


Allahle a neme  
heteungekoke homofae



The Sentani New Testament (Indonesia) for DBL

**Allahle a neme heteungekoke homofae**  
**The Sentani New Testament (Indonesia) for DBL**

copyright © 2020 Wycliffe Bible Translators, Inc.

Language: (Sentani)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source files dated 29 Jan 2022  
859ba8eb-684e-5487-b4c3-32cb1cc2f5d4

Contents

MATIUS . . . . .	1
MARKUS . . . . .	49
LUKAS . . . . .	77
YOHANES . . . . .	124
YESUSLE ABU AKO . . . . .	159
ROMA . . . . .	201
1 KORINTUS . . . . .	223
2 KORINTUS . . . . .	242
GALATIA . . . . .	255
EFESUS . . . . .	263
FILIPPI . . . . .	270
KOLOSE . . . . .	275
1 TESALONIKA . . . . .	280
2 TESALONIKA . . . . .	284
1 TIMOTIUS . . . . .	287
2 TIMOTIUS . . . . .	293
TITUS . . . . .	297
FILEMON . . . . .	300
IBRANI . . . . .	302
YAKOBUS . . . . .	318
1 PETRUS . . . . .	324
2 PETRUS . . . . .	330
1 YOHANES . . . . .	334
2 YOHANES . . . . .	339
3 YOHANES . . . . .	340
Yudas . . . . .	341
WAHYU . . . . .	343

## MATIUS

*Yesus Na Yobe Naei Kamahe Naei*

*(Luk. 3:23-38)*

<sup>1</sup> Na bere hele Yahudi kanine ro mbai nekewole na ro Yesus. Neyae Yahudi ro miyae naei yobe mbai nendo Abrahambe orona menara yeuboke, nane merau Yahudi naei Ondofolo Kaban Daudle orona mena. Allah yae nda Yesusre Wali Ondofolore ranenjendere oro umau heraweungeboke.

Yesus na yobe naei kamahe naei homone molaiko ke nda niyae:

<sup>2</sup> Abrahambe kelu Ishak,

Ishakle kelu Yakub,

Yakuble kelu Yehuda na aka baeke wa bele,

<sup>3</sup> Yehudale kelu Peresle Zerahle Tamar yae honouko ke,

Peresle kelu Hezron,

Hezronbe kelu Ram,

<sup>4</sup> Rambe kelu Aminadab,

Aminadable kelu Nahason,

Nahasonbe kelu Salmon,

<sup>5</sup> Salmonbe kelu Boas Rahab yae hongke,

Boasle kelu Obed Rut yae hongke,

Obedle kelu Isai,

<sup>6</sup> Isaite kelu Daud Yahudi naei Ondofolo Kaban.

Daudle kelu Salomo Badseba bere Uriale nekeiko ke miyae yae hongke,

<sup>7</sup> Salomole kelu Rehabeam,

Rehabeambe kelu Abia,

Abiale kelu Asa,

<sup>8</sup> Asale kelu Yosafat,

Yosafatle kelu Yoram,

Yorambe kelu Uzia,

<sup>9</sup> Uziale kelu Yotam,

Yotambe kelu Ahas,

Ahasle kelu Hizkia,

<sup>10</sup> Hizkiale kelu Manasye,

Manasyele kelu Amon,

Amonbe kelu Yosia,

<sup>11</sup> Yosiale kelu Yekhonya na aka baeke wa bele. Nebi hee Israelna ro miyae Babel ro miyae yae ikilewate, Babel kanire hauwate ewate.

<sup>12</sup> Israel Babel kanire ekate hee yae

Yekhonyale kelu Sealtiel hongkate,

Sealtielle kelu Zerubabel,

<sup>13</sup> Zerubabelle kelu Abihud,

Abihudle kelu Elyakim,

Elyakimbe kelu Azor,

<sup>14</sup> Azorle kelu Zadok,

Zadokle kelu Akhim,

Akhimbe kelu Eliud,

<sup>15</sup> Eliudle kelu Eleazar,

Eleazarle kelu Matan,

Matambe kelu Yakub,

<sup>16</sup> Yakuble kelu Yusuf Mariale molo Yesusre hongke. Nda Yesus Allah yae Wali Ondofolore oro umau heraweungeboke kiyae.

<sup>17</sup> Yesus Na yobe naei kamahe naei nemene na helen nda niyae: Abrahambe heera mewole Daudle heene, na akona akona nemene me bee oro nen keli bele (14). Daudle heera mewole Babel kanine aisayeuko ke heene, na akona akona nemene me bee oro nen keli bele (14). Nebi sului mbai Babel kanine aisayeuko ke heera mewole Yesusle heene, na akona akona nemene me bee oro nen keli bele (14).

*Yesusre Hongkate na Mekai Ma  
(Luk. 2:1-7)*

<sup>18</sup> Yesus Wali Ondofolore hongkate na mekai ma nda niyae: Yesus nenake Maria Yusuflere endere be hinainyeboke, roro miyaere namman eyeiboi mo, Allahle Roh yae aungebokene Maria emale yeuboke. <sup>19</sup> Yusuf wali himaloungeboke nekeweke aerene ro miyae helen bene febe mokonnebonde belene, Mariare maleu-maleu wae nennehinde naei merau raungehike.

<sup>20</sup> Yusuf nibi niniae mokoukoke Mariare nukennebondere. Ijongkune eungeke nebei u benene haiwole hee Allahle malaikat imene uwa yakaungeboke weunge, "Yusuf, Ondofolo kaban Daudle orona mena, Mariare rowele wae miyaere yembonde naeise wa kena wauwau wae okojiae. Rabuhine ban, Maria na kou bulu yahi buluna yale Fa ro miyae naainya ban, nebeibe Allah yae Rohle walora Mariale kou ei yahi einye aungeboke yale. <sup>21</sup> Maria Kelu Fabe hononde, Na ro Yesus yae hele roungebonde. Rabuhine ban nebei Kiyae yae hele nda kanina kelana ro miyae hole emmimolonde na beko neban mokoyatera emmifaeinyende."

<sup>22</sup> Allahle ako faeuko Naei yendo kayaalo Yesaya yae eleukoke na hului yembonde naeise nda rambun bewate. <sup>23</sup> Yesaya nda mekai a eleukoke, "Maengke yele mbai emale miyae yembonde, kelu fabe hononde.

Na ro ronainyebonde niyae: Imanuel."\*

(Immanuel na mekai: Allah aere ei haweyeume.)

<sup>24</sup> Yusuf ijongkura aunguke mo, Allahle malaikat yae imene ukeunge a hului nye hakouboke. Mariare roke nekewote. <sup>25</sup> Nebeibe hokolo bee uwa mbainye ohonoi mo meinyekokete Maria fa honoke. Allahle malaikat yae eleukoke hului nye, nebei Fa na ro Yesus yae rainyeboke.

## 2

*Naufa Mekate Kolo Yo*

<sup>1</sup> Yesus Betlehem yone hongkate hee Herodes Ondofolore Yudea kanine nekewole. Nebei hee findelau mehinin mewalora isaei hebaen bele yo naufa Yerusalem yore mewate <sup>2</sup> hinaimimeke, "Makeinye Yahudi naei Ondofolo manemfana hongkate? Maere kelemebo! Na findelau naufe reufine meuyakauboke eranneboke. Mana meyae nebei kiyaere eise molomandere baimeyannele."

<sup>3</sup> Ondofolo Herodes nane merau Yerusalemna ro miyae nebei a nanemene borowate hee na kena u isasa alalo kowate. <sup>4</sup> Ondofolo Herodes ukeumile Yahudi naei imam yun-jun bele, Musale walora wali heere foloukoke are isaeyaeiboke kelaeimi yo bele nanemene arileumihike mo hineumi, "Allah yae oro umaufe heraweungeboke Wali Ondofolo makeinye hononatare?"

<sup>5</sup> Nebei yo wainye, "Betlehem yone Yudea kanine. Nebeinye hononate yae Allah yae Na yendo kayaalo walora Betlehem naeise nda a moloukoke,

<sup>6</sup> 'Mayae Betlehem yona ro miyae

Yahuda kani honolene nekaube.

Wa yo yan na hele melae,

nebeibe Yahuda kanina Ondofolo holo erayete weyae melae ban.

Rabuhine ban, wa yo ei yan eisa Ondofolo mbai menjakambonde,

Raei ro miyae Israelle Neyae mende,

obo yoku domba kayaalo nebei domba naei be yun be yebae hebate wanen mae,

nebei ro miyae naei be yun be yebaere mensebende.' \*\*

<sup>7</sup> Nebei findelau mehinin mewalora isaei hebaen bele naufa mekate yore Ondofolo Herodes maleu-maleu wae arileumihike wa, nebei findelau meujakauboke hee hinewoumine isaeyaeinyeboke. <sup>8</sup> Nebeisa Ondofolo Herodes naufa mekate yore Betlehem yore enatere ukeumi mo a heraweumi, "Embe, nebei fa hongkate anuwau foi yae hinengkombe. Hubayengkombena bembombe mensewembe, rangkele yae erele, nebei fare be erensinende ei eremolonde."

<sup>9</sup> Ondofolo Herodeslena a boraiبوکه heera, oro molaiboke Betlehem yore ewate. Nibi nolone ewate yae findelau nau reufine erekainyele kiyae bere holo yae nebei fa nekewole anuwau ranne yauboke. <sup>10</sup> Nebei isaei bele hebaen bele yo benen findelaufe erekainyelene, rei mai sele kowate. <sup>11</sup> Nebei imaene ayeuboke nebei Fa melae nenake Mariale nekewote hubayaekoke, uwa are nihaeinyehike ei molowainye. Na run kangke wewe molaimiboke, na hili era akau era foi sele yarowate, nebei Fare kolowainye. Nebei

\* 1:23 1:23 Yesaya 7:14 \* 2:6 2:6 Mikha 5:2

rambun nda niyae: mas, kemenyan, mur. <sup>12</sup> Ondofolo Herodesle bokore ebeiboi ei naeise Allah ime walora a hun raumihike. Nebeinye nda yo na yore yande nibi hira baeboke ewate.

*Mesir Kanire Hakaikoke Ekate*

<sup>13</sup> Naufa mekate yo kulun ukate ewate hee yae, Allahle malaikat benen Yusufre imene uwa yakaungeboke weunge, "Ondofolo Herodes nebei fa baennekonde hombondere merau raungehike. Nebeinye anyu, Fa melae nenakele bele yaweimibo hakangkombe Mesir kanire embe. Nebei kanine mo nekembe, benen bembombe naeise ware a ufete."

<sup>14</sup> Yusuf aunguke, Fa melae nenakele bele yaweumiboke, nebei reniai mo kulun ukate Mesir kanire ewate. <sup>15</sup> Mesir kanine mo nekewate Herodes hereke hee yae bukaiboke Israel kanire mewate. Nda rambun bewate walora Allah yae Na yendo kayaalo Hoseale walora homone moloukoke huluinye yeuboke. Nebei a nda mekai moloukoke, "Mesir kanira Raei Kelu kaenerengkonde."<sup>†</sup>

*Herodes Ukeumi Fa-Fare Howate*

<sup>16</sup> Ondofolo Herodes isaeyuboke naufa mekate isaie bele hebaen bele yo nare ame-amebe baeyekokene ikele hele kowole. Nebeinye felayore ukeumi, "Betlehem yore embe, naufa mekate yo rainyehike ralo yakama hului beera onde ane kelu fa-fa nemene hongkombe." <sup>17</sup> Nda rambun bewate walora Allahle yendo kayaalo Yeremia yae Israel kani naeise homone moloukoke huluinye yeuboke. Nebei a nda mekai moloukoke,

<sup>18</sup> "Rime kali ayan buyan bole, Rama yora borande.

Yahudi naei yobe Israel na miyae Rahel naei orona mena na fa-fa aerene rimele.

Kena foi mokainye an,

rabuhine ban na fa-fa nundate aerene."<sup>‡</sup>

*Mesir Kanira Nazaret Yore Bukaiboke*

<sup>19</sup> Mesir kanine nekewate Ondofolo Herodes hereke mo, Allahle malaikat benen Yusufre imene uwa yakaungeboke weunge, <sup>20</sup> "Anyu, Fa melae nenakele bele yaweimibo, kulun wembe Israel kanire eme! Rabuhine ban nebei Fare baewainyele honaibondere merau kolowainye yo ninae heraiboke."

<sup>21</sup> Yusuf aunguke, Fa melae nenakele bele yaweumiboke, kulun ukate Israel kanire ewate. <sup>22</sup> Yudea kanine Arkelaus naeko Herodesle a bulure Ondofolore ranaijeke a boroubokene Yusuf buhae hokoungboke nebei kanire ei. Imene Allah yae keleungeboke huluinye, Yusuf naei Galilea kanire ekate. <sup>23</sup> Nebei kanire ekate, yo mbai na ro Nazaret, nebei yone ekainyekewate. Allahle yendo kayaalo Yeremia yae Yesusle are moloukoke na hului yeuboke. Nebei a nda mekai moloukoke, "Nare Nazaret yona ro yae enainyeronde."<sup>§</sup>

### 3

*Yohanes Bure Koumi Kiyae*

(Mrk. 1:1-8; Luk. 3:1-18; Yoh. 1:19-28)

<sup>1</sup> Ralo yakama 30 hului mainyekeukoke mo Yohanes bure koumi kiyae Yudea kanina a kala-kalane na uwa neumiyauboke ahuba huwewoumi weumi, <sup>2</sup> "Mai beko nebanda nulu kenayembe! Rabuhine ban Allah merau raungehike ya ninae nobeungeboke Naei holona ro miyae Wali Ondofolole me kelee u keleene menayorulembonde nekenate."

<sup>3</sup> Yohanesle naeise Allahle yendo kayaalo Yesaya yae a yen kolowole, weumi,

"Ro mbai a kala-kala anuwaufa kali yae kaenele weumi,

'Tuhan menderene wali nibi mokonnehambe,

yeli-yeli kayeero ijen alonnehambe.'<sup>\*†</sup>

<sup>4</sup> Yohanes na malo hirewole unta maara haikoke, na yolu ha rinewole nebei obo yoku rara mokouboke. Kesengki bele akelana madu bele anewole. <sup>5</sup> Ro miyae Yerusalem yora, Yudea kanira, nane merau Yordan Wi kelaunga yo honatera Yohanesle bokore hokoumeke. <sup>6</sup> Nebei ro miyae hokoumeke Yohanes yae uwoumi ane boraiboke. Na me u beko mokowatere wo kaikoke yore, Yordan Wine Yohanes bu kowoumi.

<sup>7</sup> Yahudi era henare na bereise eraimi holo mbai Farisi yae ro raimiboke yo nane merau nulu yo mahe yora benen ewaleiboi are kelaemi Saduki yae ro raimiboke yo helen sele bure kowoumi anuwaufe mekate. Nebei yo erekeumine Yohanes yae weumi, "Mayae rami ehakei wanen hangkei, faeu kai bee. Allah mare ehee bukulu inyembombe belene mai walire himalonnebombe naeise, nde yae mare angkaa

<sup>†</sup> 2:15 2:15 Hosea 11:1    <sup>‡</sup> 2:18 2:18 Yeremia 31:15    <sup>§</sup> 2:23 2:23 Yeremia 31:15    <sup>\*</sup> 3:3 3:3 Yesaya 40:3

yobombokembe? <sup>8</sup> Mai wali beko nebanda nei huwayembokembena, na ani nebei suluinye mai u mekai wa mekainye kelembe. <sup>9</sup> Mai uware menaeijae bumane kaeube wa elaube, 'Meyae Abrahambe orona mena yo.' Nebei aerene mayae u bene nekayembe Allah mare Naei ro miyaere me baele. Reyae wamale, nda ruka yoni-yoni honatera Allah na hului Abrahambe orona menare weumile yaeiboube! <sup>10</sup> Nda hee ramekahu o kambu kelaeunge relahi mokounglake. O anire omokoi yo nemene kahende balenake, inye hayende hukulenate. Nebei sului mbai Allah yae Naei kenare kole me u omokoi ro miyaere ehee bukulu yemmile."

<sup>11</sup> "Mai wali nei huwembokembe iwau naeise Reyae mare bu yae kamale. Raei moisa mende Kiyae Allah yae Nare uwa keteungebokene naei oro mehau kaerebondere Reyae yeisi raeiboi ban sele. Nebei Kiyae Niyae ro miyaere Allahle Roh hawemmile, nane merau i naumene rambun hibate wanen mae a elae elende walora ro miyae kena u einye mokommile. <sup>12</sup> Kayeere wahende naei hiloi kaban Na mene rouke gandumde arilendere. Ani yo naei fale einye kolonde, rebauka yoni-yoni i na hibi mo beyele nebei nolone ensayengkonde hukulenate. Nebei sului mbai Allah yae ro miyaere mokommile."

*Yesus Yohanes yae Bu Koungboke*

(Mrk. 1:9-11; Luk. 3:21-22)

<sup>13</sup> Yohanes yae bure konnebondere, Yesus Galilea kanira Yohanesle bokore Yordan wire eke. <sup>14</sup> Yohanes na melihau fele erewoungene weunge, "Weyae rare bu korebomae ya! Na man ban sele reyae Ware bu koreibotere mewoyae."

<sup>15</sup> Yesus yae weunge, "Reyae wawale huluinye yeubo. Nebei mekai yaere Allah Naei kenare kole huluinye haraungeboke ma nanemene eyae hakomabonde." Yesusle ane Yohanes hakouboke.

<sup>16</sup> Bu koungboke mo, Yesus yeukiteke. Nebei hee yaku wewe koukoke Yesus erele Allahle Roh aye merpati wanen mae nauwa rande oke. <sup>17</sup> Yakura nda a wanen mae elele, "Nda niyae kena buhaere haenale Kelu, Ra kenare foise mokoyeufe Kiyae."

## 4

*Walobo Yun Yesusre Wabewoung*

(Mrk. 1:12-13; Luk. 4:1-13)

<sup>1</sup> Yesusre bu koungbokera, walobo yun mae umalire hubannehinderene Allahle Roh yae Yesusre yaweungehoke, a kala-kala anuwaufe ekete. <sup>2</sup> Ya rorele u bee reniai bele rai bele raman aneikoi mo meunkeukokene, Yesus moni hele hubawoung. <sup>3</sup> Nebei hee yae walobo yun meke mo Yesusre weunge, "Weyae na hele Allahle Keluna, mana nda ruka yoni-yoni honate weimi, 'Ramande yaeibo.' "

<sup>4</sup> Nebeise Yesus yae weunge, "Allahle homofaene nda wanen mae molaikoke, 'Ro miyae raman elae me wali enekei, Allahle Naei a elelere hakate walora ro miyae na hului walire nekenate.' " \*

<sup>5</sup> Nebeisa mo walobo yun Yesusre yaweungehoke Yerusalem yone Allahle ei mom-mom imae na kaban sele kiyae naei mali ranne haungeboke wa <sup>6</sup> Yesusre weunge, "Weyae na hele Allahle Keluna, mana honoinyihi are oyo. Waei naeise Allahle homofaene molaikoke,

'Woro rukane oungende belene

Allah Na malaikat yoni-yonire weumile na me hirenaibonde

Ware hole molonayeibote.' " †

<sup>7</sup> Yesus yae walobo yunde weunge, "Allahle homofaene nda wanen molaikoke, 'Allah waei Tuhan Nare weyae umali ehubainyemae!' " ‡

<sup>8</sup> Nebeisa walobo yun kiyae Yesusre yaweungehoke elu mbai buma hosoro helere ekete. Nebeise ekete wa, Yesusre nda kani kelana yo yan na one hengko bele nemene kelewoung. <sup>9</sup> Walobo yun mae weunge, "Weyae raei bene uwa are niheungehinde ei moloufobondena, nda kani kelana yo yan ereyae nemene Ware mo kinyerete hakerete."

<sup>10</sup> Yesus yae walobo yunde a elae lon mae haungeboke weunge, "Walobo, raei bera nundeye howaleye! Allahle homofaene nda wanen molaikoke, 'Allah waei Tuhan, ei moloungelane nane merau Naei a elele mo hakoungel!' " §

<sup>11</sup> Walobo yun moise keungehike. Malaikat yoni-yoni mekate Yesusre ei mekaisauwainye.

*Yesus Galilea Kanine Huba Raweuboke A Foi Faeu Foi Ahuba Huwoumi*

(Mrk. 1:14-15; Luk. 4:14-15)

\* 4:4 4:4 Ulangan 8:3 † 4:6 4:6 Mazmur 91:11-12 ‡ 4:7 4:7 Ulangan 6:16 § 4:10 4:10 Ulangan 6:13

<sup>12-13</sup> Yesus Nazaret yone nekewole hee, Herodes yae Yohanes bure kowoumi kiyare kawane heungekoke a boroke hee Nazaret yora kulun uke Galilea kanina yo mbai na ro Kapernaum Galilea bukoba enene honolere yae eke. Na bere Zebulonbe Naftalile rore rowaimi kani ranna. <sup>14</sup> Allahle yendo kayaalo Yesaya yae eleukoke a na hului yembondere nebei kanine Yesus ekenekevole. <sup>15</sup> Yesaya nda a mekai moloukoke, “Zebulonbe Naftalile kani Galilea bumoko wai reufina nate. Naubure ende nibi naei kani Yahudi ban ro miyae nekate anuwau.

<sup>16</sup> Nebeinya ro miyae ouben hauben nolone,

rabuhine ban Allahre isaeyeiboi nekeimeyate.

Nebeisa Allah Naei a foi faeu foi kelemmile wali nibi foi naeise.

Nebei a faeu hehe wanen

nebei ouben haubenne hehe enaibolombonde.”\*

<sup>17</sup> Nebei heera Yesus huba raweuboke ro miyaere huwoumi weumi, “Ma u mekai beko mokoyauberu nei hungembe, uwa olomombe. Rabuhine ban, Allah merau raungehike ya Naei ro miyae Raei me kelee u keleene menayorulembonde nekenatere nobeungekokene.”

*Yesus Na Moisa Oronate Yore Eleukoke*

(Mrk. 1:16-20; Luk. 5:1-11)

<sup>18</sup> Kapernaum yone nekewole hee, ya mbai Yesus Galilea buhaeisa oroweke mo, kare baete ro bee naekale nauwakele wau wae kane baewote erekeumi. Nebei ro bee na ro niyae: Simon, Petrus yae raiboke kiyaele, Andreas bele. <sup>19</sup> Yesus hokolo beere weumi, “Mebu, Rare meisehakoko. Reyae elae isebe. Nebei elae walora mayae ro miyaere baemile Raei me kelee u keleene menayorulembonde nekenate. Kare baeube wanen mae nebei ro miyaere baebebe.” <sup>20</sup> Nebei a boroibokene, na hibi hele na ka baei-baei kalia nukeiboke, Yesusre hakoinyekoke.

<sup>21</sup> Yesus nebei bee bele oro molaiboke ewate mo, benen ro bee naekale nauwakele hubayaeikoke. Nebei ro bee Zebedeusle kelu wa na ro: Yakobusle Yohanesle. Hokolo bee naeko Zebedeus bele naei kai einye wau foinye mokowate. Nebei ro beere Yesus nane merau kaeneumikoke. <sup>22</sup> Hokolo bee na hibi hele na waka nukeiboke, nane merau naekore nukeinyeboke, Yesusre hakoinyekoke.

*Era Yo Buloo Yo Onomi Yarowate*

(Luk. 6:17-19)

<sup>23</sup> Yesus Galilea kani yanewole na Allahre ei mom-mom imae hine hine ro miyaere nda a foi faeu foi huwoumi: Allah merau raungehike ro miyae Raei me kelee u keleene nekenatere wali hena bona inyemile. Nebeinya ro miyae era buloo na mane-mane kowate yore Yesus onomi iwoumi. <sup>24</sup> Erana buloona yore Yesus onomi iwoumi a Siria kanire eungeyobokoke. Erana buloona yo na mane-mane bele, u buhae kaban kowate yo bele, alo yae hawaimiyeke kayeke yo bele, u rani-rani kate yo bele, oro mere nimewaimi yo bele, Yesusle bokore onomire yaronatere yauwaimi mewate. Yesus na hibi nebei yore onomi iwoumi. <sup>25</sup> Ro miyae helen sele Galilea kanira, Dekapolis kanina yo me bee yora, Yerusalem yora, Yudea kanira, nane merau Yordan wi reufira mewate Yesusle moisa mo hakowainye.

## 5

*Yesus Mokone Huweumi Ahuba*

<sup>1</sup> Nebei ro miyae helende Yesus erekeumi hee, mokore yae Yesus ike, angken nuweuboke hee yae na moisa orowate yo Naei bokore mekate. <sup>2</sup> Yesus huba raweuboke kelewoumi weumi,

<sup>3</sup> “Ro miyae naei u mekai beko mokoyelera roiboyoungera alonnehandere, Allah mbai yae na hului hakonnebonde naeise isaeyeiboyele ro miyae onomi foka hubannende.

Nebei ro miyae Raei me kelee u keleene nekate holona ro miyae yae me baerebonde.

<sup>4</sup> Ro miyae naei u mekai beko mokoyelera roiboyeungene kena beko koyele kiyae onomi foka hubannende.

Allah nebei holonare kena foi u foi mokommikonde.

<sup>5</sup> Nauwa ro ban elele kiyae nane merau Allah weunge a hului rilibo ban olomo narulu ban u mekai ma nekende ro miyae onomi foka hubannende.

Allah yae nda kani kela nebei yore kinyemmile hakemmile.

<sup>6</sup> Wali himalonnebondere kena haehae koyele kiyae, neyae onomi foka hubannende.

\* 4:16 4:16 Yesaya 9:1-2



Nebei kiyaere wali himalonnebonde naeise Allah yakannebonde.

<sup>7</sup> Yanekoi yase bele kiyae, neyae onomi foka hubannende.

Allah nare yanekoi yase yae ei hawennele.

<sup>8</sup> Ro miyae naei kenare kole bele Allah naei kenare kole bele na hului mbainye orole kiyae, neyae onomi foka hubannende.

Nebei holona ro miyae Allahre ijoko enainyerende.

<sup>9</sup> Ro miyae mbai hiwa yo naei yokeijo belere foi mokoyeumi kiyae, neyae onomi foka hubannende.

Nebei holona ro miyaere Allah Naei kelu omi yae kaenemmile.

<sup>10</sup> Allah Naei a elelere hakoyeunge aerene weitasi koyainye kiyae, neyae onomi foka hubannende.

Nebei ro miyae Raei me kelee u keleene nekate holona ro miyae yae me baerebonde.

<sup>11</sup> Mare Raei aerene a beko yae ungayembe, mare weitasi konayembe, nane merau na hele ban a beko yae aukaka konayembe, nebei mekai ma mokonayembena, onomi foka hubannembe. <sup>12</sup> Mayae rei yae mai yae kombe, rabuhine ban Allah surgana mai me buhae kaban mokoungahake. Mare u mekai beko mokayembe nebei sului mbai Allahle yenjo kayaayo holonare na bere mokowaimile ma mbai.

### *Hae Bele Isehe Bele*

(Mrk. 9:50; Luk. 14:34-35)

<sup>13</sup> "Hae raman einye yuweiboyole wanen mae nda kani kelana ro miyae naei wali einye mayae foi mokomiyembe. Hae naei han faennekondena nebei han benen emerei boi sului. Nebei hae rabuhi ban yeubokene, hainyaikonde ifau wanen nendon mae ro miyae ele mele na ranne oronate.

<sup>14</sup> "Nda kani kelana ro miyae bene mayae hehe wanen naeukoke nekaube. Moko ranne hebate yo yande naeungekoke isehe faunge nekate ro miyae nanemene na hului erenate.

<sup>15</sup> Hehe mokonnebonde ro miyae na hului ijoko erei-ereise erenate. Ise releikoyeunge boloi siyele ro miyae nebeisa helai yae obumboi. Nebei imaena ro miyae nanemene hehe naemmikonderene bende anuwaunge ambonde hele. <sup>16</sup> Nebei sului mbai, ro miyae bene mai me u foi mokombe. Nebei me u neyae hehe merau erenate. Mai me u foi mokombene, mai Ako surgana ekenekele Kiyaere buma enainyekolonde.

### *Musale Walora Wali Heere Foloukoke Naeise*

<sup>17</sup> "Musale walora wali heere foloukoke bele Allahle yenjo kayaayo homone molaikoke belere hororebonde naeise mekale bene yae enekeijae. Naeinya hesele na mekai na haraungebokere kelerembobere mekale. <sup>18</sup> Reyae nana heselebe mare wamale, nda yaku bele kani kela bele ainyundeuboube hororebe, nebeibe Musale walora wali heere foloukoke homona molaikoke a nemene fomene honnate nda kani kela huba menmemokongkonde heene. <sup>19</sup> Nebeinye nde yae Musale walora wali heere foloukokena berei ban sele are horombonde nane merau nebei horoubokere hiwa yo mokonatere kelemmilena, nebei ro raei me kelee u keleene nekate holone ro ban sele yae me baerebonde. Nebeibe nde yae nebei rabuhi ban sele are hubara haeisa yanennele nane merau hiwa yore nebei sului hakonatere kelemmilena, nebei ro Raei me kelee u keleene nekate holone ro bele holona yae me baerebonde. <sup>20</sup> Reyae mare wamale, Farisi holona yo bele Musale walora wali heere foloukoke are isaeyaeiboke kelaeimi holona yo bele naei wali himalonainyelere Musale walora wali heere foloukoke hakoyainye. Nebeibe nebei wali nibi yae wali ehimaloiboi sului. Mayae Raei me kelee u keleene nekate yo holonare emembobere mai wali himalonembomberena, Raei a elerelere hila rabo halembe hele. Nda wanen maere mai u mekai Farisi holona bele Saduki holona bele yo naei wali moi wommiyombe.

### *Ikele Romou*

(Luk. 12:57-59)

<sup>21</sup> "Musale walora wali heere foloukokena ma haraungebokere Yesus yae kelewoumi weumi, 'Mai yobe naei kamahe naeise nda uwaimile a mayae boroimeyaube: Ro miyae ohoijae! Ro miyaere hombonde kiyae, na walire ro miyae hului ranainyehinde ehee bukulu inyainyele.' <sup>22</sup> Nebeibe Reyae mare wamale, naendae wanen horo ro mbai na aka baekere ikele mo konendena, nebei kiyae naei walire ro miyae hului ranainyehinde ehee bukulu inyainyele. Nebei sului mbai nde yae na aka baekere a haufau okonnekonde, nebei kiyae naei wali Yahudi naei yoyo koseyo hului ranainyehinde ehee bukulu kaban hainyainyele. Nde yae na aka baekere a haufau okonnelena, nebei kiyae naei walire Allah yae hului rannehinde, narakana i kaban beyelene wononde.

<sup>23</sup> “Nebei aerene weyae Allahre ei mom-mom imaere na ongkou felate itukai rande wa hili era akau era Allahre yeungelere ekae yae bene nekeufikete wa aka baeke ware na kena eisa ikele kotena, <sup>24</sup> nebei hili era akau era itukai bene nukeubonde hononate, beufonde ele wa aka baeke bele foi mokokobe. Nebeisa mo Allahre ei mom-mom imaere ele, wa hili era akau era Allahre buma eungekolonde.

<sup>25</sup> “Wa yokeijo mai ikele koube rambunde ro miyae bene a faeu yakangkonderena, u hasale yae foi mokokobe. Nebei omokoiboinya, nebei yokeijo ware are hokate ro naei me eise kinyeneibote benen ikilenayeikote na kayaa yore inyemmile ware kawane ahenayeukonde bele. <sup>26</sup> Na helebe Reyae wamale, Kawa einye ahenainyekonde, na roi hului aheikoi ebaeisoinya, weyae nebei kawara emeituweii sului.”

*Me Beko U Beko Naei A Usaei*

<sup>27</sup> “Mai yobe naei kamahe naeise nda ukaimi a mayae boroimeyaube, ‘Ro hi naei miyae bele uwa mbainye eisonoijae.’ <sup>28</sup> Nebeibe Reyae mare wamale, ro nde yae miyae maengkere ijokone mo erenende yae u beko naeise na kenara ura rowenehindena, nebei ro nebei miyae maengke bele uwa mbainye honoikoke. <sup>29</sup> Na hului nda wali nekandene ijoko mbai era buloone elaekei sele konde. Na foi sele nebei ijoko mbai keleufinde, ijoko bee yae euferende belene. Nebei sului mbai weyae na hului u bene beko nekenayetene, weyae rambun beko ijoko yae ereubonde. Naei foi sele waei u bene bekore herawewende, weyae narakare ele belene. <sup>30</sup> Nane merau me mbai na hului era buloo elaekei sele konde. Na foi sele nebei me mbai neufande, me bee yae euferende belene. Nebei sului mbai weyae na hului u bene beko nekenayetene waei me yae beko mokoubonde. Naei foi sele waei u bene bekore herawewende, weyae narakare ele belene.

*Miyae Hureyaimi Naei A*

*(Mat. 19:9; Mrk. 10:11-12; Luk. 16:18)*

<sup>31</sup> “Mai yobe naei kamahe naeise nda ukaimi a mayae boroimeyaube, ‘Ro nde yae na miyaere nennehinderena, neyae homo molongkonde nare yennele hele. Nda homone yakambonde nebei miyae naei ban.’ <sup>32</sup> Nebeibe Reyae mare wamale, ro mbai na miyae ro hi bele uwa mbainye ohonoibe, nebeibe nennehindena, nebei ro mokoungboke naei miyae u beko mokonde. Nane merau ro nde yae neungehike miyaebe rowendena, neyae u beko mokouboke, ((rabuhine ban Allahle ro be ro yoinye nebei miyae bena ro bele naei miyaere yeubokene.))

*A Holo Koi-Koise*

<sup>33</sup> “Mai yobe naei kamahe naeise nda ukaimi a mayae boroimeyaube, ‘Weyae a holore koukokae rambun asasi okoijae. Allahle ro randa a holo koukondena, na hibi yae mokoubonde.’ <sup>34</sup> Nebeibe Reyae mare wamale, a holo nendon okoijae. Surga ro randa a holo okoijae. Rabuhine ban surga Allah Naei kendan wamerande yeuboke. <sup>35</sup> Nane merau kani kela ro randa a holo okoijae. Rabuhine ban kani kela Allah Naei oro hensan anuwau. Nane merau Yerusalem ro randa a holo okoijae. Rabuhine ban Yerusalem Ondofolo kaban Allah Naei yo yan. <sup>36</sup> Nebei sului mbai waei uwana yun randa a holo okoijae, rabuhine ban waei yunna umaa mbai sambai keleumonde yembonde nane merau nokommon mare yembonde naeise weyae omokoiboi sului. <sup>37</sup> Na fokai fere weyae ‘ehée, niyae ban’ eleukondena, nebei a huluinye mokoubonde hele. Waei a eleyae Allah yae nemene fomene boroyele. A helen baraumilena, nebei a walobo yun belera mate.

*Mai Yokeijo Bele Nekembe Wali Ma*

*(Luk. 6:29-30)*

<sup>38</sup> “Mai yobe naei kamahe naeise nda ukaimi a mayae boroimeyaube, ‘Ijoko na ijoko yae beneikonde, heraa na heraa yae beneikonde.’ <sup>39</sup> Nebeibe Reyae mare wamale, mare bekore mokonayembe yore beko yae ebeijae. Nde yae wa kahu meube reufi ungetena, waeungehinde meli reufi bele ungete. <sup>40</sup> Nde yae hakimde bokore waei ei malo hireyae aerene yaungeufonde ebena, waei moi malo hireyae bele nare yeungele. <sup>41</sup> Nde yae ware kilometer mbai yae mo hakoungbonde ebe naeise elae hele molonetena, weyae kilometer bee yae nare hakoungbonde. <sup>42</sup> Ro miyae waeinya rambun rinyayetena yeumiyende. Nane merau ro miyae waeinya rambunde rinyeisite ya hire menahengkondere ungetena, ahi eweijae hele.

*Mai Yokeijore Kena Buhae Hemmile*

*(Luk. 6:27-28, 32-36)*

<sup>43</sup> “Mai yobe naei kamahe naeise nda a ukaimi boroimeyaube, ‘Wa kena buhae u buhae mangkele ya-ya wali nibi mbaise oraube yore mo heumiyende, wa yokejore ikele yae koumiyende.’ <sup>44</sup> Nebeibe Reyae wamale, ma yokejore buhae hemmiyembe, nane merau ro miyae mare weitasi koyayembe yore Allahre riyennehimbe onomi foka yae ei hawemmile. <sup>45</sup> Nebei mekai yaere mai Arai Allah surgane nekele Kiyaele kelu omire yembombe. Rabuhine ban ro miyae wali foi nekeyate, wali beko mokoyate nanemene Allah waesiyeyumi hu naekoyeyumi. Nebei sului mbai wali himalainyeboke yore, me hila u hila bele yore Allah waesiyeyumi ya rileyeyumi. <sup>46</sup> Ro miyae kena buhaere haeyembe yore mo mayae kena buhae hemmilena, rabuhi ban yeuboke! Nebei u mekai ma mbai pajakre yoko bele riyaimi yo mokate lonbe. <sup>47</sup> Nane merau mayae ro melaeyeiboise mai aka baeke ware mo a melaeyaumina, rabuhi ban yeuboke! Ro miyae Allahre oroibo wanan nekeyate yo nebei sului mbai mokoyate lonbe. <sup>48</sup> Nebei aerene mai Arai surgane nekele Kiyae naei wali nekele ma, mayae nebei sului mbai wali himalennebombe hele.”

## 6

### *Hun Ban Wai Ban Yore Hakomamile Naei A Usaei*

<sup>1</sup> “Kayaa hebembe, mai me foi u foi ro yae miyae yae ijokore erenayembe naeise omokojiae. Rabuhine ban ro miyae erenayembe naeise mokombena, Arai surgane nekele Kiyae mai roibu eyei.

<sup>2</sup> “Nebei aerene ma hili era akau era hun ban wai ban yore yemmiyembena burelen mae oboyeijae. U mekai beere oroyate yo yae nebei me ma u ma mokoyate. Ro miyae nare be hinenaimile naeise Allahre ei mom-mom imaene naei me u mokatere amin mae raneiboyate burelen eibowate nane merau nibine ane huweyaimi. Reyae na helebe wamale, nebei ro ma miyae ma na roibu nemene ninae yaraikoke. <sup>3</sup> Ma hili era akau era hun ban wai ban yore waheyaumi heene, a ban ma mokombe, meube me yae yeumiyayumi, meli me isian wanan mae mokombe. <sup>4</sup> Mai me foi u foi mokaube nunne-nunne mokombe. Mai Arai nunne mokaubere erembene ma roibu wahanembe.

### *Ebeli Boi-Boi Naei A Usaei*

*(Luk. 11:2-4)*

<sup>5</sup> “Allahre ebelire bonnele hee, u mekai beere oroyate yo naei u mekaise ehakojiae. Nebei yo na kena hele eikowate Allahre ei mom-mom imaene nane merau ro miyae helen orate nibi kainye aufae yae hebeiboyate, ro miyae yae ijokore erenaimilere ebeli eibowate. Reyae na helebe wamale, nebei yo na roibu ninae yaraikoke. <sup>6</sup> Weyae Allahre ebelire boungehinde hee, wa u mbai yae yowa eise eweufinde, romau ahunekonde, Arai ereibo Kiyaeere ebeli boungehinde. Wa me u nunne mokoyaere waei Arai yae erete nane merau roibu inyete. <sup>7</sup> Allahre onaeinye yo yae molate wanan mae waei ebeli einye a mbai mo eibeko meibeko ebeijae. Neyae u bene nekaimi a eibeko meibeko yae benaimilene naei ebelire bainye kiyae yae borommibonde. <sup>8</sup> Nebei yo naei u mekai wa mekainye ehakojiae. Rabuhine ban, mai wali rambun namman eriyeisi mo mai Arai na bere isaeyeboke. <sup>9</sup> Mai ebeli nda wanan mae bonnele, ‘Arai surgane nekeyae,

Waei ro nene waewae hele yae mokomayewende.

<sup>10</sup> Ro miyae Waei me kelee u keleene nekate yo yan meinyeibo.

Waei kenare koyae surgana wanan

nebei sului mbai nda kani ran kela ranne mokommikonde.

<sup>11</sup> Maei raman mana ya naeise maere na hului yae yeumele.

<sup>12</sup> Maei beko neban faeinyeumeko,

meyae hiwa yo naei beko neban mokaimekokere u bene nundaimekoke wanan mae.

<sup>13</sup> Maere wabenaimile hee, ei haweumele

meyae ane nalemmihinde balemale belene.

Walobo yun, bekore mokole kiyaele me ei u eisa hole moloumebonde.

((Rabuhine ban Waei me kelee u keleene ro miyae nemene nekenate. Elae wake nane merau one hengko bele Waei einye huba ban haei ban ninae hononende.

Amin.))\*

<sup>14</sup> Ro miyae hiwa yo yae mare beko mokayengkokembere mai u benene nundem-mikombena, mai Arai surgana nebei sului mbai mai bekore faeinyenembombe.

<sup>15</sup> Nebeibe, mayae hiwa yo naei beko mare mokayengkokembe u benene enundeikoinya, mai Arai nebei sului mbai mai me u beko mokaubere efaeinyeibo.

\* 6:13 6:13 Nane reufi ( ) homofae hena hiwa barainyekoke hiwa ebaraioki.

*Eraman Yarele Me Heiboyate Mon Naei A Usaei*

<sup>16</sup> “Mayae mai kena huluinye yarele me hembombe hee, ma be yoi u mekai beere orate yo yae kena bekone kate mokoiboyate wanen mae enekeijae. Nebei yo ro miyae erenaimile naeise yarele me heiboyate mom nekate be yoi baeinyehoke. Reyae na helebe wamale, nebei ro ma miyae ma na roibu nemene ninae yaraikoke. <sup>17</sup> Nebeibe mayae yarele me hembombe mon nekembena, ma be yoi nondon ma erenayembe naeise bu yae hobengkombe nane merau ma yunne minyak yae hengkombe. <sup>18</sup> Nebei wanenne ro miyae isian mayae yarele me heiboyaupe mon nekaube naeise. Mai Arai ro miyae yae erei boi Kiyae mai me u nunne mokaubokere Neyae ijoko erenembe. Neyae mai roibu wahenembe.

*Eba Naei He Naei A Usaei*

*(Luk. 12:33-34)*

<sup>19</sup> “Eba he nda kani ran kela ranne waei u mbai naeise arileyejiae. Rabuhine ban, nda kanine oyaya bele ehi bele rambun-rambunde bekore mokate, nane merau yokoyo yae honate anuwau kelarenaibonde. Nebei rambun yoko yae yaronaikonde. <sup>20</sup> Nebei aerene naei foi sele mai eba he surgane kolon, rabuhine ban oyaya bele ehi bele bekore omokoiboi sului, nane merau yokoyo yae ekelaiboi. Nebei rambun yoko ebaeikoi sului. <sup>21</sup> Rabuhine ban waei ebare here honnayete anuwaunge, waei kena u nebeinye.

*Kena U Einya Hehe*

*(Luk. 11:34-36)*

<sup>22</sup> “Mai kena una hubaunge mai ijoko wanen mokoikoyole. Rambun na foi reufine mo eremembena, hehere erembe wanen mai u bene foi nekenayembe yae nekemembe. <sup>23</sup> Rambun na beko reufine mo eremembena, ouben hauben erembe wanen u bene beko nekenayembe yae nekemembe. Mayae u bene beko na hibi-hibi nekenayembena, mai kena une beko mo nekemembe.

*Allah bele Eba He bele*

*(Luk. 16:13; 12:22-31)*

<sup>24</sup> “Ro miyae mbai rowa bee naei yebaei bubaeise eyeiboi sului. Rabuhine ban hire ikele yae konnele, hire buhae yae hennele. Nane merau hire mo boronnele, hire oboroi. Allah Naei a elele hakombombe bele roise abunembe kena roungensimbe bele na beene na kulun mbainye mayae omokoiboi sului.

<sup>25</sup> “Nebei aerene Reyae wamale eraman bu, malo, nda wali nekemale rambunde buhae ohokojiae. Allahle ro be ro yoinye aei wali nekemale ma na bereise aei wali rambunde. Raman bele malo bele Allah na foma-foma mokommihande. <sup>26</sup> Eremmi, aye bumana o haka eheraeyeyei, ani era emaluyei, ufeyei heke falene okoloyei, nebeibe mai Arai surgane nekele Kiyae na hibi-hibi nareyeumi. Nebei aye yoni-yonira mare na bereise yae Allah erembe. <sup>27</sup> Nde mai nolona buhae-buhae koyele walora na hului hukai mbai na wali baraungeboke heki meungeyoboukoke?

<sup>28</sup> “Nane merau rahene hirembe naei malo aerene buhae hokombe? Akelana arokou hebate ereibo buleibo konne, me ban u banbe baengko fereisayeunge. <sup>29</sup> Nebeibe Reyae mare wamale, Ondofolo Salomo one bele hengko bele ketewainye hororebe na malo bae Allah arokoufe hiyei raneungeboke ma ehireikoi mo. <sup>30</sup> Nebei mekai mbai yae Allah akelana arokou na foi bele keteumiboube hororebe mana ya hebele wahenare i ranne hayeikoube, hila rabo kalore moloyembe hororebe, Allah mare emekai bele yae kitenembombe. <sup>31</sup> Nebei aerene buhae ohokojiae, nda a mekai eleijae, ‘Rahe raman mae anemale? Rahe bu yae anemahinde? Nane merau rahe malo yae hiremale?’ <sup>32</sup> Nebei rambun yoni-yonire Allahre oneyainye yo yae hineyate baeyate. Mai Arai surgane nekele Kiyae naeisaei sele mai walire nebei rambun yoni-yoni nemene baeyaube mo. <sup>33</sup> Nebeibe Raei me kelee u keleene nekate holonare me baenembombere relennekombe nane merau Raei a elalere hakongkombe rambun na bemere hele. Mai wali rambun nemene bararembe. <sup>34</sup> Nebei aerene wahena ya naeise buhae ohokojiae. Rabuhine ban wahena ya maei kena bekore mokommele rambun nanaei. Ya mbai buhaere hokoyembe rambun na hului yae benayende.”

## 7

*Hiwa Yo Naei Bekore Hului Okolijae*

*(Luk. 6:37-38, 41-42)*

<sup>1</sup> “Weyae hiwa yo naei bekore hului okolijae, waei bekore hului ranayeisite bele. <sup>2</sup> Rabuhine ban, hiwa yo naei bekore hului kolamae, nebei wanen mbai waei bekore hului ranayeisite. Hiwa yo naei rambunde hului kolamae wanen nebei sului mbai ware

mokonayete. <sup>3</sup> Rahe londe waka baেকে wali na beko reufire mo a eleyae nebeibe waei wali naeise weyae erei boi! Nda hului mbai waka baেকে na ijokona kerende mo ereyae, waei ijoko einya o male aheukokere weyae isian nekeyae! <sup>4</sup> Naendae wanen lon mae waka baekere wanae, 'Mei, wa ijokona keren don reyae roufe,' nebeibe waei ijokona o male bae na hibi mo honoimeyete? <sup>5</sup> Weyae u bee-beere koyae kiyae! Na bemere waei ijokore aheukokete o malebe weinye. Wa ijoko yoloneukonde mo, nebeisa waka baেকে ijokona keren weyae rowele.

*Allah Naei Rambun Wahei-Waheise Isaei Hebaen*

<sup>6</sup> "Allah Naei ako faeuko rambun foi sele moi sele nau buna mutiara wanen mae yeuboke. Nebei ako faeuko obo yoku u mekai wanen ro miyaere ehuweijae. Obo mutiara ranne nendon oro aleikoyate wanen mae nebei yo yae Allah naei ako faeukore a beko elenate. Yoku benaibonde ware akenayeikote waei uwa fo bee-bee raungayeikote wanen mae neyae ware a yae horonayete.

*Allahre Rambun Riyennehimbe Na Mekai*

*(Luk. 11:9-13)*

<sup>7</sup> "Mai kenare kaube rambun inyengkamberena, na hibi mo riyennele. Mayae ereibo rambunde hubayengkamberena, na hibi mo baembe. Me kaba-kaba bonnelena, romau mare raungembombe. <sup>8</sup> Rabuhine ban nde yae riyende kiyaere yennele. Nde yae baende kiyae, hubainyekonde. Nde yae me kaba-kaba bonde kiyae, romau raungembonde.

<sup>9</sup> "Ako nde mai nolona nekele na kelu feufe riyewoungebe ruka yae ikeunge, <sup>10</sup> nane merau kare riyewoungebe rami yae ikeunge? <sup>11</sup> Mayae beko bele neban bele yo maisaei nekaube ma kelu omi riyayembere foi bele moi bele rambun yeyaumi. Na kaban sele mai Arai surgane nekele Kiyae foi bele moi bele rambun Nare riyeyainye yore yeyeumi.

<sup>12</sup> "Me naei u naeise mai kenare kaube huluinye ro miyae mokonayemberena, nebei sului mbai hiwa yore mokomile. Musale walora wai heere foloukoke homo bele, Allahle yenjo kayaayo naei homo bele, nebei a na no niyae.

*Wali Kayaa Hebemale Naei A Usaei*

*(Luk. 13:24)*

<sup>13</sup> "Raei a elalere hakoyate romau melaera enayembonde nibi kikira orate wanen. Wali nibi hi kiyae kaeu mau molaimiboke na romau kaban. Romau kikira eweufinde. Rabuhine ban, romau kaban bele nibi kaeu mau bele bekore eke nibi, ro miyae helen sele nebei nibira hakaikoke ate. <sup>14</sup> Nebeibe romau melae bele nibi kiki bele nebei wali henare ate nibi niyae. Ro miyae na hangka hele nebei nibi aisubayekoke.

*O Ha Na Ani*

*(Luk. 6:43-44)*

<sup>15</sup> "Ame-amere yanate yenjo kayaayore kayaa hebembe. Mai bokore domba wanen kena nime haba menatebe, serigala wanen hangkei sele. <sup>16</sup> Na u mekai wa mekai kelenatera mayae nebei yore rommibombe. Ro yae miyae yae isa bele nora anggur ani ohokoiboi. Nane wanen fonom bele kaiwa bele nora ara ani ohokoiboi sului. <sup>17</sup> O rimi-rimina ani foi mokonde. O beko na ani beko mokonde. <sup>18</sup> Na hului ban sele o rimi-rimi kiyae ani bekore omokoi sului, nane merau o beko kiyae ani foise omokoi sului. <sup>19</sup> O ha ani foise omokoi yo, kahenate i tanne hainyate. <sup>20</sup> Nebei sului mbai ame-ame yae yanate yenjo kayaayo na u mekai wa mekai kelaetera mo mayae rommibombe.

*Allah Naei Holona Ro Miyae Hele*

*(Luk. 13:25-27)*

<sup>21</sup> "Ro miyae nde yae Tuhan mae kaenensele aerene mo raei me kelee u keleene nekate yo holone eyeisi. Naeinya hesele nde yae Maeko surgane nekele Kiyae kenare kole huluinye mokonde kiyae na hului enensinde. <sup>22</sup> Huba mokoikoi ya mendene, ro miyae helen sele Rare ungaisele, 'Tuhan, mayae ro miyaere Waei ro yae kelewammile, buloo walobore Waei ro yae hukewammile, nane merau rambun emere-emere Waei ro yae mokowandebe ya!' <sup>23</sup> Nebei hee Reyae na yaka yae ufemile, 'Reyae mare onaemale. Mayae bekore nebande mokoyaube yo, Raei bokora felande yae eme!'

*Imae Haete Ro Bee*

*(Luk. 6:47-49)*

<sup>24</sup> "Nebei aerene ro miyae nde yae Raeinya a faeu elalere borole na hibi me yae u yae mokoimeyete kiyae, nebei kiyae isaei hebaen bele ma yae uwa haraungeboke kiyae na imae ruka ranne heuboke wanen mae ahunebokale. <sup>25</sup> Ya woke molowole, bumae meke nane merau alu boye elaekei sele raweuboke. Nebei imae nekeunge nebeibe ebuleisai, rabuhine ban nebei imae ruka ranne heubokene. <sup>26</sup> Ro miyae nde yae raei a elalere

borolere me ban u banna, nebei kiyae onei handai ro na imae ifau ranne heuboke wanen mae ahunebokale. <sup>27</sup> Ya woke molowole, bumae meke, alu boye elaekei sele rawewole, nebei imae nekeunge buleufake, na beko hele yeuboke.

*Yesus Elae Bele Kelewoumi*

<sup>28</sup> “Yesus nebei a usaei yoni-yni weumikoke baeufoke heera, nebei ro helen miyae helen borowate yo Na isaei hebaen ma kelewoumilere fa yae bowate. <sup>29</sup> Rabuhine ban Na mekai kelewoumilere hului kolowainye Allah one hengko bele kiteungeboke wanen keleumi, Musale walora wali heere foloukoke are isaeyaeikoke yo yae kelaemi wanen ban.”

## 8

*U Ranna Bauwaufe Kowole Ro Yesus Onomi Ikeunge  
(Mrk. 1:40-45; Luk. 5:12-16)*

<sup>1</sup> Yesus mokora owakouboke ro miyae helen sele mewate na moisa hakainyekoke. <sup>2</sup> Ro mbai u bauwaunge kowole kiyae meke, Yesusle bene oro selen-selen roroukoke weunge, “Tuhan, weyae kena kokomae yae, rare na hului onomi yeremae.”

<sup>3</sup> Yesus Na me nekeunge nebei rore me rameungehike mo weunge, “Reyae kena kale, weyae onomi rowei!” Na hibi hele na uwana bauwau nebei hukai yae faeinyeungekoke. <sup>4</sup> Yesus nebei rore weunge, “Boroyae, ro hi miyae hire eisuweijae. Oro moloubonde imamde hebele kiyaele bere ele, onomi yeuboke naei uwa yakaungebonde. Musale walora wali heere foloukoke a huluiyene Allahre hili era akau erare ongkou wae felennekonde naeise obo yoku mbai yeungele. Nebei mekai yae isaeyeumibonde weyae na hele onomi roukae.”

*Fela Yun Na Hila Rabore Yesus Buma Kaeungeboke  
(Luk. 7:1-10)*

<sup>5</sup> Nebeisa Yesus Kapernaum yore eke. Eweufike hee, Kaisar Romawi naei fela be neboi holona ro mbai Yesusle bokore meke. Nebei rore Yesus hakonnebondere riyewoung <sup>6</sup> weunge, “Tuhan, raei yebaei bubaei oro me nimainyekoke buhae kaban koyelene, imaene ekehonole.”

<sup>7</sup> Yesus yae weunge, “Reyae erele onomi erenjende!”

<sup>8</sup> Nebeibe felayona ro yae weunge, “Tuhan, Weyae raei imaere obere ele naeise reyae yeisi raeiboi ban sele. Ndara weyae are mo eleiko, raei yebaei bubaei na hului onomi rowende. <sup>9</sup> Rabuhine ban, reyae hiwa yo naei keleene nekale, nebei sului mbai raei keleene felayo hiwa nekate. Reyae ro hire wanale, ‘Eye,’ neyae eyewole. Ro hire wanale, ‘Mei,’ neyae eimewole. Nebei sului mbai raei yebaei bubaeise wanale, ‘Nda mokoibo,’ neyae mokoiboyele.”

<sup>10</sup> Yesus nebei a wanen borokene fa yae bowole. Na moisa hakainyekoke mate yore weumi, “Reyae na helebe mare wamale, Israel kanina ro miyae nekate nolone nda hila rabo ma Reyae roko mbai ehubaikoi mo. <sup>11</sup> Reyae wamale, Yahudi ban ro miyae helen sele naufa waisa raei me kelee u keleene nekate ro miyae holonare hokommende. Surgare enate heene Abraham mae, Isak yae, Yakub yae nebei ro miyae hokommende bele anuwau mbainye enaitombonde raman mbainye anenaikonde. <sup>12</sup> Nebeibe Yahudi ro miyae helen moinya ouben kika honolene hainyaikonde. Nebeinye rime bele a bele konate nane merau beko hubanainyelene heraa kili-kili enaikonde.”

<sup>13</sup> Nebeisa Yesus meubeke Roma naei felayona rore weunge, “Waei imaere beiso eye, hilare rabore haleyae huluiyene yembonde.” Nebei hukai mbai na yebaei bubaei na hibi onomi rouke.

*Erana Buloona Yore Yesus Onomi Iwoumi  
(Mrk. 1:29-34; Luk. 4:38-41)*

<sup>14</sup> Petrusle imaere ekate hee, Petrus na miyae nenake era naume kaban sele kowole, na ijongku honson ranne ane neke honowole Yesus erekeunge. <sup>15</sup> Yesus nebei miyae mere mo rameungehike bae na hibi na uwana naume kowole u yeuboke, ewaunguke Yesusre ei hauwoung.

<sup>16</sup> Be bahewole ro miyae helen sele alo yae hauwaimi yo Yesusle bokore yauwaimi mewate. Yesus are mo eleukoke nebei alo yoni-yni ro naei miyae naei u bulura horayeke balayeke. Erana buloona kowate yo helen sele Yesus onomi iwoumi. <sup>17</sup> Nda bewate walora Allahle yendo kayaalo Yesaya yae nuleungekoke a na hului yeuboke. Neyae nda a mekai moloukoke, “Neyae aei era buloo nemene fomene onomire ikeume kiyae.”\*

\* 8:17 8:17 Yesaya 53:4

*Yesusre Hakonainyebonde Naendae Mekai Yembonde  
(Luk. 9:57-62)*

<sup>18</sup> Ro miyae helen sele hokoimeyelere Yesus erelene, na moisa orowate yore ukeumi rambun mokonainyehande bukoba reufire fonatere. <sup>19</sup> Nebeinye uwoumi mo, Musale walora wali heere foloukoke kelewaimi holona ro mbai Yesusle bokore meke weunge, “Guru, makei ijende ele reyae hakorebonde orayendere.”

<sup>20</sup> Yesus yae weunge, “Serigala yoni-yni kate na ahe bulu bele, aye yoni-yni bumana koyate na nale bele, nebeibe Reyae Allahle bokora mekale ro miyae uware yeubokale Kiyae nore isebonde imae ban mae nekale.”

<sup>21</sup> Yesus Na moisa orowate ro hi yae weunge, “Tuhan, na bere holo rare waeisihi maeko eremolonsan.”

<sup>22</sup> Nebeibe Yesus yae weunge, “Nda hee yae Rare hakoisobo. Raei a elalere hila rabo ehalei ro miyae herewate yo wanen. Nebei yo nenaiejae waemmihhi heraiboke ro miyaere molonate.”

*Alu Buna Rauwolere Yesus Ukeunge Kalauboke  
(Mrk. 4:35-41; Luk. 8:22-25)*

<sup>23</sup> Yesus na moisa orowate yo bele nane kai mbaisa hawaiboke naisike fowate. <sup>24</sup> Na roko mbai sele alu elakei raweuboke nebei kai ruwae yae felennehandere kowoungue. Nebeibe Yesus nebei hee ijongkune honowole. <sup>25</sup> Na moisa orowate yo ekate yengkainyekoke aunguke, wainye, “Aei wali hole moloibo! Meyae bune anemabonde bele!”

<sup>26</sup> Yesus yae weumi, “Rare mai hila rabo haleyaufe wauwaunge era mayae buhae hele hokombokembe!” Yesus aufae yae yeufureukoke, alu rawewole bele ruwae haiwole belere a elae yae haeungeboko. Nebei bukobana alu rawwole na hibi hele kalaungeboko.

<sup>27</sup> Nebei yo fa yae bowate na a bele elewate, “Alu bele ruwae bele a elae yae haeumibokene boroinyeboko Kiyae naeinya hesele nde maenin?”

*Yesus Alo Yoni-Yonire Hukeumihike Aibaleke  
(Mrk. 5:1-20; Luk. 8:26-39)*

<sup>28</sup> Bukoba reufina, Gadara kanine ro bee hele alo yae aumiboke kowote, here bulei ruka einye nekeyeke. Hokolo bee na u mekai nansau fele koyekene, ro miyae fe faeiboke nane merau nebei nibira oroyei nekayeke. <sup>29</sup> Yesus naei fainyoke hee, hokolo bee naei nekewote anuwaufa meibaleke Yesusre hubainyekondere mewote, na kali bele kaenewoinye, “Allahle Kelu, Weyae ndare na ijen ban sele mekae! Allah bekore mokoumelere merau raungehike ya na hului eyeiboi tonbe.”

<sup>30</sup> Nebei anuwaufa ahau fele ban, obo helen sele ramanne anewate. <sup>31</sup> Nane alo yoni-yni yae Yesusre riwainye wainye, “Weyae maere hukeumihinde emabalenderena, obo riyana kate einye weime emayembon.”

<sup>32</sup> Yesus yae weumi, “Eme!” Nane alo yoni-yni hokolo bee naei u bulura maibaleke obo naei uwa einye ayeuboke. Nane obo yoni-yni kowate alo yae nekaimi a yaeyaere habeleyoke, bune waibaleke, anayeke, herayeke. <sup>33</sup> Obo kayaare hebewate yo hakaikoke nobena honate yore ekate, nebei yeuboke rambun huwaimi. Alo yae hawaimiboke ro bee foi yeiboke naei a ekaisuwaumi. <sup>34</sup> Nebei yona yanna ro miyae nebei a borowatene nemene hele Yesusre hubainyaikondere mewate. Nda yo Yesusre riyewainye nebei anuwau nukembonde anuwau hire yae endere uwainye.

## 9

*Orora Nimainyekoke Rore Yesus Onomi Ikeunge  
(Mrk. 2:1-12; Luk. 5:17-26)*

<sup>1</sup> Yesus naei Kapernaum yore enaterene kaisa hawaiboke bukoba reufire fowate. <sup>2</sup> Kapernaum yone ekate yae, ro mbai orora nimainyekoke kiyae na ijongku honson ranne ro hiwa yo yae kaeibokate Yesusle bokore mekate. Yesus nebei yo naei hila rabo erekumine, orora nimainyekoke kiyae weunge, “Kelu, rabo halei. Wa beko yoni-yni niniae faeinyeubokawale.”

<sup>3</sup> Musale walora wali heere foloukoke isaeyaeiboke kelaeimi holona yo hiwa nebeinye hebewate yo Yesus eleukoke a borowate. Na u benera haeyaeynye wa elate, “Buhae hokoiboi ban eleukoke. Ro miyae naei beko faeinyeiboise ro hi miyae hi yae na hului ban. Allah nenaiejaere na hului. Nda ro Allahre aukakabe kounge!”

<sup>4</sup> Nebei yo na u benera hayaeynye a Yesus isaeyebokene weumi, “Mai kena u einye a na hele ban elabe!” <sup>5</sup> Meyae elabe, “Na foma-foma hele Yesus nda rore weungele, wa beko niniae faeinyeubokawale, rabuhine ban yembonde naeise ro miyae ereiboinye.

Nebeibe ehakaie kiyaebe Yesus wennele, ainyu, wa koi kaeibo eye, rabuhine ban ro miyae erenaterene.<sup>6</sup> Mana Reyae kelerembobere Reyae Allahle bokora mekale ro miyae uware yeubokale Kiyae nane merau Allah one hengko bele kiteufeboke yae Reyae mere mokale. Reyae na hului beko bele neban bele yore faeinyeremile.” Nebeisa orora nimainyeko kiyaeere weunge, “Ainyu, wa ijongku honson kaeibo na hibi aloinyoko wa imaere eye!”<sup>7</sup> Nebei ro aanguke, na hibi aloungeko imaere ewole.<sup>8</sup> Ro miyae helen sele nebei iwau rileuboke eraibokene fa yae bowate. Allahre ei molowainyele, rabuhine ban nebei one hengko Yesusre kiteungeboke.

*Yesus Matiusre Kaeneungekoke  
(Mrk. 2:13-17; Luk. 5:27-32)*

<sup>9</sup> Yesus nebei anuwaufa oro molouboke ewole yae, ro mbai na ro Matius pajakre arilate imaene nekewolebe erekeunge. Yesus yae weunge, “Rare hakoisobo!” Matius aanguke na hibi Yesusre hakoungboke.

<sup>10</sup> Yesus na moisa orowate yo bele Matiusle imaene ramanne anewate hee, pajakre arilate yo bele Yahudi yo yae bekore nebande mokayeke erewaimi yo bele mekate raman mbainye Yesus naei raiboke anewate.<sup>11</sup> Farisi holona yo nebei mekai erekaimine, Yesus na moisa orowate yore waimi, “Rahene mai guru pajakre arileyate yo bele bekore nebande mokoyate yo bele raman mbainye raiboke anate?”

<sup>12</sup> Yesus nebei a elewate borokeumine weumi, “Onomire foise nekate yo onomire mokoumi roro ebaeyei, erane buloone kate yo yaere baeyainye.<sup>13</sup> Mana embe Allahle homofae yae elele a isaeyembombe, ‘Reyae mai hili era akau erare kena okoi, nebeibe Raei kena kale mayae hiwa yore yanekoi yase yae ei hawemmile.’ Rabuhine ban wali himalainyeboko yo yae nauware elate yore Reyae kaeneremile naeise mekale ban, bekone nebanne mokate yore kaeneremile nulu kenaimibonde naeise mewale.”

*Yarele Me Heiboyate Nekeikoyate Mon Naei Abe Yesusre Hinainyehike  
(Mrk. 2:18-22; Luk. 5:33-39)*

<sup>14</sup> Yohanes bure kowoumi kiyaele moisa orowate yo Yesusle bokore mekate mo hinainye, “Rahene Farisi holona yo bele maengkele yarele me heiboyande nekandebe, nebeibe Waei moisa orate yo nendon nekate?”

<sup>15</sup> Yesus isaeyeboko na heki ban mo Nare honaibonde. Neyae kani kelane nekele naeise raman bulau wanen a yae ahuneuboko weumi, “Ro mbai miyae neme rowele raman bulau mokoiboyolere hokoimeyele yo nebei ro bele nanembainye nekate yae yarele me heiboyate? Nebei mekai ban. Raman bulau baensonde mo, nebei molo neme naei u nolo u kaisa ahaufe ende wa. Nebei hee na kahili wa na hului yarele me heiboyate nekate.”

<sup>16</sup> ((Nda ahuba beene malo male bele anggur bu anuwau male bele na u mekai Musale walora wali heere foloukoke are hakainye ro miyae wanen Yesus yae a ahuneuboko. Malo neme bele anggur bu anuwau neme bele na u mekai Yesus Naei a elelere hila rabo halaeinye ro miyae wanen a ahuneuboko.)) Nebei ahuba nda mekai huwoumi, “Hangkande malo neme yae malo male ranne oboyei. Rabuhine ban nebei malo neme kingkongebonde malo malere yobongkonde benen kaban sele kayengkonde.<sup>17</sup> Nebei sului mbai anggur bu neme anuwau malene erileyei. Rabuhine ban nebei anggur bu kaban bende, mokonnebonde nebei bure rilate anuwau ferengkonde, beko yembondene bu rilengkonde baensonde. Nebeinye hole moloiboise anggur bu neme anuwau anggur bu neme rilengkombe.”

*Hereke Maengke Bele Hane Rileweke Miyae Bele  
(Mrk. 5:21-43; Luk. 8:40-56)*

<sup>18</sup> Nda yore Yesus ane uwoumi hee, Allahre ei mom-mom imae mbai naei yun meke, Yesusle bene oro selen-selen roroukoke mo weunge, “Raei maengke manemfa hele nare hereke. Nebeibe kena kokomae yae raei imaere memae, me na u ranne ranehimae neyae waleuboube.”<sup>19</sup> Yesus aanguke na moisa orowate yo bele nanembaisa nebei roro hakainyeko ewate.

<sup>20</sup> Oro molaiboko ewate mo, miyae mbai meke ralo yakama me bee oro hine bee bele (12) ha yae rileweke. Yesusle moisa meuyaneufoko Na malo buraibe me yae rameufike.<sup>21</sup> Na kena eisa elele, “Na malore mo katarendinde, na hului onomi roufele.”

<sup>22</sup> Yesus meubeufoko nebei miyaere erewoung wa weunge, “Omi, rabo mo halei, waei hila yae rabo yae ware onomi ikete.” Yesus are ukeunge hee yae nebei miyae onomi na hibi rouke.



<sup>23</sup> Allahre ei mom-mom imae naei yunbe imaene Yesus naei ayeuboke hee, erewoumi rime ei haungainyelere sulingde ranewate yo bele ro helen miyae helen bele mewar-ileufike aku nau fele howate. <sup>24</sup> Yesus yae weumi, “Nda anuwaufa nemene embale. Nda maengke eherei, ijongkube honole.” Yesus nda a mekai eleukokene ro helen miyae helen borowate yo na re bele harewainye aukaka yae kowainye. <sup>25</sup> Nebei ro miyae nemene moise aibaleke mo, Yesus eweufike na mera ikileungeboke bele nebei maengke aufae aunguke. <sup>26</sup> Allahre ei mom-mom imae naei yun na maengke waleungeboke a eungeyoboukoke. Nebei kanine nekewate ro miyae nemene borowate.

*Ijoko Kumba Bele A Mun Bele Yo Yesus Onomi Ikeumi*

<sup>27</sup> Nebei anuwaufa Yesus aloungekoke ewole mo, ro bee ijoko kumba na moisa hakoinyekoke kali ara nene kaenewoinye weinye, “Weyae Ondofolo kaban Daudle orona mena Kiyae, maere yanekoi yase yae ei haweumele ya!”

<sup>28</sup> Imaene Yesus eweufike hee, hokolo bee Yesusle bokore mekete mo hineumi, “Ma ijoko erebe naeise Reyae na hului mokorebobere mayae hila rabo haleube?”

Hokolo bee yae weinye, “Yesus, meyae hila rabo halende.”

<sup>29</sup> Hokolo bee na ijoko Yesus me rameumikoke mo weumi, “Mai hilare rabore haleube hului yae yembonde.” <sup>30</sup> Na hibi hele hokole bee na ijoko erewote. Yesus nebei beere a hun raumihike weumi, “Ro miyae hiwa yore nda yeuboke a eisuweijae hele.” <sup>31</sup> Nebeibe hokolo bee nebei imaera eibaleke Yesus onomi ikeumi abe nebei yo ran yo ranne huweyeke eungeyobouboke borowate.

<sup>32</sup> Hokolo bee eibaleke hee, ro mbai alo yae aungebokene a munde yeuboke nekeweke kiyae, Yesusle bokore yawainyehoke mekate. <sup>33</sup> Yesus nebei alore hukeungehike eukuke bae, nebei ro a elewole. Ro miyae helen fa yae bowate elate, “Nda me ma u ma, Israel ro miyae nolone eyeiboi mo.”

<sup>34</sup> Nebeibe Farisi holona yo yae elate, “Walobo yun mae elae ikeunge walora, alo yoni-niire hukeumi baleyate.”

*Ro Helen Miyae Helende Yesus Kena Buhae Kowoumi*

<sup>35</sup> Yesus yo ran yo randa oroweke, Yahudi naei Allahre ei mom-mom imaene nda a foi faeu foi huweumiyeke, “Allah merau raungehike ro miyae Raei me kelee u keleene nekenatere wali hena bona Allah inyemmile.” Nane merau erana buloo u ranna u buluna kayeke yore Neyae onomi yeumiyeke. <sup>36</sup> Nebei ro helen miyae helen Yesus erewoumine na beko hubawaimi aerene kena beko hele hubawoungue, rabuhine ban male yambi yae koloukeumi. Nebei ro miyae domba yoni-yoni yaweiboi ro ban wanenne, na uware hole moloi Boise na hingkin ban sele. <sup>37</sup> Nebei yore Yesus ahuba hekena ani era wanen mae ahuneuboke Na moisa orowate yore weumi, “Ani era helen sele ninae henaiboke, nebeibe malunaibonde yo na hangka hele. <sup>38</sup> Nebei aerene Allah na heke yunde a yae riyennehi, ‘Heke kaliare enamokonde yo weumile enate. Nebei male yambi bele yore wali nibi foi naei kelenaimile.’ ”

## 10

*Na Moisa Orowate Yore Yesus Naei Kaliare Mokonatere Ukeumi Enatere*

*(Mrk. 3:13-19; Luk. 6:12-16)*

<sup>1</sup> Ya mbai mo Yesus na moisa orowate yo me bee oro nen bee belere riyane arileumihike mo, walobore hukenaimile naei elae nane merau era buloo na mane-mane onomi inyaimile naei elae nda yore kiteumiboke.

<sup>2</sup> Nda ro me bee oro nen bee bele yo na ro niyae: Simon na ro hi Petrus yae eiwewainye, naka baeke Andreas, Zebedeusle kelu wa bee Yakobusle naka baeke Yohansele, <sup>3</sup> Filipus, Bartolomeus, Tomas, Matius pajak arileweke kiyae, Yakobus Alfeusle fa, Tadeus, <sup>4</sup> Simon zelot holona ro, Yudas Iskariot Yesusre haiboke kelaise neke kiyae.

<sup>5</sup> Na moisa orowate yo ro me bee oro nen bee belere Yesus ukeumi enaterene a weumi, “Yahudi ro miyae ban naei yo yan bele Samaria kanina yo yan honate bele nibire yae eweyejae. <sup>6</sup> Nebeibe Israel ro miyae yoni-yoni nekate domba wanen here ware waeiboke nundeyate howaleyate holonare yae embe. <sup>7</sup> Nda abe huwemmile: Allah yae merau raungehike ya Naei holona ro miyae Wali Ondofolole me kelee u keleene menayorulembonde nekenate naei ya nobeungekoke. <sup>8</sup> Erana buloona kate ro miyae onomi yemmile, herenate yore walemmile, u bauwaunga kate yore onomi yemmile, alo u rannare hukemmile. Mai elae nanemene me karo yae yaraokokene, nebei sului mbai me karo yae emmiyembe. <sup>9</sup> Roi emasra, perakra, tembagara, ma yolu ha roi haufau hawate anuwau einye eyaroi eijae. <sup>10</sup> Nibi embe naei era inyale holoboi, uwa naei malo

beere, oro mehau karo bele, o mehukun, eyaroi eijae. Rabuhine ban kaliare mokonde kiyae na kalia mokowole hului roibu inyainyele lonbe.

<sup>11</sup> “Yo kaban yan kabanne nane merau yo melae honatene mayae embalembe, mare eise annembombe u mekai foi bele ro mbai baennekombe. Nebeinye nekembe mayae kulun wembe embe. <sup>12</sup> Nebei ro naei imaere emembombena, nebei imaena yore ro melaeyemmbombe. <sup>13</sup> Nebei imaena yo ei anayembombena, mai uware kitewamale hakawamalena onomi foi yemmile. Nebeibe mare ahi yae elenatena, nebei onomi foi mai uware yobombombe. <sup>14</sup> Ro miyae mbai mare ei aiboise ahi yae elende nane merau mainya a faeu wemmilere oboroinya, nebei yo yanda, imae opera embalembe. Mai orona kani bahe bongkombe nebei anuwau embalembera rubommibombe. Neyae u mekai beko helebe mokaibokene nda iwau wanen mae kelemmibombe <sup>15</sup> Reyae wamale, nana hesele Allah yae ro miyae mere nommiyonde yane Sodom yo bele Gomora yo belena ro miyae naei ehee bukulu foma-foma inyaibonde, nebei yo yoni-yoni honatena ro miyae naei ehee bukulu ehekaei sele kaenaibonde.

<sup>16</sup> “Bene nekenayembe! Mayae domba wanen mae me baemale nekaube. Reyae mare ufembe han bele obo yoku serigala wanen ro miyae nolore embere. Nebeinye mai isaei hebaen bumane nekembe mai u mekai han ban aye yawo-yawo wanen mae. <sup>17</sup> Uwa kayaa bele yae hebembe. Rabuhine ban mare ikilenayembe Yahudi naei yun-jun hebate bene mai wali hului kolonainyekombere mare kinyenayembe, nebeisa Allahre ei mom-mom imaene erahuae olenayembe. <sup>18</sup> Rare hakaufefoke aerene mare yobonayembe gubernur yoni-yoni bere nane merau ondofolo kaban yoni-yoni bere embe. Raeinya a faeu nda yo bele Yahudi ban ro miyae belere nebei mom mae kelemmilerene yobonayembe embe. <sup>19</sup> Nebei yo naei me einye kinyenayembombe hee mayae are wemmile naeise buhae ohokojiae. Mayae nebeinye elembe a nanemene Allah mare kelenembe. <sup>20</sup> Rabuhine ban nebei hee mai u benera elembe ban, Arai Allah Naei Rohle walora mayae elembe.

<sup>21</sup> “Nda u mekai enaibende hele, ro miyae naka baeke nake mbainyare wali huluisse koloyaimi yo naei me einye kinyenaimile. Naeko yae na kelure, kelu omi naei ako nakere nebei sului mbai enaimikinyende. <sup>22</sup> Rare hakaufefoke aerene ro miyae nanemene mare ikele konayembe. Nebeibe ro miyae kena beko hubanainyele hororebe kena yae herawembonde Reyae a uwamale hului nekende kiyae Reyae hole molorembonde. <sup>23</sup> Yo hine weitasi konayembena, na kelaunge yore yae hakangkombe embe. Reyae mare isaeyaemale, nana hesele Israel naei yo yoni-yoni honate mayae huba eimokoikojiae, Reyae Allahle bokora mekale ro miyae uware yeubokale Kiyae merele.”

<sup>24</sup> Yesus Na moisa orowate yore kelewoumi weumi, “Isaeise isaeyele kiyae na isaei hebaen ana, nebei isaeise keleunge kiyae bumana. Nane merau yebaei bubaei ro ban sele, na rowa ro bele. <sup>25</sup> Isaeise isaeyele kiyae nebei isaeise keleunge kiyae naei wali nibi hului mbai orole, rilibo ehaye. Yebaei bubaei naei rowale wali nibi hului orole. Reyae imae yun wanen Kiyae walobo yun Beelzebul ro raisebokene, mayae nebei sului mbai Raei imae mbai nekaube yo wanen nane merau ro na beko hele yae ronayembe.

<sup>26</sup> “Nda a isaeyaebokene, weitasire kayembe ro miyaere fe efaejiae. Felaimi rambun nemene wewe enaimimolombonde, nunna honate rambun nemene emmiyakambonde. <sup>27</sup> Mare huae yae uwamale a nebei a mbai na rai yaka yae wemmile. Mare angkaei kelaufa a maehae-maehae yae uwamale a ro miyae nemene na yaka yae isaeyenyaibondere imae malira wemmile. <sup>28</sup> Nda uwa na hului honayengkombe yore fe efaejiae. Neyae narakare ungayembe embe naeise na hului ban. Nebeibe Allahre fe faenne. Neyae na hului narakare ungembe embe, ndine beko hele ennehubambe. <sup>29</sup> Aye kilin-kilin (aye kerendeng) naise roi ane hele. Na hului nebei aye beere heiboyate perak mbai rowate horobe, nebeibe mai Arai Allah kena okoikoinya mbai sambai nendon ewaesi kani ranne eruiwe sele. <sup>30</sup> Nane merau ma yunna umaa hebate nanemene Allah me baeukoke. <sup>31</sup> Nebei aerene weitasi konayembe yore mayae fe efaeyejiae, Allahle bene nda aye yoni-yoni katera mayae aweukoke hele.

<sup>32</sup> “Nde yae ro miyae ro be ro yoinye Rare Wali Ondofolo yae elendena, Reyae naei mekai mbai Maeko surgane nekele Kiyaele ro be ro yoinye nebei rore Raei me kelee u keleene nekate holona ro yae erelengkonde. <sup>33</sup> Nebeibe nde yae ro miyae ro be ro yoinye Rare Wali Ondofolo ban mae elendena, Reyae naei mekai mbai Maeko surgane nekele Kiyaele ro be ro yoinye nebei rore Raei me kelee u keleene nekate holona yo ban mae erelengkonde.

<sup>34</sup> “Mai u benera nekayembe elaube Reyae rei mai nda kani kela rande roukale mekale. Reyae rei maibe erowei mei, nana hesele buloo felabe roukale mekale. <sup>35</sup> Reyae mekale aerene Allahle homofaene moloukoke nda a hului yembonde, ‘Kelu naeko bele,

maengke nenake bele,  
na fau miyae nenake bele  
han onyeibonde releneinyele.  
36 Nane merau na yokeijo hele bae

ro miyae naei imae mbainya yo bele yembonde.\*

37 "Ro miyae nde yae naeko bele nenake belere nane merau na kelu bele na maengke belere kena buhae hemmile ma Rare emekai bele henselena, Raei moisa hakombonde holonara yeisi raeiboi ban sele. 38 Raei aerene ohaline bonaikonde ro Rare hakoufele wanen ehakoiboi kiyae Raei ro miyaere yeisi raeiboi ban sele. 39 Nde yae naei wali Raei me einye ekinyeiboinya, naei wali holere omoloiboi. Nebeibe nde yae naei wali Raei me einye kinyensebondena, nebei ro na wali hole molorebonde.

40 "Rare hakaufekoke aerene ro miyae ei haungayembena, Rare ei hawaise. Nane merau Rare eise hawensela ro miyae nebei kiyae Allah Rare ukeufe mekale Kiyare ei haweunge. 41 Nde yae yenjo kayaayo yae ro rainyebokene ei hawennelena, na roibu yenjo kayaayo hului yarionate. Nane merau nde yae wali himaloungeboke yo yae ro rainyebokene ei hawennelena, na roibu nebei sului rowende. 42 Raei moisa oronde aerene hun ban wai ban yeuboke kiyare bu nuku kolaie mbai ken sele yennele anensindena, nana hesele na roibu einyundeiboi."

## 11

*Yohanes Bure Koumi Kiyae Naeise Yesus Yae Huwewoumi*  
(Luk. 7:18-35)

1 Yesus na moisa orowate yo me bee oro nen bee bele a weumikoke baeufokera, nebei anuwaufa aloungekoke Galilea kanina yo yoni-yoni honatere kelemmiyenderene ewole.

2 Yesus Wali Ondofolo na kalia ma mokowolebe a eungeyoboukoke Yohanes bure kowoumi kiyae kawa eisa boroke. Nebeinye Yohanes na moisa orowate yore ukeumi 3 Yesusre are enainyehinsindere, "Mendere nulainyekoke Wali Ondofolo Weyae niyae, benen meyae ro hire rakemandere?"

4 Are ukeumi yore Yesus weumi, "Embe mo, mayae ijokore eraukoke, angkaeise boraukoke hului yae Yohanesre huwennekombe. 5 Ro miyae ijoko kumba nekayeke mana ijoko erate, oro rebeisi-rebeisi rebaeyeke yo mana ele mele kate, u bauwaufe kayeke yo onomi yarowate, ro miyae angkaei kokun nekayeke yo mana angkaei borate, herewate yo walaieboke, a foi faeu foi hun ban wai ban yore ekehuweumi. 6 Ro miyae Rare hakoyaise aerene ehakeai hubayainyebe Rare moi ebulei yo onomi foka hubanainyende."

7 Yohanes yae ukeumi mekate yo ewate mo, Yesus huba raweuboke ro miyae helen hebatere Yohanesle ane weumi, "Rahere erembomberene mayae a kala-kalare eyewaube, nebeinya kena u wauwaufe koyate holona ro mbai naei u mekai o mbai alu yae ndire ndare kuseunge wanende erembombere? 8 Rahere erembomberene eyewaube, ro mbai malo maye-maye hireukokere erennebombere? Niyae ban! Ro miyae malo maye-mayere hirate yo bae naei anuwau ondofolo yoni-yoni naei imaena. 9 Nebeise banna, rahere mayae eyewaube? Yenjo kayaayo mbaise erennebombere? Na hele. Reyae mare wamale, neyae Allahle yenjo kayaayo holore moi wokeumi. 10 Nane merau naei naeise Allahle homofaene homo molaikoke. Neyae Raei burelen boi-boi rore yeuboke naeise Allah yae Rare ukeufe are Maleakhi moloukoke, 'Nda niyae Raei burelen boi-boi ro.

Neyae Weyae mele nibi a mokoisaise

nare bere holo yae ufende ende.\*

11 Reyae nda a na helebe mare wamale, Miyae naei kou ei yahi eisa honowate yoni-yoni nolora Yohanes bure kowoumi kiyae na bumane hele. Nebeibe ro ban sele ro miyae Raei me kelee u keleene nekate holo yo Yohanesre moi wokainye. 12 Yohanes bure koumi kiyae yeuyakauboke a kelewoumi heera meke nda heene Yahudi yun-jun kena okoi hororebe Allahle holona ro miyae Raei me kele u keleene menayorulembonde are huweimeyate, nane merau nebei yun-jun huwaimi a asasi konate hororebe ro miyae nenaiejae uwa mayoruleboka. 13 Rabuhine ban Allahle yenjo kayaayo nemene naei a bele Musa yae wali heere foloukokene a bele Wali Ondofolole naeise nulewainye meke Yohanes meuyakauboke heene. 14 Nebei aerene, naei a borom, 'Allahle yendo kayaalo Elia benen mende.' Nebei a huluinye Eliale u mekai wanen ma Yohanes meke. 15 Raei a elalere u bene nekenayembe!

\* 10:36 10:36 Mikha 7:6 \* 11:10 11:10 Maleakhi 3:1

<sup>16</sup> “Rahe rambun mae nda holona ro miyaere ahundebonde elerekonde? Nebei yo fa-fa rambun nai hei-sei anuwaunge roiboyate naei hokolo uneyaufe kaenaimi wanen waimi,

<sup>17</sup> ‘Mai naeise meyae suling ranandebokebe,  
nebeibe mayae bae okoi mo.

Meyae here rime wanenjekebe,  
nebeibe mayae rime erimei mo.’

<sup>18</sup> Rabuhine ban Yohanes bure koui kiyae meke bae raman bele bu bele nendon ban aneinye, nebeinye ro miyae yae elate, ‘Nda ro alo yae aungeboka.’ <sup>19</sup> Nebeisa Reyae Allahle bokora mekale ro miyae uware yeubokale Kiyae raman bele bu bele nendon mae analene, ro miyae elate, ‘Ndi ro erenne, raman mali bu mali ro, pajakre u bulu-bulu buleyate yo bele ro miyae beko nebande mokoyate holona yo bele kahili awaikoke.’

“Allahle isaei hebaen bele ro miyae me foi u foi mokoyatene, erenate ro miyae yae naei foi naeise elenate.”

*Allah Naei A Elewolere Ehakoyei Yo Yan Beko Hubanainyende*

*(Luk. 10:13-15)*

<sup>20</sup> Na bere Yesus rambun emere-emere helende mokowole yo yoni-yonina nekate ro miyae nulu ekeiboi mo katene, Yesus huba raweuboka a elae hele naei naeise uwoumi, <sup>21</sup> “Mayae Khorazim yona ro miyae bele Betsaida yona ro miyae bele beko bele hubanembe. Rabuhine ban rambun emere-emere mai yo yan nolone mokowale bewate ma na bere hele Tirus yone bele Sidon yone belene mokole yae, nendahina nda yo rime a kaikoube nane merau nulu kaimiboube. <sup>22</sup> Nebeinye Reyae mare wamale, Allah ro miyaere me nommiyonde yane Tirus bele Sidon bele naei ehee bukulu fomammibonde, mayae ehee bukulu kaban sele kaembombe. <sup>23</sup> Nane merau mayae Kapernaum yo ei bele molonayembe buma bele kolonayembere kaube! Nebei mekai ebei sele! Mayae nulu yo mahe yore omembombe. Rabuhine ban mai nolone rambun emere-emere mokowale ma na bere hele Sodom yone yaeikoube yae, nebei yo yoni-yoni nda ya bele na hebaen foi nekaimoube. <sup>24</sup> Nebeibe Reyae mare wamale, Allah ro miyaere me nommiyonde yane Sodom yo naei ehee bukulu fomannebonde mare ehee bukulu kaban sele inyembe.”

*Yesus Wali No Yeiboi Wali Nibi Yeumi*

*(Luk. 10:21-22)*

<sup>25</sup> A weumikoke baeufoke heera Yesus nda mekai yae Naekore weunge, “Arai, bumana anare ikileubokae Ako, Ware mbaibe buma kaewale. Helen foi wawale, rabuhine ban Waei ako fauko no nanemene isaei bele hebaen bele ro miyae naeisa nunne raufikae, nebeibe fa-fa wanen ro miyae isaei ban hebaen ban yore keleumibokae. <sup>26</sup> Ako nebei mekai Wa kenare foi yae hubanae.”

<sup>27</sup> Yesus a weumi, “Raei Ako Allah nemene fomene Raei me einye kinyewoufe. Ro miyae hi yae ha yae Rare oroiboi Ako Allah nembai mo roufoboka. Nane merau hi yae ha yae Raei Ako Allahre oroiboi. Reyae na kelu nane merau Reyae elerebonde Akore yakaremibonde ro miyae bele mo Ako Allah royanne.

<sup>28</sup> “Mayae Musale walora wali heere foloukoke huluinye hakombombere relaunge aere ne uwa yambi koloukembe ro miyae nanemene Raei bokore men. Reyae mare wali no yeiboi wali nibi isembe. <sup>29</sup> Reyae wamale a hakombo, nane merau Raeisa meme isaeyengko. Rabuhine ban Reyae nime haba nane merau kena u ane nekeyale. Mai beko bakore faeinyerembombera kena foi u foi isembe. <sup>30</sup> Raei a wamale hakombombere nime haba, mai baka ranna ransikamale na foma-foma hele.”

## 12

*Sabat Ya Naei A Usaei*

*(Mrk. 2:23-28; Luk. 6:1-5)*

<sup>1</sup> Sabat ya mbai Yesus na moisa orowate yo bele gandum heke nolora ewate. Moni kowatene gandum ani hokayeke anayeke. <sup>2</sup> Farisi holona yo erekaimilene Yesusre wainye, “Ereimi, Yahudi naei era hena huluinye Sabat ya omokojiae eleukoke rambunbe wa moisa orate yo mokate.”

<sup>3</sup> Nebeibe Yesus yae weumi, “Naendae wanen, aei yobe Ondofolo kaban Daud na moisa hakainyekoke orayeke yo bele monine kowatene mokouboke u mekai mayae homone okoikoi? <sup>4</sup> Allahre ei mom-mom imae eise eweufike imam yoni-yoni yae mo anenai konde feube yaroukoke na moisa hakainyekoke ro miyae bele ikeumi anaikoke. Musale walora wali heere foloukoke a huluinye nebei feu ro miyae hosoro anei sului. <sup>5</sup> Nane merau Musale walora wali heere foloukoke homone moloukoke mayae okoikoi. Nebei homone

molaikoke Sabat yare kalia omokoijaebe, nebeibe imam yoni-yoni Allahre ei mom-mom imae na kaban sele kiyaene kalia imokowate. Nebei naeise Allah yae bekore eleikoi. <sup>6</sup> Reyae mare wamale, Reyae mai nolone hebale Kiyae Allahre ei mom-mom imae na kaban sele kiyaere hameungekokale. <sup>7</sup> Allahle yendo kayaalo Hosea yae nda Allah ukeunge a moloukoke, 'Yanekoi yase bele wali mekaise Raei kena kale, Rare hili era akau erare ongkou wae fellennekonde Reyae kena ban.'\* Nebei a faeu naei no isaeyaeubokena, mayae Raei moisa orande yo beko omokoi holore me onoyoi sului. <sup>8</sup> Rabuhine ban Reyae Allahle bokora mekale ro miyae uware yeubokale Kiyae Sabat ya na yunde yeubokale Reyae niyae."

<sup>9</sup> Nebei anuwaufa alainyekoke ewate, aibaleke yona Allahre ei mom-mom imae mbainye Yesus eweufike. <sup>10</sup> Nebeinye ro mbai na me reufi nimainyekoke nangkele eweufike. Nda yo Yesusre kemere nenainyebonderene a melaeli wanen mae nainyebokone wainye, "Sabat ya yae ro miyaere na hului onomi inyaimile?"

<sup>11</sup> Yesus yae weumi, "Mayae ro miyae nemene mai domba naenda mekai horo a bulune Sabat ya yae ruweubere bae mayae kaeuboube. <sup>12</sup> Ro miyae bae Allahle ro be ro yoinye berei sele nda domba yoni-yonira. Nebeinye Reyae wamale, Ro miyaere Sabat ya na hului hakomambonde?"

<sup>13</sup> Yesus eweuke nda rore weunge, "Wa me neinye!" Nebei ro na me nekeunge na hibi na me reufina me wanen onomi yeuboke. <sup>14</sup> Nebei aerene Farisi holona yo Allahre ei mom-mom imaera aibaleke Yesusre honaibonde naei a meraunge kolowainyele.

<sup>15</sup> Nda yo na merau kolowainyele Yesus isaeyaeubokene nebei ei mom-mom imaera eukuke anuwau hire ewole. Ro miyae helen Yesus ewolene hakainyekoke ewate era yo buloo yo nanemene onomi iwoumi.

<sup>16-17</sup> Allahle yendo kayaalo Yesaya yae Yesusle naeise nuleungekoke a na hului yembonde naeise, nda ro miyaere a hun kolowoumi Naei uwa naeise hiwa yore ehuweijae. <sup>18</sup> Nda Wali Ondofolo naeise Allah ukeunge are Yesaya yae moloukoke, "Erenne, Raei yebaei bubaei eleubokale ukanale Reyae buhaere haenaale Kiyae nane merau Raei kenare foise mokoyeufe Kiyae.

Raei Roh Nare arembonde.

Neyae Yahudi ban ro miyaere wali ijen are huwemmile.

<sup>19</sup> Neyae nibi enene a kaban mae ekaengkoi, ro kabande ebaei.

<sup>20</sup> Hila rabo holei-holei an ro miyae wali o ha ba bele wanen nane merau ye rondon wanen.

Nebei yo Neyae mokommile naei hila rabo elae halenate.

Nebei me u Neyae mokonde mende ro miyae nemene Allah Naei me kelee u keleene enayorulengkonde nekenayende.

<sup>21</sup> Nare mbaibe nda kani kelana Yahudi ban ro miyae wali hena bonare rabo enainyehalende."†

*Yesus Bele Beelzebul Bele*

(Mrk. 3:20-30; Luk. 11:14-23)

<sup>22</sup> Nebeisa ro mbai alo yae ainyebokene na ijoko kumba yeuboke nane merau a mun yeuboke Yesusle bokore yawainyehoke mekate. Yesus onomi ikeungera a elewole ijoko erewole. <sup>23</sup> Nebeinya ro miyae nanemene fa yae bowate elate, "Ondofolo kaban Daudle orona mena are nulainyekoke Ro nda niyae era!"

<sup>24</sup> Farisi holona borokate bae nda ro miyaere waimi, "Beelzebul, walobo yun mae elae ikeungebe, walobore hukeyumi."

<sup>25</sup> Farisi holona yo naei u benena a Yesus naeisaeinye weumi, "Yo yan mbai na ro miyae be hun ma hun nekenatena, nebei yo yan here ware wembonde. Nane merau yo mbai na ro miyae naeise naeise kena ikele nekenatena, nebei yona ro miyae here ware wembonde. <sup>26</sup> Nebei sului mbai walobo yun na walobo akobaere hukennehindena, nauware uware fela roronete. Nebei mekai yae na yo yan kerensonde. <sup>27</sup> Beelzebulle elae yae Reyae nda walobore hukeyungehikale elaubena, ndele elae yae mai moisa orate yo walobore hukaimi? Nebeinye mai moisa orate yo yae mai beko mokaubere me nonayemombe. <sup>28</sup> Nebeinye nda walobo yoni-yoni Allahle Roh elae yae hukamaelena, nana hesele Allah Rare eleufebokone nda kani kelana ro miyae me mokoremile.

<sup>29</sup> "Elae bele ro naei imaene nekelena, naei rambun yaroikoise ro miyae na hului ban sele. Nebei imaena ro na bere ha yae ikilainyeyekonde helere nebeisa naei rambun yaronaikonde.

\* 12:7 12:7 Hosea 6:6 † 12:21 12:21 Yesaya 42:1-4

<sup>30</sup> “Nde yae Raei a elalere ehakoyei kiyae, nebei kiyae Rangkele yokejibobe nekende. Nde yae Raei me kelee u keleene nekate holona ro miyae inyaibondere moi eneisi, nebei kiyae ro miyaere here warebe boumi. <sup>31</sup> Nebei aerene Reyae mare wamale, nde yae me hila u hilae Rare konsele, a beko faeu beko Rare wensele kiyae Allah naei beko bako faeinyennebonde. Nebeibe nde yae Allahle Roh Naei me u mokole walobolena elae walora mokale yae elengkondena, Allah nare buhae eheikoi sului. <sup>32</sup> Reyae Allahle bokora mekale ro miyae uware yeubokale Kiyae ro miyae mbai a beko wenselena, Allah naei beko bakore faeinyennebonde. Nebeibe nde yae Allahle Rohre a beko wennele kiyae Allah naei beko bako efaeinyeiboi mo nekenende nda kani kela huba menemokonde yane.

<sup>33</sup> “Raei u mekai kombo mahu ani mokoyate wanen mae ahunerebonde. Mayae Raei u mekai ma elengko! Raei me u Allahle walora mokalene u mekai foi ma nekale, nebei banna, Raei me u walobo yun elae walora mokalene u mekai beko ma nekale. Rabuhine ban anira nebei o no ronboyainye wanen mae ro miyae naei me u mokate yae na hului ronainyebonde. <sup>34</sup> Mayae rami holona wanen ro miyae yaeuboke. Mai u mekai beko nolone nekeimeyaubene, mayae a foi faeu foise eleikoi sului! Rabuhine ban mai kena beko u beko eisa are faeufe elaube. <sup>35</sup> U mekai foi bele ro miyae foi yae maemae koikoyeunge na kena einye honainyene, foi naei rambunde mo eyelewole. Nebei sului mbai beko yae maemae koikoyeunge na kena einye honainyele kiyae beko naei rambunde mo eyelewole. <sup>36</sup> Nebeinye bene nekenayembe, Allah yae ro miyae naei walire hului enengkolombe yane, mayae nanemene mai a faeu mekai ban elewaube wo engkongkombe. <sup>37</sup> Rabuhine ban menaeijae elaube a faeu huluinye Allah yae foi yo kaenenembe, beko yo naei ehee bukulu inyembe.”

*Allahle Yendo Kayaalo Yunus Nekewole Hee Wanen*  
(Mrk. 8:11-12; Luk. 11:29-32)

<sup>38</sup> Nebei hee yae Musale walora wali heere foloukoke isaeyaeiboke kelewaimi holona yo bele Farisi holona yo bele Yesusre wainye, “Guru, meyae kena hele kande Weyae rambun emere-emere mokoubonde eremabondere.”

<sup>39</sup> Nebeibe Yesus yae weumi, “Mayae u hila wa hilaere kaube ro miyae, rambun hoime bahe Allah merau wae ei molaungele lonbe, iwau emere mokorebondere riyaufe. Mare iwau eme Reyae omokoi, Allahle yendo kayaalo Yunusle iwau mbaibe kelerembombe. <sup>40</sup> Yunus reniai ya name ka kaban yarele einye nekeukoke naei wanen mbai, Reyae Allahle bokora mekale ro miyae uware yeubokale Kiyae reniai ya name kani einye erenekongkonde. <sup>41</sup> Allah ro miyae naei walire hului emmikolonde yane, Niniwe yone nendahina hele nekewate ro miyae bele nda kulunne yo bele nanembaisa anainyunde. Niniwena yo nda kulunna yore me nonaimiyonde. Rabuhine ban Niniwe ro miyae na mene ban une ban Yunus Allahlena a yae huwoumine hee rorowate nulu keumiboke. Mana Reyae mekale, Yunus yae ehameikoi Kiyae wamalebe, nebeibe mayae nulu ekeiboi sele. <sup>42</sup> Allah ro miyae naei walire hului emmikolonde yane miyae Ondofolo Hilo Norona nda holona yo bele mbainye anainyunde, na beko mokowatera me nommiyonde. Rabuhine ban nda miyae Ondofolo kani kela hubara Ondofolo Salomole isaei hebaende borombonderene mewole. Mana Reyae nda nekale Salomo yae ehameikoi Kiyae, nebeibe Raei isaei hebaende oboroiboi sele kaube.

<sup>43</sup> “Nda kulunna ro miyae walobo nansau wae beko yae ei aungeboke wanen. Nebei walobo nansau ro miyae naei uwara etuwele hee, nore yembonde naei a kala-kala anuwaunge baeyele anne. <sup>44</sup> Nebei walobo elele, ‘Reyae nukeubokale role uwa eise berehonde erelere.’ Eke bae nebei ro naei wali erele bangka, niki ban, nambai mokoungehake. <sup>45</sup> Nebeinye nda walobo eukuke eke walobo na beko hele kayeero mehine bee yaweumiboke ayeuboke nekewate. Nda ro naei wali beko hele bena nekewolera. Nebei sului mbai nda u hila wa hilae ma kulunna ro miyae mai wali beko hele yembombe. Rabuhine ban Reyae mai nolone nekale heene, walobo yoni-yni aibaleke. Nebeibe mayae Raei a elale hila rabo ehaleinye, Reyae erele heene walobo yoni-yni helen bukenaibonde menate.”

*Yesus Nenake Naei, Naei Aka Baeke Bele*  
(Mrk. 3:31-35; Luk. 8:19-21)

<sup>46</sup> Ro miyae helende Yesus ane weumi hee yae, nenake nauwake wa bele mekate. Yesus naei are elenaikonderene moinye hebewate. <sup>47</sup> Ro miyae helen nolona ro mbai yae Yesusre eke weunge, “Ereibo ba, ana wauwake wa bele moinye mekaisebate Wangkele hubayengkomber.”

<sup>48</sup> Nebeibe are ukeunge rore Yesus yae weunge, “Nde menake wanen? Nde raei aka baeke wanen?” <sup>49</sup> Na moisa orowate yore me yae keleumi wa elele, “Nda niyae menake

naei rauwake wa naei. <sup>50</sup> Rabuhine ban nde yae Maeko surgana naei kena kole huluinye hakonde mokonde, nebei kiyae Raei aka baeke wa yae menake naei yae elerekonde.”

## 13

### *Ro Mbai O Haka Heraeiwole Ahuba*

(Mrk. 4:1-9; Luk. 8:4-8)

<sup>1</sup> Nebei yana ayeuboke imaera Yesus eukuke eke Galilea bukoba buhaei yaufainye nuweuboke nekewole. <sup>2</sup> Ro miyae helen sele hokoumeke, Yesusre ele yae nainyebokene, Yesus kai einye eunguweuboke nebei ro miyae hokoumeke nanemene buhaei yaufaesa hebaiboke. <sup>3</sup> Nda yore Yesus a mekai mahi-mahi ahunewole kelewoumi huwoumi, “Ro mbai na hekere o haka heraeiwole eukuke. <sup>4</sup> Heraeiwole hee nebei o haka hiwa nibi enene balewate, aye mekate anaikoke baeufoke. <sup>5</sup> Hiwa ruka bele kanine balewate. Nebei kani hele-hele ranne nda o haka na hibi hele kitewate. <sup>6</sup> Nebeibe hu naeukoke inyukui naumene, kambu eleman ororoi oinye habawate kala-kala bewate. <sup>7</sup> Hiwa hun isa bele nolone balewate. Hun kaban bewole nda o haka kitewatere aiwaimine herewate. <sup>8</sup> Hiwa kani foinye balewate, na hibi kitewate, ani mokowate, faru wang-wang hiwa rorele u maehae mbai (100), rorele u name (60), rorele u mbai me bee bele (30) bewate. <sup>9</sup> Raei a elalere u bene foi nekenayembe.”

<sup>10</sup> Na moisa orate yo mekate mo Yesusre hinainye, “Rahene nda yore rambun hinehine ahuneubokae huwamae?”

<sup>11</sup> Yesus yae weumi, “Raei me kelee u keleene nekate ro miyae holo naeise na nunna honate rambun isaeymbombe naeise mare mo ikembe, ndi yore eyei. <sup>12</sup> Rabuhine ban Allah na mekai na haraungebokere baenate ro miyae keleemile, helen isaeyinyate, nebeibe ebaei yo boraikoke a u benera hanenaimikonde. <sup>13</sup> Nebeinye a ahumbo-ahumbo yae nda yore huwamaele, rabuhine ban  
‘Neyae ijoko yae erenayendebe  
nane merau angkaei yae boronayendebe,  
nebeibe u benene orowei.’

<sup>14</sup> Naei naeise Allahle yendo kayaalo Yesaya yae nuleungekoke a na hului yeuboke. Nda mekai yae moloukoke,  
‘Mayae roko yae roko yae emborombe hororebe,  
isaeyeiwole sele.

Nane merau roko yae roko yae emerembe hororebe,  
ereiwole sele

<sup>15</sup> Rabuhine ban, nda ro miyae na kena ruka-ruka yaeiwole, angkaei kokun yaeiwole, ijoko nambai kunaikoke.

Neyae kena okoi ijoko yae enayerembonde, naei angkaei yae enaiborombonde, naei kenara enaisaeymbonde, wali enainyeharombonde

nebeisa Rare waenaisehinde naei u mekaise onomi isemilere.’ ”\*

<sup>16</sup> “Nebeibe mayae Raei moisa oraube yo na foi moi sele Raei me u mokalere mai ijoko yae eraube, Raei a elalere mai angkaei yae boraube. <sup>17</sup> Reyae mare wamale, nana hesele nendahina hele Allahle yenjo kayaayo nane merau ro miyae wali himalainyeboke yo yae kena hele kayeke nda hena eraubere enaibondere, boraubere boronaibondere, nebeibe nda yo ereiwole oboroiboi sele.”

<sup>18</sup> “Nebeinye heke rone a ahuneubokamale na mekai ma borombo. <sup>19</sup> Nibi enene balewate o haka na mekai ro miyae nde Raei me kelee u keleene nekate ro holone eise ate naei a faeu borombonde, nebeibe mbai sambai isaeyeiwole sele. Walobo yun meke bae na kenane heraeiwole baeufake. <sup>20</sup> O haka heraeiwole ruka bele kanine balayeke yo, na mekai ro miyae nebei a faeu borolera na rei mai yae hele ei aiboyeunge. <sup>21</sup> Nebeibe neyae kambu kanire ehireiwole einye hekire ehebeikoi. Nebei a faeu boroke aerene wali beko hubanainyele belene weitasi nare kainye belene nebei wali nibira u hale yae ungaiyende. <sup>22</sup> O haka heraeiwole hun isa bele nolone balewate yo nebei niyae ro miyae nebei a faeufe boraiboke yo. Nebeibe nda yo naei wali holere molommibonde aerene buhae hokoiboyoumi nane merau yeisi raeiwole walire kena haehae koyatene, nebei a faeufe ayeikoyainyene anire omokoi. <sup>23</sup> O haka heraeiwole kani foi kela foinye balewate yo, nebei ro miyae niyae nda a faeufe borowate nane merau isaeyeiwole, nebeinye ani mokowate faru wang-wang hiwa rorele u maehae mbai (100) rorele u name (60), rorele u mbai me bee bele (30) bewate.”

*Gandum Bele Hun Bele Ahuba Huwoumi*

\* 13:15 13:15 Yesaya 6:9-10

<sup>24</sup> Yesus a hi kiyaebe benen nda yore ahuneuboke huwoumi, “Raei me kelee u keleene nekate ro miyae holo naeise na mekai ma heke ro mbai na hekene o haka foi heraeyekoke yae ahundebondere. <sup>25</sup> Nebeibe ro miyae ijongkune honowate hee yae, na yokeijo ro meke gandum nolone hun haka heraeyeukokera ewole. <sup>26</sup> Gandum kitekate anire hurenaimile hee yae nebei hun yaeijakauboke.

<sup>27</sup> “Nebeinye na kalia yo yae na heke rowale bokore mekate mo wainye, ‘Rowa, o haka foibe wa hekene heraeyeubokaebe, nebeibe makeisabe ndi hun kitekate?’ ”

<sup>28</sup> “Nane heke rowa yae weumi, ‘Ra yokeijo ro yae hele nda mekai mokouboke.’

” “Kalia yo yae wainye, ‘Rowa kena kokomae yae meyae ande ndi hun rawandekoube?’ ”

<sup>29</sup> “Nebeibe nebei heke rowa yae weumi, ‘Nebei mekai omokoiyae, nendon mayae hunde rawembe hee gandumbe rawembombe bele. <sup>30</sup> Waemmihi nebei hun bele nanembainye kitai ani hokoi-sokoi ya mende nebei hee yae hokonate yore ufemile, Na bere hun korombombe bomone-bomone rinengkombe i ranne hekelengkombere, nebeisa gandum mo arilensimbe honson anuwaunge engkolongkombe.’ ”

*O Kaban Ko Yae Ahuba Ahuneuboke*

(Mrk. 4:30-32; Luk. 13:18-19)

<sup>31</sup> Nebei yore Yesus benen weumi, “Raei me kelee u keleene nekate ro miyae holo naeise o kaban naei ko heke ro rouke na hekene eke moloufakae yae ahunerebondere. Nebei o kaban na ro Yunani afaeunge mustard yae elewate. <sup>32</sup> Nda o haka ko sawi ko wanen mbaibe na kaei-kaei sele. Nebeibe kitele bae nda o reu ha reu hiwa hebatera neyae na kaban sele yeiboyele, maensa akau rorole ate, aye bumana mate nebeinye no yeiboise meisebate.”

*Ragi Ahuba Ahuneuboke*

(Luk. 13:20-21)

<sup>33</sup> Benen Yesus weumi, “Raei me kelee u keleene nekate ro miyae holo naeise nda mekai a ahunerebondere. Miyae mbai ragi ebi mo roke terigu kaban mokoungihakene alewoungel nanemene ohuleuboke.”

<sup>34</sup> A usaei wasaei nemene Yesus a ahumbo-ahumbo yae mo nda ro miyae helende uwoumi. <sup>35</sup> Nebei ahuba ahunewolera Allahle yenjo kayaayo yae Yesus naei uware nulainyekoke a faeu na hului yaeiboke. Yesusle naeise nda mekai ma moloukoke, “Reyae nda yore a ahumboi yae ahunerebonde ufemilere.

Nda kani kela mokouboke heera nunne honayeke rambunde hufekondere.”†

*Hun Gandum Kaikainye Kitewate Ahubare Yesus Yakaumiboke*

<sup>36</sup> Nebei ro miyae helende nanene Yesus nukeumiboke. Imae mbainye ayeuboke hee, na moisa orowate yo mekate Yesusre wainye, “Hun gandum heke nolone kitewate ahuba ahuneuboke huwekokae a maere yakaimebone.”

<sup>37</sup> Yesus yae weumi, “O haka foise heraeyekoke ro Reyae Allahle bokora mekale ro miyae uware yeubokale Kiyae Niyae. <sup>38</sup> Na heke nda kani kela niyae. O haka foi nebei Raei me kelee u keleene nekate holona yo. Hun hobo nebei walobo yun naei me kelee u keleene nekate holona yo. <sup>39</sup> Yokeijo hun hobore heraeiwole kiyae nebei walobo yun niyae. Anire hokonate ya nebei huba mokoikoi ya, anire hokonate yo nebei malaikat yoni-yoni niyae.

<sup>40</sup> “Hun hobo arilaisike i ranne hayaikoke wanen, nebei mekai mbai huba mokoikoi ya enjembonde. <sup>41</sup> Reyae Allahle bokora mekale ro miyae uware yeubokale Kiyae malaikat yoni-yonire ufemile Raei me kelee u keleene nekate holona ro miyae nolora ro miyaere mokaimiyeke bekore mokonate yo nane merau me hila u hilare kayeke yo nanemene hele arilenaimihinde. <sup>42</sup> Nebei yo i kaban beyele ranne nanemene hekelenaikonde, rime a heraa kili-kili anuwaunge enaikonde. <sup>43</sup> Nebei hee yae wali himalainyebokke ro miyae Ako Allahle yo yanne hu inyukui wanen enainyaengkonde. Mayae angkaei bele mone borombo.”

*Rambun Na Roi Bumana Kanine Molaisake Ahuba*

<sup>44</sup> Yesus nebei yore weumi, “Raei me kelee u keleene nekate holo na mekai nda a ahunerebondere. Rambun na roi bumane hele kani einye honowekebe ro mbai yae hubayeikoke benen kani yae feleungekoke na kena rei mai sele hubawoungel. Eke naei rambun-rambun honowainyele nanemene hele naise heukoke beufoke nane rambunde moloufakae kanire roi yae rouke.”

*Mutiara Ahuba Ahuneuboke*

† 13:35 13:35 Mazmur 78:2



<sup>45</sup> Yesus nebei yore benen weumi, “Benen Raei me kelee u keleene nekate holo naeise Reyae ro mbai mutiara foise baeweke wanen mae ahunerebonde elerekondere. <sup>46</sup> Nebei mutiara foi hubayeikokene, eke naei rambun honowainyele nanemene naise heukoke, nebeisa nda mutiara roi yae rouke.”

*Ela Bumokone Hayaete Ahuba*

<sup>47</sup> Yesus benen weumi, “Naei mekai mbai Raei me kelee u keleene nekate holo naeise Reyae ela bumokone hayaete ka na mane mane arilate wanen mae ahunerebonde. <sup>48</sup> Kare baete ela ka yae maemae koikoyole hee ohore yae yoboiboyate maete, nebeisa angken mae roiboyate, foi-foi yo eleikoyate kakaline haweikoyate beko yo hayaete. <sup>49</sup> Nebei mekai mbai huba mokoikoi ya mendene, malaikat yoni-yoni yae enate me hila u hilare kayeke ro miyaere wali himalainyeboko yo naeisa here bonaimile. <sup>50</sup> Nebeisa me hila u hila bele ro miyae i kaban beyele ranne hekelenaikonde, beko hubanainyelene rime a heraa kili-kili nebei anuwaunge anaikonde.”

<sup>51</sup> Yesus yae hineumi, “Nda a elale mayae nanemene isaeyaeuboke?”

Nda yo yae wainye, “Ehee, meyae isaeyaendeboke.”

<sup>52</sup> Yesus nda yore weumi, “Nebeinye Musale walora wali heere foloukoke are isaeyaeuboko kelaeimi holona ro mbai Raei me kelee u keleene nekate holona ako faukore ehe koukoke kiyae nda mekai yae yeuboke. Neyae imae rowa wanen, naei rambunde honate anuwaufa eba he neme bele male belere yakammikondere yaroukoke.”

*Yesus Naei Yore Eke*

*(Mrk. 6:1-6; Luk. 4:16-30)*

<sup>53</sup> Are ahunewole huwoumi riyau weubokera, nebei anuwaufa Yesus kulun uke ewole. <sup>54</sup> Yesus ewole kabande yeuboke yone eke. Allahre ei mom-mom imaene eweufike nebeinya ro miyaere a usaei kelewoumi. Borowate yo fa yae bowate elate, “Ndi isaei hebaen makeisa yaroukoke nane merau rambun emere-emere mokole makeinya elae wakebe kitewainye? <sup>55</sup> Aeisaeise nekande Neyae ore ahuneweke kiyaele fa, nenake Maria nauwake wa Yakobus, Yusuf, Simon, Yudas, <sup>56</sup> nane merau nemaen wa nanemene aengkele nanembainye nekande. Nebeinye makeisabe nda wanen nanemene yarowole?” <sup>57</sup> Nebei ro miyae Yesusre moi yae bulainyeboko.

Yesus yae nda yore weumi, “Yendo kayaalo mbai ende ijenne be hinenainyende ei haungainyende, nebeibe naei yo yanne naei imae obene bere ehineiboi eise aiboi sele.”

<sup>58</sup> Na yona yanna yo hila rabo ehalei aerene Yesus rambun emere-emere helen nebei anuwaunge omokoikoi.

## 14

*Yohanes Bure Koumi Kiyae Yun Naeisake*

*(Mrk. 6:14-29; Luk. 9:7-9)*

<sup>1</sup> Nebei hee Ondofolo Herodes Galilea kani mere ikileuboko kiyae, Yesusle a yobowoung boroukoke. <sup>2</sup> Nare hakowainye yore weumi, “Na hele nda Yohanes bure kowoumi kiyae nulu yo mahe yora aunguke. Nebei mekainye neyae elae rouke rambun emere-emere mokole.”

<sup>3-4</sup> Nda Herodes yae na aka baek Filipusle miyae Herodiasre rouke. Roko yae roko yae Yohanes yae Ondofolo Herodesre a elae uwoung, “Na ijen ban sele Herodias roukae.” Nebei aerene Herodes ukeumi Yohanesre ikilenaibonde kawane ahenainyekondere. <sup>5</sup> Herodes Yohanesre hombondere kena kowolebe, nebeibe ro miyae helen Yohanesre yenjo kayaayo holona hi yae erewainyene fe yae faewole.

<sup>6</sup> Ondofolo Herodes na ralo yakama barauboko ya, raman bulau mokouboke. Nebei kanina rore raimi yo kaenewoumi hokoumeke. Nebei hee Herodias na maengke nebeinya ro miyae bene baene kowolera Herodes rei mai aungeboko kowole. <sup>7</sup> Nebeinye Ondofolo Herodes a holo yae heteungekoke nda maengke yae riyensinde rambun yennele hele. <sup>8</sup> Nenake yae a moi-moi mokoungekokene nda maengke eke Ondofolo Herodesre riyewoung weunge, “Rare nda hee yae mo Yohanes bure kowoumi kiyaele yun hote einye ambombe yensele.” <sup>9</sup> Nda a mekai riyehengikene Ondofolo Herodes na kenara beko hele hubawoung, nebeibe ro bele yo hokoumeke bene a eleukokene ukeumile nebei maengke yae riyemihike a huluinye hakouboke. <sup>10</sup> Yohanesle yun neisaise kawa eise ukeumi ekate. <sup>11</sup> Yohanes na yun naisake hote einye aiboko roukate mekate, nebei maengkere ikeungele, rouke eke nenakere ikeunge. <sup>12</sup> Nebeisa Yohanes bure kowoumi kiyae na moisa orowate yo mekate na nore mo roukate a bulune aimouloufake. Nda yo yae ekate Yohanesle a Yesusre isaeyainyeboko.

*Yesus Ro Miyae Helende Raman Ikeumi Anewate*

(Mrk. 6:30-44; Luk. 9:10-17; Yoh. 6:1-14)

<sup>13</sup> Yohanes bure kowoumi kiyae haiboke a Yesus boroukokera bae nebei anuwaufa keungehike kaisa hawaiboke aku ban nau ban anuwaufe enatere. Nebeibe ro miyae nebei a borokatene na yora yanda balaimke Yesus kaisa fowolere yau nibira alainyekoke fowate. <sup>14</sup> Yesus naei fowate kai ohone fainyoke bele, ro miyae helen bolen hokoumeke erewoumine na beko hubawaima aerene kena beko hele hubawoungwe. Nebei yo hokoumeke nolona erare buloore kowate ro miyae onomi iwoumi.

<sup>15</sup> Huae rai yae Yesus na moisa orowate yo yae mekate mo Yesusre wainye, "Nda anuwau mon sele nane merau huae raibe yeuboke. Naei foi sele ndi yo-yo honatenare nda ro miyae weimi ai na hului raman enaiyarongkonde."

<sup>16</sup> Nebeibe Yesus yae weumi, "Nda yo rahe londe wemmile enatere? Mayae raman yemmile anenaikonde."

<sup>17</sup> Na moisa orowate yo yae wainye, "Feu maehae mbai ka bee nebei mo maeyne honaime."

<sup>18</sup> Yesus yae weumi, "Raei bokore yarongko men." <sup>19</sup> Nebeisa nda ro miyae helen ukeumi angken mae mo ke ranne raiboke. Nebei feu maehae mbai ka bee belere mo yaroukoke, be bumare weuweke, Allahre helen foise mo ukeunge, nebei feu kaiwole, na moisa orowate yore iwoumi, nebei ro miyae helende wahewaimi. <sup>20</sup> Hokoumeke yo nanemene anaikoke uwa raiboke. Nebeisa Yesus na moisa orowate yo raman kalun arilaisike kakali me bee oro nen bee bele maemae kaikoke. <sup>21</sup> Nebei ramande anaikoke yo, ro mo 5.000 hului, miyae maengke bele nane merau fa-fa bele me ebaeikoi.

*Yesus Ele Mele Bu Ranne Orowole*

(Mrk. 6:45-52; Yoh. 6:15-21)

<sup>22</sup> Nebeisa Yesus na moisa orowate yore ukeumi kaisa hawaiboke bere holo yae bukoba reufire fonaimaembondere. Yesus nembai nekwole nda ro miyae helen bolen uwoumle ewate. <sup>23</sup> Ro miyae eufokoubokera mo, Yesus nembai ebeli boisise moko mbaise ewole. Be baheuboke Yesus namman nebeyne nembai nekwole. <sup>24</sup> Na moisa orowate yo hawaiboke fowate kai ahau fele bumoko nolone, alu yekele elae hele rawebokene nauwala ruwae yae eiwo meiwo kowoumi.

<sup>25</sup> Yare me fo hukai name hului Yesus na moisa orowate yo bokore bu randa aloungoke mewole. <sup>26</sup> Na moisa orowate yo erainye Yesus bu randa mewolene kulu-kulu hele yaeiboke, fe waku roukeumi kate na kali bele kaenewate, "Enaelo ya!"

<sup>27</sup> Nebeibe Yesus yae weumi, "Hilembo. Reyae yae fe waku okoiyae."

<sup>28</sup> Petrus yae weunge, "Weyae na hele Yesusna, rare weise bu randa waei bokore ere."

<sup>29</sup> Yesus yae weunge, "Meinye."

Petrus nebei kai eisa bu ranne owakouboke aloungoke Yesusle bokore eke. <sup>30</sup> Nebeibe nauwala ruwae erewolene buhae hokoungoke bae nauwa ruwambonde wanan hubawoungene kaenele, "Tuhan, rare hakoisobo!"

<sup>31</sup> Na hibi hele Yesus na me nekeunge, ikileungeboke wa weunge, "Petrus, rahene kena wauwau koyae. Wa hila rabo kalo molotene?"

<sup>32</sup> Hokolo bee kai einye yeisaweiboke bele alu bele na hibi kalaungeboke. <sup>33</sup> Kai einya yo Yesusre ei molowainye wa elate, "Nana hesele Weyae Allahle Kelu."

<sup>34</sup> Bukoba reufire fokate Genesaret yo ohone na kai fainyoke. <sup>35</sup> Nebei anuwaunge ro miyae Yesusre rainyebokene, Yesus meke a yo yoni-yoni nebei kanina honatere eungeyoboukoke. Ro miyae erana buloona nanemene Yesusle bokore yawuaimi mewate.

<sup>36</sup> Nda yo Yesusre riwainye ehee kommikonde na malo buraisa mo katanainyele. Ro miyae nanemene na malo buraisa katawate yo onomi yarowate.

## 15

*Era Hena Naeise*

(Mrk. 7:1-13)

<sup>1</sup> Farisi holona bele Musalena walora wali heere foloukoke isaeyaeikoke kelaeimi yo holona bele Yesusle bokore Yerusalem yora mekate mo hinainye, <sup>2</sup> "Rahene wa moisa orate yo aei abu naei arai naeitena era hena moi wokate? Neyae me ekuikoi yae raman eyanewate."

<sup>3</sup> Nebeibe Yesus yae nda yore weumi, "Rahene mayae nebei sului mbai Allah wali heere foloukoke are moi hayeyaube mai abu naei arai naeitena era hena aerene?"

<sup>4</sup> Rabuhine ban Allah yae a eleukoke, 'Ako naekere be hinemmiyembe benen nde yae akore nakere olomo roromilena honaibonde hele.' <sup>5</sup> Nebeibe mayae elaube, nde yae ako naekere wemmile, 'Raeinya mare isebe rambunbe, Allahre hili era akau erare

erenjendere,'<sup>6</sup> nebei ro miyae ako nakere bere hinenaime naeise era buhi ban yeiboyole. Nebei mekainye Allahle ako faukore fomaiboyaunge abu naei arai naeitena era hena aerene.<sup>7</sup> Mayae ro miyae faeu kai bee. Naijen sele mai naeise Allahle yendo kayaalo Yesaya yae Allah ukeunge a nuleungekoke. Nebei a nda mekai yae moloukoke,<sup>8</sup> 'Nda ro miyae Rare euwa boneisa mo be hinaise,

nebeibe na kena u nahau buhau fele.

<sup>9</sup> Na karo hele nda yo Rare ei molaise.

Na usaei wasaei bae ro miyae yae elate wali heere folaikoke abe kelaeimi.' '\*

<sup>10</sup> Nebeisa Yesus nda ro miyae helende kaeneumikoke mo weumi, "Reyae elerele a borombe isaeyembe. <sup>11</sup> Euwa eise ate rambun mae nikire olei, kena u einya euwa walora baleimeyate yaere ro miyaere nikire olaeimi."

<sup>12</sup> Nebeisa na moisa orowate yo mekate Yesusre wainye, "Weyae isaeyebokae Farisi holona yore nebei a mekai wamaene na kenara ikele kate?"

<sup>13</sup> Yesus a ahuneuboke weumi, "Ro mbai o meleme ha meleme omoloikoi yo na kambura hele endawengkonde wanen mae Maeko surgana ekenekele Kiyae yae ame-ame kelaeimi a faeufe era buhi ban mokommile. <sup>14</sup> Nebei yo nenaiejae waemmihi, neyae ro miyae ijoko kumba. Ro mbai ijoko kumbabe benen ijoko kumba rore yawennehondena na beene bo einye eneibalende."

<sup>15</sup> Nebeisa Petrus yae Yesusre weunge, "Nebei a ahuneubokae wamae, maere bele yae yakaimbebo."

<sup>16</sup> Yesus yae weumi, "Mayae namman isaeyei boi mone? <sup>17</sup> Mayae isian selene, rambun yoni-yoni euwa eise ate yarelere oyowate nebeisa kelen bele anuwaunge eyokate? <sup>18</sup> Nebeibe euwa eisa baleimeyate rambun kenara mo hebeunge. Nebei yaere ro miyaere niki oleumi. <sup>19</sup> Rabuhine ban kena eisa u bene beko, ro miyae hoi-soise, yokore kaeimaere, yokore, ame-amere, aukakare, baleimeyate. <sup>20</sup> Nebei u mekai yaere ro miyaere mokoumi niki belere baete, nebeibe me ekuyekojiae raman anendene ro miyaere nikire olei."

*Kanaan Kanina Miyae Na Hila Rabo Ma Halewole*

(Mrk. 7:24-30)

<sup>21</sup> Nebei anuwaufa Yesus eukuke ewole Tirus yo bele Sidon yo bele kelaeunga anuwaufe eke. <sup>22</sup> Nebeinye Yahudi holona ban miyae mbai Kanaan kanine nekewole Yesusle bokore mele na kali bele kaeneimeyele, "Tuhan, Daudle orona mena, Wa yanekoi yase yae rare ei meishaweise. Raei maengke fa alo yae aungebokene nauwa ekeukabeunge hele ya."

<sup>23</sup> Yesus a ban faeu ban nekele, na moisa orowate yo yae wainye, "Nebei miyaere weinye 'Eunge,' beko hele aei moisa hakoumeboke kali yae kaeneimeyele."

<sup>24</sup> Yesus euweke nda miyaere weunge, "Allah Rare ukeufe mekale Israel ro miyae mo hakoremilere. Neyae domba nibira oneikoyate wanen yaeiboke, rabuhine ban Allah Naei a elerele oboroibo katene."

<sup>25</sup> Nda miyae Yesusle bene oro selen-selen roroukoke mo weunge, "Tuhan, rare hakoisobo."

<sup>26</sup> ((Yahudi ro miyae yae Yahudi ban ro miyaere yoku yae kaenewaimine)) Yesus yae weunge, "Na ijen ban sele fa-fa naei feu yarorekonde yokure haisemikonde."

<sup>27</sup> Nebei miyae yae weunge, "Tuhan, na hele, nebeibe yoku naei hayeunge ro ramande anele anuwaufa feu mohi-mohi balate naei yoku yae eyanewole lonbe."

<sup>28</sup> Yesus yae weunge, "Wa hila rabo kaban sele! Waei kenare koyae hului yae yembonde." Nebei hee yae nda miyae na fa onomi rouke.

*Yesus Ro Miyae 4.000 Raman Ikeumi Anaikoke*

(Mrk. 8:1-10)

<sup>29</sup> Nebei anuwaufa Yesus aloungkoke Galilea buhaei yaufaeisa ewole. Nebeinya moko mbainye eukiteke nuweuboke nekewole. <sup>30</sup> Ro miyae helen sele naei bokore mewate, ro miyae oro rebeisi-rebeisi yo, ijoko kumba yo, oro me nimewaimile yo, a mun yo, nane merau era buloo mahi-mahi kate yo, yarowaimi mewate Yesus noro wene hawaimi. Nebei yo nanemene Yesus yae onomi iwoumi. <sup>31</sup> Nebei ro miyae helen nda rambunde na ijoko yae erewate: a mun yo a elewate, oro rebaeyeke yo alowate, orora nimewaimi yo ainyukate ele mele kowate, ijoko kumbare nekayeke yo ijoko erewate. Nebei erewate ro miyae fa yae bowate, Israel naei Allahre ei molowainye.

<sup>32</sup> Nebeisa Yesus na moisa orowate yo kaeneumikoke mo weumi, "Nda ro miyae helen bolende nda ya name nendobe Rare mo hakaisekoke matene raman baeumihokene,

\* 15:9 15:9 Yesaya 29:13

Reyae kena beko hele hubanale. Reyae kena ban nda yore na moni yae ufemile enatere, rabuhine ban nibi nolone enate monine ijoko belau-belaunge balenayende bele.”

<sup>33</sup> Yesus na moisa orowate yo yae wainye, “Nda anuwau mon wanen, makeinya raman mae yaromakonde nda ro miyae helen bolende na hului imamile anenaikonde?”

<sup>34</sup> Yesus yae hineumi, “Mai mene feu naennaen hului honate?”

Neyae wainye, “Feu mehine bee, ka fele-fele keli name.”

<sup>35</sup> Yesus nda ro miyae helen ukeumi kani ranne raiboke. <sup>36</sup> Nebeisa nane feu bele ka bele yaroukoke, Allahre helen foise mo ukeunge, nebei feu kayewole na moisa orowate yore wahewoumi, ro miyae helende wahenaimilere. Nebei sului mbai kare wahewaimi. <sup>37</sup> Nebei ro miyae nanemene anewate uwa raiboke, nebeisa anaikokona kalun arilaisike, kakali mehine bee maemae kaikoke. <sup>38</sup> Ramande anaikoke me baeikoke ro mo 4.000, miyae fa-fabe me ebaeikoi. <sup>39</sup> Nebeisa Yesus nda ro miyaere ukeumi ewate. Yesus naei kaisa eufileukoke naisike Magadan yo kelaeunga kanire ewate.

## 16

*Yesus Iwau Emere-emere Mokondere Riwainye*  
(Mrk. 8:11-13; Luk. 12:54-56)

<sup>1</sup> Ya mbai Farisi holona yo bele Saduki holona yo bele riya mbai mekate Yesusle bokore u malire hubanainyehindere. Nda yo yae Allahle elae naei iwau mahi eme helere Yesus kelemmbondere riwainye.

<sup>2</sup> Nebeibe Yesus yae weumi, “Huae raei hu naeukoke inyukui hasai roroiboyolene mayae elaube, ‘Wahenare buma foi sele.’ <sup>3</sup> Nane merau Israel kanine ya heiboyole rene hu naeukoke inyukui hasai roroiboyole mangko belene mayae elaube, ‘Yare molondere.’ Yaku buma na mekai ma mayae na hului nulembombe, nebeibe nda heena Raei me u mahi-mahi mokalere mayae isaeyei boi sele. <sup>4</sup> Mayae u hila wa hila koyaube ro miyae, hoime bahe rambun Allah merau wae ei molaungele lonbe, iwau emere-emere kelerembombere riyaufe. Mare na iwau eme hi ekeleibo, Yunusle uwana yeubokere mo kelerembombe.” Nebeisa Yesus nda yore nanene nukuumiboke aloungekoke ewole.

*Farisi Naei Ragi Wanen Kelaeimi A Kayaa Hebembe*  
(Mrk. 8:14-21)

<sup>5</sup> Yesus na moisa orowate yo bele bukoba reufine fokate yae nda yo u bene nekeumihike feu na mene oroweifo. <sup>6</sup> Yesus yae weumi, “Farisi holona bele Saduki holona bele yo naei ragire mauwa kayaa bele hebembe.”

<sup>7</sup> Yesus nebei a mekai eleukoke borokatene, na moisa orowate yo hi yae hire weunge, “Eyae feu orowei meinye Yesus ndi a mekai haraungeboke elele.”

<sup>8</sup> Nda yo yae elate a Yesus isaeyeboke, nebeinye weumi, “Rahene mayae feu ban maube ane kolaunge, hila rabo wauwau koyaube ro miyae! <sup>9</sup> Mayae namman isaeyei boi selene! Mai u benera onengkokembe era, feu maehae mbai yae 5.000 ro anaikoke, nebeisa kakali naennaen hului kalun arilaufike? <sup>10</sup> Nane merau feu mehine bee yae 4.000 ro anaikoke, nebeisa kakali naennaen hului kalun arilaufike? <sup>11</sup> Naendae mekai tonne mayae isaeyei boi sele, feu naei abe Reyae eharaibo eleikoi! Reyae wamale, Farisi holona bele Saduki holona bele naei ragire mauwa kayaa bele hebembe.” <sup>12</sup> Nebei mekai a Yesus ukeumine, na moisa orowate yo isaeyei boke Farisi holona Saduki holona yae kelaeimi a usaei uwa kayaa hebenate, ragi hele ban.

*Petrus Yae Yesus Na Hele Wali Ondofolore Yeuboke Are Eleukoke*  
(Mrk. 8:27-30; Luk. 9:18-21)

<sup>13</sup> Kaisarea Filipi yo nobaeinyekoke mo, Yesus yae na moisa orowate yore a hinewoumi, “Reyae Allahle bokora mekale ro miyae uware yeubokale Kiyae ro miyae yae nde yae elate?”

<sup>14</sup> Nda yo yae wainye, “Ro miyae hiwa yo Yohanes bure kowoumi kiyae yae elate, hiwa yo Allahle yendo kayaalo Elia yae elate, hiwa yo Allahle yendo kayaalo Yeremia yae elate, hiwa yo yenjo kayaalo ro holona hi yae elate.”

<sup>15</sup> Nebeisa Yesus nda yore hineumi, “Nebeibe mayae nde yae Rare elaube?”

<sup>16</sup> Simon Petrus yae weunge, “Weyae Niyae Allah yae oro umaufe heraweubokete Wali Ondofolo, Allah huba ban haei ban nekeimeyele Kiyaele Kelu.”

<sup>17</sup> Yesus yae Simon Petrusre weunge, “Foi moi sele weyae Simon Yunusle kelu, rabuhine ban nda are ro miyae yae ware ewei, Maeko Surgane ekenekole Kiyae yae ukete. <sup>18</sup> Nane merau Reyae ware wawale, Wa ro Petrus, na mekai ruka. Nda ruka ranne raei jemaat arenundere naei ro miyae nulu yo mahe yo naei me kelee u keleene einyekei sele. <sup>19</sup> Raei me kelee u keleene nekate ro miyae holore enayembonde nibire Reyae

ware kelereibote. Weyae nebei nibi romau kayaa roware yeubonde. Nda kani kelana rahe rambun weyae hun raungehinde, Allah surgana Kiyae nebei sului mbai ware be hinenete. Rahe rambun weyae meraufe raungehinde, Allah surgana Kiyae nebei sului mbai ware be hinenete.”<sup>20</sup> Nebeisa Yesus na moisa orate yore a hun raumihike weumi, “Reyae Wali Ondofolore oro umau heraweufeboke a ro miyae hiwa yore ehuweijae.”

*Yesus Herende Naei A Roko Mbai Nendo Isaeyeumiboke*

(Mrk. 8:31—9:1; Luk. 9:22-27)

<sup>21</sup> Nebei heera Yesus huba raweuboke na moisa orowate yore na yaka yae uwoumi, Nyaie Yerusalemde ende hele, nane merau Yahudi naei yun-jun naeisa, imam yun-jun naeisa, nane merau Musale walora wali heere foloukoke are isaeyaeiboke kelaeimi yo naeisa, weitasi konainyele beko helen hubannekonde. Nebeisa honaibonde nebeibe ya name nendo Allah yae anennunde.

<sup>22</sup> Nebei a wanen Yesus eleukokene, Petrus me nekeunge Yesusre yaweungehoke enere yae ekete mo a elae yae weunge, “Tuhan, nda benate naeise felande yae Allah kena koukoube weungeweube. Nda mekai waei uwane ebeijae hele!”

<sup>23</sup> Yesus weke Petrusre weunge, “Walobo yun, Ra moise yae eye, Rare oro halun wanen yeuboke kiyae. Waei u bene nekayete ro miyae helen mae u bene nekaimi hului mbai, Allahle u benene nekainye ma ban.”

<sup>24</sup> Nebeisa Yesus na moisa orowate yore weumi, “Raei moisa hakombonde ro, naei kenare koyele wali mekai kena yae herawende hele, nebeisa Raei aerene ohaline bonaikonde ro wanen mae Rare hakonsebonde. <sup>25</sup> Rabuhine ban nde yae naei wali Raei me einye ekinyeiboinya, naei wali hole omoloiwai. Nebeibe nde yae naei wali Raei me einye kinyensebondena, nebei kiyae naei wali hole molorembonde. <sup>26</sup> Na foi rahe ro miyae mbai nda kani kelana rambun naei me einye honoube, nebeibe wali hena bona eitowei. Nane merau rahe rambun mae na hului na wali hole moloiboise beneikonde. <sup>27</sup> Rabuhine ban Reyae Allahle bokora mekale ro miyae uware yeubokale Kiyae Maeko naei one hengko hehe kaban bele einye na malaikat yoni-yoni bele surgara memale. Nebei hee yae Reyae ro miyaere na u mekai wa mekai mokowate huluinye isemile. <sup>28</sup> Nana heselebe Reyae wamale, ndane mewarileufike ro miyae mai nolona hiwa eherei mo nekenate, Reyae Allahle bokora mekale ro miyae uware yeubokale Kiyae Wali Ondofolore yolu ikilaiseboke one hengko bele ma yae merele erenaisele.”

## 17

*Yesus Nauwa Ma Hi Yeuboke*

(Mrk. 9:2-13; Luk. 9:28-36)

<sup>1</sup> Ya mehine mbai nekaikokera Yesus yae Petrus, Yakobus, na aka baeke Yohanes naeise yaweumiboke nanembaisa moko mbaise ekate. Nebeinye nda yo na mo-mo ekainyekewate. <sup>2</sup> Nebeisa na ijoko bene erewate Yesus nauwa mahi bewole. Na be yoi hehe hu inyukui wanen naeukoke, na malo keuleumon wili halaman bowole. <sup>3</sup> Hokolo name erate Allahle yenjo kayaayo Musale Elia bele meiyakauboke Yesus naei ane elewate.

<sup>4</sup> Petrus yae Yesusre weunge, “Tuhan, na foi moi sele meyae nda anuwaunge mekannekande, Weyae kena koyae Reyae nda anuwaunge fale name herekonde, mbai waei, hi Musale, hi Eliale.”

<sup>5</sup> Petrus ane weunge hee mangko hehe yae nda yore oumifelemboke. Nebei mangko eisa a borate, elele, “Nda Niyae buhaere haenale Fa, Ra kena foise mokoufe Kiyae. Nare mo boronnele!”

<sup>6</sup> Hokolo name nda a borokate bae buhae hele hokoumiboke, be are aitoroke. <sup>7</sup> Nebeibe Yesus hokolo name bokore meke me yae katawoumi, weumi, “Annu, buhae ohokojiae!”

<sup>8</sup> Na be waijeke erate bae, Yesus mbai mo hebewole.

<sup>9</sup> Mokora owate hee yae hokolo namere Yesus a hun kolowoumi wa weumi, “Reyae Allahle bokora mekale ro miyae uware yeubokale Kiyae nulu yo mahe yora arenunde ya nammanne, mayae ijokore eraukoke rambun ro miyae hiwa yore ehuweyijae.”

<sup>10</sup> Hokolo name yae hinainye, “Nebei mekainya rahene Musale walora wali heere foloukoke are isaeyaeiboke kelaeime holona yae elate, ‘Allahle yendo kayaalo Elia na bere holo yae mende mo nebeisa Wali Ondofolo mende?’”

<sup>11</sup> Yesus yae weumi, “Na hele, Elia bere yae mende ro miyae naei wali beko belere hiyei ranembonde. <sup>12</sup> Reyae wamale, Elia meke, nebeibe ro miyae nare oroiwai kate, naei kenare kate hului yae mokainye. Nebei sului mbai Reyae Allahle bokora mekale ro miyae uware yeubokale Kiyae nebei yo naei me kelee u keleene beko erensubande.”

13 Nebei hee yae wa Yesus na moisa orowate yo isaeyaeiboke, Yohanes bure kowoumi Eliale u mekai wanen nekwole kiyaele abe Yesus elele.

*Alo Yae Aungeboke Kelu Fa Mbaise Yesus Onomi Ikeunge  
(Mrk. 9:14-29; Luk. 9:37-43a)*

14 Yesus hokolo name bele moko orone ro miyae helen rakewaimi bokore bukaiboke okate hee ro mbai meke Yesusle bene oro selen-selen roroukoke <sup>15</sup> na a bele weunge, “Tuhan, Wa yanekoi yase yae ra kelu fare ei meungehawende. Roko yae roko yae wayang mae watene, naei yun beko yeiboyole, nauwa beko hele hubayeunge. <sup>16</sup> Wa moisa orate yo bokore roukanale ekendebe, nebeibe neyae onomi yeise na hului ban mae ukaisele.”

17 Yesus yae weumi, “Na hele ya, mayae nda kulunna ro miyae hila ban rabo ban yo nane merau wali nibi wewere koyauhe yo. Reyae kena okoi sele, naendae mekai horo lon mangkele heki hele mbainye orimeyandebere mayae Rare hila rabo ehale sele. Nane merau kena beko hele hubanale, mai wali mekai nekeimeyabere heki hele kena yae heraweumekale.” Nebeisa nda yore weumi, “Nebei fa yawennoho meu!” <sup>18</sup> Nda fa nauwa einya walobore Yesus oku yae nekeunge. Na uwa einya walobo eukuke nebei hee na hibi hele nda fa onomi rouke.

19 Ya hi yae Yesus na moisa orowate yo bele na mo-mo nekwate mo hinainye, “Rahene walobo hukeisi ferere meyae na hului ban sele kande?”

20 Yesus nda yore weumi, “Ma hila rabo kalo molombene. Nebeinye mare wamale nana hesele mai hila rabo sawi ko hului honayembe yae mayae na hului nda mokore waungele, ‘Nda anuwaufa ndire yae nakeleisi,’ nebei moko nakeleufiube. Mayae hila rabo halemmembena, na hului rambun kaban sele mokombe. <sup>21</sup> Nda walobo ma nendon mae ehukeisi hului, ebeli boungele bele yarele me heubonde moni yae nekeukonde bele na hului hukeumile.”\*

22 Ya mbai Yesus na moisa orowate yo bele nanembaisa Galilea kanine arilaisike mo Yesus yae weumi, “Reyae Allahle bokora mekale ro miyae uware yeubokale Kiyae ro miyae naei me kelee u keleene enaisekinymbonde. <sup>23</sup> Nebei ro miyae yae enaisehombonde, ya name nendo nulu yo mahe yora arenunde.” Nebei a ma na moisa orayeke yore ukeumine, na kena beko hele hubawainye.

*Allahre Ei Mom-mom Imae Na Kaban Sele Kiyae Naei Pajak Roi*

24 Yesus na moisa orowate yo bele ewate Kapernaum yone aibaleke hee, Allahre ei mom-mom imae na kaban sele naei roise riyeyate yo Petrusle bokore mekate mo hinainye, “Allahre ei mom-mom imae naei roi dirham bee riyande mai guru mokombondere?”

25 Petrus yae weumi, “Mokombondere.”

Petrus imae eise eweufike. Eweufike hee mo, Yesus na bere a hineunge, “Simon, waei u benera naendae yae hubanae, nde naeise nda kani kelana Ondofolo yoni-yoni pajak naei roi riyeyaimi. Na kanina kelana ro miyaere? Yo moinya meiko-meiko ro miyaere?”

26 Petrus yae weunge, “Yo moinya meiko-meiko ro miyaere.”

Nebeinye Yesus yae weunge, “Nebeinya na kanina kelana ro miyae omokoi. <sup>27</sup> Nebeibe nda kani yo kela yo eyae na kena beko mokomamibonde belene, kaiwa rowei bukobane eiwoyo. Bena ka yoboubonde rowele, neuwa kaeweungekonde roi dirham keli neuwa einye hubayeukonde. Nebei roi yaroukonde aei bee naei eumokoubonde.”

## 18

*Yesus Naei Me Kelee U Keleene Nekate Holona Ro Bele Enainyeronde Nde Naei?  
(Mrk. 9:33-37; Luk. 9:46-48)*

1 Petrusre ane uwounghe hee yae na moisa orowate yo mekate Yesusre hinainye, “Waei me kelee u keleene nekate ro miyae nolone nde ro bele enainyerombonde?”

2 Yesus fa kaei-kaei mbai kaeneungekoke nda yo nolone haungeboke mo, <sup>3</sup> weumi, “Reyae mare wamale, nana hesele mai wali nulu ekeiboi mauwa ebukeisi nda fa kaei-kaei wanen eyeiboinya, Raei me kele u keleene nekate holo einye mayae eyeiboi sului. <sup>4</sup> Nde yae nauwa, na kena u ane rannehinde nda fa kaei-kaei wanen yembondena, Raei me kelee u keleene nekate holo einye nebei ro miyae ro kaban sele enainyeronde.

<sup>5</sup> “Nane merau nde yae Raei ro aerene na wali fa kaei-kaei wanen yeuboke ro miyaere ei hawennelena, Rare ei haweufe wanen. <sup>6</sup> Nebeibe nde mai nolona nda fa kaei-kaei mbaise, na hila rabo Rare haleuferu mokonnebode ruwendena, naei foi sele nebei kiyae

\* 17:21 17:21 Ayat 21 homofae hena hiwa barainyekoke hiwa ebaraikoi.

na horone ha ruka kaban mae bainyaisinde nau bune enaiwonde. <sup>7</sup> Nda kani kelana ro miyae hiware mokommile beko mokonaikonde ro miyae, beko hele hubanainyele. Rambun beko na hibi-hibi baete, nebeibe naei beko hele nebeise mokonate ro miyae.

<sup>8</sup> “Mai kena u foi yae kayaa hebembe. Na hului waei me mbai oro mbai era buloone elaekei sele konde. Na foi sele nebei me oro mbai neufande nainyekon mae euferende belene. Nebei sului mbai weyae na hului beko mokolere kena kole. Naei foi sele waei beko bele kena ure herawewende, weyae narakare ele belene. <sup>9</sup> Nane merau na hului ijoko mbai era buloone elaekei sele konde. Na foi sele nebei ijoko mbai keleufinde, ijoko bee yae euferende belene. Nebei sului mbai weyae na hului rambun beko ijoko yae ereubondere kena kole. Na foi sele waei beko bele kena ure herawewende, weyae narakare ele belene.

<sup>10</sup> “Bene nekenayembe, nda fa kaei-kaei holonare ro ban mae eleijae. Reyae mare isaeyaemale, nda yo naei malaikat yoni-yoni Maekole be yoi na hibi mo surgane ekaikanainye na hului nebei fa holona a ungainyele.

#### *Domba Naei Ahuba Ahuneuboke*

<sup>11</sup> “Reyae Allahle bokora mekale ro miyae uware yeubokale Kiyae ro miyae na wali nalaiبوکه horoyate yore holere moloremibonde naeise mekale.

<sup>12</sup> “Waei u benera naendae yae nekayete? Ro mbai na domba rorele u maehae mbai (100) kate. Nebei nolora mbai nundeuboube. Nda mbai nundeubokere baekoisene, na kayaa ro na domba 99 hele elune nukeumiboube? <sup>13</sup> Reyae wamale, nana hesele nebei domba mbai erennebondena, rei mai kaban sele koubé, nda domba 99 elune nekate yore rei mai kommira. <sup>14</sup> Nebei sului mbai Arai surgana ekenekele Kiyae kena kaban kole nda fa fele-fele u mekai wanen ro miyae nolora hi Naei wali nibi wewe okoyei nekenate.

#### *Wali Nibi Foi Moko-Mokoise*

<sup>15</sup> “Waka baeke yae beko ware mokoneibotena, wauwa yae na bokore ele, a usaei weungele. Boroneibotena nebei kiyaele aka baekere nekebe. <sup>16</sup> Neyae ware oboroinya, me u beko hiyei raneboise nebei rambun ijoko erewate ro miyae bee name a hului kolonnele naeise, ro mbai bee naei bokore yaweumibonde. <sup>17</sup> Nebei yo naei a wainye oboroinya, naei me u beko mokouboke jemaatre isaeyemmibombe. Jemaat naei a oboroinya nare erennele Allahre onaeinye holona ro wanen nane merau pajakre arileyate ro beko wanen.

<sup>18</sup> “Rare hakaufele yore nana heselebe mare wamale, rahe rambun nda kani kelana mai kena mbai yae hun rannehimbená, Allah surgane ekenekele Kiyae nebei sului mbai be hinenembe. Nda kani kelane mayae kena mbai yae merau rannehimbe, Allah surgane ekenekele Kiyae nebei sului mbai be hinenembe. <sup>19</sup> Benen Reyae wamale, nda kani kelane mai nolona ro bee rambun mbaise na kena mbai yae riyeneisindena, nebei a boneinyele Maeko Surgana nekele Kiyae nebei rambun emmimokombonde. <sup>20</sup> Rabuhine ban makei anuwaunge ro bee name Raei ro einye arilenaisindena, nebei yo naei nolone Reyae rangkele.”

#### *Yebaei Bubaei Na U Mekai Beko*

<sup>21</sup> Nebeisa Petrus meke mo Yesusre hineunge, “Tuhan, raei aka baeke yae rare u mekai beko mokonsebondena, roko naennaen mae nebei u mekai beko mokoufebokere raei u benera hanensekonde, roko mehine bee bele yae?”

<sup>22</sup> Yesus yae weunge, “Roko mehine bee bele yae ban. Nana hesele roko u name me bee oro nen bee bele (77) hului yae mokoungkonde.

<sup>23</sup> “Nebeinye Raei me kelee u keleene nekate holona naeise ondofolo mbai na yebaei bubaei rambun yaraikokere mere baenaikondere kaenewoumi wanen mae a ahundebondere. <sup>24</sup> Nebei mene mokowole hee, ro mbai rambun yaroweke na roi kaban sele 10.000 talenta hului yeubokebe nda ondofolo bere yawainyehoke mekate. <sup>25</sup> Nebei ro nda roi kaban sului aheikoise na hului banne, nebei ondofolo yae ukeumi ekate, ‘Naei uwa, na miyae, na fa-fa, naeinya honainye rambun nanemene hele naise henaikonde, nebei roi suluisse ahenaikondere.’

<sup>26</sup> “Nebei yebaei bubaei be are neke be hineunge wa weunge, ‘Wa kena na hebaen fere rakeise. Nebei rambunde yaroukokale roi sului eraehengkonde.’ <sup>27</sup> Nebei ondofolo kena beko hubawoungene, nebei rore heungeboke roi suluisa fomaungeboke omokoiyae ukeunge.

<sup>28</sup> “Nebeibe nda ro nebei ondofolole bera eukukera, eke na kahili mbai naeinya rambun yaroweke na roi ane hele 100 dinar hului yeuboke kiyaebe hubayeikoke.

Ikileuboke na horora ramewoungwe wa weunge, 'Rambun yaroukokae roi sului hasale aheiko!'

<sup>29</sup> "Na kahili are hele ruke a ri-ti yae riyeunge weunge, 'Wa kena na hebaen fere rakeise. Nebei rambun yaroukokale roi sului na hului aherekote ya!'

<sup>30</sup> "Nebeibe nda ro roko yae roko yae riwoungwe hororebe, neyae kena ban sele. Nebei ro kawane eungehekoke hebende yaroukoke roi sului ahengkonde baensonde mo menduwende. <sup>31</sup> Nebei u mekai mokouboke yebaei bubaei hiwa yo erewatene, kenara beko yae hubawainye. Nda u mekai mokoubokene nda yona ondofolore yakainyeboke.

<sup>32</sup> "Nebei ondofolo ukeumi na yebaei bubaei kaenainyekoke meke wa weunge, 'Weyae ro beko hele, waei rambun yarowoyae na hebaen-sebaen riyewaraene reyae fomaubokawale. <sup>33</sup> Reyae ware yanekoi yase yae ei hawawale ma, wa kahilire weyae ei ehawe sului.' <sup>34</sup> Nda ondofolo na kena ikele hele kowolene kawa kayaare hebate yore kinyeumbokoke, nda ro nebeinye hebende naei yarowole rambun roi sului ahengkonde baensonde mo kawara menduwende.

<sup>35</sup> "Nda wali nekaubene maise naeise mai aka baeke naei bekore mai u benera nundenayengkombena, Maeko surgana ekenekele Kiyae nebei sului mbai mare enemmokombe."

## 19

### *Miyae Neisi-Neisi Naei A Usaei*

(Mrk. 10:1-12)

<sup>1</sup> Yesus nda a usaei waeisaei huwoumi huba mokoungkokera, Galilea kanire kulun uke Yudea kanire endere bukeufike Yordan wi enaa reufira ewole. <sup>2</sup> Ro miyae helen bolen Yesusre hakainyekoke, ewate ijenne erana buloona yo onomi yeumiyeke.

<sup>3</sup> Farisi holona yo mekate oro halunde ungayonderene nda a yae Yesusre hinainye, "Musale walora wali heere foloukoke a huluinye na hului ro mbai naei kena hului yae na miyaere nennehinde?"

<sup>4</sup> Yesus yae weumi, "Homona molaikoke a mayae kaukoke hele. Na bere hele ro me miyae mere mokouboke Kiyae ro bele miyae bele mokoukoke. <sup>5</sup> Nebeisa eleukoke, 'Nebei aerene ro naei ako nake nukemmibonde na miyae bele mbainye nekenete, na beene uwa mbaise inyeibonde ((kena u aweneikonde)).' <sup>6</sup> Nebei mekai yaere uwa bee ban, nana hesele mbaise yeiboke. Nebeinye, Allah yae mbaise mokoungboke yo ro miyae yae kayee omoloiyae hele."

<sup>7</sup> Nda yo yae Yesusre wainye, "Nebei mekai lonbe, rahe aerene Musa ukeumi ro na miyaere nennehinderena kayeere moloneikonde naei homo yae mokombonde yennele?"

<sup>8</sup> Yesus yae weumi, "Allah Naei a eleukoke hakombere mayae kena okoi aerene Musa be hinembokembe. Nana hesele na bere nebei mekai ban. <sup>9</sup> Nebeinye Reyae mare wamale, Nde yae na miyae ro hi bele uwa mbainye honoikoke aerene ban nennehinde, nebeisa maengke hi benen rowendena, nebei ro yoko kaeimaebe koukoke."

<sup>10</sup> Yesus na moisa orowate yo yae wainye, "Rore miyaere yeiboyete na mekai nebei wanenna, naei foi sele ro miyae eyaroi, miyae maengke rore ei."

<sup>11</sup> Nebeibe Yesus nda yore weumi, "Ro miyae nanemene miyae ehurei a kelaemalere ehakoiboi sului, Allah Naei a elelere hakainye holona ro miyae mo na hului nebei a elelere hakonainyebonde. <sup>12</sup> Ro miyae ban mo nekenende naeise hiwa nenakele yarele eisa nebei mekai honokatene, ro hiwa yo hakara yaraimi aerene miyae eyaroi. Hiwa Raei me kelee u keleene kalia na hibi-hibi mokate aerene miyae eyaroi. Nde yae na hului Raei kelaemale a usaei hakonnele, nenaeyiae hakonnele."

### *Fa-Fa Yesusle Bokore Yauwaimi Mate*

(Mrk. 10:13-16; Luk. 18:15-17)

<sup>13</sup> Nebei hee yae ro miyae na fa-fa fele-fele naei yun ranne Yesus mere kolommilere nane merau Allahlere ebeli boisi naeise Yesusle bokore yauwaimi mewate. Nebeibe Yesus na moisa orowate yo yae nebei fa-fa yaraimi mate ro miyaere a elae yae uwaimi.

<sup>14</sup> Yesus na moisa orate yore a elae yae weumi, "Rahene nebei fa-fa a hun kolaumi, waemmihi Raei bokore mai. Rabuhine ban ro miyae nde Rare hila rabo haleufe nda fa-fa naekole nenakele hila rabo haleiyaimi wanen mae Raei me kelee u keleene nekate holone na hului enayembonde." <sup>15</sup> Nebeisa Yesus na mere mo nda fa-fa naei yun ranne koloumikoke. Baeufokera mo Yesus nebei anuwaufa kulun uke ewole.

### *Keren Bele Nale Bele Hokolo Fa Naei Ahuba*

(Mrk. 10:17-31; Luk. 18:18-30)



<sup>16</sup> Ro mbai Yesusle bokore meke mo weunge, "Guru, rahe me u foi yae mokorebondene wali hena bona eitoufele?"

<sup>17</sup> Yesus yae weunge, "Rahe aerene 'foi' naei are Rare hinarae? Ako mbai ken sele foi. Nebeibe waei kena koyae wali hena bonare rowelerena, Musale walora wali heere foloukoke a faeube hakoubonde!"

<sup>18</sup> Nebei ro yae Yesusre weunge, "Wali heere foloukoke makei kayeero?"

Yesus yae weunge, "Ro miyae ohojjae, ro miyae bele miyae ro bele mbainye ohonoijae, yoko ebaeyejjae, ro naei miyae naei a ame-ame ehuweijjae, <sup>19</sup> ako nakere be hineumiyende, waei uware kena buhae haenae wanen nebei sului mbai ya-ya wali nibi mbainye oraube yore heumiyende."

<sup>20</sup> Nda ro yae weunge, "Nda warae nanemene mokoimeyale, rahebe erarae kalore moloufe?"

<sup>21</sup> Yesus yae weunge, "Waei kena haehae koyae wali himaloungebonderena, eye, waei keren nale honayete nanemene naise heukonde. Nebei keren nale heukonde na roi keren ban nale ban ro miyae waheumikonde. Surgana eba he yae weyae eukowende. Nebeisa mele raei moisa meufakoubonde orayende."

<sup>22</sup> Nebei ro nda a wanen boroubokene na kena beko hele hubawoungene, aloungokoke ewole. Rabuhine ban nebei ro keren nale helen sele honowainyelene.

<sup>23</sup> Nebeisa Yesus na moisa orate yore weumi, "Na helebe Reyae wamale, na yabi-yabi hele ro mbai keren bele nale bele kiyae, Raei me kelee u keleene nekate yo holo eise enensindere. <sup>24</sup> Benen Reyae wamale, aimake bulure obo unta na hului eweifiube, nebeibe keren bele nale bele yo Raei me kelee u keleene nekate yo holonare enayembondere na yabi-yabi hele."

<sup>25</sup> Yesus na moisa orate yo nda wanen borowatene fa yae bowate. Nebeisa Yesusre hinainye, "Nebei wanenna, nde naeibe wali hena bona enajjaronde naeise hole emmimolombonde?"

<sup>26</sup> Nda yore kaeneumikoke wa Yesus yae weumi, "Ro miyae yae nda rambun omokoi hului, nebeibe Allah yae rambun nanemene na hului mokoikoyele!"

<sup>27</sup> Nebeinye Petrus yae Yesusre weunge, "Meyae mokandeki rambun nanemene nukewande haiwande, ware mo hakayekokete. Nebei mekainye rahe era yae meyae emayarongkonde?"

<sup>28</sup> Yesus yae weunge, "Reyae na helebe nda a wamale, nda kani kela neme ennebensonde hee Reyae Allahle bokora mekale ro miyae uware yeubokale Kiyae one hengko bele yae kendan wameranne nuwerebonde hee, mayae Rare hakaufekoke yo ro me bee oro nen bee bele (12) kendan wameran mokoungehake ranne enrombombe, Israel yoho yoni-yoni mai keleene enainyekende. <sup>29</sup> Nane merau ro miyae nde Raei ro aerene naei imae obe, naei aka baeke, ako nake, kelu omi, na buro kela nukewole, nebei kiyae raka rorele u maehae mbai (100) sele nebei rambun nukewolere enjarongkonde nane merau wali hena bona endowende. <sup>30</sup> Nebeibe rore rowaimi ro miyae helen Allahle bene ro ban inyaibonde. Nane merau nda hee ro ban nekate ro miyae helen ro bele inyaibonde."

## 20

### *Anggur Heke Kalia Mokate Yo Naei Ahuba*

<sup>1</sup> Yesus nebei yore weumi, "Raei me kelee u keleene nekate ro miyae holona na mekai, rowa mbai na rene kaukau imaera akouboke naei anggur hekere mokonate yone baeumiyeke wanen mae a ahunerebonde ufembere. <sup>2</sup> Weumikoke yo ya mbai na roibu hobeikoise dinar mbai yae be hinaibo, nebeisa nda yore ukeumi naei anggur hekene ekaimokowate.

<sup>3</sup> "Nda heke rowa rene hukai mehine keli hului eukuke oroweke. Nai hei-sei anuwaunge ro miyae hiwa kalia ban nekatebe erewoumi. <sup>4</sup> Nda yore weumi, 'Mangkele yae raei anggur heke kalia mokombere. Eme, roibu yeyaimi hului mare isembe.' <sup>5</sup> Nda yo alainyekoke ewate.

"Rai hu hului me bee oro nen bee bele (12) nane merau huae rai hukai name hului eukuke oroweke, ro hiwa yo hubayaeikoke mo bona hubayaeikoke a hului yae benen ukeumi. <sup>6</sup> Huae rai hukai maehae mbai sului benen eukuke oroweke, ro miyae hiwabe hubayaeikokere nda yore weumi, 'Rahene mayae nda hu koko kalia ban nekeyaube?'

<sup>7</sup> "Nda yo wainye, 'Ro hi kaliare emamokonde naei a eweinnye.'

"Heke rowa yae weumi, 'Nebei mekainya mayae raei anggur hekene kalia emmoko.'

<sup>8</sup> “Hu helae bowole hee nda rowa na kalia yunde hebele rore weunge, ‘Kalia yo nanemene na roise waheumikondere kaeneimiko mai. Moisa mayeuboke yo naeise huba raweubonde waheumile onde na rene na mayeuboke yo na moi sungkaya.’

<sup>9</sup> “Hukai maehae mbai sului kaliare mayeuboke yo mekate, nebei kalia yun mae ro mbai dinar mbai yeumikoke. <sup>10</sup> Nebeisa na rene hele kaliare mayeuboke yo mekate, nda yo na u benera nekaimi helene yaronaikonde era, nebeibe nda ro mbai dinar mbai yeumikoke. <sup>11</sup> Nda yo yaraikoke heera na mulun-mulun bele heke roware wainye, <sup>12</sup> ‘Moinya hele mayeuboke yo hukai mbai mo kalia mokaikoke bele meyae nda hu koko rolonsan ijaja beyande yo bele, rahene roi nane helen nen yeumekokae?’

<sup>13</sup> “Nebei rowa yae na ro hire weunge, ‘Aka baeke, rahe u mekai ware kelebokawalene raei u mekai na ijen ban mae eleyae? Ya mbai dinar mbai isete naeise weyae be hineubokae. <sup>14</sup> Waei kayeero rowei, ndara eye. Reyae ware ikawale hului yae kalia moisa hele mayeuboke yore isemikondere kena kale. <sup>15</sup> Raei rambun honaisele raei kena hului yae mokorele. Reyae eiwahe meywahe kena ma haraungebokalene, nebeinye weyae kena hensen okojiae!’

<sup>16</sup> “Naei mekai yaere ro ban nekate ro miyae helen Allahle bene ro bele inyaibonde. Rore raimi ro miyae helen ro ban inyaibonde.”

*Yesus Naei Herende Ya Naeise Isaei Iwoumi*  
(Mrk. 10:32-34; Luk. 18:31-34)

<sup>17</sup> Yesus naei Yerusalem yore ewate, nibi nolore mo haeikoke bae na moisa orowate yo me bee mehine bee belere mo kaeneumikoke, nena ei mo arilaisike Yesus ane weumi, <sup>18</sup> “Angkaei boron! Eyae nda hee Yerusalem yore ande. Nebei anuwau emalene Reyae Allahle bokora mekale ro miyae uware yeubokale Kiyaere imam yun-jun holo bele nane merau Musale walora wali heere foloukoke are isaeyaeiboke kelaemi yo holo bele me einye kinyenaisebonde. Nebei yo yae honaisebonde naei a hokonaikonde. <sup>19</sup> Nebeisa Yahudi holone eyeiboi yore kinyenaisebonde. Nebei yo yae aukaka weitasi konaisele, nane merau ohaline bonaisekonde, nebeibe ya name mo Reyae arenunde!”

*Yohanesle Yakobusle Naeise Nenake Yesusre A Riwoungue*  
(Mrk. 10:35-45)

<sup>20</sup> Nebeisa Zebedeusle miyae na fa-fa bee Yakobusle Yohanesle yaweumiboke Yesusle bokore ekate, oro selen-selen mae roroukoke, rambun mbaise riyennehindere.

<sup>21</sup> Yesus yae weunge, “Rahe rambunbe weyae kena koyae?”

Zebedeusle miyae yae weunge, “Waei me kelee u keleene nekate ro miyae holo einye, reyae kena kale nda fa-fa bee na huluinya Wa meline meubene eumihangkonde.”

<sup>22</sup> Nebeibe Yesus yae weunge, “Rare riyarae a mekai wenaiejae isaeyeiboi.” Yesus euweke hokolo bere weumi, “Reyae andehinde bu kolaei mayae na hului aneiseibe, ((Rare beko enaisehubande na hului mayae ennehubabe))?”

Yesusre weinye, “Meyae na hului.”

<sup>23</sup> Nda beere Yesus weumi, “Nana hesele Reyae andehinde bu kolaeisa mayae aneiseibe. Nebeibe Raei meline meubene ennekebe naeise Raei me einye ban. Nebei anuwau Maeko yae eleukoke ro miyaere yemmile naeise mokoungehake.”

<sup>24</sup> Yesus na moisa orowate me bee hiwa yo nebei wanan a borokatene, hokolo beere ikele hele kowaimi. <sup>25</sup> Nebeinye Yesus nda yo nanemene kaeneumikoke mekate mo weumi, “Mayae maisaei, nda kani kelana yun-jun Allahre isian nekeyate holona naei kena hului yae naei me kelee u keleene nekate yore mokoyaimi. Nane merau ondofole kose na keleena yore herawaimi wejiei kaeiboi ban nekeyate. <sup>26</sup> Mai holona nekaube nolone nebei mekai ban. Nde yae kena kole mai nolone kabande yembonderena, mai yebaei bubaeise yembonde hele. <sup>27</sup> Nane merau nde yae mai nolone be neiboi rore yembondere kena kondena, mai yebaei bubaeise yembonde hele. <sup>28</sup> Rare erensebo, Reyae Allahle bokora mekale ro miyae uware yeubokale Kiyaere Rare mokonaiselere mekale ban. Reyae ro miyaere mokoremilere mekale, nane merau ro miyae helen naei beko bako aherekonde baensonde naeise Raei uwa yae kinyeremibonde honaisebonde.”

*Ro Bee Ijoko Kumba Yesus Onomi Ikeumi*  
(Mrk. 10:46-52; Luk. 18:35-43)

<sup>29</sup> Yesus na moisa orowate yo bele Yerikho yora aibaleke hee ro miyae helen bolen Yesusre hakainyekoke ewate. <sup>30</sup> Yesus ewole nibi enene ro bee ijoko kumba roiboke nekewote. Yesus ele borowotene hokolo bee kali yae kaenewote, “Tuhan, aei Yahudi Ondofolo Daudle orona mena, Wa yanekoi yase yae maere ei meimaiho!”

<sup>31</sup> Nane ro miyae helen bolen ate yo yae hokolo beere waimi, "Hileibo!" Nebeibe nda bee benen kali elae hele yae kaenete, "Tuhan, Ondofolo Daudle orona mena, maere yanekoi yase yae ei haweimeko!"

<sup>32</sup> Nebeinye Yesus hebeunguke, hokolo beere kaeneumikoke mo, Yesus yae hineumi, "Rahebe mayae kena koube Reyae mokorebobere?"

<sup>33</sup> Hokolo bee yae weinye, "Tuhan, maei kena ijoko eralere konde."

<sup>34</sup> Yesus kena beko hele hubawoungene, na mere mo nekeunge na ijokora me rameumihike. Nebei hee yae na ijoko keleikoke na hului erewote. Nebeisa Yesusre hakoinyeboke ewate.

## 21

*Yesus Yerusalemde Eke Yae Ro Miyae Nare Buma Kolowainye*  
(Mrk. 11:1-11; Luk. 19:28-40; Yoh. 12:12-19)

<sup>1</sup> Yesus na moisa orowate yo bele Yerusalem yo bere mo rainyehike hee Zaitun moko orona honole yo Betfagene aibaleke. Ro beere mo ukeumi bere holo yae eneterene <sup>2</sup> nda a bele weumi, "Ma bena yo honolere yae ebe." Nebei yo ebalebene keledai nafe mbai ha yae wokainyele na kelu bele hebetebe hubayekobe. Nebei keledai ha bulaerennekobe na beene yawemmibobe mebe. <sup>3</sup> Ro miyae hi yae hinenayebe wanenna, wemmile, "Tuhan Yesus nda keledai rande hebenundere, nebeisa benen roungaimete."

<sup>4</sup> Na bena Allahle yendo kayaalo Zakharia yae nuleungehoke a na hului yembondere nda rambun bewate. Zakharia nda a mekai moloukoke,

<sup>5</sup> "Yerusalem yore a weinye,

'Erei! Mai Ondofolo mai bokore mele.

Nebei ro kena nime haba

keledai kelu randa mele.' "\*

<sup>6</sup> Hokolo bee ekete Yesus yae ukeumi hului yae eimokouboke. <sup>7</sup> Keledai nafe na kelu bele nanembaisa yaweimiboke, nebeisa keledai moko ranne malo baikoke, Yesus keledai ranne yeufebeunguke. <sup>8</sup> Ro miyae helen bolen sele ei haungainyeleri malo nibine bewate, hiwa yo o maensa nihewate ende nibine haiwate. <sup>9</sup> Bere ate holona bele, na moisa mate holona bele kaenete,

"Foi moi Ondofolo Daudle orona mena kelu.

Allahle ro yae meke Kiyae,

onomi foka hubanayende.†

Allah anuwau na bumana hele nekele Kiyaere

eyae nemene ei moloman."

<sup>10</sup> Yerusalem yo eise eweufike hee ro miyae yeufike, eisine meisine hinete, "Nda ro nde?"

<sup>11</sup> Ro miyae yae elate, "Nebei niyae Yesus Galilea kani Nazaret yona yendo kayaalo."

<sup>12</sup> Yesus Allahre ei mom-mom imae na kaban sele kiyae eise eweufike, ro miyae imaehoungue naise haete yo, yaroi-yaroi se yarate yo nanemene hukewoumi, Yahudi naei ban roi yarowate Yahudi naei roi yae ibewaimi yo naei anuwau, merpati naise haete anuwau, yarowole are felewoumi. <sup>13</sup> Nda yore Allah Na homofaene Naei imae are moloukoke Yesus yae weumi, " 'Raei imae ebeli boi-boi imae yae enayelende,'‡ nebeibe mayae mokaungeboke yokoyo naei nalere yeuboke."

<sup>14</sup> Ro miyae ijoko kumba bele orora nimewaimi yo bele Yesus Allahre ei mom-mom imae na kaban sele kiyae eweufikere hokoumeke, nanemene Yesus onomi iwoumi. <sup>15</sup> Nebeibe imam yun-jun nane merau Musale walora wali heere foloukoke are isaeyaeiboke kelaeimi holona yo Yesus iwau emere-emere mokowole erewatene nane merau nebeinya fa-fa a bulau wae kate ei molainye, "Onomi foka Daudle orona mena kelu" boratene, na kenare ikele hele kowate.

<sup>16</sup> Nda yo yae Yesusre wainye, "Nda fa-fa yae elate a weyae boroyae?"

Yesus yae weumi, "Reyae borale. Mayae roko mbai Allahle homofaene molaikoke okoikoi mone? Nebei homofae Raei naei are moloukoke,

Fa-fa wayeu naei euwara bele

fa-fa fele-fele naei euwara bele

Ware buma kaenayete naeise mokoungehake."

<sup>17</sup> Nebei yore Yesus nanene nukeumiboke Yerusalemde eukuke, bukeufike Betania yone ensonondere ewole.

\* 21:5 21:5 Zakharia 9:9 † 21:9 21:9 Mazmur 118:26 ‡ 21:13 21:13 Yesaya 56:7

*Yesus Olomo Yae Neungeboke Ara No  
(Mrk. 11:12-14, 20-24)*

<sup>18</sup> Na rene hele Yesus benen bukeufike Yerusalemde ewole. Nibine ewate hee Yesus moni hubawoune. <sup>19</sup> Nibi kelaeunge ara no erekene nebeise yae eke, nebeibe ani mbai ereiboi sele, fae bangka mo hebewate. Nebei ara nore weunge, "Weyae nda heera ani omokoi mo hebewendere!" Are ukeunge hee na hibi nebei ara na fae habawate.

<sup>20</sup> Na moisa orowate yo iwau eme hele mokouboke erewatene fa yae bowate nebeisa elate, "Naendae mekai yae nda ara no na roko mbai sele kalaukoke?"

<sup>21</sup> Yesus yae weumi, "Reyae nana heselebe wamale, Mai hila rabo kena wauwau banna, mayae na hului nda ara nore ukanale kalaukoke ma mokombombe, nane merau nebei mo ban. Mayae na hului nda mokore wennele, 'Weije naubune eituwe,' nebei rambun na hului enaibende. <sup>22</sup> Mai ebelire embombe rambun hila rabo nana heselena, mayae na hului enjarombe."

*Yesus Ndele Ro Yae Meke Mokole  
(Mrk. 11:27-33; Luk. 20:1-8)*

<sup>23</sup> Allahre ei mom-mom imae na kaban sele kiyaeene Yesus eweufike kelewoumi hee, imam yun-jun bele Yahudi yoyo koseyo bele Yesusle bokore mekate mo hinainye, "Ndele ro yae nda me u mekai nanemene Weyae mokoyae? Nde yae nda elae ikete?"

<sup>24</sup> Yesus yae weumi, "Reyae naei mekai a mbaise mare hinerensimbere. Nebei a hinerensimbe Rare yakansombena, nebei me u mekai mokalere Rare elare ikeufe a mare yakarembombe." <sup>25</sup> Yesus nda yore hineumi, "Ndele ro yae Yohanes ro miyaere bure kowoumi, Allahle ro yae, ro miyae naei ro yae?"

Nda yo nenaei mo a kolainyekoke wa elate, "Eyae umande, 'Allahle ro yae,' Neyae wemmele, 'Nebei mekainya rahene mayae nare na hele yae eleikoi kowaube?"

<sup>26</sup> Nebeibe eyae umande, 'Nda ro miyae naei ro yae,' eyae nda ro miyae helen boronaibondere buhae hele hokoume." Rabuhine ban ro miyae nanemene hele nda Yohanesre Allahle yenjo kayaayo holona yae elatene.

<sup>27</sup> Nebeinye nda yo yae Yesusre wainye, "Meyae maesaei ban."

Yesus yae weumi, "Nebei mekainya, Reyae naei mekai mbai ndele ro yae mokale naeise mare eyakai."

*Ako Mbainya Kelu Wa Bee Naei Ahuba*

<sup>28</sup> Yesus yae nebei yore weumi, "Nda ahumbo-ahumbo ahunerebonde rahe a yae elembe? Ro mbai na kelu wa bee hele. Nebei ro eke na kelu benare weunge, 'Kelu, mana ya eye, anggur hekene kalia eimoko.'

<sup>29</sup> "Na kelu bena kiyae yae weunge, 'Arai, reyae nebei kaliare ahi elale.' Nebeibe na heki ban mo, naei u bene nekainyekokera mehi neufake aloungekoke nebei hekene ekemokowole.

<sup>30</sup> "Nda ro na kelu moinya bokore eke nebei a hului mbai ukeunge. Nebei fa yae weunge, 'Arai reyae erelere.' Nebeibe neyae hekere ei nekewole.

<sup>31</sup> "Nda kelu wa beera nde yae naekole a hakouboke?"

Nda yo yae wainye, "Bena fa kiyae yae."

Yesus yae nebei imam yun-jun bele Yahudi yoyo koseyo belere weumi, "Reyae na helebe nda a wamale, Pajak roi arileyate yo bele nauwa naise heyate miyae maengke bele Raei me kelee u keleene nekate yo holo eise mare moi ungainyemombe bere yae enayembonde. <sup>32</sup> Rabuhine ban Yohanes bure kowoumi ro meke Allah mokoungehake nibi ro miyaere wali himalainyeboke yore me baemmile are kelewoumi mayae boraukokebe, na helere eleikoi nulu ekeiboi. Nebeibe nane beko bako bele yo na hele yae elewate."

*Heke Roi Yae Mokate Yo Ahuba  
(Mrk. 12:1-12; Luk. 20:9-19)*

<sup>33</sup> Yesus yae weumi, "Benen a mbaise ahunerebonde ufembere borombe. Kani rowa mbai anggur heke mokouboke mo nebei heke ele yae neuboke, anggur bure ramenat rilenat naei anuwau a bulu waeuboke, heke kayaa hensan naei imae heuboke. Nebeisa roi yae mokonate yore nebei heke kinyeumboke, kulun uke, yo hire kolone oroweke.

<sup>34</sup> Anggur anire hokonate hee meuyeuboke mo, kani rowa na yebaei bubaeise ukeumi anggur ani naei kayeerore yarongkonderene na hekere mokate yo bokore ekate.

<sup>35</sup> "Nebeibe hekere mokate yo nda yebaei bubaei ukeumi ekatere ikilailaikoke hi erahuae yae baikoke, hi haiboke, name nendo ruka yae haiwainye. <sup>36</sup> Nebeisa kani rowa na yebaei bubaei helen sele na bena ekate hului mbai ukeumi ewate, nebeibe na bere ukeumi ekatere mokowaimi mekai yae nda yore mokowaimi. <sup>37</sup> Kani rowa na yebaei

bubaei haikoke baeufokene, na moi sungkaya hele naei kelu mbai ken sele nda yo bokore ukeunge ewole. Naei u benera elele, 'Raei kelu yae endene fe faenainyele.'

<sup>38</sup> "Nebeibe heke yo na kelu mewole erekainyele hee, hi yae hire weunge, 'Kani rowa naei rambunde kinyennele kiyaebe mele. Men! Eyae homabon. Nebei mekai yaere nare kinyennele rambun aeise inyaibonde.' <sup>39</sup> Heke yo nda kelu fa ikilaiبوکه, heke moise yobaiboکه eke mo, nebeisa haiboکه."

<sup>40</sup> Yesus yae hineumi, "Kani rowa bensonde mende hee anggur hekere kinyeumiboکه mokowate yore naendae mekai yae mokommibonde?"

<sup>41</sup> Nda yo yae wainye, "Nebei u mekai bekore mokaiبوکه yore hongkonde beko mokommibonde, nebeisa nane anggur heke mokowate hiwa yore kinyeumibonde. Nebei yo yae anggur anire na rokone baei nebei rowa bele enaiwahende."

<sup>42</sup> Yesus benen weumi, "Mayae Allahle homofaene nda mekai yae moloukokene kaukoکه hele,

'Imae hei-seise isaei hebaen bele yo na hului banne wokate rukabe

Allah yae nebei imae naei berei rukare mokouبوکه.

Aei ijokone erannele

nebei wanen mokouبوکه foi sele.' "§

<sup>43</sup> "Nebei aerene Reyae wamale, Raei me kelee u keleene nekate yo holore mayae Yahudi agamanare mo hakaube yore eyei. Raei kena kale me u mokonatere ro miyae ani foise mokate o wanen yaeiboکه. Nda u mekai wanen ro miyae Raei me kelee u keleene nekate yo holonare enaijembonde. <sup>44</sup> Nde naei Rare moi ungaiondena, ehee bukulu inyaimile hele. Nebei yo ruka oro halunde naleisiyeumi oimohaete wanen inyaibonde. Nane merau nde naei Reyae mere noremiyonde yo, ehee bukulu ehakaи sele inyaimile hele. Nebei yo ruka yae ennefelembonde wanen, mohi-mohi kamai-kamai inyaibonde."

<sup>45</sup> Imam yun-jun nane merau Farisi holona yo Yesus yae a ahunewole huwoumi borokate hee, nda holo bee isaeyaeiboکه naei uwa naei abe Yesus ahuneuboke huwoumi. ((Naeisaei nekate neyae heke mokate yo nane merau imae hei-sei isaei hebaen bele yo bele a ahuneuboke.)) <sup>46</sup> Nebeinye Yesusre ikilenaibonde naei nibine baewate. Nebeibe ro miyae helen Yesusre Allahle yenjo kayaayo holona ro hi yae bene nekewaimine, nda yo Yesusre ikilenaibondere buhae yae hokowoumi.

## 22

*Ondofolo Mbai Na Kelu Miyae Rokeungere Raman Bulau Mokouبوکه Anewate Ahuba Yae Ahuneuboke*

(Luk. 14:15-24)

<sup>1</sup> Nda ro miyae helende Yesus benen Yahudi ro miyae Nare me u mokonainyelere a yae ahuneuboke huwoumi, <sup>2</sup> "Raei me kelee u keleene nekate yo na mekai ondofole mbai na kelu miyae rokeungere raman bulau mokouبوکه wanen. <sup>3</sup> Ro miyae helen homo haiwoumi menatere. Raman bulau mokoungehake hee, na yebaei bubaeise ukeumi homore hayeukoke yore kaenaimiyeke, nebeibe hi yae ha yae emei mo.

<sup>4</sup> "Benen na yebaei bubaei hiwa yore ukeumi nda a yae nebei homo hayeukoke yore wemmiyendere, 'Nana hesele, raman ninae mokainyehake, sapi uwa foi moi roukate folaikoکه. Nanemene hele mokainyehakene, men, nda raman bulau anuwaufe yae, ema!'

<sup>5</sup> "Nebeibe homore haiwaimi ro miyae oboroi angkaei nekewate, hiwa na buro kelare ewate, hiwa na kalia anuwaufe ewate. <sup>6</sup> Nane merau hiwa yo nda ondofole na yebaei bubaeise ikilakoکه erahuae yae bowate nane merau haikoke. <sup>7</sup> Nebei ondofole na yebaei bubaei haikoke a borokene ikele hele haneungeboکه. Na felayore ukeumile enate rora haikoke yo honaikonde, na yo yan i yae relenainyekonde bende.

<sup>8</sup> "Nebeisa nda ondofole na yebaei bubaeise weumi, 'Rore miyaere yeiboکه raman bulau mokoungihakale, nebeibe homore hayeumikokale ro miyae na u mekai beko aerene ndare menate naeise na hului ban selene. <sup>9</sup> Nda hee embe nibi kaban enene, nibi kainye hubayembe ro miyae nanemene yawemmile raman bulau mokoungihakale anuwaufe hokommende.' <sup>10</sup> Nebei yebaei bubaei ekate nibine hubaiwate ro miyae na u mekai beko, foi, nanemene yawuaimile raman bulau wakundanne hokoumeke yo yae maemae meukoukoکه.

<sup>11</sup> "Ro miyae hokoumeke ijoko ereiboise nebei ondofole eweufike bae, ro mbai raman bulau malo ehireikoi mekebe erekeunge. <sup>12</sup> Nebei ondofole yae nda rora weunge, 'Aka baeke, weyae naendae mekainye raman bulau naei malo ehireikoi yae nda anuwaufe meweuifikaе?' Nebei ro a ban faeu ban yeuبوکه.

<sup>13</sup> “Nebei ondofolo na yebaei bubaeise weumi, ‘Nebei ro noro me ha yae rinenneko, ouben kika anuwaunge kannehimbe ennekende, ndine rime a heraa kili-kili engkonde.’”

<sup>14</sup> “Nebei a ahuneuboke huwamaele naei no nda niyae: Allah ro miyae helen bolen Raei me kelee u keleene nekate yo holone enayembondere kaenemmile, nebeibe Raei a elalere hakainye ro miyae mo enaijembonde. Nebei u mekai ma ndana ro miyae keli name hele.”

*Kaisarre Mokoinyeye Roi Nounge Hewate*

(Mrk. 12:13-17; Luk. 20:20-26)

<sup>15</sup> Nebeisa Farisi holona yo ekate meraunge ekaikolowainyeye, rahe a yae hinenainyehindene na hului Yesusre oro halun ungangiyonde. <sup>16</sup> ((Naeisaei nekate Farisi holona pajak mokonatero ahi hele elate nane merau Ondofolo Herodesre hakainye holona yo kelaeimi pajak mokonate helene)), nebei holo bee na yo hiwa ukaimile Yesusre a hineisise ekate wainye, “Guru, meyae maeisaei Weyae ro mbai wali ijen sele nekeyeyae. Ro miyae be ijokore ereyei, nebeibe be rabuleiboyoyae Allah Naii wali nibire na ijen mae kelaemae. <sup>17</sup> Nebeinye Waei eranae ma maere weime, Romawi kani naei Ondofolo kaban Kaisarre roi mokomandere, omokojiae?”

<sup>18</sup> Na merau beko rainyehike Yesus isaeyeubokene, nebei yore weumi, “Faeu kai bee ro miyae, mayae kena kaube Rare oro halunbe hayauefe. <sup>19</sup> Mayae pajakre mokaube roi Rare kelensebol!” Nda yo Romawi kanina roi dinar roukate Yesusre ikainyeye. <sup>20</sup> Yesus nda yore weumi, “Nda ndele be yoi mokouboke, na me nou bele molaikoke?”

<sup>21</sup> Nda yo yae wainye, “Kaisarle be yoi bele me nou bele.”

Nebeisa Yesus yae weumi, “Kaisar naei kayeero Kaisarre yeungele, Allah naei kayeero Allahre yeungele.”

<sup>22</sup> Nebei a mekai borowatene nebei yo fa yae bowate, Yesusre nanene nukainyebokewate.

*Herewate Yo Walenaibonde*

(Mrk. 12:18-27; Luk. 20:27-40)

<sup>23</sup> Nebei ya mbai Saduki holona riya mbai Yesusle bokore mekate. Naei u benera nekewaimi herewate yo benen ainyui sului, nebeinye Yesusre hinainye, <sup>24</sup> “Guru, Musa keleumikoke ro mbai miyae rowende nekeneikonde fa ban mae herende, nukeungeboko miyaenale naka baeke yae rowende, naekale oro mere holensindere. <sup>25</sup> Maei nolona ako nake mbainya kelu mehine bee hele. Bena kiyae miyae rouke, fa ban mae hereke. Nebei miyaenale nauwake bee nendo yae rouke. <sup>26</sup> Naei mekai mbai bee nendo fa ban mae hereke. Name nendo nebei sului mbai eke ro mehine bee yae rouke na fa ban mo nekeikoke hereke. <sup>27</sup> Na moi sungkaya nebei miyae hereke. <sup>28</sup> Nda ro mehine bee heraikoke nebei miyae bele nekaikokene, ro miyae herewate amminunde heene, ndele miyaere yembonde?”

<sup>29</sup> Yesus yae weumi, “Mai u bene na ijen ban selebe nekayembe, rabuhine ban Allahle homofaena a ma haraungeboko bele Allah Naii elae wake bele mayae isaeyeiboinye.

<sup>30</sup> Ro miyae herewate yo anainyunde hee menjembondere ro miyae eyaroi, nane merau miyae maengke rone enekei. Nda yo malaikat surgana wanen na wali enaijembonde.

<sup>31</sup> Ro miyae heraibokera anainyunde naei, naendae wanen Allahle homofaene roko mbai Neyae mare ukembe a mayae homone okoikoi? Allahle homone nda mekai yae moloukoke, <sup>32</sup> ‘Abraham mae, Isak yae, Yakob yae, Rare ei molaisele.’\* Ro miyae herate yo Rare ei omoloikoi sului. Waline nekate ro miyae yae mo Rare ei moloyaisele. Nebei a keleumekoke herate yo benen walenaibonde.”

<sup>33</sup> Ro miyae helen Yesus yae elewole are borowate yo na mekai ma uwoumire ei sele molowainyeye.

*Musale Walora Wali Heere Foloukoke A Na Berei Selena Kiyae*

(Mrk. 12:28-34; Luk. 10:25-28)

<sup>34</sup> Farisi holona yo hebate borokate Yesus yae elele a yae mokoumikoke Saduki holona yo a mun faeu mun bewate. Nebei aerene Farisi holona yo riyane mewarileufike Yesusre umalire hubanainyehinderene a meraunge kolowainye. <sup>35</sup> Musale walora wali heere folaikokere isaeyeuboko ro mbai yae hineunge, <sup>36</sup> “Guru, maere weimana Musale walora wali heere foloukoke einya honate a makei na berei selena kiyae?”

<sup>37</sup> Yesus yae weunge, “Waei kena buhae u buhae Allahre no ban hee ban mae heungele, wa meli mekai yae nane merau wa u bene wa bene yae. <sup>38</sup> Nebei niyae wali heere foloukoke a na bereinya kiyae. <sup>39</sup> Wali heere foloukoke bee nendo nebei sului mbai:

\* 22:32 22:32 Keluaran 3:6

Waei uware buhae haenae wanan mae ya-ya wali nibi mbainye oraube ro miyaere buhae heumiyende. <sup>40</sup> Musale walora wali heere foloukoke a yoni-yoni nane merau yenjo kayaayo yae kelewaimi a nanemene nda bee yae nore yeiboke.”

*Wali Ondofolo Ndele Fa?*

(Mrk. 12:35-37; Luk. 20:41-44)

<sup>41</sup> Farisi holona yo arilaisike namman hebate hee, Yesus yae hineumi, <sup>42</sup> “Mai u benera Wali Ondofolore naendae yae u bene nekayembe? Neyae ndele orona mena yae elaube?” Nda yo yae wainye, “Ondofolo Daudle orona mena.”

<sup>43</sup> Yesus nda yore weumi, “Nebei mekai lonbe, naendae mekainye Daud yae Allahle Roh walora kelewoumi hee Wali Ondofolore naei Tuhan mae ro roungeboke. Daud nda a wanan mae eleukoke,

<sup>44</sup> ‘Allah yae raei Tuhande weunge,

“Raei meube reufine nuweibo

mende Waei yokeijo mokoremibonde

waei oro keleene mo mayorulembonde.” †

<sup>45</sup> Daud yae Nare naei Tuhan mae rowounge lonbe, na hului ban sele nare benen naei orona mena yae wennelere!” <sup>46</sup> Hi yae ha yae benen are wennelere na hului ban hubawainye. Nane merau nebei yara are hinenainyehindere fe yae faewate. Nebei yo oro halunde owoyoi sului.

## 23

*Era Hena Mo Hakoyaimi Yore Yesus Yae A Elae Yae Huwewoumi*

(Mrk. 12:38-39; Luk. 11:43, 46; 20:45-46)

<sup>1</sup> Nebei ro miyae helen bele, na moisa orowate yo belere Yesus yae weumi, <sup>2</sup> “Musale walora wali heere foloukoke are isaeyaeiboke kelaemi holona yo bele Farisi holona bele Musale a faeu kayaare hebate. <sup>3</sup> Nebeinye naeinya a usaei wasaei kelenayembe hakombe, nebeibe naei u mekai wa mekai mokatere mayae ehakoijae hele. Rabuhine ban neyae kelaemi huluinye na u mekai wa mekai eharaiboi omokoi sele. <sup>4</sup> Neyae wali hee emere ro miyaere waimi hakonatere, rambun ehakaie wanan mae. Nebeibe nda wali heere emere mokaiboke kelaime yo nebei a huluinye neyae ehakoiboi.

<sup>5</sup> “Naei meli mekai nanemene ro miyae yae erenaimile naei mobe haraiboyainye imokowate. U mehauwae na baka ranne Allahle homofaena a mbemba moloikoyate hokou kaei-kaei einye haweikoyate, nane merau na malo ene burai koko mokoikoyate.

<sup>6</sup> Kena hele eikowate raman bulaunge ro bele anuwaunge roiboyate nane merau Allahre ei mom-mom imaene bene hele roiboyate. <sup>7</sup> Nda yo nai hei-sei anuwaunge be hinenaimilere nane merau ro bele erenaimilere ‘Agama naei Guru’ yae kaenenaimilere kena hele ikowate.

<sup>8</sup> “Nebeibe mare agama naei Guru yae kaenenayembe naeise kena okoyeijae hele. Rabuhine ban mai Tuhan mbai mo Allah Niyae nane merau mayae nanemene aka mbai baekae mbai wanan yaeuboke. <sup>9</sup> Nane merau nda kanine waei ako hele ban hire ako yae ekaneyeijae, rabuhine ban mai Ako mbai sele surgana nekele. <sup>10</sup> A usaeise kelaemi ro yae ro ronayete naeise kena okoyeijae, rabuhine ban mare a usaeise kelembe ro mbai sele, Reyae Wali Ondofolo Niyae. <sup>11</sup> Mai nolone nde ro ronainyebondena, neyae yebaei bubaeise yembonde hele. <sup>12</sup> Nde yae nauware bumane engkaendana, Allah yae nebei kiyaeere ane enneransinde. Nane merau nde yae nauwa ane enneransindena, Allah yae nebei kiyaeere bumane ennekaembonde.

<sup>13</sup> “Mayae Musale walora wali heere foloukoke are isaeyaeukoke kelaemi holona bele Farisi holona bele, mayae faeu kai bee holona nekaube yo. Raei me kelee u keleene nekate yo holo naei eise eke romau mayae ahaeube. Mayae eyeiboise kena okoinye, enayembondere relaeinye yore ahaeumi. Mayae na beko hele hubannembe!

<sup>14</sup> “Mayae Musale walora wali heere foloukoke are isaeyaeukoke kelaemi holona bele Farisi holona bele, mayae faeu kai bee holona nekaube yo. Miyae nannalere ame-ame yae wabaumi naei imae obe yaraube maise baete. Mai beko mokaubere ro miyae isaeyaeubonde belene, Allahre ebeli akoisi yae akoisiyaunge ibowaunge. Nebei aerene Allah yae ehee bukulu ehakaie sele mai uwane enensayembe. Mayae na beko hele hubannembe!\*

<sup>15</sup> “Mayae Musale walora wali heere foloukoke are isaeyaeukoke kelaemi holona bele Farisi holona bele, mayae faeu kai bee holona nekaube yo. Ro miyae mbaise mokonnebombe Musale walora wali heere foloukoke hakonnele naeise mayae naubu

† 22:44 22:44 Mazmur 110:1

\* 23:14 23:14 Ayat 14 homofae hena hiwa barainyekoke hiwa ebaraikoi.

walaubu ahau fele eyewaube, kani yoni-yni eyerekoyaube. Nebei wali nibi hakonnenena, narakare embe. Mayae na hele narakare aube, nebei sului mbai nda ro narakare ende hele. Mayae na beko hele hubannembe!

<sup>16</sup> “Mayae Musale walora wali heere foloukoke isaeyaeukoke kelaeumi holona bele Farisi holona bele yo, mayae ijoko erei be yun be yebaere hebaube. Mayae nda mekai yae waumi, ‘Nde yae Allahre ei mom-mom imae na kaban sele hebele randa a holo kondena, nebei a elae ban. Nebeibe Allahle imaena emas randa a holo kondena, nebei a elaekei yembonde.’ <sup>17</sup> Nebei emas Allah naei. Mayae kobu yae felebokembe nane merau ijoko ereiboi kaube ro miyae. Nebei emas bele imae bele Allah Naei me einye honete. Nebei bee naei elae mbai, Allahle rambunbe yaeibokene. <sup>18</sup> Naei mekai mbai waumi, ‘Nde yae Allahle imaena hili era akau era ongkou felate itukai randa a holo kondena, nebei a elae ban. Nebei itukai ranna rambun nebei randa a holo kondena, nebei a elaekei yembonde.’ <sup>19</sup> Mayae na hele ro miyae ijoko ereiboi sele kaube. Nebei itukai bele nebei itukai randa rambun bele Allahle me einye honete, naei elae mbai roukete. <sup>20</sup> Nebei mekainye, nde yae hili era akau era ongkou felate itukai randa a holo kondena, nebei sului mbai nebei itukai ranne kolaikoke rambun randa a holo konde. <sup>21</sup> Nane merau nde yae Allahre ei mom-mom imae na kaban sele kiyae randa a holo kondena, nebei sului mbai Allah neinye nekele kiyaele randa a holo konde. <sup>22</sup> Nde yae surga randa a holo kondena, nane merau Allahle kendan wameranda a holo konde, na mekai nebei kiyae Allahle randa a holo konde. Mayae na beko hele hubannembe!

<sup>23</sup> “Mayae Musale walora wali heere foloukoke are isaeyaeukoke kelaeumi holona bele Farisi holona yo bele, mayae faeu kai bee holona nekaube yo. Mai hekena ani hili era akau era fololo bele selasih, adas yu bele, jintan bele me bee kayeero Allahre mbai yeyaunge. Nebeibe wali heere folaikoke nda niyae: wali ame-ame ban, yanekoi yase, mai a eleukoke huluinye mokole, na bereinya kiyae mayae omokoyei. Na foi sele nebei u mekai nemene mokombe. <sup>24</sup> Mayae be yun be yeabae ijoko erei wanen nekaube. Rabuhine ban mayae wali heere foloukoke na berei ban kiyae kelaeumi, nebei na bereinya Kiyae ehakoiboi. Nebei wanen mbai anensimbe bu einya baendo kaei-kaeise mayae moise yaraube hayaube, nebeibe unta kaban anensimbe bu einyare mayae moise ehaye. Mayae na beko hele hubannembe!

<sup>25</sup> “Mayae Musale walora wali heere foloukoke are isaeyaeuboke kelaeumi holona bele Farisi holona bele, ma faeu kai bee holona nekaube. Mai wali kolaei bele hote bele a yae ahunerebondere. Nebei kolaei bele hote belere moise reufi hiyei sele ramboyaube eyerewate, nebeibe eise reufi niki hele. Rabuhine ban mai wali u mekai nda ma niki bele: rambun hiwa yo naei hangko ma haweyaube nane merau mai bekore kena haehae koyaubere hakoyaube mokoyaube. <sup>26</sup> Mayae Farisi holona ijoko erei wanen. Eise reufi bere kuyengko yolo-yolo yaeibo, nebei mekai yaere moise reufi yolo-yolo inyaibonde. Mayae na beko hele hubannembe!

<sup>27</sup> “Mayae Musale walora wali heere foloukoke are isaeyaeuboke kelaeumi holona bele Farisi holona bele, ma faeu kai bee holona nekaube yo. Mai u mekai bulei auma mokoiboyate anuwau au keulemon mae oleikoyainye hiyei ramboyate wanen. Nebei anuwau moisa ijokore maeikoi ma, nebeibe neinye bae ro miyae herewate bo yae maemae koukoke kelen baeii aufike. <sup>28</sup> Mayae naei mekai sele. Ro miyae moisa erayembe bae wali himalaungeboke, nebeibe mayae wali faeu kai bee bele u hila wa hila bele mokaube. Mayae na beko hele hubannembe!

<sup>29</sup> “Mayae Musale walora wali heere foloukoke are isaeyaeuboke kelaeumi holona bele Farisi holona bele, ma faeu kai bee holona nekaube yo. Allahle yenjo kayaayo wali himalainyeboke yo naei bulei foi ainyainyu koyaumi nane merau hiyei raneyaumi. <sup>30</sup> Mayae elaubé, ‘Mai yobe naei kamahe naei bere nekewate maengkele nebei hee nekande yae Allah Naei yenjo kayaayo howatere meyae nebei yo naei moisa ehakoikoi sele.’ <sup>31</sup> Nebei yo mai yobe naei kamahe naei yae elaubene, mai euwara menai wo kaube mayae Allah Naei yenjo kayaayore howate yo naei orona mena yaeuboke. Mayae na beko hele hubannembe! <sup>32</sup> Ninæ lonbe, abu naei yae arai naei yae huba rawaiboke u mekai beko mokowate mayae mokonemembe mende Allah a elengkonde, ‘Hennul!’ Mai naeise na beko hele yembombe naeibe mokaube.

<sup>33</sup> “Mayae beko bako bele holona. Rami ehakaie ro miyaere beko mokoyaimi wanen mae mayae ro miyaere beko mokaumi. Mayae narakana ehee bukulu mokoungihakera mauwa holere omoloiboi sului. <sup>34</sup> Foi yae boron, Reyae yenjo kayaayo bele isaei hebaen bele ma yae uwa harainyeboke yo bele Allahle a faeufe kelaeimi yo bele ufemile mai bokore menate. Nane helen nen mayae hongkombe, hiwa ohaline bongkombe, na hiwa mai ei mom-mom imaene rahuae bombe, hiwa mayae hawensambe yo ran yo randa habelenayende. <sup>35</sup> Na bena hele, mai yobe naei kamahe naeite wali himaloungeboke ro



mbai na ro Habel hailboke. Nebei heera neyae roko helen wali himalainyeboko yo hiwa maisokoke. Meke Berekiale fa Zakharialene mayae Allahre ei mom-mom imae na kaban sele anuwaunge bele hili era akau era ongekou felate itukai bele kaikainye hauboko. Mai yobe naei kamahe naeite wanan mbai mayae wali himalainyeboko ro miyaere hoimeyau. Nebei aerene hoi-soi howate yo naei ehee bukulu mare enenjembe.<sup>36</sup> Nana heselebe wamale, nda u mekai mokaibokere nanemene nda kulunna yo yae ehee bukulu engkaembombe.

<sup>37</sup> "Mai Yerusalem yona ro miyae, wa yore yande Allah yae ukeumi mewate yenjo kayaayo hiwa houmeakaube, hiwa ruka yae hayeumimekaube heraimake. Ojo nafe na kelo ware na noro keleene arileumi wanan mae Raei kena roweisiyeufe ndane nekate ro miyae arilewamalebe, nebeibe mayae ahi hele elewaube. <sup>38</sup> Erembe! Mai nekaube yo na imae obe ennukebombe aku ban nau ban enaisononde. <sup>39</sup> Reyae mare wamale, Nda heera mayae benen Rare ereiboi nekemembe, ende nda a wanan Raei naeise emelengkombe, 'Tuhan, Allahle ro yae mele Kiyaere, na rei mai yae ei hawenne.' "

## 24

### *Huba Mokoikoi Ya Na Iwau*

(Mrk. 13:1-2; Luk. 21:5-6)

<sup>1</sup> Nebeisa Allahre ei mom-mom imae na kaban sele kiyaera Yesus eukuke aloungkoke. Ewole hee, na moisa orowate yo mekate Allahre ei mom-mom imae na kaban sele kiyaere reufira reufira kelaenye. <sup>2</sup> Yesus yae nda yore weumi, "Mayae nebei ainyunuke nanemene eraube? Reyae na helebe wamale, Nebei imaere ainyunuke ruka nemene fomene kelanaikonde."

<sup>3</sup> Nebeisa Zaitun mokone ikate Yesus angken nuweuboko nekewole hee, na moisa orowate yo na mo-mo nekewate yae are hinenainyehinderene Yesusle bokore mekate mo hinainye, "Maere yakaimbone, nda a eleyae makei hee yae nanemene enaibende enaiyakande? Rahe iwau wae Waei mele naei ya bele nda kani kela huba mokoungela naei ya bele yen kolonde?"

<sup>4</sup> Yesus yae weumi, "Ro miyae yae mare ame-ame wabenayengkombe bele kayaa foi yae hebembe. <sup>5</sup> Rabuhine ban ro miyae helen Raei ro yae kelenayembe ungayembe, 'Reyae Wali Ondofolo niyae'. Nebei u mekai yae ro miyae helen ame-ame wabenaimile. <sup>6</sup> Buloo fela kulun relennele nane merau fela oinyaibonde relenainyele a yo-yo mayae emborombe, nebeibe uwa mekai bele nekembe, isasa alalobe okoiyae. Rabuhine ban nda a wamale nanemene enaijembonde, nebeibe huba mokoikoi ya namman. <sup>7</sup> Yo hi yo hi hi bele kani hi kani hi bele fela oinyaibonde releneinyele, anuwau helen moni mai nende konate, oinyeu hinate. <sup>8</sup> Nebei benate rambun huba mokoikoi ya naei hengkelenebraufike baete, miyae fa honoise hiyau buhae bere releunge wanan.

<sup>9</sup> "Raei moisa hakaufekoke aerene nda kani kelana ro miyae helen sele ikele konayembe. Nebei hee mare ikilenayembe, weitasi konayembe, nane merau honayembe. <sup>10</sup> Nebei hee Rare hila rabo halaeise ro miyae helen bona wali niki belere bukenaibonde, hi yae hire kelai nenende, nane merau hi yae hire ikele konale. <sup>11</sup> Yenjo kayaayo na hele ban helen sele menaiyakande ro miyae helen wabenaimile. <sup>12</sup> U mekai wa mekai beko fendulun nelau ranna wanan mae yakanatene nebei aerene ro miyae naeise naeise yanekoi yase u inyaibonde. <sup>13</sup> Nebeibe ro miyae naenda wanan horo wali beko hubanainyele Raei a elalere hila rabo halenayende, nebei ya huba enainyemokondena, na wali Reyae hole eremimolombonde. <sup>14</sup> Nane merau Raei me kelee u keleene nekenate yo holone ro miyae na hului enayembonde, wali hena bona yaronaikonde naei a foi faeu foi nda kani kelana ro miyae boronaibonde naeise, enaisuwengkombe huba enainyemokongkondera, nebeisa wa huba mokoikoi ya menyakambonde.

<sup>15</sup> "Yendo kagaalo Daniel are eleukoke huluinye ro mbai Yesus a elelere mehauwae kelande horonde kiyaere menyakambonde. Nda ro Allahle ro be ro yoinye na beko hele nane merau Allahre ei mom-mom imae na kaban sele kiyaere u mekai u nenere koi-koi ma mokongkonde. Nebei ro Allah heere neufake anuwaunge mensebenunde. Nde yae nda homo kongkondena, nda rambun erengkondena foi yae nou hennebende. <sup>16</sup> Nebei hee Yudea kanina ro miyae uwa hole moloiboise elure u hale me hale yae habelemembe. <sup>17</sup> Holokare okoi ma imae bumana ro miyae rambun imae einya roweise oiyae. <sup>18</sup> Hekere embe ro miyae malo roweise imaere ebukei eiyae. <sup>19</sup> Nebei ya emale miyae holona bele wayeu miyae holona bele uwa hole moloiboise na beko hele enainyehubande, rabuhine ban ehabelei suluiinye. <sup>20</sup> Mai uwa hole moloiboise habelemembe ya naei ebeli ennebombe hin manse meinyele hee bele Sabat ya bele ebeiyae hele. <sup>21</sup> Rabuhine ban nebei hee ro miyae beko hele hubanainyele, nebei wanan roko mbai eyeiboi

mo nda kani kela mokoubokera meke nda heene nane merau benen nebei wanen eibei. <sup>22</sup> Allah yae nebei ya wanen fofu eimokoiboinya, walire nekande yo wali hole omoloiboi sului. Nebeibe Allah yae eleukoke holona ro miyae aerene nebei ya fofu mokonnebonde. <sup>23</sup> Nebei hee ro miyae hi yae mare ungembe, 'Erembo, Wali Ondofolo ndine Nare yakauboke, ndane Nare yakauboke.' Ro miyae nebei ma elenatere na hele yae eleijae. <sup>24</sup> Rabuhine ban wali ondofolo na hele ban bele yenjo kayaayo na hele ban bele helen menaiyakande. Iwau mahi-mahi, rambun emere-emere nda yo mokonate, na huluinya Allah yae eleukoke holona ro miyaere mokonaimibonde naei nibi bekone enaisakongkonde. <sup>25</sup> Nebeinye u bene nekenayembe, nebei ma eyeiboi yae na bere wanen mae mare nda naeise Reyae isaeyaemale.

<sup>26</sup> "Mare ro miyae yae ungayembe, 'Eren, Wali Ondofolo ndi a kala-kalane eke nekele.' Mayae nebeise eijae hele. Nane merau ungayembe, 'Ndi yowa einye eke nekele.' Nebei are na hele yae eleijae. <sup>27</sup> Rabuhine ban Reyae Allahle bokora mekale ro miyae uware yeubokale Kiyae, Raei merele ya wili enaa reufira wele na hehe ifale reufine bele ole naeikoyole wanen mae yembonde. <sup>28</sup> Makeinye ro miyae na u mekai beko nekatene here no kaka honole ijen wanen yembonde. Allah nebei ro miyaere emmihubayengkonde, here nore anate aye hubayeikoyate wanen. <sup>29</sup> Reyae na bere huwekokamale ro miyae beko hele hubanaimile ya baensondera, Hu hehe wende ouben yembonde, oko na hehe kebengkonde, findelau yoni-yni yakuna balenate onate, yakune hebate yoni-yni kusenate.\*

<sup>30</sup> "Reyae Allahle bokora mekale ro miyae uware yeubokale Kiyae benen merele hee yae, yakura Raei iwau yakambondera nda kani kela nanemene naei ro miyae ele kali rime ayan buyan konate. Rare erenaisele elae wake bele nane merau one hengko bele yae uwa kitensebonde yakuna mangko randa merele. <sup>31</sup> Raei malaikat yoni-yni ufemile amin rannaibonde. Nebei malaikat yoni-yni nda kani kela na huba kelina Allahle holone me baeuboke yore arilenaimile, huba hira ende huba hine.

<sup>32</sup> "Ara none ahuneubokale ane mo hamennele. Hebate onsi fawate maensa rimirimi baete hee Israel kanine mayae isaeyeiboyaube yakama nobeungeboke. <sup>33</sup> Nebei sului mbai are wamale, kun waunge iwau emere-emere enaibende nanemene mayae emerembena, isaeyembombe. Reyae benen merele ya nobeungeboke, nebei wanen mbai ro romau bena meke hebele na heki ban imae eise enensinde. <sup>34</sup> Reyae mare wamale, nana hesele nda holona yo nanemene eherei boi yae nda wamale enaiyembonde. <sup>35</sup> Yaku bele nda kani kela bele nundenaibonde, nebeibe Raei ako fauko mbai sambai enundeiboi.

<sup>36</sup> "Raei merele ya na hu hului bele hi yae ha yae naeisaei ban mo, malaikat surgane nekate nane merau Reyae Na Kelu isian, Maeko Allah mbai naeisaei nekele. <sup>37</sup> Reyae Allahle bokora mekale ro miyae uware yeubokale Kiyae merele ya na mekai na bere hele Nuh nekewole heena wanen. <sup>38</sup> Bu kabande ufewole ya namman mae, ro miyae bulau kaban mokayeke anayeke nane merau ro miyae yarowate, maengke rore ewate. Nebei mekai kaimeke Nuh kai kaban mokouboke einye eweufike. <sup>39</sup> Nebei heena ro miyae yembonde rambun na isian mae nekewate, meke bu yae ufeuko ke nanemene riyau weumiboke. Naei mekai mbai Reyae Allahle bokora mekale ro miyae uware yeubokale Kiyae merele yane benate. <sup>40</sup> Nebei hee ro bee hekene eneimokonde, hire rowende, hire nukennebonde. <sup>41</sup> Miyae bee gandumne ruka yae yalenete, hire rowende, hire nukennebonde.

<sup>42</sup> "Nebeinye kayaa hebembe, rabuhine ban mai Tuhan mende ya mayae isianne. <sup>43</sup> Nda niyae bene nekenayembe, imae rowa yoko rorele huae mende hee isaeyeiboyolene, kayaa hebende hele, naei imaena rambun yoko yo yae eyarokoi sului. <sup>44</sup> Nebeinye mayae uwa mokoisa-mokoisa yae nekembe, rabuhine ban Reyae Allahle bokora mekale ro miyae uware yeubokale Kiyae mayae isian nekembe ya yae merele."

<sup>45</sup> Benen Yesus a ahuneuboke weumi, "Yebaei bubaei na ijenne nekeyele, isaei hebaen bele ma yae uwa haraungeboke kiyae, na rowa yae yunde kaeuboke nekewole, nebei imae einya kalia mokate ro miyaere raman na huluinye yemmile anenatere naeise. <sup>46</sup> Nebei imaena rowa bensonde mende hee, nebei yebaei bubaei nebei rowa naei ukeunge kaliane mokonde yae hubainyeikonde ro onomi foka hubannele. <sup>47</sup> Reyae wamale, nana hesele na rowa nda yebaei bubaei ranenjende na imae einya rambun nemene me mokoise yembonde. <sup>48</sup> Nebeibe na hului nda yebaei bubaei na u mekai bekona nda wanen mae na kenara elende, 'Raei rowa wabengkonde mende lonbe, naei

\* 24:29 24:29 Yesaya 13:10, 34:4

a ukeufe moi ufoyonde.’<sup>49</sup> Nebeinye na yebaei bubaei hiwa yore rahuae eyole meyole olemmile, raman bulau keu bure anate yo bele anenate konate.<sup>50</sup> Na rowa mende ya huluisse nebei yebaei bubaei u benere enekeise ya yae mende.<sup>51</sup> Nebei yebaei bubaei na rowa yae rahuae bongkonde hombonde, nane merau nebei ro mokonnebonde ro miyaere faeu kai bee holona yo bele nangkele enainyekende. Naei nekenate anuwaunge beko hubanainyelene rime, heraa kili-kili enaikonde.”

## 25

### *Miyae Maengke Kaijeu Yaraikoke Naei Ahuba*

<sup>1</sup> ((Na bera Yahudi era henara reniai nolone ro miyae rowende hee yae neraman bulau mokowate. Nebei ro neme emei mone, raman bulau omokoi. Mende mo neraman bulau mokonate.)) Yesus benen a ahuneuboke weumi, “Reyae benen merele hee, Raei me kelee u keleene nekate yo holone enayembonde nibi nda ahuba merau yembonde.

“Roko mbai reniai nolone ro neme emei mone, maengke me bee na kaijeu yaraikoke yae raman bulau imae eise anainyebondere ekaitakewainyele.<sup>2</sup> Maengke me bee nebei nolona maehae mbai kobu, maehae mbai isaei hebaen bele ma yae uwa harainyeboke.<sup>3</sup> Kobu yo na kaijeu yaraikoke nebeibe na minyak hama ban ekate.<sup>4</sup> Isaei hebaen bele ma yae uwa harainyeboke maengke maehae mbai kaijeune minyak rilaikeke hiwa minyakre rilate anuwaunge rowayeke.<sup>5</sup> Nebei rore heki hele rakewainyene, nanemene ijongku kowatene relaeiboke honowate.

<sup>6</sup> “Reniai nolo borate ro miyae kaenate, ‘Ma ro rakaunge mele ya. Men, ei menneambo!’

<sup>7</sup> “Nebei maengke me bee ainyuke, na kaijeu relaeikoke.<sup>8</sup> Nebei kobu maehae mbai yae isaei hebaen bele ma yae uwa harainyeboke maehae mbaise waimi, ‘Mai kaijeu kebenaikondere nobainyekokene, mainya roweimyaube minyak ebimbin mai kaijeunge rilemmeko.’

<sup>9</sup> “Nebeibe isaei hebaen bele ma yae uwa harainyeboke maengke maehae mbai yae waimi, ‘Mangkele wahemakondena, mai minyak baemmihonde. Naei foi sele minyakre haete anuwaufe embe, mai naeise yarongkombe.’

<sup>10</sup> “Nebeibe minyak yaroikoise ewate hee yae nane ro rakewainye kiyae meke, mokainyehake maengke bele miyae neme ro neme raman bulau mokainyehake anuwau imaene ayeuboke, na romau bele na hibi ahunaiboke.

<sup>11</sup> “Nebeisa maengke kobu yo mekate. Nda yo kaenate, ‘Rowa, rowa, maere romau raweimobo!’

<sup>12</sup> “Nebeibe nda rowa eisa weumi, ‘Nana hesele reyae mare onaemale.’ ”

<sup>13</sup> Nebeisa Yesus nda ahuba mekai ahuneuboke huba mokoungue wa elele, “Reyae benen merele hu hului mayae isianne, nebeinye kayaa bele hebembe.”

### *Roi Mere Nulaiboke Ahuba*

*(Luk. 19:11-27)*

<sup>14</sup> “Raei me kelee u keleene nekate yo holo naeise nda wanen mae ahuba ahundebondere. Ro mbai yo moise kolore endere, na yebaei bubaei kaeneumikoke eba he honowainyelere me nulaiboke mo waheumikoke.<sup>15</sup> ((Nebei kanine roi kaban Yunani afaeunge talenta yae elate.)) Bena ro kaeneungekokere talenta maehae mbai kinyeungeboka, hire bee, hire mbai kinyeungeboka. Nebei yebaei bubaei naei meli mekai huluinye yeumikokera, kulun uke ewole.<sup>16</sup> Na hibi hele talenta maehae mbai yaroukoke kiyae eke na isaei hebaen bele yae mokowole benen talenta maehae mbai baraungeboka.<sup>17</sup> Beere yaroukoke kiyae nebei sului mbai mokoungoboka benen bee baraungeboka.<sup>18</sup> Nebeibe mbaise roke kiyae eke na rowa yae ikeunge talenta kanine moloufaka honowole.

<sup>19</sup> “Heki hele nekaikoke mo, nda rowa yo moinye eke nekewolera bukeufike meke. Na yebaei bubaei kaeneumikoke yeumikoke talenta huluisse kolonainyekondere.<sup>20</sup> Na yebaei bubaei talenta maehae mbaise yeungekoke kiyae na mene talenta maehae mbai baraungeboka bele yaroukoke meke. Na roware weunge, ‘Weyae maehae mbai yeufekokae. Erei, reyae raei wakena yae maehae mbai baraungebokale.’

<sup>21</sup> “Na rowa yae weunge, ‘Nda u mekai foi selebe mokoubokae! Weyae raei yebaei bubaei u mekai na foi sele nane merau raei are hakoyae. Rambun kaei-kaeise na mekai yae mokoubokae, reyae rambun kaban mae kinyereibotere. Eyeisi, raei rei mai kale nolone wangkele eiko eisukele!’

<sup>22</sup> “Nebeisa talenta beere yeungekoke kiyae meke na roware weunge, ‘Talenta bee hele rare yeufekoke. Erei, benen bee hele raei wakena yae baraungebokale.’

<sup>23</sup> “Na rowa yae weunge, ‘Nda u mekai foi selebe mokoubokae. Weyae raei yebaei bubaei u mekai na foi sele nane merau raei are hakoyae. Rambun kaei-kaeise na mekai yae mokoubokaene, reyaе rambun kabande kinyereibotere. Eyeisi, raei rei mai kale nolone wangkele eiko eisukele!’

<sup>24</sup> “Nebeisa talenta mbaise ikeunge kiyae meke na roware weunge, ‘Rowa, raeisaei sele weyae ro nansau, omokoi anuwaube anire mo eisokoyae, eheraeyei boi anuwaunge anire mo eyarileyae. <sup>25</sup> Reyaе buhaе yae hokowoufene, waeinya talenta mbai ikaraе rokale ekale kani einye aubokale. Rowa, nda niyae nane talenta mbai rowei.’

<sup>26</sup> “Nebeinye na rowa yae weunge, ‘Weyae raei yebaei bubaei u mekai beko nane merau yambi horo. Weyae isaеyeubokae hele omokoi anuwaunga anire mo hokoyale, eheraeyei anuwaunga anire mo arileyale. <sup>27</sup> Nebei mekai isaеyeubokene, naeinya hesele nebei talenta roise hawate anuwaunge eyabomaе ya? Nebei mekai yaere reyaе behole merele nda ikawale hi bele yae baranebomaе!’

<sup>28</sup> “ ‘Nebeinye nda talenta ikanale naeisa rowembe, talenta me beere yeuboke kiyae yennele. <sup>29</sup> Rabuhine ban honnainyele ro miyaere benen inyainyele. Helen bolen bele na naeinye honnainyele. Nebeibe ohonoі ro miyaе naeise, honainyele ebi ken bele naeisa yaronaikonde. <sup>30</sup> Nda yebaei bubaei me ban u ban kiyae, moinya ouben kika nolone ennekansi. Ndine rime a nane merau heraa kili-kili engkonde.’ ((Nebei ahuba walora Yesus kelewoumi Allah yae yeyeyumi rambun mayae foi yae mokombe.))

#### *Domba Bele Kambing Bele Ahuba*

<sup>31</sup> “Reyaе Allahle bokora mekale ro miyaе uware yeubokale Kiyae hehe naensekonde yae malaikat yoni-yoni bele nanembaisa memale hee, Reyaе Allah kiteufefoke one hengko bele kendan wameranne erenuwembonde. <sup>32</sup> Nda kani kelana ro miyaе nanemene Raei kendan wameran bene arilenaimihinde. Nebeisa Reyaе ro miyaere me mokorele riya beere yembonde, domba bele kambing bele kayeero kayee moloumi wanen. <sup>33</sup> Reyaе waherekonde domba holona yo meube reufine ufemile hebenate, kambing holona yo meli reufire yae ufemile hebenate.

<sup>34</sup> “Nebeisa Reyaе Ondofolo Kiyae Ra meube reufina yore ufemile, ‘Maeko yae foi yoni-yoni ei haweimeyembe holona, men! Nda kani kela mokouboke heera, mai naeise yo waku mbai mokougehakene emembo. <sup>35</sup> Rabuhine ban Reyaе moni kowale hee, mayae raman ikaufefe aneukokale. Reyaе bukine kowalene, mayae bu ikaufefe aneufikale. Reyaе yo moisa mekalene imae ban obe ban kowale, mai imaene honowale. <sup>36</sup> Reyaе melan nekewale, mayae malo ikaufefe. Reyaе erane buloone kowale, mayae ei hauwayefe. Reyaе kawane hebewale, mayae Raei ereiboise ekaube.’

<sup>37</sup> “Wali himalainyеboke ro miyaе yae hinenaisele, ‘Tuhan, makei hee yae erewayete monine kowoyae meyaе raman ikayete aneukokae, bukine kowoyae meyaе bu ikayete, <sup>38</sup> Weyae imae ban obe banne maеi imaene honowoyae, Weyae melanne meyaе malo ikayete, <sup>39</sup> Weyae erane buloone meyaе ei hauwayete, Weyae kawane hebewoyae meyaе Waei ereiboise ekande?’

<sup>40</sup> “Reyaе Ondofolo Kiyae nda yore ufemile, ‘Reyaе nana heselebe mare wamale, Rare hila rabore halaeise holona ro miyaе me baei ban sele nekende kiyaere foi mokaungebokena, nebei foi mayae Rare mokaufefoke.’

<sup>41</sup> “Nebeisa Reyaе meli reufina yore ufemile, ‘Olomore nembokembe ro miyaе, walobo yun na malaikat yoni-yoni belere mokainyehake na hibi mo i benende anuwaunge emembo. <sup>42</sup> Rabuhine ban Reyaе monine kowale mayae raman eyei angkoi, Reyaе bukine kowale mayae bu eyei, <sup>43</sup> Reyaе imae ban obe ban mayae imaere ewei ei, Reyaе melan nekewale mayae malo eyei, eranne buloone kowale mayae ei aiboi, kawane hebewale mayae Rare ereiboise emei.’

<sup>44</sup> “Nda yo yae ungaisele, ‘Tuhan, makei hee yae Weyae monine kowoyae, bukine kowoyae, imae ban obe ban, melan, erane buloone kawane hebewoyae, meyaе ei ehawei?’

<sup>45</sup> “Reyaе ufemile, ‘Reyaе nana heselebe mare wamale, Rare hila rabore halaeise holona ro miyaе me baei ban sele nekende kiyae mayae nare foi omokoiboinya, mayae Rare foi omokoi.’

<sup>46</sup> “Nda yo ehee bukulu hubanainyendere ele kali no ban hee ban anuwaunge enayembonde. Nebeibe ro miyaе wali himalainyеboke holona wali hena bona nekenayende.”

## 26

*Yesusre Honaibonde Naei Merau Rainyehike  
(Mrk. 14:1-2; Luk. 22:1-2; Yoh. 11:45-53)*

<sup>1</sup> A usaei waeisaei nanemene Yesu riyau weungeboke mo, na moisa orowate yore weumi, <sup>2</sup> “Mayae maeisaei, ya bee nekemakondera ((Mesir kanine Allah yae Yahudi naei bena kelu fa-fare hole molouboke u bene nekeisi-nekeisi)) ya kaban Paskah konate, Reyae Allahle bokora mekale ro miyae uware yeubokale Kiyae Yahudi ban ro miyae naei me einye kinyenaisebonde nebeisa ohaline bonaisekonde.”

<sup>3</sup> Nebei hee imam yun-jun bele Yahudi yun-jun bele Kayafas imam kabande nekewole kiyaele imaene arilewoungue. <sup>4</sup> Yesusre na maleu-maleu wae ikilenaibonde, nebeisa honaibonde meraunge nda yo kolowainye, <sup>5</sup> nanaei mo elate, “Paskah ya kabanne komale hee omokojiae rabuhine ban, nda ro miyae Paskahre hokommende nolone aku nabe yembonde bele.”

*Yesu Bu Fololo Bele Na U Ranne Rilainyeboke*  
(Mrk. 14:3-9; Yoh. 12:1-8)

<sup>6</sup> Simon u bauwaufe koukoke kiyaele imae Betania yone Yesu eke. <sup>7</sup> Yesu ramanne anewole hee, maengke mbai na mene ruka pualam kolaei einye bu fololo bele roi bumana hele yae rouke bele meweufige. Nebei minyak fololo mo Yesu na yun ranne rileungeboke.

<sup>8</sup> Yesu na moisa orowate yo nebei mekai erekatene ikele kate na a bele elate, “Rabuhire eyeiboi rambunde nondon meke heraeeye! <sup>9</sup> Nebei bu fololo mo naise haieuboke yae na roi bumana hele roweube. Nebei roi na hului hun ban wai ban yore wahaeimikoube.”

<sup>10</sup> Nebeibe Yesu nebei yo naei u benere nekaimi ma isaeyebokene weumi, “Rahene nda maengkere kena beko mokaunge? Naei u mekai mokoufoboke Reyae be hinanale. <sup>11</sup> Rabuhine ban hun ban wai ban na yo mai nolone nekenayende, nebeibe Reyae maengkele nanembainye heki enekeyei. <sup>12</sup> Nda bu fololo bele Raei uwa ranne rileufe, Rare molonaisehande naeibe nda maengke relahi yae Raei uwane mokoufe. <sup>13</sup> Reyae na helebe mare wamale, Nda kani kaban kela ban einye, Raei a foi faeu foi hungayende ijenne, nda maengke yae mokouboke u mekai bene nekei-nekeise elenayende hungayende.”

*Yudas Merau Raungehike Yesusre Honaibonde Kelai Ruke*  
(Mrk. 14:10-11; Luk. 22:3-6)

<sup>14</sup> Nebeisa Yesu na moisa orowate ro me bee oro nen bee bele nolora ro mbai na ro Yudas Iskariot imam yun-jun bokore eke, <sup>15</sup> weumi, “Yesu mai mene kinyerembombena, mayae rahe yae rare yensele?” Imam yun-jun roi kaban me baeikoke 30 perak hele, nebei roi kaban roukate Yudasre ikainyele. <sup>16</sup> Nebei heera Yudas kelai ruke mokowole Yesusre kinyemmbondere naei ya mon foinye baewole.

*Yesu Na Moisa Orowate Yo Bele Raman Bulau Mbainye Anewate*  
(Mrk. 14:12-21; Luk. 22:7-14, 21-23; Yoh. 13:21-30)

<sup>17</sup> Paskah ya mbai nendo feu ragi ban anate bulau ya kaban heuboke mo, Yesu na moisa orowate yo mekate Yesusre hinainye, “Makeinye Weyae kena koyae Waei naei kayee Paskah raman bulau mokomansande?”

<sup>18</sup> Yesu yae weumi, “Yerusalem yo einya ro mbai ekenekele bokore eme. Nda mekai yae wennele, ‘Guru yae ukeume, Rare honaisebonde ya nobeungeboke. Waei imaene Reyae kena kale Paskah ya kaban Raei moisa orate yo bele nanembainye mokomabondere.’”

<sup>19</sup> Yesu ukeumi hului yae na moisa orowate yo mokaiboke. Ekate Paskah ya kaban naei rambun nanemene mokainyehake.

<sup>20</sup> Huae yeuboke yae Yesu na moisa orowate ro me bee oro nen bee bele nanembainye raiboke raman anewate. <sup>21</sup> Ramanne anewate wa Yesu yae weumi, “Reyae mare wamale, nana hesele ro mbai mai nolona Rare honaisebonde naei kelai ruke.”

<sup>22</sup> Nebei a wanan borokatene na moisa orowate yo kena beko hele hubawainye naeise naeise Yesusre hinainye, “Tuhan, reyae ban era?”

<sup>23</sup> Yesu yae weumi, “Raei kelaise neke ro nda kolaei eise me nanembainye nono kakonde kiyae niyae. <sup>24</sup> Reyae Allahle bokora mekale ro miyae uware yeubokale Kiyae Allahle homofaene molaikoke huluinye hererele. Nebeibe Raei kelaise neke ro na beko hele hubannele. Nebei ro naei foi sele nda kani kelane ohonoi yaebe hongkate.”

<sup>25</sup> Yudas kelaise neke mokombonde kiyae Yesusre hineunge, “Guru, reyae ban era?”  
Yesu yae weunge, “Na hele, weyae nare eleyae.”

<sup>26</sup> Ramanne anewate hee Yesu feu rouke, helen foise mo Allahre ukeungera, nebei feu me yae kaiwole na moisa orowate yore wahewoumi na a bele weumi, “Yaron, anen, nda Raei uwa melen.”

<sup>27</sup> Nebeisa bu kolaainya rouke, Allahre helen foise mo ukeunge, nebeisa ikeumi na a bele weumi, "Nda kolaainya bu mayae nanemene anensimbe. <sup>28</sup> Rabuhine ban nda Raei uwa na ha. Nda ha yaere Allah a heteungekoke nibi neme ro miyaere wali himalainyeboke yo yae me baemmile a elaekai yeuboke. Ro miyae helen naei beko faeinyeremibonde naeise nda ha yae rilerebonde. <sup>29</sup> Reyae mare wamale, Nda heera benen anggur bu aneisi mo nekerende, mende Maeko mokommibonde ro miyae Raei me kelee u keleene orulenaibonde nekenate. Benen nebei ro miyae Rangkele nanembainye anggur bu anemahinde."

<sup>30</sup> Ei mom-mom koi bae molainyekokera Yesus na moisa orowate yo bele alainyekoke Zaitun mokore ewate.

*Petrus Yesusre Naeisaei Ban Mae Enelengkonde Naei A Yesus Nuleuboke*  
(Mrk. 14:27-31; Luk. 22:31-34; Yoh. 13:36-38)

<sup>31</sup> Nebei mokone Yesus na moisa orowate yore weumi, "Na mana huae hele mayae nanemene Rare nukensebombe ma fere-fere habelemembe. Allahle homofaene mai naeise Allah yae domba wanen ahuneuboke. Nda a mekai homone molaikokene, 'Reyae domba be neiboi ro horobondera,

na domba na fere-fere here ware wembonde.\*"

<sup>32</sup> Nebeibe Reyae nulu yo mahe yora arenundera, bere holo yae Galilea kanine erendakembe."

<sup>33</sup> Petrus yae weunge, "Hiwa yo nanemene ware nukenayeibote na fere habeleanayende, reyaere Ware enukeiboi sele."

<sup>34</sup> Yesus yae weunge, "Petrus, Reyae ware wawale, nana hesele nda reniai ojo a okoikoi mo, weyae roko name hele Rare onaerae yae weumikonde."

<sup>35</sup> Petrus yae weunge, "Naendae mekai horo Wangkele nanembainye haimekoube horore bae, reyaere Ware onaewale a eleikoi sele." Nebei a hului mbai na moisa orowate yo nanemene elewate.

*Getsemani Hekene Ebeli Bowoungwe*  
(Mrk. 14:32-42; Luk. 22:39-46)

<sup>36</sup> Yesus na moisa orowate yo bele nanembaisa ewate, anuwau mbai na ro Getsemani nebeinye aibaleke. Nebeisa weumi, "Reyae ndire ebeli boikoise erelerene, mayae ndane mo nekembe." <sup>37</sup> Petrus nane merau Zebedeusle kelu wa bee bele yaweumiboke nanembaisa ekate. Yesus kena beko hele hubaungene, Nauwa oinyeu wanen hineuboke kowole. <sup>38</sup> Hokolo namere weumi, "Ra kena beko hererele wanen mae hubanale. Ndane nekembe, Raei naeise Allahre ebeli bonnele."

<sup>39</sup> Yesus ahau folore yae eungakeleufike mo, be are neke Naekore ebeline bowoungwe, "Arai, na huluinya nda ehee bukulu Reyae kaerebondere Weyae weungende. Nebeibe Raei kenare kale hului yae ebeijae, naeinya hele Waei kenare mokoungehakae hului yae ninae yeubo."

<sup>40</sup> Nebeisa Yesus beufoke hokolo name bokore meke, nebeibe nda name ijongkune relaeiboke. Petrusre weunge, "Hukai mbai sului mayae name ijoko elae yae ebeli oboi hangka? <sup>41</sup> Ijoko elae yae hebembe nane merau ebeli bonnele mai kena bekore haehae koyaube hakombe belene. Mayae kena koyaube Allah Naei a elelere hakombere nebeibe na hului ban, rabuhine ban nda uwa yambine."

<sup>42</sup> Yesus roko bee nendo eke, bowoungwe, "Nda ehee bukulu Reyae kaerebondere mokoungehakaena Ako Waei kenare koyae hului yae yembonde."

<sup>43</sup> Yesus beufoke meke, ereumi hokolo name na ijoko ehekai sele hubainyene, ijongkune rilekate faukate honate. <sup>44</sup> Yesus are ewei, ijongkune waeumihike honowate. Yesus roko name nendo eke roko beena a hului yae Naekore ebeli boungehike.

<sup>45</sup> Nebeisa Yesus hokolo name ijongkune honowate bokore meke mo weumi, "Mayae namman ijongkune honaube nane merau namman none yaeube. Eren, Reyae Allahle bokora mekale ro miyae uware yeubokale Kiyae u mekai bekore mokate ro miyae naei me einye kinyenaisebonde heebe na hului yeuboke. <sup>46</sup> Annu, men, eyae ema. Raei kelaise neke kiyae meke!"

*Yesusre Ikilaiboke*  
(Mrk. 14:43-50; Luk. 22:47-53; Yoh. 18:3-12)

<sup>47</sup> Yesus namman ane weumi hee, na moisa orowate me bee oro nen bee bele holona ro na ro Yudas meke. Imam yun-jun bele Yahudi kose yo bele ukaimile ro miyae holo kaban, hiwa na mene ramiyaeli hiwa o bohi-bohi bele nanembaise mewate. <sup>48</sup> Yesusre kelaise neke ro yae a bere nda yore ukeumi, "Reyae yoi bulure hunerensinde ro,

\* 26:31 26:31 Zakharia 13:7

nebei kiyae niyae mayae ikilembombe.”<sup>49</sup> Nebei anuwaunge ekate bele, Yudas na hibi Yesusle bokore eke ro melaeyeungeboke weunge, “Guru, Wauwa bele.” Nebeisa yoi bulu hineungekoke.

<sup>50</sup> Yesus yae weunge, “Aka baeke, mokoibone, waei haraungebokae mekae ma.”

Nebei yo na hibi mekate Yesusre ikilaiboke.<sup>51</sup> Nebeibe Yesus na moisa orowate holona ro mbai na ramiyaelire mo yobouboke imam kabanbe yebaei bubaei na angkaeibe neufake ruke.

<sup>52</sup> Yesus yae weunge, “Na honoi-sonoi anuwaunge waei ramiyaeli neinye, rabuhine ban nde yae ro miyaere ramiyaeli yae hombondena, ramiyaeli yae enaisombonde.<sup>53</sup> Weyae waeisaei ban selene, Reyae na hului Maekore riyerensinde. Neyae Naei malaikat na helen 72.000 hului aei kayaare weumile mate.<sup>54</sup> Allahle homofaene nulainyekoke rambun na hului sului benaterene nebei malaikat yoni-yoni emei nekate.”

<sup>55</sup> Ro miyae helen mekate yore Yesus yae weumi, “Mai u benera Rare yokolo yae elaubene era, Raei ikileihoise ramiyaeli yae o bohi-bohi yae yaraukoke mekaube? Reyae na yane baei Allahre ei mom-mom imae na kaban sele kiyae na imaehoungwe nuweuboyale keleyamaelebe mayae Rare ikileiboi.<sup>56</sup> Nebeibe nda mekai baete rambun nanemene yenjo kayaayo naei homofae einye molaikokere na hului yembonde.” Nebeisa na moisa orowate yo Yesusre nanene nukainyeboke na fere-fere habeleyeke.

*Yesus Yahudi Yoyo Koseyo Bene*

*(Mrk. 14:53-65; Luk. 22:54-55; Yoh. 18:13-14, 19-24)*

<sup>57</sup> Yesusre ikilaiboke, na hibi hele yawainyehoke Musale walora wali heere foloukoke are isaeyaeiboke kelaeimi holona bele Yahudi yoyo koseyo bele imam kaban Kayafasle imaene arileufike nekewate bokore yae ewate.<sup>58</sup> Yesusre yawainyehoke ewate moisa Petrus na ahau folo yae hakoumiboke imam kaban imaehoungwe ayeuboke. Petrus kena hele kowole Yesus yawainyehoke ate na huba enainyemokongkonde are isaeyembonderene imam kaban imaehoufe nangkele eweufike. Eke kayaayo bokone eunguweuboke nekewate.

<sup>59</sup> Yesusre honaibonde naei are ruwendere, imam yun-jun bele Kayafasle imaene arileufike, hiwa yo bele elae hele relewainye ehee bukulu wonnonde na hele ban are elengkonde ro miyae ei bae mei bae baewate.<sup>60</sup> Nebeibe nda yo ehee bukulure ungainyonde are helen ame-ame elewatebe, a mbai foi yae oyoloiboi mo. Nebeisa ro bee bene yeisebeuboke.<sup>61</sup> Hokolo bee yae elete, “Nda ro yae uwoumi, Reyae na hului Allahle imae kalarebonde, nebeisa ya name mo na hului benen arenunde.”

<sup>62</sup> Imam kaban aunguke mo Yesusre weunge, “Nda a Waei uware ehee bukulure hayaeyetere boroukokae. Weyae wo okoi mo nekeyae?”<sup>63</sup> Nebeibe Yesus a elei mo hebewole.

Nebeinye imam kaban mae Yesusre weunge, “Allah Walilole bene wawale maere weimena, Weyae Wali Ondofolo, Allahle Kelu Niyae?”

<sup>64</sup> Yesus yae weunge, “Wenaiejae warae, na hele Reyae Wali Ondofolo. Reyae na hele wawale, nda heera Reyae Allahle bokora mekale ro miyae uware yeubokale Kiyae Allah Elaalo Wakelo Na meube reufine nuwerebonde, nane merau yaku bumara mangko randa merele mayae erensele.”

<sup>65</sup> Nebei mekai boroukene imam kaban ikele hele kowolene, na malo yobouboke kaneukoke weumi, “Neyae Allahle mbainye yae eleukokene, aukakabe Allahre kounge! Are elenaikonde yo benen ebaiejae! Allahre aukaka kounge a mayae nanemene borokaube.<sup>66</sup> Mayae naendae yae elaube?”

Nda yo yae wainye, “Neyae a bekobe eleukokene herende hele!”

<sup>67</sup> Nda yo Yesus na be yoi euwaeki yae howainye me rulu yae rorowainye. Hiwa yo me fae yae rahuae yae bowate,<sup>68</sup> nda wanen wainye, “Maere weimena, Wali Ondofolo, nde yae ware rahuae bote?”

*Petrus Yesusre Oneunge Yae Eleukoke*

*(Mrk. 14:66-72; Luk. 22:56-62; Yoh. 18:15-18, 25-27)*

<sup>69</sup> Petrus namman imaehoungwe nekewole hee, yebaei bubaei holona maengke mbai meke Petrusre weunge, “Weyae na hi niyaebe ya, Yesus Galilea kanina ro bele nanembainye orowaube.”

<sup>70</sup> Nebeibe Petrus oneunge a ma ro miyae bene weumi, “Waeinya a haraungeboke eleyaere, reyae onaele hele.”

<sup>71</sup> Petrus nebei imaehou romau bere eke mo, maengke hi yae erekeungene, nebeinya hebate yore weumi, “Nda ro Yesus Nazaret yona ro bele nanembaisa orayeke.”

<sup>72</sup> Petrus nda kulunne oneunge are a holo yae koukoke eleukoke, “Reyae onaenale elale!”

<sup>73</sup> Na heki ban mo nebeinye hebate ro miyae Petrusle bokore mekate wainye, “Waei a faeu eleyaene mo meyae rayeubokete, weyae na hele Na ro hi niyae.”

<sup>74</sup> Petrus a olomo rorole elae yae weumi, “Reyae nebei ro onaenale hele yae wamale.”

Nebei hee yae ojo mukuu a koukoke! <sup>75</sup> Yesus yae ukeunge abe Petrus bene nekeungehike. Ojo a okoikoi mo Rare onaerae a roko name eleukonde. Petrus nebei anuwaufa na kena beko hele yae eukuke, rime kali ayan buyan koweke.

## 27

### *Pilatusle Me Einye Yesus Kinyainyeboko*

(Mrk. 15:1; Luk. 23:1-2; Yoh. 18:28-32)

<sup>1</sup> Rene ya eiwo meiwo kowole hee imam yun-jun bele Yahudi yoyo kose yo bele nanemene arilaisike Yesusre honaibonde naei a hokaikoke. <sup>2</sup> Yesus na me ha wowo kainyekoke yawainyehoke nebei yo yande ikileuboko mokowole Gubernur Pilatus naei me einye kinyenainyebondere ewate.

### *Yudas Nenaiejae Hane Heuboko Hereke*

<sup>3</sup> Kelaise neke kinyeumiboko Yudas, Yesus honaibonde naei a ruke boroko hee mehi hele folowole, na mena 30 perak hele ((roi kaban)) imam yun-jun bele Yahudi yoyo kose yo belere eke bukeumihike, <sup>4</sup> elele, “Reyae beko helebe mokoubokale. Beko ban ro kelai nekale enaisombondere kinyaimiboko.”

Nebeibe nebei yo yae wainye, “Maengkele elemakonde a ban, wenaiejae mo eleukonde.”

<sup>5</sup> Yudas nebei roi na ikele u yae Allahre ei mom-mom imae na kaban sele eise hekeleukoke ekate. Nebeisa eke nauwa nenaiejae hane heuboko hereke.

<sup>6</sup> Imam yun-jun nebei roi roukatera elate, “Hilira akaura hawande anuwaunge nda roi aiboi sului. Rabuhine ban nda kelaise neke roi ro ha bele.” <sup>7</sup> Nda yo a hului kolainyekokera nebei roi yae ebere helaise mokole ro naei kanibe roukate. Nebei kani yo moinya ro miyae herenatere molonatere roukate. <sup>8</sup> Nebei kani meke mana yane “ha bele kani” yae royainye. <sup>9</sup> Nebei wanan mae yenjo kayaayo Yeremia Yesusle naeise a eleukoke na hului yembonde. Naei a nda mekai moloukoke, “Israel kanina ro miyae are hokaikoke, Naei uware roi 30 perak hele yae mokonaibonde. <sup>10</sup> Allah yae ukeufe huluinye nebei roi yae ebere helaise mokole ro naei kanire roukate.”\*

### *Yesus Pilatus Bene*

(Mrk. 15:2-5; Luk. 23:3-5; Yoh. 18:33-38)

<sup>11</sup> Nebeisa Yesus yawainyehoko nebei yo yande ikileuboko Gubernur Pilatusle bere ekate. Gubernur Pilatus yae hineunge, “Weyae na hele Yahudi naei Ondofolo?”

Yesus yae weunge, “Na hele, wenaiejae nare eleukokae.”

<sup>12</sup> Imam yun-jun bele Yahudi yoyo koseyo bele ehee bukulure ungainyonde naei a hirewainyere, Yesus a mun faeu mun hebewole. <sup>13</sup> Nebeinye Pilatus yae weunge, “Ndi yo yae ehee bukulure ungayewote a einyo meinyo kayete Weyae oboroiboi sele?” <sup>14</sup> Yesus a mbai sambai eleikoi mo hebewolene, Pilatus fa yae bowole.

<sup>15</sup> Nebei hee Paskah feu ragi ban anate ya kaban na rokone baei kayekene, kawane hebate yo ro miyae helen mae kena koikoyate kiyaere Gubernur yae hayeikoyeunge. <sup>16</sup> Nebei hee kawane ro mbai hebewole na ro Barabas. Na me hila u hila koweke ro bele rainyeke. <sup>17</sup> Nebei rene ro miyae helen Pilatus yae nekewole anuwaunge arileufike hee, nda yore Pilatus weumi, “Mai naeise ndere mayae kena kaube reyae haiseng kondere, Barabasre, Yesus Wali Ondofolo wainye kiyaere?” <sup>18</sup> Pilatus naeisaei sele yeuboko, Yesusre ro miyae helen sele kena kowainyene, Yahudi yun-jun kena hensen kowate ikilaiyoko Pilatusre kinyainyeboko.

<sup>19</sup> Pilatus are kolainye imaene eunguweuboko hee, na miyae nda abe ukeumi ekate, “Nebei ro wali himaloungeboko Kiyaele a wangkele ehakoi eleijae. Rabuhine ban nebei Kiyaele aere ne mana reniai imene beko hele hubaimeyanale.”

<sup>20</sup> Pilatusre rinyainyehinde Barabas hainyainyekonde Yesus honaibonde naeise imam yun-jun bele Yahudi yoyo koseyo bele ro miyae helende a moi bele hurewaimi.

<sup>21</sup> Pilatus yae hineumi, “Mai kenara nda ro bee hebete eraumira ndere reyae haiseng kondere kena kaube?”

Nda yo yae wainye, “Barabas!”

<sup>22</sup> Pilatus yae weumi, “Nebei mekainya reyae rahe yae Yesus Wali Ondofolo yae rainye Kiyaele mokorembonde?”

Nda yo nanemene hele kaenate, “Nare ohaline bonaikonde hele!”

\* 27:10 27:10 Yeremia 32:6-9



<sup>23</sup> Gubernur Pilatus yae nda yore weumi, “Rahe beko mokoubokene?”

Nebei a wanen ukeumine nda yo kali ara nene kaenate, “Nare ohaline na bonaikonde hele!”

<sup>24</sup> Pilatus hubaunge nda nibi baele na hului ban nane merau nebei ro miyae huba rawaiبوکه aku nau hate. Nebeinye Pilatus bu reukoke ro miyae helen bene na me kuyeukokera mo weumi, “Nda Kiyae herende ha rangkele ban, nebei menaeijae mo elengkombe.”

<sup>25</sup> Nebei ro miyae helen mae Gubernur Pilatusre wainye, “Maere waeimihi homabonde. Naei ehee bukulu, meyae, nane merau maei kelu omi bele kaemabonde!”

<sup>26</sup> Nebeisa Pilatus nda yo yae riyewate huluinye Barabas hayeungekoke, ro miyaere ukeumi Yesusre rahuae yae bowate. Nebeisa ohaline enaibongkondere felayo naei me einye kinyeumiboke.

*Felayo Aukaka Yae Yesusre Kowainye*  
(Mrk. 15:16-20; Yoh. 19:2-3)

<sup>27</sup> Gubernur Pilatusle felayo Yesusre yawainyehoke Gubernur naei obene ekate, na felayo homo kaban kaeneumikoke Yesusle bokone arileufike. <sup>28</sup> Yesus na malo kulainyekoke, malo fi kole ma yae hirainyekoke. <sup>29</sup> Nda yo isa bele hun yaraikoke, nebei kanina ondofolo hiraikoke wanen fokomare mo hainyekoke, na yunne obunainyeboke. Na mene meube reufine ondofolo naei mehukun ikainyele, nda felayo na bene oro selen-selen roraikoke aukaka yae Yesusre kowainye, “Wauwa bele Yahudi naei Ondofolo!” <sup>30</sup> Euwaeki howainye, na mena mehukun nukaisake rahuaere na yunda roko yae roko yae bowate. <sup>31</sup> Aukaka kainyekokera, nebei malo hirainyekokere mo kainyekoke, Yesus Naei malo yae benen hirainyekoke. Nebeisa nda felayo Yesus ohaline enaibongkondere yawainyehoke aibaleke ewate.

*Yesusre Ohaline Baikoke*

(Mrk. 15:21-32; Luk. 23:26-43; Yoh. 19:17-27)

<sup>32</sup> Yerusalem yora aibaleke nibi nolone ewate yae, Afrika robon reufina yo mbai Kirenena ro mbai na ro Simon hubayaekoke bae Yesusre bonaikonde ohalire kaembon-dere waeli hele bewainye. <sup>33</sup> Anuwau mbai na ro Golgota, na mekai yun bo anuwau. <sup>34</sup> Nebeinye ekate yae nda felayo anggur bu rambun faere bele uwa buhae fomabonde naeise Yesus anensindere ikainyele, nebeibe felaeyeufikera anensindere ahi yae elewole. <sup>35</sup> Yesus ohaline baikokera felayo na malore wahenaikondere oye yae nihaebokke. <sup>36</sup> Nda felayo nebeinye raiboke, kayaane hebewate. <sup>37</sup> Mere nokainyele homone molaikoke rouke na yun rande buma reufine ukate. Nebeinye molaikoke,

NDA YESUS

YAHUDI NAEI ONDOFOLO.

<sup>38</sup> Yesus ohalire baikoke ijenne nanembainye yokore baeyeke ro bee bele meline meubene baikoke. <sup>39</sup> Ro miyae ele melere nebeinye kowate yo Yesusre aukaka yae kowainyele, yun wewe kowate, <sup>40</sup> wainye, “Weyae Niyae are elewoyae ‘Allahre ei mom-mom imae na kaban sele kiyaere kelarebonde na hului ya name mo arenundere.’ Weyae Allahle Keluna, Wauwa hole moloibo, nebei ohali randa oyakoibo.”

<sup>41</sup> Imam yun-jun bele Musale walora wali heere foloukoke are isayaebokke kelaeimi yo bele Yahudi yoyo koseyo bele aukaka nebei sului mbai Yesusre kowainye, na a bele wainye, <sup>42</sup> “Ro miyae hiwa yore hole moloumiyeke, nebeibe Naei uware hole omoloibo sului. Neyae Israel ro miyae naei Ondofolona, naei foi sele ohali randa onakombonde, nebeinye meyae hila rabo nare halemande. <sup>43</sup> Neyae na hila rabo Allahre haleungeke nane merau eleweke Niyae Allahle Kelu. Nebeinya nda hee Allah kena kolena hole molonnebonde.” <sup>44</sup> Nebei sului mbai Yesus naei nanembainye ohaline baikoke hokolo bee bele aukakane Yesusre kowoinye.

*Yesus Hereke*

(Mrk. 15:33-41; Luk. 23:44-49; Yoh. 19:28-30)

<sup>45</sup> Nebei anuwau hukai me bee oro nen bee hului ouben yeuboke oke hukai name. <sup>46</sup> Huae rai hujoko name hului Yesus Aram afaeunge kali na a kaban mae kaenele, “Eli, Eli, lama sabaktani! Na mekai: Raei Allah, Raei Allah, rahene Rare nukuefobokae?”

<sup>47</sup> Nebeinye hebate yo borokatene elate, “Allahle yendo kayaalo Eliabe kaeneunge.”

<sup>48</sup> Ro mbai u hale me hale eke, hakalu foma-foma rouke, anggur manim bele bune yaweufike, one neke, kaeungeboko, Yesusre yennele anensindere. <sup>49</sup> Hiwa yo yae elate, “Ae, na foi sele ijoko yae mo ereman, Naei hole moloiboise Elia mende era.”

<sup>50</sup> Yesus benen a kaban mae kali kaeneukoke, nebeisa na nore mo Allahre kinyeunge-boko.

<sup>51</sup> Allahre ei mom-mom imae na kaban sele kiyae naei yowa heere naisake malo kaban kayeukoke bumara oke ane, oinyeu hineuboke, ruka yoni-yoni kaiwate. <sup>52</sup> Nane merau ruka bulei wewe molowate, Allah Naei eleuboke wekeumi ro miyae helen herai bokera ainyuke. <sup>53</sup> Yesus aungukera nda holona yo ruka bulei eisa aibaleke. Nebeisa Yerusalem yore ayeuboke ro miyae helende uwa yakawaimi.

<sup>54</sup> Fela yun na u keleene yo bele Yesusle kayaane hebewate oinyeu hineubokere nane merau nanemene yaeiboke rambun erewatene buhae hele hokoumiboke, elate, "Na hele nda Kiyae Allahle Kelu."

<sup>55</sup> Nebeinye miyae maengke helen ahaufa hebaiboke erewate. Nda miyae maengke Galilea kanira Yesusre hakainyekoke eise hauwainye yo. <sup>56</sup> Nebei miyae maengke nolona Maria Magdalena nangkele Maria Yakobusle Yusufle nenake, nane merau Zebedeus na miyae nangkele.

*Yesus Naei Here No Molaisake*

*(Mrk. 15:42-47; Luk. 23:50-56; Yoh. 19:38-42)*

<sup>57</sup> Yahudi kanina yo mbai Arimatea na ro mbai eba he bele ro na ro Yusuf. Nenaeiaje Yesus na moisa orowate holone hakouboke. <sup>58</sup> Be bahewoke hee Yusuf yae Yesusle here no riyeisise Gubernur Pilatusle bokore eke. Nebeinye Gubernur Pilatus a ukeumi here no nare ikainyele. <sup>59</sup> Yusuf nebei here nore mo rouke malo lenan maye-mayene ruleufike. <sup>60</sup> Nebeisa Yusuf naei ruka bulei neme waeiboke einye nekainyele, ruka kaban olainyekoke romau ahaeinyekokera, Yusuf bukeufike ewole. <sup>61</sup> Nebeibe Maria Magdalena nane merau Maria hi kayeero, hokolo bee ruka bulei bene roiboke nekewote.

<sup>62</sup> Ya heuboke mo, Paskah raman mokoisayainye ya baeufoke mo, imam yun-jun bele Farisi holona bele nanembaisa Pilatusle bokore ekate, <sup>63</sup> wainye, "Rowa, mayae bene nekeumehike ndi ro hereke na waline nekewole hee ame-ame bewoumi eleweke, 'Ya name mo Reyae arenunde'. <sup>64</sup> Nebeinye weimi nebei ruka bulei bene kayaa enaisebende. Rabuhine ban ya name yembonde na moisa orowate yo yae here nobe yoko yae enaitowendebe, nulu yo mahe yore aunguke yae ro miyaere nendon wabenaimile bele. Nebei mekai yembondena, naei ame-ame bewoumi na beko helebe yembonde."

<sup>65</sup> Gubernur Pilatus yae weumi, "Mai kayaayo niyae, mayae wemmile ruka bulei kayaa foi sele yae enaisebende." <sup>66</sup> Nda yo ekate kayaayo yae hakaimiboke, romau ruka yae mokaibokene me nou herawaikoke. Nebei ruka bulei kayaa yae hebewate.

## 28

*Yesus Waleuboke*

*(Mrk. 16:1-10; Luk. 24:1-12; Yoh. 20:1-10)*

<sup>1</sup> Sabat ya moi woke, nebei mon ya mbai nendo, ya eiwo meiwo kowole hee Maria Magdalena, Maria hi kiyae, ruka bulei ereiboise ewote.

<sup>2</sup> Oinyeu kaban sele hineuboke rabuhine ban Allah Naei malaikat mbai yaku bumara oke, nebei bulei romau ahaeinyekoke ruka oleungekoke, na ranne nuweuboke nekewole.

<sup>3</sup> Na be yoi wili hehe wanen, na malo keleumon hele salju wanen. <sup>4</sup> Ruka bulei kayaane hebewate felayo buhae hokoumiboke, oro me bae hayaeiboke, ane balewate, here no wanen mae honowate.

<sup>5</sup> Nebei miyae beere malaikat yae weumi, "Mayae buhae ohokoijae! Reyae raeisaei Yesus ohaline baikoke Kiyaebe mayae baimeyaunge. <sup>6</sup> Nda anuwaunge ohonoi. Mare na bere a uwombe huluinye aunguke. Men, uware nekainyele honowole anuwau ijoko memerembo. <sup>7</sup> Nda hee u hale yae embe, na moisa orowate yore wemmile, 'Neyae nulu yo mahe yora aunguke, bere holo yae Galilea yore ende. Mayae nebeinye ennerembombe.' Nda a Neyae ukeufebe reyae wamale."

<sup>8</sup> Nebei miyae-miyae u hale me hale ruka bulei ijenda alainyekoke, fe waku kowate nebeibe nane merau rei mai hubawainye. Malaikat yae ukeumi are Yesus na moisa orowate yore ungaimilerene oro yae habeleyeke. <sup>9</sup> Nebeisa habeleyeke hee yae Yesus nda miyae bee bele huhu baikoke. Yesus yae ro melaeyeumiboke weumi, "Mai foi." Nda miyae bee Yesus na bokore mekete, oro selen-selen roroikoke, norora aeinyefoke, ei molowainye. <sup>10</sup> Yesus yae weumi, "Buhae ohokoijae ebe, Raei aka baeke ware a wemmile Galilea yore yae enate, ndine Rangkele emahubayengkonde."

*Kayaare Hebewate Yo Naei Ahuba*

<sup>11</sup> Nebei miyae bee nibi nolone ewete hee, felayo ruka bulei kayaare hebewate yo keli name Yerusalem yore ewate. Ruka buleinye yeuboke are imam yun-junde isaeinyaimibondere ewate. <sup>12</sup> Imam yun-jun bele Yahudi yoyo koseyo bele riyane a elaikokene hokaikoke. Kayaare hebewate felayore roi yae inyaimikondere hokaikoke

<sup>13</sup> waimi, “Nda a mekai yae wemmile, ‘Reniai nolo ijongkune honowande hee yae Yesus na moisa orowate yo yae mekate, here no yoko yae elaisake. <sup>14</sup> Nda a Gubernur Pilatus borombondena, mare beko omokoi naeise meyae a moi-moi yae mokomangkonde.’ ”  
<sup>15</sup> Nebei felayo roise mo yaraike are heraewaimiboke hului yae ekayelewate. Nda a mekai Yahudi ro miyae nolone nda hee namman huweimeyate.

*Yesus Huba Mokoungekoke A Usaei*

(Mrk. 16:14-18; Luk. 24:36-49; Yoh. 20:19-23; Y.A.A. 1:6-8)

<sup>16</sup> Yesus ukeumi huluinye na moisa orowate ro me bee oro nen mbai bele Galilea na moko keleumibokere kulun ukate ewate. <sup>17</sup> Ndine Yesusre erekainyele nda yo ei molowainye, nebeibe arilewoungue nolona hiwa yo na kena wauwau hele kowate. <sup>18</sup> Yesus nda yo bokore meungakeleufike mo weumi, “Allah Naei elae wake nane merau nda kani kelana elae wake nanemene hele Raei me einye kinyeufeboke. <sup>19</sup> Nebei aerene nda kani kelana yo yoni-yoni embe na hubane haeinye. Na ro miyae kelemmle Raei a elalere hakonayende nekenayende. Nane merau nda yore Maekole ro yae, Reyae Allahle Kelu ro yae, Allahle Roh ro yae bu kommile. <sup>20</sup> Nane merau nebei yore, mare uwamale a hului kelemmle nebei sului yae mokonate. Reyae mare na hibi mo ei haufemembe ende nda kani kela huba mokorende yane.”

## MARKUS

### *Yesus Mende A*

(Mrk. 3:1-12; Luk. 3:1-18; Yoh. 1:19-28)

<sup>1</sup> Allahle Kelu Yesus, Wali Ondofolo Kiyae, Naei a foi faeu foi nda na huba raweiboi.  
<sup>2</sup> Nendahina Allahle yendo kayaalo Yesaya homofaene moloukoke. ((Nebei homo einye Allah yae Wali Ondofolore Yohanes bure koui kiyae naeise nda a moloukoke,))

“Nda Raei burelen boi-boi ro.

Waei nibi mokoisaise nare bere holo yae ufende ende.

<sup>3</sup> Nebei burelen boi-boi ro a kala-kala anuwaufa ro miyaere nda a kaenemmile,

‘Aei Tuhan menderene wali nibi mokonnehambe!

Ende nibi kalo-kalo ran-dan hiyei ranennebombe,

yeli-yeli kayeero ijen alonnehambe!’ ”\*

<sup>4</sup> Molaikoke huluinye Yohanesbe a kala-kalane yakauboke. Ro miyaere bune kouiyeke, nda ako faeuko uwoumi, “Mai me u beko mokaubera nei hungembe bukembombe mauwa yemmile bu konayembe. Nebeisa mai me u beko Allah faenymbombe.” <sup>5</sup> Ro miyae helen Yudea kanina yo yan honatera Yerusalem yora Yohanesle bokore a kala-kala anuwaufe hokoumeke. Na me u bekore wo kaikoke yo, Yordan wine Yohanes bu kowoumi. <sup>6</sup> Yohanes na malo obo yoku unta naei ma, na yolu ha obo yoku rara, neraman kesengki bele akelana madu bele. <sup>7</sup> Yohanes nda abe huwoumi, “Reyae mekale eraufe, nebeibe one bele hengko bele kiyae raei moisa mende. Naei oro mehau ha niheisi kulaiboise reyae na hului ban, rabuhine ban Naei bene reyae ro ban selene. <sup>8</sup> Reyae mare bu yae kamale, nda wanen mbai nebei Kiyae mende mare Allahle Roh yae haungembe.”

### *Yesusre Bu Koungboke*

(Mat. 3:13-17; Luk. 3:31-32)

<sup>9</sup> Yohanes bu kowoumi hee yae, Yesus Nazaret yo Galilea kaninara meke. Yordan wine Yohanes Yesusre bu koungboke. <sup>10</sup> Nebei bura yeukiteke hee yae Yesus erele yaku wekeunge, aye merpati wanen mae Allahle Roh Yesus Na uwa rande oke. <sup>11</sup> Surgara a elele, “Weyae Raei kena buhaere haewale kelu. Rare kena foise mokarae.”

<sup>12</sup> Nebeisa yeubokera na hibi Allahle Roh yae Yesusre yaweungehoke a kala-kala anuwaufe ewole. <sup>13</sup> Neyae a kala-kalane ya rorele u bee nekeukoke mo Setan, walobo yun, umali hubawoung. Yesus obo yoku hangkei-hangkei nolone nekewole nane merau malaikat yae ei hauwainyele.

### *Yesus Na Moisa Oronate Ro Kaeneumikoke*

(Mat. 4:12-22; Luk. 4:14-15; 5:1-11)

<sup>14</sup> Ya mbai mo Ondofolo Herodes ukeumile Yohanesre ikilenaibonde kawane ahenainyekondere. Na heki ban mo, Yesus Galilea kanire meke, Allahle a foi faeu foi nebeinya huwoumi. <sup>15</sup> Weumi, “Allah merau raungehike ya ninai nobeungeboke Naei holona ro miyae Reyae Wali Ondofolole me keele u keleene menayorulembonde nekenate. Mai me u beko mokoyaubera nulu kenembombe bukembombe, nda a foi faeu foi na hele yae elembe.”

<sup>16</sup> Ya mbai mo, Galilea bukoba bu haei yau faeisa Yesus ele melene oroweke yae ro bee erekeumi Simon naka baeke Andreasle waunge haiwote naei kalia mokoyeke huluinye. <sup>17</sup> Yesus yae weumi, “Mebu, rare hakoisoko! Wau kare hayaeube wanen ro miyaere hayebobe ma mare kelerekobe.” <sup>18</sup> Na hibi hele na wau nukeiboke Yesusle moisa aloinyekoke.

<sup>19</sup> Ewate mo Yesus erewole Zebedeusle kelu wa bee Yakobusle Yohanesle kai einye waunge mokowote. <sup>20</sup> Yesus nda beere kaeneumikoke na hibi na moisa hakeinyekoke. Naeko Zebedeus bele na kalia yo bele kai einye nukeimiboke hakoinyekoke ewate.

### *Yesus Yae Walobore Hukeungehike*

(Luk. 4:31-37)

<sup>21</sup> Yesus na moisa orowate yo bele Kapernaum yone aibaleke. Sabat ya yae nebeinya Allahre ei mom-mom imaene Yesus eweufike huba raweuboke kelewoumi. <sup>22</sup> Yesus a elewolere borowainye yo yae fa yae bowate, rabuhine ban Neyae one bele hengko bele wanen mae kelewoumi Musale walora wali heere foloukoke isaeyaeiboke kelaeimi yo wanen ban. <sup>23</sup> Nebei hee yae, ro mbai nebei nekatera alo yae aungeboke kiyae kali yae

\* 1:3 1:3 Yesaya 40:3

kaenele, <sup>24</sup> “Yesus Nazaret yona ro, rahere weyae mekae? Bekore mokoumbondere? Reyae raeisaei weyae Allah yae eleubokete ukete mekae Kiyae.”

<sup>25</sup> Nebei walobore Yesus yae oku nekeunge, “Hileibo! Nda ro uwa eisa eituwe!”  
<sup>26</sup> Nebei walobo nda ro nauwa nekeunge oinyeu wae hineuboke. Nele bele yae kaenewole nauwa eisa eukuke.

<sup>27</sup> Ro miyae nemene fa bate wa elate, “Nda rahe a usaei emebe na elae helae bele keleumi. Walobo weumi na hului borainye nane merau hukeumi na hului baleyate.”

<sup>28</sup> Yesus nda ma mokouboke hasale hele a eungeyoboukoke, Galilea kanina yo honate boraiboke.

*Yesus Yae Era Yo Buloo Yo Helen Onomi Iwoumi*

(Mat. 8:14-17; Luk. 4:38-41)

<sup>29</sup> Allahre ei mom-mom imaera maibaleke Yesus yae Yakobus bele Yohanes bele yaweumboke Simonbe Andreasle imaere ewate. <sup>30</sup> Yesusre isaeyaeinyeboke Simon na miyae nenake era manse-mansene kowole. <sup>31</sup> Yesus nda miyae honole anuwaufe eke na mera ikeleungeboke aungunuke, nane manse-manse kowole hireungeboke aunguke anenaikonde naei eramanne mokowole.

<sup>32</sup> Nebeise be bahewole yae, ro miyae erana buloona koyate yo nane merau walobo yae hawaimiyeke yo nemene Yesusle bokore yawuaimi mewate. <sup>33</sup> Kapernaum na ro miyae nemene imae romau bene ele yae nainyeboke. <sup>34</sup> Era buloo mahi-mahi kowate yo helen Yesus onomi iwoumi. Walobo yae hawaimiyeke yo helen na walobo hukewoumi. Yesusre rainyebokene, nebei walobo are elenatere Yesus mon eyei.

*Yesus Galilea Kanine*

(Luk. 4:42-44)

<sup>35</sup> Na rene kaukau fele Yesus aunguke, imaera eukuke, aku ban nau ban anuwaufe ewole. Nebeinye Allahre ebeli ekeubowoune. <sup>36</sup> Simon na kahili wa bele alainyeko baeinyeke. <sup>37</sup> Hubayaikoke mo Yesusre wainye, “Ro miyae nemene ware mo baeyete.”

<sup>38</sup> Yesus yae weumi, “Men, ndi yo ran yo rande oromandere. Reyae ndi yo bele yae a foi faeu foi hufemikondere mekale.” <sup>39</sup> Nebei aerene Yesus Galilea kanina yo honatere oroweke. Nebei yo yanna Allahre ei mom-mom imaene a usaei uwoumi nane merau walobo hukewoumi.

*Yesus U Bauwaunge Koweke Rore Onomi Ikeunge*

(Mat. 8:1-4; Luk. 5:12-16)

<sup>40</sup> U bauwaunge koweke ro Yesusle bokore meke oro selen-selen mae roroukoke hakonnebondere na hebaen-sebaen riyewoune weunge, “Weyae kena kolena, rare na hului onomi yeufele.”

<sup>41</sup> Yesus Na kena beko bele hubaungene me nekeunge raungehike mo weunge, “Reyae kena kale, onomi yeubondere!” <sup>42</sup> Yesus are ukeunge hee yae na uwana u bauwau u yaeiboke onomi rouke. <sup>43</sup> Ukeunge endere yae a hun raungehike weunge, <sup>44</sup> “Bene nekenayete nda onomi ikawalere hi hire ehuweyijae. Oro moloubonde imam hebele kiyae naei bere ele, onomi yeubokae naei uwa yakaungebonde. Musale walora wali heere foloukoke a huluinye Allahre hili era akau erare ongkou wae felennekonde naeise obo yoku mbai yeungele.” <sup>45</sup> Nda ro Yesus yae ukeunge a huluinye ehakoiboi. Naei ewole ijenne huweumiyeke. Nebeinye Yesus yo hire na u yaka yae endere kabewoune, yo moinye aku ban nau ban anuwaunge nekewole. Nebeibe anuwau hira-hira ro miyae Nare hubainyaikondere hokoumeke.

## 2

*Yesus Oro Mere Nimewainye Rore Onomi Ikeunge*

(Mat. 9:1-8; Luk. 5:17-26)

<sup>1</sup> Galilea kanira ya mbemba ayorokokera, Yesus Kapernaum yore bukeufike meke. Neyae imaere bukeufike meke a yobougekoke. <sup>2</sup> Ro miyae helen sele mekate nebei imae maemae koukoke, nane merau romau moinye ro miyae helen hebewate. Yesus nebei yore ahuba huwewoumi. <sup>3</sup> Ro keli hele ro hi oro mere nimewainyebone na koinye kaeibokate mewate. <sup>4</sup> Ro miyae helenne Yesusle bokore enatere kabewainye. Nebeinye imaena yan Yesus hebele anuwaunga mo wewe kaikoke. Nda ro na koi ranne nokainyele oke. <sup>5</sup> Yesus nda yo na hila rabo halewate erekeumine, orora nimainyeko rore weunge, “Keli, wa beko bako ninai faeinyeubokawale!”

<sup>6</sup> Musale walora wali heere foloukoke are isaeyaeiboke kelaeimi yo nebei anuwaunge nekewate nebei ara boroukate bae na u bene haeyaeinye wa elate, <sup>7</sup> “Buhae hokoiboi

ban nda a eleukoke, Allahre aukakabe kounge, Nauwa Allah lon mae eleukoke. Ro miyae naei beko faeinyeiboise ro hi miyae hi yae na hului ban! Allah Nenaiejaere na hului.”

<sup>8</sup> Na kena eisa elate a Yesus na hibi isaeyebokene weumi, “Mai kena u einye a na hele ban elaupe! <sup>9</sup> Meyae elaupe, ‘Na foma-foma hele Yesus nda rore weungele, Wa beko ninae faeinyebokawale, rabuhine ban yembonde naeise ro miyae ereiboinye. Nebeibe ehakeai kiyaebe Yesus wennele, Ainyu, wa koi kaeibo eye, rabuhine ban ro miyae erenaterene.’ <sup>10</sup> Reyae kelerembombe na hele Reyae, Allahle bokora mekale ro miyae uware yeubokale Kiyae, na hului Allahle elae yae ro miyae naei beko faeinyeremikonde.” Nebeisa orore nimainyekoke kiyaeere Yesus yae weunge, <sup>11</sup> “Ainyu, wa koi kaeibo, waei imaere aloinyoko eye!” <sup>12</sup> Ro miyae nanemene erewainye hee yae nda ro aunguke, na koi kaeuboke, eukuke ewole. Erwainye yo fa yae bowate, Allahre buma kaewainye wa elewate, “Nda yeuboke ma roko mbai ereiboi mo!”

*Yesus Lewire Kaeneungekoke*

(Mat. 9:9-13; Luk. 5:27-32)

<sup>13</sup> Yesus benen Galilea bukoba buhaeisa ewole. Ro miyae helen Yesusle bokore hokoumeke. Yesus huba raweuboke a usaei wasaei kelewoumi. <sup>14</sup> Nebeisa fowole yae Alfeusle kelu Lewi pemerintah naei roise arilate imaene erekeunge nekewole. Yesus yae weunge, “Rare hakoisobo!” Lewi ewaunguke na moisa hakoungoboke ewate.

<sup>15</sup> Ya mbai mo, Yesus na moisa orate yo bele Lewile imaene eramanne anewate. Nebeinye pemerintah naei roise arilewate yo bele, Farisi yae u mekai beko bele yae me baeiboke yo, Yesusle holo bele anewate, rabuhine ban nebei ma ro miyae helen Yesusre hakowainyele. <sup>16</sup> Farisi Musale walora wali heere foloukoke are isaeyaeiboke kelaeimi holona yo yae Yesus nebei yo bele eraimi eraman nanembainye anatene, Yesus na moisa orowate yore hinewaimi, “Yesus rahene pemerintah naei roise arilate yo bele nebei u mekai beko yo bele eraman nanembainye anate?”

<sup>17</sup> Yesus nebei a waimi boroukokene weumi, “Erana buloona yo yae Dokterre baeyaimi, nebeibe onomi yo ebaei. Reyae ro miyae beko bele yore kaeneremiyendere mekale, nauware himalainyeboke eleyate yore ban.”

*Raman Yarele Me Heiboyate Mon*

(Mat. 9:14-17; Luk. 5:33-39)

<sup>18</sup> Roko mbai mo, Yohanes bure koumi kiyae na moisa orowate yo bele Farisi yo bele yarele me heiboyate nekewate. Ro miyae hiwa mekate Yesusre hinewainye, “Rahene nebei yo yarele me heiboyate mon nekatebe, nebeibe wa moisa orate yo enekei?”

<sup>19</sup> Yesus yae weumi, “Ro mbai miyae rowele ya naka baeke rei mai ikowate, naei bokone inyekewate, raman yanewate. <sup>20</sup> Na ya bele mensembonde, nebei ro naei nolora rountate yae nebei hee yaere yarele me heiboyate nekenaikonde.”

<sup>21</sup> Yesus benende elele, “Na mekai ban sele malo male kayengkondere malo neme yae hakande ungate, rabuhine ban hakande uke malo neme kingkondene nebei anuwau kaban sele kanengkonde. <sup>22</sup> Nebei sului mbai, hokou male anggur bu bale-balere rilembonde mokonnele ohulendene kayengkonde, nebei bu rilenate. Nebei anggur bu bale-bale hokou nemene rilembe.”\*

*Sabat Ya Naeise*

(Mat. 12:1-8; Luk. 6:1-5)

<sup>23</sup> Sabat ya mbai Yesus Na moisa orowate bele gandum heke nolora ewate. Norone ewate, gandum ani hokayeke anayeke. <sup>24</sup> Farisi holona yo yae erekaimile mo, Yesusre wainye, “Musale walora wali heere foloukoke a hului Sabat ya yae omokoi mabe rahene wa moisa orate yo mokate?”

<sup>25</sup> Yesus yae weumi, “Ondofolo Daud naei monine nekewate heene mokouboke u mekai mayae homone okoikoi mo? <sup>26</sup> Imam Abyatarle heena, Musale walora wali heere foloukoke a huluinya Allahre feu hili era akau era ikainyele imam mae mo anenaikondere. Nebeibe Ondofolo Daud rouke hakainyekoke yo bele anaikoke.”

<sup>27</sup> Benen weumi, “Sabat ya ro miyaere mokouboke ro miyae Sabat yare mokouboke ban. <sup>28</sup> Nebeinye, Reyae Allahle bokora mekale ro miyae uware yeubokale Kiyae, Sabat ya naeise Reyae naei yun nyae.”

\* 2:22 2:22 Malo male bele hokou male bele ro miyae naei era hena hului nekenate yo bele a ahuneuboke. Neme kiyae Yesus a elele hului nekate yo bele a ahuneuboke.

## 3

*Ro Mbai Na Me Reufi Kingkouboke*  
(Mat. 12:9-14; Luk. 6:6-11)

<sup>1</sup> Kapernaum yone nekwate hee yae Sabat ya mbai Allahre ei mom-mom imaere Yesus eweufike. Hokoumeke nolone ro mbai na me reufi kingkouboke nangkele meweufike. <sup>2</sup> Ro miyae hiwa Yesusre kemere nenainyehonderene Nare ijoko raisike erewainye Sabat ya ndi rore onomi yei bele era. <sup>3</sup> Yesus yae nda rore weunge, “Nda ro miyae bene meisebeinyu!”

<sup>4</sup> Nebeinya yore Yesus hineumi, “Musale walora wali heere foloukoke a huluinye rahebe Sabat ya mokomale? Beko yae foi yae? Hole yae molomamile, hoi-soi yae homale?” Nebei yo a ban faeu ban mo nekwate.

<sup>5</sup> Na yun elae katene Yesus kena bekore yeuboke. Na kena ikele yae a hire a hire ereukoke wa nda rore weunge, “Wa me neinye!” Na mena nekeunge bele na hibi onomi rouke. <sup>6</sup> Farisi holona Allahre ei mom-mom imaera aibaleke, ekate Yesusre honaibonde naei ane Ondofolo Herodesle holona yo bele ekayewate.

*Ro Miyae Helen Buhaeinye Hokowole*

<sup>7-8</sup> Kapernaum yora Yesus na moisa orowate yo bele Galilea bukobare ewate. Yesus rambun emere-emere mokowole borowatene ro miyae helen bolen hakainyokoke. Galilea kanira, Yudea kanira, Yerusalem yora, Idumea kanira, Yordan wi enaa reufira, Tirus yo bele Sidon yo bele yo honatera hokoumeke. <sup>9</sup> Ro miyae helen hokoumeke uwa yae ainyainyokonde belene, Yesus yae na moisa orowate yore ukeumi kaikai mbai mokonainyehande are huwemmilere. <sup>10</sup> Yesus yae ro miyae helen onomi iwumine, erana buloona yo Yesusle uwa bokore eikinye meikinye Naei uware me ferere ramenainyehindere relewainye. <sup>11</sup> Ro uwa miyae uwana walobo Yesusre ereungene na bene meutuwele kali yae kaenele, “Weyae Allahle kelu!” <sup>12</sup> Nebeibe Yesus nda walobo yoni-yonire oku yae rorowoumi, Nauwa naei are eyakai yae uwoumi.

*Yesus Abu Ako Me Bee Oro Nen Bee Bele Eleukoke*  
(Mat. 10:1-4; Luk. 6:12-16)

<sup>13</sup> Yesus elune ike yae kenare kowoumi yore mo kaeneumikoke mekate. <sup>14</sup> Yesus yae ro me bee oro nen bee bele eleukoke, abu ako yae roumiboke weumi, “Reyae mangkele oromalere nane merau ufembe Raei ako faeukobe huwembere mare elembokamale. <sup>15</sup> Walobore hukemmile naei elae arembombe.” <sup>16</sup> Ro me bee oro nen bee bele eleukoke na ro nda niyae: Simon (Yesus Petrus yae roungeboka kiyae), <sup>17</sup> Zebedeusle kelu wa Yakobus nauwawe Yohanes (nda ro bee Yesus Boanerges yae roumikoke, na mekai kule kelu wa), <sup>18</sup> Andreas, Filipus, Bartolomeus, Matius, Tomas, Alfeusle fa Yakobus, Tadeus, Simon Zelot holona fa, <sup>19</sup> Yudas Iskariot, Yesusre kelaise mokouboka kiyae.

*Yesusle Beelzebulle*

(Mat. 12:22-32; Luk. 11:14-23; 12:10)

<sup>20</sup> Yesus naei elura bukaiboke imaere mekate, ro miyae helen hokoumekene eramande anenaikondere kabewainyele hele. <sup>21</sup> Yesus na aka baeke wa Yesusle a boraikokene mekate yaungainyehondere, rabuhine ban ro miyae naeisa borokate Yesus na u bene beko yeuboke.

<sup>22</sup> Yerusalem yora mekate Musale walora wali heere foloukoke are isaeyaeiboke kelaemi holona yo yae elate, “Beelzebul (walobo yun) Yesusre helaukeunge. Nebei walobo yun mae walobo hiware huweumi.”

<sup>23</sup> Nda a mekai elaeikokene, Yesus nebeinya ro miyaere kaeneumikoke wa, a ahuneuboke weumi, “Walobo yun na walobo akobaere ehukeyei! <sup>24</sup> Yo yan mbai na ro miyae han soi-soi wanen nekenatena, nebei yo yan here ware wembonde. <sup>25</sup> Imae mbainya na ro miyae naeise naeise kena ikele nekenatena, nebei imaera here ware wembonde. <sup>26</sup> Naei mekai mbai Setan naei yo waku wahenaikonde nanaei mo relenainyelena, naendaen wanan mae elae hebende? Naei yo waku here wembonde. <sup>27</sup> Elae ro wake ro ha ikileikoinya, naei imaene rambunde yoko yae yaroukondere na hului ban sele. Nebei ro rineungekonde helere na hului.”

<sup>28</sup> “Na helebe Reyae wamale, u hila wa hila mahi-mahi koyate yo bele ro miyaere aukaka koyaimile bele Allah na hului faeinyemmile. <sup>29</sup> Nebeibe nde naei yae Allahle Rohre aukaka konainyelena, Allah nebei yore efaeinyeiboi mo huba ban haei ban nekenende.”\*

\* 3:29 3:29 Isaei bele holona yo hiwa u bene nekaimi Allahle Rohre aukaka konainyele nda merau mokonate: Yesus yae rambun emere-emere mokondere walobo elae walora mokole yae elemba.

<sup>30</sup> Yesus walobo yae helaukeunge elewatene, nebeinye nda a mekai yae ukeumi.

*Yesus Nenake Nauwake Wa Bele*

*(Mat. 12:46-50; Luk. 8:19-21)*

<sup>31</sup> Nebei imaene Yesus ane elewole hee, nenake nauwake wa bele mekate, imae moinye hebewate, ro hire ukainyele Yesusre kaenenengkondere. <sup>32</sup> Ro miyae helen Yesusre yanainyekoke nekatera wainye, "Guru, ana, wauwake wa bele mekate wangklele hubayengkombere moinye nare ekaisebate."

<sup>33</sup> Yesus nebei yore hineumi, "Menake bele Raei aka baeke bele nde naei?" <sup>34</sup> Na bokone yanainyekoke ro miyae helende Yesus ereumi mo elele, "Raei menake raei aka baeke nda niyae!" <sup>35</sup> Ro miyae Allah kenare kole huluisse mokonate nebei holona yo niyae Raei aka baeke wa remaen wa menake naei."

## 4

*O Haka Ahuba*

*(Mat. 13:1-9; Luk. 8:4-8)*

<sup>1</sup> Roko mbai Yesus Galilea bukoba bu haei yau faeinye a usaeinye huba raweuboke kelewoumi yae, ro miyae helen bolen hokoumeke ele yae nainyebokene. Nebeinya kai yate einye Yesus nuweuboke, nebei ro miyae buhaeinye hebewate. <sup>2</sup> Nebeisa Yesus a usaei helen kelewoumi a ahumbo-ahumbo yae ahunewole nda wanen mae weumi, <sup>3</sup> "Boron, heke rorele mbai o hakare heraeyendere eke. <sup>4</sup> Heraeyeweke bae hiwa nibi enene balekate, aye mekate anaikoke baeufoke. <sup>5</sup> Hiwa kani ruka bele ranne balekate kani helee-heleene, u hale hele yae kitewate. <sup>6</sup> Nebeibe na kambu eise eleman oi, hu kiteke bae na reu habaiboke, kala-kala yaeiboke. <sup>7</sup> Hiwa yo isa bele hun nolone balekate. Na reu hun isa bele yae auwaimine anire omokoi sului. <sup>8</sup> Hiwa yo kani foinye balewate kitewate buyae-buyae kowate, kaban yaeiboke, ani faru raka yae raka yae hurewaimile, hiwa rorele u mbai me bee bele, hiwa rorele u name bele, hiwa rorele u maehae mbai bele ani-ani faru-farune mokowate."

<sup>9</sup> Yesus weumi, "Mayae angkaei boraube ro miyae nebei are nou hemo!"

<sup>10</sup> Na mo-mo yae ekate nda a ahumboi yae ahunebokere na moisa orowate yo me bee oro nen bee bele yae hinainyehike. <sup>11</sup> Yesus yae weumi, "Mare Raei me kelee u keleene nekate ro miyae holona nunna honayeke rambunbe isaeyembokamale. Nebeibe, moise woke holonare a ahumboi yaere keleremile. <sup>12</sup> Nebei nibi yae, nda a Allahle yendo kayaalo Yesaya homone moloukoke na hului yembonde, 'Neyae ijoko yae erenayendebe nane merau angkaei yae boronayendebe, nebeibe u benene isaeyeiboi.

Isaeinyaibondena,

nulu kenaibonde naei wali ma bukenainyehinde era,

nebeinya Allah naei me u bekore faeinyemmibonde.' "

<sup>13</sup> Na moisa orowate yore Yesus yae weumi, "Nda a ahuneubokale wamale mayae onauebena, na yaka yeuboke benen a hi ahunerebonde ufembe mayae isaeyeiboi sului. <sup>14</sup> Nebei ahumbo-ahumbo ahunebokale na mekai nda niyae: Reyae are kelaemaele nebei heke rorele o hakare heraeyele kiyae. <sup>15</sup> Hiwa yo o haka nibi enene balekate wanen. Nebei ro miyae nda a borate yo, nebeibe na hibi hele Setan, walobo yun kiyae yae na kenara yarokoyele. <sup>16</sup> Hiwa yo o haka ruka ranne balekate wanen. Nebei ro miyae nda a waimi boratera na rei mai yae rowate. <sup>17</sup> Nebeibe nda a boraikoake aerene kena bekore mokoumi rambun hubanayendene bele weitasi kaimine bele nebei are na u hale hele nukeiboyainye, nebei ro miyae na kenane nda a kambu herawennele naei elae banne. <sup>18</sup> Hiwa yo o haka isa bele hun nolone balekate wanen. Nebei ro miyae nda are borate, <sup>19</sup> nebeibe nda wali naeise buhae isokowoumi, rabuhine ban yeisi raeiboi walire nane merau rambun helende kena kaban ikowate. Nebei meraunge Raei ako faeuko naei kena une elae ban yeiboyatene ani omokoyei. <sup>20</sup> Hiwa yo o haka kani foinye balekate wanen. Nebei ro miyae nda are borate na wali nebei suluinye mokainye. Nebeinye ani faru raka yae raka yae imokowate, u mbai me bee bele, rorele u name bele, rorele u maehae mbai bele."

*Imae Hehe Ahuba*

*(Luk. 8:16-18)*

<sup>21</sup> Nebeisa weumi, "Rahe londe imae hehere naengkondere releikoyanae rambun helai yae obuneiboyate, koi kelene neyainye? Nebei mekai ban sele! Imae hehere naengkonderene naei anuwaunge raisiyate. <sup>22</sup> Allah merau raungehike nunna honate

\* 4:12 4:12 Yesaya 6:9-10



rambun nemene yakanaibonde, Naei a faeu u bene foi isaeinyaibonde. <sup>23</sup> Nebeinye angkaei bele yo borombe!”

<sup>24</sup> “Nda wali einye, aei yeyanne hului mbai Allah yae aere yeyeume hiwa bele barammekonde. Nebei aere, boraube a u bene yolo-yolo yae nekenayembe. <sup>25</sup> Mai Allahle isaei hebaen mokombombena, Allah mare benen hi baranembombe. Allahle isaei hebaen bele kiyae helen barannele. U kiyae naeinya honainyele bele enjarongkonde.”

*O Haka Kiteyate Ahuba*

<sup>26</sup> Yesus na hibi weumi, “Wali Ondofolole me kelee u keleene nekate holona ro miyae nda wanan ((kabani benate)). Heke ro mbai na hekene o haka heraeeyuboke. <sup>27</sup> Heraeyubokera na yane baei huaera, raisa, ijongkune, annundene, o haka kiteyate, kaban yeiboyate. Kiteyate nibi ma nebei ro isian. <sup>28</sup> Nda kani nenaie yae mokoungboke ani bele bewole, reu neme fae nemera, maensara akaufa, mai ani bele ijakawate. <sup>29</sup> Ani nime yeiboyele yae heke ro eifolole, rabuhine ban nime yaeibokene.”

*Sawi No Ahuba*

(*Mat. 13:31-32, 34; Luk. 13:18-19*)

<sup>30</sup> Yesus benen weumi, “Sawi ko wanan Raei me kelee u keleene nekate holona ro miyae eyae na hului elemakonde nane merau ahumbo-ahumbo ahunemabonde. <sup>31</sup> Nda kani kelana o reu ha reu ko bele sawi ko bele, sawi ko na ninokaei sele. <sup>32</sup> Nebeibe, heraeiboyatera, kitele kaban bele bae, heke einye o reu ha reu hebatera niyae na kaban sele. Na maensa akau kaban sele. Nebei alinne aye nale meikolate.”

<sup>33</sup> Ro miyae naei isaeise nekate huluinye Yesus Naei ako faeuko nebei wanan a yae ahunewole uwoumi. <sup>34</sup> Ro miyaere kelemmilere Yesus a yae ahuneboyele mo huweumi. Nebeibe na moisa orate yo bele na mo-mo einyekate yae a ahuneboyelebe nanemene yakaikoyeumile.

*Alu Elaekie Selere Yesus Yae Kalaungeboka*

(*Mat. 8:23-27; Luk. 8:22-25*)

<sup>35</sup> Nebei ya hu holo ranne oke hee yae Yesus yae na moisa orowate yore weumi, “Men, eyae nda bukoba reufire fomalere.” <sup>36</sup> Kai einye Yesus bere yawole. Na moisa orate yo hawaiboke mo naeisike. Nda ro miyae hokowole nanene nukaimiboke. Kai hiwa bele hakaikoke ewate. <sup>37</sup> Na heki ban mo alu elaekie sele raweuboke. Nebei aluna ruwae yae na kai fowateru hauwoumi omboi kai ei maemae kowole. <sup>38</sup> Alu raweuboke hee kai imolina Yesus ijongkune honowole. Na moisa orowate yo Yesusre yengkainye, wayine, “Guru, beko baende naiese Weyae nou ehei sele!”

<sup>39</sup> Yesus aunguke, alu rawelere a elae yae haeungeboka, “Heinyu!” Na hibi alu heunguke nda bukoba kalauboke yawole. <sup>40</sup> Yesus na moisa orowate yore weumi, “Rahene mayae buhae hokombokembe kaube? Rare hila ban rabo ban nekaube?”

<sup>41</sup> Nda wanan yeubokene, na moisa orowate yo buhae hokoumboka hi yae hire hineunge, “Nda ro nde maenin, alu bele ruwae bele yae naei are hakainyekoke?”

## 5

*Alo Yae Aungeboka Rore, Yesus Onomi Ikeunge*

(*Mat. 8:28-34; Luk. 8:26-39*)

<sup>1</sup> Gerasa kani Galilea bukoba nau reufine honole, nebeinye Yesus na moisa orowate yo bele na kai ainyoke. <sup>2</sup> Nebei anuwaunge ro mbai alo yae aungeboka. Maeinyoke Yesus kai eisa akowoke bele nda ro Yesusle hubainyeikondere ruka buluna bulei anuwaufa meke. <sup>3</sup> Nda ro ruka buluna bulei einye nekeweke, nauwa elaekie sele kowolene, rantai yae ikilenainyekondere na hului ban. <sup>4</sup> Roko helen oro me rantai yae ikileikoyainyele, nebeibe mere ikileikoyainye rantai hekeleikoyole orore ikileikoyainye besi insekoyole. Nebeinye ikilenainyekondere kabaeinyeke. <sup>5</sup> Na yane baei reniai rai bulei nolone bele elune bele ele mele koweke, ele kali mo kaeneweke, ruka yomo yae nauwa roroweke.

<sup>6</sup> Yesus melere nahaufa erekeungene, habeimeyele na bene ruke oro selen-selen roroukoke. <sup>7-8</sup> Yesus yae weunge, “Walobo, nauwa bulura etuwe!”

Nebeinye nebei ro kali elaekie sele kaenele Yesusre weunge, “Yesus, Allah na bumana hele Kiyaele Kelu, Weyae rahebe rare mokoufobondere? Allahle ro yae riyawale rare weitasi okoisemae!”

<sup>9</sup> Yesus nare hineunge, “Wa ro nde?”

Nebei walobo nda ro eisa weunge, “Meyae helenne, ra ro Legiun.”\*

\* 5:9 5:9 “Legiun” Romawi afaeufe na mekai felayo holo mbai, 5.000-6.000 helen nen.

<sup>10</sup> Na hebaen sele nebei walobo Yesusre riyounge nda anuwaufa nare ehukei eijae.

<sup>11</sup> Elu yaeyae nebei anuwaufa na nobe obo riya kaban mbai eramanne baete anate. <sup>12</sup> Nda role uwa einya walobo yae Yesusre riyainye, "Maere weime ndi obo bokore ema! Waeimehi naei uwa eise yae emambon!" <sup>13</sup> Walobo yoni-yni yae riwainyele are Yesus ehe koumikone, nda role uwara aibaleke obo holona kowate uwane ayeuboke. Obo 2.000 hului kowate kani yaeyara habelewate, yun mae bune mo rorowate owate, nanemene bune anewate herewate.

<sup>14</sup> Nda mekai yeubokere obo kayaare hebewate yo yae Gerasa kani yo kelaunga honatere huwaimi. Nebeinye ro miyae na yora yora balaimeke, yeuboke rambunde na ijoko yae erenaibondere hokoumeke. <sup>15</sup> Yesusre bokore nda yo mekate bae, na bere alo yae aungeboko ro na malo foi hireuko ke uwa osaeuboko nekewole erewainyene, nanemene buhae hele hokowoumi. <sup>16</sup> Yesus nda ro nauwa walobo holonare hukeyumihike a bele obo bune anewate herewate a bele na ijoko yae erewate yo yae ro miyae hokoumekere huwaimi. <sup>17</sup> Nebeinye nda kanina nekate yo yae Yesusre na hebaen-sebaen riwainye nebei anuwaufa kennehinde a hire ende.

<sup>18</sup> Walobo na uwanare hukeyunghike ro, kainye hauwate hee Yesusre na hebaen-sebaen riwoungue nare hakommibondere ehe konnekonde. <sup>19</sup> Nebei riwolere Yesus ehe okoikoi. Nda a yae weunge, "Waei imae obere waei yo yande yae eye, Allah ware mokoubokete are nane merau ware yanekoi yase yae ei aubokete are huweumiyende." <sup>20</sup> Nda ro eke Dekapolis kanina yo me bee honatene, Yesus naei uware onomi ikeungele abe huwoumi. Borowate yo nanemene fa yae bowate.

*Yairusle Maengke Aungunuke; Miyae Mbai Ha Rilewole Kiyae Onomi Ikeunge (Mat. 9:18-26; Luk. 8:40-56)*

<sup>21</sup> Yesus naei bukaiبوکه miyaka waise reufire okate. Nebei buhaeinye ro miyae helen hokoumeke, ele yae naeinyeboko. <sup>22</sup> Nebei yona Allahre ei mom-mom imae naei yun holona mbai na ro Yairus. Yesusre erekeungene bae na bene ane ruke. <sup>23</sup> Yesusre na hebaen-sebaen riyounge, "Ra maengke buloone hereinyen-hereinyen eke kole. Herende belene, mei, raei imaere ale mere mo rameunghinde onomi yeungele." <sup>24</sup> Yairus naei imaere Yesus hakoungoboko ewote.

Nebei hee, ro miyae helen bolen Yesus na moisa hakainyekoko ekinye mekinye kinyayeke.

<sup>25</sup> Nebei ewate nolone maengke mbai ha yae rileweke ralo yakama me bee oro hi nen bee bele yeuboko. <sup>26</sup> Roko helen dokter hiwa bokore onomire inyainyele naeise oroweke nebeibe na hului ban. Beko helen hubawoungue nauwa bekore mo beweke. Na roi dokterre iwoumine baeunghoko. <sup>27</sup> Yesus yae ro miyae helen onomi yeumiyeyeke are nda maengke borouboko. Ro miyae helen nolora kikaweke Yesus na moisa euwaneufoko na malobe kataunghike. <sup>28</sup> Nebei mekai mokouboko rabuhine ban naei u benera elele, "Na malora mo katarensinde foi isebonde lonbe." <sup>29</sup> Yesus na malora kataunghike hee yae ha rileweke na hibi heunguko nebeisa nauwa onomi hubaunghike.

<sup>30</sup> Nda maengke me kataunghike hee Yesus nauwa eisa onomire yeumi elae eukuko hubawoungue. Nebeinya ro miyae helen hebatero weke eroumikoko mo hineumi, "Ra malo nde yae me kataunghike?"

<sup>31</sup> Na moisa orowate yo yae Yesusre wainye, "Eramae, ro miyae wa bokone ekinye mekinye kinyate lonbe, nde yae wa malo kataunghike ane hinamae?"

<sup>32</sup> Nda a wainyere oboro, Yesus ijoko reufire erele na malore kataunghike kiyaere baeunge. <sup>33</sup> Nda maengke naei uware yeuboko naeisaeyne, oro me oinyeu wae hineuboko. Mokouboko rambun nanemene Yesusle bene oro selen-selen roroukoko wa huweunge. <sup>34</sup> Nebei a wanan huweungekokene Yesus nda maengkere weunge, "Waei hila rabo yae onomi ikete. Na foi mo eye, era buloo ban mae!"

<sup>35</sup> Yesus nda maengkere ane weunge hee yae, Yairusle imaera kayaa ukaimile Yairusre a weise mekate yo yae wainye, "Wa maengke hereke ya! Guru rahe londe wabeunghinde ebere?"

<sup>36</sup> Yairusre wainye are Yesus oboro sele hebele. Euweke Yairusre weunge, "Buhae ohokojiae, Raei elele are hila rabo mo halei!"

<sup>37</sup> Yairusle imaere enatere, hokolo name Petrus, Yakobus, Yohanes (Yakobus naka baeke) Yesus ehe koumikoko hakonainyekondere. Hiwa yore a hun raumihike nekewate.

<sup>38</sup> Yairus naei imaene ekate Yesus erewole rime yo, holo yae wowo, aku nau bumana hele kiteuboko. Rime kali a yan bu yan kaenate. <sup>39</sup> Yesus eweufike rimere rimate yore weumi, "Rahene nda mekai ton aku nau wae rime yae felaufake rimaube? Nda fa eherei, ijongku lonbe honole!" <sup>40</sup> Nebeibe nda yo Yesusre re yae harainye. Nebeinye nanemene hukeyumihike. Hokolo name bele, nenake naeko bele, Yesus yae ukeumi nangkele nda

fa honole yowaise ayeuboke. <sup>41</sup> Yairus na maengke hereke honolere Yesus na mera ikeleungeboke, Aram afaeu wae weunge, "Talita kumi" na mekai, "Maengke fa, Reyae ware wawale, 'Ainyu!' " <sup>42</sup> Nda maengke na ralo yakama me bee oro hi nen bee bele. Yesus annundere ukeunge heera aunguke ele melene kowole, erewainye yo nanemene fa yae bowate. <sup>43</sup> Hiwa yore nda maengkere Yesus waleungeboke abe hungaimiyende belene, a elaekei sele yae Yesus a hun kolowoumi. Nebeisa weumi nda maengke eraman yenne aneuko.

## 6

### *Nasaret Yone Yesusre Nainyehike*

(*Mat. 13:53-58; Luk. 4:16-30*)

<sup>1</sup> Yairusle maengke waleungebokera, Yesus na moisa orowate yo bele alainyekoke ewate Yesus kabande yeuboke yone aibaleke. <sup>2</sup> Sabat ya mo, Yesus huba raweuboke Allahre ei mom-mom imaene kelewoumi. Ro miyae helen sele borowate yo yae fa yae bowate. Hiwa yo yae elewate, "Nda nanemene makeisabe yarowole? Rahe isaei hebaenbe ikainye? Naendae wanen mae rambun emere-emere na hului mokole?" <sup>3</sup> Aeisaeise nekande neyae ore ahuneweke kiyae. Meyae ranneboke nenake Maria nauwake wa Yakobus, Yoses, Yudas, Simon? Nemaen wa aengkele nekande." Nebei yo Yesusre moi yae bulewainye.

<sup>4</sup> Nebeinye Yesus yae weumi, "Yenjo kayaayo a hi a hine be hineyaimi, nebeibe na yo yanne na aka nolo baeke nolonena be ehineyei."

<sup>5</sup> Nebeinye rambun emere-emere helen selere Yesus omokoikoi sului. Erana buloona yo mbembare mo, me yae nauwa randa kolowoumi onomire iwoumi. <sup>6</sup> Hila rabo ban nekewate erewoumine, Yesus fa yae bowole.

### *Yesus Na Moisa Orowate Yo Ukeumi Ewate*

(*Mat. 10:5-15; Luk. 9:1-6*)

Nebeisa Yesus aloungekoke, yo ran yo ranne keleumiyeke. <sup>7</sup> Na moisa orowate ro me bee oro hi nen bee belere mo kaeneumikoke, beere beere waheukoke, walobore hukenaimile naei elae kiteumiboke, yo hire yo hire ukeumi enatere. <sup>8</sup> Nibire enate naei ane weumi, "Era inyale, feu, be kangke, roi, eyaroiyaj, o mehukun mbaibe yarongkombe embe. <sup>9</sup> Oro mehau hirengkombe, nebeibe ambelae beere eyaroiyaj."

<sup>10</sup> Na hibi weumi, "Emembombe yo imae mbainye ehe konaikombena, nebei imaene nekembe. Nekengkombe mo, nebei yora membalembe. <sup>11</sup> Anuwau hi embe na ro miyae mare ei ehaweinya, a wemmilere oboroinya, embalembe hee mai orona kani bahe rubommibombe. Nda iwau wanen kelemmibombe neyae me u beko hele mokaiboke!"

<sup>12</sup> Na moisa orowate yo alainyekoke ewate yae ahuba huwaimiyeke ro miyae wali bekora nulu kennaimibonde bukenaiibonde hele. <sup>13</sup> Nda yo walobo u ranna nekai hukewaimi, era yo buloo yo helen minyak yae kolowaimi onomi iwaimi.

### *Yohanes Bure Kowoumi Kiyae Na Yun Naisake*

(*Mat. 14:1-12; Luk. 9:7-9*)

<sup>14</sup> Rambun emere-emere Yesus mokowolene, a hina a hina yo Nare isaeyaeiboke. Nebei abe yoboungekoke Ondofolo Herodes borouboke. Ro miyae hiwa yae elate, "Neyae Yohanes bure kowoumi kiyae herekebe benen waleuboke. Nebeinye rambun emere-emere mokole."

<sup>15</sup> Hiwa yo yae elate, "Neyae Allahle yendo kayaalo Elia!"

Hiwa yo elate, "Neyae yendo kayaalo hi bena yenjo kayaayo wanen."

<sup>16</sup> Herodes nebei a faeu elewate boroukokene elele, "Nda Yohanes bure kowoumi bere na yunde ukamaele naisake kiyae, nebeibe waleuboke ya!"

<sup>17-18</sup> Herodes u benere nekewainye manemfa hele na miyae Herodias kenare kole hului ukeumi Yohanesre ikilaiboke kawane haeyekoke. Rabuhine ban Yohanes na hibi-hibi Herodesre a elae yae uwoungue, "Na ijen ban sele Filipus na miyae Herodias roukae!" Filipus Ondofolo Herodes na aka baeke. <sup>19</sup> Nebei aerenne Herodias Yohanesre ikele yae kowoungue, kena hele kowole Yohanesre hombondere, nebeibe Herodes yae aheungkene mokombondere kabewoungue. <sup>20</sup> Ondofolo Herodes naeisaei Yohanes wali himaloungebokene nane merau Allahle holona rone, fe faewoungue. Nebeinye weumi, "Yohanesle wali kayaare foi sele hebembe." Yohanes ahubane isuwewole hee Herodes na kena osaeiibo ikowole, nebeibe kena hele borondere ikowole.

<sup>21</sup> Herodes na ralo yakama barauboke yabe mon foi sele rouke. Nebei ya Herodes eraman bulau kaban mokoumiboke. Naei yo wakuna anuwau bele holona yo, fela yun-jun holona yo, Galilea kanina ro bele ro bele yo kaenewoumi. <sup>22</sup> Nebei hee yae

Herodiasle maengke meweufige, baene kowole. Ondofolo Herodes nebei kaenewoumi mekate yo bele nda maengke bae kole yae mokowoumi na kenare roweumihike.

Nebeinye Herodes yae nebei maengke fare weunge, "Rahe rambun kenare kole riyuefihinde, reyae ware isete! <sup>23</sup> Na hele wawale, naendae wanan horo lon raei yo waku nekale reufire riyuefihindena, reyae ware kinyerete hakerete."

<sup>24</sup> Nebei maengke fa eke nenakere ekeufinewoung, "Ana, weyae rahebe kena koyae reyae risehinde?"

Nenake yae weunge, "Yohanes bure koumi kiyaele ro yunbe riyeyisi!"

<sup>25</sup> Nebei maengke fa na hibi bukeufike Ondofolo Herodesle bokore eke weunge, "Reyae riyawale nda hee yae Yohanes bure kowoumi kiyaele yun hote einye menaiseyende!"

<sup>26</sup> Nebei a wanan riyueingehikene Ondofolo Herodes mehi neufake, na kena beko hele hubawoung. Nebeibe hokoumeke yo bene a holo yae heteungekoke boraibokene, nda maengke yae riyuefike rambunde ahi ewei sului. <sup>27</sup> Na hibi kayaare hebate felayo mbaise ukeungele Yohanes bure kowoumi kiyaele yun roweise. Nda ro kawa eise eke Yohanes na yun neufake. <sup>28</sup> Nebeisa hote einye Yohanesle yunde mo auboke meke nebei maengke fare ikeunge. Nebei maengke rouke nenakere ikeunge.

<sup>29</sup> Yohanesle moisa orowate yo hereke a angkaei boroukatene, ekate na uwa bangkare mo elaisake a bulune aimoloufak.

*Yesus Yae Ro Miyae Helen Selere Raman Wahewoumi Anewate*

(Mat. 14:13-21; Luk. 9:10-17; Yoh. 6:1-14)

<sup>30</sup> Yesus na abu ako ukeumi ekate ahuha huwewaimile bele onomi iwaimile bele kaliara bukaiboke Yesusle bokore mekate, ekaikewewaimile ekaimokowate a nemene Yesusre huwainyekoke. <sup>31</sup> Ro miyae helen ele mele kowatene, Yesus na abu ako bele ramande anenaikondere mon ban. Nebeinye Yesus yae weumi, "Men, enaei mo ema. Na hului mayae no yeiboise aku ban nau ban anuwaufe yae ema."

<sup>32</sup> Uwa monde roungaterene, kaisa hawaiboke aku ban nau ban anuwaufe ewate.

<sup>33</sup> Nebeibe nda yo naeisikere ro miyae helen eramiboke nane merau enate anuwau isaeyaeiboke. Nebeinye ro miyae nebei yo honatena, yau nibira oro habelei-sabelei yae wainyehake, bere holo yae nebei anuwaufe faibaleke. <sup>34</sup> Yesus naei kaikaisa fainyoke yae ro miyae helen sele erewoumine kena beko hele hubawoung. Nebei ro miyae domba wanan yaweiboi ro ban. Nebeinye huba raweuboke a helen kelewoumi.

<sup>35</sup> Hu akombondere yae Yesus na moisa orowate yo mekate wainye, "Be bahele nane merau nda anuwau monne, <sup>36</sup> nda yo weimi, 'Ai, yo hine eraman ayaneko.' "

<sup>37</sup> Nebeibe Yesus yae weumi, "Mayae raman yemmile anenaikondere ya!"

Na moisa orowate yo yae wainye, "Nda ro miyae feu helen anenante. Ro mbai oko mehine name na me buhaena roi yae nebei feu hului yaromakonde. Weyae kena koyae nebei feufe emayarongkonde imamile anenaikondere?"

<sup>38</sup> Yesus beufoke hineumi, "Mainya feu naennaen helen nen honayembe? Emerembo!"

Eraikoke mo wainye, "Feu maehae mbai, ka bee honate."

<sup>39</sup> Nebeisa Yesus na moisa orate yore ukeumi, "Ro miyae nanemene wemmile ke ranne riyane riyane mo nungaikonde." <sup>40</sup> Riyane riyane rowate yo holo hi 100 roiboyate holo hi 50 roiboyate. <sup>41</sup> Yesus feu maehae mbai bele ka bee belere mo yaroukoke. Na be bumare weuweke Allahre helen foise mo ukeunge. Nebei feufe kayeukoke na moisa orowate yore yeumikoke ro miyaere wahanaimikondere. Nebei sului mbai ka bee kayeukoke nebei yore wahaeimikoke. <sup>42</sup> Nane yo anewate wande hele yaeiboke. <sup>43</sup> Yesus na moisa orowate yo eraman kalunde mo nemene arilaisike kakali me bee oro hi nen bee bele. <sup>44</sup> Feufe anaikoke yo ro mo nanemene 5.000.

*Yesus Bu Randa Orole*

(Mat. 14:22-33; Yoh. 6:15-21)

<sup>45</sup> Yesus na hibi na moisa orowate yore ukeumi bere holo yae Betsaida yore kaisa fonatere. Nebeisa nebeinya ro miyae helen enatere uwoumi.

<sup>46</sup> Here ukera Yesus elure ebeli boikoise ewole. <sup>47</sup> Huae yeuboke ereumi na moisa orate yo kaikaisa bumoko nolone fowate, Yesus yaunge namman hebele. <sup>48</sup> Yesus erewoumi nda yo na kaikai ren auwatebe, kabewainye alu bera haraungeboko rawewolene. Nebeinye yare mefo hukai name hului Yesus nda yo bokore bu randa oroumeke moi wommiyonde wanan mae mokoungboko. <sup>49-50</sup> Nda yo Yesus erekainyelene nanemene kulu-kulu yaeiboke, bu randa mewolene enaelo yae elaikokene ele kali bowate.

Nebeinye Yesus weumi, "Hilembo, Reyae ya, fe efaei yae!" <sup>51</sup> Nebei kaikai einye eweufileukoke bele, alu na hibi kalaungeboko. Yesus na moisa orowate yo fa hele yae bowate, <sup>52</sup> rabuhine ban Yesus naei elae wakere namman onaeite handate, erabae

manemfana feu anewaterere naei ijoko yae erewate. Naei u bene na hului ban sele isaeyaibondere.

*Yesus Genesaret Yone Erana Buloona Yore Onomi Iwoumi*  
(*Mat. 14:34-36*)

<sup>53</sup> Bu habala reufine fokate, Genesaret yo isoungue yaiboke yawate. <sup>54</sup> Kaikaisa akowate yae ro miyae rainyeboke Yesusbe meke. <sup>55</sup> Ro miyae na yore eisa bele meisa bele habelaete. Erana buloona yo Yesus ekenekele anuwaufe na ijongku honoi kewa ranne yarate mate. <sup>56</sup> Yesus makeise makeise eyewole yo ei yan ei bele yo moinye bele, era yo buloo yo nebei yo yanna nai hei-sei anuwaunge relaeimi honate. Yesus elere erana buloona yo yae riyainye ehe ferere kommikondere na malo kabanne ikilenatere, na hului banna, na malo burainye mo ikilenaibonde. Ikilewate yo nanemene onomi yarowate.

## 7

*U Mekai Yolo-Yolo Na Mekai*  
(*Mat. 15:1-9*)

<sup>1</sup> Roko mbai mo Farisi holona riya mbai bele Musale walora wali heere foloukoke are isaeyaeiboke kelewaimi holona bele Yerusalem yora Yesusre hubainyaikondere mekate. <sup>2</sup> Neyae erewaimi Yesus na moisa orowate yo hiwa na me Yahudi era hena ma yae bu ekuyeikoi yae eraman eyanewate. <sup>3</sup> (Farisi holona yo bele Yahudi ro miyae hiwa bele Yahudi era hena ma yae me bu kuyeikoyatera eramande eyanewate. Nebei u mekai mokate naei waline na yobe naei kamehe naeitena era hena namman ikilainyekokene.) <sup>4</sup> Neyae nai hei-sei anuwaufa imewatena nauwa bu bele kuyeikoyate wa, raman eyanewate. Era hena helen sele na yobe naei kamahe naei yae kinyaimiboke rambun me bobo hele ikilainyekoke, nda merau: kolaei, bu yai-jai anuwau, olemebe tembagara mokoiboyate, nebeise bu kuinyate mekai huba man mokoyainye.

<sup>5</sup> Nebei Farisi holona bele Musale walora wali heere foloukoke are isaeyaeiboke kelaeimi holo bele Yesusre wainye, "Rahene wa moisa orate yo aei yobe naei kamahe naeitena mokowate era henane ehakoikoi omokoi, eramande na me bu ekuye yae anate?"

<sup>6</sup> Yesus yae weumi, "Mayae ro miyae be bee bee yo! Mai naeise na ijen selene Allahle yenjo kayaalo Yesaya yae moloukoke a maijeukoke, Allah yae eleukoke,

'Nda ro miyae na euwa bonei randa mo Rare buma kolonaisele,  
nebeibe na kena u bae ahau buhaunga hele.

<sup>7</sup> Rare nendon hele ei molaise,

na a usaei wasaei bae ro naei miyae naeinya era henabe roukate kelaeimi!\*"

<sup>8</sup> "Allahle ako faeukore mayae moise yae hayaekoke, ro naei miyae naei era hena mayae elae yae ikilauboke."

<sup>9</sup> Yesus na hibi a ahuneungeboke, "Mai yobe naei kamahe naeitena era henare hakoyaube, nebeibe Allah mare ukembe are moinye hayeyaube. Nebei wanen mokoyaube maisaei sele! <sup>10</sup> Musa yae a eleukoke, 'Mai araise anare enera faisa yanemmyembe.'† Nane merau, 'Nde yae naekore nenakere a beko wemmilena, nebei kiyae honaibonde hele.'‡ <sup>11</sup> Nebeibe mayae kelaeumile ro miyae naekore nenakere wemmile, 'Arate anale, mai walire hakorebobe rambunbe roufele Allahre hili era akau erare erenjende.' <sup>12</sup> Nebei mokaibokera mayae nebei ro miyaere mon eyei sele naekore nenakere foise mokonaimilere. <sup>13</sup> Nebei era hena walora Allahle ako faeukore mokaunge erabuhi ban baete. Nda wanen me u beko helen mayae mokaube."

<sup>14</sup> Nebeisa ro miyae helen ahaunga hebatere Yesus kaenewoumi na bokore mewate wa weumi, "Raeinya a wamale boronsebombe nane merau nou hennele. <sup>15</sup> Rambun hiwa moisa eise ate yae ro miyae naei u mekai bekore nikire omokoiboi sului, nebeibe kena eisa u benera euwa boneisa baleimeyate rambun mae bekore nikire mokaimi. <sup>16</sup> Mayae angkaei boraube ro miyae nebei are nou hembe!"

<sup>17</sup> Nebeisa Yesus nda ro miyae helen nukeumiboke, na moisa orowate yo bele imae mbainye ayeuboke. Nebeinye yae na moisa orowate yo yae ahumbo-ahumbo ahuneuboke uwoumi isaeyeihoi mone hinainyehike. <sup>18</sup> Yesus yae weumi, "Mayae namman isaeyeihoi mone. Mayae isian selene, rambun yoni-yoni ro naei miyae naei euwa moisa eise ate naei u mekai bekore nikire omokoiboi sului. <sup>19</sup> Rabuhine ban

\* 7:7 7:7 Yesaya 29:13 † 7:10 7:10a Keluaran 20:12, Ulangan 5:16 ‡ 7:10 7:10b Keluaran 21:17

euwara ate bae kena eise eyeisi ton, yarelere yae eyewate nebeisa beko anuwaunge eyokande." Nebei yaere Yesus kelewoumi raman nanemene eli hoho ban yaeiboke.

<sup>20</sup> Benen Yesus weumi, "Ro naei miyae naei kena ura balenate rambun yaere naei u mekai bekore nikire olengkonde. <sup>21</sup> Rabuhine ban kena u eisa baleimeyate nda miyae: u bene beko, yoko kaeimae, yokore, ro miyae hoi-soise, ro miyae bele miyae molo bele mbainye hononetere, <sup>22</sup> ro miyae hiwa naei rambun kena haehae koyatere, bekore benate me u mokatere, ame-amere, bekore kena haehae hele koyate mokonatere, kena hensende, a hufuufe, u kaeise, wali yeli-yelire. <sup>23</sup> Nebei beko bako nemene fomene kena ei u eisa mo ijakawate, ro miyae naei u mekai bekore nikire mokaimi."

*Siro-Funisia Na Miyae Na Hila Rabo*

*(Mat. 15:21-28)*

<sup>24</sup> Galilea kanira Yesus kulun uke Tirus kanire ewole. Eke naeise isaeinyaihonde belene aibaleke yone imae mbainye eweufike, nebeibe ro miyae erekainyelene yaka haikoke. <sup>25</sup> Nebei yona miyae mbai na maengke alo yae aungeboke. Yesus meke naeise nda miyae boroubokone, meke oro selen-selen mae Yesus na bene meukoroukoke. <sup>26</sup> Nda miyae Yunanina, Siro Funisia kanine hongkate Yahudi yo ban. Na maengke alo yae aungebokere Yesusre na hebaen-sebaen riyeunge na walobo u rannare hukennehindere.

<sup>27</sup> ((Yesus naei kenare kowole Yahudi yore na bere hakommile, Yahudi ban yore moisa.)) Nebei aere ne Yesus yae weunge, "Fa-fa na berei yae raman anenaikonde uwa renaibonde wa, na ijen ban sele fa-fa naei feube yokure haiyaimile."

<sup>28</sup> Nebei miyae yae weunge, "Na hele, Tuhan, nebeibe eramande anate anuwau kelene yoku honate, fa-fa anate eraman mohi-mohi balate yoku eyanewate lonbe!"

<sup>29</sup> ((Yesus isaeyeuboke nebei miyae "yoku" a eleukokene, neyae merau haraungeboke "Yahudi ban ro miyae.") Nda miyae nebei a mekai yae ukeungene, Yesus yae weunge, "Waeinya a naijen waraene, eye, wa fa foi ikanale, na u buluna walobo eukuke ya."

<sup>30</sup> Nane miyae imaere eke bae na fa ereunge ijongku honoi tanne honowole. Nebei walobo na hele nebei fa na u bulura eukuke.

*A Elei Angkaei Kokun Kiyare Yesus Onomi Ikeunge*

<sup>31</sup> Yesus naei Tirusra nekaikokera Sidon yo bu kelare ewate. Nebeisa Galilea bukobare bukaiboke na kelaunge yo me bee (Yunani a faeunge Dekapolis elate) kani nolora ewate. <sup>32</sup> Nebei anuwaunge ro mbai angkaei kokun nane merau a foise elei ro miyae yae yawainyehoke, Yesusle bokore mekate. Yesus Na mere nebei kiyaele uwa ranne rannehindere na hebaen-sebaen riwainye. <sup>33</sup> Nebeibe Yesus nda rore mo yaweungehoke ro miyae helen hebate anuwaufa felan wanen eke mo, Yesus Na mere mo nebei role angkaei bulure nekeungele ekeru, Yesus euwaeki houboke nebei role faeunge kataungehike. <sup>34</sup> Nebeisa Yesus Na be yakure weuweke no yobouboke mo nebei rore Aram afaeu wae weunge, "Efata!" na mekai, "Raweuweuko!" <sup>35</sup> Yesus are ukeunge hee nda ro naengkaei bele faeu bele onomi yaeiboke, angkaei borowole are nendon wanen mae elewole.

<sup>36</sup> Yesus yae ijokore eraiboke yore a herauwoumi nda rore onomi ikeungere hiwa yore ehuweyejae. Yesus a hun kolowoumibe, eraiboke yo yae na hibi-hibi huwayeke ndire ndare yobainyeke. <sup>37</sup> Borowate yo fa yae bowate, elate, "Yesus nemene fomene na foi sele mokowole, fare boi-boi wanen! Ro miyae angkaeise oboroi yo mokoumi angkaei borate, are elei yo mokoumi a elate!"

## 8

*Ro Miyae 4.000 Yesus Raman Iwoumi Anewate*

*(Mat. 15:32-39)*

<sup>1</sup> Nebeinye mo nekwate ro miyae helen bolen hokoumeke, holo kaban sele wokainyele. Hokoumeke yo Yesus ereweumile eraman banne, na moisa orowate yo kaeneumikoke mo weumi, <sup>2</sup> "Nda ro helen miyae helen arilewolene Reyae kena beko hele hubanale. Rangkele mo nekeimeyande ya name nendobe yeuboke, ramanbe baeumihoke. <sup>3</sup> Nda yore na yarele bangsa yae ufemile enatena, nibi nolone hokoiko-hokoiko konayende, rabuhine ban naei nolona hiwa ahaufa mewate."

<sup>4</sup> Yesus na moisa orowate yo yae wainye, "Na hului ban sele nda a haei-saei a koukou wanen raman yaromakonde ro miyae helende imamile anenaikonde uwa renaibondere!"

<sup>5</sup> Yesus yae hineumi, "Mainya feu naennaen hului honate?"

Neyae wainye, "Mehine bee bele." <sup>6</sup> Yesus nda ro helen miyae helen kani ranne mo nuwenaikondere ukeumi. Nebeisa nane feu mehine beere mo yaroukoke Allahre

helen foise mo ukeungele. Nane feufe mo Naei me yae kayele na moisa orowate yore yeumi, nda ro miyaere wahenaimilere. <sup>7</sup> Ka fele-fele name keli hubayaeikoke roukate mekate mo, Yesus helen foise mo Allahre ukeunge. Nebeisa na moisa orowate yore wahenaimikondere ukeumi. <sup>8</sup> Nanemene anaikoke uwa hele raeibokate. Nebeisa na moisa orowate yo anaikoke na kalun honowatebe riya mbainye arilaisikera me baeikoke kakali mehine bee bele yaeiboke. <sup>9</sup> Eraman anaikoke yo me baeikoke bae nemene 4.000 hului. Nebeisa Yesus ukeumi nebei ro miyae helen na yore-yore ewate. <sup>10</sup> Halakokera Yesus na moisa orowate yo bele kaikainye maeisaweuboke Dalmanuta kanire fowate.

*Farisi Yo Bele Yesus Naei Bele A Kilei-Kilei Kilewate*  
(Mat. 16:1-4)

<sup>11</sup> Fainyoke yona Farisi holona yo Yesus bokore mekate. Umalire hubanainyehindere nebei Farisi holona yo yae surgana rambun eme wanen kelemmbondere riyainye. <sup>12</sup> Yesus na kena eisa mehi yae folowole wa elele, "Rahene nda heena ro miyae rambun emere-emere mokorebondere riyaise? Reyae nda heena ro miyaere rambun emere ekeleijae hele." <sup>13</sup> Yesus nebei are riwainye yore nukeumiboke, na moisa orowate yo bele kaisa hawaiboke naisike reufire fowate.

*Farisi Naei Ragi Bele Herodesle Ragi Bele*  
(Mat. 16:5-12)

<sup>14</sup> Yesus na moisa orowate yo oneumikoke feu hi ebaraiwai. Naei feu mbai ken sele kaikai einye nekewole. <sup>15</sup> Bumokone fowate yae Yesus weumi, "Kayaa hebembe! Farisi holona bele Herodesle holona bele naei ragi."

<sup>16</sup> Na uware uware hinate elate, "Yesus na mekai ma rahebe haraungeboka? Eyae feu eyaroikoi mekandene era?"

<sup>17</sup> Na kena u einye hubawainyere Yesus isaeyeuboke, nebeinye nda yore weumi, "Rahene mayae feu ban nounge haeube? Mayae namman Raei elae isaeyeiboi! Mai u bene namman nana yae nekeimeyayembe. <sup>18</sup> Mayae raei me u mokoukokalere ijoko eraukoke angkaei boraukoke, nebeibe naei mekai isaeyeiboi mo kaube era. Bene nekenayembe, <sup>19</sup> Reyae feu maehae mbai kaiwale ro miyae 5.000 ikamaele! Nebei ikamaele anaikoke heene, na kalun kakali naennaen arilaufike?"

Nebei yo yae wainye, "Me bee oro hi nen bee bele."

<sup>20</sup> Yesus benen weumi, "Nane merau feu mehine bee belere kaiwale, ro miyae 4.000 ikamaele anaikoke hena na kalun kakali naennaen arilaufike?"

Nebei yo yae wainye, "Mehine bee bele."

<sup>21</sup> Yesus yae weumi, "Nebei lonbe wa mayae namman isaeyeiboi mo koimeyaube Reyae naeinya hesele nde!"

*Betsaida Yone Ro Ijoko Kumba Mbaise Yesus Onomi Ikeunge*

<sup>22</sup> Yesus na moisa orowate yo bele kaisa awayeke ekate Betsaida yone ainyoke. Betsaida yona ro mbai ijoko kumba yawainyehoke Yesusle bokore mekate. Yawainyehoke yo yae Yesusre na hebaen-sebaen riyainye mere ramenensindere. <sup>23</sup> Yesus nane rone mo na mera ikileungeboka yaweungehoke yo moise ekete. Nebeisa Yesus euwaekire mo mene houboke nebei role ijoko ranne raungehike. Nebeisa hineunge, "Mana naendaen wanen, ndane rambun hi ijoko ereyae?"

<sup>24</sup> Nebei ro na ijoko bere yae erele, weunge, "Ro miyaere eramaele, nana wanen, o merau ha merau eramaele ele mele kate."

<sup>25</sup> Yesus na me nebei role ijoko ranne benen raungehikera ijoko na hele hele erewole ro miyae ro rowoumile. Nda ro na hele na ijoko foibe yeiboke erele. <sup>26</sup> Nebeisa Yesus nebei kiyaere weunge, "Nda a huweumile belene, yo eise eijae, na hibi waei imaere yae ele."

*Petrus Yesusre Na Hele Yae Eleukoke*  
(Mat. 16:13-20; Luk. 9:18-21)

<sup>27</sup> Yesus na moisa orowate yo bele Betsaida yora alainyekoke Kaisarea Filipi yo kaban yanainyekoke honate yo ran yo randa orayeke. Nibi nolone ewate yae Yesus hineumi, "Ro yae miyae yae rare nde yae elate?"

<sup>28</sup> Na moisa orate yo yae wainye, "Hiwa yo yae elate, Yohanes bure kowoumi kiyae; hiwa yo yae Allahle yendo kayaalo Elia yae elate; na hiwa yo yae wa Allahle yenjo kayaalo mbai yae elate."

<sup>29</sup> Yesus yae hineumi, "Mayae bae Rare nde yae elaube?"

Petrus yae weunge, "Weyae Allah yae oro umaufe herauungeboka Wali Ondofolo!"

<sup>30</sup> Nebeisa Yesus nda yore a hun koloumi, weumi, "Ndere ndere Raei uwa naei a ehuweyijae."

*Yesus Naei Herendere A Yakauboke*  
(Mat. 16:21-28; Luk. 9:22-27)

<sup>31</sup> Nebeisa roko mbai nendo Yesus naei uwa beko mokonainyelere abe yakawoumi. Na moisa orowate yore weumi, "Reyae, Allahle bokora mekale ro miyae uware yeubokale Kiyae, beko helen sele hubarengkonde. Yahudi yun-jun bele, imam yun-jun bele, nane merau Musale walora wali heere foloukoke are isaeyaeiboke keleyaimile holona bele nenaishinde nebeisa honaisebondera enaisemolonsande. Nebeibe ya name nendo nulu yo mahe yora arenunde." <sup>32</sup> Yesus na uware enainyemokonde a na yaka yae yakawoumi. Nebeisa Petrus yaweungehoke felande einyakeleuboke a maleu-maleu wae weunge, "Nebei wanan are ehuwejjae ya!"

<sup>33</sup> Nebeibe Yesus eubeufoke na moisa orowate yore ereumi wa, Petrusre oku nekeunge weunge, "Ra moisa yae eye, Setan walobo yun! Rabuhine ban waei u benera Allah yae haraungebokere ebaei, ro miyae naei u benena ma yae haranae!"

<sup>34</sup> Nebeisa Yesus ahaunga hebate ro miyae helen bele na moisa orowate yo bele kaeneumi naei bokore menatere. Mekate mo ane weumi, "Rare hakonsebonde kiyae, nda wali ma mokonde hele: naei bekore kena haehae koyelere ehakoyei, naei ohali kaembonde, a ufende hululi hubara haeha yanende yae Rare hakonsebonde. <sup>35</sup> Rabuhine ban nde yae releunge naei wali holere molonnebondera, nebei kiyae naei wali hole omoloihoi. Nebeibe nde yae Raei naei a foi faeu foi aerene naei wali Rare yenselena na wali hole molonnebonde. <sup>36</sup> Na foi rahe, ro mbai nda kanina kelana rambun nemene fomene yaroukoube, naei wali bae hole omoloihoi! <sup>37</sup> Rahe rambun nda kani kela naei yae wali henare na hululi beneikonde! <sup>38</sup> Nda hokolona ro miyae Allah are ehakoihoi, me hila u hila bele mokate yo nolone nekate. Nde yae Raei naeise nebei yo bene fe engkondena, Reyae roko benen merele heene nare nebei sului mbai fe eremikonde. Reyae, Allahle bokora mekale ro miyae uware yeubokale Kiyae, benen merele heene Maeko Naei one hengko eisa Naei eleuboke malaikat bele ei anaisebonde memale."

## 9

<sup>1</sup> Yesus yae weumi, "Na helebe mare wamale, mai nolona hiwa yo ehereiboi mo nekenate Allahle yo waku nelae wake bele enayerembonde."

*Yesus Nauwa Ma Hi Yeuboke*  
(Mat. 17:1-13; Luk. 9:28-36)

<sup>2</sup> Ya mehine mbai nekaikokera, Yesus yae nda ro name Petrus, Yakobus, Yohanes yaweumiboke elu kaban mbaise ikate. Nebeinye na mo-mo nekewate yae Yesus na uwa ma hi yeuboke. <sup>3</sup> Yesus na malo kelemun wili halaman bowole. Nda kanina kelana malore mokate anuwaunga nebei mekai malo kelemunde ehameikoi sului. <sup>4</sup> Hokolo name erate bae, ro bee yakaiboke ane Yesus naei elate. Nebei ro bee ro raimiboke Allahle yenjo kayaayo Eliale Musale.

<sup>5</sup> Nebeisa Petrus yae Yesusre weunge, "Guru, nda baete foi sele hubannele, kena kokomae yae meyae fale name haendekoube Ware mbai, Musa mbai, Elia mbai." <sup>6</sup> Fe yae waku yae hokolo name nekeumi kowatene, Petrus elengkonde a onewolene na mekai ban mae eleukoke.

<sup>7</sup> Petrus ane weunge hee yae mangko meumiranoke, nebeisa bae borate abe nda wanan weumi, "Nda Raei fa kena buhaere haenale Kiyae, Nare mo boronmembe."

<sup>8</sup> Hokolo name na hibi enere faise ijoko eiwela haiwala kate, nebeibe Musale Eliale nundeiboke, Yesus nembai erainye hebele. <sup>9</sup> Nebei elura owate yae wa Yesus a hun kolowoumi, weumi, "Hire hire nda erauboke era ehuweyijae mo nekemfombe. Reyae, Allahle bokora mekale ro miyae uware yeubokale Kiyae, nulu yo mahe yora arenunde ya wa hiwa yore huwemmile." <sup>10</sup> Yesus nebei a hun raumihikene neyae ro miyae hiware ehuwe mo nekayeke. Hokolo name na mo-mo roiboyate yae wa eisinewate naendae mekaise Yesus nulu yo mahe yora annundere eleukoke.

<sup>11</sup> Hokolo name yae Yesusre hinainye, "Rahene Musale walora wali heere foloukoke are isaeyaeiboke kelaeimi yo yae elate, 'Wali Ondofolo emei mo Allahle yendo kayaalo Elia yae na bere hele mende?'"

<sup>12</sup> Yesus yae weumi, "Nebei na hele Allahle yendo kayaalo Elia bere holo mende, Wali Ondofolo mende naeise nemene mokonnehandere. U bene nekayembe Allahle yenjo kayaayo yae naendae mekai yae a molaiokoke: Reyae, Allahle bokora mekale ro miyae uware yeubokale Kiyae, roko helen beko hubarengkonde nane merau aukaka yae enaisekonde. <sup>13</sup> Na helebe Reyae mare wamale, Allahle yendo kayaalo Elia\* na

\* 9:13 9:13 Nda a huwole yae Yesus kelewoumi Elia, Yohanes bure koumi kiyae niyae.



hele meke ya, homone nulainyekoke huluinye. Ro miyae yae nare naei kena hului yae mokainyele.”

*Yesus Yae Alore Aungeboke Fare Onomi Ikeunge  
(Mat. 17:14-21; Luk. 9:37-43a)*

<sup>14</sup> Yesus hokolo name bele elura nokainyele owate. Erewate bae elu orone ro miyae helen mekate Yesus na moisa orowate yo hiwa nukaimibokere ele yae naeimiboke, Musale walora wali heere foloukoke are isaeyaeiboke kelaemi yo bele ane kilewate. <sup>15</sup> Nebei ro miyae helen hebate aiweke Yesusre erekainyele bae fa yae bate. U hale me hale Yesusle bokore habeimeyate na a bele melaeyeimayainye.

<sup>16</sup> Na moisa orowate yore Yesus yae hineumi, “Rahe abe mayae ndi Musale walora wali heere foloukoke are isaeyaeiboke kelaemi yo bele kilaube?”

<sup>17</sup> Nebei ane hineumi yae ro miyae helen arilewounghe hebate nolora ro mbai yae Yesusre weunge, “Guru, raei kelu fa waei bokore roukanale mekende, alo yae aiboyeunge kokunde yeiboyele. <sup>18</sup> Alo yae aiboyeunge hee bae nda fare a walinne hakeiboyele, neuwara olokee mo itilewate, heraa roroikoyele, na uwa kaban elaekei halaekai yeiboyele. Wa moisa orate yore nauwana alore hukenainyehindere riyeumihikalebe, nebeibe neyae na hului ban.”

<sup>19</sup> Yesus nebeinye hebate yore weumi, “Mayae nda heena nekaube ro miyae hila ban rabo ban yo! Naendae mekai horo lon mangkele heki hele orowandebe, mayae Rare hila rabo ehalei sele. Nane merau kena beko hele hubanale, rabuhine ban mai naeise heki hele kena yae heraweumekale.” Nebeisa nebei yore weumi, “Nebei fa yawennoho meu!”

<sup>20</sup> Yesusle bokore yawainyehoke ekate. Nebei walobo Yesusre erekeunge heene nda fare na uwa mokoungboke nei-nyei kowole, ane ruke eyole meyole olewole neuwara olokee mo balaimke. <sup>21</sup> Yesus nda fa naekore hineunge, “Makei hee yae nda u mekai mokoungboke koumeke?”

Naeko yae weunge, “Nebingken nekewole hee yae. <sup>22</sup> Nane merau nda kole u mekai mo ban, roko mbemba walobo nda fare i ranne rowele kaisiyeungele, roko hire bune rowele kaisiyeunge honaibondere mokainyeke. Nebeinye Guru Weyae na hului mokoubondena, buhae heimeko maere hakoimebo.”

<sup>23</sup> Yesus yae weunge, “Rahe aerene eleukokae, ‘Na hului mokoubondena?’ Ro miyae yae Rare hila rabo halenselena, nemene-fomene na hului mo!”

<sup>24</sup> Nda fa naeko na hibi kaenele, “Tuhan, reyae hila rabo halaelebe nebeibe elae ban. Rare hakoisobo raei hila rabo elae roufe!”

<sup>25</sup> Yesus erewole ro miyae helen u hale yae arileumeke haei bae, nda fa na uwa bulura walobore hukennehindere a elae yae weunge, “Walobo angkaei kokunde, a munde mokoungbokae kiyae, Reyae wawale, nda fa uwa bulura eituwe, benen emeijsae mo!”

<sup>26</sup> Walobo enduwendere na kali bele kaenewole, nda fa nauwa kaban nekeungele oro me bae yae hayeuboke. Walobo na u bulura eukukera erainye bae nebei fa here no merau honole. Ro miyae helen erainyele yo yae nanemene elate, “Nda fa hereke ya.”

<sup>27</sup> Nebeibe Yesus nda fare ikileungeboke na mera kaeungeboke aunguke afae yeufurekoke.

<sup>28</sup> Nebeisa imae mbainye ayeuboke nekewate wa, na moisa orowate yo a maehae-maehae yae Yesusre hinainye, “Rahene meyae walobore ehukeisi sului?”

<sup>29</sup> Yesus yae weumi, “Nebei wanen walobore hukennehimbere, nena ei ma, ebeli yae helere na hului.”

<sup>30</sup> Nebei anuwaufa enatere Galilea kanira fowate, Yesus kena ban hiwa yo isaeyai-bondere makei ijenna ate, <sup>31</sup> rabuhine ban Yesus naei na mo-mo fonate yae na moisa orate yore a usaei bele kelemmilerene. Yesus yae weumi, “Reyae, Allahle bokora mekale ro miyae uware yeubokale Kiyae, beko mokoiboise ro miyaere Raei kelai nenainyendere. Nebei yo yae honaisebonde. Name nenja mo nulu yo mahe yora arenunde.” <sup>32</sup> Yesus Naei mekai haraungeboke uwoumilere, na moisa orowate yo onewate handawate. Nebeibe a hinenainyehindere fe yae kowainyele.

*Nde Naei Kaban Sele?  
(Mat. 18:1-5; Luk. 9:46-48)*

<sup>33</sup> Ewate Kapernaum yone aibaleke. Nebeinya imae mbainye ayeuboke wa Yesus yae na moisa orate yore hineumi, “Mayae rahe abe nibi nolone mande yae eleimeyabe?”

<sup>34</sup> Fe yae hubainyelene a ban nekewate, rabuhine ban a na no bae nde yae naei nolona kabande yeuboke abe kileimeyate.

<sup>35</sup> Yesus angken ounguweuboke mo, na moisa orowate yo kaeneumikoke wa weumi, “Nde yae rone ronainyere kena kolena, nebei kiyae naei ro are yae mokonnele hele, nane merau ro miyae nemene naeise yebaei bubaeise yembonde.”

<sup>36</sup> Nebeisa Yesus fa kaei-kaei mbai roukeunge naei nolone haungeboke, hahi yae roukeungele wa weumi, <sup>37</sup> “Nde yae fa kaei-kaeise Raei ro aerene foi yae ei anebondena, nebei kiyae Rare eibe haweufe. Nane merau nde yae Rare ei hawensele, nebei kiyae Rare mo ei haweufe ban, Allah, ndare ukeufe mekale Kiyae bele, ei haweunge.”

*Yesusle Holona Yo Naei Ma*

*(Luk. 9:49-50)*

<sup>38</sup> Nebeisa Yohanes Yesusre weunge, “Guru, meyae ro mbai erekannele Waei ro yae walobore hukeumihike. Meyae nebei mekai mokoubokere a hun kolowannele, neyae aei holone oroinye.”

<sup>39</sup> Nebeibe Yesus yae weumi, “Ahennemae! Rabuhine ban ro miyae nde maenin rambun emere-emere Raei ro yae mokombonde kiyae u hale yae Rare a beko ewei sului. <sup>40</sup> Nde aengkele me kena u kena ekinyeinya, nebei kiyae aei reufine weke, aere hakoume. <sup>41</sup> Reyae Wali Ondofolore yeubokale. Nana heselebe wamale, nde yae bu nuku weyae aneufinde naeise kolaei mbai inyete Raei holone oroyae aerene, nebei kiyae na me buhae Allah enneyende.”

*Ro Hire Ewabeijae*

*(Mat. 18:6-9; Luk. 17:1-2)*

<sup>42</sup> “Ro miyae fa-fa wali wanan nekate holona ro miyae Rare hila rabore halaeisele yo, wabenaimihinde beko ranne enaibalendena, nebei yo beko hele hubanainyende. Naei foi sele nebei ro miyae ruka kaban na horora ha yae bainyaisinde nau bune enaiwoyonde.

<sup>43-44</sup> “Naei foi sele wali hole moloubonde naise me mbai neufande, me bee herele bele. Nebei sului mbai wa kena haehaere koyae hului waei me yae bekore mokoubondena, narakare ele belene, nebei kena haehaere koyeyae hee neungele. Narakana i bulo-bulo ekebeikoi sului, nane merau uware anate hen eherei boi sului. <sup>45</sup> Na foi sele wali hole moloubonde naeise oro mbai neufande, oro bee herele bele. Nebei sului mbai wa kena haehaere koyae hului waei oro yae bekore orolena, narakare ele belene, wa kena haehaere koyeyae hee neungele. <sup>46</sup> Narakana uware anate hen eherei sului, na i bulo-bulo ekebeikoi sului. <sup>47</sup> Na foi sele wali hole moloubonde naeise ijoko ani mbai keleufinde wowonde, ijoko bee herele bele. Nebei sului mbai wa kena haehaere koyae hului waei ijoko yae bekore erelena, naraka ele belene, wa kena haehaere koyeyae hee neungele. <sup>48</sup> Narakana uware anate hen eherei sului, i bulo-bulo ekebeikoi sului.†

<sup>49</sup> “Rambun hiwa i walora yolo-yolo inyaibonde wanan mae ro miyae beko hubanainyele walora u mekai foi inyaibonde. Nebei ro miyae wanan Allah yae kenare kole, naei wanan mbai Allah hae bele heraeiyekoyate hili era akau erare kenare koyele. <sup>50</sup> Hae na yu foinya, nebei hae na foi. Nebeibe na yu u yembondena, na hului ban benen yu belere mokonainyebonde. Mai wali einye hae bele wanan mae nekembe, foi hi yae hire mokonnele.”‡

## 10

*Einyeisi Meinyeisi Koyate Naei Abe Yesus Kelewoumi*

*(Mat. 19:1-12; Luk. 16:18)*

<sup>1</sup> Kapernaum yora Yesus naei alainyekoke Yudea kanire ekate. Nebeisa Yordan wi enaa reufire ekate. Ro miyae helen sele mekate Yesusle bokone mo mewarileufike, ya-ya na wanan Yesus nda ro miyaere wali nibi ane kelewoumi.

<sup>2</sup> Nebeinya kelewoumle yae Farisi holona yo mekate Yesusre u malire hubanainyehinderene hinainye, “Musale walora wali heere foloukoke ma huluinye miyae na hului huremamile?”

<sup>3</sup> Yesus yae weumi, “Musa yae rahe abe nda naeise mare ukembe?”

<sup>4</sup> Farisi holona yo yae wainye, “Musa ehe koumikoke ro na miyaere na hului nennehinde. Nebei ro yae nennehinde naei homo mbai molongkonde yennele.”

<sup>5</sup> Yesus yae weumi, “Mai kena elae yun elae nekeyaubene Musa yae nebei a moloukoke. <sup>6</sup> Allah nebei wanan u bene eharai boi. Rabuhine ban nda kani kelana mokouboke heene, Allah ro bele miyae bele mokoukoke.\* <sup>7</sup> Nebei aerene ro mbai naeko nenake nukemmibonde, nanaei yae na miyaele mbainye eneinyekende, <sup>8</sup> na beene mbainye

† 9:48 9:48 Yesaya 66:24 ‡ 9:50 9:50 Yahudi kanina hae hiwa niki bele. Bu filembondena hae yu u yembonde.

\* 10:6 10:6 Kejadian 1:27

inyeibonde<sup>†</sup> ((naei kena u aweneikonde)).' Nebei aerene bee ban mbai mo yembonde.<sup>9</sup> Nebei wanenne Allah yae mbainye mokommibonde rambun, benen ro yae miyae yae ekelareijae!"

<sup>10</sup> Imaene na mo-mo nekewate yae wa, na moisa orowate yo yae nebei a mbaibe benen hinewainye. <sup>11</sup> Yesus yae weumi, "Nde na miyae nenensinde, benen miyae hi rowendena, nebei ro yoko kaeimae koukoke, naei miyae helere beko mokoungeboke. <sup>12</sup> Nebei sului mbai, miyae mbai na molo nenensinde, benen ro hi bele eneinyekendena, yoko kaeimaebe koukoke."

*Yesus Fa-Fa Bele*

(*Mat. 19:13-15; Luk. 18:15-17*)

<sup>13</sup> Ane weumi hee yae ro miyae na fa-fa yarowaimi Yesusle bokore mewate mere kolommilere, nebeibe Yesus na moisa orowate yo a elae yae uwaimile. <sup>14</sup> Yesus nebei wanen hukewaimile erewolene a na ikele yae na moisa orowate yore weumi, "Raei bokore nebei fa-fa nendon waemmihi mai, a hun okolommimae! Nde naei nda fa-fa wali ma nekate yo Raei me kelee u keleene nekate holona ro miyaere yaeiboke. <sup>15</sup> Nana heselebe wamale, nde yae fa-fa ((naeko nenake weimi are boroyeumi wanen Reyae weumi are oboroinya,)) Raei me kelee u keleene nekate ro miyae holone eyeisi sului." <sup>16</sup> Nebei wanen a weumikokera, Yesus nebei fa-fare mo hahi yae yarowoumi, me yun ranne kolowoumi, Allahre riwoung nebei fa-fare onomi foka yae ei hawemmile.

*Hembonilo Relalo*

(*Mat. 19:16-30; Luk. 18:18-30*)

<sup>17</sup> Alonainyekonde enatere yae ro mbai oro habelei-sabelei yae habeimeyele Yesusle bene uwa oro selen-selen mae roroukoke. Nebeisa hineunge, "Foise mo mokoyeyae Guru, rahe me u yae mokoreborona na hului wali hena bona eitoufele?"

<sup>18</sup> Yesus yae weunge, "Rahe ma haraungebokaene weyae Rare foi yae warae? Rabuhine ban hi yae ha yae foi u hele, Allah nembai sele foi. <sup>19</sup> Weyae Allah yae Musare ukeunge wali heere foloukoke are waeisaei, ro hoi-soi ohojiae, ro miyae bele miyae ro bele mbainye ohonoiiae, yoko ebaeijae, ro miyae naei a hele ban ehuweijae, ame-ame ebeyejiae, ana araise enera faisa yaneumiyende."<sup>‡</sup>

<sup>20</sup> Nebei ro yae weunge, "Guru, nebei a nemene na hokolona hakowale mokowale bangka mo."

<sup>21</sup> Yesus nebei rore erewoung na kena buhae bele hewoung wa weunge, "Mbai sele waeinya kalore molote, eye waei rambun nemene naise heukonde mo, nebei roibe keren ban nale ban nekate yore yeumikonde. Nebei yae weyae keren nale surgane hononayete. Nebeisa rare hakoufubonde!"

<sup>22</sup> Yesus yae ukeunge are na kenara beko hele yae hubawoung. Nda ro naei rambun helen selene, nebei anuwaufa na rei ban mai ban mae aloungkoke ewole.

<sup>23</sup> Yesus na moisa orate yore ereumi wa weumi, "Na yabi-yabi hele keren bele nale bele ro miyae Raei me kelee u keleene nekate holona ro miyaere inyaibondere!"

<sup>24</sup> Yesus yae eleukoke are na moisa orowate yo borowate fa yae bate. Yesus ahuneungeboke weumi, "Fa-fa borombo, ro miyae na yabi-yabi hele Raei me kelee u keleene nekate holona ro miyaere enajembondere. <sup>25</sup> Imake bulure nendon wanen sele obo unta eweufube, nebeibe keren nale nolone nekeyate yo yae Raei me kelee u keleene nekate ro miyae holone enensindere yabi-yabi hele."

<sup>26</sup> Yesus yae elewoke a na moisa orowate yo borowate, fa yae bowate, hi yae hire hineunge, "Ndi a merau eleukokena, nde naei yae wali enaiyaronde."

<sup>27</sup> Yesus ereumi weumi, "Benate naeise Allahle me einye mo, nebeinye ro yae miyae yae na hului ban elate kayeero. Allah yae bae rahe rambun na hului ban? Nanemene na hului mo yeiboyele!"

<sup>28</sup> Nebeisa Petrus yae weunge, "Eramae, maei rambun nemene fomene nukandekoke hayaendekoke, Ware hakayekokete."

<sup>29</sup> Yesus yae weunge, "Nana heselebe wamale, nde yae raei aerene bele Raei a foi faeu foi aerene bele naei imae obe, naka baeke, naeko nenake, na kelu omi, na buro kela nukemmibondena, <sup>30</sup> nebei ro miyae holore nda hee yae rambun raka 100 yae barammibonde. Nebei rambun barammibonde nda niyae: imae obe, aka baeke, nenake, kelu omi, buro kela, nane merau weitasi konainyele. Nebeibe bena yane nda holona yo wali huba ban haei ban enaiyaronde."

<sup>†</sup> 10:8 10:8 Kejadian 2:24    <sup>‡</sup> 10:19 10:19 Keluaran 2:12-16, Ulangan 5:16-20

<sup>31</sup> “Na yaka inyaibonde nda heena ro bele raimi yo helen rabuhi ban mae me baemmibonde, nane merau nda heena me baei ban yo helen ro bele yae me baemmibonde.”

*Yesus Naei Herende A Roko Name Nendobe Uwoumi*  
(Mat. 20:17-19; Luk. 18:31-34)

<sup>32</sup> Yesus na moisa orowate yo bele alainyekoke Yerusalemde ewate. Nebei yone Yesusre beko mokonainyekonde isaeyeubokebe, neyae bera neuboke ewate. Nebei aere ne nibine ewate bae na moisa orowate yo fangkengke kowate nane merau ro miyae helen hakainyekoke ewate yo fe waku kowate. Yesus na moisa orowate yore me bee oro nen bee helere mo arileumihike, Naei uwara enainyemokonde ane uwoumi, <sup>33</sup> “Borombo! Mana eyae Yerusalem yore ande. Nebeinye emale yae Reyae, Allahle bokora mekale ro miyae ure yeubokale Kiyae, imam yun-jun naei nane merau Musale walora wali heere foloukoke are isaeyaeiboke kelaeimi yo naei me einye kelai nenayende kinyenaisebonde. Nebei yo yae honaisebonde naei a hokonaikonde mo, nebeisa Allahre rore oroihoi, Yahudi ban ro miyae holona, me eise yae kinyenaisebonde. <sup>34</sup> Nebei yo aukaka yae konaisele, eki hesere yae roronaisele, erahuae olenaisebonde, honaisebonde. Nebeibe molonaisehandera kanine ya bee mo honorekonde, name nenjare mo arenunde.”

*Yakobusle Yohanesle A Ri-Ti Riwoinye*  
(Mat. 20:20-28)

<sup>35</sup> Nebeisa Zebedeusle fa-fa bee, Yakobusle Yohanesle Yesusle bokore mekete weinye, “Guru, meyae riyayeisite maei kenare konde rambunde mokoumebondere.”

<sup>36</sup> Yesus yae hineumi, “Mai kenare koube rahe erabe mokorebobe mayae erebobere?”

<sup>37</sup> Hokolo bee yae weinye, “Ehe koimeko Waei yo waku one bele hengko bele meungeubondene, maere waei meline meubene anuwau haumekonde.”

<sup>38</sup> Nebeibe Yesus yae weumi, “Riyeube a mayae isaeyeihoi sele! Na huluniye Reyae beko yae enaisemokonde u mekai enaimokoyebe nane merau enaisehombonde wanen enaisokobe?”

<sup>39</sup> Nda bee yae weinye, “Meyae na hului!”

Yesus yae weumi, “Na helebe eleube, Reyae beko yae enaisemokonde u mekai mare enaimokobe, enaisehombonde wanen enaisokobe. <sup>40</sup> Nebeibe, anuwau meubene meline bele Raei bokone enairombonde yo, Reyae ewaheikoi sului. Nebei naeise Allah yae mokoungehake wahemmikondere.”

<sup>41</sup> Hokolo bee yae Yesusre riwoinye abe na moisa orowate yo me bee hiwa borowatene, Yakobusle Yohanesle ikele yae kowaimi. <sup>42</sup> Nebeinye Yesus nebei yo nemene kaeneumikoke mo, weumi, “Mayae maisaei nda kanina kelana ro miyae yunde nekate yo na ro miyaere me boi u boi koyaimi, nane wanen nebei yun naei yun-jun yo yae nare moi hureyaimi. <sup>43</sup> Mayae nebei mekai omokoiyae! Mai nolona nde kabande yembondere konde kiyae, hiwa yo naei yebaei bubaei wanen mae yembonde. <sup>44</sup> Nane merau nde mai nolona bereise wanen mae nekendere kena konde kiyae, mai yebaei bubaeise yembonde hele. <sup>45</sup> Raei wali erembo! Reyae, Allahle bokora mekale ro miyae uware yeubokale Kiyae, Rare mokonaisele mekale ban. Reyae yebaei bubaei wanen mekale, nane merau ro miyae helende hole molorebonde naeise Raei wali isemile.”

*Yesus Bartimeusre Onomi Ikeunge*  
(Mat. 20:29-34; Luk. 18:35-43)

<sup>46</sup> Ewate Yerikho yone aibaleke. Na heki ban mo, Yesus na moisa orowate yo bele nane merau ro miyae helen hokoumeke bele nebei yora maibaleke mewate mo, ro mbai na ijoko kumba nibi enene nuweuboke a na hebaen-sebaen riwole. Na ro Bartimeus, Timeusle fa. <sup>47</sup> Borole Yesus Nazaret yona ro mele, nobaeinyekoke mo kaenele, “Yesus, Daudle kelu, rare yanekoi yase yae ei aufele ya!”<sup>S</sup>

<sup>48</sup> Nebeibe Yesusre hakainyekoke mate ro miyae helen mae a elae hele yae hilembondere uwainye. Nebei a hun kolainyere oboroi, a elae hele kaenele, “Daudle kelu! Rare yanekoi yase yae aufele ya!”

<sup>49</sup> Yesus hebeunguke mo weumi, “Nebei ro kaenennoko meu.”

Nda ro miyae helen Bartimeusre kaenewainyele wainye, “Wa kenabe elae rowei! Ainyu! Yesus Naei bokore elere kaenete!” <sup>50</sup> Nda ro u hale me hale naei malo uware feleuboke raka kiyae rubounguboke aunguke Yesusle bokore eke.

<sup>51</sup> Yesus yae hineunge, “Waei kena koyae rahebe ware mokoreibotere?”

<sup>S</sup> 10:47 10:47 Isaei bele holona yo hiwa u bene nekaimi nda ro, Daudle kelu, Wali Ondofolo ro wanen mbai. Na mekai Allah yae oro umau heraugeboke Ondofolo. Neyae ya hire mende Allahle holona yore wali hena bona yemmile.

Nda ro ijoko kumba yae weunge, “Guru, reyae ijokore ererelere kena kale.”  
<sup>52</sup> Yesus yae weunge, “Ninae eye! Wa hila rabo haleyae yae ware onomi ikete.”  
 Are ukeunge hee yae na hibi na ijoko erewole. Yesus ewole moisa mo hakouboke orayeke.

## 11

*Yesus Yerusalem Yore Na Buma-Buma Ewole*  
 (Mat. 21:1-11; Luk. 19:28-40; Yoh. 12:12-19)

<sup>1</sup> Yesus naei Yerusalem yore nobewainye mo, nebei eke nibina yo bee hele Betfage bele Betania bele Zaitun moko enene honate. Nebeinye Yesus na moisa orowate yo ro bee ukeumi Betfagere ekete. <sup>2</sup> Yesus yae nda ro beere weumi, “Mai bena yo eke honorere ebu. Nebei yone ebeubobe mo, keledai mbai ha yae wokainyelebe hanennele. Nebei keledai ro miyae yae na uwa ranne ehebeinyui mo. Nebei keledai ha bulaerenebobe yawenehobe mebe. <sup>3</sup> Ro yae miyae yae hinenayebena, ‘Rahere nebei keledai ha bulaerenebobe?’ mayae bee weumile, ‘Aei yun kena koukokene, na heki ban mo menenjembe.’ ”

<sup>4</sup> Nda ro bee ekete mo, Yesus yae ukeumi wanen hubayeikoke. Keledai kelu nibi kaban enene imae romau bene ha wokainyele hebewole. Nebei keledai hare mo bulaerineyeboke. <sup>5</sup> Nebeinya ro miyae hebate nda beere hinaimi, “Rahere mokoneborene nebei keledai na ha bulaereungele?”

<sup>6</sup> Yesus yae ukeumi hului yae hokolo bee ukeimine, nebei ro miyae ehe kaimikoke nebei keledai yawainyehoke ewate. <sup>7</sup> Nda keledai Yesusle bokore yawainyehoke ekete. Naei malo keledai moko ranne baikokera mo Yesus na randa yeufebunguke. <sup>8</sup> Ro miyae helen bolen mewate. Hiwa na malo nibine bewate, hiwa na buro kelana o maensa na fae bele yae inewate nibine alowate. <sup>9</sup> Bere ate yo moisa mate yo nemene fomene kaenate,

“Men, Allahre buma koloman!

Allahle ro yae meke Kiyaere foi moi helen barannele!”

Aei yobe Daudle yo wakube annununde!

<sup>10</sup> Nebei yo waku foi moi baranne!

Allah na bumana hele!

Men, Nare buma koloman!”

<sup>11</sup> Yesus naei Yerusalem yone ayeuboke Allahle ei mom-mom imae na kaban sele kiyaene eweufike. Nebei imae ei ewerekoke mewerekoke wa eukuke. Be bahewolene na moisa orowate yo me bee oro nen bee bele kulun ukate Betania yore ewate.

*Yesus Ara Nore Olomo Neungeboko*

(Mat. 21:18-19)

<sup>12</sup> Rene ya heuboko Betania yora Yerusalem yore alainyekoke ewate. Nibine ewate Yesus moni hubawoungue. <sup>13</sup> Yesus nahaufa erele nibi enene ara no mbai fae yae houngeboko. Nobaeinye wa ijoko roboungue nda ara no ani bele era, nebeibe na no kelaeunge mekate bae ani mbai ereiboi sele. Fae bangka mo erele, rabuhine ban nebei hee ara no ani omokoinye. <sup>14</sup> Yesus nda ara nore weunge, “Waeinya anibe ro miyae anenainyende bele!” Nebei a eleukoke na moisa orowate yo borowate.

*Yesus Allahre Ei Mom-Mom Imaere Eweufike*

(Mat. 21:12-17; Luk. 19:45-48; Yoh. 2:13-22)

<sup>15</sup> Nebeisa ekate Yerusalem yone mo, Yesus Allahle ei mom-mom imae na kaban sele kiyaene eweufike, nebeinya huba raweuboko ro miyae naise hewate yo hukeweumi balayeke. Yahudi naei ban roi ijarowate Yahudi naei roi yae ibewaimi yo naei rambun koloi-koloi bele, aye merpati naise hewate yo naei anuwau bele nemene kou wae beumiyeye. <sup>16</sup> Hire hare ewaeisi naei naise haete rambun bele nebei Allahle imae eisa eyaroi ei. <sup>17</sup> Nebeisa Yesus nebeinya ro miyaere kelewoumi, Allahle yenjo kayaayo yae homo molaiukohebe huwewaimi, “((Allah yae elele,)) ‘Raei imae obe nda kanina nemene ro miyae ebeli boi-boi anuwau wae enayelende.’† Nebeibe mayae mokaungeboko ‘yoko yo naei nalere yeuboke.’”‡

<sup>18</sup> Imam yun-jun bele Musale walora wali heere foloukoke are isaeyaeiboko kelaeimi yo bele nebei a boraiiboko, nebeinye Yesusre honaibondere nibi baewate. Nebei holona Yesusre fe yae faewainye, rabuhine ban ro miyae nemene Naei a kelewoumire fa yae bowate.

\* 11:9 11:9 Mazmur 118:25-26 † 11:17 11:17a Yesaya 56:7 ‡ 11:17 11:17b Yeremia 7:11

<sup>19</sup> Be bahewole mo, Yesus na moisa orowate yo bele Yerusalem yora aibaleke ewate.

*Ara None Ahuneboke Kelewoumi*

(Mat. 21:20-22)

<sup>20</sup> Na rene hele, wenana nibi relahira bukaiboke ewate bae, na moisa orowate yo yae erewate bae, nane ara no kalaukoke, na kambune bele oke. <sup>21</sup> Petrus wenana yeuboke bene nekeunghikene Yesusre weunge, “Guru ijoko ereibone! Olomore neungebokae ara no kalaukoke ya.”

<sup>22</sup> Yesus yae weumi, “Na helebe wamale, Allahre mo hila rabo halennelena, <sup>23</sup> mai kena wauwau banna, elengkombe a na hele yae hila rabo halembena, nda elu na hului wennele, ‘Raweibo naubune etuwe!’ Allah yae nebei mekaise mokonde benate yakanate. <sup>24</sup> Nda abe bene nekenayembe: Mayae ebeli embombe, riyennehimbe rambun inyembere hila rabo elae yae halemba hele, nebei heere Allah enenjembe. <sup>25</sup> Nane merau weyae ebelire eungeboderena, wa kena einye hire kena ikele kanaena, nebei ro miyae naei beko bako mokoubokete u benera nundeneikote wa Arai Allah surgana nekele waei beko bako faeinyleneibote. <sup>26</sup> Ro miyae hi naei beko bakore u benera enundeikoinya, mai Arai surgane ekenekele Kiyae nane merau waei beko bakore efaeinyeiboi.”

*Yesusre Hinainye Nde Yae Ukete Mekae*

(Mat. 21:23-27; Luk. 20:1-8)

<sup>27</sup> Yesus na moisa orowate yo bele Yerusalem yore bukaiboke ekate. Yesus Allahre ei mom-mom imae na kaban sele kiyae orowole mo, imam yun-jun, Musale walora wali heere foloukoke are isaeyaeiboke kelaeimi yo, Yahudi yun-jun Yesusre erekainyelene nebeinye na bokore mekate. <sup>28</sup> Nda yo yae Yesusre hinewainye, “Ndele ro yae nda rambun nemene mokoyae? Wa kenare koyae huluibe mokoyae?”

<sup>29</sup> Yesus yae beumihoko weumi, “Reyae nane merau mare are hinerensimbere. Mare hinerensimbe mayae wo konsekombe, nebeisa mo mainya a hinaufehike, ‘Ndele ro yae Reyae nda rambun wanen mokale’ Reyae ufembe. <sup>30</sup> Reyae mare hinemale, ‘Yohanes bu koumi kiyaeere nde yae ukeungele bu kowoumile, Allah yae, nda ro miyae yae?’ Mayae wo konseko!”

<sup>31</sup> Nebei yo nanaei mo kolowainye wa elate, “ ‘Allah yae ukeunge’ a yae umande bae, bensonde wemmele ‘Rahene Yohanes bu kowoumile na helere eleikoi kowaube?’

<sup>32</sup> Nebeibe yabi-yabi hele ‘ro miyae yae ukainyele mokowole yae’ umanderebe, rabuhine ban ro helen miyae helen mae Yohanesre yendo kayaalo hele elate. Meyae nare fe faemmile.”

<sup>33</sup> Nebeinye wainye, “Meyae isian.”

Yesus yae nebei yore weumi, “Nebei wanenna, Reyae nane merau mare eyakaiboi nde yae ukeufe nda rambun nemene mokale.”

## 12

*Anggur Heke Yo Ahumbo-Ahumbo Ahuneboke*

(Mat. 21:33-46; Luk. 20:9-19)

<sup>1</sup> Nebei Yahudi yun-junde Yesus ahumbo-ahumbo a yae ahuneuboke weumi, “Ro mbai anggur heke mokoubokere, ruka ele yae neuboke, anggur bure ramenat naei a bulu waeuboke, kayaare hebenate naei anuwau mokouboke, roi yae mokonate yore nda anggur heke kinyeumbokera, kulun uke kolore ewole. <sup>2</sup> Anggur anire hokonate hee yae, naei kayeere yarongkonde naeise nebei heke rorele naei yebaei bubaei ukeunge hekere mokowate yo bokore eke. <sup>3</sup> Nebeibe heke yo yae nda rore ikilaiiboke, erahuae baikoke, na me banka yae ukainyele beufoke ewole. <sup>4</sup> Heke rorele benen naei yebaei bubaei hire ukeunge eke. Heke yo yae na yunda baikoke, fe mokainyeboke, hukainyehike ewole. <sup>5</sup> Nane heke rorele ro name nendo ukeunge ekere haiiboke. Nebei moisa uwoumi ewate yo hiwa erahuae bayeke, hiwa hoi-soi yae hayeke. <sup>6</sup> Heke rorele na imaene mokowate yo erewole oloo haloo, naei kelu mbai sele kenare kounge kiyae mo nekwewole. Nebeinye na kelure ukeunge heke yo bokore ewole. Heke rorele na u bene nekwainye naei fa wanenne heke yo yae nare ei molonainyele era. <sup>7</sup> Eke bae, heke yo yae erekainyele mo elate, ‘Nda niyae heke rorele naei rambunde kinyennele hakennele kiyae. Men homabon, nebei nibi yaere nare kinyennele rambun aeise inyaibonde!’ <sup>8</sup> Heke rorele na kelure mo heke yo yae ikilaiiboke, haiiboke, na uware mo anggur heke ele moise kainyehike eke.”

<sup>9</sup> Nebeise huwekokera mo Yesus yae hineumi, “Nda heke rorele na kelure heke yo yae haiiboke a borombonde heene, rahebe heke yore mokommile? Mensongkonde hele nebeisa nda anggur heke hiwa yore kinyenemibonde mokonate. <sup>10</sup> Mayae Allahle

homofae are isaeyaeuboke. Neinye Reyae ruka bele a ahuneuboke, nda wanen moloukoke,

'Imaere haetena ruka mbai beko yae elaeikoke wokatebe,  
mana nebei ruka yae hereise yeuboke.

Neyae nebei imaere kaeuboke.

<sup>11</sup> Nebei me u Allahle reufira mokouboke,

aei ijoko bene foi eme wanen yeuboke.' \*\*

<sup>12</sup> Boraikoke yo isaeyaeuboke neyae heke mokate yo bele nane merau imae haete yo bele a ahuneuboke huwewoumine, Yesusre ikilenaibondere nibi mahi-mahi baewate. Nebeibe ro miyae helende fe yae faewaimine, nebei anuwaunge Yesusre nukainyeboke ewate.

*Pajak Naei Abe Hinewainye*

(Mat. 22:15-22; Luk. 20:20-26)

<sup>13</sup> ((Nebei Yahudi yun-jun isaeyaeuboke Herodian holona yo kelaeimi pajak roi pemerintahre inyainyele hele, nebeibe Farisi holona be ehineiboi. Nebei aerene)) Farisi holona bele Herodian holona bele ukaimile walangka wanen yembonde Yesusre are enainyehinensindere. <sup>14</sup> Ekate mo, Yesusre hinainye, "Guru, meyae maeisaei sele Waei afaeu na ijenne mo eleyeyae, ro miyae naei kena yon-jonde ban. Allah kenare kole afaeu Weyaebe ijokore ereyei weyamae. Nebeinye riyae yete a na ijen mae weumelere, pajak Ondofolo Kaban Kaisarre imanelena nebei me u foi, beko? <sup>15</sup> Nebei pajak imanele hele, eyei yae?"

Yesus nebei holo bee naei ame-ame isaeyebokene, weumi, "Na yaka mayae umalibe hubaufe. Roi perak mbai kelensebo!" <sup>16</sup> Nebei yo perak mbai kelaeinyeboke. Yesus ereuboke mo hineumi, "Ndele u nulu bele ro belebe honate?"

"Kaisarle" neyae wainye.

<sup>17</sup> Yesus yae weumi, "Nebei wanenna Kaisarle kayee Kaisarre yennele, Allahle kayee Allahre yennele."

Nebei a merau boroukatene fa yae bowate.

*Herewate Yo Walenaibonde Naei Abe Hinewainye*

(Mat. 22:23-33; Luk. 20:27-40)

<sup>18</sup> Nebeisa Saduki holona yo, herewate yo benen ewaleiboise elewate yo, Yesusle bokore mekate mo hinewainye, <sup>19</sup> "Guru, Musale walora wali heere folaikoke homofaene nda a moloukoke: Ro mbai na aka baeke na fa ban mae herendena, na miyae nale rowende naeka hereke kiyaele orona menare holensindere. <sup>20</sup> Na ako naka mbainya kelu mehine bee hele. Bena kelu miyae rouke fa ban mo hereke. <sup>21</sup> Na kelu bee nendo naekale miyae nale bele nekeikoke, naekale wanen fa ban mae hereke. Kelu nane nondone naei mekai yeuboke. <sup>22</sup> Nda kelu riyana fa ban mo yae heraikoke, na huba mokoikoi nda miyaebe hereke. <sup>23</sup> Na hele hereyate yo walenaibondena, nda kelu mehine bee bele nane miyae bele nekaikokena, ndele miyaeere yembonde?"

<sup>24</sup> Yesus yae weumi, "Homofae yolo-yolone molaikoke, nane merau Allah elae wake naeisa mayae isaeyeboinye nebeinye onaeube. <sup>25</sup> Rabuhine ban herewate yo walenaibonde hee, ro miyae eyaroi miyae rore ei. Surgana malaikat wanen mae inyaibonde. <sup>26</sup> Na hibi ro miyae herewate yo benen walemmile naei, Allahle Yendo Kayaalo Musa homone moloukoke mayae okoikoinye? Nebei homone isa folon i bewole reufira Allah a uwoungge, 'Reyae Abrahambe Allah, Ishakle Allah, Yakuble Allah yeubokale.'† <sup>27</sup> Nebei Allah here yo naei ban, neyae wali yo naei Allah. ((Nebei aerene na yaka yeuboke nebei yo waleumikoke.)) Mai u bene ma beko helebe nekayembe."

*Allah Yae A Ukeume Na Berei Kiyae*

(Mat. 22:34-40; Luk. 10:25-28)

<sup>28</sup> Saduki holona yo bele ane huwate hee, Musale walora wali heere foloukoke are isaeyaeuboke kelaeimi ro mbai meke borowoumi. Nebei a Yesus na ijenne mo wo kowoumine, nda ro Yesusre hineunge, "Allah yae Musare ukeunge wali heere foloukoke honate a nolona makei kayeero na bereinya hele?"

<sup>29</sup> Yesus yae weunge, "Na bereinya nda miyae, 'Israël borom! Aei Tuhan Kiyae, Allah, Neyae Tuhan nembai sele, hi hi u hele. <sup>30</sup> Allahre buhae hennele, mai kena ura, mai u bene wa benera, mai elae wakera.'‡ <sup>31</sup> Na bee nendo, 'Waei uware heungele ma wangkele wali nibi mbainye oroyaube yore heumiyende.'§ Nda beera hi berei wanende u hele."

\* 12:11 12:11 Mazmur 118:22-23 † 12:26 12:26 Keluaran 3:6 ‡ 12:30 12:30 Ulangan 6:4-5 § 12:31 12:31

<sup>32</sup> Musale walora wali heere foloukoke are isaeyaeiboke kelaemi ro yae weunge, “Guru, na ijen selebe eleyae Allah nembai sele, hi ha ehameikoi. <sup>33</sup> Nebeinye ro miyae Allahre kena buhae na kena u nemene, na u bene wa bene nemene, nelae wake nemene hennete nebei sului mbai naei uware hennete wanan mangkele wali nibi mbainye oroyauwe yore hemmiyende. Nebei u mekai naei berei sele, aei hili era akau era mahimahi Allahre ongkou wae felemangkonde na moinya.”

<sup>34</sup> Yesus erewoungwe nda kiyae na ijen roukokene, Yesus yae weunge, “Raei me kelee u keleene nekate yo holone euwende naeise weyae ahau ban sele.” Nebei heera ro miyae hiwa are hinenainyelere fe yae kowate.

*Wali Ondofolo Naei A*

*(Mat. 22:41-46; Luk. 20:41-44)*

<sup>35</sup> Allahre ei mom-mom imae na kaban sele kiyaeene kelewoumi yae, nda a Yesus yae weumi, “Naenda wanan mae Musale walora wali heere foloukoke are isaeyaeiboke kelaemi yo yae elate, ‘Wali Ondofolo Daudle orona mena?’ <sup>36</sup> Era bae Daud nenaie yae Allahle Roh aungebokene eleukoke,

‘Allah yae raei Tuhan Kiyaeere weunge, meube reufine mei nuweibo,

wa yokeijo nemene mokoremibonde Waei oro kele me kelene mo menai orulembonde?’\*

<sup>37</sup> Daud yae Wali Ondofolore ‘Tuhan mae’ elene, eyae Nare Daudle orona mena mo yae eleikoi sului!” Nda ro helen miyae helen Yesus kelemire kena hele kate.

<sup>38</sup> Yesus nebei yore kelewoumi mo weumi, “Musale walora wali heere foloukoke are isaeyaeiboke kelaemi yore kayaa-kayaa hebembe. Neyae malo koukou foi sele hirate, nai hei-seise haete anuwaunge orate, bere hinenaimilere ibaewate. <sup>39</sup> Neyae Allahle imae einye bele raman bulau anuwaunge bele rora ronaimibonde anuwaufe ibaewate.

<sup>40</sup> Miyae nannale naei rambunde yaronatere ame-ame yae beyaimire yaroyate, nebeisa ro miyae bene ebeli heki kaeu-kaeu hele ibowate. Nebei yore ehewe bukulu kaban emmiyende hele.”

*Miyaenale Mbai Naei Akau Era*

*(Luk. 21:1-4)*

<sup>41</sup> Yesus Allahre ei mom-mom imae na kaban sele kiyaeere roise hawate anuwau kelaunge raiboke nekewate yae, Yesus ijoko neumbokoke erewoumi roi helen holona yo roi helen sele hawate. <sup>42</sup> Nebei nolone miyaenale mbai naei roi auboke, tembaga roibe fele-fele hele. <sup>43</sup> Yesus na moisa orowate yore kaeneumikoke mo weumi, “Na helebe wamale, ndi anuwaunge hawaikoke yo nolora ndi keren ban nale ban miyae ken helen sele auboke. <sup>44</sup> Rabuhine ban, ndi yo helen honaiminabe mekaisawate. Nda miyaenale honainye hului nanemene hele mewauboke.”

## 13

*Huba Mokoikoi Yane*

*(Mat. 24:1-2; Luk. 21:5-6)*

<sup>1</sup> Allahre ei mom-mom imae na kaban sele kiyaeere Yesus naei maibaleke ewate mo, na moisa orowate ro mbai yae weunge, “Guru, nda imae obe hebele ereibo! Na ruka foi sele ahunewate, yalaeinyebokoke hele!”

<sup>2</sup> Yesus yae weunge, “Ndi imae obe kaban-kaban mokainyehake hebate ereyae? Nanemene kerenaionde ruka hi ran hi ranne ahungkoi hononate.”

<sup>3</sup> Zaitun elune ikate. Yesus nuweubokoke na ijoko nebei Allahre ei mom-mom imae na kaban sele kiyaeere erewole mo, Petrus, Yakobus, Yohanes, Andreas, nenaie mo Yesusre hinainye, <sup>4</sup> “Maere yakaimibona are eleukoke nanemene makei hee yae enaibende? Nebei naeise rahe iwau ma rilende?”

<sup>5</sup> Yesus yae weumi, “Kayaa hebembe, ro miyae hiwa ame-ame yae wabenayengkombe bele. <sup>6</sup> Ro miyae helen nemate ame-ame yae elenate, ‘Reyae Wali Ondofolo, Allah yae ukeufe mekale.’ Nebei yo ro miyae nekai sele ame-ame yae wabenaimile. <sup>7</sup> Buloo fela kulun relennele nane merau a yo-yo buloo fela kaenainyebonde naei emborombe yane buhae ohokojae. Nda wanan nemene inyaibonde hele. Nebeibe nebei huba mokoikoi ya ban. <sup>8</sup> Nda kani kelana yo yan hi bele yo yan hi bele fela relenainyele. Onyeu, moni mai makeinye-makeinye benate, nebeibe huba mokoikoi ya namman, miyae hiyaunge fare honondere kole wanan ma bekore hubanainyele naei hengkelenbe raungehike.

\* 12:36 12:36 Mazmur 110:1



<sup>9</sup> “Nebei hee kayaa bele yae hebembe, rabuhine ban Rare ehakoyei yo yae mare ikile-nayengkombe, yo riyare kinyenayembombe, mai wali ijokore erenayengkombere. Ei mom-mom imaene erahuae yae bonayembe. Rangkele mbainye nekandene yaungayembombe gubernur yoni-yoni bene ondofole yoni-yoni bene embe. Nebei hee yae mon rowembe Raei a foi faeu foi wemmile. <sup>10</sup> Nane merau huba mokoikoi ya emei yae Raei a foi fae foi nda kani kelana nanemene hungaimile hele. <sup>11</sup> Mai wali ijokore erenayengkombere ikilenayembene, emelengkombe are buhae ohokoiyae. Nebei hee Allahle Roh yae u bene yakanembe hului a yae elengkombe. Nebei a elele waei a ban, Allahle Roh waei euwa walora elele. <sup>12-13</sup> Rare hakonsebombe aerene ro miyae helen mare ikele konayembe. Ro mbai na aka baekere enaisombonde naeise kelai nenende, nane hului mbai naeko yae na kelure. Kelu omi hiwa naeko nenakere angkaei oboroiboi konate, ro miyae hiware ungaimile honate. Nebeibe kena yae heraungayende Raei elele are hila rabo halenayende ro miyaere hole eremolombonde.

<sup>14</sup> “Nebei ya mende heene ‘ro nansau fele kiya’\* heere naisake anuwaunge mensebununde. Nda ro Allahle bene na beko hele nane merau Allahre ei mom-mom imae na kaban sele kiyaene u mekai u nene ma mokonnebonde. Nebei hee Yudea kanina ro miyae elure mo habelemembe hele. (Mayae nda homofae kombe yo isaeyembombe!) <sup>15</sup> Nebei ro nansau beko helen mokombondene, imae kelaeunge nekaube yo mai rambun roweise imaere eijae. <sup>16</sup> Hekene mokonate yo na malo roweise imaere ebukeisi eijae. <sup>17</sup> Nebei hee bendene, emale miyae bele wayeu miyae bele beko hele hubanainyele. <sup>18</sup> Manse hele yembonde bele naeise ebeli bombe, <sup>19</sup> rabuhine ban beko hele rambun benate. Nebei beko bako hubanainyehinde Allah nda kani kela mokoubokera meke nda hee nda waline eyeiboi mo, nane merau benen eyeiboi mo honenende. <sup>20</sup> Allah yae eleukoke holona holere molommibonde aerene bekore hubanainyehinde ya fofu mokonnebonde. Nebei mekai omokoiboi yae walire nekande yo hi yae ha yae wali orowei.

<sup>21</sup> “Nebei hee yae hiwa yo yae elenate, ‘Ereibo, Wali Ondofolo ndina nare, ndana nare!’ Mare ungayembena, nebei are na hele yae eleijae. <sup>22</sup> Rabuhine ban, na hele ban wali ondofole holona bele na hele ban yenjo kayaayo bele menaiyakambonde, rambun emere-emere mokonate, Allah yae eleukoke holonare ame yae wabenaimihinde balenatere, nebeibe na hului ban. <sup>23</sup> Namman eyeiboi yae, Reyae na bere holo yae nanemene isaeyaemale. Nebei mekai yae mauwa kayaare hebembe.

<sup>24</sup> “Allahle homofaene ya beko huba mokonnekonde naeise nda a moloukoke, ‘Hu hehe wende ouben yembonde, oko na hehe kebengkonde,

<sup>25</sup> findelau yoni-yoni yakura balenate onate, yakuna elae wake Allah yae kusemmikonde.’†

<sup>26</sup> Nebei hee yae ro miyae erenaisele Reyae, Allahle bokora mekale ro miyae uware yeubokale Kiyae, elae wake bele one hengko bele kitenaisebonde mangko eisa merele. <sup>27</sup> Nebeise malaikat ufemile enate Allah yae eleukoke wekeumi holona yore nda kani kelana makeinya-makeinya nemene arilenaimihinde.

<sup>28</sup> “Ara none mo isaeyembe u bene yarombe. Yahudi kanine ara no na maensa-maensa ereiboyate rimi-rimi ibewate bele onsi efawewate belene mo, neyae isaeyeyoyate rolonsan wenjendere yabe nobeungekoke. <sup>29</sup> Nebei sului mbai nda a wamale wanen mae erembe benatena, mayae isaeyembombe Reyae benen merele ya nobeungekoke hele. <sup>30</sup> Na helebe mare wamale, nda hokolo namman eheryiboi mo nda a elale nemene menaibende. <sup>31</sup> Yaku bele nda kani kela bele enainundembonde, nebeibe Reyae wamale a na hibi mo hononayende.

<sup>32</sup> “Na huba mokoikoi ya hului hu hului raungehikere surgana malaikat yoni-yoni bele, Reyae Allahle Kelu bele, nde nde nanemene isian mo, Allah nembai ken naeisaei. <sup>33</sup> Nebei yare mayae isianne kayaa-kayaa hebembe. <sup>34</sup> Kayaare hebate u mekai nda wanen mae a ahunemabon: Ro mbai kolore enderene, naei imae einye kaliare mokate yore naeise naeise waheumikoke. Romau kayaana kiyaere a elae bele rorongue foi yae hebende.

<sup>35-36</sup> “Nebei mekai Reyae berehonde merelene ijongkune honombe yae hubaimakonde belene mayae kayaa hebembe. Rabuhine ban nebei imae rowa berehonde wanen Raei merele hee isian nekaube, huae yae, reniai yae, ojo konate hee yae, ya hembonde yae. <sup>37</sup> Nda a faeu mare wamale hului mbai ro miyae nemene ufemiyende, ‘Kayaa bele yae mo hebembe mai wali mokaungehake yae nekemembe!’ ”

\* 13:14 13:14 Daniel 9:27, 11:31, 12:11 † 13:25 13:25 Yesaya 13:10, 34:4

**14***Yesusre Honaibonde Merau Kolowainye**(Mat. 26:1-5; Luk. 22:1-2; Yoh. 11:45-53)*

<sup>1</sup> Ya bee nekenaikonde mo Yahudi naei Paskah ya kaban bele feu ragi banne ohuleiboi anate bulau ya kaban belere konatere. Imam yun-jun bele Musale walora wali heere foloukoke are isaeyaiiboke kelaemi yo bele nibi baewate Yesusre na maleu-maleu wae ikilenaibonde mo na hibi honaibonde. <sup>2</sup> Nenaie yae elate, "Akube yembonde belene, ya kaban komale yane omokoijaa."

*Maengke Mbai Bu Fololo Kaei Bele Yesus Na Yunne Rileuboke**(Mat. 26:6-13; Yoh. 12:1-8)*

<sup>3</sup> Nebei hee Betania yone Yesus Simon bere u bauwaufe koukoke kiyaele imaere eke. Eramanne anewate yae, maengke mbai na mene minyak narwastu fololo kaei bele botol mbai rouke meke. Naise hembondena na roi bumana hele. Walambare mo uke kayeukoke nebei narwasture mo Yesus Na yunne rileungeboka. <sup>4</sup> Nebeinya mekate yo hiwa na kenara ikele yae katene, hi yae hire weunge, "Rahe londe nda minyak narwastu meke heraeyele!" <sup>5</sup> Roise heuboube bae kalia ya 300 mokokoube na roibu moi wowoube. Hun ban wai ban nekate yore na hului wahaeimikoube." Nebei aerene nda maengkere a usaei elae yae uwainye.

<sup>6</sup> Nebeibe Yesus yae weumi, "Rore ronainyele u mekai foibe Rare mokoufeboka. Rahere kena beko mokaunge? Waennihi!" <sup>7</sup> Hun ban wai ban yo mai nolone nekenayendene, mayae hakommilerena, hakommiyembe. Reyae bae mangkele na hibi mo enekei ya! <sup>8</sup> Nda maengke naei mokouboke ma ninae mokouboke. Na ya namman mae Raei uwa molonaisehande naei bele minyak fololo foi yae ninae mokoungehake. <sup>9</sup> Reyae wamale, nana hesele nda kani kelane makeinye-makeinye Raei a foi faeu foi yobonnende, nda maengke yae mokouboke u mekai bene nekei-nekeise enaitonde, enaisuwende."

*Yudas Be Hineuboka Yesusle Kelaise Nenendere**(Mat. 26:14-16; Luk. 22:3-6)*

<sup>10</sup> Yesus na moisa orowate yo me bee oro hi nen bee bele nolona hi na ro Yudas Iskariot. Neyae Yesusre kelaise nenendere imam yun-jun bokore eke. <sup>11</sup> Nda a mekai boroukatene rei mai sele kowate, roi yae inyainyelera a hokaikoke. Nebei heera Yudas kinyemmibondere monne baewole.

*Yesus Na Moisa Orowate Yo Bele Paskah Naei Ramanne Anewate**(Mat. 26:17-25; Luk. 22:7-14, 21-23; Yoh. 13:21-30)*

<sup>12</sup> ((Mesir kanine Allah yae Yahudi naei bena kelu fa-fare hole moloumiboka u bene nekeisi-nekeisi)) ya kaban Paskah feu ragi banne ohuleiboi yae eyanewate nane merau na ya mbai nendo domba kelu mbai Allahre ongkou wae ifelewainye. Nebei ya kaban naeise Yesusle moisa orowate yo hinainye, "Waei kena koyae makeinye Paskah naei raman waei kayee mokomansandere?"

<sup>13</sup> Nebeinye Yesus na moisa orowate yo ro beere weumi, "Yerusalem yore ebe. Nebei yone ebebobe mo ro mbai bu habuna bele kaembonde mende hubayengkombe, na moisa hakonnekobe. <sup>14</sup> Imae mbaise enensinde. Nebei imae na rorelere wennele, 'Guru yae hinele, Ra moisa orande yo bele Paskah bulau eraman nanembainye anemakondere, makei yowabe mokoungehake?' <sup>15</sup> Yaungeubobe embe mo imae raka bee nendo na anuwau kaeu-kaeu na hului-sului mokainyehakebe kelenebobe. Paskah bulau naei raman aei kayee nebei anuwauange anemakonderene, nanemene mokonnehabe."

<sup>16</sup> Hokolo bee yore eyeuboka. Nebei yone hubaiwote nanemene Yesus yae are eleukoke huluiinye mo bewate. Hokolo bee Paskah bulau eraman naei anenaikondere mo mokoinyehake.

<sup>17</sup> Huae mo Yesus na moisa orowate yo me bee hiwa yo bele nebei anuwaufe mekate. <sup>18</sup> Ramanne nauwaikoke anewate yae, Yesus yae weumi, "Reyae na helebe wamale, ro mbai mai nolona raei kelaise nenende, nda hee nangkele eraman mbainye anande."

<sup>19</sup> Na kenara beko wanen hubainyene, Yesusre naeise naeise hinainye, "Tuhan, reyae niyae ban, era?"

<sup>20</sup> Yesus yae weumi, "Nebei ro mayae ro me bee oro nen bee bele nolona, rangkele feu kolaei mbainye yawakonde. <sup>21</sup> Reyae, Allahle bokora mekale ro miyae uware yeubokale Kiyae, homofaene molaikoke huluiinye Raei uwa ereherende. Nebeibe nebei kelaise nenende kiyae beko hele hubannende. Naei foi sele nda kiyae ohonoi yae nekeube."

<sup>22</sup> Anewate mo, feube Yesus rouke, Allahre helen foi ukeungelera nebei feu me yae kayele na moisa orowate yo waheumi, na a bele weumi, "Nda raei uwa, yaron anen."

<sup>23</sup> Nebeisa kolaei anggur bu bele rouke. Allahre helen foi ukeunge, na moisa orowate yore ikeumile, nanemene nda kolaeinya bu yae anewate. <sup>24</sup> Nebeisa Yesus yae weumi, “Nda Raei ha niyae. Ro helen miyae helen aerene ererilembonde. Nda ha yaere Allah are heteungekoke nibi neme, ro miyaere wali himalainyeboke yo yae me baemmile nibi, elaekei yeuboke. <sup>25</sup> Mare wamale, nana hesele Reyae nda anggur bu aneisi mo nekerende, mende Maeko mokommibonde ro miyae Raei me kelee u keleene orulenaibonde nekenate. Benen nebei ro miyae Rangkele nanembainye anggur bu anemahinde.”

<sup>26</sup> Paskah bulau eraman naei anaikoke baeufoke, a koi-koi a bulaunge Allahre buma kolainyekokera, Zaitun elura ewate.

*Petrus Na Me U Mokombonde Yesus Yae Yakauboke*  
(Mat. 26:31-35; Luk. 22:31-34; Yoh. 13:36-38)

<sup>27</sup> Nebeisa Yesus yae weumi, “Reyae raeisai nekale mayae nemene ma fere-fere hakangkombe rare nukensebombe, rabuhine ban nebei naei Allahle yendo kayaalo Zakharia yae Raei naeise homone moloukoke elele, ‘Allah na domba kayaa rore hombonde,

nane domba riyana here ware molombonde.’”\*

<sup>28</sup> Nebeibe nulu yo mahe yora ansenundera Reyae bere holo yae Galilea kanire erele.”

<sup>29</sup> Petrus yae weunge, “Naendae wanen horo nemene fomene Ware nukenayeukonde, reyae Ware enukeiboi sele!”

<sup>30</sup> Yesus yae weunge, “Nda a na helebe wawale, na mana reniai ojo a roko bee okoikoi mo weyae roko name hele Rare isian mae weumikonde.”

<sup>31</sup> Petrus a nana hesele hele yae weunge, “Naendae wanen horo lon reyae Wangkele nanembainye aherembonde, reyae Ware isian mae eleikoi sele!”

Na moisa orowate yo hiwa nane a hului mbai elewate.

*Yesus Getsemani Heke Einye Ebeline Allahre Bowoung*  
(Mat. 26:36-46; Luk. 22:39-46)

<sup>32</sup> Anuwau mbai na ro Getsemani. Nebeinye Yesus na moisa orate yo bele aibaleke. Yesus yae weumi, “Ndine ebelire erembonderene mayae ndane rombo ba.”

<sup>33</sup> Petrus, Yakobus, Yohanes ukeumile nangkele hakainyekoke ekate. Yesus buhae hokoungbokene na uwa kulu-kulu kowole. <sup>34</sup> Yesus yae weumi, “Ra kena beko hererele wanen mae hubanale. Nebeinye ndane mai uwa kayaa bele yae hebembe ijongku ohonoijae.”

<sup>35</sup> Yesus ahau holo eke mo, na uwa kani ranne eukuke Naekore riyeungehike hakonnebondere <sup>36</sup> Yesus yae weunge, “Arai, Raei Maeko, rahe rambunbe Weyae na hului ban? Beko hubarende belene Rare hole moloufebonde. Nebeibe Raei kena hului yae ban, Waei kenare koyae hului yae bende.”

<sup>37</sup> Nebeisa Yesus beufoke, hokolo name bokore meke ereumi bae ijongkune honate. Petrusre weunge, “Simon, ijongkuba honoyae! Weyae na hului ban sele hukai mbai kayaare hebeukondere!” <sup>38</sup> Benen Yesus nda yore weumi, “U mekai beko yae wabenensimbe balembe belene, uwa kayaa-kayaa bele yae nane merau ebeli na hibi-hibi mo bonele. Mayae kena koyaube Raei a hakonsebomberebe, nebeibe mai uwa yambi hele yaeuboke.”

<sup>39</sup> Roko hi eke ebeli nane a hului mbai boungehike. <sup>40</sup> Bukeufike meke bae, naei ijoko ehakaesi selene hokolo name ijongkune honate. Yengkeumikoke bae, Yesusre ungainyele abe onaete handate.

<sup>41</sup> Roko name nendo eke, beufoke meke mo weumi, “Mayae namman ijongkune honaube none yaube! Annu! Reyae, Allahle bokora mekale ro miyae uware yeubokale Kiyae, bekore mokate ro miyaere kinyenaisebondere heebe meuyeuboke. <sup>42</sup> Eren, Yudas, Raei kelaise neke kiyae mele. Annu emalere!”

*Yesus Ikilaiiboke*  
(Mat. 26:47-56; Luk. 22:47-53; Yoh. 18:3-12)

<sup>43</sup> Yesus namman ane elele mo, Yudas ro me bee oro hi nen bee bele holona ro mele. Na moisa ro homo mbai imam yun-jun bele Musale walora wali heere foloukoke are isaeyaeiboke kelaemi yo bele Yahudi yun-jun bele yae ukaimile yo, ramiyaeli bele, o bohi-bohi bele mo mewate. <sup>44</sup> Yudas, kelaise neke kiyae, a isaeyeumiboke weumi, “Yoi bulure hunerensinde kiyae na ro niyae, ikilembombe, felayo bele yae yawennehombembe.”

\* 14:27 14:27 Zakharia 13:7

<sup>45</sup> Mekate bele na hibi hele Yudas meke Yesusre weunge, “Guru!” Nebeisa yoi bulure mo huneungekoke. <sup>46</sup> Yudas naei mekate ro homo mbai Yesusre ikilaiboke. <sup>47</sup> Na kelaeunge hebele ro mbai na ramiyaelire mo yobouboke imam kaban na yebaei bubaei na angkaeibe uke neufake.

<sup>48-49</sup> Yesus nda yore weumi, “Ya-ya Allahre ei mom-mom imae na kaban sele kiyae na imaehoungue mai bene kelewamaelebe mayae rare ikileiboi mo. Mai u benera Reyae yokolo yae elaukoke era. Raei ikileiboise ramiyaeli yae o bohi-bohi yae yaraukoke mekaube? Allahle yendo kayaalo Yesaya moloukokere waennihi na hululi yeuboke.”<sup>†</sup>

<sup>50</sup> Nebeisa Naei moisa orowate yo nanemene hakaikoke habelaeyeke, Yesusre nanene nukainyeboke.

<sup>51</sup> Ro hokolo fa mbai Yesusre hakowoungue malo mbai mo lenan mokaiboke yae nauware feleuboke. Nda homona ewate yo yae nare ikilenaibondere, <sup>52</sup> nebeibe na malore ikileuboke ro na mene nebei malo nukeungeboke, neyae na melan mae hakauboke ewole.

*Yesus Naei A Kolowainye*

(Mat. 26:57-68; Luk. 22:54-55, 63-71; Yoh. 18:13-14, 19-24)

<sup>53</sup> Yerusalem yore ekate, Yesus yawainyehoke imam kabanbe imaere ekate. Imam yun-jun, Yahudi yun-jun, Musale walora wali heere foloukoke are isaeyaeiboke kelaeimi yo, nemene fomene nebeinye arileufike. <sup>54</sup> Petrus nahau holo Yesus imam kaban imaere yawainyehoke ewate moisa ewole, imaehoufe ewole. Nebeinye kayaare hebewate yo bele itukai kelaeunge raiboke inye akelewate.

<sup>55</sup> Yesusre mere nonainyonde honaibonde naei abe, Yahudi naei yoyo koseyo nemene baete, reufi mbai imam yun-jun. Nebeibe a mbai sambai mere nonainyonde a ma ehubayeikoi. <sup>56</sup> Ro miyae helen a ame-ame yae Yesus bekore mokonainyebondere huwewaimi, nebeibe naei ahuba na isohi-isohi huwewate.

<sup>57</sup> Ro riyai mbai ainyuke Yesusre mere nonainyondere nda a ame-ame yae waimi, “Naei a nda mekai eleukoke borandeboke, <sup>58</sup> ‘Allahre ei mom-mom imae na kaban sele kiyaeere nda ro miyae me yae ainyunuke Reyae kererensonde, imae hi nda ro miyae me yae ainyui kiyae na ya name mo na hululi arenunde.’ <sup>59</sup> Nda a ame-ame nokainyele bae nane merau isohi-isohi.”

<sup>60</sup> Nebeise imam kaban aunguke, Yesusre nda ro miyae arilewoungue bene hineunge, “Ndi a faeu Waei randene mo nokayete, Weyae wore okoikoi!”

<sup>61</sup> Nebeibe Yesus a mbai sambai ewei, maleu mo hebele.

Imam kaban benen hineunge, “Weyae Wali Ondofolo, Allah yae oro umaufe haraungeboke Wali Ondofolo, Allahle Kelu Niyae?”

<sup>62</sup> Yesus yae wo koungokoke, “Reyae Niyaebe yae. Mayae nanemene enserembe Reyae, Allahle bokora mekale ro miyae uware yeubokale Kiyae, Allahle meube reufine nuwrebondere, yakuna mangko nolora merele!”

<sup>63</sup> Nda a wanen boroukokene, imam kaban u nene yae wa kolene na malo kanekokera, weumi, “Rahe naeise hiwa yo a elenaikondere! <sup>64</sup> Menaiejae boraube na uware Allah yae eleukoke, Allahle rore ane hele koloungue! Naendae wanen mae elaubere?”

Nemene fomene na bulau wae elate Yesus nauwa kabeukoke. Nebeinye na honaibonde hele.<sup>‡</sup>

<sup>65</sup> Hiwa huba rawaiboke euwaeki yae howainye. Malo yae na ijoko felainyekoke, me rulu yae erahuae yae bate wa wainye, “Allahle yendo kayaalo yei! Roibona, nde yae ware wete?” Nebeisa kayaare hebewate yo anuwau hire yawainyehoke ekate mo, nangekele yae erahuae baikoke.

*Petrus Yesusre Isian Mae Elewole*

(Mat. 26:69-75; Luk. 22:56-62; Yoh. 18:15-18, 25-27)

<sup>66</sup> Petrus nebei imaehoungue namman nekele yae, maengke mbai imam kabanbe yebaei bubaei nebei nolore meke. <sup>67</sup> Nda maengke Petrus inye akelewolere ereungekoke na be ijoko roungeboka wa weunge, “Weyae na hi niyaebe yae Yesus Nazaret yona Kiyae nanembaisa orowaube.”

<sup>68</sup> Nebeibe Petrus oneunge yae elewole, weunge, “Reyae onaele handale rahe a mabe haraungeboka warae.” Petrus aunguke aloungokoke imaehou romaufe endere yae ojo a koukoke.

<sup>†</sup> 14:48-49 14:48-49 Yesaya 53:6-9, 12; Zakharia 13:7    <sup>‡</sup> 14:64 14:64 Musa wali here foloukoke ane ro mbai Allahle rore ane kolonnlena, honaibondere. (Imamat 24:16)

<sup>69</sup> Nane maengke benen Petrusre erekeunge nebeinya nekewate ro miyaere weumi, “Ndi ro hi niyae Naei holo mbainye orowate.” <sup>70</sup> Nebeibe benen Petrus oneunge yae eleukoke.

Na heki ban mo nebeinya hebate yo yae Petrusre wainye, “Weyae Galilea kanina rone, na hele weyae nebei holona na ro hi niyae.”<sup>§</sup>

<sup>71</sup> Nebei mekai wainyene Petrus nauwara olomo rorole a na ikele u yae elele, “Reyae ndi ro onaenale!”

<sup>72</sup> Petrus nda a mekai eleukoke heera ojo roko bee nendo koukoke. Petrus nebei hee yae Yesus yae nare ukeunge abe bene nekeungehike, “Ojo roko bee nendo a okoikoi mo, weyae roko name rare oneufekonde a eleukonde.” Petrus nebei abe bene nekeungehikene na kena moheuboke rime rimewole.

## 15

### *Yesus Pilatusle Bene*

(Mat. 27:1-2, 11-14; Luk. 23:1-5; Yoh. 18:28-38)

<sup>1</sup> Na rene kaukau hele Yahudi yoyo koseyo nemene reufi mbai imam yun-jun, reufi mbai Yahudi yun-jun, reufi mbai Musale walora wali heere foloukoke are isaeyaeiboke kelaeimi yo, nanembainye arilaisike Yesusre mokonainyebonde a hokaikoke. Nebeinye Yesus ha rinainyekoke, Gubernur Pilatusre kinyenainyebonderene yawainyehoke ewate.

<sup>2</sup> Ekate mo, Pilatus yae Yesusre hineunge, “Weyae na hele Yahudi yo naei Ondofolo?”

Yesus yae weunge, “Na hele, wenaiejae eleukokae.”

<sup>3</sup> Imam yun-jun eheere ungainyondere a mahi-mahi yae einyo meinyo Yesusre kainye.

<sup>4</sup> Nebei aerene Pilatus benen Yesusre hineunge, “Weyae wore koukondere ahi yae eleyae? Boroyae, waei a helen sele ware ahunayete?”

<sup>5</sup> Nebei a elate mbai sambai Yesus wo okoikoi mone, Pilatus fa yae bowole.

<sup>6</sup> Paskah roko yae roko yae kayekene, kawane isebewate yo ro mbai nebeinya ro miyae riyeyisyate huluinye Pilatus yae hayeikoyoung. <sup>7</sup> Yo hiwa na bere hee Pemerintah Romawi bele han fela kaikoke, ro miyae hiware haikokene, ikilewate kawane hebewate. Nebei nolone ro mbai na ro Barabas. <sup>8</sup> Nda ro miyae Pilatusre mekai riyainye kawana hebate ro mbaise hayennekondere mokoimeyele huluinye. <sup>9-10</sup> Pilatus isaeyeboke, ro miyae helen Yesusre hakoyainyene, imam yun-jun Yesusre kena hensan kowate. Nebei aerene Yesusbe kinyainyeboke. Nebeinye Pilatus nda yo helende hineumi, “Mayae kena Yahudi yo naei Ondofolo Kiyae haisengkondere?”

<sup>11</sup> Pilatus Yesusre hayennekondere, nebeibe imam yun-jun mae ro miyae helende moi hurewaimi Barabasbe Pilatusre rinyainyehinde hayennekondere. <sup>12</sup> Pilatus beufoke hineumi, “Nebei wanenna Yahudi naei Ondofolore elaubae kiyae rahebe mokorembonde.”

<sup>13</sup> Nda yo a bulau wae kaenate, “Ohaline bongko!”

<sup>14</sup> Pilatus yae hineumi, “Rahe bekobe mokouboke?”

Nebei wanan bele bae nda yo kali ara nene kaenate, “Ohaline bongko!”

<sup>15</sup> Pilatus ro miyae helen kena foise mokommibonderene Barabasbe hayeungekoke. Pilatus ukeumile Yesusre erahuae baikoke, nebeisa felayore kinyeumboke ohaline enaibongkondere.

### *Felayo Aukaka Yesusre Kowainye*

(Mat. 27:27-31; Yoh. 19:2-3)

<sup>16</sup> Romawi felayo yae Yesusre yawainyehoke Gubernurle Obere ekate, felayo naei homo kaban kaenaimikoke mekate. <sup>17</sup> Aukakare konainyelere malo fi kolei ma yae Ondofolo hireikoyate wanan Yesusre wokainyele. Ondofolo-ondofolo yae fokoma obunayeke wanan isa bele yae huinyaikoke na yun ranne obunainyeboke, <sup>18</sup> ro melaeyainye, “Yahudi yo naei Ondofolo!” <sup>19</sup> Yesus na yun roko yae roko yae o bohi yae baikoke, euwaeki yae hainyeke, oro selen-selen mae bene hinainye. <sup>20</sup> Nebei aukaka kowainye baefoke mo, nebei malo fi kolei ma kaeinyeboke benen naei malo yae hirainyekoke. Nebeisa yawainyehoke Yerusalem yo moise aibaleke ohaline enaibongkondere ewate.

### *Yesus Ohaline Baikoke*

(Mat. 27:32-44; Luk. 23:26-43; Yoh. 19:17-27)

<sup>21</sup> Nibi nolone ewate yae ro mbai na ro Simon Kirene yona ro, Aleksanderle Rufusle naeko, yore enderebe felayo yae ikilainyekoke, a wake yae melewainyele nda

§ 14:70 14:70 Rabuhine ban Yesus nane merau Galilea kanina ro.

ohali neyae kaembondere. <sup>22</sup> Anuwau mbai honole Aram afaeunge “Golgota” yae kaenewainye na mekai “yun bo”. Nebei anuwaufe Yesus wawainyehoke kitaijeke. <sup>23</sup> Nebeinye ikate yae anggur bu mur yae alaeinyebokebe iwainyele anensindere na u buhae are ondere naeise. Nebeibe Yesus nebei bure ahi. <sup>24</sup> Nebeisa Yesusre ohaline baikoke. Nda felayo Yesus na malore wahenaikondere ndelene ruwende, nebei naeise oye yae nihaeiboke wanan mokaiboke. <sup>25</sup> Rene hu ijoko mehine keline yae Yesus ohaline baikoke. <sup>26</sup> Ohaline baikoke hereke naei aere na yun ranne hormone molaikeke ukate. Nda niyae,

NDA YAHUDI YO NAEI ONDOFOLO.

<sup>27</sup> Yesus na meline meubene ro bee yokore kelaise rorayeke bele baikoke. <sup>28</sup> Nebei mekai yaere Allahle homofaene moloukoke a na hului yeuboke, “Ro miyae beko nolone yae Nare me enaibaembonde.”\*

<sup>29</sup> Ro miyae nebei ijenne orowate yu aukaka helen kowainye na a bele uwainye, “Allahre ei mom-mom imae na kaban sele kiyae kelaubonde na ya name mo aungunundere eleukokae kiyae niyae! <sup>30</sup> Nebei a mekai elewekae lonbe, wauwa hole moloinyebolo! Nebei ohali randa oyakoibo!”

<sup>31</sup> Nebei sului mbai imam yun-jun bele Musale walora wali heere foloukoke are kelewaimi yo bele naeise aukaka yae kowainye elate, “Hiwa yore mo hole moloumiyeke, nauwa bae hole omoloiboi sului! <sup>32</sup> Wauware Yahudi naei Ondofolo nane merau Wali Ondofolo yae elewekae lonbe, mana ya na helere elemakondere maei ijoko yae eremayeibotere nda ohali bayeukokete randa oyakoibo!”

Meline meubene baikoke yokoyo bee Yesusre nane merau aukaka kowoinye.

*Yesus Hereke*

(Mat. 27:45-46; Luk. 23:44-49; Yoh. 19:28-30)

<sup>33</sup> Hukai me bee oro hi nen bee bele nebei kani nemene ouben hauben meumifeleuboke honowo ke huae rai hukai name yeuboke. <sup>34</sup> Nebei hukai name yae, Yesus Aram afaeunge kaenele, “Eloi, eloi lama sabaktani” na mekai, “Raei Allah, Raei Allah, rahene rare nukeufebokae?”

<sup>35</sup> Nebeinye hebate yo borowainyene hiwa yo elate, “Borombo, Allahle yendo kayaalo Eliare kaeneunge!” <sup>36</sup> Ro mbai u hale me hale eke hakalu bulu fele-fele bele rouke, anggur bu rileuboke, one neke, neungejeke Yesus anensindere. Nebeisa elele, “Raken! Ijokore eremambondere Elia mende ohali randa rowende hanembondere!”

<sup>37</sup> Yesus ele kaenekokera na no u yeuboke.

<sup>38</sup> Allahre ei mom-mom imae na kaban sele kiyae einya malo kaban hilowole reu bee kayeukoke, na bumara oke ane.† <sup>39</sup> Yesusre baikoke ohali bene fela yun hebewole. Yesus ele kaenekoke borouboke, na here ma erewolene, elele, “Nana hesele nda Allahle kelu!”

<sup>40</sup> Miyae maengke hokowole nolone, Maria Magdalena yae, Yakobus hokolo fa kiyae na aka baeke Yoses nenake Maria yae, Salome yae. Nda wanan mokowainyelere nahaufa erewate. <sup>41</sup> Nebei miyae maengke Yesus Galilea kanine nekewole heene Na wali rambun rikewainye hakowainye yo. Nebei anuwau hebatene miyae maengke helen hiwa Galilea kanira Yerusalem yore Yesus naei nanembaisa mekate yo.

*Yesus Molaisake*

(Mat. 27:57-61; Luk. 23:50-56; Yoh. 19:38-42)

<sup>42</sup> Sabat ya kalia omokoi naeise, maehae mbai nenja rambun mokoisayainye. Nebeinye nekewate eke bahewoke. <sup>43</sup> Ro mbai Yusuf Arimatea yona ro na fe ban mae Pilatusle bokore eke Yesusle here no hilolere rowendere riwoung. Nda Yusuf Yahudi yoyo koseyo holona rora rowainye. Allah yae Wali Ondofolole me kelee u keleene nekate ro miyae holone memmikaenendere rakeyunge kiyae. <sup>44</sup> Yesus u hale hele hereke a Pilatus borouboke bae fa yae bowole. Nebeinye fela yun kaeneungekoke meke hineunge, “Yesus ohaline baikoke Kiyae na hele hereke?” <sup>45</sup> Pilatus naei fela yun bera a boroukokera, Yusufre ehe koungekoke here no na hului rowende. <sup>46</sup> Nebeisa Yusuf malo lenan roi yae rouke, Yesus hereke no ruboungboke oke, nebei malo maye-mayene ruleufikera kaeuboke bulei ruka bulunane nekeunge. Nebei bulei romaufe ahengkondere ruka kaban mae oleungekoke aheukoke. <sup>47</sup> Yesusre nekainyele anuwau Maria Magdalene, Maria, Yoses nenakele, ijoko ninai erewoinye.

\* **15:28** 15:28 Yesaya 53:12 † **15:38** 15:38 Na bere Allahle ei mom-mom imaene nda malo kaban mae yowai bee heere folaikeke. Malo kayeukokera na nemene yakaiboke. Bere imam kaban mae mo yo kaban yan kaban naei u hila wa hila faeinyeiboyoumi ise felayeke. Nebeibe nda malo kayeukokera Allah u hila wa hila faeinyeiboyoumi nibi neme mokouboke.

## 16

### *Yesus Waleuboke*

*(Mat. 28:1-8; Luk. 24:1-12; Yoh. 20:1-10)*

<sup>1</sup> Sabat ya nekaikoke baeufoke hee yae, Maria Magdalena yae, Maria, Yakobus nenake yae, Salome yae, minyak fololo mo roi yae yaraikoke, Yesusle here none olenainyekonde naeise. <sup>2</sup> Nebei mon ya mbai nendo Minggu ya rene hu inyukui roroweke nda miyae maengke bulei ijende ewate. <sup>3-4</sup> Nobaeinyekoke mo naeise naeise elate, "Bulei romaufe ruka kaban sele ahunaiبوکه. Nde yae hakommebonde nebei ruka olennekonde?" Nebeibe rilibore hayaete ruka kaban na nobera erewate bae nebei anuwaufa olaeinyekoke. <sup>5</sup> Ruka bulu eise ayeuboke bae, nebei ruka bulu ei meube reufine ro hokolo fa mbai na malo keleumon angken mae nuweuboke nekewole, erekainyene kulu-kulu hele yaeiboke.

<sup>6</sup> Nda kiyae weumi, "Buhae ohokojae. Reyae raeisaei Yesus Nazaret yona ro ohaline baikokebe mayae baimeyauge. Neyae oloo, herekera aunguke! Erembo, nda na uware nekainyene anuwau nyae! <sup>7</sup> Nda hee embe, na moisa orowate yo bele Petrusre bele a wemmile Yesus are ukembe huluinye. Neyae Galilea kanire bere holo yae ende, nane merau nebeinye mangkele ensubayengkombe."

<sup>8</sup> Nda miyae fe oinyeu wae hinaiboke kowatene, nane merau fa yae bowatene, ruka bulura maibaleke hakaikoke ewate. Buhae yae hokoumibokene, nda are hire hare ehuwe.

### *Ahuba Huba Mokoikoi Hi*

*(Mat. 28:9-10; Yoh. 20:11-18)*

<sup>9</sup> Minggu\* rene Yesus herekera aunguke ya, na bere hele Maria Magdalenare Nauwa yakaungeboke. Nda Maria kiyaele u bulura Yesus walobo mehine bee bele hukeumihike aibaleke. <sup>10</sup> Maria Magdalena ijoko ereuboke rambun Yesus na kahili wa ibo insene kate nolone ekeufuwemmi. <sup>11</sup> Yesus waleuboke a borowate nane merau Maria yae ijoko erekeunge huwaimikokebe, nda yo na helere eleikoi.

### *Yesus Na Moisa Orowate Yore Nauwa Yakaumiboke*

*(Luk. 24:13-35)*

<sup>12</sup> Nebeisa mo na uwa meumiyakauboke. Yesus na uwa ma hi yae yakaumiboke. <sup>13</sup> Hokolo bee bukeiboke Yerusalem yore meketera nebei a hiwa yore huwaimile horo lon, nebei borowate yo hi yae ha yae na helere eleikoi.

<sup>14</sup> Nebeisa Yesus na moisa orowate me bee oro nen mbai belere ramanne anewate haei yae na uwa meumiyakauboke. Yesus a elaekei sele yae yarewoumi, rabuhine ban naei hila rabo elae ban yaeiboke nane merau Yesus hereke aungekera erainyeboke yo yae huwaimile are na hele eleikoi. <sup>15</sup> Nebeisa Yesus nebei yore weumi, "Eme, nda kani kaban kela kabande Raei a foi faeu foi ro miyaere nemene heraeyemmiyembe. <sup>16</sup> Nde Rare hila rabo halenselena bu konainyebonde, Allah yae na wali hole molonnebonde. Nde yae Rare hila ban rabo banna, Allah yae me wonnonde ehee bukulu endowende. <sup>17</sup> Hila bele rabo bele yo nda rambun emere-emere mokonate: walobore Raei Ro yae hukenaimile, afaeu-afaeu eme elenate, <sup>18</sup> naei uware beko eyeiboi naendae wanen horo rami hangkei me yae ikilenate, bu beko anenate. Ro miyae era buloone konate yore me nauwa ranne kolonaimiyende onomi yaronayende."

### *Yesus Yo Buma Yore Ewole*

*(Luk. 24:50-53; Y.A.A. 1:9-11)*

<sup>19</sup> Aei Tuhan Kiyae, Yesus, a weumikoke baeufokera, surgare raneuweke ewole, Allahle meube reufine eunguweuboke. <sup>20</sup> Na moisa orowate yo yae Yesusle a foi faeu foi a hine a hine huwaimiyeke. Aei Tuhan Kiyae, Yesus, nangkele yae hakouwoumi, rambun emere-emere mokowate yae yakawoumi naei ako faeuko huwewate na hele yeuboke.

\* 16:9 16:9 Homofae hena hiwa ayat 9-20 barainyekoke hiwa ebaraikoi.

## LUKAS

<sup>1</sup> Foi moi, Teofilus. Ro miyae helen mae nda rambun aei nolone bewatere homone uwa nihaeinyehike hauwate. <sup>2</sup> Huba ijokore eraiboke yo yae huwaima wanan, naei wanan mbai na homone hauwate. Nebei yo yae nda a heraeayiboke. <sup>3</sup> Nemene, reyae na hubara meungehaleukokale, ra ura hubawanale naei foi sele benen ware homone na foi moi yae na hubara hufeumendere. <sup>4</sup> Na bena ware kelewayete naeinya hele niyae.

### *Yohanes Bure Koumille Kiyae Hononatere A Yobowoung*

<sup>5</sup> Ro mbai na ro Zakharia. Neyae imam Abiale riyana. Nda Zakharia imamde hebewole hee yae Herodes Yudea kanire Ondofolore hebewole. Nda Zakharia na miyae na ro Elisabet, Harunbe orona mena. <sup>6</sup> Hokolo bee ro bele miyae bele Allahle ro be ro yoinye wali himaleinyeboke yo. Allah yae Musare ukeunge wali heere foloukoke are hubara haeisa yaneinyeke. <sup>7</sup> Elisabet kihone, hokolo bee na fa ban mo nekeimeke, rorele miyaenale meijeukoke.

<sup>8-9</sup> Ya mbai mo, Abiale homona yaunga orowate yo naei mon kayee ruke hee mo, Zakharia yae imam kaliare mokowole. Allahre ei mom-mom imae na kaban sele kiyae einye o ha ongkou fololo bele ongkou felembonde naeise oye yae nihaeibo, Zakharialena ruke. <sup>10</sup> O ha ongkou fololo bele ongkou felewole hee, ro miyae moinye woke yo naeise naeise Allahre ebeli bowainye. <sup>11</sup> Zakharia hili era akau era ongkoung felewole hee, euweke ongkou felei-felei itukai meube reufira Allahle malaikat uwa yakaungeboke. <sup>12</sup> Nebei malaikat erekeungene, kulu-kulu yeuboke, fe yae waku yae roukeunge. <sup>13</sup> Nebeibe malaikat yae weunge, “Fe efaeijae, Zakharia, webeli kali boyanae Allah be hineubokete. Wa miyae Elisabet kelu mbai hononetere, Yohanes yae hele ro roubonde. <sup>14</sup> Nda fa honondene, weyae rei mai aneibote kole, ro miyae woke yo nebei sului mbai konate hukelenate. <sup>15</sup> Allahle ro be ro yoinye Nare ro bele enneronde. Bu elae aneyei sele nekenende. Nenakele kou ei yahi eisa menduwende heera, Allahle Roh yae ei annehonde. <sup>16</sup> Nda fa hononde Israel yoni-yoni helen sele mokommile bukenate naei Tuhan Allah a wemmile hului nekenate. <sup>17</sup> Allahle burelen boi-boi rore yembonde. Allahle yendo kayaalo Elia Allahle Roh bele elae wake bele Allahle kaliare mokowole wanan Yohanes mokonde. Ako naei mokommile bukenaibonde na kelu omi bele rei mai yae nekenate nane merau be elae u elae ro miyaere mokommile wali himalainyeboko yo isaei hebaen bele huwate are boronate. Tuhan huwemmile a hului nekenate ro miyae holo mbai neyae mokommihande.”

<sup>18</sup> Zakharia yae weunge, “Reyae rorelebe yeubokale. Ra miyae nebei sului mbai miyaenalebe yeuboke. Naenda mekai yae nda a waraere reyae a hele yae elerekonde?”

<sup>19</sup> Nebei malaikat yae weunge, “Reyae malaikat Gabriel yae ware wawale. Reyae Allahle bene hebeyale. Neyae ukeufe nda rei mai bele a ware mekawawale. <sup>20</sup> Nda wawale a mbai sambai weyae na helere eleikoinye, mana yara weyae a mun faeu mun yeubonde nekeumende, nda a wawale na hului menaibende erele.”

<sup>21</sup> Ro miyae moinye woke yo nare ereiko rakeiko yae kainye, a hin-sin mae hinate: “Rahene Zakharia nda heki nen eke wabeyole.” <sup>22</sup> Rakainye mo, Zakharia meukuke, a mun yeuboke. Ro miyae erainyere Zakharia me weije-weije yae koui, a eleikoi sului. Nebeinye ro miyae isaeayeboko Zakharia era buhibe kaneungeboke.

<sup>23</sup> Nebeisa imam kalia mokowole hee baeufoke mo, Zakharia kulun uke imaere ewole. <sup>24</sup> Nekaikoke na heki ban mo Elisabet emale yeuboke. Oko maehae mbai na imae einye mo meungekeukoke. <sup>25</sup> Nda a bae elewole, “Ro yae miyae yae kiho nekewekalene a wewe kaisekere Allah nou heufekoke. Mana yara onomi foka Allah meufeyeke.”

### *Yesus Hononate A Yobowoung*

<sup>26</sup> Elisabet emale oko mehine mbai nendo yeuboke mo, Allah Na malaikat Gabrielre ukeunge Galilea kanina Nasaret yore eke. <sup>27</sup> Gabriel ukeunge eke miyae yele maengke yele mbai na ro Mariale bokore eke. Nda maengke Yusuf rowendere a hokaikoke. Nda Yusuf Ondofolo Kaban Daudle orona mena. <sup>28</sup> Nebei malaikat Mariale bokore eke mo weunge, “Allah ware onomi foka yae ei hawenewende, wangkele mbainye nekefobe.”

<sup>29</sup> Malaikat nda a mekai ukeungene Maria kulu-kulu hele yeuboke. Na kena eisa elele, “Rahe a mabe nda malaikat meke haraungeboke eleukoke.”

<sup>30</sup> Nebeibe malaikat benende weunge, “Fe efaeijae, Maria. Allah ware onomi foka yae ei hawete. <sup>31</sup> Weyae emale yeubondera, kelu mbai honole, Yesus yae hele ro roubonde. <sup>32</sup> Neyae kaban yembonde, Allah Hubalo Mando Na Kelu yae kaenenainyele. Na yobe



Ondofolo Kaban Daudle yo waku Allah Nare kinyennele. <sup>33</sup> Mende Yakuble orona mena yo naei Ondofolore yembonde, nekenende huba ban haei ban."

<sup>34</sup> Nebeibe Maria yae weunge, "Reyae miyae yele maengke yele ya. Naendae wanen mae nda a rare warae benate?"

<sup>35</sup> Nebeibe malaikat yae weunge, "Allahlena Roh waei rande onde, Allahle elae wake mende ei aneubondene, Allah yae nda nene waewae Fare Naei Fa yae elende. <sup>36</sup> Boroibo, waka baeke Elisabet, kiho kaeneimeyainye miyaebe, emale oko mehine mbaibe yeuboke. <sup>37</sup> Rabuhine ban Allahlena rambun nemene na hului yembonde."

<sup>38</sup> Nebeibe Maria yae weunge, "Reyae Allah Naei yebaei bubaei ya. Niniae lonbe nemene waei are eleyae huluinye raei u ranne yembonde."

*Maria Elisabetle Ereiboise Eke*

<sup>39</sup> Na heki ban mo, Maria erambun mokoungelake kulun uke, yo mbai Yudea kanina moko nolone honolere eke. <sup>40</sup> Nebei ijenne Zakhariale imae hebelene. Maria eweufike Elisabetre ro bere melaeyeungeboko. <sup>41</sup> Mariale are mo Elisabet boroke bae, na kou yahi einya fa nenaiejae eiso meiso howole nane merau Allahle Roh Elisabetre ei aungeboko. <sup>42</sup> Nebeisa kaenele, "Ewole mewole miyae maengke nolora wembai onomi foka yae ei aubokete. Foi sele moi sele waei koufa yahira honole fa. <sup>43</sup> Raei Tuhan nenake weyae mekaene raei kena roweufehike. <sup>44</sup> Rone mo melaeyaerae bae, kou yahi na fa reinye oro kena me kena rorole. <sup>45</sup> Reyae Allahre ebeli banale weyae onomi foka hubaungele, rabuhine ban Allah ware uwote a nemene benate naeise hila rabo haleyaene."

*Maria Na Helen Foi Allahre Uwoungelake*

<sup>46</sup> Maria yae weunge,  
"Ra kena u eisa Tuhande buma kaenale.

<sup>47</sup> Reyae roweisi-roweisi kale,  
Allah wali holere moloufeboko Kiyaele eisa.

<sup>48-49</sup> Me baei ban nekewekalera,  
Allah me baeufeboko.

Raei eisa Allah Elaelo Wakelo rambun mbai kaban sele mokoubokene,  
mana yara huba raweuboko,  
ro miyae yae rare onomi foka yae ei aungeboko kiyae yae ungaisendere.  
Na Ro Niyae yolo-yolo hele.

<sup>50</sup> Ro miyae Nare hubara haesa yanainyeke yo norona mena bele  
yanekoi yase yae ei haweumiyeye.

<sup>51</sup> Allah Hubalo Mando rambun emere-emere mokowole,  
embei aiko bele yore na mehininde kolowainye bele heraeiwoumi.

<sup>52</sup> Ondofolo-ondofolo hiwa Na yo malo bele yae herewoumi,  
me baei ban yore yarowole anuwau foinye hawoumi,

<sup>53</sup> Monine kowate yo raman foise narewoumi wande bewate,  
nda kanina kelana keren nalene arilayeke yo uwoumi na me bangka u bangka yae ewate.

<sup>54</sup> Allah Naei are raufike huluinye,  
eyae Israel Naei yebaei bubaei nekande yore yanekoi yase yae ei haweume.

<sup>55</sup> Maebu naei maeko natere ukeumi hului  
Allah Abrahamde buhae hewoungelake mahi eyeiboi,  
nebeibe huba ban haei ban ma mbai  
maere na orona mena bele yae hemmeyende."

<sup>56</sup> Maria oko name hului Elisabetle bokone nekeukoko mo, nebeisa kulun uke naei imaere ewole.

*Yohanes Bure Konemile Kiyae Hongkate*

<sup>57</sup> Meke ya na hului yeuboko mo, Elisabet kelu fabe hongke. <sup>58</sup> Elisabetre yaneikoi yase yae Tuhan ei hawewoungere imae ribo mbainye yo nane merau naei aka baeke borowatene, nangkele rei mai kowate.

<sup>59</sup> Nebei kelu fa hongkate ya mehine name mo, na ro uwa elan nenaesande naeise Allahre ei mom-mom imaere mekate. Naei yohona ro miyae naeko Zakhariale ro bu yae ronaibondere kena kowate. <sup>60</sup> Nebeibe nda fa nenake yae weumi, "Nebei ro kena ban, Yohanes yae ro romabonde."

<sup>61</sup> Nebei ro miyae yae wainye, "Waei akana baekena nda ro wanen ewei mo."

<sup>62</sup> Nebeinye Zakhariale a hinenainyehindere me yae mo kowainye, "Nde yae nda fa ro romabondere?"

<sup>63</sup> Zakharia homore molongkondere homofae riyeumihike, ikainyele, nebeinye moloukoke, “Na ro Yohanes.” Ro miyae na fangkengke bele bowate. <sup>64</sup> Nebei heera Zakharia na he mabon raweuboke na a bele Allahre benen buma kolowoung. <sup>65</sup> Naei imae ribona nekewate yo euwa kaeu-kaeu mo kaeuwate. Nebeisa nda a Yudea kani mokona ro miyae bele efureukoke borowate. <sup>66</sup> Allah nare na hele ei aungebokene, ro miyae helen nda are borowate yo a hin-sin mae hinewate, nenaiejae na kenara mo elewate, “Kabanne nda fa rahere enjembonde?”

*Zakharia Allahlena A Heraeiwole*

<sup>67</sup> Nebei fa Yohanes naeko Zakharia, Allahle Roh yae maemae koungekoke mo Allahlena a elewole,

<sup>68</sup> “Men, Allahre buma koloman  
aei yo Israel naei Allah,  
rabuhine ban Neyae meke

Naei holona ro miyae na beko bakore aheukoke baeufoke.

<sup>69</sup> Allah Walilo mbai raneujeke,

Naei yebaei bubaei Ondofolo Kaban Daudle orona menabe.

<sup>70</sup> Nendahina Allah Naei yenjo kayaayo walora eleukoke hului mokoukoke.

<sup>71-72</sup> Aei yobe naei kamahe naeise yanekoi yase yae ei emmihawende naeise nane merau Naei a heteungekoke a hului mokonde naeise,  
yokeijo aere ikele u han u hebate yo nolora

Allah aere hole molommebonde.

<sup>73-75</sup> Nebei are heteungekoke mbai

nendahina Allah aei yobe Abrahamde a holo koukoke  
aere yokeijo nolora hole emmemolonde.

Nebei nibi yae eyae na hului fe efaei yae,

u mekai yolo-yolo bele  
wali himalanneboke bele

Naei kaliare mokomayende nda no hayaende emmebaensonde.”

<sup>76</sup> Zakharia yae benende elele,

“Kelu, ware Allah Hubalo Mando Naei yendo kayaalo yae enaikaenete,  
Tuhan Naei nibi hiyei raneubonde naeise  
weyae bere holo ele.

<sup>77</sup> Weyae Allahle holona ro miyaere weumile

naei beko bako faeinyemmibonde walora wali hena bona enaiyaronde.

<sup>78</sup> Nda nemene Allah yanekoi yase bele Kiyae randa mo.

Wali Ondofolo Allah ungende mende

surgara onde hehe wanen mennaengkonde.

<sup>79</sup> Onde ro miyae ouben nolone nekate yo

herere buhae hokoyeumi yore  
hehe naemmikonde.

Neyae aere rei mai yeume

wali nibine oromale naeise kelemmele.”

<sup>80</sup> Nebei Zakharia na fa kaban bewole, na u bene wa bene maemae kowoung. Neyae a kala-kala anuwaunge ennekengkondera Israel ro miyaere uwa memmikelembonde hee.

## 2

*Yesus Hongkate*

(Mat. 1:18-25)

<sup>1</sup> ((Yohanes hongkate heera oko mehine mbai nekaikoke hee yae)) Kaiser Agustus ukeumi Roma kani kabanna ro miyae nemene mere nulenaibondere. <sup>2</sup> (Nda roko mbai selebe me nulaiboke, Kirenus, Siria kani naei Ondofolore hebewole hee yae.) <sup>3</sup> Rore haungate naeise ro miyae naeise-naeise na yore yande bukewate mewate.

<sup>4</sup> Ro mbai, na ro Yusuf, Galilea kanina Nasaret yora kulun uke Yudea kanina Betlehem yore, Ondofolo Kaban Daudre hongkate yore ewole, rabuhine ban Yusuf Daudle orona menane. <sup>5</sup> Yusuf Maria na miyaere yembondere ehe kaikoke kiyae bele ro haungeikonde naeise nanembaisa ekete. Nebei hee Maria emale yeuboke yae. <sup>6</sup> Betlehem yone ekete Maria naei hononde ya nobeungeboke. <sup>7</sup> Meke, Kelube na kou eme yahi emera hongke. Maria rouke malone ruleufike. Kolo imae maemae koukokene, o hote kaban sapi yae domba yae ramande anate einye nekeunge.

*Domba Kayaayo Yesus Hongkate Isaeyaeiboke*

<sup>8</sup> Yudea kanine Betlehem yo kelaeunge, domba kayaare hebate yo reniai yae na domba kayaane hebewate mo, <sup>9</sup> Allahle malaikat na uwa meumiyakauboke. Allah na u inyukui yae hehe naeumikoke. Nebei domba kayaare hebate yo fe yae waku yae maemae koumikoke. <sup>10</sup> Nebeibe malaikat yae weumi, “Fe efaemmae. Reyae a foi faeu foibe roukale male mare ufembere, nane merau ro miyae nemene ufemilere. Mayae rei mai kombe nebei wanen mbai nebei ro miyae konate. <sup>11</sup> Mana ya Walilo mbai Daudle yona hongkate. Neyae Tuhan Allah yae oro umau herauungeboke Wali Ondofolo Kiyae ((Yunani afaeunge)) Kristus yae kaenainye. <sup>12</sup> Iwau wanen nda ma yae erennele, fa mefa na malo yae rulenaisinde, domba naei sapi naei kere anate o hote kaban einye nenainyende.”

<sup>13</sup> Nebeisa nebei malaikat kelaeunge surgana malaikat felayo helen sele na hiwa yakaiboke. Allahre buma kaewainye na a bele elewate,

<sup>14</sup> “Allah na bumane hele ekenekele Kiyaere

hili hebenayende

nane merau nda kani kelana ro miyae Naei kenare koyeumi yore

Allah rei mai yemmile.”

<sup>15</sup> Nebeisa malaikat nda domba kayaayo nukaimiboke, surgare baeiboke. Ewate mo, nda domba kayaayo naeise naeise elate, “Men, Betlehem yore ema. Allah yae meke weume a ema erembon.”

<sup>16</sup> Na hibi u hale me hale nane yo kulun hayaeikoke. Ekate, Mariale Yusufle nebei fa bele hubayaeikoke, o hote kaban einye nekainyele honowole. <sup>17</sup> Erewainye bae, nda fa malaikat are huwaimi huluinye a heraeuuboke. <sup>18</sup> Nebei domba kayaayo huwaimi are borowate ro miyae nemene fa yae bowate. <sup>19</sup> Nebeibe Maria nebei a faeu elayoke, naei kena einye auboke nou heungoke.

<sup>20</sup> Malaikat are weumikoke borowate nane merau erewate huluinye yeubokene, nebei domba kayaayo ke faufe benen bukewate ewate, Allahre bumane kolainyeke.

*Yesu Ro Baeinyehoke*

<sup>21</sup> Hongkatera ya mehine name mo, Yesu ro uwa elan nainyehake mo, na hibi nenake emale eyeiboi heene malaikat ukeunge hului Yesu yae Na ro baeinyehoke.

*Allahle Imaene Yesu Allahle Me Einye Kinyainyeboke*

<sup>22</sup> Musale walora wali heere foloukoke a hului Maria fa honoke heera ya rorele u bee Allahre ei mom-mom imaere ei sului, ((tuwa ha belene)). Nebei mon moi wokene Yusufle Mariale Yesu roukainyele Allahle me einye kinyenainyebonde naeise Yerusalem yore ewate. <sup>23</sup> Allah yae Musare ukeunge wali heere foloukoke homo einye nda wanen moloukoke, “Kelu bona Kiyae Allahre kinyennebombe hele,” <sup>24</sup> nane merau Maria uwa faeinyeiboise. Tuhan Allah Musare ukeunge wali heere foloukoke a hului, fa hononde miyae Allahre ongkou feleiboise merpati kelu bee, una, merpati aye wanen hi bee.\*

<sup>25</sup> Nebei hee Yerusalem yone ro mbai nekwole na ro Simeon, na wali himaloungeboke nekeweke. Allahle are hubara haeisa yaneungeke, nane merau Allah yae Israel ro miyae yokeijo naei me eisa memmihayengkondere ereiko rakeiko koweke. Allahle Roh yae Naei uware ei haweungeboke. <sup>26</sup> Na bere Allahle Roh yae a ukeunge neyae eherei mo nekende mende Tuhan Allah oro umaufe heraweungeboke Wali Ondofolo Kiyaere naei ijoko yae erennebonde. <sup>27</sup> Allahle Roh yae Simeonde yaweungehoke, Allahre ei mom-mom imae na kaban sele kiyae imaehoufe eke. Nebei ya Musale walora wali heere foloukoke a hului Allahre kinyenainyebondere naeise Yesusre naekole nenakele roukeinyele nebei anuwau mbainye ayeuboke. <sup>28</sup> Nebei fare Simeon roukeunge nda a yae mo Allahre buma kaewoung,

<sup>29</sup> “Nemene me mokamae Allah a ukeufe hului reyae Waei kaliare mokale kiyaeer mokoufobonde

kena rei mai yae hererele.

<sup>30</sup> Rabuhine ban Weyae ukanae meke Walilo raei ijoko yae ninae erekanale.

<sup>31</sup> Weyae ro miyae nemene naei bene

nda Walilo relahi yae mokoungchakae.

<sup>32</sup> Neyae hehe naeyele wanen

Yahudi ro miyae ban yore wali hena bona wali nibi are yakammile

nane merau Israel yore Waei nene waewae kelemmle.”

<sup>33</sup> Naei fa naei a Simeon mae weumi borowetene Yusufle Mariale fa yae bowote.

<sup>34</sup> Simeon Allahre riyeungehike hokolo namere onomi foka yae ei hawemmile, nebeisa

\* 2:24 2:24 Imamat 12:8

Mariare weunge, “Allah nda fare eleuboke wekeunge Israel ro miyae helen ehee bukulu yemmile nane merau helen onomi fokare yemmile. Neyae Allahle bokora meke are elendebe, nebeibe ro miyae hiwa Naei a beko hungaimile. <sup>35</sup> Nane merau Naei aerene waei kena une buhae kole. Neyae ro miyae helen naei nunne honate u bene nekaimi yoni-yonire yakammibonde.”

<sup>36</sup> Allahle yendo kayaalo miyaenale hele mbai na ro Hana, Fanuelle fa, Aserle yohona. Na molo bele ralo yakama mehine bee bele nekeikokete mo na molo hereke. <sup>37</sup> Hana rora moloufaka heera ralo yakama 84 Allahle imaene mo nekeweke. Reniai rai Allahre ei moloungeke, roko mbembe yarele me heiboyele nekeweke, na hibi-hibi ebeli boyeunge. <sup>38</sup> Yusufle Mariale na fa bele mekatera mo, Hana Allahre helen foi uwounge nane merau Allah Yerusalem yo na yokeijo me eisa hayemmikondere rakeimeyainye ro miyae nemenere nda fa naei a weumiyake.

*Nasaret Yore Benen Bukaiboke Ewate*

<sup>39</sup> Yusufle Mariale Allah yae Musare ukeunge wali heere foloukoke honate homo na huluinye mokoikokete mo, hokolo bee na fa bele bukaibokate Galilea kanina naei yo Nasaretre ewate. <sup>40</sup> Nda fa kaban bewole, meli mekai bele. Isaei hebaen bele ma yae u mekai harannele naeise maemae koungekoke. Allah ro miyaere kena buhae aere ban mae heumi Kiyae Nangkele mbainye nekete.

*Yesus Allahle Imaene*

<sup>41</sup> Na ralone yakamane baei Yesus naekole nenakele ((Mesir Kanine Allah yae Yahudi naei bena kelu fa-fare hole molouboke u bene nekenaimihinde)) ya kaban (Paskah ya) Yerusalem yone eikate. <sup>42</sup> Naei koyate heena nda roko hibe ekate ya kabande Yesus ralo yakama me bee oro nen bee bele yeuboke ekate. <sup>43</sup> Ya kabanda baeufoke mo, bukaiboke naei yore ewate. Yesus mbai nukainyebokete Yerusalem yone nekewolere naekole nenakele naeisaei ban, na kobu ewote. <sup>44</sup> Neyae elete Yesus nda ro helen miyae helen nolona mande ya. Ekate nibi nolone ya mbai yeuboke yae wa nebeisa baeinyekoke, ro nolo miyae nolore, na aka nolo baeke nolore, baei-baei baewoinye. <sup>45</sup> Baewoinye hubayeikoi mo, nebeinye hokolo bee naekole nenakele benen bukeiboke naei baeikoise Yerusalem yore ewote. <sup>46</sup> Yerusalemnda kulun ukate ewate heera, baeinyemeke ya namebe yeuboke benen Yerusalemne, mekete Allahle imaene erekeinyele. Nebeinye Yahudi naei agamare kelaeimi ro nolone nuweuboke nekewole. Yesus naei a hineyumi weyainye nane merau nebei yo hineyainye Yesus yae weumi. <sup>47</sup> Nebei a nemene hinewainye na ijenne na hibi-hibi uwoumine, nebeinye arilewole yo fa yae bowate. <sup>48</sup> Naekole nenakele naei wanen ekete erekeinyele bae, fa yae bowote. Nebeisa nenake yae weunge, “Kelu, rahene kobu wanen maere mokoumebokae. Araite rangkele ware hubayeikoi mone, buhae hokoumebokae.”

<sup>49</sup> Nebeibe Yesus yae weumi, “Rahene mayae Rare baeufe? Mayaebe isian, nda Maekole imaene Reyae nekerele Kiyae.” <sup>50</sup> Yesus na mekai haraungebokere hokolo bee onewote.

<sup>51</sup> Nebei ara ukeumi bae, Yesus naekole nenakelere hakoumibokete Nasaret yore ewate. Nebeinye eke, nenakele naekole kelene ekenekewole. Nenake nda a nemene na kena einye mo heraweuboke. <sup>52</sup> Yesus kabande beuweke, isaei hebaende bele ma yae u mekai harannele naeise henaweke. Allah yae nane merau ro miyae yae nare kena hele kowainye.

### 3

*Yohanes Bu Koumi Kiyae Naei Ahuba*

(Mat. 3:1-12; Mrk. 1:1-8; Yoh. 1:19-28)

<sup>1</sup> Ralo yakama me bee oro fae reufi mbai bele (15) meujeuboke Kaisar Tiberius meungekeukoke. Nebei hee yae Yudea kani naei Ondofolore Pontius Pilatus yae hebewole, Herodes yae Galilea kanire. Iturea bele Trakonitis bele kanire wa Herodes naka baeke Filipus yae, Abilene kanire Lisania yae ikileuboke. <sup>2</sup> Imam-imam naei kaban sele Hanasle Kayafasle hebewote. Ralo yakama yae Zakhariale fa Yohanes a kala-kalane nekewole yae Allah a meke uwounge. <sup>3</sup> Yohanes Yordan Wi kelaeunga kanine meke nekewole, ro miyaere Allahle a huwoumi weumi, “Mai beko bakora nulu kenayembe, kelemmbombe naeise bu konayembe, Allah mai beko bakora faeinyenengkombe.”

<sup>4</sup> Yendo kayaalo Yesaya Yohanesle naeise nda wanen moloukoke,

“Ro mbai a kala-kalane ekekaenele,

“Tuhanbe nibi a hiyei ranennebo.

Kalo-kalo ran-dan ijen alommi.

<sup>5</sup> Moko faufe mokonnele, nibi yeli-yeli yo alommile,  
eleiso akoibore honate nibi ro hiyei ranen.

<sup>6</sup> Allah ro miyaere hole molommibonde nibire

nda kanina kelana ro miyae nemene na ijoko yae erenate.' »\*

<sup>7</sup> Ro miyae Yohanes bure kommilere nekai mewate nebeibe Yohanes yae weumi, "Nda ro miyae mewaube rami orona mena wanan. Nde yae angkaa yobombokembene Allahlena ehee bukulu menensayembera henensombe. <sup>8</sup> Mayae na hele bekora nulure kembokembe naeise kelemmilere u mekai foi mokombe. Mayae Abrahambe orona menane wali hena bona yarongkombe naeise u benera enekemmae, rabuhine ban nda rukara Allah na hului Abrahambe orona menare mokongkonde! <sup>9</sup> Rame kahu relahi mokainyehake o na kambura kahenate onatere. Nane merau Allah relahi mokoungahake ani foise omokoi yo kahenate i ranne mo hainyate."

<sup>10</sup> Nebei ro miyae yae Yohanesre hinainye, "Nebei uwana rahebe meyae mokomabonde?"

<sup>11</sup> Nebeinye Yohanes yae weumi, "Nde na malo beena, ro miyae malo ban kate yore hakommile. Nane merau nde raman belena, ro miyae hiwa raman ban yore hakommile."

<sup>12</sup> Pajakre arileyate yo bele Yohanes bure kommilere mekate mo, wainye, "Guru, rahebe meyae mokomabonde?"

<sup>13</sup> Nebeibe Yohanes yae weumi, "Mare ukayembe hului yae mo pajak riyemmiyembe, mai kenana hului bele yae eriyejae."

<sup>14</sup> Nane merau felayona ro hiwa mekate hinainye, "Meyae bae rahebe mokomabonde?"

Nebeibe Yohanes yae weumi, "Ro naei miyae naei roi na mera einukeijae hele, ro miyae naei ro nendon naise eiseijae. Wali waei roi buna yae nekewede."

<sup>15</sup> Nda a weumikoke heera ro miyae na kena ura elate, "Nauwae nda Yohanes nebei Wali Ondofolo rakeimeyannele Kiyae niyae era?" <sup>16</sup> Nebeibe Yohanes yae weumi, "Reyae mare bu yae kamale. Nekemakonde mo, Ro hi ro bele Kiyae mende. Naei oro mehau ha kulaiboise reyae na hului ban, rabuhine ban Naei bene reyae ro ban sele. Reyae mare bu yae kamale wanan Neyae mende mare Allahle Roh bele, i bele yae konembe. <sup>17</sup> Neyae ro miyae kayee memmimolonde. Nare hila rabore halaeinye yo yawemmibonde Nangkele mbainye nekenate. Naei are moise haiwate yo yarongkonde hekelengkonde ralone yakamane italo ranne enaibende." <sup>18</sup> Mehi mehi yae Yohanes ro miyaere a usaei uwoumi, a foi faeu foi huwoumi.

<sup>19</sup> Nebei hee Herodes Galilea kani naei Ondofolo, na aka baেকে miyae na ro Herodiasbe roukene nane merau na me hilae u hilae hiwa nekai mokowolene, Yohanes yae a usaei wasaei a elae yae horoungboke. <sup>20</sup> Herodes naei me u beko benen elaeibo-elaeibo hele kowolene, Yohanesre kawane heungekoke.

### *Yesus Yohanes Yae Bu Koungboke*

*(Mat. 3:13-17; Mrk. 1:9-11)*

<sup>21</sup> Yohanes namman Herodes yae kawane eheikoi hee yae, ro miyae hiware bu kowoumi hee nane merau Yesusre koungboke. Nebeisa Yesus Naekore ebeline bowoung mo, yaku uke raweukoke, <sup>22</sup> Allahle Roh yakura aye merpati wanan mae Naei uwa rande owole nane merau a yakura wuenge, "Weyae Raei kenare kawale Kelu, Weyae Raei kenare foi mokoyarae."

### *Yesus Na Yobe Naei Kamahe Naei*

*(Mat. 1:1-17)*

<sup>23</sup> Yesus na ralo yakama ro rele u mbai u hine me bee bele (30) hului yae, na kalia huba raweuboke. Ro miyae yae na kena u eisa bae elewate

Yesus Yusufle kelu, Yusuf Elile kelu,

<sup>24</sup> Eli Matatle kelu, Matat Lewile kelu,

Lewi Malkhile kelu, Malkhi Yanaite kelu,

Yanai Yusufle kelu, <sup>25</sup> Yusuf Maticale kelu,

Matica Amosle kelu, Amos Nahumbe kelu,

Nahum Heslile kelu, Hesli Nagaitle kelu,

<sup>26</sup> Nagai Maatle kelu, Maat Maticale kelu,

Matica Simeite kelu, Simei Yosekhle kelu,

Yosekh Yodale kelu, <sup>27</sup> Yoda Yohananle kelu,

Yohanan Resale kelu, Resa Zerubabelle kelu,

\* 3:6 3:6 Yesaya 40:3-5

Zerubabel Sealtielle kelu, Sealtiel Nerite kelu,  
<sup>28</sup> Neri Malkhile kelu, Malkhi Adile kelu,  
 Adi Kosamle kelu, Kosam Elmadamle kelu,  
 Elmadam Erle kelu <sup>29</sup> Er Yesuale kelu,  
 Yesua Eliezerle kelu, Eliezer Yorimbe kelu,  
 Yorim Matatle kelu, Matat Lewile kelu,  
<sup>30</sup> Lewi Simeonbe kelu, Simeon Yehudale kelu,  
 Yehuda Yusufle kelu, Yusuf Yonambe kelu,  
 Yonam Elyakimbe kelu, <sup>31</sup> Elyakim Meleale kelu,  
 Melea Minale kelu, Mina Matatale kelu,  
 Matata Natanbe kelu, Natan Daudle kelu,  
<sup>32</sup> Daud Isaite kelu, Isai Obedle kelu,  
 Obed Boasle kelu, Boas Salmonbe kelu,  
 Salmon Nahasonbe kelu, <sup>33</sup> Nahason Aminadable kelu,  
 Aminadab Adminbe kelu, Admin Arnile kelu,  
 Arni Hezronbe kelu, Hezron Peresle kelu,  
 Peres Yehudale kelu, <sup>34</sup> Yehuda Yakuble kelu,  
 Yakub Ishakle kelu, Ishak Abrahambe kelu,  
 Abraham Terahle kelu, Terah Nahorle kelu,  
<sup>35</sup> Nahor Serugle kelu, Serug Rehule kelu,  
 Rehu Pelegle kelu, Peleg Eberle kelu,  
 Eber Salmonbe kelu, <sup>36</sup> Salmon Kenanbe kelu,  
 Kenan Arpaksadle kelu, Arpaksad Sembe kelu,  
 Sem Nuhle kelu, Nuh Lamekhle kelu,  
<sup>37</sup> Lamekh Metusalahle kelu, Metusalah Henokhle kelu,  
 Henokh Yaredle kelu, Yared Mahalaleelle kelu,  
 Mahalaleel Kenanbe kelu, <sup>38</sup> Kenan Enosle kelu,  
 Enos Setle kelu, Set Adambe kelu,  
 Adam Allahle kelu.

## 4

### *Walobo Yun Yesusre Wabewoung*

*(Mat. 4:1-11; Mrk. 1:12-13)*

<sup>1</sup> Allahle Roh yae Yesusre ei aungebokera Yordan Wira bukeufike ewole bele. Allahle Roh yaweungehoke a kala-kala anuwau mbaise ewote. <sup>2</sup> Nebeinye ya rorele u bee ekenekewole yae walobo yun wabeungemeke. Yesus bune ramanne anei mo nekeukokene na huba mokoikoi yare bae Yesus moni yaroungokoke.

<sup>3</sup> Walobo yun mae weunge, "Na hele Weyae Allahle Keluna, nda ruka honate weimi ramande yaeibo!"

<sup>4</sup> Nebeibe Yesus yae weunge, "Allahle homofaene nda a moloukoke, 'Ro miyae raman anatene mo ban wali nekate.' " \*

<sup>5</sup> Nebeisa walobo yun Yesusre yaweungehoke anuwau mbai na bumare hele ekete, u hale me hale nda kanina kela Yesusre keleungeboke. <sup>6</sup> Walobo yun mae Yesusre weunge, "Nda kani kela nemena ei ondofolo anuwau bele na one hengko bele Waei me einye kinyereibotere. Nemene raei me einye mo honoimeyele meke mana yane ndere raei kenare korele huluinye nendon isende. <sup>7</sup> Rare ei moloufebondena, nemene ware kinyerete."

<sup>8</sup> Yesus benen beungehoke weunge, "Allahle homofaene nda a moloukoke honole, 'Tuhan Waei Allah mbaise mo ei moloungela, Naei kaliare mo mokole!' " †

<sup>9</sup> Nebeisa walobo yun Yesusre yaweungehoke ikete Yerusalem yone Allahre ei mom-mom imae na kaban kiyae maline haungeboke. Nebeisa mo weunge, "Na hele Weyae Allahle Keluna, mana ndara are honoinyihi oyo. <sup>10</sup> Allahle homofaene Waei naeise nda a moloukoke honole, 'Allah na malaikat yoni-yonire wemmile

Waei kayaa hebenate.

<sup>11</sup> Woro rukane nele belene

na malaikat yoni-yoni mene roungayete.' " ‡

<sup>12</sup> Yesus yae weunge, "Allahle homofaene nda a moloukoke, 'Tuhan waei Allah, me u hire kelebondere u wabu-wabu wanen mae ewabeinyemae.' " §

\* 4:4 4:4 Ulangan 8:3 † 4:8 4:8 Ulangan 6:13 ‡ 4:11 4:11 Mazmur 91:11-12 § 4:12 4:12 Ulangan 6:16

<sup>13</sup> Walobo yun Yesusre mekai mahi-mahi yae meungewabeukoke baeufoke hee yae, Yesusre nembai nukeungeboke, nebeisa ya mon hine ereumeke.

*Yesus Galilea Kanine Na Me U Huba Raweuboke Mokowole  
(Mat. 4:12-17; Mrk. 1:14-15)*

<sup>14</sup> Allahle Roh ikeunge elae bele Yesus Galilea kanire bukeufike ewole. Nebei kanine Yesusle a faeungekoke huwayeke. <sup>15</sup> Allahre ei mom-mom imae yoni-yonine keleumiyeye, ro miyae nemene Nare buma kaewainye.

*Yesus Nasaret Yone Hukainyehike  
(Mat. 13:53-58; Mrk. 6:1-6)*

<sup>16</sup> Yesus Nasaret yone kaban yeuboke. Roko mbai nebei yore eke. Sabat ya mo naei mokoyate huluinye Yesus Allahre ei mom-mom imaene eke Allahle homofae kongkondere afae yae aunguke. <sup>17</sup> Nare Allahle yendo kayaalo Yesaya moloukoke homofaebe ikainyele. Nda homofae na rulune ikainyelebe Yesus wekeunge Naei uwa naei a moloukoke koukoke,

<sup>18</sup> "Allahle Roh Rauwane keteufeboke.

Allah Rare eleufeboke

a foi faeu foise hun ban wai ban yore hufemiyendere.

Allah Rare ukeufe mekale nda me u mokorebondere.

Ikilaimikoke yore bulaereremibonde,

Ijoko erei yo mokoremile ijoko erenate,

Hiwa yo naei me kelene nekate yore haisemikonde,

<sup>19</sup> Nane merau ufemile nda ya Allah ro miyaere foi mokommile.\*

<sup>20</sup> Nebei homore mo Yesus oleungekoke ikeunge kiyaere benen beungehoke wa, nebeisa angken ounguweuboke. Nebei imae einye ro miyae nemene ijoko Nare mo mokaiboke erewainye. <sup>21</sup> Yesus huba raweuboke ro miyaere uwoumi, "Nda homofaene a huwe a relen kolowate yembondere elayeke, mana ya mai ro be ro yoinye na hului yeuboke."

<sup>22</sup> A foi sele elewolene, ro miyae fa yae bowate buma kaewainye elate, "Nda Yusufle fa mo. Naendaen wanan mae nda ma meke mokole?"

<sup>23</sup> Yesus yae nebei yore weumi, "Reyae isaeyeubokale mayae nda are wenselere, 'Dokter, waei ube onomi yeinye. Meyae borowande Weyae Kapernaum yone rambun emere-emere mokowoyae. Mana weyae kabande yeubokae yone nebei wanan mae mokoikone!' "

<sup>24</sup> Yesus benende weumi, "Allahle yendo kayaalo mbai na yone yanne ro ban. <sup>25</sup> Nebeibe borombo ba! Allahle yendo kayaalo Elia na wali nekewole heene ralo yakama name bohi bele ya omoloiroi mone nebei kanine moni mai nekeumi kowate. Nebei hee miyae nannale (rora molowate yo) Israel kanine nekai nekewate. <sup>26</sup> Nebeibe Elia nebei miyae nannale hile bokore ewei ei. Sarfat yore Sidon kanina miyae nannale mbaite bokore mo Allah yae ukeunge ewole. <sup>27</sup> Nebei sului mbai yendo kayaalo Elisale heene Israel kanina ro miyae u bauwau (kusta) helen sele nekeumi kowate. Nebeibe, nebei kowate nolora hi yae ha yae onomi erowei mo, Siria kanina Naaman nembai sele onomi rouke."

<sup>28</sup> Nebei ro miyae ei mom-mom imaene nekewate yo borokainyelene, ikelere yeumboke. <sup>29</sup> Na riyane ainyukate Yesusre hukainyeke yo moinye ai baleke ekate a yaeyae mbai nebei yore honore kelaeunge. Nebei yo merau harainyebokke Yesusre a yaeyaene kinyenaibonde onoderebe, <sup>30</sup> nebeibe Yesus ro nolo miyae nolora waeisi-waeisi koukoke aloungekoke ewole.

*Ro Mbai Alo Yae Aungeboke Yesus Onomi Ikeunge  
(Mrk. 1:21-28)*

<sup>31</sup> Nebeisa Yesus Galilea kanina Kapernaum yore eke Sabat yane Yesus ro miyaere keleuwomi. <sup>32</sup> Naei yo malo waku malo bele meke elewolene, Naei a faeu elewolere ro miyae fa yae bowate.

<sup>33</sup> Nebei ei mom-mom imae eise ro mbai alo yae aungeboke kiyae eweufike. Nebei ro kali yae hebeungekoke kaenewole, <sup>34</sup> "Yesus Nasaretina Ro rahere maere mokoumbondere? Weyae maei hoikoise mekae? Reyae Ware raeisaei! Weyae nene waewae Kiyae Allahlera mekae!"

<sup>35</sup> Yesus yae nebei alore weunge, "Hileibo! Nda role u bulura eituwe!" Nebeisa ro miyaele bene alo yae nebei rora kaeuboke woke na maleu-maleu wae eukuke.

\* 4:19 4:19 Yesaya 61:1-2

<sup>36</sup> Nebeinya ro miyae nemene naeise-naeise elate, "Ei! A korolo ukeunge? Naei uwane kitainyeboke yae walobo yoni-yonire enaibalende hukeyeumei baleyate!" <sup>37</sup> Yesus nda me u keleubokene Naei ro nebei kanine hurewole.

*Ro Miyae Helen Yesus Onomi Iwumi*  
(Mat. 8:14-17; Mrk. 1:29-34)

<sup>38</sup> Allahre ei mom-mom imaera Yesus meukuke Simonbe imaere ewole. Simon na miyae nenake naume kaban sele ekekolene, ro miyae yae Yesus hakonnebondere riwainye. <sup>39</sup> Simon na miyae nenake honole ijende Yesus eke, nebei naume hukeyengehike, na hibi foi rouke. Nebei miyae aunguke Yesus naei mekatene humfo wamfo bewole.

<sup>40</sup> Be baheweke mo ro miyae era yo buloo yo nemene yauwaimi Yesusle bokore mewate. Yesus mere mo na u ranne koloumiyeke, nera buloo ninae nundayeke. <sup>41</sup> Nebei alo yoni-yoni ro miyae une nekayeke nele bele balayeke kaenayeke, "Weyae Allahle Fa hele ya!"

Alo yoni-yoni naeisaei Yesus Wali Ondofolone, nebei alo yoni-yonire Yesus oku yae rorowoumi a elenatere a hun kolowoumi.

*Yesus Yo Ran Yo Randa Allahre Ei Mom-Mom Imaene Keleumiyeke*  
(Mrk. 1:35-39)

<sup>42</sup> Ya heuboke mo Yesus a haei-saei mbainye maleu eke nekewole. Ro miyae nare baei-baei baewainye, nebeisa mekate erekainyele wainye, "Maere enukeimemae ya!"

<sup>43</sup> Nebeibe Yesus weumi, "Allahle holona yo Raei me kelee u keleene nekenate naei a foi faeu foi yo hi yo hi bele yae hufemiyendere, rabuhine ban nebei naeise Allah nda kani kelare ukeufe mekale."

<sup>44</sup> Nebeisa Yesus Yudea kanina ei mom-mom imae hira-hira huweumiyeke.

## 5

*Yesus Na Bemere Na Moisa Oronate Yore Eleukoke Wekeumi*  
(Mat. 4:18-22; Mrk. 1:16-20)

<sup>1</sup> Ya mbai mo Yesus meke Genesaret bu yabainye meke hebewole, ro miyae kilin-kilin hoi-soi Allahlera a foi faeu foise angkaeise boronaterere. <sup>2</sup> Nebeisa Yesus euweke erele bae ka yo naei kai bee maeyorouboke, kaisa wayakoukoke na waunge bune hukate. <sup>3</sup> Yesus nebei kai yatere eke, Simonbe kiyaene yeufileukoke. Nebeisa Simonde ukeunge raufe yae ebi fere neufike mo, nebei kai randa Yesus angken mae nuweuboke mo nebeinya ro miyae helen arilewolere kelewoumi.

<sup>4</sup> Keleumikoke mo, Yesus Simonde weunge, "Ebi fere raufe yae neufinde imale mo, wa wau nebeinye wowonde kare haumalere."

<sup>5</sup> Nebeibe Simon mae Yesusre weunge, "Tuhan, nda reniai koko lon mehi mehi hayeyandere bae, ka mbai sambai maei waunge ofoisi mo! Nebeibe weyae ukaraene reyae benen ufoyondere."

<sup>6</sup> Yesus are eleukoke huluinye wokate bae ka wau eise maemae koukoke, na wau huba raweuboke kaiwole. <sup>7</sup> Helen selene kai hina yore kaenewaimi. Kai hina yo bele mekate hakaimiboke hauwate. Nebei kai bee hawaikoke maemae koukoke, bu ike kai wanei kaneungeboke.

<sup>8</sup> Simon nebei ma erekene meke Yesusle bene oro selen-selen mae roroukoke weunge, "Tuhan, ninae rare nukeisobone. Reyae beko yae bako yae maemae koufekoke." <sup>9</sup> Simon mae, ro hiwa nanembainye orate yo yae nda ka helen hauwatene yei yae kowate. <sup>10</sup> Nebei sului mbai Simon naei holo mbainye orate yo Yakobusle Yohanesle Zebedeusle fa-fa bee bele. Nebeisa Yesus yae Simonde weunge, "Fe efaeijae Simon! Mana yara weyae rore miyaere wau hayewendere yobole Rangkele mbainye nekemale." <sup>11</sup> Nebei yo na kaise mo yobaiboke yaufe ike bae, nemene fomene nukaiboke hayaiboke Yesusre hakainyeko.

*Yesus Ro Mbai U Bauwaufe Koweke Onomi Ikeunge*  
(Mat. 8:1-4; Mrk. 1:40-45)

<sup>12</sup> Nebei kanina yo mbainye ya mbai Yesus nekewole yae, nebeinya ro mbai u bauwau na ure nekai sele feleungeboko Yesusre erekeungene, na be are yae neke riyewoungene, "Tuhan, Weyae kena kolena, rare onomi yeufele!"

<sup>13</sup> Yesus na mere mo nekeunge nda rora kataungehike wa weunge, "Reyae kena kale, onomire rowelere." Na hibi hele nebei u bauwau kowole u yeuboke.

<sup>14</sup> Yesus nebei rora weunge, "Boroyae, ro hi miyae hire eisuweijae. Oro moloubonde, imamde hebele kiyaele bere ele, onomi yeuboke naei uwa yakaungebonde. Musale walora wali heere foloukoke a huluinye Allahre hili era akau erare ongkou wae



fellennebonde naeise obo yoku mbai yeungele. Nebei mekai yae isaeyeyubonde weyae na hele onomi roukae.”

<sup>15</sup> Naenda wanende bae, Yesusle a heraeeyuboke elewate nane merau ro miyae helen sele Naei a faeu elewole borayeke naeise, nane merau nera buloo kayeke hireumiyeke onomi yaronaikonde naeise, Yesusle bokore mewate. <sup>16</sup> Yesus roko helen Naekore ebeli boi-boise a haei-saeinye eyewole.

*Ro Mbai Oro Me Nimainyeko Yesus Onomi Ikeunge*  
(Mat. 9:1-8; Mrk. 2:1-12)

<sup>17</sup> Ya mbai Yesus ro miyaere kelewoumi hee yae Farisi holona yo bele Musale walora wali heere foloukoke are isaeyaeiboke kelaeimi yo bele nebeinye raiboke borowainye. Nda yo hiwa Yerusalem yora, hiwa yo Galilea kanira, hiwa yo Yudea kanira mewate. Yesus Na uwane Allahle elae wake keteungeboke yae erana buloona yore na hului onomi iwoumi. <sup>18</sup> Nekate mo, hiwa yo ro mbai oro mere nimewainyebe na ijongku honson bele kaeibokate mekate. Yesus imae einyene nebei yo relewainye Yesusle bene ranaisindere. <sup>19</sup> Ro miyae ahuneubokene kaenaibonde enatere na hului ban, nebeinye kaeibokate imae malire yae ikate, yande mo wewe kaikokate na honson anuwau bele ro miyae hebate nolone Yesus hebele bene nokainyele oke.

<sup>20</sup> Na hila rabo erewoumi elakei selene nebei rore Yesus yae weunge, “Aka baeke wa beko bako faeinyebokawale.”

<sup>21</sup> Nebeibe Farisi ro yoni-yoni hebate bele, Musale walora wali heere foloukoke are isaeyaeiboke kelaeimi yo bele naeise naeise elate, “Nda ro ndebe meke Allahre aukaka mekeukouge?” Ro miyae naei beko faeinyeiboise ro hi miyae hi yae na hului ban. Allah nenaaijaere na hului.

<sup>22</sup> Nebei yo na u benera hayaeinye a Yesus isaeyebokene weumi, “Mai kena u einye a na hele ban elaubé! <sup>23</sup> Mayae elaubé, ‘Na foma-foma hele Yesus nda rore weungele, wa beko ninae faeinyebokawale, rabuhine ban yembonde naeise ro miyae ereiboinye. Nebeibe ehakei kiyaebe Yesus wennele, ainyu, wa koi kaeibo eye, rabuhine ban ro miyae erenaterene.’ <sup>24</sup> Mana Reyae kelerembomere Reyae Allahle bokora mekale ro miyae uware yeubokale Kiyae nane merau Allah one hengko bele kiteufeboke yae Reyae mere mokale. Reyae na hului beko bele neban bele yore faeinyeremile.” Nebeisa oro mere nimewainye kiyaeere weunge, “Ainyu, wa ijongku honson kaeibo na hibi aloinyoko wa imaere eye!”

<sup>25</sup> Na hibi nebei yo naei nolone aunguke na kewa yumakere mo yaroukoke aloungekoke ewole Allahre buma kaeungeke. <sup>26</sup> Nebei ro miyae euwa kaeu-kaeu mo kaeuwate Allahre buma kaewainye. Nebei yo na fa bele bowate elate, “Era emera hele mana ya nda mekai yeuboke erande.”

*Yesus Lewire Kaeneungekoke*  
(Mat. 9:9-13; Mrk. 2:13-17)

<sup>27</sup> Yesus nebei anuwaufo oro molouboke ewole yae, ro mbai na ro Matius pajakre arilate imaene nekewolebe erekeunge. Yesus yae weunge, “Rare hakoisobo!” <sup>28</sup> Lewi aunguke nemene fomene nukeuboke hayeuboke Yesusre hakoungéboke.

<sup>29</sup> Nebeisa mo Lewi Yesusre raman bulau mbai mokouboke. Lewi naei kalia mbainye mokate yo helen arilewole nane merau ro miyae hiwa yo bele yae mekate Lewile imaene Yesus naei nanembainye raman anewate. <sup>30</sup> Farisi holona yo bele Musale walora wali heere foloukoke are isaeyaeiboke kelaeimi yo bele Yesus na moisa orowate yore waimi, “Rahene pajakre arilate yo bele ro miyae beko bakore mokoyate yo bele nanembainye alaeuboke raman anaube?”

<sup>31</sup> Nebeibe Yesus yae weumi, “Onomire nekate yo onomire mokoumi rore ebaeyei, erane buloone kate yo yae baeyainye. <sup>32</sup> Wali himalainyeboké yo yae nauware elate yore Reyae kaerneremile naeise mekale ban, bekone nebanne mokate yore kaerneremile nulu kenaimibonde naeise mewale.”

*Yarele Me Heiboyate Naei A*  
(Mat. 9:14-17; Mrk. 2:18-22)

<sup>33</sup> Nebei ro miyae Yesusre wainye, “Yohanesle moisa orowate yo, Farisi moisa orowate yo bele roko mbemba yarele me heiboyate nane merau naei ebéli bele ibowainye, nebeibe wa moisa orowate yo nendon raman anate.”

<sup>34</sup> Yesus isaeyeboké na heki ban mo Nare honaibonde. Neyae kani kelane nekele naeise raman bulau wanen a yae ahuneuboké weumi, “Ro mbai miyae neme rowele raman bulau mokoiboyolere hokoimeyale yo nebei ro bele nanembainye nekate yae yarele me heiboyate! Nebei mekai ban. <sup>35</sup> Raman bulau baensonde mo, nebei molo

neme naei u nolo u kaisa ahaufe ende wa. Nebei hee na kahili wa na hului yarele me heiboyate nekate.”

<sup>36</sup> (Nda ahuba beene malo male bele anggur bu anuwau male bele na u mekai Musale walora wali heere foloukoke are hakainye ro miyae wanen Yesus yae a ahuneuboke. Malo neme bele anggur bu anuwau neme bele na u mekai Yesus Naei a elelere hila rabo haleinye ro miyae wanen a ahuneuboke.) Nebei ahuba nda mekai huwoumi, “Hangkande malo neme yae malo male ranne oboyei. Rabuhine ban nebei malo neme kingkombonde malo malere yobongkonde benen kaban sele kayengkonde. Nane merau nebei malo neme malo malene hakan ungatena nayaka yembonde. <sup>37</sup> Nebei sului mbai anggur bu neme anuwau malene erileyei. Rabuhine ban nebei anggur bu kaban bende, mokonnebonde nebei bure rilate anuwau ferengkonde, beko yembondene bu rilengkonde baensonde. <sup>38</sup> Nebeinye hole moloiboise anggur bu neme anuwau anggur bu neme yae rilengkombe. <sup>39</sup> Nde yae anggur bu henara aneufikera mo benen anggur bu bale-balere anensindere riyewole? Nenaiejae elengkonde anggur bu hena mbai naei foi sele.”

## 6

### *Sabat Ya Naeibe Hinewainye*

(Mat. 12:1-8; Mrk. 2:23-28)

<sup>1</sup> Sabat ya mbai mo Yesus na moisa orowate yo bele gandum heke nolora ewate na gandum ani bele hokayeke me yae haeyeke na rabingkae balayeke nebeisa euware anayeke. <sup>2</sup> Farisi yo yae wainye, “Rahene Yahudi naei era henare mayae asasi kaube, Sabat ya yae omokoi rambunbe mayae mekaumokaube?”

<sup>3</sup> Nebeibe Yesus yae weumi, “Naendae wanen, aei yobe Ondofolo kaban Daud na moisa hakainyekoke orayeke yo bele monine kowatene mokouboke u mekai mayae homone okoiko? <sup>4</sup> Allahre ei mom-mom imae eise eweufike imam yoni-yoni yae mo anenaikonde feube yaroukoke na moisa hakainyekoke ro miyae bele ikeumi anaikoke. Musale walora wali heere foloukoke a huluiinye nebei feu ro miyae hosoro anei sului.”

<sup>5</sup> Nebeisa Yesus weumi, “Reyae, Allahle bokora mekale ro miyae uware yeubokale Kiyae, Sabat ya na yunde yeubokale Reyae Niyae.”

### *Ro Mbai Na Me Meube Reufi Nimainyekoke*

(Mat. 12:9-14; Mrk. 3:1-6)

<sup>6</sup> Sabat ya hine mo Allahre ei mom-mom imae mbainye Yesus eke kelewoumi. Nebeinye ro mbai na me meube reufi nimainyekoke nangkele eweufike. <sup>7</sup> Musale walora wali heere foloukoke are isaeyaeiboke kelaeimi yo bele Farisi holona bele Yesusre kemere nenainyebonderene na ijoko ranne mo erainye, Sabat yare hiwa yore onomi yemmikonde era. <sup>8</sup> Nebeibe Yesus na u benere nekaimi ma isaeyaeuboke. Nebeisa nebei ro na me reufire nimainyekoke kiyaere weunge, “Ainyu ndane meisebeinyu!” Nebei ro aunguke, yeufebeunguke.

<sup>9</sup> Nebeisa mo nebei ro miyae nebeinye arilewole yore Yesus yae weumi, “Musale walora wali heere foloukoke a huluiinye rahebe Sabat yane mokomale? Foibe mokomale, bekobe mokomale? Ro miyae wali holebe molomamile, hoi-soibe homale?”

<sup>10</sup> Nebei ro miyae nekatere nemene ereumikoke mo, nebei rore weunge, “Wa me neinye meu.” Nebei ro na mere mo nekeunge, na hibi na me foi yeuboke.

<sup>11</sup> Nebeinye Musale walora wali heere foloukoke are isaeyaeikoke kelaeimi yo bele Farisi holona yo bele ikele hele kowate, arilaisike Yesusre mokonainyebondere ane kolowainye.

### *Yesus Abu Ako Ro Me Bee Oro Nen Bee Bele Yaroukoke*

(Mat. 10:1-4; Mrk. 3:13-19)

<sup>12</sup> Ya mbai Naekore ebelire bonnele naeise Yesus mokore yeuketeke, reniai koko Allahre ebeline mo boungemeke. <sup>13</sup> Ya yolowole wa, na moisa orowate yore kaeneumikoke, nebei nolora ro me bee oro nen bee bele eleukoke wekeumi. Nda eleukoke yore Naei abu ako yae kaenewoumi. Nebei yo na ro nda niyae, <sup>14</sup> Simon (Petrus yae Yesus ro roungeboke), Andreas Simon na aka baeke, Yakobus, Yohanus, Filipus, Bartolomeus, <sup>15</sup> Matius, Tomas, Yakobus Alfeusle fa kayee, Simon (Zelot yae kaenainye kiyae), <sup>16</sup> Yudas Yakobusle fa, meke Yudas Iskariot kelaise neke kiyae.

### *Foi Beko Yoni-Yoni Hubanaimile Are Yesus Keleumiyeke*

(Mat. 4:23-25)

<sup>17</sup> Yesus nebei ro eleukoke yo bele mokora nanembaisa okate fau mbainye waise-beuboke. Nebei faunge ro miyae Yesusre hakainyekoke yo arilewole. Nane merau ro

miyae helen hokowole, Yudea kanira, Yerusalem yora, nane merau bu haainya yo beera Tirus bele Sidon bele. <sup>18</sup> Nda yo hokowole Yesus a elende boronate naeise, nane merau nera buloo katere Yesus onomire yemmile naeise mewate. Alo yae aumibokeye kayeke yo mekate, Yesus onomi iwoumi. <sup>19</sup> Yesusle bokore ro miyae Na uware ikilenatere waere-waere relewainye, rabuhine ban Na uwara onomi yeumi elae nebeinya ro miyae nemene onomi yeumikoke.

<sup>20</sup> Yesus na moisa orowate yore ereumikoke mo, nebeisa weumi,  
“Mayae keren ban nale ban yo na hului Raei me kelee u keleene nekembene,  
onomi foka hubannembe!

<sup>21</sup> Mayae nda heena monire kaube yo Allah mare narenembe uwa rembombene,  
onomi foka hubannembe!

Mayae nda heena rimere are kaube yo re ensarengkombene,  
onomi foka hubannembe!

<sup>22</sup> Reyae Allahle bokora mekale ro miyae uware yeubokale Kiyae aerene  
mare ikele konayembe, hukenayembe, a beko huwayembe,  
ro u mekai beko bele yae kaenenayembe yo  
onomi foka hubannembe.

<sup>23</sup> “Yo koi yo bae rei mai nendon kombe, rabuhine ban mai me buhae kaban sele surgane mokoungehake. Nendahina nebei u mekai beko ma yae na yobe nebei naei yae me u mbai Allahle yenjo kayaayore mokowaimi.

<sup>24</sup> Nebeibe mayae run bele kangke bele hemboni bele rela bele yo  
beko hele hubannembe,  
rabuhine ban mai foi ninde nda waline mo hubaimyaunge.

<sup>25</sup> Mayae nda heena kuikui maemae bele honoimeyayembe yo  
beko hele hubannembe,

rabuhine ban moni mai ennehubambe.  
Mayae nda heena re are koimeyaube yo

beko hele hubannembe,  
rabuhine ban kena beko yae rime a yae engkombe.

<sup>26</sup> Mayae nda kanine eise moloimeyayembe yo  
beko hele hubannembe,

rabuhine ban nendahina Allahle ban yenjo kayaayore naei wanen mbai aei yobe naei kamahe naei yae ei molowaimi!”

*Wa Yokejore Buhae Heumile  
(Mat. 5:38-48; 7:12a)*

<sup>27</sup> “Mayae boraufele yore Reyae wamale, mai yokejore buhae hemmiyembe, ware ikele koimeyete kiyaere me u foi yae mokoungela, <sup>28</sup> ware olomore roronete kiyaere Allah riyeungele foi yae mokonnele, ware bekore mokonete kiyaere naeise Allahre ebeli boungela. <sup>29</sup> Nde yae wa kahu reufi mefae ungetena, na reufi bele yeungele ungete. Wa ambelae rowendena, waeungehinde rowende nane merau malo hi bele yeungele. <sup>30</sup> Rambun hi rinyetena, na hibi nebei rambun yeungele. Waei rambun nukensandena, benen beneufonde naeise huku-huku yae okoinyemae. <sup>31</sup> Ware mokonayetere kena koyae ma, naei sului mbai yae hiwa yore mokoumile.

<sup>32</sup> “Ware kena buhaere heyayete yore mo wa kena buhae heumilena, rahe foibe rowele? U mekai bekore bakore mokoyate yo naei wanen mbai mokoyate. <sup>33</sup> Nane merau ro miyae ware foise mokoyate yore mo waei foi mokoumiyendena, rahe foibe rowele? U mekai bekore mokoyate yo nebei wanen mbai na hului mokonaikonde!

<sup>34</sup> Benen benayeubonde bene yae nekenayetene elae yo wake yore wa hemboni rela yeumiyendena, rahe foibe rowele? U mekai bekore bakore mokoyate yo nebei wanen imokowate yeumira nebeisa riyeisiyaimile. <sup>35</sup> Naei sele nebei wanen ban! Wa yokejore foi mokoumile nane merau buhae heumile. Nane merau ma hemboni rela yokeijo yae rinyetena, benen beneisote naeise u bene enekeijae. Wa me u naei wanen mokolena, Allah Hubalo Mando waei roibu hobeneikote, nane merau Allah Naei kelu omi yae ware elengkonde, rabuhine ban ro miyae helen foi eweyei yo bele u mekai bekore bakore koyate yo bele Allah foi yae mokoyeumi. <sup>36</sup> Mai Ako Allah ro miyaere yanekoi yase yae ei haweyeumi wanen mae mayae yanekoi yase bele nekembe.”

*Waei Kena Hului Yae Ro Miyaere Hului Okoloiiae  
(Mat. 7:1-5)*

<sup>37</sup> “Weyae hiwa yo naei bekore hului okoloiiae, waei bekore hului ranayeisite bele. Ro miyae naei are weyae a hele ban mae eleijae, Allah ware beneufonde bele. Ro miyae hiwa naei beko u bene nundenayewende, nebei wanen mbai Allah waei beko

fainyeneibote. <sup>38</sup> Nendon yeumiyende waheumiyendena, nebei sului mbai ware mokonayewende benen kone-kone maemae enaikitete. Mehinin mae kolole yeumilena, nebei sului mbai ware mehinin mae kolonayewende inyayewende.”

<sup>39</sup> Nebeisa mo Yesus nda a ahuneuboke huwoumi, “Ijoko kumba kiyae benen ro ijoko kumba kiyare yawennenhondena, nebei bee bo einye enebalende. <sup>40</sup> Guru mbai naei isaei bumana na fa-fa kelemira. Nebeibe isaei isaeiaekoke fa-fa na guru u mekai wanen mbai nekenate.

<sup>41</sup> “Rahene wa aka baeke na ijokona kerende mo weyae eranae, nebeibe o kaban wa ijokonare bae weyae ereiboi? <sup>42</sup> Naendae wanen mae wa aka baeke na ijokona kerende rowelere weyae weungele, ‘Mei, wa ijokona keren roufei,’ nebeibe o kaban waei ijoko einyare bae weyae ehubaisi sele! Weyae faeu kai bee! Wa ijokona o kaban rowei! Ijoko foi erele mo wa, nebeisa wa aka baekele ijokona keren rowele.”

*O Ha Na Ani Bele Mo*

(Mat. 7:16-20; 12:33-35)

<sup>43</sup> “O foi ha foi na ani bekore omokoiboi. Nebei sului mbai o beko ha beko ani foise omokoiboi. <sup>44</sup> Nanira rowate ereiboyatera, nebeisa na no ro roiboyainye. Fonom kaiwa ara ani yae omokoiboi nane merau isa bele ora anggur ani yae omokoiboi. <sup>45</sup> Nebei sului mbai u mekai foi bele ro miyae na kena une foi honainyera a foi faeu foise eleyate. U mekai beko bele ro miyae na kena une beko honatera a bekore eleyate. Na kena u einya hului mbaibe neuwara baleimeyate.”

*Isaei Bele Ro Isaei Ban Ro Na Imae Heikoke*

(Mat. 7:24-27)

<sup>46</sup> “Rahene mayae Rare kaeneyaufe, ‘Tuhan, Tuhan,’ nebeibe mai wali bae Raei a weyamale huluinye omokoyei? <sup>47</sup> Ro miyae Rangkele mbainye nekate yo nane merau Raei are boraise huluinye mokate yo naeise Reyae kelerembombe. <sup>48</sup> Naei u mekai ro mbai imae ruka ranne heuboke wanen. Alune yane hu foi mekele foinyene nebei imae kusei mahei ban hebende. <sup>49</sup> Ro miyae Reyae huwamaele are boraikeke mere ure omokoyei yo naeise Reyae kelerembombe. Naei u mekai ro mbai na imae ifau ranne heuboke wanen. Alune yane mende wende nebei imae kelambonde kulun ya, nemene beko yembonde.”

## 7

*Fela Yun Na Yebaei Bubaei Erane Kowole Yesus Onomi Ikeunge*

(Mat. 8:5-13)

<sup>1</sup> Nebei ro miyae arilewolere nebei a weumikoke mo, Yesus na hibi Kapernaum yore ewole. <sup>2</sup> Nebeinye fela yun mbai naei kena koungeke yebaei bubaei erane hereinyen-herinyen kowole. <sup>3</sup> Nebei fela yun Yesusle a borokene, Yahudi yun-junde ro keli name weumikoke Yesusle bokore enate, rinyainyehinde na yebaei bubaeise erane kolere onomi menneyendere. <sup>4</sup> Ekate mo, Yesusre na kena maemae riwainye wainye, “Nda fela yun na yeisi raeiboi hului na yebaei bubaeise onomi yeungele, rabuhine ban <sup>5</sup> maei ro miyaere kena buhae heyeyumi nane merau maei ei mom-mom imae heuboke.”

<sup>6</sup> Yesus nebei yo bele nanembaisa alainyekoke ewate. Na imaere nobewounge bae, nebei fela yun na kahili ware ukeumi ekate Yesusre ungainyele, “Tuhan, maei rowa elele naei imaere eijae, rabuhine ban neyae yeise raeiboi ban nauware ereungene. <sup>7</sup> Nebei aere ne renaei yae Waei bere ei sele. Weyae are mo eleiko, nda yebaei bubaei erane koyele kiyae onomi rowende. <sup>8</sup> Reyae maei fela yun hi na me kelee u keleene nekeyale nane merau raei keleena felayo hiwa rare boraise. Ro mbaise reyae ufende, ‘Eye!’ neyae ende; nane merau ro hire ufende, ‘Ndare mei!’ neyae mende. Nebei sului mbai raei yebaei bubaeise ufende, ‘Nda mokoibo!’, neyae mokombonde.”

<sup>9</sup> Nda a wanen boroukokene, Yesus fangkengke yae kowole. Euweke na moisa mate ro miyaere weumi, “Nda ro hele ken. Israel ro miyae nekate nolora nda role hila rabo wanen Reyae ehubayeikoi mo!” <sup>10</sup> Ukeumi mekate yo naei imaere baebokoke ekate bae, nebei erane kole kiyae erainye aunguke onomibe rouke.

*Yesus Hokolo Fa Mbai Waleungeboke*

<sup>11</sup> Na heki ban mo, Yesus Nain yore eke. Na moisa orowate yo, nane merau ro miyae helen Yesus naei nanembaisa ewate. <sup>12</sup> Meke Nain yo romau kaban nobeungeboke mo, ereumi ro miyae herebe no koloi einye kaeibokate nebei yo eisa maibaleke mate. Nda here miyaenale mbai (na molo nukengeboke) na kelu nembai sambai selebe hereke kaeibokate mate. Ro miyae helen sele hakainyekoke nda miyaenale rimeimeyelene

mbainye mate. <sup>13</sup> Yesus euweke nda miyaenalere erekeungene, Na kena beko hele hubawounge weunge, "Ninae erimeijae!"

<sup>14</sup> Yesus ebi fere bere yae eungakeleufike mo, nebei here no kaeibokate matene na me ikileuboke. Nebei nore kaeibokate mate yo nemene hebaiboke. Yesus a weunge, "Ae, hokolo fa, Reyae ware wawale ainyu!" <sup>15</sup> Nebei fa aunguke, angken nuweuboke wa a elewote. Nebeisa Yesus nenakele mene kinyeungeboko.

<sup>16</sup> Nebeinya ro miyae fangkengke yae bowate, Allahre buma kolowainye. Nebei yo yae elate, "Yendo kayaalo kaban mbai aei nolone meuwakauboko, Allah Na ro miyaere hakommibonde naeise meke!"

<sup>17</sup> Yesusle a Yudea kani nemene ninae hureukoko nane merau na kelaeunga yo bele borowate.

*Yohanes Bure Koumi Kiyae Ukeumi Ewate Yo  
(Mat. 11:2-19)*

<sup>18</sup> Yohanes na moisa orowate yo Yesus na me u mokowole a Yohanesre huwainyekoko. Yohanes nebei yo mekate nolora ro bee kaeneumikoko, <sup>19</sup> ukeumile enete Yesusre nda a hineinyehinde, "Weyae na hele Allah are kolowounge kiyae niyae, meyae ro hibe rakemandere?"

<sup>20</sup> Hokolo bee ekete Yesusre weinye, "Yohanes bure koumi kiyae yae maere ukeume mekende Ware hinaitere, Weyae Allah are kolowounge Kiyae niyae, niyae ban, meyae ro hibe rakemandere?"

<sup>21</sup> Nebei hee erane buloone kayeke ro miyae helen sele Yesus onomi iwoumi, alo yae hauwaimi yo na alo yoni-yonire hukeumiyeye, ijoko erei yo mokowoumi ijoko erewate. <sup>22</sup> Nebei aerene Yohanes yae ukeumi ekete beere Yesus weumi, "Bebo, mayae ijokore erekeube angkaeise borokeube hului yae Yohanesre huwennekobe. Ro miyae ijoko kumba nekayeye yo mana ijoko erate, oro rebeisi-rebeisi rebaeyeke yo mana ele mele kate, u bauwau kayeye yo onomi yarowate, angkaei kokun nekayeye yo mana angkaei borate, herewate yo walaiboko, a foi faeu foi keren ban nale ban yore bele ekehuwoumi. <sup>23</sup> Ro miyae Rare hakoyaise aerene ehakaui hubanainyelebe Rare moi ebulei kiyae, onomi foka hubanainyende."

<sup>24</sup> Yohanes yae ukeumi mekete ro bee ewote mo, Yesus huba raweuboko ro miyae helen hebatero Yohanesle ane weumi, <sup>25</sup> "Rahere erembomberene mayae a kala-kalare eyewaube, nebeinya kena u wauwaufe koyate holona ro mbai naei u mekai o mbai alu yae ndire ndare kuseunge wanende erembombero? <sup>26</sup> Rahere erembombero eyewaube, ro mbai malo maye-maye hireukokere erennebombero? Niyae ban! Ro miyae malo maye-mayere hirate yo bae nane merau nime kaungei nolone nekate yo ondofofo yoni-yoni naei imaena. Nebeise banna, rahere mayae eyewaube? Yenjo kayaayo mbaise erennebombero? Na hele. Reyae mare wamale, neyae Allahle yenjo kayaayo holore moi wokeumi. <sup>27</sup> Nane merau naei naeise Allahle homofaene homo molaikoko. Neyae Raei burelen boi-boi rore yeuboko naeise Allah yae Rare ukeufe are Maleakhi moloukoko, 'Nda niyae Raei burelen boi-boi ro.

Neyae Weyae mele nibi a mokoisaise nare bere holo yae ufende ende.\*

<sup>28</sup> Reyae nda a na helebe mare wamale, Miyae naei kou ei yahi eisa honowate yoni-yoni nolora Yohanes bure kowoumi kiyae na bumane hele. Nebeibe ro ban sele ro miyae Raei me kelee u keleene nekate holona yo Yohanesre moi wokainye."

<sup>29</sup> Nebeinye arilewote ro miyae nemene pajakre arilate yo bele Yesus huwoumi are boraikokene, Allahle wali nibi are na ijen elaikoko. Yohanes nebei yore bu koumikoko. <sup>30</sup> Nebeibe Farisi holona yo bele Musale walora wali heere foloukoko are isaeyaeiboko kelaeimi yo bele Allahlena mehinin kolowounge na wali holere molommibondere kena ban. Nebei yo Yohanes bure kommikondere ahi yae elewate.

<sup>31</sup> Yesus benen weumi, "Rahe rambun mae nda holona ro miyaere ahundebonde elerekonde? Naei u mekai naendaen wanan mae elerekonde ban? <sup>32</sup> Nebei yo fa-fa rambun nai hei-sei anuwaunge roimoyate naei hokolo uneyaufe kaenaimi wanan moi, 'Mai naeise meyae suling ranandeboko,

nebeibe mayae bae okoi mo.

Meyae here rime wananjekebe,

nebeibe mayae rime erime mo.'

<sup>33</sup> Rabuhine ban Yohanes meke bae raman bele bu bele nendon ban aneinye, mayae elaube, 'Alo yae aungeboko!' <sup>34</sup> Nebeisa Reyae, Allahle bokora mekale ro miyae uware yeubokale Kiyae, raman bele bu bele nendon mae analene, ro miyae elate, 'Ndi ro erenne, raman mali bu mali ro, pajakre u bulu-bulu buleyate yo bele ro miyae beko

\* 7:27 7:27 Maleakhi 3:1

nebande mokoyate holona yo bele kahili awaikoke.’ <sup>35</sup> Allahle isaei hebaen bele ro miyae me foi u foi mokoyatene, erenate ro miyae yae naei foi naeise elenate.”

*Yesus Simonbe Imaene*

<sup>36</sup> Farisi holona ro mbai na ro Simon Yesusre riyeungehike meke ramande enei anengkondere. Naei imaene ekete raman anawote. <sup>37</sup> Nebei yone maengke mbai na wali beko yae maemae koungekoke. Nebei ya Yesus Farisi holona ro Simonbe bokone ekete raman anawote borokene, minyak kemo fololo bele mongkon kaei-kaei yayatebe rouke Yesusle bokore eke. <sup>38</sup> Eke Yesus na moinye noro kelaeunge hebeunguke rimene rimewole. Na ijoko ibo balewate Yesusle oro ranne. Nebeinye na umaa yae rouke hobewoungue kalangkondere. Nebeisa yoi yae huneungeke nane minyak kemo fololo belebe Yesus na orone heungeke.

<sup>39</sup> Farisi holona ro Simon Yesusre ramande riyeungehike meke kiyae nebei wanen ereubokene na kena eisa elele, “Nda ro ramanne anende kiyae na hele Allahle yendo kaaalona, nda maengke na wali beko ma nemene isaeyembonde.”

<sup>40</sup> Nebeisa mo Yesus yae Simonde weunge, “Simon, Reyae a mbaise ware ufetere.”

Simon mae weunge, “Guru, nendon weise.”

<sup>41</sup> Yesus nda ahuba ahuneuboke weunge, “Ro bee, ro mbaise ekete roi riyeinyehike (nebeisa mo benen aheneikonde). Ro hi yae kalia ya 500 mokoukoube na hului yae riyeungehike, ro hi yae wa ya 50 mokoukoube na hului yae riyeungehike. <sup>42</sup> Hokolo bee aheikoi suluinye, nebei roi ikeumi ro ninae hobeukoke karo yae eleukoke. Nda ro bee nolora nde yae nebei ro roise riyeinyehike kiyae kena buhae hele kowoungue?”

<sup>43</sup> Simon mae weunge, “Reyae bene nekeufe roi kabande rouke kiyae yae.”

Yesus yae weunge, “Na helebe waei a eleukokae.”

<sup>44</sup> Yesus nebei maengkere ereungekoke mo, benen beufoke Simonde weunge, “Nda maengke eranae. Waei imaere Reyae mekalebe, nebeibe orore kuyeufekonde naei bu weyae omokoisai ((nda naei mokoyate era hena)). Nda maengke na ijoko ibo yae rorore kuyeyoufe benen rouke na umaa yae hobeufekoke. <sup>45</sup> Weyae rare yoi bulu ehuneisi mo, nda maengke eranae Reyae na meweufikalera Raei oro ninae yoi bulu yae huneyoufe ((ro melaeyeiboi wanen)). <sup>46</sup> Weyae Rare minyak fololo bele yae Raei yunda ehobeikoi mo, nebeibe nda maengke bu fololo bele yae Raei oro hobeufekoke. <sup>47</sup> Nebeinye na beko bako helen sele faeinyeumikoke, rabuhine ban naei kena buhae kaban heufekoke. Ro miyae na beko ebi ken faeinyeungekoke, nebei ro miyae kena buhae ebi ken hemmiyende.”

<sup>48</sup> Nebeisa Yesus nebei maengkere euweke weunge, “Waei beko bako nemene faeinyeikokete.”

<sup>49</sup> Ro miyae hiwa yo nangkele raman mbainye anayoke yo naeise naeise a hin-sin mae hinate, “Nda ro maenin meke ro miyae naei beko bele mekeufaeinyeumi!”

<sup>50</sup> Nebeibe Yesus nebei maengkere weunge, “Rei mai yae ninae eye, Rare hila rabo halewaraene wa wali hole moloubokete!”

## 8

*Yesusre Hakowainye Maengke Fa-Fa*

<sup>1</sup> Na heki ban mo nebei kanina yo ebibi kaban-kaban nemene Yesus orowole a huweumiyeye, Allah merau raungehike Naei holona ro miyae Raei me kelee u keleene nekenate. Na moisa orowate yo me bee oro nen bee bele, <sup>2</sup> miyae maengke helen, Yesus onomire iwoumi yo, nane merau alo yoni-yoni na uwara hukewoumi yo, Nare hakainyeko. Nebei miyae maengke na ro nda niyae, Maria, Magdalena kaenainyele (alo mehine bee belere Yesus na u bulura hukeumihike kiyae); <sup>3</sup> Yohana (Khuza Ondofolo Herodesle imae eise wakun kayaare hebewole kiyaele miyae); Susana; miyae maengke hiwa helen nangkele. Nda miyae maengke naei roibu yae Yesusle holo naei wali rambunde hakowainye.

*O Haka Heraeyeyele Wanen Mae Yesus Nda Ahuba Ahuneuboke Huwoumi (Mat. 13:1-9; Mrk. 4:1-9)*

<sup>4</sup> Ro miyae helen Yesusle bokore yo hira yo hira hokowole. Erewole helen sele arilaisike wa, Yesus nda ahubabe ahuneuboke huwoumi, <sup>5</sup> “Ro mbai hekere mokondere eukuke o haka heraeyeweke hiwa nibine balayeke. Hiwa ro miyae oro yae alaeyeke, na hiwa yo aye yae anaikoke. <sup>6</sup> Hiwa kani ruka bele ranne balayeke. Nebei kani helehelene nane merau bu banne hon ketaijeke na hibi kalayeke. <sup>7</sup> Hiwa hun isa bele kaiwa nolone balayeke, ketewatene hun nangkele ikate awainyekoke kalaukoke. <sup>8</sup> Nebeibe o haka hiwa kani foi kela foinye balayeke, ketewate, ani mokowate, faru wang-wang 100 bewate.”

Nda ahubara huweumikoke baeufoke mo wa Yesus yae weumi, “Nda a boraube ro miyae noua foi hembe.”

*Rahene Yesus Nebei Wanen Ahuneuboke Huwoumi*  
(Mat. 13:10-17; Mrk. 4:10-12)

<sup>9</sup> Na moisa orowate yo Yesusre hinainye, “Nebei ahuba na no rahe mekai?”

<sup>10</sup> Yesus yae weumi, “Raei me kelee u keleene nekate ro miyae holo naeise na nunna honate rambun isaeyombombe naeise mare mo ikembe. Nebeibe, ro miyae hiwa naeise Allahle yendo kayaalo Yesaya nda a homone mokoukoke, ‘Neyae erenatebe, ijoko ereiboi

nane merau boronatebe, isaeyeiboi.’\*

Nebei a hului benatene ro miyae hiware ahumbo-ahumbo yae huwamaele.”

<sup>11</sup> “Nebei a ahuneubokale huwaemale na mekai nda niyae, O hakare eleukokale nebei Allahle ako faeuko.

<sup>12</sup> “Nibine balayeke yo na mekai ro miyae nebei are borayeke yo. Nebei yo Rare hila rabo halenaisele belene, walobo yun mae na kena eisa meke nebei are nukeufake.

<sup>13</sup> “Ruka bele kani ranne balayeke yo na mekai ro miyae nebei are borayeke na kenane na foi sele hawayeke, nebeibe inyale ban kambu ban. Mon fofu nebei are na hele elenate, nebeisa walobo yun wabeisiyeyumi na roko mbai balenate.

<sup>14</sup> “Hun isa bele nolone balayeke yo nebei niyae nebei a faeufe boraikoke ro miyae. Nebeibe nebei yo naei wali holere molommibonde aerene buhae hokoiyoyoumi nane merau yeisi raeiboi walire kena haehae koyatene, nebei a faeufe ayeikoyainyene anire omokoi.

<sup>15</sup> “Kani foi kela foinye baleyate yo nebei niyae nebei a faeufe borowate ro miyae na kena u yolo-yolo bele, na hibi-hibi hila rabo halenayende, nebei a hului nekenate, ani nime bele mokowate.”

*Isehe Naeikoyole Wanen*  
(Mrk. 4:21-25)

<sup>16</sup> “Hi yae ha yae ise releikoyeunge bolosisyele yae helai yae obumboi nane merau ijongku honson kelene eraisi. Imaere obere mate yo nebei hehe erenaterere naei anuwauunge ambonde. <sup>17</sup> Nda wali einye, aei yeyanne hului mbai Allah yae aere yeyeume hiwa bele barammekonde. Nebei aerene, boraube a u bene yolo-yolo yae nekenayembe. <sup>18</sup> Nebeinye Reyae wamala a naeise u bene foi yae nekenayembe. Mayae Allahle isaei hebaen mokombomona, Allah mare benen hi baranembombe. Allahle isaei hebaen bele kiyae helen barannele. U kiyae naei u bene nekainye hului honainyele bele enjarongkonde.”

*Yesus Nenake Bele Na Uwakewa Bele Mekate*  
(Mat. 12:46-50; Mrk. 3:31-35)

<sup>19</sup> Yesus nenake, na uwakewa bele naei bokore mewatebe, ro miyae helenne naei bokore menatere kabewainye. <sup>20</sup> Nebeinye ro mbai eke Yesusre weunge, “Ana, wa uwakewa bele moinya ekaisebate, Wangkele hubayengkombere mekate.”

<sup>21</sup> Nebeibe Yesus yae weumi, “Menakere, Raei uwakeware ufemile yo Maekole a faeufe boroyate, nebei suluinye mokoyate yo niyae.”

*Yesus Alure Ukeunge Kalaungeboke*  
(Mat. 8:23-27; Mrk. 4:35-41)

<sup>22</sup> Ya mbai mo Yesus na moisa orowate yo bele kai mbaisa hawaiiboke. Nebei yore Yesus yae weumi, “Men, eyae ndi bu habala reufire fomalere.” Nebeinye nane yo kulunde mo ukate. <sup>23</sup> Au wae nekate bumoko nolore nare fowate yae, Yesus ijongkune feleungekoke. Ya alu kaban nda bu hubane raweuboke. Ombi kai eise bele hauwole bae, obulaenaikonde wanen mae kowate. <sup>24</sup> Nebeinye Yesus na moisa orowate yo ekate nare yengke wainye, “Tuhan, Tuhan, eyae bune obulemakondere kande ya!”

Nebeisa Yesus aunguke nebei alu rawele bele ruwae kaban belere a elae ukeungera uke kalaungeboke. <sup>25</sup> Nebeisa Yesus kai einya yore weumi, “Rare hila rabo haleyaufu wauwauunge era mayae buhae hele hokombokembe!”

Nebei yo na buhae bele hokowoumi fa yae bowate. Naeise naeise elate, “Nda ro nde maeninne? Alu boyene, alu ruwaene naei a bele weumi nane merau Naei ane boraiboke!”

*Alo Yoni-Yoni Ro Mbaite Uwana Yesus Hukeumihike*  
(Mat. 8:28-34; Mrk. 5:1-20)

\* 8:10 8:10 Yesaya 6:9

<sup>26</sup> Yesus na moisa orowate yo bele kaisa fokate Gerasa kanine Galilea kani bu habala reufinane. <sup>27</sup> Yesus yaunge akoiboise mo akouboke bae, ro mbai alo yae aungeboke meke na bokone meufebeunguke. Nda ro yo kaban mbaisabe meke, heki hele na melan mae mo oroweke, imaere nekende naeise ahi yae eleweke. Ruka ahe bulu here nore kolayeke nolone honoweke. <sup>28-29</sup> Roko yae roko yae alo yoni-yoni na aweiso-aweiso mo koyeunge. Naenda menen horo na me oro rantai yae rinainyekoke nane merau hiwa yo kayaa hebewatebe, hokoikoyole hayeikoyole, alo yae yaweisoyoungue a kala-kala kabanire eyewote. Yesusre erekeungene, kali nekai kaenewole meke, na bene oro selen-selen mae roroukoke. Na u buluna alore Yesus ukeunge eukukene, nda ro kaenele, "Yesus Allah Hubalo Mando Na Fa, rahere rare mokoufobondere? Reyae riyawale rare beko omokoisemae!"

<sup>30</sup> Nda rora Yesus yae hineunge, "Wa ro nde?"

Nebei ro yae weunge, "Legiun," rabuhine ban na u bulune alo yoni-yoni helen nekatene. <sup>31</sup> Nebei alo yoni-yoni yae Yesusre riyei-tiyei riyainye benen a bulu na wauwau helere ewei eijae hele.

<sup>32</sup> Nebeinye moko enene obo nekai sele kate ramanne anate. Nebei aerene Yesusre waynye, "Maere waeimihi nebei obo kate uwa einye emayembon." Nebeinye Yesus be hineumiboke. <sup>33</sup> Nebeisa nane alo yoni-yoni nebei role uwara maibaleke nane obo kate u einye ayeuboke. Nebei obo habeleyate ekate a yaeyaera rorate bune wate nebeisa anaiboke.

<sup>34</sup> Obo kayaare hebate yo nebei wanen erewatene, hakaikoke ewate yo eise bele yo moise bele a heraeiwate. <sup>35</sup> Nebei yeubokere erenaibondere ro miyae yora yora balaimke, Yesusle bokore mekate bae, nebei ro Yesus na u buluna alo yoni-yonire hukeumihike kiyae erainyele Yesus Noro kelaeunge nuweuboke. Ambelae hireukoke na u bene foi yeuboke. Ro miyae erewainye yo buhae yaraiboke. <sup>36</sup> Naei ijoko yae erewainye yo, ro miyae hiwara Yesus na mekai nda role u buluna alo yoni-yoni hukeumihike huwewaimi. <sup>37</sup> Gerasa kanina ro miyae buhae hele hokowoumine, Yesusre nebei anuwaufa endere uwainye. Nebeinye Yesus bukensindere kaisa fileukoke ewate.

<sup>38</sup> Foise yeuboke ro Yesusre hakonnebondere riyewoungue.

Nebeibe Yesus yae weunge, <sup>39</sup> "Beiso, waei yore eye. Allah ware onomi ikete a huweumiyende!"

Nane ro eke Yesus na u buluna alo yoni-yoni hukeumihike a nebei yo kaban honole einye huweumiyeke.

*Yesus Yairus Na Maengke Fa Waleungeboke Bele Miyae Mbai Ha Yae Rileweke Bele (Mat. 9:18-26; Mrk. 5:21-43)*

<sup>40</sup> Yesus benen bukeufike mewole mo, Nare rakeikoi kainye ro miyae erekainyele, ei hauwainyele. <sup>41</sup> Ro mbai Allahre ei mom-mom imae yunde hebewole na ro Yairus Yesusle bokore na hibi meke, Yesusle bene oro selen-selen roroukoke riyewoungue naei imaere enetere. <sup>42</sup> Na maengke ralo yakama me bee oro nen bee bele, naei mbai sambai sele kiyae, era buloone koumeke herendere eke kole.

Yesus aloungokoke Yairusle imaere ewate mo, ro miyae hokoimeyele yae Yesusre uwa yae ayaeinyekoke. <sup>43</sup> Nebei nolona miyae mbai ralo yakama me bee oro nen bee bele ha yae mo rileweke, hi yae ha yae onomi yeise na hului ban. <sup>44</sup> Nda miyae Yesusle bokore moisa meke Na malo me yae kataungehike. Nebei hee yae ha rileweke na hibi heunguke.

<sup>45</sup> Yesus Na uwara hubaungehikene hinele, "Nde Ra uwa kataufehike?"

Nebei ro miyae mate yo neyae ban mae mo elate. Nebeinye Petrus yae weunge, "Tuhan, aei bokona ro miyae helen sele mande, Ware ayayekokete kilin-kilin hoi-soi hoimeyate."

<sup>46</sup> Nebeibe Yesus yae weunge, "Ro miyae hi yae Raei uwa kataufehike ya. Reyae hubanale Raei uwana elae hi eukuke."

<sup>47</sup> Nda miyae naei ura hubawoungene, na hibi oro me oinyeu hineuboke. Meke Yesusle bene oro selen-selen mae roroukoke. Nebeisa nda ro miyae matere huweumi rahene neyae Yesus na uwa kataungehike. Nane merau kataungehike heera na hibi ha heunguke. <sup>48</sup> Nebeinye Yesus yae weunge, "Waei hila rabo haleyae huluinye nebeinye onomi roukae. Woro foi yae ele!"

<sup>49</sup> Yesus ane namman elele mo, ro mbai Yairusle imaerabe mele Yairusre weunge, "Wa maengke ninnae hereke. Rahe londe benen Guru waeli bengkender!"

<sup>50</sup> Yesus nebei a borokene Yairusre weunge, "Buhae ohokoiiae! Rare hila rabo mo haleufe, wa fa annunde."



<sup>51</sup> Yairus naei imaere ekate mo, Petrus yae, Yohanes yae, Yakobus yae, Yairus yae, Yairus na miyae bele Yesus ukeumi eise ayeuboke. Ro miyae a hun raumihike na moinye mo hebewate. <sup>52</sup> Moinye ro miyae arileweke nda fa hereke aerene mekate rimewainye. Nebeibe Yesus yae weumi, "Rime rimeijae. Nebei fa eherei, ijongkuba honole!"

<sup>53</sup> Rimere rimate yo neyae naeisaei nda maengke herekebe. Nebeinye Yesuslena a weumire neyae re yae harewainye. <sup>54</sup> Nebeisa Yesus meke nane maengke hereke na mera ikileungeboka mo weunge, "Ainyu!" <sup>55</sup> Nda maengke na unulu na u bulure meweufike bae na hibi waleuboka. Nebeisa Yesus ukeumi nebei fare ramande inyainyele anengkondere. <sup>56</sup> Nenakele naekole fangkengke mo bowote. Nebeibe Yesus yae weumi, "Hire hare ehueijae hele."

## 9

### *Yesus Na Moisa Orowate Yo Elae Ikeumi* (Mat. 10:5-15; Mrk. 6:7-13)

<sup>1</sup> Yesus na moisa orowate ro me bee oro nen bee bele kaeneumikoke alo yoni-yoni hukenaimiyende elae bele era yo buloo yo onomi inyaimiyende elae bele kiteumboka. <sup>2</sup> Nebeisa ukeumi ewate Allah merau raungehike Naei holona ro miyae Yesus Naei me kelee u keleene nekenate a faeu hungaimile nane merau era buloo kayeke yore onomi inyaimile. <sup>3</sup> Nebeisa weumi, "Mai nibi a embe wali rambun ma mene eyaroi ei kayee nda niyae: mehukun, hokou, raman, roi, ambelae hi bele. <sup>4</sup> Makei imaene ungayembe nekembena, nebeinye mo nekembe kulun wembe embe. <sup>5</sup> Makei yone mare hukenayembena, membalembe hee mai orona kani bahere mo rubonnebombe. Nda iwau wanan kelemmibombe neyae beko hele mokaibokene."

<sup>6</sup> Nebeisa Yesus na moisa orowate yo kulun ukate yo ran yo randa orayeke, Yesuslena a foi faeu foi huwaimiyeke, nane merau erane buloone kayeke yore onomi yaeimiyeke.

### *Herodesle Yesusle*

(Mat. 14:1-12; Mrk. 6:14-29)

<sup>7-8</sup> Herodes Galilea kanire Ondofolore hebewole hee yae Yesus mokowole a elewate borowole. Ro miyae hiwa elate Yohanes bure kowoumi kiyaebe waleuboka, hiwa yo yae elate Allahle yendo kayaal Eliabe benen meujakauboka, hiwa yo yae elate na bena hele nekewate yenjo kayaa yo nolora hibe benen waleuboka, Herodes u bene baeso-baeso kowole. <sup>9</sup> Herodes yae elele, "Yohanes mbai na yun ukamaele naeisake. Nda ro nde maenin? Helen sele naei a boroimeyale." Herodes Yesusre ijoko erennebonde naeise relewouge.

### *Ro Miyae Nemene 5.000 Yesus Raman Wahewoumi Anewate* (Mat. 14:13-21; Mrk. 6:30-44; Yoh. 6:1-14)

<sup>10</sup> Yesus na moisa orowate yo bukaiboka mekate, ekaimokowate a nemene Yesusre huwewainyele. Nebeisa Yesus na moisa orowate yo bele na mo-mo Betsaida yore ewate. <sup>11</sup> Nebeinya ro miyae borokate bae Yesus na moisa mo hakowainye. Yesus ei hawoumi nane merau Naei me kelee u keleene nekate ro miyae holona naeise kelewoumi. Nda yo nolora mewatena erane buloone kayeke yore onomi iwoumi.

<sup>12</sup> Hu akowole hee yae wa, Yesus na moisa orowate yo mekate Yesusre wainye, "Tuhan, nda anuwau a kala-kala ya. Ro miyae weimi yo nobena-nobena honatene enate raman annayende nane merau ijongku enairelende hononate."

<sup>13</sup> Nebeibe Yesus yae weumi, "Ramande mayae yemmile anenatere!"

Nebei yo wainye, "Maainya feu maehae mbai ka bee hele! Waei kenare koyae meyae raman hiwa bele emayarongkondere?" <sup>14</sup> (Ro arilewole nemene 5.000 hului.)

Yesus benen na moisa orowate yore weumi, "Ro miyae wemmi riyane-riyane nuwaiko, riyaa mbai ro miyae 50 hului yae!"

<sup>15</sup> Nebeinye Yesus na moisa orowate yo naei a ukeumi huluinye ukaimile raiboka. <sup>16</sup> Nebeisa Yesus nane feu bele ka belere mo yaroukoke, be bumare weuweke Naeko Allahre helen foise mo ukeunge, na hibi Naei me yae kaiwole na moisa orowate yore iwoumi ro miyae arilewolere wahenaimilere. <sup>17</sup> Nebei ro miyae anewate wande hele yaeiboka. Nebeisa na kalun honowate arilaisike kakali me bee oro nen bee bele.

### *Petrus Yesusre Ro Roungeboka* (Mat. 16:13-19; Mrk. 8:27-29)

<sup>18</sup> Ya mbai Yesus ebeline nembai eke bowole mo, na moisa orowate yo Na bokore mekate. Yesus yae hineumi, "Ro miyae Rare nde yae elate?"

<sup>19</sup> Na moisa orowate yo yae wainye, “Ro miyae hiwa Ware Yohanes bure koumi ro yae elate. Nebeibe hiwa yo yae Ware Allahle yendo kayaalo Elia yae elate. Na hiwa yo yae Ware bena yenjo kayaa yo nolora hibe benen aunguke yae elate.”

<sup>20</sup> Nebeinye Yesus yae hineumi, “Mayae bae Rare nde yae elaube?”

Petrus yae weunge, “Tuhan, Wembai Allah yae oro umaufe heraweibokete Wali Ondofolo.”

<sup>21</sup> Yesus yae weumi, “Nebei a hire hare a yaka-yaka okommimae. <sup>22</sup> Reyae, Allahle bokora mekale ro miyae uware yeubokale Kiyae, beko helen hubarengkonde hele. Yahudi yun-jun mae, imam yun-jun mae, Musale walora wali heere foloukoke are isaeyaeiboke kelaemi yo yae Rare moi bulenaisele. Ro miyae yae honaisebondebe, nebeibe ya name mo Reyae arenunde.”

<sup>23</sup> Nebeisa Yesus nebeinye ro miyae hebaterwe weumi, “Nde Raei moisa hakombonde kiyae, na kenare koyele wali mekai kena yae herawende hele, nebeisa Raei aerene ohaline bonaikonde ro wanen mae Rare hakonsebonde. <sup>24</sup> Rabuhine ban nde yae naei wali Raei me einye ekinyeiboinya, naei wali hole omoloiboi. Nebeibe nde yae naei wali Raei me einye kinyensebondena, nebei kiyae naei wali hole molorembonde. <sup>25</sup> Na foi rahe ro miyae mbai nda kani kelana rambun naei me einye honoube, nebeibe wali hena bona eitowei? <sup>26</sup> Ro miyae nde Raei ro aerene nane merau Raei a faeu kelaemaele aerene, ro miyae bene fe kondena, nebei wanen mbai fe yae korende Reyae Maeko Allah Naei one hengko kitensebonde hehe kaban Maekole u i u nukui einye bele malaikat yolo-yolo bele surgara memale ya. <sup>27</sup> Reyae na hele wamale, mai nolona ro miyae hiwa eherei mo nekenate Allahle yo waku mende naei ijoko yae kanenainyebonde.”

*Yesus Nauwa Ma Hi Yeuboke*

*(Mat. 17:1-8; Mrk. 9:2-8)*

<sup>28</sup> Yesus a huwoumira ya mehine name hului mainyekekukera Petrus, Yohanes, Yakobus, Yesus yaweumiboke Naeko Allahre ebeli boisise mokore ikate. <sup>29</sup> Yesus Naekore ane bowoung mo na be yoi uke ma hire bewole nane merau malo keuleumon wili halaman bewole. <sup>30</sup> Na heki ban mo ro bee yakaiboke Yesus naei ane elate. Nebei yenjo kayaayo bee na ro Musale, Eliale. <sup>31</sup> Hehe hokolo bee na une naeumikoke. Hokolo bee Yesus naei ane elate, Yerusalemne menjembondere Allah naei mehininde raungehike huluinye Yesus honaibondere. <sup>32</sup> Petrus, Yohanes, Yakobus, nemene jiongkune honaiboke. Nebeisa ainyukate eraimi hokolo name na une hehe namman boumi. <sup>33</sup> Kulun bowote Yesusre nukeneinyele hee yae wa, Petrus yae Yesusre weunge, “Tuhan, ndane onomi hele hubannele. Naei foi sele meyae fale name hemakondere: mbai Waei, mbai Musale, na hi Eliare.” (Petrus nebei a elewolebe onewainye rahe abe elele.)

<sup>34</sup> Petrus ane elewole yae, mangko meke feleumiboke na moisa orate name fe waku yae yaroumikoke. <sup>35</sup> Nebeisa a mbai mangko bulura weumi, “Nda Raei Fa Niyae Reyae eleubokale wekeunge Kiyae, Nare mo boronnele.”

<sup>36</sup> Nda ara baeufoke bae, Yesus nembai sele nukainyekoke hebewole. Nda ijoko yae erewate rambun hokolo name ehuweyei nekayeke.

*Yesus Kelu Fa Mbai Na U Bulura Alore Hukeungehike*

*(Mat. 17:14-18; Mrk. 9:14-27)*

<sup>37</sup> Ya heuboke mo, Yesus hokolo name bele nebei mokora wayakoukokene ro miyae nekai Naei bokore mewate. <sup>38</sup> Ro mbai nebei ro miyae nolora kaenele, “Guru, raei kelu fa mbai ken ijoko erenebomae ya! <sup>39</sup> Alo mele helaweunge bae, kali mo ikaenewole, na uwa nemene elae halae yeiboyole, olokee mo neuwara ibalewate. Nebei alo na uware beko hele mokoyeunge, menduwendere ahi elele! <sup>40</sup> Wa moisa orowate yore ekale nebei alore hukenainyehindere riyewamaele, nebeibe neyae na hului ban.”

<sup>41</sup> Yesus nebei a boroukokene hebate yore weumi, “Mayae na hele Rare hila rabo ehalei holona nane merau Raei kelemale wali nibira wekaube yona mangkele mbainye mo nekemandere nane merau kena yae mo heraufendere.” Nebei fa naekore weunge, “Wa fa ndare yaweynyoho meu!”

<sup>42</sup> Yaweungehoke Yesusle bokore ete mo, alo nebei fare ane woke, noro me elaeiwate, nebeibe Yesus na hibi nane alo a elae yae haeungeboko bele, nebei fa onomi yeuboke, nebeisa naekole mene ikeungele. <sup>43</sup> Nebeinya ro miyae fangkengke yae bowate Allah nebei elae keleubokene.

*Yesus Herende Naei A Benen Huwoumi*

*(Mat. 17:22-23; Mrk. 9:30-32)*

Ro miyae Yesus nebei merau mokowole erewainye ijoko kelei-kelei mo kelewate. Nebeisa Yesus na moisa orowate yore weumi, <sup>44</sup> “Nda Raei a wamale angkaei foi-foi yae boron: Reyae, Allah ukeufe mekale ro miyae uware yeubokale Kiyae, u mekai beko bele ro miyae naei me einye kinyenaisibondere.” <sup>45</sup> Nebeibe na moisa orowate yo nebei a eleukokere ka yae raneumbokene onewate handawate nane merau benende hinenainyehindere buhae yae hokowoumi.

*Nde Naei Kaban Sele?*

*(Mat. 18:1-5; Mrk. 9:33-37)*

<sup>46</sup> Yesus na moisa orowate yo naeise naeise a kilate elate nde naei nolora naei kaban sele. <sup>47</sup> Yesus na u mekai kate isaeyebokene nebeinye fa mefa ken mbai yaweungehoke meke na bokone haungeboke hebewole. <sup>48</sup> Nebeisa mo na moisa orowate yore weumi, “Nde nda fa hebelere Raei Ro einye ei hawennelena, Rare ei hawensele. Nde Rare ei hawenselena, Rare ukeufe mekale Kiyae Maeko Allahre ei hawennele. Rabuhine ban, nde mai nolora ro ban sele, nebei kiyae niyae ro bele!”

*Nde Mayae Mokaube Wanen Mokondena, Nebei Kiyae Mai Kahili*

*(Mrk. 9:38-40)*

<sup>49</sup> Yohanes yae weunge, “Tuhan, ro mbai erekannele Waei ro yae alo yoni-yonire hukeyeumi. Nebei ro aei riyana banne meyae nare ahewannele.”

<sup>50</sup> Yesus yae Yohanesre nane merau na moisa orowate yo na hiware weumi, “Nare ahennema! Ro miyae na me u mangkele nane hului mokonatena, nebei kiyae niyae mai kahili.”

*Yo Mbai Samariana Yesusre Kena Ban*

<sup>51</sup> Surgare ende ya nobewoungue mo, Yesus Naei u benera haraungeboke Yerusalem yore endere. <sup>52</sup> Naei uware enainyekende naei bele inyale naei bele rambun mokoneinyehande naeise, ro bee ukeumi nibi bere Samaria kanina yo mbainye enete. <sup>53</sup> Naeisaei nekate Yesus Yerusalem yore endene, nebeinye Samaria ro miyae Yesusre ei ehawei! ((Samaria ro miyae bele Yahudi ro miyaere bele yokeijo yae nekate.)) <sup>54</sup> Na moisa orowatera ro bee Yakobusle Yohanesle nebei merau isaeyebokene Yesusre weinye, “Tuhan, Waei kena naendae hubanae, meyae i ungannele yakura onde nda ro miyaere hukelenaibondere?”

<sup>55</sup> Yesus beufoke are mo yareumikoke. <sup>56</sup> Nebeisa yo hire yae ewate.

*Ro Miyae Nde Naei Yesusle Moisa Oronayende*

*(Mat. 8:19-22)*

<sup>57</sup> Yesus na moisa orowate yo bele alainyekoke ewate mo, ro mbai yae meke weunge, “Tuhan, raei kena kale Weyae makeise ele rangkele mo orayendere!”

<sup>58</sup> Nebeibe Yesus yae weunge, “Bulou yoku na honson bulu bele nane merau aye na nale bele. Nebeibe Reyae, Allahle bokora mekale ro miyae uware yeubokale Kiyae, uware alorebonde anuwau ban.”

<sup>59</sup> Nebeisa Yesus ro hire weunge, “Rare hakoisobo!”

Nebeibe weunge, “Rare mon yeise maeko hereke eremolonsan.”

<sup>60</sup> Nebeibe Yesus yae nebei rore weunge, “Rare hila rabore ehalei yo yae nebei here molonaisande. Weyae aloinyoko Raei me kelee u keleene nekenate ro miyae holone enaiyembonde are huweumiyendere.”

<sup>61</sup> Ro hi yae meke weunge, “Tuhan, raei kena kale Ware hakoreibotere, nebeibe ebi fere waeisihi wangkele orayende naeise raka baeke a isaemisibon.”

<sup>62</sup> Nebeibe Yesus yae nebei rore weunge, “Ro miyae nde naei kena ura a hokoukoke Raei a wanale hului yae nekenende nebeisa kennehinde, nebei kiyae Raei kaliare mokonde naeise na hului ban.”

## 10

*Yesus Ro 70 Bere Bere Ukeumi Ewate*

<sup>1</sup> Tuhan Yesus benen ro 70 eleukoke wekeumi yo ukeumi anuwau Neyae ende ijende bere holo yae enate. <sup>2</sup> Yesus nebei yore weumi, “Ro miyae helen sele Raeinya are boronaterere kena kate, nebeibe kelei-keleise kelenaimile ro kalobe molole. Nebeinye Allahre riyennele ro miyae helen mae wemmile menate. <sup>3</sup> Ninae eme! Mai kena nime hababe, nebeibe ikele hande koyate yo nolore wamale embere. <sup>4</sup> Malo huba, bekangke, oro mehau, ma mene yaroi eijae mo. Nibi nolone embena, ro hi miyae hire ro emelaeyejae mo.

<sup>5</sup> “Imae mbaise emembombena, nda wanen mae wemmile, ‘Rei mai nda imae eise.’

<sup>6</sup> Ro miyae na wali rei mai bele nebei imaene nekelenana, neyae rei mai endowende. Ro

miyae na wali rei mai ban mae nebei imaene nekelena, neyae rei mai erowei. <sup>7</sup> Imae ungayembe einye mo nekembe nane merau raman bu inyaiyembe anembe, rabuhine ban kaliare mokoyate yo na me buhae bele yaronate. Nebei imae mbainye mo nekembe, imae hira hira okoiiae.

<sup>8</sup> “Yo mbaise embe mare na foi yae ei hawenayembene, raman bu inyaiyembe hului anembe. <sup>9</sup> Nebei yona erane buloone kayeke yo onomi yemmiyembe nane merau a wemmile, ‘Allah merau raungehike hului Naei holona ro miyae Raei me kelee u keleene nekenate ya nobeungeboke.’ <sup>10</sup> Embe yo hira mare hukenayembena, na nibi kabanda hebembombe mo kaenemmile, <sup>11</sup> ‘Mare isaiese imayembere, wa yona yanna kani bahe kela bahe maei orona kolowaiboke nemene nare rubannele. Nda iwau wanen kelaeyembe mayae beko hele mokowaubene. Nebeibe bene foi yae nekenayembe, Allah merau raungehike hului Naei holona ro miyae Yesus Naei me kelee u keleene nekenate ya nobeungeboke.’ <sup>12</sup> Reyae mare wamale, ‘Sodom Gomora yo bee Allah ehee bukulu hayeumikoke foma-foma bele nda yo ehee bukulu hainyemikondera.’

*Korazim Yo Bele Betsaida Yo Bele Allahle Are Oboroi Kowate*  
(Mat. 11:20-24)

<sup>13</sup> “Korazim yona ro miyae bele Betsaida yona bele beko hubannele! Mai nolone rambun emere-emere mokoukokale Tirus bele Sidon bele yone mokoukokale yae nendahina nebei yo naei beko bakora nulu keumboube, nane merau rei ban mai ban malo yae hiraikoube, na yun ran ondowai yae olaeikoube nekaimbe (nulu keiboyoumire naei iwau mokoikoyate.) <sup>14</sup> Allah nda kani kelana ro miyae naei walire hului kolommikonde heene Tirus bele Sidon bele yona ro miyaere ehee bukulu ebi fere foma-foma bele mare hainyengkomba. <sup>15</sup> Nane merau mayae Kapernaum yona ro miyae mai kenara elaubo Allah mare yakure kaenengkombe, nebeibe Allah ane hele hainyengkombe.”

<sup>16</sup> Nebeisa Yesus na moisa orowate yore weumi, “Ro miyae mare borayembe yo, Rare boraise. Mare hukayembe yo, Rare hukaise. Nane merau ro miyae Rare hukaise yo nebei yo Allah Rare ukeufe mekale Kiyaere hukainye.”

*Ro 70 Bukaiboke*

<sup>17</sup> Ro 70 eleukoke wekeumi na moisa oronate na hiwa yo bukaiboke rei nekai kaimeke. Mekate wainye, “Tuhan, Waei ro yae oku naemmilene alo yoni-yonibe maere boroi-boyaim!”

<sup>18</sup> Yesus yae weumi, “Reyae erewanale walobo yun wili weiboyole wanen mae yaku bumara ruke owole. <sup>19</sup> U bene foi nekenayembe a kaikai bele rami bele oro yae alemembe naei elae nemene mare kitembokamale, walobo yun nelae nemene mayae na hului melennehambe. Hi yae ha yae mare bekore omokoiboi sului. <sup>20</sup> Alo yoni-yoni mai ane borowayembe aerene reibe okoiiae, nebeibe mai ro surgana homofaene molaikokene reibe kom.”

<sup>21</sup> Nebei hee mo Yesus Allahle Roh aungeboke yae rei nekai kowole elele, “Arai, kun wau na Tuhan, Reyae ware helen foi sele wawale, rabuhine ban Weyae nebei kelewamaele rambun isaei hebaen bera fae yae felewanae, nebeibe fa-fa u mekai wanen ro miyaere yakaimyeumi, Waei kenare koyae huluinye.

<sup>22</sup> “Maeko, rambun nemene ninae Raei me einye kinyeufoboke. Hi yae ha yae Reyae Allahle Kelure ro oroibo mo, Maeko nembai sele. Nane merau hi yae ha yae Maekore ro oroibo mo, Reyae Na Kelu rembai sele, nane merau Reyae eleukokale wekamaele ro miyae na kena u einye Reyae Allahle naeise yakaremibonde.”

<sup>23</sup> Nebeisa Yesus euweke na moisa orowate yore na mo-mo yae weumi, “Allah yae mokole rambun yoni-yoni mai ijoko yae ereyaubene foi hubaungele. <sup>24</sup> Rabuhine ban yenjo kayaayo helen bele ondofolo yoni-yoni helen bele mayae ereyaube boroyaube rambun wanende erenaibondere relaeinyeke, nebeibe na hului ban.”

*Samariana Kena Buhae Bele Ro Yae Ahuneuboke*

<sup>25</sup> Roko mbai Musale walora wali heere foloukoke are isaeyaeiboke kelaemi nolona ro mbai meke umali hubannehinde naeise Yesusre weunge, “Guru, reyae wali hena bona ererowende naeise rahe me u mokorele?”

<sup>26</sup> Yesus yae weunge, “Musale walora wali heere foloukoke homofaene rahe abe molaikoke? Waei u bene nekayete nebeinya a na mekai rahe?”

<sup>27</sup> Nebei ro yae weunge, “ ‘Wa kena u, welae wake, wa u bene wa bene nemene, Allahre kena buhae na maemae yae heungele. Nane merau waei uware buhae haena wanen mbai mangkele ya-ya wali nibi mbainye oraube yore heumile.’ ”

<sup>28</sup> Yesus yae weunge, “Na helebe eleyae. Naei wanen mae ele mokolena wali hena bona eukowende.”

<sup>29</sup> Nebeibe nane ro naei uware felele benen Yesusre weunge, “Raei wali nibi mbainye orande yo nde?”

<sup>30</sup> Yesus yae weunge, “Ro mbai Yerusalem yora Yerikho yore owole. Nibi nolone owole mo yokoyo mekate rahuae yae baikoke, herendere kowole. Yokoyo nebei ro naei rambun na malo nemene yaraikoke nukainyeboke na nibine ha yae kaka yobowole.

<sup>31</sup> Imam mbai naeisaei ban nebei nibi mbaisa auboke mewole. Meke nebei ro honole erekeungene, uke yaheuboke nahaufa ewole. <sup>32</sup> Nebei sului mbai Imam Lewile orona mena ro mbai, nane nibi mbaisa auboke mele. Meke nane ro honole erekeungene, nane merau yaheuboke nahaufa mo ewole. <sup>33</sup> Nebeisa, Samariana ro mbai kolore ewole nane nibi mbaisa mewole nebei robe erekeunge bae na kena beko bele hubawoungene.

<sup>34</sup> Nebeinye eke na uwana ba minyak bele, anggur bele yae kuyeuengekoke, malo yae aweungekoke. Nebeisa nda Samariana ro naei keledai ranne nane ro haungeboko, yaweuengehoke kolo yo honate imae mbaise ewote, nebeinye holewoungene. <sup>35</sup> Ya heuboko mo, nebei imaena roro roi perak hele bee yeungekoke mo weunge, ‘Nda roro foi yae holeungele. Benen roi naennaen helen nen mokoungekondena, reyae merele yare ware isete.’ ”

<sup>36</sup> Nda ahubara huweungekoke mo Yesus nebei Musale walora wali heere foloukoke isaeyaeiboke kelaemi holona roro hineunge, “Nda ro name nolora elale makei kiyaebe waei u benere nekete hului nebei ro name nolora nde na hele ya-ya wali nibi mbainye orate ro?”

<sup>37</sup> Nebei ro yae weunge, “Hakoungoboke kiyae.”

Nebeinye Yesus yae weunge, “Foi, mana eye waei me u nebei wanen mae eumokonde!”

*Yesus Martale Mariale Bokore Eke*

<sup>38</sup> Yesus na moisa orowate yo bele alainyekoke ewate yae yo mbainye ayeuboko. Nebeinye maengke mbai na ro Marta ukeumi naei imaere enatere. <sup>39</sup> Marta nauwaka mbai na ro Maria. Maria meke Yesus Na oro kelaunge nuweuboko Na a elewolere borowole. <sup>40</sup> Marta mbai raman anenaikonde naei mokoisaise humfo wamfo bewoke, eke Yesusre weunge, “Tuhan, Weyae nou ehei sele Maria ereufekoke rembai nda raman kaliare mokoyale. Weinye hakonsebone!”

<sup>41</sup> Tuhan Yesus yae weunge, “Marta, Marta, weyae buhae bele hokoibo-hokoibo humfo wamfo beyoyae, nda u bene nekeyayete, ndi u bene nekeyayete. <sup>42</sup> Naei berei sele na mbai ken, Maria yae nare ikileuboko. Ro miyae hi yae ha yae naei mera enukeisai.”

## 11

*Yesus Ebeli Na Mekaibe Kelewoumi*

*(Mat. 6:9-13; 7:7-11)*

<sup>1</sup> Ya mbai Yesus eke anuwau mbainye Naekore ebeline ekebowoungene. Baeufoko mo, ro mbai na moisa orowate holona yae meke weunge, “Tuhan, Yohanes naei moisa orowate yore ebeli boi-boi naeise keleumikoke wanen maere bele keleimeko.”

<sup>2</sup> Nebeisa Yesus yae weumi, “Mayae Araise ebelire bonnelerena, nda ma yae harannebombe bonnele,

‘Arai,

Waei ro nene waewae hele yae mokomayewende.

Ro miyae Waei me kelee u keleene nekate yo yan meujebo.

<sup>3</sup> Maei raman mana ya naeise maere na hului yae yeumele.

<sup>4</sup> Maei beko neban faeinyeimeko,

rabuhine ban meyae hiwa yo naei beko neban mokaimekokere u bene nundaimekoke.

Maere wabenaimele hee, ei haweumele.’ ”

<sup>5</sup> Yesus benen weumi, “Ro mbai mai riyara reniai nolo yae naekobaale bokore eube mo boungene, ‘Ako, waeinya feu fo name hului yeisoko ba. <sup>6</sup> Rabuhine ban raei kahili mbai kolora oroyelerabe raei imaene meke none yele, anengkonde naei ramanbe kabaennele.’

<sup>7</sup> “Naekobaale ekeboungene kiyae nda wanen mae eleukoube, ‘Reniai nolo helebe mekae yengkarae ya! Romau nemene ninae ahaendekoke, raei kelu omi bele ijongkune honande. Rambun hi reyae ware ainyui eyei sului ya.’ <sup>8</sup> Reyae wamale, naendae wanen na akobaale hele boungelere bae ainyui eraweibo. Nebeibe nane ro fe ban koli-koli bowoubene, naekobaale romau raweuboube yeungele.

<sup>9</sup> “Nebei aerene Reyae mare wamale, eitiyeinye, ware inyete; eihineinye baenye, rowele; me kaba-kaba boinye, ware romau raungeibote. <sup>10</sup> Riyende kiyae rowende;

baende kiyae hubainyekonde; romau me kaba-kabare bonde kiyae nare romau raungainyebonde.

<sup>11</sup> “Mai nolora ro nde naei fa kare riyewoung, rami yae ikeunge? <sup>12</sup> Ojo rore riyewoung, a kaikai yae ikeunge? <sup>13</sup> Mai wali bekobe, nebeibe mai kelu omi rambun riyayembe huluniye yeyaumi. Nebei sului mbai, mai Allah surga einye Kiyae, Naei Roh riyenainyele yore yemmile.”

*Yesusle Beelzebulle*

(Mat. 12:22-30; Mrk. 3:20-27)

<sup>14</sup> Ya mbai mo ro mbaite uwa bulura amunde mokoung alobe Yesus hukeungehike eukuke. Nebei alo eukukera, nda ro a elewole. Ro miyae helen sele ijoko kelei-kelei mo kelewate. <sup>15</sup> Na hiwa yo yae elate, “Beelzebul, walobo yunbe elae yae Yesus alo yoni-yonire hukeumi.” <sup>16</sup> Ro miyae hiwa Yesusre umali hubanainyehinde naeise surgana iwaufe riwainye.

<sup>17</sup> Nebeibe Yesus nebei yo na mekai harainyebokere isaeyebokene weumi, “Yo yan mbai na ro miyae be hun ma hun nekenatena, nebei yo yan here ware wembonde. Nebei sului mbai imae obe mbai na ro miyae naeise kena ikele ikowatena, nebei ro miyae here ware wembonde. <sup>18</sup> Walobo yun na walobo akobaere hukennehindena, na yo yan here ware wembonde. Mayae elaube Reyae Beelzebulle elae yae roukale alo yoni-yoni hukamaele. <sup>19</sup> Reyae Beelzebulle elae yae roukale alo yoni-yonire hukamaelena, mai riyana yo rahe elae yae alo yoni-yonire hukaumi? Mai moisa orowate yo nenaiejae mayae ame-amebe yanaube are wayembe! <sup>20</sup> Reyae Allahle elae yae roukale alo yoni-yonire hukamaelene, Allah meraufe raungehike hului Reyae Wali Ondofolo yae mere mokamaele.

<sup>21</sup> “Elae bele ro naei imaene nekelena, naei rambun yaroikoise ro miyae na hului ban sele. <sup>22</sup> Nebeibe ro hi naei elakei sele meube, nebei rore heraweuboube, na fela mendare rabo haleimeyunge mera nukeufaube, nane merau rambun nemene wahemmikonde.

<sup>23</sup> “Ro miyae Rangkele mbainye nekemalere ahire elate yo nana hesele Raei yokeijo. Nane merau ro miyae nde Rangkele mbainye nekemalere muli oyoboinya, nebei kiyae ro miyae herebe boumi.”

*Alo Yoni-Yoni Ro Miyae U Bulune Benen Meyeisiyele*

(Mat. 12:43-45)

<sup>24</sup> “Alo mbai ro uwa miyae uwara meituwele, anuwau kala-kalane yaneyele no yeiboise baeyele, ehubayeikoinya, elele, ‘Reyae benen bukerehinde raei imae nukeungebokale relahine erenekendere.’ <sup>25</sup> Bukeufike nane imae eke erewole bae, nebei imae erele mokoisai sele mokainyehake, na imaena rambun yoni-yoni hiyei ranaiboke. <sup>26</sup> Nebeinye benen bukeufike eke alo mehine bee bele na u mekai beko hele yobe yaweumiboke mekate. Yaweumiboke mekatera nebei role u bulune na riyane ayeuboke nekewate. Nda ro na beko hele wali bona nekewolera.”

<sup>27</sup> Yesus ane huwoumi yae miyae nebei ro miyae hebate nolora Yesusre weunge, “Ware honokete nane merau nimere naefokete miyae mbai, onomi foka hubanende!”

<sup>28</sup> Nebeibe Yesus yae weunge, “Ro miyae Allah weumi are boroyate nane merau nebei suluniye nekeyate yo onomi foka hubanainyende.”

*Ro Miyae Yesusre Riyewainye Rambun Emere-Emere Mokondere*

(Mat. 12:38-42)

<sup>29</sup> Yesus namman ane huwoumi yae ro miyae helen hokoumeke. Yesus uwoumi, “Nda hokolo na ro miyae na wali beko hele. Rambun emere-emere keleremibondere kena kate, nebeibe Reyae nare ekelei. Allahle yendo kayaalo Yunuslena relahire benen keleremibondere. <sup>30</sup> Yunus Niniwe yore kelewoumi wanen, nebei sului mbai Reyae, Allah bokora mekale ro miyae aware yeubokale Kiyae, nda heena ro miyaere kelaemale. <sup>31</sup> Miyae Ondofolo Hilo norona ahaufa mewole Ondofolo Salomole a usaeibe meke borowole. Nda hee Reyae mekahebale Ondofolo Salomole isaei hebaende moi wokanale. Nda kani kela huba mokoikoi yane, nebei miyae Ondofolo bele nda hokolona ro miyae bele nanembaisa annumbe, me nonomombe. Rabuhine ban, nebei Miyae Ondofolo, Salomole a usaeinye hakoubokene, nebeibe mayae Raei a usaei wamalere boraubebe, nebeibe ehakoiboi. <sup>32</sup> Yunus Allahlena a faeu eke Niniwe yona ro miyae uwoumine, nebei Niniwe yona yo naei beko bakora nulu keumiboke. Nda hee Reyae mekale Yunusre moi wokanale. Nda kani kela huba mokoikoi yane, Niniwe yona ro miyae bele nda hokolona ro miyae bele nanembaisa annumbe, me nonayemombe. Rabuhine

ban nebei Niniwe yona ro miyae Yunusle a uwoumi boraibokera nulu keumibokene, nebeibe mayae Raei a faeu elalere boraubebe, nulu ekeiboi mo.

*Ouben Bele Hehe Bele*

(Mat. 5:15; 6:22-23)

<sup>33</sup> "Isehe releungekoke kiyae nunne honate anuwau helai keleene obuneiboi sului. Isehe releikoyainye, nebei hehe naemmikonde naeise naei anuwaunge anaibonde. <sup>34</sup> Mai kena una hubaunge mai ijoko wanen mokoiboyole. Rambun foi reufine mo erembemba, hehere erembe wanen mai u bene foi nekenayemembe. Rambun na beko reufine mo erembemba, ouben hauben erembe wanen u bene beko nekenayemembe. Mayae u bene beko na hibi-hibi nekenayemembemba, mai kena une beko mo erembembe. <sup>35</sup> Nebei aere ne mai kena u kayaa foi yae hebembe, hehe naeukokebe kebengkonde bele. <sup>36</sup> Mai kena une hehe mo naaikoyelena, nebei heene ouben hauben enekei sului, isehe wauwane naeyete wanen."

*Moise Mo Foi Omokojae*

(Mat. 23:1-36; Mrk. 12:38-40)

<sup>37</sup> Yesus ara huwoumi baeufoke mo, Farisi holona ro mbai yae uwoungae naei imaene ramande eneyanengkonde. Yesus hakoungeloke nebei role imaene ramanne ekeyanewote. <sup>38</sup> Nda Farisina ro Yesus na me bu ekuyeikoi yae raman anwolene, fa yae bowole. ((Naei era hena honoyele ramande anenatere me bu kuyeikoyatera eyanewate.))

<sup>39</sup> Nebei wanen ukeungene Yesus yae weunge, "Na hele, mayae Farisi ro miyae mai kolaei bele hote bele na moi reufire mo bu kuyeyaube, nebeibe ma kena u ei bae bolu yae naba yae, beko yae bako yae maemae kongkokembe. <sup>40</sup> Mayae kobu! Allah moi reufi mokouboke Kiyae mbai eise naei wanen mbai mokouboke. <sup>41</sup> Mai hote ei kolaei einyabe keren ban nale ban yore hakommiyembemba, ma kena ei yolo-yolo yembonde.

<sup>42</sup> "Mayae Farisi ro miyae beko hele hubannele, rabuhine ban mai ani era hekena yaroyaube yele era me bee kayee rora mbai Allahre yeyaunge, nebeibe ro miyae hiware na ijen ban mokoyaumi nane merau Allahre kena buhae ehoyei. Nebei me ube na bereise mokomembe nane merau Allahre hili era akau era yennele naeise moise ehayejae.

<sup>43</sup> "Mayae Farisi ro miyae beko hele hubannele, rabuhine ban Allahre ei mom-mom imaene mayae kena hele anuwau foise-foise baeyaube royaube. Nai hei-sei ijenne mare rore melaeinyayembere mai kena hele koyaube.

<sup>44</sup> "Mayae beko hele hubannele, rabuhine ban mayae here bulei auma ban na wanen. Ro miyae nebei bulei randa atebe, nebeibe kelen bele baeei bele rambun nebei kani bulune honate neyae isian."

<sup>45</sup> Musale walora wali heere foloukoke are isaeyaeiboke kelaeimi holona ro mbai Yesusre weunge, "Guru, nebei a mekai huwaemae yae naei naei a bekobe huwaemae."

<sup>46</sup> Yesus yae weunge, "Mayae Musale walora wali heere foloukoke are isaeyaeuboke kelaeumi yo beko hele hubannele, rabuhine ban nebei wali heere foloukoke homofaena honate huluinye waumi nda wanen mae mokon, ndi wanen mae mokon, nebeibe ro miyae nebei wali mane enainyekende heene mayae nare ebi fere hara enei sele einyekewaube.

<sup>47</sup> "Mayae beko hele hubannele, rabuhine ban mai Allahle yenjo kayaaayo na bulei ranne mayae u bene nekeise-nekeisi fale foi haeube. <sup>48</sup> Nebei nibi yae mai yobe naei kamahe naei me u mayae be yae hinaube. Mai yobe naei yae haikoke, mayae bene nekeisi-nekeisi fale haeube. <sup>49</sup> Nebeinye Allah Na isaei hebaen bele yae elele, 'Raei yenjo kayaaayo bele, Raei abu ako bele ufemile enate. Naei nolora hiware beko mokonaimiyende, hiware honayende.' <sup>50-51</sup> Nebei aere ne nda kani kela na hubare rawebokera Habelre haiboke heera huba rawembonde mende Zakhariale heene Allahle yenjo kayaaayo nemene haikoke aere ne, nda heeng nekate ro miyaere Allah ehee bukulu hainyemikonde. (Zakharia hili era akau erare onkoufe felate itukai bele, Allahre ei mom-mom imaene bele haiboke.)

<sup>52</sup> "Mayae Musale walora wali heere foloukoke homofaere isaeyaeuboke kelaeimi yo beko hele hubannele, rabuhine ban Allahle isaei hebaen naei romau einye mayae hebaube ((mayae kelaeumi)). Nebeibe mai wali nebei a huluinye aloisai mo, benen nebei wali nibine hakonate ro miyaere mayae a hun mae kolaumi!"

<sup>53-54</sup> Yesus kulun uke heene Farisi holona ro miyae nane merau Musale walora wali heere foloukoke homofaere isaeyaeiboke kelaeimi yo, Yesusre ikele hele kowainye, walangka wanen wokainyete a mahi-mahi yae hinewainye.

## 12

*U Mekai Bee Bele A Usaei*  
(Mat. 10:26-27)

<sup>1</sup> Ro miyae nekai sekai sele kilin-kilin hoi-soi, oro hi ran hi ranne hebeyeke. Nanene hebete wa Yesus na moisa orowate yore weumi, "Farisi kelaeimi are kayaa foi yae hebembe. Rabuhine ban naei u mekai be bee bele yae nekate. Ragi ebi ken mokoung tepung kaban ohulembonde wanen Farisi yae a kelaeimi na hului mokonaimile ro miyae helen u bene beko nekenaimile. <sup>2</sup> Nunna honate yo nemene ninae yakanaibonde a yakane kolonaimikonde. <sup>3</sup> Reniai yae elewaube a faeu, rai yae boronate. Ro miyaere angkaei kelaeufa a maehae-maehae yae yowa einye uwaumi, a yaka bu yakane kaenenate." (Nebei aere ne u mekai be bee bele yae enekeijae.)

<sup>4</sup> "Aka naei baeke naei, Reyae wamale, nda uwa melen honayembe hainyayembe naeise mayae buhae ohokoiyae. Rohre neyae ohoiboi sului. <sup>5</sup> Mana Reyae kelerembombere ndere mayae fe faennelere. Allah mbaise mo fe faennele. Neyae na hului ro miyae uwa hombondera na hibi narakare kannehinde ende. Nebei Kiyae Niya mayae buhae hokonnembe. <sup>6</sup> Aye maehae mbaise roi na ane hele heiboyate, nebeibe Allah aye mbai sambaise enundeikoi sului. <sup>7</sup> Wa yunna umaa Allah na helen Naeisaei. Nebeinye Reyae wamale buhae ohokoiyae, rabuhine ban mai yeisi raeiboi na bumana hele aye yoni-yonira."

*Yesusle Ro Na Hele Yae Elembe Ro Miyae Naei Bene*  
(Mat. 10:32-33; 12:32; 10:19-20)

<sup>8</sup> "Reyae wamale, nde yae ro miyae naei bene Rare Wali Ondofolo yae elendena, Reyae, Allahle bokora mekale ro miyae uware yeubokale Kiyae, naei mekai mbai Allahle malaikat yoni-yoni naei bene nebei rore Raei me kelee u keleene nekate holona ro yae erelengkonde. <sup>9</sup> Nebeibe nde yae ro miyae naei bene Rare Wali Ondofolo ban mae elendena, Reyae naei mekai mbai Allahle malaikat yoni-yoni naei bene nebei rore Raei me kelee u keleene nekate holona yo ban mae erelengkonde.

<sup>10</sup> "Nde yae Rare, Allahle bokora mekale ro miyae uware yeubokale Kiyae, a beko faeu beko wenselena, nebei kiyae na beko mokowolere na hului faeinyerembonde, nebeibe nde yae Allahle Rohre a aukaka konnele kiyae naei beko mokowolere efaeinyeiboi sului.

<sup>11</sup> "Ei mom-mom imae yun-jun bene, yoyo koseyo bene, mere mokaimi ro bene wauwa foi naeise olelere yaungayeufote heene a weyae buhae ohokoiyae nane merau eleukonde a nemene buhae ohokoiyae mo hebembe. <sup>12</sup> Rabuhine ban nebei hee Allahle Roh yae eleukonde a faeu nemene ware keleneikote."

*Rundo Kangkelo Ro Kobune Ahuneuboke*

<sup>13</sup> Nebeinye arilewole ro miyae nolora ro mbai yae Yesusre weunge, "Guru, raei aka baeke weinye maekolena run kangke meyae beere nukeumiboke raei bele yae hi yensele."

<sup>14</sup> Yesus yae weunge, "Aka baeke, nde yae Rare roukeufe mai nolora heberenunde mai run kangkere waherekobere?"

<sup>15</sup> Nebeinye nekewate ro miyaere Yesus yae weumi, "Mauwa foi yae kayaa hebembe, kuikui maemaere kena haehae okoiyae. Naendae wanen horore ro mbai kuikui maemae nolone nda wali heki nekeweube, nebei kuikui maemae yae nare wali foise eyei."

<sup>16</sup> Nebeisa Yesus nebei ahuba ahuneuboke a huwoumi, "Ro mbai run bele kangke bele. Kani foi kela foi tanne nekewolene, nime kaungei bele na imaene honowate. <sup>17</sup> Nda ro na kena eisa elele, 'Rahebe nda hee mokorebonde? Nebei ani era, kombo mahu, nime kaungei bele honaisene kolorekonde anuwau u yeuboke.' <sup>18</sup> Nebeisa u bene nekainyekoke mo nenaeyae nauware weunge, 'Ninae u bene nekaisehike. Nda imae kolate relahibe ufemile kelanaibonde benen naei kaban sele yae henaikonde. Nebeinye ani era kombo mahu abunerehinde hononate.' <sup>19</sup> Nebeisa wa raei uware ufende, 'Rambun foi helen sele arilewekae, ninae na hului arilewoyae! Na hului nekewende rimolone yangkone. Mei, meyane meisire.'

<sup>20</sup> "Nebeibe Allah weunge, 'Kobu! Nda reniai sele weyae herele. Nebei rambun yoni-yoni arilewoyaebe weyae ehubaisi.' "

<sup>21</sup> Na ahuba riyau weiboise wa Yesus yae weumi, "Na mekai naei wanen, nda kani kelane ro miyae hembonine relane mo arilenende, nebeibe Allahlena a weunge huluinye ehakoiboi."

*Wali Rambunde Buhae Ohokoiyae*  
(Mat. 6:25-34)



<sup>22</sup> Nebeisa Yesus na moisa orowate yore weumi, “Reyae mare wamale, eraman bu, malo, ma wali rambunde buhae ohokojiae! <sup>23</sup> Mai wali einye na bereinye kiyae raman bu ban nane merau malo ban. <sup>24</sup> Aye abara mali koyate ijoko foi yae na wali eremmikombe! Nebei aye meleme ban, kombo mahu mokoiboyole neyae einyihei, nane merau imae kaban obe kaban ban nebei kombo mahu nimere kolonatare. Nebeibe Allah nare holeyeumi! Mangkele aye bele, meyae aweuko. <sup>25</sup> Naendae wanan, mai nolora nde buhae-buhae yae na wali hukai mbai baraungeboke? <sup>26</sup> Wali hukai mbai ken mayae ebaraikoi sului, Allah mo na huluinye, waennehimbe Allah mai wali rambun inyembe. Nebei naeise mayae buhae ohokojiae.

<sup>27</sup> “Eme! Arokou kitele ma ijoko foi yae erennekombe me u omokoyei, malo ehayei, nebeibe na u mokoisayeunge baengko fereisaye. Ondofolo Salomo rundo kangkelo hororebe naei u rela kiteungeboke, nda arokou ehameikoi sului. <sup>28</sup> Faunga ke hebeyate mana kitate wahanare i yae baikoube ika bangka yaeiboube. Nebeibe Allah nebei kere uwa moloumiboke foi moi sele yaeiboke. Emekai bele Allah mayae hila rabo elae ban yore uwa baengkore ferenembe rambun inyembe. <sup>29</sup> Raman bu anengkombe naeise buhae ohokojiae. <sup>30</sup> Rabuhine ban Allahre isian yo yae nebei rambun naeise rilibo hayeyate. Mai Arai Allah wali rambun yembe nibire isaeyeuboke. <sup>31</sup> Nebeibe Allah merau raungehike hului Raei me kelee u keleene nekate holonare me baenembombere relennekombe. Neyae mai wali rambun nemene barannembe.

<sup>32</sup> “Mayae holo kaei-kaei ken buhaebe ohokojiae, rabuhine ban Arai Allah kena rei mai aungeboke Raei me kelee u keleene nekate holona yo yae ei hawennembe. <sup>33</sup> Mai keren nale roi naise heiko! Nebeisa nebei roi keren ban nale ban yore waheumiyende. Ma me u foi mokombena, surgana hemboni rela wanan rambun hononayembe. Nebeinye yokoyo yae erowe, nane merau mane yae ofoloyei hononayende. <sup>34</sup> Makeinye hemboni relare honate ijen, mai kena u nebeinye mo.”

#### *Mokoisa Mokoisa Yae Nekembe*

<sup>35</sup> Nebeisa mo Yesus benen nda yore weumi, “Kayaa na hebembe erabuhi yeiboi bele era. Ma malo nemene ma uwane mo kitennebombe, ishe na naeiso yae hebembe. <sup>36</sup> Abu ako na rowa kolore eyewole rakeunge wanan mauwa mokonnehambe rakembe, mele romau me kaba-kaba bole bae na hibi romau raweiboyeunge. <sup>37</sup> Abu ako romau kayaaere hebeyate yo na ijoko elae mo isebewate yae na rowa mele hee, kena rei mai ikowate. Na hele, nda wanan bele bae nebei rowa na abu akore ungemile raman mbainye anenante, naei me yae raman naei abu akore wahemmile. <sup>38</sup> Abu ako na rowa reniai nolo, na rene kaukau mende na ijoko elae mo isebewate wali ma yae hubainyaukonde, nebei hului mbai rei mai konate. <sup>39</sup> Nebeibe nda a bele isaeyembo, Imaena rorele yokolo mendere hukai naeisaeinya, imae nendon yokolore ewaeisi sele. <sup>40</sup> Mayae naei wanan mokoisa-mokoisa yae nekembe, rabuhine ban mayae isian ya Reyae, Allahle bokora mekale ro miyae uware yeubokale Kiyae, benen merele.”

<sup>41</sup> Petrus yae Yesusre hineunge, “Tuhan, mai foi naeibe Weyae ahuneubokae weyamae, ro miyae nemene foi naei?”

<sup>42</sup> Nebeibe Yesus yae beufoke weunge, “Abu ako na rowa a weunge huluinye imokowole nane merau isaei hebaen bele ma yae uwa haraungeboke kiyae na rowa yae kaeiboyole yunde yeiboyole. Nda ro yae yebaei bubaei hiwa yore raman yeumi na hu huluinye aneikoyate. <sup>43</sup> Na rowa meke heene nebei abu ako imae einya rambunne roi yae bu bende kiyae, onomi foka yae hubannele. <sup>44</sup> Reyae na helebe wamale, nebei wanan bendena, nebei rowa na hemboni rela nemene kayaa hebende naeise nda rore inyengkonde. <sup>45</sup> Abu ako beko kiyae bae, na kena eisa elende, ‘Nda rowa eke namman wabenende.’ Nebeinye, na yebaei bubaei huba rawembonde rone miyaere rahuae olemmle, raman bele bu elae bele anenende, yun yambi-yambi anebonde konde. <sup>46</sup> Na kobu-kobu konde hee yae na rowa mende. Nda abu akore na rowa mende yae rowende, ramiyaeli yae folongkonde, ro miyae Rare hila rabo ehalei yo nolone hannebonde.

<sup>47</sup> “Abu ako na rowa kenare kole naeisaeibe, nebeibe naei kena kole hului omokoikoinya nane merau nauware omokoisainya, na rowa mende heene nda abu akore rahuae elae hele bongkonde. <sup>48</sup> Ro hi, na rowa kenare kole naeisaei ban nane merau ehe bukulu hainyainyele naei rambun mokombonde kiyaere, rahuae elae ban bonaikonde. Helen ikainyele kiyaera helen riyanainyele. Kayaa hebende naeise helen ikainyele kiyaera helen sele riyanainyele.

#### *Rei Mai Ban, Nebeibe Ikele Han*

*(Mat. 10:34-36)*

<sup>49</sup> “Reyae nda kani kela ise ufoyonde bolonsinde naeise mekale. Raei kena u eisa elale, nebei i boloufiube beube ya! <sup>50</sup> Reyae beko namman foronsubangkonde nane

merau kena beko foronsubangkonde mende nebei beko baensonde. <sup>51</sup> Mayae u bene nekayembe, Reyae rei maibe nda kani kelare roukale mekale. Nebeibe rei mai ban, ikele hanbe Reyae roukale mekale. <sup>52</sup> Nda heera huba rawembonde imae mbainye ro miyae maehae mbai nekenate, bee yae name bele oinyaikonde relenainyele. <sup>53</sup> Na waere-waere, naeko yae na kelule a onyeibonde, na kelu yae naekole a onyeibonde. Nenake yae na maengkere a onyeibonde, na maengke yae nenakere a onyeibonde. Nenake yae na fau miyae a onyeibonde, na fau miyae yae nenakere a onyeibonde."

*Kani Kela Na Mekai Beimeyeunge Isaeimabonde*  
(Mat. 16:2-3)

<sup>54</sup> Nebei ro miyae arilewole yore Yesus benen weumi, "Mangko wai reufire keteijele mayae na hibi yae elaube, 'Yare molondere,' na hele ya moloikoyole. <sup>55</sup> Nane merau alu eraunge nau reufira mele bae elaube, 'rolonsan wendere,' na hele rolonsan naeikoyole oyowole. <sup>56</sup> Mayae maisaei nda kani kelara nane merau yakura ya mehinin alu mehinin kolaungebe, nebeibe Raei me u mokalere mayae isaeyeiboi, nane merau Allah meraufe raungehike hee Naei holona ro miyae Raei me kelee u keleene nekenate ya nabeungeboke mayae isaeyeiboi.

<sup>57</sup> "Mayae menaeijae foi naeise a ohoikoi! <sup>58</sup> Weyae yokeijo hi bele yoyo koseyo bene ebe mai a ranainyehinderena, u hale yae releungekonde nda ro bele foi mokokobe. Foi omokoikoinya, ware yoyo koseyo naei me einye kinyenaibote, yoyo koseyo yae Polisi naei me einye kinyenaibote. Polisi yae ikilenaibote embe ware kawane henaikote. <sup>59</sup> Reyae wamale, naei riyegete roi aheikoi ebaeisoinya, weyae kawa eisa emeituiwei sului."

## 13

*Beko Bakora Nulu Ekeiboinya, Beko Eubende*

<sup>1</sup> Nebei heene ro miyae hebate nolora hiwa Yesusre uwainye, Galilea kanina ro miyae Allahre hili era akau era ongkoufe felewainye hee yae Pilatus houkoke. <sup>2</sup> Nebei a boroukokene Yesus yae hinewoumi weumi, "Mai u benera nekayembe hului, Galilea ro miyae nolora nebei ro miyae na wali beko helene neyae nebei wanen mae haikokate? <sup>3</sup> Reyae wamale, nebei mekai ban. Nebeibe mai beko bakora nulu ekeiboinya, mayae nane merau Allah bele wahengkombe. <sup>4</sup> Nane merau mai u bene nekayembe hului, nebei ro miyae 18 Siloam imae yae oke herauwolere Yerusalem yona ro miyae nolora na wali beko helene hereke? <sup>5</sup> Reyae wamale, nebei mekai ban. Nebeibe mai beko bakora nulu ekeiboinya, mayae nane merau Allah bele wahengkombe."

<sup>6</sup> Nebeisa mo Yesus nda ahubabe ahuneuboke huwoumi, "Ro mbai anggur heke mokouboke nolone ara no mbai moloufakere. Ya mbai mo nebei ro eke ara no hebelenana anire kaneweke an, mbai ereiboi mo. <sup>7</sup> Nebei aerene, na heke mere mokole roro weunge, 'Eranae, nda ara no hebele ralo yakama name hele anire meungerakeukokale mbai sambai ehubayeikoi mo. Kaheinyoko ou! Na karo hele ndane hebeimeyele!'

<sup>8</sup> "Nebeibe nebei heke kayaere hebele kiyae yae na roware weunge, 'Nda ralo yakama mbaise mo eranekon hebeukoke. Reyae enera enera kani waerekonde retara einye haufekonde. <sup>9</sup> Na u bene nekainye hului bena ralo yakamane ani mokonde era. Ani wa mokondena, hebende; omokoinya, kaheungekonde ruwende.' "

*Miyae Mbai Moko Buru Nekewekebe Yesus Sabat Ya Yae Onomi Ikeunge*

<sup>10</sup> Sabat ya mo, Yesus Allahre ei mom-mom imae mbainye eweufike kelewoumi. <sup>11</sup> Nebeinye miyae mbai ralo yakama 18 alo yae aungebokene buloone mo koweke. Moko buru yeuboke aufaere na hului ban. <sup>12</sup> Yesus nda miyaere erekeunge bae na hibi kaeneungekoke. Nda miyaere weunge, "Nda hee ninnae weyae onomi roukae!" <sup>13</sup> Yesus nebei miyae moko buru ranne mere mo raungehike. Nebei hee yae nda miyae na hibi na uwa benen aloukokene Allahre na hibi buma kolowoungere.

<sup>14</sup> Yesus Sabat ya yae nda miyaere onomi ikeungene ei mom-mom imae yunde hebewole kiyae ikele nekai sele kowole. Nebeinya ro miyaere weumi, "Ya mehine mbai eyae kaliare mokomale ya. Nebei ya yae membe onomi inyayembe, Sabat ya yae emejae!"

<sup>15</sup> Yesus nebei ei mom-mom imae yunde hebele kiyae weunge, "Mayae u mekai u bee wa bee yae nekaube! Sabat yane baei mai obo yoku elera raweboyau mi yawaumi raman bune baeyate. <sup>16</sup> Nda hee nda Abrahambe orona mena miyae mbai ralo yakama 18 alo yae aungeboke. Naendae wanen, nda Sabat ya yae nebei alo hukeisi eituwei sului?"

<sup>17</sup> Yesus nda are mo ukeumi bae, na yokeijo fene kuinyei-kuinyei kuinyewate, nebeibe Yesus nda me u wanen mokouboke naei ijoko yae erewatene ro miyae hiwa rei mai kowate.

*O Haka Wanen Mae Ahuneuboke Huwoumi*  
(Mat. 13:31-32; Mrk. 4:30-32)

<sup>18</sup> Yesus yae hineumi, "Raei me kelee u keleene nekate ro miyae holo rahe mekai elemakonde?" <sup>19</sup> O kaban ko heke ro rouke na hekene eke moloufake yae a ahunerebondere. Nebei o kaban na ro Yunani afaeunge *mustard* yae elewate. Nda o haka ko sawi ko wanen mbaibe na kaei-kaei sele. Nebeibe kitele bae nda o reu ha reu hiwa hebatera neyae na kaban sele yeiboyele, maensa akau rorole ate, aye bumana mate nebeinye no yeiboise meisebate."

*Benen Ragi Yae Ahuneuboke Huwoumi*  
(Mat. 13:33)

<sup>20</sup> Yesus benen hineumi, "Raei me kelee u keleene nekate ro miyae holo rahe a yae ahunerebonde?" <sup>21</sup> Nebei holo nda wanen elerekonde, miyae mbai ragi ebi mo roke terigu kaban mokoungihakene nanemene alewoungelē."

*Romau Kiki*  
(Mat. 7:13-14, 21-23)

<sup>22</sup> Yerusalemde ewole nibi na yo ran yo randa oroweke, yo ebibi, yo kaban-kabanne keleumiyeke. <sup>23</sup> Oroweke mo, ro mbai yae hineunge, "Tuhan, wali hena bonare enaiyaronde ro miyae helen, na keli name mo?"

Yesus yae weumi, <sup>24</sup> "Mayae relenembe romau kikirā emembombe, rabuhine ban ro miyae nekai sele nebei romau kikirā enayembondere relenainyele, nebeibe na hului ban. <sup>25</sup> Roko mbai nebei imaere rorele annunde nebei romau ahunembonde mare na moinye nenensimbe hebembe, me kaba-kaba yae bombe wennele, 'Rowa, romau raweibo meyae emambondere!'

"Nebei rowa yae ungembe, 'Reyae mare onaemale ya, makeisabe meyae mekaube.'

<sup>26</sup> "Mayae benen wennele, 'Aei mbai raman anewande. Weyae mbai maei yone kelewamae.'

<sup>27</sup> "Benen nane a mbai ungembe, 'Reyae mare onaemale, makeisabe meyae mekaube. Ndara eme hasale yae beko bakore mokoyaube ro miyae!'

<sup>28</sup> "Naei ya mende mayae Abraham, Ishak, Yakub, nane merau Allahle yenjo kayaayo nemene Allahle yo ei waku einye eremmile, nebeibe mare hukenayensimbe. Nebei heene mayae rime a kena beko hele kombe. <sup>29</sup> Naufa, waisa, ebunda, robonda nemene menate Allah naei yo waku mennembondene nebeinye raman bulaunge rei mai yae menaikonde. <sup>30</sup> Nebeibe rore rowaimi ro miyae helen Allahle bene ro ban inyaiyabonde. Nane merau nda hee ro ban nekate ro miyae helen ro bele inyaiyabonde."

*Yesus Yerusalem Yore Kena Beko Kowoungelē*  
(Mat. 23:37-39)

<sup>31</sup> Nebei hee Farisi holona yo hiwa mekate Yesusre wainye, "Nda yora eye, yo hire yae ele, rabuhine ban Herodes ware honeubondere baete."

<sup>32</sup> Nebeibe Yesus yae weumi, "Eme, nebei ame-ame yaneyele ro isaei yennele, 'Ereiko, nda hee bele wahena bele alo yoni-yoni Reyae hukeremile, erane buloone kayeke yo onomi isemiyende. Ya name nendo Raei kalia riyau ufebonde.' <sup>33</sup> Nebei aerene Reyae nda hee, wahanare, ya hende alorengkondere, rabuhine ban na mekai ban sele Allahle yendo kayaalo mbai sambai Yerusalem yo moinye herende.

<sup>34</sup> "Yerusalem, Yerusalem! Allahle yenjo kayaayo mayae howaube haiwaube! Allahle abu ako ruka yae bowaube haiwaube! Roko naennaen don ojo nafe na fa-fare nora keleene hanemikondere wanen mae mare yaufembombere relewanale, nebeibe meyae kena ban sele. <sup>35</sup> Nebei wanenne nda heera mare Allah ei ehawei. Nda a isaeyembombe, nda heera Rare ereiboi mo nekemembe mende mayae elembe, 'Tuhan Allahle Ro eisa mele Kiyae onomi foka hubannende.' "

## 14

*Ro Mbai Yesus Sabat Ya Yae Onomi Ikeunge*

<sup>1</sup> Sabat ya mbai mo Farisi holona ro bele rowainye ro mbai naei imaene ramande aneikondere Yesus eke. Hiwa yo Yesusre ijoko mokaiboke erewainye. <sup>2</sup> Yesusle bokore ro mbai na uwa nemene benben baeyeke meke Yesusle bene meufebeunguke. <sup>3</sup> Nebeinye nekate yora hiwa Farisi holona yo hiwa Musale walora wali heere foloukoke

homofaere isaeyaeiboke kelaeimi yo. Nebei ro erekeungene, Yesus nebei yore hineumi, "Musale walora wali heere foloukoke a hului Sabat ya erane buloone kayeke yo onomi imamile, eyeijae?"

<sup>4</sup> Nebei yo hineumi a ban faeu ban yaeiboke. Nebeinye, Yesus nebei ro yaweungehoke meke na hibi onomi ikeunge, nebeisa ukeunge ewole.

<sup>5</sup> Nare ewole mo, Yesus nebei arilewole yore weumi, "Ro mbai na sapi kelu Sabat ya yae perigi einye ruweube hikoube, nde yae mai nolo mekaubera Sabat yane nare hole omoloiboi?"

<sup>6</sup> Nebei yo hi yae Yesusre a ebeisoi mo, a ban faeu ban yaeiboke.

<sup>7</sup> Nebei yo riyane kaenewoumi mekate Yesus ereumi anuwau foise-foise mo baetene, Yesus nda ahuba ahuneuboke weumi, <sup>8</sup> "Ro mbai raman bulau mokombondere ware kaenekote melene, anuwau foise-foise ebaeijae. Rabuhine ban, yeisi raeiboi kaban bele hibe moisa wabengkonde mende era. Nebeinye, <sup>9</sup> nebei imae rorele yae mende ungete, 'Kena beko okojiae, nda angken nuwei nekeyae ndi ro kiyae melere rannehike.' Nebeinye wa fe bele aungunde, na moinya hele angken nuwei honatene eunguweubonde. <sup>10</sup> Reyae wamale, ro hi yae ware kaeneneikote naei imaere elena, angken nuwei na moinya helene rowele. Nebeise kaenewole kiyae nenaiejae mende ungete, 'Ako, mei ndi anuwau foinye nuweibo.' Nebei wanende ware ro miyae arilewole nolone burna kaeneibote <sup>11</sup> Nde nauwa kaendena, kerenainyekonde onde. Nde wali ara nihennehindena, ro miyae nare ro enainyeronde."

<sup>12</sup> Nebeisa mo Yesus nebei imae rorelere weunge, "Raman bulau kaban, ebi mokoubondene waei kahili wafeu, aka baek, hokolo oneyau, waei imae ribo mbainya nekaube ro miyae, hembonilo relalo, ekaenei emejiae. Rabuhine ban, benen ware kaenenayeikote. Weyae mokowamae wanen naei wanen mbai benaibonde ware mokonayete. <sup>13</sup> Nebeibe raman bulau eumokoubondene keren ban nale ban yo, mera nimewaimi yo, orora nimewaimi yo, ijoko kumba yo, kaeneumile menate. <sup>14</sup> Nebei wanen mokoubondena, Allah ware foi yae ei haweneite. Naendae wanen horore nebei yo ware benen ebeisoi omokoiboi sului, wali himalainyeboke ro miyae nulu yo mahe yore benen anainyunde heene, Allah waei roibu hobeneikote."

*Raman Bulau Kaban A Yae Ahuneuboke Huwoumi*  
(Mat. 22:1-10)

<sup>15</sup> Nebei nolora ro mbai Yesus a eleukoke boroukokene, weunge, "Ro miyae Allah Naei yo waku mende yane yawemmile raman bulau Nangkele mbainye enayanende yo, onomi foka hubanainyele."

<sup>16</sup> Nebeibe Yesus yae nda ahuba ahuneuboke weunge, "Ya mbai, ro mbai raman bulau kaban mokoubokere ro miyae helen homo hayewoumi. <sup>17</sup> Meraufe raungehike ya mo, nebei rorele naei abu akore ukeunge homore hayewoumi yore emmikaenendere, 'Mem, nemene ninae mokannehake!'

<sup>18</sup> "Nebeibe kaenewoumi yo menate naeise na hului ban mae a wainye.

"Ro mbai nendo kiyae weunge, 'Ikele okojiae, reyae kani manemfa roukale, ijoko ereiboise erelere hele.'

<sup>19</sup> "Ro bee nendo kiyae weunge, 'Ikele okojiae, reyae nda sapi me bee menemfa roi yae roukale, ijoko foi eremierengkonde hele.'

<sup>20</sup> "Ro name nendo kiyae weunge, 'Miyae manemfa hele roukalene reyae ei sului.'

<sup>21</sup> "Nebei abu ako bukeufike eke na roware nebei a weungekoke. Na rowa nebei wanen boroubokene, ikele hele kowole. Nebeinye benen na abu akore weunge, 'Hasale yae bukeisi eye. Nibire, a koukoufe baeumile. Hun ban wai ban yo, mera nimewaimi yo, ijoko kumba yo, oro nimewaimi yo, nemene yaweumile ndare menate.'

<sup>22</sup> "Na heki ban mo nebei abu ako na roware weunge, 'Nemene weyae ukarae huluinye mokowale, nebeibe angken nuwei hiwa namman na bangka honate.'

<sup>23</sup> "Nebei bulau ro benen weunge, 'Raei imae ei maemae kongkonde naeise eye, nibi kabanna akela nibina ele, erumile yo u hale yae weumile ndare menate. <sup>24</sup> Reyae wawale, nebei homore waheukokamaele yora ro mbai raei imae eise raman aneikoise menensinde belene.' "

*Yesusre Hakonnebonde Oroneyende Ro Naei Wali*  
(Mat. 10:37-38)

<sup>25</sup> Ro miyae helen sele Yesusle moisa mewate. Euweke erekeumi mo weumi, <sup>26</sup> "Rare kena buhae heufene hakonsebonde oroyende kiyae nenake naekore, na miyae fa-fare, naei aka baekere, nane merau naei uware bele hole omoloyei yae Raei moisa ehakoiboi oroi sului. <sup>27</sup> Raei aerene ohaline bonaikonde ro Rare hakoufele wanen ehakoiboi kiyae, Raei moisa orowate holona yo ban.

<sup>28</sup> “Ro mbai mai nolora imae mbaise hembondena, namman eheiboi mo roi na helen me baengkonde. Roi na hingkin ma nda imae hembonde riyau wennebonde. <sup>29</sup> Rabuhine ban huba yae yensebendena, erabae aehure bohi ruka ahuneuko, erenate yo re yae harenainyele. <sup>30</sup> A elenate, ‘Yei, nda ro na imae hewole riyau eweiboi ya!’

<sup>31</sup> “Nane merau ondofolo mbai naei felayo ro nemene 10.000. Ondofolo hi kiyaele fela roroneikondere nebeibe naei felayo na helen 20.000. Nebei aerene ondofolo mbai nendo nuwembonde nou hembonde na hului nebei felayo helende melemmihande. <sup>32</sup> Nauwara hubannele na hului banna, namman ahaufa nekele heene abu akore wemmile enate, foi mokonaikonde.” <sup>33</sup> Na huba mokoikoise wa Yesus yae weumi, “Mai nolora nde nerambun-rambun enukeiboi ehaiboinya, Raei moise hakonate holonane eyeisi sului.

<sup>34</sup> “Hae na yu foinya, nebei hae na foi. Nebeibe na yu u yembondena, na hului ban benen yu belere mokonainyebonde. <sup>35</sup> Nebei hae rabuhi ban yeuboke, kani foi mokonnekondere na hului ban sele, na hibi kaenainyehinde.”  
“Raei wamale are boraube ro miyae nebei are nou hembe.”

## 15

### *Domba Mbai Nundeuboke* (Mat. 18:12-14)

<sup>1</sup> Ya mbai mo, Yesus huweumi are boronate naeise pajakre arilate yo nane merau u mekai beko bako bele yo arilewole. <sup>2</sup> Nebeibe Farisi holona yo bele Musale walora wali heere foloukoke homofaere isaeyaeiboke kelaeimi yo bele a mulun-mulun mae elewate, “Yeu, ro miyae u mekai beko bele Neyae ei haweyeumi nane merau raman don bele mbainye anate.”

<sup>3</sup> Yesus nda ahubabe ahuneuboke huwoumi, <sup>4</sup> “Ro mbai mai nolora wanen naei domba nemene 100, domba mbaibe nundeuboubena, rahebe mokouboube? Neyae nebei 99 nemene na ke faunge nukeumiboube, nebei mbai nundeuboke kiyaere baeungeweube roweungele mete. <sup>5</sup> Nda domba mbai ken nundeubokere hubayeikoube baka ranne kaeuboube kena rei mai bele imaere meube. <sup>6</sup> Nebeisa nebei ro naei hokolo uneyau, ro miyae naei imae ribo mbainye nekate yo kaeneumile, ‘Mem, rei maise komalere. Ra domba mbai nundeubokerabe, nebeisabe ekale roukanale mekende.’ <sup>7</sup> Nebei wanen mbai ro mbai beko nolora meukuke nulu keungebokene surgana yo rei mai kaban sele kate, ro miyae 99 nulu keumibokera.”

### *Roi Perak Mbai Nundeuboue Ahuba*

<sup>8</sup> Yesus benen nda ahuba ahuneuboke huwoumi, “Maengke mbai na roi perak me bee hele. Mbai nundeuboubena, isehe yae naeufoube, niheungehiube imaena retara nemene faeinyeukoube, baeube. <sup>9</sup> Ereubera, naei hokolo uneyau bele imae ribo mbainye nekate yo bele kaeneumile, ‘Mem, nda heene raei imae einye rei maise komalere. Rabuhine ban raei roi perak mbai nundeubokerabe benen roukale.’ <sup>10</sup> Reyae wamale nebei wanen mbai ro mbai beko bako mokoimeyelera nulu keungebokene Allahle malaikat yoni-yoni rei mai kate.”

### *Fa Mbai Nundeuboke*

<sup>11</sup> Yesus benen nda ahuba ahuneuboke weumi, “Ro mbai na kelu fa-fa bee. <sup>12</sup> Na moinya kiyae yae naekore weunge, ‘Arai, waei rambun rambun honatera raei kayee yeisoko.’ Nebeinye naeko hokolo beere naei rambun kayee moloumikoke. <sup>13</sup> Mainyekeuko mo, nda fa nebei rambun naei kayee yeungekoke yaroukoke naise heukoke, kulun uke ahaunga kanire ewole. Eke nebei kanine na roi nemene haiwole, wali na isohi-isohi bekore kena haehae kole hului nekewole. <sup>14</sup> Na roi baeungehoke hee mo, moni mai naei kaban sele nebei kanine meungeke kowate. Na wali kabewounghe hele. <sup>15</sup> Nebei kanina obore nareumi ro mbaite bokore eke, roi kaliare mokondere riwounghe. Nda ro yae ukeunge naei obo kayaane eke hebewole. <sup>16</sup> Nebei ro moni yaroungkokene, obo yae anate ramande naei kena anengkondere kowole, nebeibe hi yae ha yae nare eyei mo.

<sup>17</sup> “Nebeisa u bene meungenekeufike elele, ‘Yei, maekole imaena na yebaei bubaei raman aneyatera kalun-kalun bele ekaisonate, nebeibe ndane reyae monine hererelere kale! <sup>18</sup> Mana ya reyae maekole bokore bukerehinde erelere maekore na yaka yae ufende, “Arai, reyae u mekai beko helebe Allahre nane merau ware mokowabale, <sup>19</sup> Nebei aerene reyae waei fa yae eleikoi sului. Rare waei yebaei bubaei yae me baeufebonde.”’ <sup>20</sup> Na hibi kulun uke naekole bokore ewole.

“Nahau buhaufa hele mewole naeko naei imaera roungeboke. Naeko naei kena buhae nekai sele kowounghe, habeumeke hahi yae roukeunge yoi bulu hunewounghe.

<sup>21</sup> “Nda fa naekore weunge, ‘Arai, Allahre nane merau ware beko nekai mokowabale. Rare na hului ban hele waei fa yae me ebaeufebondere.’

<sup>22</sup> “Nebeibe naeko yae imae einye kaliare mokate yore kaeneumi, ‘Hasale yae malo naei foi sele rowemme na une menne hirengko, bula na mene mennehirengko, oro mehau norone menne hirengko. <sup>23</sup> Nebeisa embe sapi hokolo fa rundun koba-koba hele rowembe nensambe, rei mai komale anemale. <sup>24</sup> Nda raei fa herekerabe benen waleuboke, eungundeubokerabe benen mende hubayekoke.’ Nebeinye yo koi yo bae yoloufakowate.

<sup>25</sup> “Nebei ya na fa bena kiyae na hekene yae. Hekera mokoukoke mewole imaere nobewounge bae, amin waku yo koi yo bae katebe borole. <sup>26</sup> Nebei aerene, naei imae eise kaliare mokate ro hire kaeneungekoke hineunge, ‘Nda rahe erabe kate?’ <sup>27</sup> Nebei ro yae weunge, ‘Wauwake mana bukeufike meke. Na fa na be foi yoi foi yae mekene naeko ukeumi sapi hokolo fa rundun koba-koba hele naendehake.’

<sup>28</sup> “Na fa bena ikele hele kowole, imae eise enensindere ahi hele elewole. Naeko meke a moi-moi yae mokowounge eise enensindere. <sup>29</sup> Nda fa yae weunge, ‘Arai, ralo yae yakama yae waei kaliare relei-telei relewekanale, waei a wewekarae borowekawale. Rahebe nebei wanen ware mokowekawalene rare ikarae? Raei hokolo uneyau bele yo koi yo baere amin wakure komakondere kambing mbai fere enesai mo! <sup>30</sup> Nebeibe waei fa waei rambun-rambunde eke miyae maengke nauwae naise haete yore heraeyumiboke, bukeufike meke bele, sapi foi moi nare houngeboka!’

<sup>31</sup> “Naeko yae weunge, ‘Kelu, weyae rangkele mo nekeyende kiyae. Raei rambun yoni-yoni nemene waei rambun bangka mo. <sup>32</sup> Amin waku yo koi yo bae komale hele. Wauwake herekerabe waleuboke, nundeubokerabe mandehubayeukoke.’ ”

## 16

### *Hemboni Relu Mere Ikileuboke Ro U Bulu-Bulu Mo*

<sup>1</sup> Yesu na moisa orowate yore nda ahuba huweumi, “Ro mbai hembonilo relalo. Naei abu ako yae nebei ro naei rambun yoni-yoni nendon heraeyele are hiwa yo yae a mainyeneke. <sup>2</sup> Nebei abu ako kaeneungekoke, weunge, ‘Waei a boroukokale hului weyae u bulu-bulu bele ro. Raei rambun yoni-yoni weyae yaroukokae nane merau mokoukokae na helen homone moloiko roweime, rabuhine ban ninae weyae mokoukokae.’ ”

<sup>3</sup> “Nda abu ako u bene baeiso-baeiso kowole, ‘Naendae wanen mae mokorebonde? Nda ro hukensehindena, rahe kaliabe mokorele? Kani nei-nyeise reyae elae ban wake ban koyale, a ri-ti fe mo nde riyende!’ <sup>4</sup> Nebeisa elele, ‘Ninae u bene nekeufehike. Hukensehinde ya bae, raei kahili naei imaere erelene ei haungaisele naeise nda me ure mokorebonde.’

<sup>5</sup> “Nebei abu ako na rowa naei rambun yaraikoke yo kaeneumikoke mekate mo weumi, ‘Raei rowale rambun mayae yaraikoke nebeibe namman eheikoi ebaeiso naennaen hului honate?’

<sup>6</sup> “Ro mbai nendo yae weunge, ‘Raei minyak zaitunda helai 100.’

“Nebei abu ako yae weunge, ‘Mbae nda homo niyae 50 hele yae moloiko.’

<sup>7</sup> “Ro bee nendore hineunge, ‘Aka baeke, waei kayee naennaen hului?’

“Nebei ro yae weunge, ‘Raei gandum holoboi 1000.’

“Abu ako yae weunge, ‘Nda homo molo niyae moloiko holoboi 800.’

<sup>8</sup> “Naei u bene holoka koukokene, nebei u bulu-bulu u mekaise na rowa yae buha kaewounge. Nda kani kelana wali beko nibine orate ro miyae naei riyane bele a mokoi-mokoise meli mekai ayeukoke Raei are borate hakoyate yora.” <sup>9</sup> Reyae wamale, nda kani kelana rambun yoni-yoni yae ro hi miyae hire hakoumiyendere, nebei wanen maere kahili wafeufe arilewende. Here mende, nda rambun yoni-yoni erabuhani ban inyaibonde nane merau surgare eweufinde ro bele melaeinyayeibote.

<sup>10</sup> “Ro mbai rambun ebibire kayaa foi hebende, foi yae mokondene, nebei ro mbai rambun kabande rabo halaete. Ro hi rambun ebibira kayaa foi ehebei, foi omokoinye, rambun kabande rabore ehalei sului. <sup>11</sup> Nda kanina kelana rambun yoni-yoni mai mene rabore ehalei huluinya, surgana rambun yoni-yoni bele nde yae mai mene rabo halende? <sup>12</sup> Ro miyae hiwa naei rambun waei menare rabore ehaleinya, nde yae waei naei rambun inyete?”

<sup>13</sup> “Ro mbai rowa bee naei kaliare omokoiboi sului. Rabuhine ban hire kena ikele konende, hire kena buhae hennele nane merau hire angkaei boronnele, hire oboroi. Nebei sului mbai Allahre boroyainye yo, ro naei yebaei bubaeise eyeiboi sului.”

<sup>14</sup> Farisi holona yo Yesu huwoumi a angkaei yae borowate. Roise kena kaban kowatene, Yesusre aukaka kowainye. <sup>15</sup> Nebeibe Yesu weumi, “Mare ro miyae naei,

bene mai wali ijen mae elembe, nebeibe Allah mai kena u ei bele isaeyeuboke. Ro miyae yae ro bele elande rambunde, Allah ro ban mae ereunge.

<sup>16</sup> “Musale walora wali heere foloukoke homofae bele Allahle yenjo kayaayo homone molaikoke bele a faeufe huwaimi meke Yohanes bure kowoumi kiyaele heene. Nebei heera Allah merau raungehike Naei holona ro miyae Raei me kelee u keleene nekenate a faeufe huwammi. Nda hee ro miyae elae relaeinye Raei me kelee u keleene nekate yo holone enayembondere. <sup>17</sup> Nda kani kela bele yaku bele nendon mekai nundenaimbonde, nebeibe Musale walora wali heere foloukokene honate a mbai sambai ehobeiko sului.

<sup>18</sup> “Nde na miyae nennehinde benen miyae hibe rowendena, nebei kiyae u bekobe mokouboke. Ro mbai miyae nenainyehindebe rowende nekenetena, nebei nane merau u bekobe mokouboke.”

### *Hembonilo Relalole, Lazarusle*

<sup>19</sup> Nebeisa Yesus benen weumi, “Ro mbai hemboni rela, kuikui maemae nolone nekeweke. Ambelae foi-foi bun-bun neyae hireweke, nime nolo kaungei nolone nekeweke. <sup>20</sup> Ro mbai naei wali a ri-ti yae riyeweke, na ro Lazarus, na uwa u bauwau wae feleungeboko koweke. Nare hemboni rela bele kiyae imae romau bene nekainyele honowole. <sup>21</sup> Na moni kolere, hemboni rela bele kiyae anele raman mohi-mohi balatere anengcondere bele yoku yae mekate na bauwaube faeu wae efelaewate.

<sup>22</sup> “Nebeisa Lazarus hereke malaikat-malaikat yae yawainyehoke ekate surgane Abrahambe bokone hainyeboko. Hemboni rela bele kiyae nane merau hereke ai moloufako. <sup>23</sup> Narakare eke u buhae wa buhae hele hubawoungue. Na ijoko narakara erewole bae, nahau felera Abrahambe erekeunge nekele Lazarus na bokone. <sup>24</sup> Nda ro yae kaenele, ‘Yobe Abraham! Rare kena buhae korekomae ya. Ra u buhae kaban sele nda i nolone hubanale Lazarus wenemae na mengkamaunge bu yaweu fiube meube raei faeu ranne raufehiube ya.’

<sup>25</sup> “Nebeibe Abraham mae weunge, ‘Kelu, bene nekayete, wa wali heki foi yoni-yoni nemene ninai hubawekae, Lazarus yae bekobe hubawoungue. Nda hee neyae ndane foi mekeufubaunge, weyae beko mekaehubanae. <sup>26</sup> Nebei mo ban, nane merau aei nolone bo (a bulu) kabani hele honole. Ndana yo nebeise ofoi, nebeinya yo ndare emei!’

<sup>27</sup> “Nda ro yae weunge, ‘Nebei uwana, Lazarusbe weinye maekole bokore eu. <sup>28</sup> Nebeinya maeka naei rauwake wa nemene maehae mbai. Nda u buhae wa buhae hubayanne anuwaufe emejiae hele naeise Lazarus ende angkaa yobommibonde.’

<sup>29</sup> “Nebeibe Abraham mae weunge, ‘Musale walora wali heere foloukoke homofae bele Allahle yenjo kayaayo molaikoke homofae bele nemene na mena ekaisonate. Nebeinye erenate hakonate!’

<sup>30</sup> “Nebeibe nda ro yae weunge, ‘Nebei homofae koi-koise neyae kena ban nekeyate. Ro mbai herende benen walembonde naei bokore endena, neyae nulu kemmibonde.’

<sup>31</sup> “Nebeibe Abraham mae weunge, ‘Musalena, Allahle yenjo kayaayo naeinya honate homofaena a neyae moi yae bulenainyelena, ro miyae hereubera aungube horo londe bae neyae ba ebukeisi.’ ”

## 17

### *Rahene Ro Miyae U Bene Beko Rowe*

*(Mat. 18:6-7, 21-22; Mrk. 9:42)*

<sup>1</sup> Yesus na moisa orowate yore weumi, “Oro halunde hayaeimi rambun yakanaibonde hele, nebeibe nebei oro halunde hayemmile kiyae na wali beko hele hubannende. <sup>2</sup> Na foi sele nebei beko mulire yobombonde kiyae na bereise na horora ruka ehakeai yae na horone ha molonaisinde bumoko nolo lonne enaiwonde, nda fa-fa wanan ro miyae wali beko nibibe kelemmle bele. <sup>3</sup> Ma uwa kayaa foi yae hebembe!

“Waka baeke na wali ereungele bekore wenendena, a yareungekonde, nulu kennebonda, na bekore u benera nundenayengkombe. <sup>4</sup> Ya mbai mehine bee bele ware beko mokoneikotena, benen nulu kennebondera a mende ungete, ‘Ikele okoisemae,’ na beko mokouboke u benera nundenayekote.”

### *Hila Rabo*

<sup>5</sup> Na abu ako benen Yesusre wainye, “Tuhan, maei hila rabo elae yeime.”

<sup>6</sup> Yesus yae weumi, “Ma hila rabo sawi ko ebi ken wanan bae o ha kabande waungele, ‘Raweibo ndi bumoko nolone yeisebe,’ na hului raweuboube yufeubebe.

### *Yebaei Bubaei Yo*

<sup>7</sup> “Ro nde yae na yebaei bubaeise ara bura meube mo weungele, ‘Mei na hibi raman mei aneiko!’? <sup>8</sup> Nebei mekai ban sele. Na hele beufoube weungele, ‘Eraman koloisoko.

Wambelae foi hireko, ndane mo hebewonde. Reyae raman andekonde baensonde mo, nebeisa weyae aneukonde.’<sup>9</sup> Yebaei bubaei, abu ako, nebei naei wanen mokonatebe, nebeibe na rowa ‘helen foi’ ewei, rabuhine ban na baka ranne kaliare mo mokowate.<sup>10</sup> Nebei sului mbai mayae Allah a ukembe kalia mokombe baensonde hee, elembe ‘Maei ukeume kaliare mo mokowande. Meyae yeise raeiboi ban yebaei bubaeibe nekande.’ ”

*Yesus Ro Me Bee U Bauwau Wae Molayeke Yo Onomi Ikeumi*

<sup>11</sup> Yesus Yerusalem yore ewole hee, Samaria kani bele Galilea kani bele hee randa ewole. <sup>12</sup> Yo mbaise eweufike mo, ro me bee na u bauwau wae molayekene Yesusle bokore mewate. Nebei hee ro miyae u bene nekewaimi u bauwau era buloone foisi-foisi foyatene, nda yo nahaufa hebaiboke kaenainyeko, <sup>13</sup> “Yesus, Tuhan, maere yanekoi yase yae ei meimehawe!”

<sup>14</sup> Yesus nebei yore ereumikoke mo weumi, “Eme imam-imamde mauwa onomi yaraukokere emmikelembo.” Nibine alainyeko ewate mo, onomi yaraikoke. <sup>15</sup> Nebei me bee nolora ro mbai na uwa onomi yeuboke erewoungene, bukeufike meke Allahre buma nekai kaewoungene. <sup>16</sup> Meke Yesusle oro bene be are neke, helen foi uwoungene. Nda Samariana ro mbai mo meke. ((Yahudi yoni-yoni Samaria ro miyaere ele moise woke yo yae elewate.))

<sup>17</sup> Nebeinye, Yesus yae weumi, “Ro me bee lonbe, onomire yaeiboke yo? Na mehine keli bele makeinya ekate?” <sup>18</sup> Rahene nda ele moinye robe, nembai mo bukeufike meke Allahre buma mekeukoungene?” <sup>19</sup> Nebeisa Yesus nda rore weunge, “Ainyu eye. Wa hila rabo yae onomi ikete!”

*Allah Mende Naei Yo Waku Nembonde Hee*

*(Mat. 24:23-28, 37-41)*

<sup>20</sup> Ya mbai Farisi holona yo hiwa mekate Yesusre hinainye makei hee yae Allah Naei yo waku mennembonde. Yesus yae weumi, “Allah Naei yo waku mennembonde hee ro miyae nda ijoko hele ereiboi. <sup>21</sup> Nane merau ro miyae hiwa yae ware ewei, ‘Mennerembo nda niyae!’ Hiwa yo yae nane merau ewei, ‘Ndi nare!’ Rabuhine ban, Allah Naei yo waku mai kena u einye honole.” ((Yesusle me kelee u keleene nekate niyae.))

<sup>22</sup> Nebeisa Yesus na moisa orowate yore weumi, “Bena ya mendene mayae kena kaban kombe Reyae Allahle bokora mekale ro miyae uware yeubokale Kiyae erebombere, nebeibe mayae Rare ereiboi sului. <sup>23</sup> Nebei heene ro miyae a hira kaenante, ‘Ndare erennoko! Ndire erennoko!’ Naei are oboroijae ehakojae hele. <sup>24</sup> Wili wanen yakune wele na hehe nda kani kela nemene naeikoyole wanen mbai Raei merele ya. <sup>25</sup> Na bere holo Reyae beko nekai hubarengkonde, nebeisa nda heena ro miyae Rare moi bulenaisebonde.

<sup>26</sup> “Raei uwa yakarebonde heene, Allahle yendo kayaalo Nuh bere nekewole hee wanen. <sup>27</sup> Nebei heene nekewate yo raman anewate, miyae yarowate iwaimi, ya-ya nebei hului mo kaimekate Nuh kai kaban einye meufileuko heene. Nebeisa bumae yae meke yarowole bune ayaneuboke.

<sup>28</sup> “Nebei wanen mbai Lotle heene, ro miyae raman bu anayeke, rambun yoni-yoni nai haeyeke yarayeke, heke mokayeke, imae haeyeke. <sup>29</sup> Lot Sodom yora meukuke mo, nebei ya mbai i yakura oke, ro miyae nemene howole haiwole.

<sup>30</sup> “Nebei wanen mbai Raei merele yane. <sup>31</sup> Nebei ya ro miyae imae bumane hebenatena, nerambun yaroikoise imae eise oijae. Nebei sului mbai hekena mokonate yo imaere ebukeijae hele. <sup>32</sup> Lotle miyaene mo bene nekenayembe. Nerambun u bene nekewainyene moise yae be beufike bae, hae rukare yeuboke. <sup>33</sup> Nde na walire hole molonnebonderena, herende bae Allahle nanembainye einyekei. Nde na wali Allahle me einye kinyennebondena, herende bae Allahle nanembainye eneinyekende. <sup>34</sup> Reyae wamale, nebei reniai ro bee a honson mbainye ijongku hononete, hire rowende, hi nukennebonde. <sup>35</sup> Miyae bee melune yalenete, hire rowende, hi nukennebonde. <sup>36</sup> Ro bee hekene eneimokonde, hi rowende, hi nukennebonde.”\*

<sup>37</sup> Yesus na moisa orowate yo yae hinainye, “Tuhan, makeinye?”

Yesus nda a ahuneuboke weumi, “Makeinye makeinye era kaka honate, aye abara mali hubayeikoyate.”

## 18

*Miyaenale Mbai Hakimbe Bokore Orowole*

\* 17:36 17:36 Ayat 36 homofae hena hiwa barainyebonde hiwa ebaraiwai.



<sup>1</sup> Yesus Na moisa orowate yo na hibi-hibi yae Allahre ebeli bonainyende nane merau rabo ban nekatere kelemmile naeise Yesus nda ahuba ahuneuboke huwoumi, <sup>2</sup> “Yo mbainye hakim mbai Allahre fe efaeyei nekeweke, rore miyaere nde ban beweke. <sup>3</sup> Nebei yo mbainye miyaenale (rora moloufaké) mbai roko yae roko yae nebei hakimbe bokore eibeiso meibeiso koweke weunge, ‘Raei yokeijo beko mokoufeboke rambunde benen ijen mae mokoibo!’

<sup>4</sup> “Ya-ya yae oroumekere hakim nebei miyaenalere ahi yae mo weungemeke. Nebeisa hakim u bene nekainyekoke mo na kena eisa elele, ‘Reyae Allahre fe efaeyei, rore miyaere nde ban beyale. <sup>5</sup> Nebeibe nda miyaenale rare hileiko-hileiko koimeyefene, ninae hakorembon. Ehakoiboinya, na hibi-hibi mo orommende, reyae ijongku foi ohonoibo korele.’ ”

<sup>6</sup> Nebeisa Yesus yae weumi, “Nda hakim nde ban beyele yae elele a boraube. <sup>7</sup> Naendae wanen, Allah Naei eleuboke wekeumi ro miyae nebei wanen reniai rai hileiko-hileiko kainyeweube yore ehakoibo? Hakoibo naeise wahanare, ya hendere yae wemmile? <sup>8</sup> Reyae wamale, Allah nebei ro miyae naeise u hale aere olende! Nebeibe Reyae, Allahle bokora mekale ro miyae uware yeubokale Kiyae, roko bee nendo merele heene, naendae wanen, Rare hila rabore halaeise yo hubaimale?”

#### *Farisina Ro Bele Pajakre Yarole Ro Bele*

<sup>9</sup> Ro miyae hiwa nauware wali himalainyeboko yae erainye, nebeibe hiwa yore u mekai beko bele yae eraimi. Nebei yore kelemmile naeise Yesus nda ahuba ahuneuboko huwoumi, <sup>10</sup> “Ro bee ebelire boneinyele naeise Allahre ei mom-mom imae na kaban sele kiyae ekete. Ro hi Farisi holona, na hi kiyae pajakre arilewole ro. <sup>11</sup> Farisi holona ro eufebeunguke hebele naei naeise elele, ‘Allah, reyae nebei ro miyae hosoro wanen banne Ware helen foi sele wawale. Reyae yoko ebaeyei, beko omokoyei, ro naei miyae uwa mbainye ohono nane merau raei wali ndi ro pajakre arileyele kiyaele wanen ban. <sup>12</sup> Reyae mon mbai roko bee yarele me heiboyale nekeikoyale. Nane merau raei roibure hobeyaise rambun me bee kayeero Allah yeyawale.’

<sup>13</sup> “Nebeibe pajakre arileyele kiyae yae, nahaufa hebeunguke na be kanire beufoko na beko mokowolene kena beko hubawoungue yae elele, ‘Allah, reyae beko bako bele ro, rare yanekoi yase yae ei haweufe.’ ”

<sup>14</sup> Yesus yae weumi, “Reyae wamale hokolo bee imaere ewote, pajakre yaroyele kiyaebe Allah yae nare wali himaloungoboko ro yae me baeungeboko, nebeibe Farisi holona kiyae me ebaei. Nauware kaete ro miyaere ane enaimikolonde. Nauware ane koloyainye ro miyaere bumane emmikande.”

#### *Yesus Fa-Fa Ebibire Me Herauwoumi*

*(Mat. 19:13-15; Mrk. 10:13-16)*

<sup>15</sup> Ro miyae na wayeu fa-fa mere herawemmile naeise yarowaimi Yesusle bokore mewate. Yesus na moisa orowate yo nebei wanen erwatene, nebei ro miyae mewatere a yae yarewaimi. <sup>16</sup> Nebeibe Yesus nebei fa-fa ebibire kaenewoumi wa elele, “Raei bokore nebei fa-fa ebibi nendon waemmihai mai! Nare ahemmimae! Rabuhine ban Raei me kelee u keleene nekate holona ro miyae fa-fa u mekai wanen nekate. <sup>17</sup> Nana heselebe wamale, nde yae fa-fa naeko nenake weimi are boroyeumi wanen Reyae wamaele are oboroinya, Raei me kelee u keleene nekate ro miyae holone eyeibo sului.”

#### *Hembonilo Relalo*

*(Mat. 19:16-30; Mrk. 10:17-31)*

<sup>18</sup> Yahudi yun-jun nekatena ro mbai meke Yesusre hineunge, “Guru, u mekai foi bele Kiyae, reyae rahe me ube mokorebonde wali hena eitoufele?”

<sup>19</sup> Nebeibe Yesus yae weunge, “Rahene weyae rare u mekai foi bele yae warae? U mekai foi bele ro miyae u, Allah nembai u mekai foi bele nekele. <sup>20</sup> Allah yae Musare ukeunge wali heere foloukoke are weyae isaeiwoyae, Ro miyae bele miyae ro bele uwa mbainye ohonoijae, ro miyae ohojiae, yoko ebaeijae, ro miyae naei ro nendon naeise eheyaeijae, araise anare be hinenaemile.”

<sup>21</sup> Nda ro yae weunge, “Nebei nemene fomene na hokolora reyae mokoyale.”

<sup>22</sup> Nebei wanen eleukoke borokene, benen Yesus yae weunge, “Mbai sele honole niyae weyae mokoubonde hele. Waei rambun-rambun nemene naise heukonde, nebei roi keren ban nale ban yore waheumikonde. Nebeisa surgana hemboni relabe waeise enaijembonde. Nebeisa mele Rare hakoufebonde orayende.” <sup>23</sup> Yesus yae uwoungue a boroukokerana na hemboni rela helen selene na kena beko kaban kowole.

<sup>24</sup> Yesus ereungekoke wa elele, “Hemboni mali rela mali ro miyae Raei me kelee u keleene nekate yo holo eise eyeiboise kabainyekomde. <sup>25</sup> Unta jarum bulure nendon

eweufube, hemboni rela nolone nekeyate yo, Raei me kelee u keleene nekate yo holo eise neyae eyeiboise kabenainyekonde.”

<sup>26</sup> Ro miyae hiwa Yesus nebei a wanen eleukoke borokainyelene hinainye, “Nebei wanen mae eleyaena, makei yo yae wali hena bona enaiyaronde?”

<sup>27</sup> Yesus yae weumi, “Ro miyae yae omokoiko sului rambunde Allah na hului mokonde!”

<sup>28</sup> Nebeisa mo Petrus yae weunge, “Eramae, Ware mo hakomayete naeise maei rambun nemene nukewande haiwande.”

<sup>29</sup> Yesus yae weumi, “Nde yae na imae obe, na miyae fa, naka baeke, nenake naeko, Raei me kelee u keleene yo holo aerene nukemmibondena, <sup>30</sup> nda kanine neyae nebei hului mbai benen helen yaronde nane merau herendera wali hena bona endowende.”

*Yesus Herende Naei A Roko Name Nendobe Huwoumi*  
(Mat. 20:17-19; Mrk. 10:32-34)

<sup>31</sup> Yesus na moisa orowate yo me bee oro nen bee bele yore na mo-mo arileumihike mo weumi, “Eyae Yerusalem yore emalere. Reyae Allahle bokora mekale ro miyae uware yeubokale Kiyae naeise Allahle yenjo kayaayo homone molaikoke hului benatere. <sup>32</sup> Allahre onaeinye ro miyae naei mene Rare kinyenaisebonde. Neyae aukaka konaisele, a beko ungaisele, eki hesere roronaisele, rahuae bonaisekondera honaisebonde. <sup>33</sup> Nebeibe ya name mo Reyae walerebonde.”

<sup>34</sup> Yesus nebei a merau elewokere na moisa orowate yo hi yae ha yae isaeyeboi. Na mekai harawoung nebei yore felewoumi, onewate rahe abe elewole.

*Ro Mbai Ijoko Kumba Nekeweke Yesus Onomi Ikeunge*  
(Mat. 20:29-34; Mrk. 10:46-52)

<sup>35</sup> Yesus Yerikho yo nobewoung yae, ro mbai ijoko kumba nibi enene nekewole a ri-tinye riyewole. <sup>36</sup> Ro miyae helen sele mate borowolene hineumi, “Nda rahe erabe yeuboke?”

<sup>37</sup> Nebei yo wainye, “Nazaretna Yesusbe mele.”

<sup>38</sup> Nebei a boroukokene nebei ro yae kaenele, “Yesus, Ondofolo Daudle kelu! Rare yanekoi yase yae ei haweufele ya!”

<sup>39</sup> Nebei ro hilembonde naeise na bena hebate ro miyae a elae yae haewainye, nebeibe neyae kali laeisi-laeisi kowole, “Ondofolo Daudle kelu! Rare yanekoi yase yae ei haweufele ya!”

<sup>40</sup> Yesus hebeunguke mo ukeumi nebei ro yawainyehoke. Naei bokore yae meke mo, Yesus yae hineunge, <sup>41</sup> “Waei kena koyae rahebe ware mokoreibotere?”

Nda ro yae weunge, “Tuhan, raei kena kaban sele koyale benen ijoko ererelere.”

<sup>42</sup> Yesus weunge, “Mana onomi rowei! Wa hila rabo elae randa nda foi roukae.”

<sup>43</sup> Nebei ro na ijoko na hibi onomi yeuboke. Nebeisa Yesusre hakoungboke ewote Allahre buma kaeungeke. Hebewate yo nebei wanen erewatene, naeise naeise Allahre buma kaewainye.

## 19

*Yesusle Zakeusle*

<sup>1</sup> Yesus Yerikho yo einye eweufike oroweke yae, <sup>2</sup> nebei yona ro mbai na ro Zakeus, hembonilo relalo pajakre arilate holona yo naei yun. <sup>3</sup> Yesus ndebe ijoko yae erennebondere, nebeibe Zakeus oro fone nane merau ro miyae helen selene, Zakeus Yesusre erennebondere relewoung an. <sup>4</sup> Nebeinye ro miyae mate nolora bere yae hakauboke o bumare neke yeuketeki, Yesus keleera mende na hului hilonnele. <sup>5</sup> Yesus meke nebei ijenne mo bumare euweke Zakeusbe kanekoung weunge, “Zakeus, hasale yae oi akoibo! Reyae nda ya waei imaene erensindere.”

<sup>6</sup> Nebeinye Zakeus u hale me hale owakouboke, Yesusre yaweungehoke na rei bele naei imaere ewote.

<sup>7</sup> Nebei erewate ro miyae na a mulun-mulun bele elewate, ro wali beko lonbe naei imaere ete!

<sup>8</sup> Zakeus Yesusle naei imaene ekete mo, hebeunguke Yesusre weunge, “Tuhan, raei hemboni rela nolora waherekondere reufi ro miyae keren ban nale ban yore isemikondere. Ro miyae nde nde reyae ame-ame yaneungekale kiyae, raeisa nare berensonde raka keli isengkonde!”

<sup>9</sup> Yesus yae weunge, “Nda heene Allah ware hole molokokete, rabuhine ban Abrahambe wanen weyae Allah a ukete hului mokobokae. <sup>10</sup> Reyae, Allahle bokora mekale

ro miyae uware yeubokale Kiyae, ro miyae wali nibi mekaisorate yore baeimeyamaele nane merau hole eremimolonde.”

*Roi Foi Mokate Ahuba Ahuneuboke Huwoumi*  
(Mat. 25:14-30)

<sup>11</sup> A elewolene namman nare borainye mo, Yesus nda ahuba ahuneuboke huwoumi, rabuhine ban Yerusalem yore Yesus naei nobaeinyekoke nane merau ro miyae u bene nekewaimile Yesus Yudea kani naei Ondofolore menjembonde hee nobeungeboke. <sup>12</sup> Yesus yae weumi, “Ro mbai ondofolo riyana kani hire ewole. Ende ondofolore enjembondere oro umau heraungainyebondera benen bukensinde na yore yande mende. <sup>13</sup> Namman kulun ewei ei mo, na imae einya kaliare mokate ro me bee ka neumiko mekate. Naeise naeise roi roibu oko name hobenaikonde hului yeumikoke. Nebeisa mo weumi, ‘Reyae nukerembombe heera nda roi foi yae mokombe mende reyae bukerehinde merele.’

<sup>14</sup> “Nebei yona ro miyae hiwa nda rore ikele kowainyene ro hiwa ukaimile na moisa enate, ungainyele, ‘Meyae kena ban nda ro maei ondofolore nekendere.’

<sup>15</sup> “Nebeibe nebei ro ondofolore nekende kiyae oro umau herawainyeboke, bukeufike naei yore ewole. Nebei roise waheumikoke yore ka neumikoke mekate isaeise rowendere naennaen hului na roi benen baraikoke.

<sup>16</sup> “Ro mbai nendo meke weunge, ‘Ondo, nebei roi ikarae mokoungebokale me beere yeuboke.’

<sup>17</sup> “Nebei ondofolo yae weunge, ‘Foi sele, weyae abu ako foi. Rambun ebibine rabo halawale. Nebei aere ne ndi yo yan me bee waei me einye kinyereibote.’

<sup>18</sup> “Ro bee nendo meke weunge, ‘Ondo, nebei roi ikarae mokoungebokale maehae mbaise yeuboke.’

<sup>19</sup> “Nebei kiyae nebei ondofolo yae weunge, ‘Yo yan maehae mbai waei me einye kinyereibote.’

<sup>20</sup> “Ro name nendo meke weunge, ‘Ondo, nda wa roi niyae reyae malone ruleufikale honoumeke. <sup>21</sup> Weyae nansau felene, reyae buhae hokowoufe. Waei banbe roweyae, weyae omoloikoi ijen ani eisokoyae.’

<sup>22</sup> “Nebei ondofolo yae weunge, ‘Weyae ro beko hele! Waei are eleukokae huluinye mana ware mokoreibotere. Weyae waeisaei reyae ro nansau, raei banbe reyae rowale, reyae omoloyei ijenne ani eisokale. <sup>23</sup> Rahene weyae roi meli mekai bele ro miyaere eyei? Emiyemae, reyae nebei yo rambun hi yae mokouboube roi barauboube. Mele mo helen wanen mae rowele.’

<sup>24</sup> “Nebei ondofolo nebeinye hebate yore weumi, ‘Na mena roi rowen, mbai nendo kiyae yenne.’

<sup>25</sup> “Nebei ro miyae hebate yae wainye, ‘Neyae naei helen sele.’

<sup>26</sup> “Nebeibe benen nebei ondofolo yae weumi, ‘Reyae mare wamale, nde na mena bele honate kiyae benen helen sele barainyeye. Nde na mena ebibi yoboungue kiyae, nebei rambun-rambun ebibi yoboungue nemene kuyenainyekonde. <sup>27</sup> Mana reyae ninne ondofolore heberelere rare ahi yae elewate yo yawemmibo mai. Ra bene nemene hongko hayengko!’ ”

*Yesus Yerusalem Yore Eweufike*  
(Mat. 21:1-11; Mrk. 11:1-11; Yoh. 12:12-19)

<sup>28</sup> Nebei ahubara huwoumikoke baeufoke mo, Yesus bere neuboke Yerusalem yore ewate. <sup>29</sup> Befage yo bele Betania yo bele Zaitun moko kelaeunge honote yo bee nobaeinyeboke mo, Yesus na moisa orowate nolora ro bee ukeumi bere enetere, <sup>30</sup> Yesus yae weumi, “Bena yore ebe,” “Nebei yone ebalebene keledai hokolo fa mbai erenele ha yae rinainyekoke. Ro mbai na randa efileikoi mo. Na ha bulaerenekobe ndare yawenhobe mebe. <sup>31</sup> Ro hi miyae hi mare hinenayebena, ‘Rahere nebei keledai ha bulaereunge?’ Meyae wennele, ‘Maei Tuhan mae ukeume.’ ”

<sup>32</sup> Hokolo bee ekete Yesus na are eleukoke huluinye bewate. <sup>33</sup> Nebei keledai hokolo fa na hane bulaerewoinye mo, keledaise hayeunge ro meke hineumi, “Rahere nebei keledai ha bulaereunge?”

<sup>34</sup> Nebeibe hokolo bee yae weinye, “Maei Tuhan nda keledai randa efilengkondere hele.”

<sup>35</sup> Nebeisa keledai yawoinyehoke Yesusle bokore ewate. Ekate na malo nebei keledai uwa ranne hayaenyekoke nebeisa Yesusre ikilainyeboke keledai ranne yeunguweuboke. <sup>36</sup> Yesus keledai randa mei-meise mo mewole, ro miyae naei nibi ende ijende malo yae bewate.

<sup>37</sup> Yerusalemde nobewoungwe, Zaitun moko nonore owole ijenne mo, naei ijoko yae erewate Allah naei mahi-mahi mokowole bewatene na moisa orowate yo helen sele mun sobolo Allahre buma kolowainye.

<sup>38</sup> Nebei yo kaenate,  
 "Allahle ro yae meke Ondofolo,  
 onomi foka hubannele!"  
 Meyae ebeli bomanele surgane rei mai nekenayende  
 nane merau Allahre hili hebenainyende.

<sup>39</sup> Farisi ro miyae nebei kaenate nolone hebate Yesusre wainye, "Guru, ndi Waei moisa mate yo weumi hilaibone."

<sup>40</sup> Nebeibe Yesus yae weumi, "Reyae wamale, ndi yo hilenaibondena, nda ruka ufemile kaenate."

<sup>41</sup> Yesus Yerusalem yore nobewoungwele wa euweke erewoungwe rimewoungwe, <sup>42</sup> elele, "Yei, Reyae kena kaban koimeyale mayae isaeyembombe Reyae na hului rei mai isembe, nebeibe nda hee nebei a usaei nunne hononende. <sup>43</sup> Ya mon mbai mende, wa yokeijo helen menate yo ele yanainyehonde na ranne honsi-honsire konate naeise kani hainyaikonde ahenayengkombe, yanenayengkombe, bohira bohira ainyayengkombe. <sup>44</sup> Allah waei hole moloiboise mekebe mayae Nare ehakoiboinye, waei ro miyae, waei kelu omi, waei imae obe, nemene ninnae kuinyayengkombe, faeinyenayembombe, ruka ahunewate aene ranne ohonoi yembonde."

*Yesus Naeko Allahle Imaere Eweufike*  
 (Mat. 21:12-17; Mrk. 11:15-19; Yoh. 2:13-22)

<sup>45</sup> Nebeisa Yesus Allahre ei mom-mom imae na kaban sele kiyae eise eweufike nebeinye nai hei-sei yore hukewoumi weumi, <sup>46</sup> "Allahle homofaene nda wanen molaikoke, 'Raei imae obe ro miyae ebeli boi-boi imaere yembonde.' Nebeibe mayae mekaube yokoyo naei nalere maumokouboke!"

<sup>47</sup> Allahle imaene mo rene huae keleumiyeke. Nebeibe imam yun-jun bele Musale walora wali heere foloukoke isaeyaeiboke kelaeimi yo bele Yahudi yun-jun bele Nare honaibondere nibi baewate. <sup>48</sup> Nebeibe nibi baewate an, rabuhine ban ro miyae helen Naei a faeu elewokene maeumikoke.

## 20

*Yesus Rahe Randa A Elewole*  
 (Mat. 21:23-27; Mrk. 11:27-33)

<sup>1</sup> Ya mbai Allahre ei mom-mom imae na kaban sele imaehoungwe Allahle a foi faeu foinye Yesus huwoumi yae imam yun-jun bele Musale walora wali heere foloukoke homofaere isaeyaeiboke kelaeimi yo bele Yahudi yun-jun bele <sup>2</sup> mekate Yesusre hinainye, "Nde yae nda elae ikete?"

<sup>3</sup> Nebeibe Yesus yae weumi, "Reyae benen mare hinerensimbere. <sup>4</sup> Yohanes ndele ro yae bure kowoumi, Allahle ro yae, ro miyae ro yae?"

<sup>5</sup> Nebei ro na mo-mo arileufike elate, "Allahle ro yae elemakondena, Neyae aere wemmele, nebei wanenna rahene naei are elele hului nye mayae ehakoiboi? <sup>6</sup> Benen, ro miyae naeinya yae elemakondena, nda ro miyae boronate bae aere ruka yae hainyaimele, rabuhine ban naei u benera nekaimi Yohanes Allahle yendo kayaalo."

<sup>7</sup> Nebeinye Yesusre wainye, "Meyae maeisai ban."

<sup>8</sup> Yesus yae weumi, "Reyae nane merau mare ewei, ndele elae yae nda rambun emere-emere mokale."

*Heke Roi Bele Yae Mokate Ahuba Ahuneuboke*  
 (Mat. 21:33-46; Mrk. 12:1-12)

<sup>9</sup> Yesus nebei ro miyae arilewolere nda ahuba ahuneuboke huwoumi, "Kani rowa mbai anggur heke mokouboke. Nebeisa roi yae mokonate yore nebei heke kinyeumiboke, kulun uke, yo hire kolone oroweke. <sup>10</sup> Anire hokonate hee, nebei kani rowa naei yebaei bubaei mbaise ukeunge ewole naei ani kayeere rowende. Nebeibe nebei hekere mokate yo yae nare rahuae baikoke hukainyehike na me bangka u bangka yae ewole. <sup>11</sup> Nebei heke rowa benen yebaei bubaei hi ukeunge ewole. Nda kiyae mekere benen bowate fe mokainyeboke nebei hului mbai ukainyele na me bangka yae ewole. <sup>12</sup> Nebei heke rowa yebaei bubaei name nendo ukeunge eke. Nebei heke yo herawaikoke bowate ba hainyebokera, kaeibokate heke ele moinye wokate.

<sup>13</sup> "Nebeisa bae nebei heke rowa yae elele, 'Benen rahebe reyae mokorebondere. Mana raei kenare kanale fabe ufende endere. Neyae endene, ndi yo fe faenainyele era.'

<sup>14</sup> “Nebeibe nebei heke rowa na kelu mewole erekainyelene nebei hekere mokate yo naeise naeise elate, ‘Naeko herendera nda hekere rowende kiyae niyae. Mem homabondere! Nda rambun rambun nukembonde aeise inyaibondere.’ <sup>15</sup> Nebei fare yobaiboke ekate heke moinye haiboke.”

Nebeisa Yesus yae hineumi, “Nebei heke rowa bukensinde mende bae, nebei heke yore naenda yae mokommile? <sup>16</sup> Reyae elale meube nebei heke yore houkoube hele, nebeisa nebei hekere mo roweube benen hiwa yore yemmile.”

Yesus nebei a eleukoke boraikokene, nebei yo yae elate, “Meyae rabo halemale nebei wanan ebeijae!”

<sup>17</sup> Yesus nebei ro miyaere ijoko ereumi mo wa elele, “Nebei wanan mae elaubena, nda Allahle homofaene honole a rahe naeise molaikoke?”

‘Imae hei-seise isaei hebaen bele yo na hului banne wokate rukabe,

mana na bereise yae erainye?’\*

<sup>18</sup> Ro miyae nde nebei ruka ranne ruwende kiyae mohi mohi kamai kamai yembonde; nde nebei ruka yae onde wende herawembondena, kani man kela mande yembonde.”

<sup>19</sup> Musale walora wali heere foloukoke homofaere isaeyaeiboke kelaemi yo bele imam yun-jun bele na hibi Nare ikilenaikonde nibi mbai baewainye rabuhine ban naeisaei Yesus naei u naeibe nebei ahuba ahuneuboke huweyole. Nebeibe ro miyae helen erewaimine fe yae faewate.

*Pajak Naei Abe Hinewainye*

(Mat. 22:15-22; Mrk. 12:13-17)

<sup>20</sup> Nebei yo Yesusre naei ijoko ranne mo erainye. Ro mbembare a moi-moi yae mokaimikoke Yesusle bere ame-ame yae wali himalainyeboké yo yae enate. Yesusre melaeli roronainyale a mahi wanan elengkondena, nebei kanire ikileuboke Ondofolole me einye kinyenaibonde naeise. <sup>21</sup> Nebei ro a moi-moise mokaimikoke yo ekate Yesusre wainye, “Guru, meyae maeisaei nekande Waei a faeu kelaemae nemene na hele mo. Nane merau Allah a wete hului wali nibi naeise rore miyaere na bene-bene wamae, be ijokone erei. <sup>22</sup> Mana maere na yaka yae weime, Kaisarre pajak imanele, eyeijae?”

<sup>23</sup> Yesus nebei yo naei holoka kate isaeyebokene weumi, <sup>24</sup> “Nebei roi mbai Rare kelensebo. Ndele me nou bele ro yun bele honole?”

<sup>25</sup> Nebei yo yae wainye, “Kaisarle.”

Yesus yae weumi, “Nebei wanenna, Kaisarle kayee Kaisarre yennele, Allahle kayee Allahre yennele!”

<sup>26</sup> Nebei ro miyae nolone Yesus naei a faeu mbai sambai walangkare wainyejeke na hului ban yeuboke. Naei a eleukokene nebei yo fa yae bowate nane merau a ban faeu ban yaeboké.

*Herewate Yo Walenaibonde*

(Mat. 22:23-33; Mrk. 12:18-27)

<sup>27</sup> Saduki ro miyae (nda yo yae elate ro miyae heraiiboké yo benen ewaleiboi) hiwa Yesusle bokore mekate. Yesusre hinainye, <sup>28</sup> “Guru, Musa nda a huwe a relen aere harawoume, ‘Ro mbai miyae rowende na fa ban mae herendena, nebei ro hereke naei aka baeke hele yae nebei miyaenale nekenete, naeka naei orona menare holensindere.’

<sup>29</sup> Roko mbai ro mehine bee bele naeka nauwake nekewate. Na bena kiyae miyae rouke na fa ban mae nekeikoke neyae hereke. <sup>30</sup> Nauwake bee nendo nebei miyaenale rouke nane merau fa ban mae hereke. <sup>31</sup> Nebei wanan mae mo, oke nauwake na nime kalaikoinya kiyaele nekeikoke na fa ban mae hereke. <sup>32</sup> Nebei miyae nebei sului mbai na moisa na fa ban mae hereke. <sup>33</sup> Nebei ro yoni-yoni na mehine beene nemene nangeke nekaikokene, mende herewate yo benen anainyunde heene, nda miyae naei sele ndele nekenete?”

<sup>34</sup> Yesus yae weumi, “Nda heena ro miyae yaronate, maengke rore enate. <sup>35</sup> Nebeibe bena ya fokehonolene, Allah yae wemmile anainyunde yo, benen rone miyaene kewa yumake mbainye ohonoi. <sup>36</sup> Allahle malaikat ekainyekate wanan, naei wanan enainyekende, here ehubayeikoi. Rabuhine ban heraiibokera walenaibondene, nebeinye ndine Allahle kelu omire enayembonde. <sup>37</sup> Musa na yaka yae kelewoume, ro miyae herewate yo walenaibonde. Rabuhine ban isa folon i yae bewolene Musa yae Allahre nda ro yae kaenewoungé, ‘Abrahambe Allah, Ishakle Allah, Yakuble Allah.’ <sup>38</sup> Nebei aerene Neyae wali yo naei Allah ya, nulu mahe naei Allah ban. Allahle ro be ro yoinye ro miyae nemene wali bele nekate.”

\* 20:17 20:17 Mazmur 118:22

<sup>39</sup> Ro mbemba Musale walora wali heere foloukoke homofaere isaeyaeiboke kelaeimi yo yae wainye, “Waei a foi sele eleukokae.” <sup>40</sup> Benende hinenainyelere, nebei yo fe yae faewainye.

*Wali Ondofolo Ndele Fa?*

(Mat. 22:41-46; Mrk. 12:35-37)

<sup>41</sup> Yesus nebei yore hineumi, “Rahene ro miyae yae Wali Ondofolo, Ondofolo Daudle orona mena yae elate?” <sup>42</sup> Daud nenaiejae homofae Mazmurne moloukoke, ‘Allah yae Raei Tuhande weunge,

Ra meube reufine meinyuweibo,

<sup>43</sup> mende wa yokeijo nemene mokoremikonde woro keleene menayorulembonde.’†

<sup>44</sup> “Daud yae Tuhan mae kaeneungena, naendae wanan benen Wali Ondofolore Daudle orona mena yae elemakonde?”

<sup>45</sup> Nebei ro miyae Yesus ane elele borainye yae, Yesus weke na moisa orowate yore weumi, <sup>46</sup> “Kayaa hebembe ndi Musale walora wali heere foloukoke homofaere isaeyaeiboke kelaeimi yo. Nare rora melaeinyaimile naeise malo koko neme yae hirekoyate. Nai hei-sei anuwaunge ate bohire bohire eyorate. Ei mom-mom imaene anuwau foise nare baeyate, nebei sului mbai raman bulau nolone. <sup>47</sup> Miyae hi na molo herele bae, naei imae einya rambun-rambun belae walae yae yaroyate. Na bekore felenaikonde naeise, Allahre ebeli koko eibainye. Allah nebei yore ehee bukulu na ehakaie sele emmiwononde.”

## 21

*Miyaenale Mbai Na Roi Auboke*

(Mrk. 12:41-44)

<sup>1</sup> Roko mbai Allahre ei mom-mom imae na kaban sele kiyane Yesus ijoko erewoumi yae run bele kangke bele nolone nekayeke yo na roi haufau anuwaunge hauwate.

<sup>2</sup> Miyaenale rora moloufaké mbai nane merau erewoungé na wali kou kalo einye nekeyekebe meke na roi tembaga bee hele roi haufau anuwaunge haweukoke.

<sup>3</sup> Nebeinye Yesus yae weumi, “Reyae wamale, nda miyaenale na helen selebe neyae hauwole. <sup>4</sup> Nebei run kangke nolone nekate yo ebibibe yaraikeke mekaisawate. Nebeibe nda miyaenale naei wali hunde nekewolebe rouke mewauboke.”

*Huba Mokoikoi Iwau*

(Mat. 24:1-2; Mrk. 13:1-2)

<sup>5</sup> Na moisa orowate yo hiwa mekate Allahre ei mom-mom imae na kaban sele kiyana ruka baengko bele ya nane merau rambun hiwa yae uwa molainyebokene ei sele molowainye. Nebeibe Yesus yae nebei yore weumi, <sup>6</sup> “Na ya bele hembonde nda imae eraunge nemene fomene kerensonde onde, ruka mbai sambai aene ranne ohono.”

<sup>7</sup> Nebei yo yae Yesusre hinainye, “Tuhan, Waei eleyae a makei ya yae yembonde? Iwau rahe ma yae rilende eremalene isaeimabonde nebei ya nobeungeboke?”

<sup>8</sup> Yesus yae weumi, “Kayaa foi yae hebembe mare wabenayembe bele. Ro miyae helen sele Raei ro yae mekate are elenate. Nauwa naeise nda a elenate, ‘Reyae Wali Ondofolo Niya! Huba mokoikoi ya nobeungeboke.’ Nebeibe, nebei yore oboroiyajae ehakoiyajae hele. <sup>9</sup> Buloo fela mahi-mahi naei aku borombena, buhae ohokoiyajae. Nebei nemene na bere yae menaibende, nebeibe huba mokoikoi ya na hibi yae ebei.”

<sup>10</sup> Yesus benen huwoumi, “Yo yan hi anainyunde yo yan hi bele relenainyele, kani hina yo anainyunde kani hina yo bele relenainyele. <sup>11</sup> Oinyeu kaban makei-makei nemene hinende, moni mai, yano o reu ha reu nenaisande ungayonde, era buloo mennende. Iwau beko bako mahi-mahi eme hele yakura benate erembe.”

<sup>12</sup> “Nebeibe nda rambun-rambun nemene ebei mo, Raei aerene mare nemene ikilenayangkombera, weitasi konayembe. Ei mom-mom imaene yaungayembombe embe a kolonayembe nane merau kawa eise henayembe. Rare hakaufe aerene yobonayembe ondofolo kose bene yensebembe. <sup>13</sup> Nebei benatene, mayae Raei naei a faeu nebei yore huwemmile. <sup>14</sup> Mai kena elae yae hebembe, nebei hee naei a faeu hinenayembere mayae bukemmile naeise buhae ohokoiyajae. <sup>15</sup> Renaeijae isaei hebaen isembene, ma yokeijo yoni-yoni mai a faeu elembere ohoroiboi sului. <sup>16</sup> Ana yae arai yae, aka yae baeke yae, yoho yongko yae, hokolo uneyau wae, mai kelai nenayende. Hiwa yo mbemba mai nolora honaikonde.”

† 20:43 20:43 Mazmur 110:1

<sup>17</sup> "Rare hakonsele aerene, ro miyae nemene mare ikele konayembe. <sup>18</sup> Nebeibe, mai Allahlena wali henara neyae ehobeikoi sului. <sup>19</sup> Rare hila rabo halensemembe walora wali hena bona hubayengkombe.

<sup>20</sup> "Felayo eremmile Yerusalem yo yanenainyekonde heene, mayae isaeyembombe nda yo na heki ban beko bendere. <sup>21</sup> Nebei hee Yudea kanina ro miyae mokore habelenate. Yerusalem yo einye nekaube yo nukembombe membalembe, yo moinya yo benen yo eise eijae. <sup>22</sup> Nebei ya Allah Na homofaene molaikoke honole huluinye ro miyae naei beko mokowate hului ehee bukulu hainyemikonde. <sup>23</sup> Nebei ya emale miyae holona nane merau wayeu miyae holona beko hele hubanainyele. Yudea kanina nekate yo beko hele hubanainyekonde nane merau ikele han kaban me u yoni-yoni hubanaimile. <sup>24</sup> Hiwa yo ramiyaeli yae honaikonde, hiwa yo ikilenate kani hi kela hire yaungaimile enate. Allahre onaeinye yo menate Yerusalem yo ei yae anainyebonde, mende Allah huluisse raungehike ya membaensonde.

*Yesus Bukensinde Mende Ya*

*(Mat. 24:29-31; Mrk. 13:24-27)*

<sup>25</sup> "Hune, okone, findelaunge, nebeinye yen mengkolonde. Nau wala kulun mendene, nda kanina kelana ro miyae fe yae waku yae yarommikonde, onenate handanate. <sup>26</sup> Nda kani kelane benatere fe kaban faenatene ro miyae hokoiko-hokoiko konate, rabuhine ban kunde waufe ikilaikoke honate nemene bulenaibonde alenaibondene. <sup>27</sup> Nebei hee ro miyae Reyae Allahle bokora mekale ro miyae uware yeubokale Kiyae elae wake bele one hengko hehe kaban bele mangko einye merele erenaisele. <sup>28</sup> Nebei wanen erembe benate heene, annumbe, be bumare wemembe, ebi fere mo wali hena bona rowelere." <sup>29</sup> Nebeisa Yesus nda ahuba ahuneuboke huwoumi, "Ara no hebele bele o hiwa hebate bele eremmiko. <sup>30</sup> Reu bu kate eraube bae elaube yakama nobeungeboko. <sup>31</sup> Nebei sului mbai nda iwau hi hi erembe benate, mayae isaeyembombe ebi fere mo, Allah mare hole molonembombe.

<sup>32</sup> "Reyae wamale, nda hokolo namman nekenate, nda a wamale nemene menaibende. <sup>33</sup> Buma a nemene nundenate, nebeibe Raei ako faeukobe niyae mbai sambai enundeiboi mo hononayende.

<sup>34</sup> "Mauwa kayaa foi yae hele hebembe, yo koi yo bae naeise bele bu elae naeise bele nda wali naei kena beko mokoyeumi naeise bele aerene buhae hokonayembe belene, nane merau huba mokoikoi ya mende obo yoku wali omokoisainye walangkane ikilenaikonde beko hubanainyekonde wanen mare beko hubanayembe belene. <sup>35</sup> Nda kanina ro miyae nekande nemene nebei ya hubanaimikonde. <sup>36</sup> Kayaa foi yae hebembe. Allahre ebeli bonnele nebei beko bende yare mare hole molonembombe nane merau Reyae, Allahle bokora mekale ro miyae uwa yeubokale Kiyae, benen merele heene mayae buhae ohokoi yae Raei bene hebembe."

<sup>37</sup> Na yane baiei Yesus Allahre ei mom-mom imae na kaban sele kiyaeene eikeleumi. Huaere keisiyeunge Zaitun mokone einyeekele. <sup>38</sup> Benen ya heiboyole bae, Allahre ei mom-mom imaene arilewainye ro miyae na rene mate Yesus are elende boronainyele naeise.

## 22

*Yesusre Honaibondere Merau Kolowainye*

*(Mat. 26:1-5; Mrk. 14:1-2; Yoh. 11:45-53)*

<sup>1</sup> ((Mesir kanine Allah yae Yahudi naei bena kelu fa-fare hole molouboke u bene nekeisi-nekeisi)) ya kaban Paskah nobewoung. (Nebei heene feu ragi ban anewate.) <sup>2</sup> Nebei yona ro miyae helende fe yae faewaimine, imam yun-jun bele Musale walora wali heere foloukoke homofaere isaeyaeiboko kelaeimi yo bele Yesusre honaibondere nibibe baewate.

*Yudas Yesusre Kelai Nenendere*

*(Mat. 26:14-16; Mrk. 14:10-11)*

<sup>3</sup> Yesusle moisa orowate ro me bee oro nen bee bele nolona ro mbai Yudas Iskariotle kena einye walobo yun meweufike. <sup>4</sup> Nebeisa Yudas eke imam yun-jun bele Allahre ei mom-mom imae na kaban sele kiyaele kayaare hebate yun-jun bele bokore eke Yesusre kelai nenendere are kolonainyekondere. <sup>5</sup> Nebei yo rei nekai kowate, Yudasre wainye, "Ware roi yae imayete." <sup>6</sup> Yudas be hineuboke, ya monbe ereumeke Yesusre kelai nenende ro miyae naeisaei ban mae kinyemmibondere.

*Ya Kaban Naei Ramande Mokonainyehandere*

*(Mat. 26:17-25; Mrk. 14:12-21; Yoh. 13:21-30)*

<sup>7</sup> Nebei ya kaban ninae nobeungeboke. Nebei yare domba mbai hili era akau era yae Allahre ongkou feleiboyate. <sup>8</sup> Yesu Yohanesle Petruslere weumi, "Ebe ndire, nda ya kaban aei raman anemakondere mokonnehabe."

<sup>9</sup> Nebei bee hineinye, "Tuhan, makeinye Waei kena koyae meyae raman mokomansandere?"

<sup>10</sup> Yesu yae weumi, "Yo eise ebebobe yae ro mbai na mene bu helena kaembonde mende. Hakonnekobe na moisa ebe, neyae enensinde imaene mangkele ebebobe.

<sup>11</sup> Imae rorelere wennele, 'Aei Tuhan mae riyeye makei ijenne Rangkele Raei moisa orande yo bele nda ya kaban naei raman anemakonde?' <sup>12</sup> Nebei rorele imae buma raka na wakun kaban honolebe mare kelenebobe. Rambun-rambun na hului sului nebeinye honate. Nebeinye mayae raman mokonnehabe."

<sup>13</sup> Petrusle Yohanesle aloinyekoke ekete Yesu naei are eleukoke hului nye na ijenne bewate. Nebeinye hokolo bee Paskah raman mokoinyehake.

*Arileufike Raman Mbainye Anewate*

(Mat. 26:26-30; Mrk. 14:22-26; 1 Kor. 11:23-25)

<sup>14</sup> Paskah ramande anenate hee mo, Yesu meke Na abu ako nolora nuweuboke. <sup>15</sup> Nebei yore Yesu weumi, "Raei kena kaban kale Reyae namman beko ehubayeikoi yane, nda Paskah raman mbainye mangkele anemakonde. <sup>16</sup> Reyae wamale, nda heera benen reyae nda ya kabanda raman aneikoi mo nekerende, mende ro miyae Raei me kelee u keleene orulenaibonde nekenate yo Allah merau raungehike hului yae anenate. Benen nebei ro miyae Rangkele nanembainye anggur bu anemahinde."

<sup>17</sup> Nebeisa kolaei anggur bure rileuboke rouke, Naeko Allahre helen foise mo ukeunge wa elele, "Nda kolaei yaron, maise maese menaei wahan. <sup>18</sup> Bene nekenayembe, nda heera benen Reyae nda ya kabanda raman aneikoi mo nekerende, mende Maeko mokomibonde ro miyae Raei me kelee u keleene orulenaibonde nekenate. Benen nebei ro miyae Rangkele nanembainye anggur bu anemahinde."

<sup>19</sup> Nebeisa, Yesu feu rouke benen Naeko Allahre helen foise ukeunge, benen Naei me yae kaiwole nebei yore iwoumi weumi, "Nda Raei uwa melen niyae, mai aere ne ikembe. Rare u bene nekeisi-nekeisi wanende nda mokande wanen mae mokomembe."

<sup>20</sup> Nebei wanen mbai raman anaikoke mo, anggurre anate kolaeise mo rouke weumi, "Nda kolaei einye rambun ((walora u bene nekenayembe)) mai aere ne Raei ha rileubokale. Raei ha yaere Allah a heteungekoke nibi neme ro miyae wali himalainyeboko yo yae me baemmile a elaekei yeuboko.

<sup>21</sup> "Nebeibe eraunge! Raei kelaise nenende kiyae Rangkele mbainye ndane nekende. <sup>22</sup> Reyae, Allahle bokora mekale ro miyae uware yeubokale Kiyae, Allah meraufe raungehike hului nye hererele, nebeibe Raei kelaise nenende kiyae beko hele hubannende!"

<sup>23</sup> Nebei yo naeise naeise na uware uware hinate, ndebe naei nolora nebei merau mokombonde?

<sup>24</sup> Yesu na moisa orowate nolora aku yeuboko. Ro ndebe naei sele naei nolora rorele yae erenainyele (fe faenainyele). <sup>25</sup> Yesu yae weumi, "Nda kanina kelana nekeyate ondofole kose na ro miyae feleyaimi nane merau nauware kaenaimile, 'Aka kayaa baeke kayaa yo.' <sup>26</sup> Nebeibe mayae nebei wanen omokoiyae. Nde mai nolora roro ronainyele kiyae, na wali fa meha wanen mae oronde. Nde ondofole kosere nekendena, bennhonde abu ako wanen mae mokonde. <sup>27</sup> Yebaei bubaei ramande wahaimi yo ro ban. Ondofole kose ramanne anele kiyaeere ro rainyeboko. Nebeibe Reyae yebaei bubaei yae mai nolone nekeimeyale.

<sup>28</sup> "Bekore meisubanale yane mayae Rangkele hebemeyande. <sup>29-30</sup> Raei yo waku einye mayae nendon Rangkele mbainye raman emanende naeise nane merau Israel naei akona akona me bee oro nen bee bele na orona mena yore naei walire mayae hului kolommile naeise, Maeko yo waku mbai kinyewoufe naei wanen mbai Reyae mare yo waku mbai kinyerembe."

*Petrus Wo Konde Reyae Yesusre Onaenale*

(Mat. 26:31-35; Mrk. 14:27-31; Yoh. 13:36-38)

<sup>31</sup> Yesu na moisa orowate ro mbai na ro Simon. Yesu yae weunge, "Simon, Simon, boroyae! Walobo yun meke riyefehike ware wabeneifitere. <sup>32</sup> Nebeibe Simon, Reyae waei naei ebeli Allahre bowanale hila rabobe nelae yae mo hebele. Weyae benen bukeufinde Raei a ufete hului nekele ya, waei aka baeke hiwa yo naei hila rabore elae eumiyende."

<sup>33</sup> Petrus yae weunge, "Tuhan, ware kawane henayeikotena, honayeibotena, raei uwa mokoungihakale Wangkele mbainye nekale."



<sup>34</sup> Nebeibe Yesus yae weunge, “Petrus, mana ya ojo mukuu a namman okoikoi mo, Rare weyae waesaei ban mae roko name weumikonde.”

*Malo Huba, Kakali, Ramiyaeli*

<sup>35</sup> Nebeisa Yesus yae nebei yore weumi, “Na bena hele mare ukamale embe naeise. Malo huba, kakali, oro mehau nemene eyaroi eijae ukamale. Nebei hee kalo molowombe?”

Nebei yo yae wainye, “Omoloiboi!”

<sup>36</sup> Yesus yae weumi, “Nebeibe nda heera, malo huba, kakali hononatena, nemene yarongkombe embe; nde ramiyaeli banna u hale yae na malo roi naise hembonde, nebei roi yae na hibi ramiyaeli rowende. <sup>37</sup> Allahle homofaene Raei naeise nda a molaike, ‘Nare u hila wa hila ro yae elenaikonde.’\* Nebei a Raei uwane yembonde hele. Allahle homofaene Raei uwa naeibe molowate hului na hele benate eraube.”

<sup>38</sup> Yesus na moisa orowate yo yae wainye, “Tuhan, ereibo ndana ramiyaeli bee.”  
Yesus yae weumi, “Ninae na hului.”

*Yesus Zaitun Mokone Ebeline Naekore Ike Bowounge*

*(Mat. 26:36-46; Mrk. 14:32-42)*

<sup>39</sup> Yesus benen naei orole wanen Yerusalem nukeungeboke na moisa orowate yo bele Zaitun mokore iwate. <sup>40</sup> Ikate mo weumi, “Ebeli Allahre bonnele, walobo yun wabenensimbe balembe bele.”

<sup>41</sup> Nebeisa Yesus ruka yalo roko mbainya wande eukuweube hului yae nebei yo naei bokora nahau eke, oro selen-selen mae oukoroukoke Naekore ebeli bowounge, <sup>42</sup> “Arai, na huluinya, nda beko Raei rande mendere ahaufe yae kinyeibo eu. Nebeibe Raei kena kale yae omokojae, Waei kena huluinye mo mokole.” <sup>43</sup> Surgana malaikat mbai meujakauboke elae ikeunge. <sup>44</sup> Yesus na kena u eisa han wanen mae howote nebeinye benen Naekore ebeli bowounge. Na uwana roibu ha kibo-kibo wanen mae kani rande balewate.

<sup>45</sup> Ebelira bungekokera mo, Yesus benen na moisa orowate yo riyare eke. Nebei yo eke erewoumi kena beko kaban kowatene nemene u kei-keinye ijongkune mo honaiboke. <sup>46</sup> Nebei yore weumi, “Rahene ijongkune mo honaube? Annu, ebelibe bonne walobo yun mare wabenensimbe balembe bele.”

*Yesus Iklaiiboke*

*(Mat. 26:47-56; Mrk. 14:43-50; Yoh. 18:3-11)*

<sup>47</sup> Yesus namman nare ane elate bae, ro homo mbai nekate mewole. Yudas Yesusle moisa orowate kiyae yae be neuboke eke Yesusre yoi bulure hunennehindere. <sup>48</sup> Nebeinye Yesus yae Yudasre weunge, “Yudas, wa kelai neufende naeise Rare yoi bulu yae huneufehindere?”

<sup>49</sup> Yesus na moisa orowate yo nda rabuhi yembonde era erewaimine Yesusre wainye, “Ramiyaeli yae folomakondere ya.” <sup>50</sup> Nebeisa Yesus na moisa orowate ro hi ramiyaeli yae uke bae, imam kaban nabu ako na angkaei meube reufibe neufake ruke.

<sup>51</sup> Nebeibe Yesus yae weunge, “Ninae okojae!” Nebeisa nebei ro nangkaeise mo ikileungeboke na hibi foi yeuboke.

<sup>52</sup> Nebeisa Yesus imam yun-jun bele Allahre ei mom-mom imae na kaban sele kiyae kayaare hebate yo bele uwoumi, “Rare yokolo yae elaubene era, Raei ikileiboise ramiyaeli yae o bohi-bohi yae yarauko mekaube? <sup>53</sup> Reyae na yane bae Allahre ei mom-mom imae na kaban sele kiyae na imaehoung nuweuboyale keleimeyamaelebe, mayae Rare ikileiboi. Nebeibe ninae, nda ya mayae ouben hauben nolone nekaube yo mai kena hului mokongkombe.”

*Yesus Yahudi Yoyo Koseyo Bene*

*(Mat. 26:57-58, 69-75; Mrk. 14:53-54, 66-72; Yoh. 18:12-18, 25-27)*

<sup>54</sup> Yesusre ikilaiiboke na hibi hele yawainyehoke imam kabanbe imaene ewate. Yesusre yawainyehoke ewate moisa Petrus na ahau folo yae hakoumiboke. <sup>55</sup> Nebeinya ro miyae uware akelenate naeise imaehou nolone i ralo kaban mokaibokene nuwaike. Petrus na nolone eunguweuboke. <sup>56</sup> Petrus nebei imaehoung namman nekele yae, maengke mbai imam kabanbe yebaei bubaei nebei nolora meke Petrus isehe naeungekoke yae ereungekoke nabe ijoko roungeboke wa weunge, “Nda ro Yesus Nangkele mbainye orowote.”

<sup>57</sup> Nebeibe Petrus oneunge yae elewole, weunge, “Reyae Nare onaenale.”

\* 22:37 22:37 Yesaya 53:12

<sup>58</sup> Na heki ban mo ro hi Petrusre erewoungwe, weunge, “Weyae nane merau Naei holo mbainye orowaube.”

Petrus weunge, “Reyae nebei holona ban!”

<sup>59</sup> Hukai mbai nekeukoke mo, ro hi eleukoke, “Na yaka hele weyae nebei holona na ro hi niyae, rabuhine ban weyae Galilea kanina rone.”

<sup>60</sup> Petrus weunge, “Waei a eleyae reyae na hele isian!” Petrus nda a mekai eleukoke hee yae ojo a koukoke. <sup>61</sup> Tuhan Yesus be beufoke Petrusre na hibi ijoko ereungeboke. Petrus nebei hee yae Yesus yae ukeunge abe u bene nekeungehike, “Nda hee ojo a okoiko mo, weyae roko name Rare oneufekonde a eleukonde.” <sup>62</sup> Petrus nebei abe u bene nekeungehikene, imaehou moise eke rime a yan bu yan rimewole.

*Yesusre Aukaka Kowainye*

(Mat. 26:67-68; Mrk. 14:65)

<sup>63</sup> Yesusle kayaare hebate yo hiwa Nare aukaka kowainye hiwa rahuae yae bowate.

<sup>64</sup> Nane kayaa yo hebate yae na ijoko aheikoyainye mo hinainye, “Mana eleiko nde yae ware rahuae ukete.” <sup>65</sup> Nane merau aukaka konainyele a nekai sele uwainye.

*Yesus Yahudi Naei Yoyo Koseyo Bene*

(Mat. 26:59-66; Mrk. 14:55-64; Yoh. 18:19-24)

<sup>66</sup> Ya heuboke mo, Yahudi yun-jun bele imam yun-jun bele Musale walora wali heere foloukoke are isaeyaeiboke kelaemi yo arileufike, Yesus yawainyehoke naei are kolainye ijenne meufebeunguke. <sup>67</sup> Nebei yo wainye, “Maere yakaimbebo, Wali Ondofolo Kiyae Weyae Niyae?”

Yesus yae weumi, “Mare yakarembombena, mai nolora ro mbai sambai a hele yae eleikoi. <sup>68</sup> Nane merau Reyae mare hinerensimbena, mayab wo okoi. <sup>69</sup> Nebeibe nda heera Reyae, Allahle bokora mekale ro miyae uware yeubokale Kiyae, ninae erele Allah Elaelo Wakelo Naei meube reufine erenuwembondere.”

<sup>70</sup> Borate yo nemene hinainye, “Naendae wanan, Weyae na hele Allahle Kelu?”

Yesus yae weumi, “Mayae elaube hului mbai.”

<sup>71</sup> Nebei yo yae elate, “Ro miyae Naeinya a hele ame lon ninae oboroiyai, mana ya naei euwara na hele borokande!”

## 23

*Yesus Pilatusle Bene*

(Mat. 27:1-2, 11-14; Mrk. 15:1-5; Yoh. 18:28-38)

<sup>1</sup> Nebei are kolainye yo nemene ainyukate, Yesusre yawainyehoke Ondofolo Pilatusle bere ekate. <sup>2</sup> Nebeinye ekate mo, nebei yo Nare nda a horoubokebe elate, “Nda ro erannekoke aei kanina ro miyaere nibi bekobe keleimeyumi. Neyae weumi Kaisarre pajak omokonnemae. Nauware elele Neyae Ondofolo hi yae, Wali Ondofolo yae.”

<sup>3</sup> Nebeinye Pilatus Yesusre hineunge, “Na hele Weyae Yahudi naei Ondofolo?”

Yesus yae weunge, “Wenaeyai nane merau eleyae.”

<sup>4</sup> Nebeinye Pilatus imam yun-junde, nebei ro miyae arilewolere weumi, “Reyae nda ro naei u mekai wa mekai nane merau naei a faeu nemene ereungekokale, na foi bangka mo. Rahe randa Nare bekore mokomandere?”

<sup>5</sup> Benen nebei yo waeli hele baete elate, “Yudea kanina ro miyae nemene a moi hurewoumile naei era hena hului ehakoiboi yae nekenate, na bereise Galilea kanina ro miyaere bere a nareumikoke, mana meke ndane.”

*Yesus Herodesle Bene*

<sup>6</sup> Pilatus nebei elaikoke are boroukokene hineumi, “Nda Galileana ro?” <sup>7</sup> Galilea kanina yo Ondofolo Herodesle me einye honole. Pilatus isaeyebokke Yesus Galileana rone, nebeinye Yesus ukainyele Ondofolo Herodesle bokore eke. Herodes nebei hee Yerusalem yore kolone oroweke.

<sup>8</sup> Ondofolo Herodes Yesusle a elayeke borowekene, kena kaban kowole na be ijoko erenembondere. Herodes rabo halewole Yesus rambun emere-emere naei bene mokombonde. Neyae Yesusre erewoungene naei uwa roweungehike. <sup>9</sup> Nebeinye Herodes Yesusre a hi yae hineyeunge hi yae hineyeunge, nebeibe Yesus a mbai sambai ewei sele. <sup>10</sup> Imam yun-jun bele Musale walora wali heere foloukoke homofaere isaeyaeibokke kelaemi yo bele hebewate Yesusre a elaekei sele nekainyele. <sup>11</sup> Herodes bele naei felayo bele Yesusre mahi-mahi mokowainye, aukaka yae kowainye, ondofolo ondofolo naei yo malo yan malo haeyebokke, benen bukainyehike Pilatusle bokore ekate. <sup>12</sup> Herodes bele Pilatus bele yokeijo yae nekeyekebe, nebeibe nebei ya foi mokoikokete kahilire yeibokete.

*Yesus Honaibonde Naei A Ruke**(Mat. 27:15-26; Mrk. 15:6-15; Yoh. 18:39—19:16)*

<sup>13</sup> Pilatus imam yun-jun bele Yahudi yun-jun hiwa bele ro miyae hosoro bele arilewoumi <sup>14</sup> weumi, “Mayae nda ro raei bokore yawaungehoke meke elaube ro miyaere a nekai huweumi akure ketembondere. Mana ya nda mai bene reyae ereungekokale, mainya beko elaube naeinye reyae ehubayeikoi mo. <sup>15</sup> Herodes nebei sului mbai ehubaikoi, rabuhine ban ereungekokera ukeumi benen raei bokore yawainyehoke mekate. Nda ro Na me u mokolera nane merau Naei a faeu elerera erannekoke. Mayae nane merau na yaka eraube hoiboise homabondere me ure Neyae omokoiboi. <sup>16</sup> Nebeinye reyae rahaere mo ufemile bonaikondera haisengkonde ende.”

<sup>17</sup> Paskah ya kabande mo naei era hena huluinye, kawane hebate ro mbai nebei yore Pilatus hayennekonde menduwende.\* <sup>18</sup> Nebei ro miyae arilewole yo yae kaenate, “Nebei ro hombo! Maere Barabasbe hayennoko meukuwe!” <sup>19</sup> (Barabas yo kelai yan kelai mokouboke, ro houkokene kawane haeyekoke.)

<sup>20</sup> Pilatus kena kowole Yesusre hayennekonderene, nebei ro miyae arilewolere a roko hi bele a uwoumi. <sup>21</sup> Nebeibe nebei yo yae kaenate, “Nare ohaline bongko! Nare ohaline bongko!”

<sup>22</sup> Roko name nendo Pilatus nebei hului mbai hineumihike weumi, “Rahe bekobe neyae mokouboke? Reyae mbai sambai Naeinye beko ehubayeikoi, Nare homabonde aere u hele. Nebeinye reyae ufemile Nare rahuae bonaikonde, nebeisa haisengkonde ende.”

<sup>23</sup> Nebeibe nebei yo kali ara nene kaenate Yesus ohaline bonaikondera hele. Naei a yae mo herawaiبوke. <sup>24</sup> Nebeinye Pilatus nebei yo Yesus herendere a kaenewatene ninae be hineumbوke. <sup>25</sup> Nebei Barabas kawane hebele kiyae, yo kelai yan kelaise neungeboke kiyae riyainye huluinye Pilatus hayeungekoke meukuke. Pilatus Yesusre nebei yo naei me einye ikeumi naei kena hului yae mokowainye.

*Yesus Ohaline Bowate**(Mat. 27:32-44; Mrk. 15:21-32; Yoh. 19:17-27)*

<sup>26</sup> Nebei yo yae Yesus yawainyehoke nibi nolone Simon Kirenena ro yo eise menensindere mewole. Simonde ikilaiboke a elae haeyekoke ukainyele Yesus ohali kaewekebe kaembonde. <sup>27</sup> Ro miyae nekai sele Yesus na moisa hakainyekoke keteijeke. Miyae maengke nane merau hakainyekoke. Naei nolora hiwa Yesusre rime rimainyejeke. <sup>28</sup> Nebeibe Yesus euweke nebei yore weumi, “Yerusalem miyae maengke! Rare rimensemae. Mauwa, mai kelu omi rimebe rimenmi. <sup>29</sup> Naei yo bei yan bei ya mendene wa, mayae elembe, ‘Foi sele moi sele miyae kihore nekeyate yo, naei kou yahira kelu omi mbai ohono mo. Nane merau naei nime bune fa hi enareiboi mo.’ <sup>30</sup> Nebei hee yae

Ro miyae elure yoise ungaimile,  
‘Kereiso maere oimeherawe!’  
nane merau elure yoise ungaimile,  
‘maere feleimekone!’ †

<sup>31</sup> Reyae o nehi wanen, rabuhine ban Reyae beko ban bako banne, mayae niyae o kala-kala wanen, beko bako nekai mokoyaubene. Reyae o nehi wanen Kiyae beko mokaisene, emekai wanen mare o kala-kala wanen yore beko mokonayengkombe.

<sup>32</sup> Buloo kelai fela kelai ro bee nane merau yawaimiboke Yesus nanembainye ohali bonaikondera. <sup>33</sup> Ikate Ro Yun Bo Ma anuwau wae wayne ijenne Yesus ohaline baikoke. Nebei ro bee na meline meubene baikoke. <sup>34</sup> Yesus weumi, “Arai, ndi ro miyae naei beko mokate faeinyeumbonde, rabuhine ban naei me u mokate neyae isaeyeiboi sului.”

Yesus nambelae nebei felayo yae oye nihaeiboke nenaiejae mo wahaeikoke. <sup>35</sup> Nebeinye hebewate yo ijiko isane erewate. Yahudi yun-jun Yesusre aukaka kowainye, wayne, “Ro miyae hiware hole moloumiyekae lonbe, nda hee Allah yae na hele eleuboke ukete nda kani kelare Wali Ondofolore mekaena, Waei uware wenaie hole moloibo!”

<sup>36</sup> Kayaare hebate felayo nebei hului mbai aukaka kainye. Anggur bu faere mobe ikainyele. <sup>37</sup> Wayne, “Na hele Weyae Yahudi naei Ondofolona, Wauwa hole moloibo!”

<sup>38</sup> Na yun ran bumare bohire yae homo nda a yae molaikoke,  
NDA YAHUDI NAEI ONDOFOLO.

<sup>39</sup> Nebei ro bee meline meubene hebete hi yae Yesusre nane aukaka bae kounge, “Na hele Weyae Wali Ondofolona, mana nda hebandera wali yeimeko!”

\* 23:17 23:17 Ayat 17 homofae hena hiwa einye a baraikoke, hiwa ebaraikoi. † 23:30 23:30 Hosea 10:8

<sup>40</sup> Nebeibe na hi kayee yae weunge, “Weyae Allahre fe efaei? Nda ehee bukulu na hului mbai relannele. <sup>41</sup> Nebeibe meyae bee maei me u mokondekoke huluinye yarondekoke, nebeibe nda ro u mekai beko omokoyei.”

<sup>42</sup> Nebeisa Yesusre weunge, “Yesus, Waei yo waku Wenaai mele neubonde heene, raei u bene bele nekenayete.”

<sup>43</sup> Nebeibe Yesus yae weunge, “Reyae na hele wawale, nda heene wangkele Rangkele wali yo hena yo einye ayembonde.”

*Yesus Hereke*

(*Mat. 27:45-56; Mrk. 15:33-41; Yoh. 19:28-30*)

<sup>44</sup> Nebei hee hu yaukanne hului, nebeibe ouben hauben yeuboke hebewoke oke huare rai hujoko namene. <sup>45</sup> Hu na nukui u yeuboke, Allahle imaene malo kaban heere folaikoke uke fo beere raweukoke. <sup>46</sup> Yesus kali na kaban don mae kaenele, “Arai! Raei unulu Waei me einye kinyawale!” Nebei are mo eleukoke bae, na no na hibi hokoukoke.

<sup>47</sup> Felayo na yun kiyae, nenaai ijoko yae erewole, Allahre buma kolowoung, “Na hele! Nda ro na hele wali himaloungeboke.”

<sup>48</sup> Isare erenatere hokoweke ro miyae bewate naeise ijoko yae erewatene, imaere obere ewate na kena eisa mehi yae ekaifolowate. <sup>49</sup> Yesus na kahili wafeu bele miyae maengke Galileara hakainyekoke mewate yo bele na felanda mo hebaiبوke erainyoke.

*Yesus Molowainye*

(*Mat. 27:57-61; Mrk. 15:42-47; Yoh. 19:38-42*)

<sup>50</sup> Ro mbai na ro Yusuf Yudea kanina Arimatea yone honole. Naei wali himaloungeboke, na foi sele nekeweke. Nebei hee neyae Yahudi yoyo koseyo holona ro mbai.

<sup>51</sup> Neyae nane merau Allah Naei yo waku mennembondere rakeungeke. Yahudi naei yoyo koseyo hebewolebe, nebeibe Yesusre honaibonde a ruke neyae be ehineiboi.

<sup>52</sup> Yusuf eke Pilatusre riyeungehike Yesus na nore roungatere. <sup>53</sup> Nebeinye Yesus na nore ohali randa rubainyebokate roukate. Malo naei foi sele mokaiboke na ro lenan nebei here no rulaisike. Ruka buleinye ekate nekainyele. Nda ruka bulei manemfa hele waeibokate. Hi yae ha yae nebei anuwaunge here no mbai eneyei. <sup>54</sup> Nebei ya maehae mbai nen, Sabat ya nobeungeboka.

<sup>55</sup> Nebei miyae maengke Galilea kanira Yesus nangkele mbainye mewate yo Yusufre hakainyekoke nebei bulei bele Yesus naendae yae ruka buleinye nekainyele belere eraikoke. <sup>56</sup> Bukaiboke imaere ekate, Yesusle uwa rilenaibonde naeise bu fololo bele mokainyehake. Musale walora wali heere foloukoke a huluinye neyae Sabat yane no yaeiboke.

## 24

*Yesus Waleuboke*

(*Mat. 28:1-10; Mrk. 16:1-8; Yoh. 20:1-10*)

<sup>1</sup> Minggu ya na rene kaukau fele nebei miyae maengke naei rambun-rambun mokainyehake bele yaraikoke ruka buleise ewate. <sup>2</sup> Ruka buleise ekate nebei ruka kaban bulei romaufe ahaikoke erewate olainyekoke. <sup>3</sup> Na hibi eise ayeuboke bae, Yesus na no erewate an. <sup>4</sup> Nebeinye hebaiبوke onei-onei onewate mo, ro bee nambelae wili yae bate na bokone meisebeuboke. <sup>5</sup> Nebei miyae maengke fe hele yaroumikokene na be kanire bekate. Hebate wa, nda ro bee nebei yore a weimi, “Rahene mayae wali bele nekele ro herewate yo nolore yae baeyaunge? <sup>6</sup> Neyae oloo! Neyae ninai aunguke! Galilea kanine nekeweke hee nda a mare uwombe u bene nekenayembe, <sup>7</sup> ‘Reyae wamale, Reyae, Allahle bokora mekale ro miyae uware yeubokale Kiyaere beko bakore mokoyate yo naei me einye kinyenaisebonda, ohaline bonaisekonde, nebeisa ya name mo arenunde.’” <sup>8</sup> Nebei miyae maengke Yesus nebei a ukeumire u bene nekaimihike.

<sup>9</sup> Nebei miyae maengke ruka buleisa baebokate mekate mo, Yesus na moisa orowate yo ro me bee oro nen mbai bele yore ruka buleinye bewate rambun nemene huwewaimi nane merau na moisa orowate yo hiware bele huwaimi. <sup>10</sup> Nebei are huwaimi miyae maengke nda na ro niyae: Maria Magdalena, Yohana, Maria Yakobus nenake kiyae, nane merau miyae maengke hiwa yo Yesus na moisa orowate yo bele. <sup>11</sup> Na moisa orowate yo yae nebei miyae maengke a huwoumire na hele ban elewate. Naei waimi are a bulaen-bulaen mae elate. <sup>12</sup> Nebeibe Petrus hakauboke ruka buleise ewole. Eke, are niheufike, nebei bulei eise erewole, Yesus Nauware rulaisike malo mo nebeinye honowole. Petrus bukeufike ewole na kena eisa hubaunge an nda wanen yeubokere.

*Ro Bee Emaus Yore Ewote*

(*Mrk. 16:12-13*)

<sup>13</sup> Nebei ya mbai Yesus na moisa orowate ro bee Emaus yore ewote. Yerusalem yora Emaus yore nahau 10 km hului. <sup>14</sup> Nda Yerusalemne rilewole iwaube hokolo bee na oro ranne mete huweimeyete. <sup>15</sup> Eleimeyete, huweimeyete na u benera kolomeyeyele mo, Yesus meke hokolo beere meumibarauboke nanembaisa mewate. <sup>16</sup> Erabuhi yae mokoiboyaimi wanan, Yesusre erewoinyebwe, nebeibe Nare ro oroiboi.

<sup>17</sup> Yesus yae hineumi, "Rahe ahubabe nda nibi nolone mayae bee huweimeyebwe?" Hokolo bee hebeiboke na be bele kabeikoke. <sup>18</sup> Hokolo bee metera ro hi kiyae na ro Kleopas beufoke Yesusre weunge, "Wembai kolo ro era, nda Yerusalem yo einye manemfana bewate rambunde isaeyeboi?"

<sup>19</sup> Yesus yae hineumi, "Rahe rambun?" Hokolo bee yae weinye, "Nebei Nasaret yona ro Yesus. Neyae Allahle yendo kayaalo mbai. Naei a faeu bele Naei me u bele walora Allah na hele ukeunge meke naeise yakaungebwe nane merau ro miyae isaeyebwe Neyae Allahlera. <sup>20</sup> Imam yun-jun bele mai Yahudi yun-jun mae Nare honaibonde naeise Ondofolo Pilatusle me einye kinyainyebwe. Felayo yae Nare ohaline baikokate! <sup>21</sup> Mai rabo halewande hului Neyae mende mai Israel yoni-yoni Romawi naei me kelee u keleera bulaeremmele. Nebei ya yeubokera meke ya namebe yeuboke. <sup>22</sup> Nane merau miyae maengke hiwa mai nolora mekate maere mokaimebwe kulu-kulu hele yaendeboke. Na rene kaukau fele ruka buleise ekate, <sup>23</sup> nebeibe Yesus Na here no ehubayeikoi. Mekate elate, 'Meyae ekande, malaikat mo erekammile. Nebei malaikat yae waime Yesus waleuboke.' <sup>24</sup> Maeisa hiwa yo nane merau ruka buleise ekate, mekate elate miyae maengke a na helebe elate. Meyae mbaibe ekande, Yesusre ereiboi."

<sup>25</sup> Nebeinye Yesus yae nebei beere weumi, "Mayae na kobu hele! Allahle yenjo kayaayo homone molaikoke are mayae na hele elengkombere kena wauwau kaube. <sup>26</sup> Wali Ondofolo Allah are kolowunge hului beko helen hubannekonde helera Allah yae one hengko yae kitenengkonde." <sup>27</sup> Nebeisa Naei uwa naei abe Allahle homofaene nemene molowate yakawoumi, Musale homofaera huba raweuboke meke Allahle yenjo kayaayo molaikoke homofae nemene.

<sup>28</sup> Emaus yo nobewainye yae, Yesus na hibi endere uwa haraungebwe. <sup>29</sup> Nebeibe hokolo bee heraweyebwe weinye, "Be bafele ya na heki ban mo ouben yembondere, ninae lon maengkele ndane honoma." Nebeinye Yesus eweufike nebeinye hononater.

<sup>30</sup> Nanembainye nuwaikoke ramande anenatere yae, feu rouke, Naekore helen foise mo ukeunge, na hibi kayeukoke hokolo beere waheumiboke. <sup>31</sup> Nebei heera hokolo bee na ijoko keumikoke, Yesusre ro roinyebwe. Nebeibe Yesus hokolo bee naei nolora nundeuboke. <sup>32</sup> Naeise naeise hi yae hire weunge, "Ra kena roweufehike hele, Allahle homofaene a honate yakaimyemene!"

<sup>33</sup> Na hibi hokolo bee ainyukete bukeiboke Yerusalem yore ewote. Nebeinye na moisa orowate ro me bee oro nen mbai bele ro miyae hiwa yo bele arileufike nekewate. <sup>34</sup> Nebeinye nekate yo yae hokolo beere waimi, "Tuhan nana hesele waleuboke! Simonde Na uwa yakaungebwe."

<sup>35</sup> Nebeisa hokolo bee nibine ekete hubayaikoke a huwoimi nane merau Yesus feunge kaiwole heene ro roinyebwe.

*Na Moisa Orowate Yore Yesus Na Uwa Yakaumiboke*

(Mat. 28:16-20; Mrk. 16:14-18; Yoh. 20:19-23; Y.A.A. 1:6-8)

<sup>36</sup> Nebei bewate ahubane nare huwate mo, Yesus meke na nolone yakaiboi yae yakauboke weumi, "Onomi foka hubanne!"

<sup>37</sup> Nebei yo enaelo yae elewatene fe yae waku yae yaroumikoke. <sup>38</sup> Nebeibe Yesus yae weumi, "Rahene fe faeube, rahene mai hila rabo elae ban yaeiboke? <sup>39</sup> Raei me bele oro bele ijoko eren. Nda Reyae hele ya! Me foi yae Raei uwa ramense ijoko foi yae erense, enaelo naei melen bo Raeinya eraufele wanan ban."

<sup>40</sup> A huwoumira na me bele oro bele na hibi kelewoumi erewate. <sup>41</sup> Rei nekai kowatebe, nebeibe ijoko kelei-kelei mo kelewatene namman Neyae na hele waleuboke a eleikoi. Yesus yae hineumi, "Mai nolona raman ban mo mekaube?" <sup>42</sup> Ka bohi inye beubokere mo roukate ikainyele. <sup>43</sup> Yesus nebei ka ikainyelere mo, nebei yo naei bene hebeunguke anewole.

<sup>44</sup> Yesus weumi, "Rangkele mbainye orowande heene nda abe uwamale, Musale homofae moloukoke bele Allahle yenjo kayaayo hiwa molaikoke bele Mazmurne moloukoke bele nebei a nemene hului Raei naei molowate na hele benate bangsa mo."

<sup>45</sup> Nebeisa Yesus elae ikeumi Allahle homofaene a na mekai harainyebokere na hului isaeyebonde. <sup>46</sup> Yesus yae weumi, "Allahle homofaene molaikoke hului Wali Ondofolo mende, beko hubanengkonde, herendera ya name mo walembonde. <sup>47</sup> Nda kani kela

nemene forilengkonde Yerusalem yora bere huba raungaibonde nda a Wali Ondofolole Ro randa hungaimile, 'Ro miyae nde na beko bakora nulu kennebondena, Allah naei beko bakora faeinyermibonde.' <sup>48</sup> Mayae nemene mai ijoko yae erewaube rambun mai angkaei yae borowaube rambun yoni-yoni huwemembe. <sup>49</sup> Allah are heteungekoke huluinye Reyae mare Naeinya Roh isembere. Nebeibe mayae nda yone namman nekembe mende Allah Naei elae wake bele ketenembombe."

*Yesus Yo Bumare Ewole*

*(Mrk. 16:19-20; Y.A.A. 1:9-11)*

<sup>50</sup> Yesus yaweumiboke nebei yo eisa maibaleke ekate Betania yone, Na mere mo raneuweke nebei yore onomi yae ei hawewoumi. <sup>51</sup> Namman nare onomi ei hawewoumi yae, na hibi kaeuboke surgare ewole. <sup>52</sup> Nebei yo Nare ei molowainye, nebeisa uwa roweumihike yae Yerusalemde bukaiboke ewate. <sup>53</sup> Allahre ei mom-mom imae na kaban sele kiyae ne kayeke, na hibi-hibi Allahre buma kolainyeke.

## YOHANES

### *Yesus Allah Naei A Elele Kiyae*

<sup>1</sup> Nda homofae Yesus Wali Ondofolole naeise. Neyae nda kani kela beme fome hele Allahle nanembainye nekewote. Neyae Allah Naei uwa mbai nane merau Allah Naei a elele Kiyae yae kaenainye. <sup>2</sup> Na beme fome hele rambun yoni-yoni hengkelen erasi hee Neyae Allahle nanembainye nekewote.

<sup>3</sup> Allah yae ukeunge huluinye Yesus Wali Ondofolo Nembai yae rambun nanemene mokoukoke, elae hi rambun mbai sambaise omokoiboi sele. <sup>4</sup> Wali Ondofolole einya nekele nebei wali no niyae. Hehe ouben haubenne naeumile yae ro miyae na foi mokonatare erenaimile. Nebei sului mbai Wali Ondofolo wali nibi kelewoumi yae ro miyae wali foi nekenatare isaeiwaimi. <sup>5</sup> Allahre onaeinye ro miyae ouben hauben nolone wanen orate. Hehe ouben haubende naeumile wanen mae ro miyae nolone Wali Ondofolo Naei wali nibi a kelewoumi. Nebei are walobo yoni-yoni hun eraisi sului.

<sup>6</sup> Allah yae ro mbai ukeunge meke, na ro Yohanes. <sup>7</sup> Neyae burelende bonde robe meke. Ro miyae nemene Wali Ondofolore hila rabo halenate naeise Yohanes yae nda a huwoumi, "Wali Ondofolo mende, hehere naemmile Kiyae yembonde, rabuhine ban Naei wali nibi a kelemmille." <sup>8</sup> Yohanes bae nebei hehere naemmilere Kiyae ban, nebeibe Naei a moi neisi kiyaeere yeuboke. <sup>9</sup> Yesus hehere naemmilere kaenewainye Kiyae. Neyae hehe naeumile wanen Naei wali nibire ro miyae nemene kelemmille.

<sup>10</sup> Nebei hehere naemmilere kaenewainye Kiyae nda kani kelane nekewole yae nda kani kela Neyae mokouboke hororebe, Neyae meke hee nda kani kelana ro miyae Nare onewainye. <sup>11</sup> Naei ro miyae bokore mekebe, nebeibe Naei ro miyae yae Nare ei aiboi. <sup>12</sup> Nebeibe ro miyae nanemene eise hauwainyele yo, Naei Rore hila rabo halewainyele yo, Allahle kelu omire inyaibondere nibi mokouboke. <sup>13</sup> Nebei ro miyae melen u ha u yae ohonoi nane merau ro bele miyae bele kena huluinye ban, naei sele naei kena u Allahlera honoukoke.

<sup>14</sup> Yesus, Allah Naei a elele Kiyae, ro miyae uware yeuboke, aei u nolo u kainye nekewole. Ako bele Kelu nene waewae eyae ijokore eranneboke Kiyae. Naei Ako Allahle bokora meke, ro miyaere kena buhae u buhae aere ban mae heumi, Naei na hele wali nibire kelemi.

<sup>15</sup> Yohanes yae Yesusle abe ro miyae helende a kaban mae isaeiwoumi wa kaenewoumi, "Nda Kiyae naeise na bere nda a haraungebokale uwamale, 'Raei moisa mende Kiyae, nda Niya. Neyae ro bele enainyeronde, reyaebe ro ban. Rabuhine ban rare nda kani kelane ohonoi mo, nebei Kiyae bere meke nekewole.'" <sup>16</sup> Neyae ro miyaere kena buhae u buhae aere ban mae heumene, no ban hee ban aere foi mokoume. <sup>17</sup> Allah yae Naei yendo kayaalo Musale walora wali heere foloukoke abe ikeume. Nebeibe Allah yae Yesus Wali Ondofolole walora aere kena buhae aere ban mae heume nane merau Naei na hele wali nibire keleme. <sup>18</sup> Ro miyae hi yae ha yae Allahre roko mbai ereiboi mo. Nebeibe Allahle Kelu mbai Naekole u mekai mbainye ekeinyekete Kiyae yae Allahlena abe aere yakaumeboke.

### *Yohanes Bu Koumi Kiyae Naei Uwa Yakauboke*

*(Mat. 3:1-12; Mrk. 1:1-8; Luk. 3:1-18)*

<sup>19</sup> Naei uwa naei are hinainyehindere, Yerusalemna Yahudi ro miyae yae imam yoni-yoni bele Lewi yohona orona mena yo hiwa bele ukaimile Yohanesle bokore enatere. Neyae Yohanesre wainye, "Weyae naeinya hesele nde?" <sup>20</sup> Nebei mekai hinainyehikene Yohanes na yaka lon mae weumi, "Reyae Wali Ondofolo ban ma."

<sup>21</sup> Neyae benen hinainye, "Nebei wanenna, weyae nde? Allahle yendo kayaalo Elia era?"

Nebeibe Yohanes yae weumi, "Niyae ban."

Nebei yo yae benende hinainye, "Weyae Allahle yendo kayaalo kaban mendere meyae rakanne kiyae era?"

Nebeibe Yohanes yae weumi, "Niyae ban."

<sup>22</sup> Nebei yo yae wainye, "Weyae naeinya hesele nde? Ukaimile yore bemabonde emamiwenderene, waei uwa naeise nde yae emalengkonde?"

<sup>23</sup> Yohanes nauwa naeise Allahle yendo kayaalo Yesaya homone moloukoke a hului yae weumi, "Ro mbai a kala-kalara burelen eke bole, 'Tuhanye nibi hiyei ranembo!' " Reyae nebei kiyaeere yeubokale.

<sup>24</sup> Ukaimi ekate yo nolona hiwa Farisi holona yo. <sup>25</sup> Nebei yo yae Yohanesre hinainye, “Weyae Wali Ondofolo ban, Allahle yendo kayaalo Elia ban, nane merau Allahle yendo kayaalo meyae rakanne kiyae ban donbe, ndele ro yae weyae bu kamae?”

<sup>26</sup> Yohanes yae weumi, “Reyae bu yae kamaele. Mai nolone ro mbai hebele, mayae Nare onaunge. <sup>27</sup> Nebei Kiyae Niyae raei moisa mende. Naei oro mehau ha niheisi kulaiboise reyae na hului ban. Nare ro rowainye, nebeinye Naei bene reyae ro ban sele.”

<sup>28</sup> Nebei me u mokowole nemene Betania yo honole Yordan wi enaa reufi Yohanes bure kowoumi anuwaunge bewate.

*Yesus Allahle Domba Kelu Kiyae*

<sup>29</sup> Ya heuboke mo, Yohanes erele Yesus naei bokore mele. Nebeinye hebate yore Yohanes yae weumi, “Erenne, ndi Kiyae Niyae Allahle Domba Kelu.\* Nda kani kelana ro miyae naei beko bakore faeinyeiboi naeise nda Kiyae mele naei wali yae kinyembondere. <sup>30</sup> Reyae nebei Kiyaele abe na bere nda wanen mae haraungebokale isaeiwamale, ‘Raei moisa mende Kiyae nda Niyae. Neyae ro bele ronainyele, nebeibe reyaebe ro ban. Rabuhine ban reyae nda kani kelane ohonoi mo, nebei Kiyae meke nekewole.’ <sup>31</sup> Reyae nane merau na bere oneungekokale nebei Kiyae nde. Nebeibe Neyae Israel ro miyae nolone uware yakammibonde naeise reyae bere holo bu yae koremilere mekale.”

<sup>32</sup> Yohanes Yesusle naeise nda wanen mae a isaeiwoumi weumi, “Reyae ereubokale Allahle Roh aye merpati wanen mae yakura oke, Naei uwa ranne ufebeunguke hebele. <sup>33</sup> Reyae isaeyei boi nebei Kiyae nde. Nebeibe rare bu yae koremilere ukeufe Kiyae nda wanen mae ukeufe, ‘Weyae erele Allahle Roh onde ro mbai uwa ranne onsebenunde Kiyae, nebei Ro weyae bure kamae wanen mae ro miyaere Allahle Roh yae kommile.’ ” <sup>34</sup> Yohanes yae eleukoke, “Nebei Role uwa ranne yeuboke iwau raei ijoko yae erewalene nda a yae isaeyaemale, nebei Kiyae Allahle Kelu Niyae.”

*Yesus Na Moisa Oronate Yore Kaenewoumi*

<sup>35</sup> Ya heuboke mo, Yohanes nebei anuwau mbainye na moisa orowate ro bee bele hebewate. <sup>36</sup> Erewoungue, Yesus na bera mewole mo, weumi, “Erenne, ndi Niyae Allah Naei Domba Kelu Kiyae!”

<sup>37</sup> Yohanes na moisa orowate ro bee nebei wanen a boroketene, na hibi Yesusle moisa hakoinyekoke. <sup>38</sup> Yesus ereumi hokolo bee na moisa hakoinyekoke metene, euweke mo hineumi, “Mayae rahebe baeimeyeube?”

Hokolo bee yae weinye, “Rabi (na mekai, Guru), Weyae makeinye nekeyae?”

<sup>39</sup> Yesus yae weumi, “Mebu, menaeijae meberebo.”

Hokolo bee Yesusre hakoinyekoke nekewole anuwaufe ekate, nebei ya koko nanembainye nekayoke. Huae rai hukai keli hului yeuboke.

<sup>40</sup> Yohanes eleukoke are boroibokene Yesusre na moisa hakoinyekoke hi na ro Andreas, Simon Petrus naka baeke. <sup>41</sup> Andreas na hibi naka baeke Simonde nda are wennelere baeungekoke, hubayeikokete mo weunge, “Aka baeke, meyae Wali Ondofolobe hubayaendekoke, Allah yae oro umaufe heraweungeboke Kiyae!” (Na ro Ibrani afaeunge Mesias, Yunani afaeunge Kristus.) <sup>42</sup> Andreas yae Simon Petrusre yaweungehoke Yesusle bokore ekete.

Yesus Simonde ereungekoke wa weunge, “Weyae Simon, Yohanesle kelu, mana yara ware Kefas yae ro ronayewete” (Kefas Aram afaeunge nanembai Petrus Yunani afaeunge bele. Kefas bele Petrus bele na mekai ruka).

<sup>43</sup> Ya heuboke mo, Yesus Galilea kanira kulun wende endere a eleukoke. Nebei hee yae Yesus oro molouboke bele Filipusbe hubayeikoke. Yesus yae Filipusre weunge, “Raei moisa hakoibo.”

<sup>44</sup> Nebei Filipus Batsaida yona ro, nane merau Andreasle Petrusle naei yo mbai. <sup>45</sup> Nebeisa Filipus eke Natanielre hubayeikokete mo weunge, “Na bere Musa Allah a ukeunge wali heere foloukoke homone moloukoke. Musa bele Allahle yenjo kayaayo bele Wali Ondofolo naeise homone moloukoke. Nda hee meyae Nare andehubayeukoke. Neyae Yesus, Nazaret yona Yusufle kelu.”

<sup>46</sup> Nataniel yae Filipusre hineunge, “Nazaret yora foi naei kayeero na hului mende?”

Filipus yae weunge, “Mei ba, wena ei ijoko yae meinyereibo.”

<sup>47</sup> Nataniel nahaufa melere Yesus erekeunge, Natanielle abe elele, “Erenne, Allah mere baele Israel yohona hele mele, ame-ame ban kiyae.”

\* **1:29** 1:29 Yahudi agamane ro miyae beko mokouboke faeinyeiboise domba kelu yae Allahre hili era akau erare ongkou feleiboyate.



<sup>48</sup> Nataniel yae Yesusre weunge, “Weyae naendae mekai yae raei u mekai ma roufebokae?”

Yesus yae weunge, “Filipus ware ekaenekoi hee, Reyae na bere erekawale weyae ara no keleene nekeyae.”

<sup>49</sup> Nataniel yae weunge, “Guru, Weyae Allahle Kelu, Israel kanina ro miyae naei Ondofolo.”

<sup>50</sup> Yesus yae weunge, “Reyae na bere ara no keleene weyae nekeyae erekawale a eleukokale aerene Rare hila rabo halaerae. Weyae iwau emere-emere emekai bele nda yakaubokalera mokorelebe weyae ewerende.” <sup>51</sup> Benen Yesus yae weunge, “Nana heselebe wawale, Reyae Allahle bokora mekale ro miyae uware yeubokale Kiyae. Wa ijoko yae ewerende yaku wewe kongkonde Allahle malaikat yoni-yoni Raei bokore onate inyate konayende.”

## 2

### *Yesus Bu Hosorora Anggur Bure Mokouboke*

<sup>1</sup> Ya bee nekaikoke mo, Kana yo Galilea kanine ro miyaere yeiboke eraman bulau mokaibokene Yesus nenake nebeinye nangkele. <sup>2</sup> Yesus na moisa orowate yo bele nebei eraman bulau mokaibokere riyaimihike ekate. <sup>3</sup> Anggur bu anewatebe baeufokene, nenake meke Yesusre weunge, “Kelu, nda yo anggur bube baeumihoke.”

<sup>4</sup> Yesus yae weunge, “Ana, Raei uware yakarebonde ya namman donbe. Nebeise mokorebondere rahene Rare warae!”

<sup>5</sup> Nebeibe Yesus nenake yae nebei raman bulaunge kalia mokowate yore weumi, “Naei are ungamba huluinye nendon mokombombe.”

<sup>6</sup> Rukara mokaikoke hele kaban mehinen mbai nebeinye honate, neinye bu 100 literre rileikoyate hului. Nebei hele Yahudi naei era hena hului orore mere kuinyate naei.

<sup>7</sup> Yesus nebei raman bulaunge kaliare mokowate yore weumi, “Nebei helene bu rilengko!” Nebei yo bu rilaikeke, hele na mehinen mbainye maemae kaikoke.

<sup>8</sup> Nebeisa Yesus nebei yore weumi, “Eraman bulaufe be neihoi kiyaere ebi ken rengkombe yennele hubansinde.”

Nebei yo raeikoke ekate ikainyele. <sup>9</sup> Bu hosoro anggurre yeuboke hubaufike bae, ma hi wanen hubaunge (neyae isian nda yeubokere, nebei kaliare mokowate yo yae mo naeisaei). Nebeinye eraman bulaufe mokouboke ro na molore kaeneungekoke meke wa, <sup>10</sup> weunge, “Honoyele huluinye anggur yu bele kayeero yae bere waheikoyaimi. Nebeinye ro miyae helen anenaisindene yun yambi-yambi konatera wa hungkae-hungkae wahaeimi erabe. Nebeibe weyae ayeufakae honowole nda hee yae wa yu bele kayeero na moisa wahaemae.”

<sup>11</sup> Galilea kanine Kana yone Yesus rambun emere-emere mokowole nolora, nda niyae naei bere hele. Nda iwau wae naei nene waewae yakauboke nane merau Naei moisa orowate yo Nare hila rabo halewate.

### *Yesus Allahre Ei Mom-Mom Imaere Faeinyeuboke*

(Mat. 21:12-13; Mrk. 11:15-17; Luk. 19:45-46)

<sup>12</sup> Nebei raman bulau baeufokera Yesus kulun uke Kapernaum yore nenake yae, nauwaka wa yae nane merau na moisa orate yo bele nanembaisa ewate. Kapernaum yone ya name hului nekaikoke.

<sup>13</sup> (Mesir kanine Allah yae Yahudi naei bena kelu fa-fare hole moloumiboke hee u bene nekeisi-nekeisi naeise Yahudi ro miyae mokoiboyate) ya kaban Paskah nobeungekokene Yesus oro molouboke Yerusalem yore ewole. <sup>14</sup> Yerusalemna Allahre ei mom-mom imae na kaban sele kiyaene hili era akau erare ongkoufe felenaibonde naei obo yoku sapi, domba, aye merpati naise hewate yo bele Yahudi naei roi yae yo meiko-meiko yo naei roise bulewate yo bele Yesus hubayaeikoke. <sup>15</sup> Yesus bonde heraeiyemmile naei erahuae ha yae mokouboke. Nebeisa Neyae obo yoku naise hewate yo heraeiwoumi, roise ei buke mei buke baete anuwau na roi bele feleisayeunge kani ranne here ware weiboyole. Nda yo bele obo yoku bele nanemene Allahle ei mom-mom imae na kaban sele kiyaere houfa hukeyi baleyate. <sup>16</sup> Aye merpati naise hewate yore Yesus weumi, “Nda anuwau mai rambun nanemene yarongko! Maekore eise molainye imae mayae rambun nai hei-sei anuwau omokojiae hele!”

<sup>17</sup> Nebei mekai bewatene, na moisa orowate yo Allahle homofaene molaikoke abe bene nekeumihike. Nebei a nda wanen molaikoke, “Allah, Waei ei mom-mom imae kena kaban sele kale, na hibi-hibi u benene nekenaisele.”\*

\* 2:17 2:17 Mazmur 69:9

<sup>18</sup> Yahudi yun-jun a elae yae Yesusre wainye, “Weyae nebei me u mokoubonde kiyae wanan naisse hewate yore herae yeumihikaere maere iwau wanan keleumbonde naeise rambun emere-emere mokoibo eremabon!”

<sup>19</sup> Yesus yae weumi, “Allahre ei mom-mom imae nda hebele kalambo. Reyae ya name mo nda hebele ma na hului arenunde.”

<sup>20</sup> Nebeibe Yahudi ro miyae yae wainye, “Ralo yakama rorele u bee mehine mbai bele (46) Allahre ei mom-mom imae na kaban sele kiyae ro miyae ainyunuke. Weyae ya name lon mae benen aungunundere?” <sup>21</sup> Nebeibe Yesus Na uwa naeibe Allahre ei mom-mom imae yae ahuneboke Yahudi ro miyaere uwoumi. <sup>22</sup> Mainyekeukoke Yesus nulu yo mahe yora aunguke hee yae wa na moisa orowate yo Allahre ei mom-mom imaeere Yesus naei uwane ahuneboke eleuko kebe bene nekeumihike, nane merau Allahle homofae na a belere Yesus uwoumi a belere hila rabo halewate.

<sup>23</sup> Paskah ya kaban kowate hee Yesus namman Yerusalem yone nekewole. Rambun emere-emere mokowole erewainyene, ro miyae helen na hele yae elewate nda Kiyae Niyae Wali Ondofolo. <sup>24</sup> Nebeibe Yesus yae bae nebei ro miyae naei a elatere rabore ehalei sului, rabuhine ban ro helen miyae helen naei u mekai ame-amere roumibokene. <sup>25</sup> Ro miyae naei u mekai mbemba mbemba Yesusre ehuweikoisebe, nebeibe ro miyae naei u mekai Yesus naeisaei. Rabuhine ban nebei ro miyae naei kena ei bele Yesus ninae isaeyubokene.

### 3

#### *Yesus Nikodemusre Kelewoung*

<sup>1</sup> Yahudi naei yoyo koseyo holona ro mbai Farisi holone hakouboke na ro Nikodemus. <sup>2</sup> Ya mbai be baheuboke yae Yesusle bokore meke mo weunge, “Guru, meyae maeisaei Weyae Allah yae ukete ro miyaere isaesei keleumilere mekae Kiyae, rabuhine ban Allah Ware ei haweitene nebei rambun emere-emere Weyae mokoyae. Nebei me u ma ro miyae hi yae omokoiboi sului.”

<sup>3</sup> Yesus yae weunge, “Reyae na helebe wawale, ro miyae nde maenin wayeu fa honate wanan benen Allahlera ohonoinya, nebei kiyae Raei me kelee u keleena nekate wali foi moi ehubaikoi sului.”

<sup>4</sup> Nikodemus yae weunge, “Naendae mekai yae rorele yembonde lonbe honnate? Benen honnatere nebei kiyae na hului ban nenakele kou ei yahi einye enensinde.”

<sup>5</sup> Yesus yae weunge, “Reyae na helebe wawale, ((nulu keumiboke ro miyae na kena u ma hi hele inyaibonde. Nebei yo Allahle Roh weumi are hakainye, naei bekore kena haehae katere ehakoiboi. Naei kena ure benen eme honokate wanan inyaibonde.)) Nebei wanan bewate ro miyaere bu konaimile. Nulu ekeiboi nane merau Allahle Roh aiboi ro miyae Raei me kelee u keleene nekate ro miyae holone eyeisi sului. <sup>6</sup> Ro miyaera honowate yo ro miyae u mekai yae koyate. Allahle Rohra honowate yo Allahle Roh u mekai yae koyate. <sup>7</sup> Reyae wawale, weyae benen Allahlera hononete hele a wawale aerene fa oboijae. <sup>8</sup> Allahle Roh alu wanan raweiboyolena boye naei kena hului eyewole wanan. Eyae na kulun eiborowannele, nebeibe eyae isian makeisa mele nane merau makeise endere. Nebei sului mbai Allahle Roh yae Naei kelu omi na kena u einye mokoumile.”

<sup>9</sup> Nikodemus yae weunge, “Nebei a ma haraungebokae eleukokae naendae mekai yembonde?”

<sup>10</sup> Yesus yae weunge, “Weyae Israel ro miyaere isaei hebaende kelaemi holona ro na hi niyae. Nebeibe nebei a wawalere isian a lon mae warae! <sup>11</sup> Na helebe nda a wawale, Meyae maeisaeise nekande abe wayembe nane merau meyae ijoko yae erekande abe isaeyaeyembe. Nebeibe maei a isaemambere mayae ro miyae na helere eleikoi kaube. <sup>12</sup> Nda kani kelana ro miyae nolone baete rambun abe mare huwamalebe mayae na helere eleikoi kaube. Naendae mekai yae mare surga naei rambun are ufembene mayae na hele elengkombe? <sup>13</sup> Ro miyae hi yae ha yae roko mbai surgare ei mo. Reyae, Allahle bokora mekale ro miyae uware yeubokale Kiyae, mo surgane eweufikale. <sup>14</sup> Na bere Allahle yendo kayaalo Musa yae a kala-kalane rami yae akewate ro miyae hole molommibondere rami tembagara mokaibokebe one neungejeke. Nebei sului mbai Reyae, Allahle bokora mekale ro miyae uware yeubokale Kiyae, bumane nenaisijende hele. <sup>15</sup> Ro miyae nanemene Rare hila rabo halenaisele yo wali hena bona enaiyaronde naeise Reyae bumane nenaisijende. <sup>16</sup> Allah yae nda kani kelana ro miyaere kena buhae u buhae kaban hewoumi aerene Reyae Na Kelu mbai ken sele kinyeumiboke. Nde maenin mae Raei a elalere hila rabo halensele kiyae Allah bele ewaheikoi nebeibe wali hena bona endowende naeise, Reyae hererelere Allah ukeufe mekale. <sup>17</sup> Ro miyaere

me noremiboyonde naeise ban, nebeibe naeinya hesele nda kani kelana ro miyae holere moloremibonde naeise, Allah na Kelu Reyae nda kani kelare ukeufe mekale. <sup>18</sup> Nde yae Raei a elalere hila rabo halenselena, me onoyoi nekenate. Nebeibe nde yae hila rabo Raei a elalere ehaleinya, Allah yae me nokoungwe. Rabuhine ban nebei ro miyae Reyae Allahle Kelu mbai kende hila rabo ehaleinye.

<sup>19</sup> "Nda u mekai aerene ro miyae ehee bukulu emminoyonde: Allahle wali hena wali nibi ako faeuko hehere naemmile wanen nda kani kelare meke. Nebeibe ro miyae nebei ako faeuko ahi, nebeibe ouben hauben nolone wanen nekenatere kena kowate, rabuhine ban me u beko mokowatene. <sup>20</sup> Wali beko bako mokoyate ro miyae Allahle wali hena wali nibire ikele kainye. Nebei wali nibi Reyae kelaemaelere ahi hele, rabuhine ban hehe naeikoyele wanen naei me u mokate naei mare yakammibonde belene. <sup>21</sup> Nebeibe nde na helere mo baete ro miyae Raei kelaemaele wali nibire hakoyainye. Nebei nibi yae hehe ouben hauben nolone naemmile wanen mae naei me u Allahle walora mokatere na yaka yakanaimile."

#### *Yesusle Naeise Yohanes Bu Koumi Kiyae Yae A Elewote*

<sup>22</sup> Nebeisa Yesus na moisa orowate yo bele Yerusalem yora kulun ukate Yudea kanire ewate. Ya heki ban Yudea kanine nanembainye nekwate, ro miyaere bu kowoumi.

<sup>23</sup> Salim yo kelaunga anuwau mbai na ro Ainon. Nebei ijenne Yohanes bure koumi kiyae ro miyaere bu kowoumi, rabuhine ban bu helenne nane merau ro miyae helen nebei anuwaufe bure kommilere hokoumekene. <sup>24</sup> Nebei hee Yohanes namman kawa einye eiseikoi.

<sup>25</sup> Yohanes na moisa orowate yo bele Yahudi ro mbai bele Yahudi naei era hena bu kui-kui naei a kenane kilewate. <sup>26</sup> Nebei yo ekate Yohanesre wainye, "Guru, aengkele nanembainye hebewande Ro naei weyae are isaeiwamae Kiyae, nda hee Yordan wi bonei ndi reufine nebei Ro bu ekekoumi. Naei bokore ro miyae nemene fomene hokoyele."

<sup>27</sup> Yohanes yae weumi, "Ro miyae naei angken nuwei Allah wennele hului mo nuwenate. <sup>28</sup> Reyae isaeiwamale a boraukoke mo, 'Reyae Wali Ondofolo ban, nebeibe rare ukeufele Neyae menderene bere holo yae mekale.' " <sup>29</sup> Yohanes nda a wanen mae ahuneboke, "Miyae neme weiboyainye nebei rore weiboyainye kiyaele miyae. Nebei ro naei kahili wafeu na bokone ayeufake hebele ro, nane ro neme miyae neme wainyeboke rei kole a boroukokene kena foi sele hubaunge. Nebei sului mbai reyae hubanale. Nda hee nebei Ro neme mekene Raei kena rei mai yae eufemeleke. <sup>30</sup> Nebei Kiyae bereise erenainyele, rare moise yae bulenaisende."

<sup>31</sup> Yohanes namman huwele, "Neyae surgara meke ro miyaene, nde maenin horo, hi yae ha yae Nare ehameikoi. Reyae nda kani kelara nulaisbokene raei isaei hebaen nda kani kelana rambun-rambun naei mo raeisaei. <sup>32</sup> Yesus surgara meke Kiyae naei ijoko yae erewole naei angkaei yae borowole abe isaeyumibe, nebeibe ro miyae keli name hele Neyae elele are hila rabo halaete. <sup>33</sup> Yesus isaeyumi are hila rabo halaete yo na hele yae elate Allah na hele a mo weume. <sup>34</sup> Allah ndare ukeunge meke Kiyae Allahlena ako faeuko mo weumile, rabuhine ban Allahle Roh na hibi-hibi nebei Kiyae elae yae kiteyunge. <sup>35</sup> Ako Allah na Kelure kena buhae heunge, nane merau Ako Naei me einye u einye rambun yoni-yoni na Kelu me eise kinyewoungwe hakewoungwe. <sup>36</sup> Allahle Kelu Naei a elalere hila rabo halende ro miyae wali hena bona hubayeunge. Nebeibe ro miyae nde Allahle Kelure moi bulennele wali hena bona eyereiboi. Nebei ro miyae Allah na hibi-hibi ehee bukulu hubayeunge."

## 4

#### *Yesusle Samariana Maengke Bele A Elewote*

<sup>1</sup> Farisi holona borowate, ro miyae helen sele Yesusre hakowainye nane merau bu kowoumi. Ro miyae name keli mo Yohanesre hakowainye. <sup>2</sup> Naeinya hesele Yesus Nenaiejae ro miyaere bu okoi, na moisa orowate yo yae kowaimi. <sup>3</sup> Farisi holona nda a borokate Yesus isaeyubokene, Yudea kani nukeungeboke beufoke Galilea kanire ewole.

<sup>4</sup> Naei ende nibi Samaria kanira hele nensande fondere. <sup>5</sup> Samaria kanina yo mbai Sikarre eke. Nebei yo kelaunge nendahina Yahudi ro miyae naei yobe kaban Yakob yae kani ebi na kelu Yusufre kinyeungeboke. <sup>6</sup> Nebeinye Yakubule rotebu (bu hele) yale. Nibi a ahau mewolene Yesus nauwa yambi koloukeungene nore yengkundere rotebu kelaunge eunuweuboke. Nebei hee hu yaukanne hului.

<sup>7</sup> Nebeinye nekele yae Samariana miyae mbai bu reikoise meke. Yesus yae weunge, "Rare bu yeise anerehin." <sup>8</sup> Yesus nembai nekele, na moisa orowate yo raman yarokoise ro eise ekate.

<sup>9</sup> Nebeibe nda Samaria miyae yae weunge, “Ae, na ijen ban sele weyae Yahudi ro reyae Samariana miyae lonbe bure aneufindere mekaeriyarae?” (Rabuhine ban Yahudi ro miyae yae Samaria ro miyaere ele moinya yae me baeyaimine.)

<sup>10</sup> Yesus yae weunge, “Allah yae ro miyaere aere ban mae foi yeyeumi nane merau Reyae ware bu andehindere riyawale Kiyae Allah yae ukeufe mekale. Nebei a isaeyebokaena, weyae Rare wali bele bu riyeufehinde, ware walire yeumi bu isete.”

<sup>11</sup> Nebei miyae yae weunge, “Tuhan, nda rotebu wauwau, Weyae bure rekonde mongkon u lonbe. Makeisa nebei walire yeumi bu rowele? <sup>12</sup> Naendae wanen waei u benera nekayete Weyae kaban sele maei yobe Yakoblera? Rotebu mo kinyeumeboke, neyae, naei kelo omi, naei obo yoku, naei orona mena bele aneimeyande.”

<sup>13</sup> Yesus yae weunge, “Nde yae nda bu anensinde benen buki ennehubande, <sup>14</sup> nebeibe Reyae isende bu anensinde Kiyae bukire ehubasi nekenende. Reyae isende bu yae anensindera nauwa einye bu no wanen yembonde, na hibi-hibi rilennende, wali hena bona hubannende.”

<sup>15</sup> Nda miyae yae Yesusre weunge, “Tuhan, bukibe korele belene, nebei bu yeise, bure nda anuwaunge benen ereyei.”

<sup>16</sup> Yesus yae weunge, “Eye, wa molo kaeneungekonde ndare mebe.”

<sup>17</sup> Nda miyae yae weunge, “Reyae ro ban molo ban ma.”

Yesus yae benende weunge, “Na helebe eleyae, Weyae na hele ro ban molo ban. <sup>18</sup> Weyae ro maehae mbai nekaukoke, nda haeia yaei bele nekeube nebei waei ro molo ban. Nebei wanenne nda a elalene weyae na helebe eleukokae.”

<sup>19</sup> Nda miyae yae weunge, “Tuhan, mana na yaka hele reyae hubanale, na hele Weyae yendo kayaalo na hi niyae. <sup>20</sup> Maei yobe naei kamahe naei nekayeke nda mokone Allahre ei molainyeye, nebeibe mayae Yahudi ro miyae yae elaube Yerusalem yo mbai nebei anuwaunge mo eyae Allahre eise molomanele hele.”

<sup>21</sup> Yesus yae weunge, “Rare hila rabo haleise! Na ya bele hu bele mende, mayae Ako Allahre nda mokone ei molonnele ban nane merau Yerusalem yone ban. <sup>22</sup> Mayae Samaria ro miyae nendon rore oroiboi Allahbe ei molaunge. Meyae Yahudi ro miyae eise molannele Allah meyae rore rannele Kiyae, rabuhine ban Yahudi naei nolora aere hole molommele Kiyae mekene. <sup>23-24</sup> Nebeibe Allah roh ma yae nekele, ro miyae kena u einye a elele borole. Nda hee Allah yae Naei na hele a ro miyae kena u einye yakayeumi. Allahre ei molonainyelere ro miyae Naei kena u einye ei molonainyele hele nane merau Neyae keleumi na hele wali nibi a hului nekenate. Nebei u mekai ma ro miyaere Allah baele.”

<sup>25</sup> Nda miyae yae Yesusre weunge, “Reyae raeisaei nekale Allah yae oro umaufe heraweungeboke ro Wali Ondofolo Kiyae mendere. Neyae mende heena nemene fomene ninae aere yakammekonde.” (Na ro Ibrani afaeunge Mesias.)

<sup>26</sup> Yesus yae weunge, “Nane Kiyae mbai Reyae Niyae, wangkele are faeufe eleyonde mbai Niyae.”

<sup>27</sup> Nebei hee yae Yesus na moisa orowate yo baeiboke mekate. Yesus miyae mbai bele ane elete erainyene fa yae bate. Naei kena une nda a hinewainye, “Rahere baeyae? Rahe abe eleubere?” nebeibe a ewei mo hebate.

<sup>28</sup> Nebei miyae na habure mo nebei anuwaunge raufike, nebeisa yore habeleweke, ro miyaere weumi, <sup>29</sup> “Aka naei baeke naei memerembo, ndina ro mbai Neyae Wali Ondofolo era. Raei u mekai wa mekai kowekale nanemene hele yakaufekoke.” <sup>30</sup> Nebei yona ro miyae aibaleke Yesusle bokore ewate.

<sup>31</sup> Nebei miyae ewole mon na moisa orowate yo yae Yesusre uwainye, “Guru, eraman aneiko ba.”

<sup>32</sup> Nebeibe Yesus yae weumi, “Raei eraman honaisele, nebei naeise mayae maisaei ban.”

<sup>33</sup> Na moisa orowate yo hi yae hire hineunge, “Naendae wanen, Neyae anengkonde eraman ro miyae roukate mekatene era?”

<sup>34</sup> Yesus yae weumi, “Reyae andekonde eraman nda niyae: Allah Rare ukeufe mekale Naei kenare kole hului mokorekonde nane merau Rare kinyeufekoke kalia riyau ufembonde. <sup>35</sup> ((Yesus Naei kalia mokowole bele era bolu hekene moloisayate ani hokoikoyate bele ahuneungeboke.)) Mayae nda a mekai eyelewaubebe ya, ‘Benen oko keli nekemakonde anire hokomale ya mensembonde.’ Nebeibe Reyae mare wamale, enere faise ijoko eren! Nda kani kelane ro miyae heke yoni-yoni fae yangko-yangko wanen yaeiboke. Fae yangko-yangko yoni-yoni mokainyehake hokonatere yaeiboke wanen mbai ro miyae mokainyehake Raei a elalere boronate hila rabo halenate. <sup>36</sup> Nda hee anire maluwate yo na roibu yarate. Naei hokate rambun wali hena bonare enaiyaronde ro miyae. Nebei mekai yaere Allahle wali nibi kelaeimi ro miyae

nemene rei mai konate. Neyae bolure molate yo bele anire maluwate yo bele wanan yaeibo. <sup>37</sup> Nebei mekai yaere nda a na hele yembonde, 'Hi yae molonde hi yae maluwembonde.' <sup>38</sup> Reyae ukamale mayae omoloikoi anuwaungare ensokombere. Ro miyae hiwa aimoloukoke, mayae ekaube nebei yo yae bolu molaiikoke na anibe ensokombe."

<sup>39</sup> Nebei Samaria kanina miyae yae elewole, "Raei u mekai wa mekai mokowale Yesus nanemene wufekoke." Neyae a isaeiwoumine Samaria yona ro miyae helen Yesusre na hele Wali Ondofolo yae elewate. <sup>40</sup> Samaria ro miyae Yesusle bokore mekate mo Nare moi hurewainye nebei yo bokone nekendere. Nebeinye ya bee hele Yesus nebei yo bele nekaikoke. <sup>41</sup> Benen ro miyae helen sele Yesus elewole are boraikokene Nare hila rabo halewainye. <sup>42</sup> Nebei yona ro miyae nda maengkere wainye, "Meyae hila rabo halaenne weyae uwamae a aerene mo ban. Rabuhine ban menaeijae Naei euwara elewole a borandekokene nane merau maeisaei Neyae nana hesele nda kani kela hole moloiboi naei Ro."

*Ondofolo Herodes Naei Kaliare Mokate Ro Kaban Na Kelure Yesus Onomi Ikeunge*

<sup>43</sup> Ya bee Sikar yone nekeukokera mo, Yesus Naei Galilea kanire ewole. <sup>44</sup> (Yesus naei euwara Nenaiejae eleukoke, "Yendo kayaaloo mbai na yone yanne foi yae ei ehawe, nebeinye ro miyae nare be ehinei.") <sup>45</sup> Nebei hee Galilea kanire eke bae, nebeinya ro miyae na kena u foi moi sele ei hauwainye. Paskah ya kaban Yerusalem yone ekate nanaei Yesus na me u mokowolere ijoko yae erewainye.

<sup>46</sup> Nebeisa benen Yesus bukeufike Galilea kanina Kana yore honolere meke, bere bu hosoro ukeunge anggur bure yeuboke ijende. Kapernaum yona ro mbai Ondofolo Herodesle kaliare mokowole ro na kelu erane kowole. <sup>47</sup> Neyae borouboke Yesus Yudea kanira Galilea kanire mekene bae, eke Yesusre riwoungere Kapernaum yore mende na fa era hereinyen-hereinyen kowole onomire inyendere.

<sup>48</sup> Yesus nda rora weunge, "Mayae rambun emere-emere ijoko ereiboinye Reyae Wali Ondofolo yeubokalere mayae hila rabo ehalei sului."

<sup>49</sup> Ondofolo Herodesle kaliare mokole ro yae weunge, "Tuhan, u hale yae mele raei fa neherei yae."

<sup>50</sup> Yesus yae weunge, "Eye! Wa fa ninnae onomi rouke."

Nda ro Yesusle ane faeunge hakouboke na hibi ewole. <sup>51</sup> Nibi nolone nare ewole mo na yebaei bubaei be huhu baikoke. Mekate wainye, "Wa fa ninnae onomi rouke." <sup>52</sup> Nebeinye nda yore hineumi, "Makei haei yae uwa naume hireungeboko?"

Nda yo yae wainye, "Wena rai hujoko mbainye u naume hireungeboko."

<sup>53</sup> Naeko na u bene meungenekeufike na hele nebei haei yae Yesus a ukeunge, "Wa fa onomi rouke." Nebeinye na miyae fa-fa na imae ei obe einya yo bele nemene Yesusre hila rabo halewainye.

<sup>54</sup> Yudea kanira Yesus bukeufike Galilea kanine meke heera Neyae rambun emere-emere mokowolera roko bee nendo mokouboko.

## 5

*Bukoba Anuwaunge Ro Mbaise Yesus Onomi Ikeunge*

<sup>1</sup> Mainyekeukoke mo, Yahudi naei ya kaban na raman bulau belene, Galilea kanira Yesus kulun uke Yerusalem yore ewole. <sup>2</sup> Yerusalem yore yanainyeko ele dombare yawaimi ate romau kelaeunge bukou mbai yale, Ibrani afaeunge Betesda yae wainye. Nebeinye baengko bele norofa maehae mbai yan mae haeikoke. <sup>3</sup> Nebei anuwaunge ro miyae nekai sele era buloona yo, ijoko kumba yo, oro rebeisi-rebeisi yo, oro mere nimewaimile yo bele honate. <sup>4</sup> Rabuhine ban roko mbemba Allahle malaikat oyowole nebei bukou na bu neunge kuba ayakowole. Nde yae bere oro molombonde enensinde kiyae era buloo naendae wanan horore, na hului onomi rowende.\* <sup>5</sup> Nebei anuwaunge ro mbai ralo yakama 38 hele era buloo koweke. <sup>6</sup> Yesus nebei ro honowolere erewoungere hee, nebei u mekai mo yae heki hele honowekere isaeyebokene nda rora Yesus yae hineunge, "Weyae onomi rowelere kena koyae?"

<sup>7</sup> Nebei ro yae weunge, "Tuhan, ndana ro miyae bu ayakowole heene rare rowensele nda bukou eise hansebonde naeise u. Renaeijae nebei bure nakeleyale hee hiwa yo moi woyaisele bena eyakoikoyate."

<sup>8</sup> Yesus yae weunge, "Ainyu wa kewa yumake yaroiko aloinyoko eye." <sup>9</sup> Nebei hee yae nda ro onomi rouke, na kewa yumakere mo yaroukoke aloungeko ewole.

\* 5:4 5:4 Ayat 4 homofae hena hiwa barainyeko hiwa ebaraikoi.

Nda rambun Sabat ya yeuboke. <sup>10</sup> Nebeinye Yahudi ro miyae yae onomire rouke rore wainye, “Mana Sabat ya. Aei Yahudi naei wali heere foloukoke homo huluinye Sabat yane kewa yumake ekaeiboi ei sului.”

<sup>11</sup> Nebeibe nda ro yae weumi, “Rare onomire ikeufe Ro yae a ukeufe hului ra kewa yumake yarokokale male.”

<sup>12</sup> Nda yo yae hinaiyne, “Ro nde ware ukete hului wa kewa yumakere yaroukoka alougekoka meyae?”

<sup>13</sup> Nebeibe onomire rouke ro isian nde yae onomi ikeunge, rabuhine ban Yesus Nauwa ro helen miyae helen nolone euyaneukokene.

<sup>14</sup> Nebeisa Allahre ei mom-mom imaene Yesus onomire ikeunge ro bele hubayeikoke mo Yesus yae weunge, “Waei uwa na hubaungehike ma na beko hele kayeerobe enaiyembonde bele era, nda hee weyae onomi roukake benen me u beko omokoyeia.”

<sup>15</sup> Nebei ro isaeyuboke Yesus yae onomi ikeunge. Nebeinye eke Yahudi ro miyae hinewainyelere Yesusle ro yakaumboke.

*Wali Yemmile Naeise Yesus Yakauboke*

<sup>16</sup> Sabat ya yae nda rore Yesus onomi ikeunge aerene, Yahudi ro miyae Yesusle naeise a beko eleiko huweiko kowate. <sup>17</sup> Nebeibe nda yore Yesus yae weumi, “Maeko Allah foi naei rambun na yane baei mokoyele. Reyae nebei sului mbaiibe mokale.” <sup>18</sup> Yesus nebei a ukeumine, Yahudi yun-jun elae hele relewainye honaibonde nibine baewate. Nda aerene Yesusre honaibondere: Yahudi naei era henane Sabat yane omokoi kiyaebe Yesus moi woke mokouboke nane merau Allahre Yesus Naei Ako yae elele walora Allah Naei uwa mbai yae elele.

<sup>19</sup> Nebeinye Yesus nda yore weumi, “Reyae na helebe wamale, Reyae Allahle Kelu. Nebeinye Raei kena hului yae rambun hire omokoi sului. Maeko yae mokole rambunde Reyae erale Kiyae mokorele, rabuhine ban Maeko yae mokole rambun Reyae mokale. <sup>20</sup> Maeko Reyae Naei Kelune buhae heufe. Naei rambun mokole nemene Rare keleyeufe. Nda rore onomi ikanalera benen rambun emere-emere emekai bele Maeko yae kelensebonde. Reyae nebei rambun eremokondene fa yae embombe. <sup>21</sup> Maeko yae ro miyae herewate yore ainyainyu kowoumi wali inyemile ma mbai Reyae kena korele ro miyaere wali isemile. <sup>22</sup> Nane merau ro miyae walire Maeko yae hului okoloi. Nebeibe walire hului kolommile naeise nanemene Reyae na Kelu Niyae kinyewoufe hakewoufe. <sup>23</sup> Nebei aerene ro miyae nanemene Maekore be hinenainyele yo, nebei sului mbai Reyae Na Kelure be hinenaisele. Nde yae Reyae Na Kelure be ehineinya, nebei kiyae Ako Allah ndare ukeufe mekale Kiyae be ehinei.

<sup>24</sup> “Reyae nana heselebe wamale, nde yae Raei a elale borombonde nane merau Rare ukeufe mekale Kiyaele a elelere hila rabo halendena, wali hena bona rowende, walire hului okoloi. Nebei ro miyae Allah bele waheikoke wali ma wekeunge, Reyae Wali Ondofolo yae kelaemaele wali nibine orole. <sup>25</sup> Reyae Allahle Kelu. Nana hesele Allah bele waheikoke ro miyae Raei ako faeuko enaiboronde, nane merau Raei ako faekore hakonate yo wali neme bele hubanayende, <sup>26</sup> rabuhine ban Maeko wali none. Nebei sului mbai Reyae Na Kelu mokoufeboke wali nore yeubokale. <sup>27</sup> Reyae Allahle bokora mekale ro miyae uware yeubokale aerene ro miyae naei wali hului koloremile naei elae Allah yae Rare kinyewoufe hakewoufe.

<sup>28</sup> “Enaibende naei a yakamalene, mayae fa oboijae hele. Rabuhine ban na ya bele mensebonde herewate buleinye honate ro miyae nanemene Raei a boronate, <sup>29</sup> nebeisa a bulura menaibalende. Ro miyae u mekai foise mokayeke holona wali hena bonare emmiyende naeise amminunde. Nebeibe ro miyae u mekai bekore mokayeke holona me emminoyonde naeise amminunde. <sup>30</sup> Raei kena hului yae rambun mbai sambai omokoi sului. Maeko yae wensele huluinye ro miyae naei wali hului kolamaele. Nane merau na ijen sele Reyae wali hului kolamaele, rabuhine ban Raei kenare korele huluinye ehakoi. Maeko Rare ukeufe mekale Kiyaele kena konde huluinye mokorele.

<sup>31</sup> “Raei uwa naei a Renaeijae isaemisilena, ro miyae hiwa nebei a elalere elae ban elenate. <sup>32</sup> Nebeibe ro hi yae Raei uwa naeise isaeyaeyembe. Nebei kiyae yae isaeyembe a Reyae raesaei nana hesele. <sup>33</sup> Raei uwa naei are isaeyembomberene mayae hiwa yore ukaumile Yohanes bu koumi kiyaele bokore ekate. Yohanes Raei naei a na hele isaewoumile. <sup>34</sup> Raei naeise ro miyae uwa walora isaeyaimile elae ban ma. Nebeibe mai wali hole molonembombe naeise Yohanes a elewolere Reyae wamale, rabuhine ban naei a boraube. <sup>35</sup> Yohanesle ako faeuko isehe naeikoyole wanen mare naengkokembe. Nebeibe mayae na mon mbai ken nebei hehe naeukoke yae rei mai kenare mo molombokembera eweufike.

<sup>36</sup> “Raei uwa naei a faeu isaeyaemale na bereise Yohanes yae isaewombe a faeufa. Maeko yae Rare ukeufe kaliare namman mokale. Nebei me u yae mo keleyembe, na hele Maeko surgana Rare ukeufe mekale. <sup>37</sup> Nane merau Ako Allah Rare ukeufe mekale Kiyae Raei uwa naei a Neyae isaeyembokembe, nebeibe mayae roko mbai Naei euwara a faeu na hibi yae oboroi, Naei be yoi ijoko ereiboi. <sup>38</sup> Nane merau Maekole euwara elele a faeu mai kena ei u einye ohonoi, rabuhine ban Ako Allah Rare ukeufe mekalebe, nebeibe Raei a elalere mayae hila rabo ehalei. <sup>39</sup> Allahle homofae mayae uwa niheisiyaunge yae isaei-isaei isaeyaeube. Mai u benera nekayembe, nebei homofae walora wali hena bona yarombe. Nebeibe Allahle homofaena a faeu hamaunge Raei uwa naei abe mare isaimeyayembe. <sup>40</sup> Nebeibe mayae nebei wali hena bona yarombe naeise Raei me kelee u keleene nekembere ahi hele elaube.

<sup>41</sup> “Raei foi naeise nde maenin mae elenate naei Reyae ebaei. <sup>42</sup> Nebeibe mai uwa naeise Reyae rombokamale. Mai kena ei u einye mayae Allahre kena buhae ehiei. <sup>43</sup> Maekole Ro yae Reyae mekale, nebeibe mayae Rare ei ehawei. Nebeibe ro hi miyae hi naei ro yae mele kiyaere mayae ei haweyaumi. <sup>44</sup> Mayae Rare hila rabo ehalei sului, rabuhine ban ro miyae mai uware kaenayembe naeise baeyaube nebeibe Allah Hubalo Mando uwa kaenembe naeise ebaeyei.

<sup>45</sup> “Ako Allahle kendan wameran bene mai u mekai beko aerene Reyae mare a ohoroi, Musa yae a horonnengkombe. Mayae u bene nekayembe naei a moloukokere hubara haeisa yanaunge walora wali hole molonombombe. <sup>46</sup> Musale are na hele yae elaukoube yae Raei a elalere na hele yae elaube. Rabuhine ban Musa Raei uwa naei a moloukoke. <sup>47</sup> Raei uwa naeise Musa yae moloukoke homona are na hele yae eleikoinye, rahe ma lon mae Reyae wamale are hila rabo ensalembe?”

## 6

### *Yesus Yae Ro Miyae 5.000re Raman Ikeumi Anaikoke*

*(Mat. 14:13-21; Mrk. 6:30-44; Luk. 9:10-17)*

<sup>1</sup> Nekaikoke mo, Yesus kulun uke Galilea bukoba habala reufire foke. (Galilea bukoba nane merau Tiberias bukoba yae elate.) <sup>2</sup> Ro miyae helen Yesusle moisa hakainyekoke, rabuhine ban nanaei ijoko yae erewate erana buloona yore onomi iwoumi. <sup>3</sup> Elu hinongkane Yesus ike, na moisa orowate yo bele nebeinye raiboke nekewate. <sup>4</sup> Nebei hee Yahudi naei Paskah ya kaban nobeuboke.

<sup>5</sup> Yesus ijoko erele bae ro miyae helen Nare baeimeyainye yo Naei bokore matene, Filipusre weunge, “Ro miyae nanemene anenaikonde naei makeinya roi yae feu yaromakonde?” <sup>6</sup> Nda a mekai bae Filipusre umalibe hubannehinderere hineungehike. Mokombonde naei Yesus naeisaei sele.

<sup>7</sup> Filipus yae weunge, “Roi 200 dinar\* yae yarandekoube feu hului nda ro miyae hokoimeyelere na hului ban, naenda mekai horo nanemene anenaikonde naeise feu ebimbin mae wahemmile.”

<sup>8</sup> Na moisa orowate ro hi na ro Andreas, Simon Petrus naka baeke yae Yesusre weunge, <sup>9</sup> “Ndana fa mbai na feu maehae mbai ka bee bele honainyeye, era buhire eyeiboi sele nda ro helen miyae helende?”

<sup>10</sup> Nebei anuwau ke bele. Yesus yae weumi, “Nebei ro miyae wemmi ke ranne angken mae nuwaiko.” Ro yoni-yoni mo me baeikoke nemene 5.000 hului. <sup>11</sup> Yesus nebei feu bele ka bele yaroukoke helen foise mo Allahre ukeunge, kaiwole, na moisa orowate yore iwoumi, neyae nda ro miyae helende wahewaimi. Nanemene anaikoke uwa raeiboke.

<sup>12</sup> Nanemene uwa raeibokera na moisa orowate yore weumi, “Nendon haiyate belene eraman kalun bohi-bohi honate arilensi.” <sup>13</sup> Feu maehae mbaisa nda ro miyae anaikokera kalun arilaikoke kakali me bee oro nen bee bele hawaiikoke maemae kaikoke.

<sup>14</sup> Nebei ro miyae rambun emere-emere mokouboke erewatene elate, “Nana hesele nda Kiyae Niyae Allahle yendo kayaalo nda kani kelare mendere elewate Kiyae.” <sup>15</sup> Ro miyae helen Yesusre Ondofolore ranenajende merau kolowainyelebe Yesus isaeyeubokene, na u mbai aloungekoke elure ewole.

### *Yesus Bu Randa Mewole*

*(Mat. 14:22-33; Mrk. 6:45-52)*

<sup>16</sup> Rakewainye be baheubokene Yesus na moisa orowate yo bu haeise mekate, <sup>17</sup> kaisa hawaiboke, Kapernaum yore fonatere. Reniai yeubokebe nebeibe Yesus nda yo naei bokore emei mo. <sup>18</sup> Alu elaekei selene ruwae kaban-kaban hele haiwole. <sup>19</sup> Naisike awaijeke 5-6 km hului erate bae, Yesusbe bu randa oro yae mewole naei bokore

\* 6:7 6:7 Kalia mokate ya 200 na roibu hului.

nobeimeyeungebe erekainye. Nda yo fe waku hele yaroumikoke kowate. <sup>20</sup> Nebeibe Yesus yae weumi, "Fe efaei yae, nda Reyae ya!" <sup>21</sup> Na kena rei mai aumboke Yesus kai einye menefilngkondere riyainye hee nane merau nebei hee yae ewate anuwaunge na kai eubarauboke.

<sup>22</sup> Ya heuboke yae ro miyae nekai bu habala reufine nukaimiboke yo wena erewate nebei anuwaunge kai mbai sele yawole. Nebei kai Yesus Nangkele ban mae na moisa orowate yo naisikere naeisaei nekewate. <sup>23</sup> Yesus feufe helen foi eleukokera ikeumi anaikoke ijenne Tiberias yora nekate kai hiwa nebeinye yawate. <sup>24</sup> Nebeinye ro helen miyae helen erewate, erabae Yesus nane merau na moisa orowate yo bele baeimikoke une, kai yawatera hauwate, kulun ukate, Yesusle baeikoise Kapernaum yore fowate.

*Yesus Naei Uware Feu Wanen Mae Yakauboke*

<sup>25</sup> Ro miyae helen Yesusre baewainye yo bukoba reufine Yesus faisubayeikoke hee, nda yo yae hinainye, "Guru, makei hee yae weyae nda anuwaufe mekae?"

<sup>26</sup> Yesus yae weumi, "Reyae na helebe wamale, mai mekai ma Rare baeimeyaufe bae Reyae rambun emere-emere mokalere isaeyaeuboke aerene ban, naeinya hesele mayae feu anauboke uwa raebuke aerene. <sup>27</sup> Eraman kakare rowele naei kalia omokojae hele. Raman kakare eyeiboi hononende wali hena bona endowembe kaliabe mokombe. Nebei raman, Reyae Allahle bokora mekale ro miyae uware yeubokale Kiyae yae mare isembe. Ako Allah Rare kena koufe kelemmile naeise me nou heraufeboke."

<sup>28</sup> Nda yo yae Yesusre hinainye, "Allah weumile rahe u mekai yae meyae haramam-bonde mokomambonde hele?"

<sup>29</sup> Yesus yae weumi, "Allah wembe u mekai harannebombe nda niyae, Reyae Allah yae ukeufe mekale Kiyae yae elale are hila rabo halensembe."

<sup>30</sup> Nebei yo yae wainye, "Allah ukete mekaere hila rabo halemayetere kena koyaena, rahe rambun emere-emere mokoubondere meyae ijoko eremabonde? Weyae rahebe mokoubonde? <sup>31</sup> Na bere maebu naei maeko naei a kala-kala anuwau mewatere raman manna elewate yae anaimeke. Allahle homofae einye nda wanen molaikoke, 'Nebei yore surgana raman mae Neyae iwoumi anewate.'"<sup>†</sup>

<sup>32</sup> Yesus yae weumi, "Musa yae ban, naeinya hesele Maeko Allah yae nebei feu abu naei arai naeise ikeumi. Nda hee Maeko yae raman walire inyembe Kiyaebe surgara mare wahembe. <sup>33</sup> Rabuhine ban Allah yae Rare ukeufe surgara mekale. Nda kani kelana ro miyaere Reyae walire isemile naeise Allahle ramande yeubokale Kiyae."

<sup>34</sup> Nebeinye Yesusre wainye, "Arai, walire yemmele raman kiyaebe maere na hibi-hibi yeumende."

<sup>35</sup> Yesus yae weumi, "Walire inyemile raman Reyae Niyaebe ya. Nde naei Raei me kelee u keleene nekate nane merau Raei a elalere hila rabo halaeisele benen na kena u moni buki ehubasi mo huba ban haei ban nekenayende. <sup>36</sup> Nebeibe Reyae mare ukamale ma hului Rare eraufe hororebe, nebeibe Rare hila rabo ehalei kaube. <sup>37</sup> Maeko yae kinyeufeboke ro miyae nanemene Raei me kelee u keleene orulenate. Reyae nebei yore ehukei eibe eremihawende. <sup>38</sup> Rabuhine ban Raei kenare korele hului yae mokorelere ban, nebeibe Rare ukeufe mekale Kiyaele kena konde hului yae mokorelere naeise Reyae surgara okale. <sup>39</sup> Rare ukeufe mekale Kiyae Naei kenare kole nda niyae, ro miyae nanemene Rare kinyewoufe holona mbai sambai ewaeisi einyunde, nebeibe huba mokoikoi yane Reyae areminunde wali hena bona enaiyaronde. <sup>40</sup> Nda niyae Maeko kenare kole ma: ro miyae nanemene Raei are nou henate Raei a elalere hila rabo halenaisele yore wali hena bona isemile nane merau nebei holonare huba mokoikoi yane Reyae areminunde."

<sup>41</sup> Yesus yae eleukoke, "Reyae surgara okale wali bele raman Niyae." Nebei aerene Yahudi ro miyae a mulun-mulun elewate huwate.

<sup>42</sup> Nebei Yahudi ro miyae yae elate, "Nebei kiyae Yesus Yusufle kelube ya, nenakele naekole aeisaei. Naendaek mekainye elele, 'Reyae surgara mewale?'"

<sup>43</sup> Yesus yae weumi, "Maise naeise a mulun-mulun eleijae! <sup>44</sup> Rare ukeufe mekale Ako Allah mokoumile ro miyae kena konate Raei me kelee u keleene orulenate, hi yae ha yae naei kenare kole huluinye oruleisi. Nde orulensinde kiyae huba mokoikoi yane Reyae arennunde. <sup>45</sup> Allahle yenjo kayaayo naei homone molaikoke, 'Nebei yo nanemene Allah yae emmikelende.'<sup>‡</sup> Maeko yae keleumi are boronate isaeyate ro miyae Raei me kelee u keleene orulenate. <sup>46</sup> Reyae Maeko ukeufe mekale Kiyae mo Maekore ereungebokale, hi yae ha yae Nare ijoko yae ereiboi. <sup>47</sup> Reyae nana heselebe wamale, Raei a elalere hila rabo halaete ro miyae wali hena bona bele nekenaimile. <sup>48</sup> Raei uwa walire inyembe raman Niyae. <sup>49</sup> Mai abu naei arai naei a kala-kala anuwau



mewatere Allah yae surgara raman manna iwoumi yae anewate hororebe nanemene maisereuboke. <sup>50</sup> Raman aneikoyate wali elaere yeyeumi wanen mbai Reyae surgara okale wali hena bona isemilere. Raman mae anengkondena wali nekende wanen mbai ro miyae Raei a elalera hila rabo halenante wali hena bona yaronate. <sup>51</sup> Reyae walire inyembe raman surgara okale. Wali inyembe ramande anende kiyae wali hena bona nekenende. Walire isembe raman Raei uwa melen niyae. Nda kani kelana ro miyae wali hole moloiboise Raei uwa kinyerembonde.”

<sup>52</sup> Nebei a mekai Yahudi ro miyae borokatene nenaie mo aku hate wa elate, “A koro mahi lon, naendaie mekai yae naei uwa melen eyae anemakonde naeise emmekinyembonde?”

<sup>53</sup> ((Yesus mekai haraungeboke Neyae weume are uwa melen bele ha bele yae ahuneuboke kelewoumi. Naei merau haraungeboke ro miyae raman bu anenante wanen mae, Naei a elendere ro miyae naei kena einye isaeyate.)) Yesus nda ma yae kelewoumi, “Reyae na helebe wamale, Reyae Allahle bokora mekale ro miyae uware yeubokale Kiyae. Raei uwa melen aneikoinya, Raei ha aneisinnya, nebei wali hena bona ban ehubaikoi sului. <sup>54</sup> Ro miyae Raei uwa melen bele ha bele anele kiyae wali hena bona hubannende, nane merau huba mokoikoi yane Reyae arenunde. <sup>55</sup> Rabuhine ban Raei uwa melen raman hele nane merau Raei ha bu helere yeuboke. <sup>56</sup> Nde yae Raei uwa melende bele hare bele anele kiyae Raei einye nekele nane merau Reyae naei einye nekale. <sup>57</sup> Ako wali no Kiyae Rare ukeufe mekale, Naei walora Reyae wali nekale. Nebei sului mbai Raei a elalere hakoyate ro miyae uwa melende anate hare felayaete wanen Raei walora wali nekate. <sup>58</sup> Walire inyembe raman surgara oke kiyae niyae nebei mekai ma. Abu naei arai naei manna yae anewate, nanemene heraikoke. Nebeibe nde yae nane walire yemmile raman mae anengkondena, wali hena bona endowende.” <sup>59</sup> Kapernaum yona Allahre ei mom-mom imaene Yesus yae nebei a nanemene kelewoumi.

<sup>60</sup> Yesus na moisa orowate yo nebei a mekai boraikokera helen nda a mekai yae elate, “Nda a faeu keleume elaekai sele. Nde yae na hului angkaei alensinde boronde?”

<sup>61</sup> Yesus na moisa orowate yo nebei a eleukoke naeise na kenara a mulun-mulun elatebe Yesus isaeyebokene weumi, “Nebei a eleukokale mai hila rabo halaubere kusembe? <sup>62</sup> Reyae, Allahle bokora mekale ro miyae uware yeubokale Kiyae, mekale anuwaufe benen berehonde erelene mayae erensele naendaie mekai yae u bene nekenayembe? <sup>63</sup> Allahle Roh yae walire yeyeumi. Uwa melen na hele rabuhi ban yaeiobo. Allahle Roh yae Raei eleukokale a walora mare huwembe, wali hena bona inyembe. <sup>64</sup> Nebeibe mai holona hiwa yo nda a elalere na helere eleikoi.” Rabuhine ban Yesus na bemere isaeyebokene nde naei Nare hila rabo ehalei yo bele nde yae kelai nenende kiyae bele. <sup>65</sup> Nebeisa Yesus benen weumi, “Hiwa yo hila rabo ehalei aerene nda a yae haraungebokale uwamale, Maeko yae ro miyae kena une omokoiboinya, hi yae ha yae Raei me kelee u keleene oruleiboi sului.”

<sup>66</sup> Nebei heera Yesus na moisa orowate yo helen nukainyebokene, Yesus na moisa hakonainyekonde oronayendere ahi yae elewate.

<sup>67</sup> Nebeisa Yesus na moisa oroyeke yo me bee oro nen bee belere ereumi wa weumi, “Mai kena une nda yo nukaiseboke ate wanen embere?”

<sup>68</sup> Simon Petrus yae weunge, “Tuhan, ndere hakomanelere wamae? Waei a faeu wali hena bona bele kiyaebe wamae. <sup>69</sup> Weyae wamae a hila rabo halewande nane merau isaeyaendebokene Weyae mbaibe Allahle u mekai wanen Kiyae, Allahlera mekae.”

<sup>70</sup> Na moisa orowate yore Yesus weumi, “Reyae mare me bee oro nen bee belere elengkokamale ya! Nebeibe mai nolora mbai ken na kena une waloba yae nekele.”

<sup>71</sup> (Simon Iskariotle kelu Yudasbe Yesus a haraungeboke weumi. Rabuhine ban naendaie mekai horo Yudas na ro hi Yesus na moisa orowate me bee oro nen bee bele holonabe, nebeibe neyae Yesusre kelai nenende emmekinyembonde kiyae.)

## 7

### *Yahudi Naei Raman Bulaufe Yesus Eke*

<sup>1</sup> Nebeisa Yesus aloungekoke Galilea kanina yo ran yo rande oroweke. Yudea kanire mehauwae ei, rabuhine ban nebeinye Yahudi ro miyae Yesusre honaibondere nibi baewatene. <sup>2</sup> Nebei hee Yahudi ro miyae naebu naei naeko naei Kanaan kanire mewate kulunna ofae hafaie yae rebekan mokowate bene nekei-nekeisi mokate ya kaban nobeungekoke. <sup>3</sup> Yesus nauwae wa yae wainye, “Aka, Waei moisa orate yo rambun emere-emere eumokonde erenayete naeise ndara kulun wele, Yudea kanire yae eye! <sup>4</sup> Rabuhine ban ro miyae bene roro ronainyebondere baende kiyae na me u yae mokole rambun nunne omokoi. Nebei rambun emere-emere na hele mokoyaena, nda kani

kelana ro miyae bene mokoiko!" <sup>5</sup> Rabuhine ban nauwake wa hele hororebe, Yesus Wali Ondofolore yeubokene weumi are hila rabo ehalei.

<sup>6</sup> Nebeinye Yesus yae weumi, "Reyae Yerusalem yore erele ya namman. Nebeibe mai naeise embe hee na rokone baei mon belene na hului embe. <sup>7</sup> Nda kani kelana wali beko nibine orate yo mare ikele okoi. Nebeibe Rare na ikele hele kaise, rabuhine ban naei me u na beko mo mokate a isaeyaemaelene. <sup>8</sup> Mayae kena kaubena, nebei ya kaban eraman bulau Yerusalem yona mokonaibondere emene. Reyae namman nebei yore ei sului, rabuhine ban Raei ya na hului eyeiboinye." <sup>9</sup> Nebei a hului ukeumira Yesus namman Galilea kanine nekewole.

<sup>10</sup> Nebeibe Yesus nauwake wa kulun ukate nebei ya kabanna raman bulaufe ewate moisa Yesus aloungekoke na maleu-maleu ewole. <sup>11</sup> Nebei ya kaban raman bulaufe hokowole hee Yahudi ro miyae nebei anuwaunge Yesusre baewainyele wa elate, "Aeinya kiyae baenne, makeinya eke ban?"

<sup>12</sup> Ro miyae hokowole yo Yesusle a a maehae-maehae elewate huwate. Hiwa yo yae elewate, "Neyae ro u mekai foi," hiwa yo yae elewate, "Neyae ro miyaere ame-ame beumi." <sup>13</sup> Nebeibe ro miyae Yesusle are a yaka eleikoi, rabuhine ban Yahudi yun-junde buhae yae hokowoumine.

<sup>14</sup> Nebei ya kaban raman bulau hengkelen raisike kowate hee Yesus eke Allahre ei mom-mom imae na kaban sele kiyae na imaehoungwe eweufike, nebeinye a usaei wasaei kelewoumi. <sup>15</sup> Yahudi ro miyae fa bate wa elate, "Nda ro naendae mekai yae isaei hebaende isaeyaete anuwaunge isaeyeikoibe isaei yae eungemeleke?"

<sup>16</sup> Yesus yae weumi, "Raei uwa na a usaei wasaeibe kelaemale ban. Nebeibe Allah, Rare ukeufe mekale Kiyaelena abe kelaemale. <sup>17</sup> Ro miyae nde Allah kenare kole mare hakonate isaeyiaibonde nda kelaemale a usaei Allahlera, Raeisa ban. <sup>18</sup> Nde yae naei uwa naei are mo elendena, nebei ro ei molonainyele naei robe baele. Nebeibe nde yae ukeunge meke kiyaele ro foise baendena nebei ro na ijen sele nane merau amere ebei ro. <sup>19</sup> Allah wali heere foloukoke are Musale walora mare yengkokembe ya? Mai u benene Musa ro bele kiyae. Nebeibe mai nolona ro mbai sambai Musalena ane ehakoiboi. Rahene mayae honsebembere baeufe?"

<sup>20</sup> Nebei ro miyae helen mae wainye, "Ware alobe aubokete koyae! Nde yae Ware honoibotere baete?"

<sup>21</sup> Yesus yae weumi, "((Sabat yana)) Reyae roko mbai rambun emere-emere mokoukalebe mayae fa yae bowaube. <sup>22</sup> Na bere mai yobe mbai a ukeumi Yahudi ro nemene ro uwa elande folonate hele. Nebeisa Musa yae a ukembe kelu fa honondera ya mehine name hele yembondera ro uwa elande folonate. Nebei aerene mayae rore Sabat ya yae ro uwa elan foloumi. <sup>23</sup> Musale walora wali heere foloukoke are asasi okoinye Sabat ya yae ro uwa elan neisaise ehe kaube. Nebeibe rahene ro mbai nauwa kaban nanemene Sabat ya yae onomi ikanalere mayae ikele yae kowaufe? <sup>24</sup> Ro miyae naei walire na ijen mae hului kolommi. Na kena u harainyebokere emmiyerembe na me u mo ban."

<sup>25</sup> Nebeisa Yerusalem yona ro miyae hiwa yae elate, "Nda Niyaebe ya, aei yun-jun honaibondere baenye Kiyae Niyae? <sup>26</sup> Nebeibe erenne, uwa foro hele woke a elelebe aei yun-jun nare a mbai sambai ewei sele. Naendae wanen, Neyae Wali Ondofolo Kiyae Niyae aei yun-jun na hele elate era? <sup>27</sup> Wali Ondofolo mendena, Naei mende anuwau ro miyae isian bangka mo. Nda Ro naei meke anuwau aeisaei bangka mo yaendeboke. Nebei aerene meyae elande Neyae Wali Ondofolo ban."

<sup>28</sup> Allahre ei mom-mom imae na kaban sele kiyae Yesus namman keleumi hee a elae yae kaenele, "Raei uwa mayae ro raufeboke. Raei mekale anuwau isaeyaeboke. Mayae maisaei Raei kena huluinye emei. Rare ukeufe mekale Kiyae na hele no. Nare mayae rore oroi. <sup>29</sup> Reyae nebei Kiyae roungebokale, rabuhine ban Naei bokora mekale nane merau Neyae ukeufe mekale."

<sup>30</sup> Nebei hee Yahudi yun-jun kena haehae hele kowate Yesusre ikilenaibondere. Nebeibe hi yae ha yae mere ikilembondere kabewainye, rabuhine ban Allah merau raungehike ikilenaibonde ya namman eyeiboinye. <sup>31</sup> Nebei ya kabande hokoumeke ro miyae nolona yo helen Yesus a elewolere na hele yae elewate hila rabo halewainye, nda wanen elate, "Wali Ondofolo mende wanenna naendae mekai nda kiyae yae rambun emere-emere mokole ma nebei helen nen mokonde?"

<sup>32</sup> Nebei ro miyae a maehae-maehae yae nebei wanen Yesusle a elatebe Farisi holona yo borokate. Nebei aerene imam yun-jun bele Farisi holona bele yo yae Allahre ei mom-mom imae kayaare hebate yore ukaimi Yesusre ikileiboise ekate.

<sup>33</sup> Yesus yae weumi, "Reyae na heki ban sele mangkele nanembainye neke-makonde. Nebeisa Maeko ukeufe mekale Kiyaele bokore bukerehinde erele. <sup>34</sup> Mayae

baansekombe, nebeibe Rare ehubayeikoi sului, rabuhine ban erele anuwau mayae maisaei banne. Raei anuwau erenekendere mayae ei sului.”

<sup>35</sup> Yahudi ro miyae hi yae hire hineunge, “Nda ro makeise enderene eyae baemande hororebe Nare ehubayeikoi sului yae weume. Naei merau raungehike Yahudi ro miyae mbemba ((Yahudi ban)) Yunani ro miyae nolone nekate anuwaufe endere era, nane merau Yunani ro miyae emmikelendere? <sup>36</sup> Neyae nda a eleukoke, ‘Eya baemandebe ehubaikoi sului’ nane merau ‘Reyae erenekende anuwau mayae ei sului.’ Nebei a rahe mekai?”

<sup>37</sup> Nebei raman bulau na huba mokoikoi ya naei ya kaban sele mokaiboke na ro miyae hebatero Yesu a kaban don mae kaeneumi, “Mayae ro miyae nde walire yennele bure buki kolena, mei, a elalere hila rabo halemba, nebei bu anembe. <sup>38</sup> Allahle homofaene molaikoke huluinye, nde yae Rare hila rabo haleufe nebei kiyae naei kena u eisa walire yemmile bu wi no wanan rilennende.” <sup>39</sup> Allahlena Roh enaiyaronde abe Yesu are haraungeboke huwoumi. Yesu Naei a elelere hila rabo halenate ro miyaere Allahle Roh ammibonde. Nebei hee Allahlena Roh namman emei rabuhine ban Yesusre hilire hebenainyele ya nammanne.

<sup>40</sup> Yesu yae elewole a borowate nolona ro miyae hiwa yo yae elate, “Wali Ondofolo mende naeise bere holo yae mende yendo kayaalo, nda niyae hele.”

<sup>41</sup> Ro miyae hiwa yo yae elate, “Nda Wali Ondofolo mbai Niyaebe ya!”

Hiwa yo yae elate, “Niyae ban rabuhine ban Wali Ondofolo Galilea kanira emei sului. <sup>42</sup> Allahle homofaene molaikoke huluinye Wali Ondofolo bae yobe Ondofolo kaban Daudle orona mena nane merau Daud nekewole yo yan Betlehemda mende.” <sup>43</sup> Yesusle kenane nebei holona ro miyae kayee molaikoke. <sup>44</sup> Nebei ro miyae nolona hiwa yo kena hele Yesusre ikilenaibondere, nebeibe hi yae ha yae ikileiboise me fen eneyei.

<sup>45</sup> Hukai hi bele nekaikoke mo, Allahre ei mom-mom imae na kaban sele kiyae naei kayaare hebate yo Yesusre ikileiboise ukaimi ekatera bukaiboke mekate hee, imam yun-jun bele Farisi holona bele yo yae hinewaimi, “Rahene mayae ndare eyaweisoi emei?”

<sup>46</sup> Nebei yo yae waimi, “Era mahi hele. Nda ro miyae nekandera roko mbai Neyae elewole wanan eleikoi, maei angkaei yae oboroiboi mo!”

<sup>47</sup> Farisi holona yae waimi, “Nebei mekainya Naeinya ame-ame keelumine mare mokombokembe aufakoukoke era? <sup>48</sup> Aei yun-jun holona bele Farisi holona bele ro mbai sambai nebei Kiyae Wali Ondofolore yeubokene a elelere hila rabo ehalei mo! <sup>49</sup> Nebeibe nda ro miyae helen Musale walora wali heere foloukokere kobu helene Nare hila rabo halaeinye. Nebei ro miyaere olomo yae naimiboke!”

<sup>50</sup> Nikodemus Farisi holona ro, na bere hele Yesusle bokore meke kiyae yae naei holonare weumi, <sup>51</sup> “Aei naeise Kiyae Wali Ondofolore walora wali heere foloukoke homone, ro miyae mbai mokouboke u mekai wa mekai namman oboroiboi isaeyei boi yae me onoyoi sului.”

<sup>52</sup> Nda yo yae Nikodemusre wainye, “Galilea kanina ro Yesu Naei kahili wa weyae na hi niyaene era? Allahle homofae eyere nane merau waesaei yeubonde yendo kayaalo mbai Galilea kanira eyei boi mo.”

<sup>53</sup> Nebeisa ro miyae nanemene naei imae imaere hokoweke.

## 8

### *U Bekore Mokouboke Maengkele A Yesu Hokoukoke*

<sup>1</sup> Ro miyae nanemene imaere eufokouboke Yesu bukeufike Zaitun mokore eke. <sup>2</sup> Na rene hele Allahle ei mom-mom imae na kaban sele kiyae Yesu benen bukeufike eke erekainyene, ro miyae helen naei bokore mewate. Nebei imaehoungwe Yesu angken mae nuweuboke mo hubara raweuboke kelewoumi. <sup>3</sup> Nebeinye kelemi yae Musale walora wali heere foloukoke isaeyaei boke kelaeimi holona bele Farisi holona bele maengke mbai miyae bele ro mbaite honowotebe hanakainyelene yawainyehoke mekate. Nda maengke ukainye na nolone afae yae hebeunguke. <sup>4</sup> Nebeisa Yesusre wainye, “Guru, nda maengke u bekone ekaimokatebe meyae hanekannele. <sup>5</sup> Musale walora wali heere foloukoke homofaene honole huluinye bae, nda maengke wanan ruka yae haimangkonde herende. Mana naendae wanan mae Waenye a nebei naeise eleyae?” <sup>6</sup> Yesu a na ijen ban eleng kondene fe mokonainyebonde naeise nebei yo walangkabe wokate.

Nda a hinainyere Yesu oboro wanan, be are niheufike, na me kala-kala yae kanine homo molole. <sup>7</sup> Na hibi mo wainyene Yesu be weuweke wa weumi, “Mai nolona nekaube na uware beko ban hubanende kiyae, nebei kiyae yae bere ruka rowende

ndi maengkere wende.”<sup>8</sup> Nebei ara ukeumi mo Yesus benen be are yae niheufike kanine homone molowole.

<sup>9</sup> Yesus nebei wanen a ukeumile borokatene nebei ijenda rorele yoni-yoni bere hokolo moisa here ware molowole mbemba mbemba yae mo keungekoke. Yesus nebei hebele maengke bele mo nebei ijenne hebewote. <sup>10</sup> Nebeisa Yesus uwa aloukokera nda maengkere weunge, “Nane yo makeinya ate? Hi yae ha yae ware me onoyoi mo?”

<sup>11</sup> Nda maengke yae weunge, “Tuhan, hi yae me onoyoi mo.”

Yesus yae weunge, “Nebeinya Reyae nane wanen ware me onoyoi. Eye! Nda heera benen beko bako omokoyejae.”

*Yesus Naei Uwa A Eleukoke Na Hele Na Hele Ban?*

<sup>12</sup> Ro miyae benen Yesusle bokore hokomeke mo Yesus yae weumi, “Reyae Niyae nda kani kela hehere naemaele Kiyae. Hehe nibi reniai nolore hehe naeikoyole wanen mae, nde yae Raei moisa hakonsele kiyae wali hena bona nibibe kelaenale. Neyae ouben hauben nibine benen oroi.”

<sup>13</sup> Farisi holona yae wainye, “Waei uwa naei a lon wenaen lon mae isaeyaemae. Nebei mekainya Waei a isaeyaemae na ijen ban.”

<sup>14</sup> Yesus yae weumi, “Raei uwa naei a Renaeijae isaesemile hororebe, nebei a isaeyaemaele na hele. Rabuhine ban Reyae raeisaei makeisa mekale nane merau makeise erelere. Nebei naeise mayae maisaei ban sele. <sup>15</sup> Ro miyae erate ma yae mayae wali hului ikolowaumi. Reyae ro miyae hire wali hului erasi. <sup>16</sup> Ro miyae naei wali hului rarendindena, Reyae na ijen selebe mokoremile, rabuhine ban Rare ukeufe mekale Maeko nanembainye nekendene. Reyae rembai mo rambun omokoi sului. <sup>17</sup> Mai wali heere foloukoke hului bae ro bee yae eleikoke a amere eleikoi. <sup>18</sup> Nebeinye Raei uwa naei a isaeyaemaelere Renaei isaeyaemale nane merau Rare ukeufe mekale Maeko yae isaeyembe. Nebei aerene na helere yeuboke.”

<sup>19</sup> Are weumi yo yae wainye, “Waei Ako makeinye nekele?”

Yesus yae weumi, “Mayae Rare onaeufena, Maekore nebei sului onaeunge. Rare mayae raufeboube yae nebei sului mbai mayae Maekore raungeboube.”

<sup>20</sup> Allahle ei mom-mom imae na kaban sele kiyae einya roi haufau anuwau kelaeunge hebewole hee yae nebei a faeu nanemene uwoumle. Hi yae ha yae Yesusre ikileiboise me eneyei mo, rabuhine ban Allah meraufe raungehike Yesusre ikilenaibonde ya nammanne.

<sup>21</sup> Yesus benen weumi, “Reyae erelere nane merau mayae rare ensebaembe, nebeibe u mekai beko bako yae mokoyembene, enserembe. Reyae erele anuwaufe mayae ei sului.”

<sup>22</sup> Yahudi ro miyae elate, “Nda a yae eleukoke, ‘Reyae erele anuwaufe mayae ei sului.’ Naendae wanen, Nauwa Nenaiejae hombonderene era?”

<sup>23</sup> Nebeisa Yesus weumi, “Mai anuwau arane, nda kani kela ranna yo. Raei anuwau bumarane, Reyae nda kani kelana ban. <sup>24</sup> Nebeinye mai u mekai beko bako mokaube einye herembe a ukamale. Raei uwa naeise Renaeijae yakaubokalere mayae hila rabo ehaleinya mai u mekai beko mokaube huluinye heremembe.”

<sup>25</sup> Yesusre wainye, “Weyae naeinya hesele nde?”

Yesus yae weumi, “Raei uwa yakaimyamale hului Niyae be ya. <sup>26</sup> Mai wali hului kolorengkombe naeise a helen sele Reyae na hului ufengkombe. Nebeibe Rare ukeufe mekale Kiyae na helene elewole a Reyae borokale hului yae nda kani kelana yore yakaremibonde.”

<sup>27</sup> Yesus yae Naeko Allahle abe uwoumire nda yo onewate handawate. <sup>28</sup> Onaete aerene Yesus weumi, “Reyae Allahle bokora mekale ro miyae uware yeubokale Kiyae. Mayae bumane enseranenjembe hee ya wa mayae Raei uwa hele isaeyembombe. Nane merau mayae isaeyembombe Reyae mokale rambun mbai sambai Raei uwana yae omokoiboi. Maeko yae kelewoufe a huluinye Reyae elale. <sup>29</sup> Rare ukeufe mekale Maeko ei haweimeyeufe, Renaei mo nukenaisebonde nekerere naeise Neyae ewaesi. Maeko kena foise mokorende naei na hibi-hibi mokoyanalene.” <sup>30</sup> Yesus nebei a huwoumi yae ro miyae helen nebei a eleukokere na hele yae elewate, Nare hila rabo halewainyele.

<sup>31</sup> Yahudi ro miyae Yesusre hila rabo halewainyele elewate yore Yesus weumi, “Aka naei baeke naei, Reyae kelaemale are na hibi hila rabo halemembena, mayae Raei moisa hakaufekoke holona yore yembombe, <sup>32</sup> nane merau Raei na hele wali nibi are isaeyembombe. Nebei a yae mokonembombe mayae benen yebaei bubaei ban.”

<sup>33</sup> Nebei yo yae wainye, “Meyae Abrahambe orona mena yo, roko mbai hiwa yo naei yebaei bubaeise eyeiboi mo. Rahene nebei a wanen don mae haraungebokae wamae, ‘Mayae yebaei bubaei ban yo bande yengkombe?’”

<sup>34</sup> Yesus yae weumi, “Nda a na helebe wamale, bekore mokoyate ro miyae na bekore kena haehae kate reufi na yebaei bubaeise yaeiboke. <sup>35</sup> Nane merau yebaei bubaei nebei imae einye na hibi mo enekeyei, naei kelu hele yae nebei imaene na hibi nekenende. <sup>36</sup> Nebei aerene Reyae Allahle Kelu yae yebaei bubaeisa bulaarenembombena, weyae na hele Musale walora wali heere foloukoke a hului ehee bukulu hainyembera me rubombokembe. <sup>37</sup> Reyae isaeyebokale mayae Abrahambe orona mena, nebeibe Reyae elale ako faekore ahi yae elaube aerene mayae honsebombe nibibe baeube. <sup>38</sup> Maeko kelewoufe huluiibe mare wamale. Nebeibe mai arai naeitera boraube huluiibe mayae mokaube.”

<sup>39</sup> Nebei yo yae wainye, “Maei yobe Abraham!”

Nebeibe Yesus yae weumi, “Mayae na hele Abrahambe orona mena yaeuboube yae, mayae na hele Abraham mokowole bune wane hamaungele mokaube. <sup>40</sup> Nebeibe mayae bukaungehike, Rare honsebombere relaeunge. Reyae Allahle na hele a weufere boroukokalebe, mare huwamale aerene mayae nebei u mekai beko haraungeboke. Abraham nebei u mekai wanen omokoiboi mo. <sup>41</sup> Mai arai naei mokowate u mekai lonbe mayae mokaube.”

Nebei yo yae wainye, “Meyae kai fa-fa ban. Maei ako mbai Allah Niyae.”

<sup>42</sup> Yesus yae weumi, “Allah mai Akore yeuboube yae, Rare kena buhae haefele. Rabuhine ban Reyae mai Allah yae elaube Kiyaele bokora mekale. Raei kena hului yae emei, nebeibe Neyae ukeufene mekale. <sup>43</sup> Rahene Reyae elale are isaeyei moi mo kaube? Rabuhine ban Raei wamale are mayae boronsebombere kena ban. <sup>44</sup> Walobo yun kiyae mai ako! Nebeinye mai ako yae kena kole huluisse mokombere kena haehae hele kaube. Na bere hele mai ako walobo yun kiyae ro miyae hoi-soi ro, nane merau Allah ukeunge na hele are ehakoiboi nekeimeyele. Naei uwana na hele naeise une. Neyae ame-ame nore yeuboke. ((Ame-ame bende heene na afaeu fele yelewole,)) rabuhine ban neyae ame-ame naei akone. <sup>45</sup> Nebeibe Allah weufe na hele are Reyae wamale aerene mayae na hele yae eleikoi, hila rabo Rare ehalei. <sup>46</sup> Mai nolona hi yae Raei u mekai beko mokoubokalere kelebuna! Nebei u mekai beko u lonna, rahene Raei a elalere mayae na hele yae eleikoi, hila rabo Rare ehalei? <sup>47</sup> Allah yae eleukoke wekeumi holona ro miyae Allahle a elelere borate. Mayae Allahle holona banne, nebei a elelere oboroi kaube.”

<sup>48</sup> Yahudi ro miyae yae Yesusre wainye, “Na ijen sele meyae elande, ‘Weyae Samariana ro, alo yae aubokete kiyae!’”

<sup>49</sup> Yesus yae weumi, “Rare alo yae aiboi, Maekole ako faeuko hubara haeisa yananelebe. Nebeibe mayae Rare hubara haeisa eyanei. <sup>50</sup> Reyae uware kaenaisele naeise ebaei. Allah yae uwa kaenaisele naeise baele, Neyae mbai wali huluisse kolommiyende Kiyae. <sup>51</sup> Na helebe Reyae wamale, nde Reyae ufende are hubara haeisa yanannelena, Allah bele ewaheki nekenende.”

<sup>52</sup> Yahudi ro miyae yae wainye, “Nda hee yae wa meyae isaeyaendeboke Weyae alo yae ayeubokete koyae! Rabuhine ban Abraham naei uwa nane merau Allahle yenjo kayaayo nanemene heraiboke. Nebeibe Weyae eleyae, ‘Nde Reyae wamale are hubara haeisa yanennele kiyae here ehubayeikoi nekende.’ <sup>53</sup> Abraham nane merau Allahle yenjo kayaayo nanemene heraiboke. Naendae wanen, Waei uware nde maenin bele kiyae yae hului kolanae? Weyae maei ako Abraham nekewolera Waei uware kaban mae hubanae?”

<sup>54</sup> Yesus yae weumi, “Raei uware Renaei kaerelena, rabuhi ban isebonde. Raei uware kaensele Kiyae Maeko Niyae, mai Allah yae elaube Kiyae. <sup>55</sup> Mayae nebei Allahre ro oroihoi hororebe, nebeibe Reyae Nare ro roungebokale. Reyae Nare oroihoi a yae ufembena mainya wanen ame-ame bele rore isebonde. Nebeibe Reyae Allahre ro roungebokale, Neyae elele a huluiyene hubara haeisa yananele. <sup>56</sup> Mai ako Abraham mae Reyae nda kani kelane merenekende yare erembondere kena hele koweke. Nebei yare neyae ereuboke nane merau kena rei mai sele kowole.”

<sup>57</sup> Yahudi ro miyae yae wainye, “Waei ralo yakama namman 50 eyeiboi mo maei ako Abrahamde erekanae a lon mae eleyae?”

<sup>58</sup> Yesus yae weumi, “Nana hesele, Abraham namman ohonoi ya ((Rare rowaise,)) ‘Reyae nekewale.’” \* <sup>59</sup> Nebeisa Yahudi ro miyae ruka yarowate Yesusre hekele-nainyelere. Nebeibe Yesus Nauwa nunde yae ewaheukoke. Allahre ei mom-mom imae na kaban sele kiyae imaehoufa eukuke ewole.

\* 8:58 8:58 Nebei ro mbai Yahudi ro miyae Allahre rowainye.

## 9

*Yesus Sabat Ya Ijoko Kumba Yae Honokate Rore Onomi Ikeunge*

<sup>1</sup> Yesus aloungekoke ewole hee ro mbai na hongkatera ijoko kumba yeubokebe erekeunge. <sup>2</sup> Yesus na moisa orowate yo yae hinainye, "Guru, rahene nda ro ijoko kumba yae hongkate, nenaie beko mokoubokene, ako yae nake yae beko mokeibokene?"

<sup>3</sup> Yesus yae weumi, "Nda ro kumbare yeuboke bae nenaiejae nane merau ako nake yae mokaikoke beko aerene ban. Naeinya hesele Allahlena elae naei uwa einye mokombondene na hului ro miyae erembombe naeise. <sup>4</sup> Hu na naeukoke hebele yae Rare ukeufe mekale Kiyaele kalia mokomande hele. Rabuhine ban na heki ban mo be bahembondene ro miyae mbai sambai kaliare omokoiboi sului. <sup>5</sup> Nda kani kela einye namman nekale hee, Reyae nda kani kela hehere naerensonde Kiyae."

<sup>6</sup> Yesus nebei a ukeumira euwaeki kanine houboke, kani bele aleungekoke mo nebei role ijokone hobeungekoke. <sup>7</sup> Nebeisa nda rore weunge, "Eye, wa be yoi Siloamna bu yale yae hobeukonde." ("Siloam" na mekai "ukeunge eke") Nebei ro eke Yesus yae ukeunge hului yae mokoubokene ijoko erewole yae beufoke ike.

<sup>8</sup> Nebeibe imae ribo mbainye nekewate yo bele nda ro bere a ri-tise riyeweke erewainye, ro miyae bele hinewaimi elate, "Naendae wanen, nda ro niyaebe ya, angken mae nuweiboyole a ri-tise riyeweke kiyae?" <sup>9</sup> Ro miyae hiwa yo yae elate, "Nebei kiyae mbai niyae."

Hiwa yo elate, "Niyae ban. Nda kiyae nebei rolana wanen."

Nebei ro nenaiejae weumi, "Reyae niyaebe ya!"

<sup>10</sup> Nebei yo yae hinainye, "Rahe ma yae wa ijoko onomi rokae?"

<sup>11</sup> Nda ro yae weumi, "Yesus yae wainye Kiyae euwaeki houboke kani bele aleungeboko raei ijokone hobeufekokera bune kuisekondere Siloam bu yalere ukeufe ekale. Nebei a ukeufe huluinye mokoubokalene ra ijoko na hului erale."

<sup>12</sup> Nebei yo yae nda rore hinainye, "Makeinya nebei Ro eke?"

Nda ro yae weumi, "Reyae isian ma."

<sup>13</sup> Are hinewainye yo yae bere kumbare nekewole kiyae yawainyehoke Farisi holona yo bokore ekate. <sup>14</sup> Sabat ya yae Yesus euwaeki houboke, kani bele aleungeboko nda role ijoko foise mokoungeboko. <sup>15</sup> Nebei aerene Farisi holona yo yae nebei rore hinainye, "Naendae mekai yae waei ijoko foise mokouboko?"

Nda ro yae weumi, "Kani rebe yae beko ijokone hobeufokera nebeisa ijoko bune kuyekokale. Nda hee raei ijoko na hului erale."

<sup>16</sup> Farisi holona hiwa yo yae elate, "Nda Ro Yahudi era hena huluinye Sabat ya omokoi rambunbe mokolene, Allah yae ukeunge meke Kiyae ban."

Hiwa yo yae elate, "Naendae mekai yae beko bako bele ro miyae yae rambun emere-emere na hului mokonde?" Nebei aerene nda yo nenaie mo aku kiteuboko hate.

<sup>17</sup> Nebeisa Farisi holona yo yae nebei rore benen wainye, "Waei ijoko foi mokouboko aerene nebei Kiyaele naeise, weyae rahe ma yae eleyae?"

Nebei ro yae weumi, "Raei u benera nekeufe nebei Kiyae yendo kayaalo."

<sup>18</sup> Nebeibe Yahudi agama yun-jun nebei ro bere kumba nekewolera nda hee ijoko erele a uwoumire na helere eleikoi kowate. Nebeinye nenake naeko kaenaimikoke mekete, uwaimi, <sup>19</sup> "Ijoko kumba yae hongkaubere eleube fa nda niyae? Naendae mekai yae nda hee ijoko erele?"

<sup>20</sup> Nebei fa nenake naekole yae weimi, "Maeisaeise nekende neyae maei fa nane merau ijoko kumba yae hongkande. <sup>21</sup> Nebeibe nda hee ijoko erele naeise nane merau foise mokoungeboko naeise meyae isian hele. Roijandobe yeuboko ya! Naei uwa naei are nenaiejae hinennihie eleuko!" <sup>22</sup> Yahudi agama yun-jun fe kowaimi aerene nenakele naekole nda hului yae eleikoke. Rabuhine ban Yahudi agama yun-jun a hokaikoke, ro miyae yoni-yoni nde yae Yesusre Wali Ondofolo yae elengkonde kiyae Allahre ei mom-mom imaera hukenainyehinde. <sup>23</sup> Nebei aerene nenake naeko nda a lon mae eleikoke, "Roijando yeuboko lonbe, nare hinennihine."

<sup>24</sup> Bere kumbare nekewole ro benen kaenainyeko mo wainye, "Meyae maeisaei nebei Ro beko bako bele Ro ya. Allahre hilire hebeungelere, meyae wayete are be hineibone!"

<sup>25</sup> Nda ro yae weumi, "Reyae raeisaei ban nebei Kiyae ro foi, ro beko. Nebeibe raeisaeise nekale, bere reyae ijoko kumba nekewale, nda hee reyae ijoko erale."

<sup>26</sup> Nebei yo yae benen wainye, "Rahebe nebei Kiyae ware mokoubokete? Naendae mekai yae nebei Kiyae wa ijokore foi mokoubokete?"

<sup>27</sup> Nebei ro yae weumi, "Mare ninae reyae huwengkokamale, nebeibe mayae oboroi kowaube. Rahene nebei are benen borombere kaube? Mayae kena kaube na moisa orate holonare yembombere era?"

<sup>28</sup> Yahudi ro miyae nda rora na a haufau bele okainye wa wainye, "Weyae niyae nebei Kiyaele moisa oraube holona. Meyae bae Musale moisa orande holona! <sup>29</sup> Meyae maeisaei Allahlena ako fauko bae Musare uwoungwe. Nebeibe nda Kiyae meke anuwau naeise maeisaei ban sele!"

<sup>30</sup> Nebei ro yae weumi, "Mahi hele naei meke anuwaufe maisaei ban sele elauwe, erabae nebei Kiyae yae raei ijoko kumba nekewalere foi mokoufeboke erale. <sup>31</sup> Eyae aeisaei beko bako bele ro miyae naei are Allah oboroyei. Ro miyae Allahle u mekai wanen nekate nane merau Allah kena kole hului mokate yo bele naei are mo Allah eiborowoumi. <sup>32</sup> Nda kani kelana mokoubokera ro miyae hi yae ijoko kumba yae hongkate ro miyaere onomi ikeunge ijoko na hului erewole naeise roko mbai oboroiboi mo nekemeyande. <sup>33</sup> Nebei Ro Allahle bokora emei yae, nda mokouboke mare Neyae omokoiboi sului."

<sup>34</sup> Nebei yo yae wainye, "Naendae wanen, weyae u mekai beko hongkayete fa lonbe maere weyae keleumekondere?" Nebei heera ei mom-mom imaera moise hukainyehike eukuke.

<sup>35</sup> Yahudi agama yun-jun mae nda rora ei mom-mom imaera hukainyehike a Yesu borokene, nebei rora baeungeke, hubayekoke mo weunge, "Allahle bokora meke ro miyae uware yeubokale Kiyae hila rabo halaenae?"

<sup>36</sup> Nebei ro yae weunge, "Nebei Kiyae nde? Reyae na hului hila rabo Nare mo halarendere rare isaeyerebomae."

<sup>37</sup> Yesu yae weunge, "Weyae eranae nane merau nda hee wangkele are eleube Kiyae Niyae."

<sup>38</sup> Nda ro yae weunge, "Tuhan, reyae Ware hila rabo halaewale." Nebeisa Yesu re ei moloungwe.

<sup>39</sup> Yesu yae weunge, "U mekai beko yakaremilera wali hului koloi-koloi naeise Reyae nda kani kelare mekale. Raei kalia mokale yae kumba nekate ro miyaere ijoko erenate nane merau ijoko erate ro miyae kumba inyaibonde."

<sup>40</sup> Nebei anuwaunge Farisi holona hebate yo Yesu nebei mekai a haraungeboke eleukokene, Yesu re hinainye, "Waei u benera nekayete meyae nane merau kumba?"

<sup>41</sup> Yesu yae weumi, "Mayae ijoko kumba nekaube yae, mai me u beko aerene ehee bukulu eyaroi. Nebeibe mayae ijoko eraube yae elaubena, mai beko bako namman honayembe aerene ehee bukulu enyarongkombe."

## 10

### *Domba Naei A Ahuneuboke*

<sup>1</sup> ((Yesu Naei me kelee u keleene nekate ro miyaere ei haweumi naeise kelemmi-bondere obo yoku dombane ahuneuboke.)) Yesu nda wanen mae huwoumi, "Reyae na helebe mare wamale, nde domba nekate fale eise na romaufa eyeisi, nebeibe nibi hira enensindena, nebei kiyae na hele yoko ro yoko miyae. <sup>2</sup> Nebeibe domba yae nekate fale eise na romaufa enensinde ro miyae nebei kiyae niyae dombare holemmile ro. <sup>3</sup> Nebei kiyae enensindere fale kayaare hebele kiyae nebei falena roma rawennebonde nane merau nebei domba yoni-yoni holemmile kiyaele a fauko ronainyebonde. Mbemba mbemba na ro yae kaenemmile nane merau yawemmibonde, falera enaibalende. <sup>4</sup> Domba yoni-yoni yawemmibonde enaibalende hee, holemmile kiyae bera ende. Nebei domba yoni-yoni holemmile kiyaele a fauko ronainyebondene, na moisa hakonainyebonde enate. <sup>5</sup> Domba yoni-yoni ro hi miyae hire ehakoiboi, eme ro miyae na fauko oroiboinye na fere-fere habelenate." <sup>6</sup> Yesu nda a ahuneuboke huweumire na mekai ma haraungebokere nda yo onaete handate.

<sup>7</sup> Nebei aerene benen Yesu weumi, "Nda a na helebe wamale, domba nekate falena roma Reyae Niyae. <sup>8</sup> Reyae nammam emei heena ro miyae hiwa mekate nauware Allah yae eleuboke Wali Ondofolo Kiyae yae elate. Nebei ro miyae nanemene na hele yoko ro yoko miyae. Domba yoni-yoni nebei yo naei a faukore onaetene, waimi are oboroi nekate. <sup>9</sup> Reyae niyae na roma. Nde yae domba fale romaufa eise eyeisi wanen mae Allahle ro miyae holore Raei walora enduwende menensinde kiyaeere Reyae hole molorembonde. Domba romaufa moise aibaleke ke fau foinye eraman enanende wanen mae Raei kelaemaele a walora ro miyae wali foi hubanainyele. <sup>10</sup> Yokolo holona ro miyae domba yokore baenatere honatere, nane merau bekore mokonaimibondere eimewate. Nebei wanen mbai nauwa Wali Ondofolore ame-ame elate ro miyae hiwa yo naei hila

rabo bekore mokonaimibonde naeise eimewate. Nebeibe Raei are hakonaisele yo wali hena bona nane merau wali na foi sele moi sele enaiyaronde naeise Reyae mekale.

<sup>11</sup> “Reyae domba yoni-yonire na foi yae holamaele Kiyaere yeubokale. Domba yoni-yoni hole moloremibonderene Raei uwa kinyeremibonde. <sup>12</sup> Ro miyae hiwa roise abunende naeise domba yoni-yoni kayaare hebate. Nebei wanen ro miyae han bele yoku mende erenainyelene, nebei domba yoni-yoni nukenaimibonde na fere habelenayende. Nebei han bele yoku domba yoni-yonire yokunende, here ware bonaimile. <sup>13</sup> Roise abunata naeise domba yoni-yoni kayaare hebele kiyae na fere bele habelewube, rabuhine ban nebei domba yoni-yoni naei banne, kena buhae ehei.

<sup>14-15</sup> “Reyae domba yoni-yoni na foi yae holaemaele kiyaere yeubokale. Maeko Rare ro roufe nane merau Reyae Maekore ro ranale. Nebei mekai mbai domba yoni-yonire Reyae ro ramaele nane merau nebei domba yoni-yoni Rare ro raise. Nebei domba yoni-yoni na wali hole moloiboise Raei uwa yae kinyeumbokale. <sup>16</sup> Raei domba yoni-yoni hiwa kani hine nekate. Nda domba yaweremibonde hele. Neyae domba holo mbai nendo wanen mbai Raei a elerelere boronate. Nebei holo nanemene holo mbainye inyaibonde, na holeumi ro mbai yembonde. <sup>17</sup> Nda hee Raei wali kinyamalera bena honoifoyole ya benen roufele aere ne Maeko kena buhae Rare heufe. <sup>18</sup> Ro miyae hi yae ha yae Raei wali mera enukeisai sului, Raei kena kale hului yae kinyamale. Maeko elae ikeufe. Nebei elae walora Reyae na hului Raei wali kinyerebonde, nebeisa benen roufele. Nebei naeise Maeko a ukeufe.”

<sup>19</sup> Nebei a mekai Yesus eleukokene, Yahudi ro miyae holo beere wahaeikoke. <sup>20</sup> Ro miyae helen elate, “Neyae alobe aungeboke kole, nane merau keube aungeboke kole. Rahere nebei kiyaele a elelere mayae boraunge?”

<sup>21</sup> Nebeibe hiwa yo yae elate, “Alo yae aiboyainye ro miyae nda a wanende eleikoi sului. Walobo lonbe na huluinye ijoko kumba ro miyaere mokonnebonde ijoko kelengkonde erende?”

<sup>22</sup> ((Na bere hele Yerusalem yona Allahre ei mom-mom imae na kaban sele kiyaere Yahudi naei yokeijo yae roukate, nane merau nebei heena nebei anuwau ne neufike honowole. Yahudi felayo benen hole molainyeboke, foi mokaiboke.)) Nebei bene nekeisi-nekeisi ya kabande na heki ban mokonaibonde hee, alu hin manse meungeke. <sup>23</sup> Nebei ei mom-mom imaena anuwau mbai Salomole yowa yae elewate, nebeise Yesus ele melene koweke. <sup>24</sup> Yahudi ro miyae arilewole Yesusre yanainyekoke wa hinainye, “Rahene maere heki koko hele Waei naeise kena wauwau komayewetere waemuhikae. Weyae nana hesele Wali Ondofolona, maere a yaka faeu yaka yae weimene!”

<sup>25</sup> Yesus yae weumi, “Reyae nebei naeise a ukamalebe ya, nebeibe Reyae wamale a na helere mayae eleikoi kaube. Rambun emere-emere Reyae Maekole ro yae mokale. Nebei yae Raei uwa naei are isaeyembe. <sup>26</sup> Nebeibe Reyae Wali Ondofolo yeubokalere mayae na helere eleikoi, rabuhine ban mayae Raei domba holone emeyeisinye. <sup>27</sup> Raei domba holona yo Raei a faekore boraise. Reyae nebei yore raemaele nane merau Raei moisa hakaisele. <sup>28</sup> Nebei holona ro miyaere Reyae wali hena bona yaemaele, beko eibe nekenayende. Hi yae ha yae nebei ro miyae Raei mera einyukeisai sului. <sup>29</sup> Maeko nebei holonare kinyeufeboke Kiyae ehameikoi sului, nane merau hi yae ha yae nebei ro miyae holonare Maekole me eisa enukeisai sului. <sup>30</sup> Rangkele Maekole nanembainye nekende.”

<sup>31</sup> Nebei a elewolene Yahudi ro miyae benen ruka yaraikoke Yesusre hekelenainyelere. <sup>32</sup> Nebeibe Yesus yae weumi, “Maeko yae ukeufe rambun emere-emere helen mokoukokale, ro miyaere yakamaele. Nda mokowalere makei kayeero aere ne Rare ruka yae hekelenselere?”

<sup>33</sup> Yahudi ro miyae wainye, “Weyae rambun emere-emere mokowoyae aere ne meyae ruka yae haimayetere ban ma. Naeinya hesele weyae Allahre aukaka kanaene. Weyae nda ro miyae nekande mabe, nebeibe Wauwa mokanae Allahle na hului mbai elayae aere ne.”

<sup>34</sup> Yesus yae weumi, “Mai wali heere foloukoke homone molaikoke, ‘Allah yae elele mayae naei mekai allah.’” <sup>35</sup> Eyae aisaei Allahle homona molaikoke yoni-yoni nanemene enaibende. Nebeinye Allahle ako faeukore boroyate na helere eleyate yore allah yae ro royeyimi. <sup>36</sup> Rahene mayae Allahle Kelu yae Raei uware elale aere ne Allahre aukaka kanale yae elaubu, erabae Maeko yae Rare eleufeboke ukeufe nda kani kelare mekale. <sup>37</sup> Allahlena rambun emere-emere omokoinya, Reyae a elerelere na hele yae eleijae nane merau hila rabo ehalensemae. <sup>38</sup> Nebeibe Reyae rambun emere-emere mokalena, nebei mokalebe na hele yae elen! Nebei mekai yaere maisaei nekembe nane merau isaeyembombe Maeko Rangkele mbai, nane merau Reyae Maekole mbainye



nekayende naendae wanen hororebe Raei a elalere hila rabo ehalei.”<sup>39</sup> Yahudi ro miyae benen Yesusre ikilenaibondere relewainyebe. Nebeibe Yesus nda yo naei me ikilainyebokera eufaeuboke ewole.

<sup>40</sup> Nebeisa Yesus bukeufike eke bere Yohanes bure kowoumi Yordan wi reufine Yesus ekenekewole. <sup>41</sup> Ro miyae helen Yesusle bokore mewate yo yae elate, Yohanes bure kowoumi kiyae rambun emere-emere omokoikoibe, nebeibe nda Ro naei a elewole nanemene nana hesele. <sup>42</sup> Nebei anuwaunga ro miyae Yesusle are na hele yae elewate, hila rabo halewainyele.

## 11

### *Lazarus Herekera Aunguke*

<sup>1-2</sup> Ro mbai na ro Lazarus, nemaen wa bee Maria nauwake Martale, Betania yone nekewate. Nebei Maria Yesusle orore minyak fololo bele rilennebonde na umaa yae hobennekonde kiyae.

Roko mbai nenu Lazarus erane ruke honowole. <sup>3</sup> Nebeinye nemaen wa bee Yesusre isaainyainyebondere ukeimile ekate, “Tuhan, Weyae kenare kanae kiyae, erane kole ya.”

<sup>4</sup> Lazarus erane kole a Yesus borouboke mo elele, “Nebei era buloo ekekole herende naeise ban, nebeibe nda wanen yembonde yae Allahre hili enainyehende. Nebei wanen maere Reyae Allahle Kelu hili enaisehende.” <sup>5</sup> Nda name: Marta yae, Maria yae, Lazarus yae, Yesus na hele kena buhae heumiyeye. <sup>6</sup> Lazarus erane kole naeise Yesus borouboke hororebe, nebei heera mehauwae na kena herawemmiboke nebei anuwaunge ya bee hele nekeukoke.

<sup>7</sup> Nebeisa wa Yesus yae Naei moisa orowate yore weumi, “Mem, eyae Yudea kanire benen bukemabonde emalere.”

<sup>8</sup> Nebeibe na moisa orowate yo yae wainye, “Guru, manemfa fere nebei kanina Yahudi ro miyae Ware ruka yae hainyayeikotere kowate. Nebei anuwau londe yae benen bukeufinde elere wamae?”

<sup>9</sup> ((Yesus Naei wali nibi kelemi naeise Allah merau raungehike bele hehe bele ahuneuboke)) hineumi, “Rai hukai na heki me bee oro nen bee bele huluike ya. Nebei hee yae ro miyae eyewole kiyae enaleisi sului, rabuhine ban nda kani kelana hehe yae naeikoyeungene. <sup>10</sup> Nebeibe ro miyae huae yae oro nende kiyae naleise-naleisi konende, rabuhine ban na uwana hehe banne.”

<sup>11</sup> Naei wanenda Yesus ukeumira nebeisa benen weumi, “Aei kahili Lazarus ijongkune eke honole. Nebeibe Reyae nda hee nebei yengkeikoise erelere.”

<sup>12</sup> Na moisa orowate yo yae wainye, “Tuhan, Lazarus ijongkune honolena, neyae onomi rowende lonbe.” <sup>13</sup> Yesus Lazarus hereke abe haraungeboke uwoumibe, nebeibe na moisa orowate yo yae onaeikoke. Lazarus ijongkune ekehonole yae naei u benera nekewaimi.

<sup>14</sup> Nebeinye na yaka yae Yesus weumi, “Lazarus hereke ya. <sup>15</sup> Reyae helen foi yae elale nebeise yeuboke ya Rangkele ban, mai foi naeisene. Emale, menaei ijoko yae erembombe wa Reyae Wali Ondofolo yeubokalere hila rabo halemba. Mem, mana eyae Lazarusle bokore ema.”

<sup>16</sup> Tomas, nane merau Didimus yae kaenewainye kiyae, naei kahili hiwa yore weumi, “Eyae nanembainye emaherembonde naeise mem, hakomangkon ema.”

<sup>17</sup> Yesus nebei anuwaunge eke hee nebeinya ro miyae eleuboke, “Lazarus ruka buleinye aitaufike ya keli nendobe yeuboke.”

<sup>18</sup> Betania yo Yerusalem yo kelaeunge honole nahau km 3 hului. <sup>19</sup> Martale Mariale nenu hereke kena beko nekewotere, Yahudi ro miyae helen kena foi yeise hokoumeke. <sup>20</sup> Yesus mewolere Marta boroubokene, ei aiboise eke, nebeibe Mariabe imaene nekewole. <sup>21</sup> Marta yae Yesusre weunge, “Tuhan, nebei ya weyae ndane nekemae yae reneu eherei sele. <sup>22</sup> Nebeibe nda hee reyae raeisaei sele, Allahre riyeungehinde rambun Ware inyete hele.”

<sup>23</sup> Yesus yae Martare weunge, “Wenu benen walembonde.”

<sup>24</sup> Marta yae weunge, “Reyae raeisaei nda kani kela hubare ennemokonde ya, ro miyae anyainyu kommile heene, neyae annunde.”

<sup>25</sup> Yesus yae weunge, “Reyae niyae ro miyae herewate areminunde bele wali isemile bele Kiyae. Nde yae Rare hila rabo halensele kiyae hereube horore benen walembonde. <sup>26</sup> Nane merau ro miyae na waline nekele hee Raei a elalere hila rabo haleufena eherei ohonoyei. Naendae wanen, nda a wawalere weyae hila rabo haleyae?”

<sup>27</sup> Marta yae weunge, “Tuhan, reyae Ware hila rabo halaewale, Weyae Allahle Kelu, Wali Ondofolo nda kani ei kela eise mendere elewate Kiyae.”

<sup>28</sup> Marta nebei wanen ara ukeunge mo Mariale weise na hibi aloungokeke ewole. Eke Maria nangkaei kelaeufa weunge, “Guru, ndane ekenekele, waei a elelene nebeinye Waei kaeneikoise male.” <sup>29</sup> Nebei wanen a ukeungene Maria u hale me hale aunguke na hibi aloungokeke eke Yesusre eisubayeikokete. <sup>30</sup> Neyae eke hee Yesus namman nda yo eise emeyei. Martale hubayeikokete anuwaunge mo namman nekewole. <sup>31</sup> Yahudi ro miyae imaene Mariare kena foise mokainye yo nanembainye nekatera erainye Maria u hale yae aunguke aloungokeke elene, nda yo na moisa hakoinyekoke. Naei u benera nekewaimi bulei tande ele, rimere endimendere.

<sup>32</sup> Yesus nekewole anuwaufe Maria eke hee, Yesusre erekeunge oro helen-selen mae noro bene roroukoke weunge, “Tuhan, nebei hee yeuboke Weyae ndane yae, renewe eherei sele ya!”

<sup>33</sup> Yesus erewoungue Maria rimewole nane merau Yahudi ro miyae Mariare hakainyekoke mewate yo erewoumi rimewatene, na kena moheuboke beko hele hubawoungue.

<sup>34</sup> Nebeinye Yesus yae hineumi, “Makei ijenne molaufake?”

Nda yo yae wainye, “Tuhan, mei, ijoko meyereibo!”

<sup>35</sup> Nebeisa Yesus na rime bele rimewole.

<sup>36</sup> Yahudi ro miyae nebeinye hebewate yo yae elate, “Erenne, Lazarusre na kena buhae helebe heunge.”

<sup>37</sup> Nebeibe hebewate ro miyae nolona hiwa yo yae elate, “Neyae mbai kumbana yore mokowoumi ijoko erewate. Neyae na hului eherei naeise hee neungehaube, Lazarusre onomi yungele. Rahene Neyae foise mokoiboise heki hele emei?”

<sup>38</sup> Yesus kena beko hele hubawoungue yae molaisake ruka bulei kelaeufe eke. Nebei bulei ahe rukabe halaeikoke, ruka kaban mae na romaufe ahaeikoke. <sup>39</sup> Yesus yae weumi, “Nebei ruka wenne!”

<sup>39</sup> Nebeibe Marta nane ro hereke nemaen mae weunge, “Tuhan, ya keli nendobe bulei einye mo honoimeyele, na u kelen bele yeuboke era!”

<sup>40</sup> Nebeibe Yesus yae Martare weunge, “Reyae ware a wewekawalebe ya, weyae hila rabo halelana, Allahle nene waewae weyae ijoko ereubonde.”

<sup>41</sup> Nane rukare mo wekainyele. Nebeisa Yesus na be yakure yae weuweke mo Naekore ebeline bounge, “Arai, helen foi sele wawale Weyae boroyaraene. <sup>42</sup> Reyae raeisaei sele Raei ebeli kali Weyae na rokone baei boroyarae, nebeibe nda ro miyae helen arilewole Ware foi oroiboi. Nda a bawale, Weyae Rare ukare mekalere hila rabo bele halenatae naeise Raei riyeufikale a hului mokoibo.”

<sup>43</sup> Nebei wanen ebeli bowoungera kali na kaban mae kaeneunge, “Lazarus, ainyu meituwe!” <sup>44</sup> Nda ro hereke norona mena malo lenan rinyainyekoke bele na be yoise felainyeboke malo bele aunguke meukuke.

Yesus yae weumi, “Malo rinewainyele bulaerenneko, nenaeni waennehimbe ende.”

<sup>45</sup> Nebeinye helen sele Yahudi ro miyae Mariare eise mekaisauwainye yo Yesus mokoukokere erekate hee Nare hila rabo halewainyele. <sup>46</sup> Nebeibe hiwa yo Farisi holona bokore ekate, Yesus yae mokouboke a nemene huwaimikoke. <sup>47</sup> Nebeinye Farisi holona bele imam yun-jun bele Yahudi naei yoyo koseyo kaenaimikoke, riyane arileufike nekewate wa waimi, “Nda ro rambun emere-emere mokolene, eyae rahe yae mokomambondere? <sup>48</sup> Nda mokolere eyae na hibi waemansindena, ro miyae nanemene Nare mo hila rabo halenainyele. Nebeisa ondofole kaban na felayo menate ((Yesus nda kani naei Ondofolore ranenajjendere fe faenatene)), Allahre ei mom-mom imae na kaban sele kiyae bele aei yo yan bele beko mokonainyebonde.”

<sup>49</sup> Nebei yoyo koseyo riyare nekewate nolona ro mbai na ro Kayafas. Nebei ralo yakama naei imam yoni-yoni naei yunde neyae nekewole kiyae yae weumi, “Mayae maisaei ban mo! <sup>50</sup> Nane merau na foi naeise uwa ehubaisi kaube. Ro miyae aerene naei foi sele ro mbai herende. Nebei mekai yaere nda yo kaban yan kaban beko omokoiboi.”

<sup>51</sup> Naeinya hesele Kayafas nda a eleukoke naei u benena ban. Nebeibe imam yunde nebei ralo yakamane nekewolene, Yesus Yahudi ro miyae aerene herende abe Allahle Roh walora nuleungokeke. <sup>52</sup> Nane merau Yahudi ro miyae mo ban, nebeibe Allahle fa-fa here ware waeibokere arilemmihindere nane merau mbainye mokommibondere Yesus herende. <sup>53</sup> Nebei aerene nebei yara Yahudi yun-jun Yesusre honaibondere na merau huba rawaiboke.

<sup>54</sup> Nebeinye Yesus Yahudi ro miyae helen bene eyakaiboi mo, a kala-kala kelaeunge kulun uke, yo mbai na ro Efraim nebeise eke. Na moisa orowate yo bele nebei anuwaunge ekainyekewate.

<sup>55</sup> Nebei hee Yahudi naei ya kaban Paskah nobeungekokene ro miyae helen nebei ya kaban namman mae naei era hena huluinye nauwa yolo-yolo mokoiboise na yora

yora Yerusalem yore mo hokoweke. <sup>56</sup> Yerusalem yore hokoweke yo ekate Allahre ei mom-mom imae na kaban sele kiyane mo Yesusre baewainye. Hi yae hire hineunge, “Naendae hubanae, nauwa nda ya kabande emei era?” <sup>57</sup> Nda a wanen elate, rabuhine ban nebei hee imam yun-jun bele Farisi holona bele a ukaimile, neyae Yesusre ikilenaibonde naeise nde yae Yesus ennekende anuwau naeisaeinya, nda yore isaeyaimibonde hele.

## 12

### *Betania Yone Yesusle Oro Ranne Minyak Rilainyeboke*

(*Mat. 26:6-13; Mrk. 14:3-9*)

<sup>1</sup> Ya mehine mbai Paskah ya bere mo kolowainye, Yesus Betania yore eke. Nebei anuwauunge Lazarus herekera Yesus yae waleungeboke kiyaele yo.

<sup>2</sup> Yesus ei moloiboise eraman bulau mokaiboke, Marta mbai ei hawewoung. Lazarus na ro hi Yesus naei raman nanembainye nuwaikoke anewate. <sup>3</sup> Nebeisa Maria meke minyak narwastu fololo bele liter bohi mbai roi na bumana hele kayee rouke meke, Yesus noro ranne rileungeboke mo, nauma yae norore hobewoung. Nebei imae ei minyak narwastu fololo roroukoke hebewole.

<sup>4</sup> Nebeibe Yudas Iskariot Yesusle moisa orowate holona ro mbai, Yesusre kelai nennebonde kiyae yae weunge, <sup>5</sup> “Nebei minyak fololo bele naise heuboube roi kaban roweube. Nebei roi ro mbai na kalia ralo yakama mbai na roibu hului roweube. Nebei roi yae ro miyae kounge kalone nekeyate yore na hului eumiyube. Rahene nebei wanen omokoiboi?” <sup>6</sup> Kouna kalona yore u bene nekeumine Yudas nda a wanen eleukoke ban, nebeibe neyae yokolone. Yesusle moisa orowate holona yo naei roi kayaa hebewole ro Yudas niyae. Roko mbemba na mene yaeinye roibe naei u mbai naei rambunde rowele.

<sup>7</sup> Nebeibe Yesus yae weunge, “Karo, rabuhire eyeiboi. Allah merau raungehike Rare molonaisele yare nebei me ube mokole. <sup>8</sup> Ro miyae kouna kalona yo mangkele mbainye mo nekemembe, nebeibe Reyae mangkele mo na hibi enekeyei.”

<sup>9</sup> Yahudi ro miyae helen sele borokate Yesus nebei imaene ekenekele, nebei hee yae haleuboke ewate. Nebei yo ewate Yesusre baeinyeke mo ban, nebeibe nane Lazarus herekera Yesus waleungeboke, nebei ijoko ereiboise bele ewate. <sup>10</sup> Nebeinye imam yun-jun mae Lazarusle bele honaibondere merau rainyehike, <sup>11</sup> rabuhine ban Lazarus waleuboke aerene Yahudi ro miyae helen nebei yun-jun naeise moi kaeinyehike Yesusre hila rabo halewainyelene.

### *Yerusalem Yone Ro Miyae Helen Mun Hobolo Yae Yesusre Foi Yawainyehoke*

(*Mat. 21:1-11; Mrk. 11:1-11; Luk. 19:28-40*)

<sup>12</sup> Ya heuboke mo nebei ya kaban naei raman bulau konate ro miyae helen hokoumeke yo borowate Yesus Yerusalemde be raungehike mele. <sup>13</sup> Nebeinya hoyeu nihewate, eisa haweyainye wa kaenate,  
“Allahre buma koloman!

Tuhan Allahle Ro einye meke Kiyae

onomi foka yae ei enainyehawende!

Israel ro miyae naei Ondofolo

onomi foka yae ei enainyehawende!”\*

<sup>14</sup> Yesus keledai kelu hubayekoke randa yeufileukoke. Allahle homofaena molaikoke huluinye yeuboke,

<sup>15</sup> “Ereinye, Sion yona ro miyae buhae ohokojiae,

mai Ondofolo mele,

keledai kelu randa hebeunguke mele.”†

((Yerusalem nane merau Sion mae uwainyele.))

<sup>16</sup> Nebei hee Yesus na moisa orowate yo nda bewatere u bene orowei kowate. Nebeibe Yesus herekera meke benen bumane ike heera wa u bene nekaimihike, na hele nebei ro miyae yae ei molowainyere nemene fomene Allahle homofaene Naei naeise molaikoke honate.

<sup>17</sup> Lazarusre ruka buleisa Yesus kaeneungekoke meukuke nane merau herekera waleungebokere nanaei ijoko yae erewate yo helen nebei a faeube eleiko ramumbo kate. <sup>18</sup> Ro miyae helen Yesus nebei iwau emere-emere mokoubokere borowatene, Yesusre hubainyaikondere mewate. <sup>19</sup> Nebei aerene Farisi ro miyae hi yae hire naeise elate, “Eyae rabuhi-rabuhire omokoiboi sului ya. Eren, nda kani kelana ro miyae nemene Nare mo hakainyekoke.”

\* 12:13 12:13 Mazmur 118:25-26 † 12:15 12:15 Zakharia 9:9

*Yesus Naei Herende A Isaeyeumiboke*

<sup>20</sup> Yerusalem yore ya kaban mokaibokere ei mom-momde hokoweke ro miyae nolone hiwa Yunani kanina ro miyae. <sup>21</sup> Filipus Galilea kanina Betsaida yona ro nebei yo mekate mo wainye, "Aka baeke, meyae kena haehae hele kande Yesus Naei hubaimakondere." <sup>22</sup> Filipus eke nebei a Andreasre isaeyeungeboke, nebeisa hokolo bee ekete Yesusre ukeinyele.

<sup>23</sup> Yesus yae weumi, "Allahle bokora mekale ro miyae uware yeubokale Kiyae hiline hebenaisele hee na hului meujeuboke. <sup>24</sup> Reyae nana hesele wamale, gandum ko kani einye emoloisai nane merau eheryina ko mbai mo nekende. Nebeibe herendena, benen kitende, ko nekai sele emmokonde. <sup>25</sup> Ro miyae nde naei wali bekore kena kole kiyae na wali hole omoloiboi sului. Nebeibe nde yae nda kani kelana wali bekore na kenara ikele yae kole kiyae, na wali hole moloungboke nane merau wali hena bona rowende. <sup>26</sup> Ro miyae Raei kaliare mokate yo Raei moisa hakonaikonde hele nane merau Reyae erenekende ijenne nebei u mekai ma yo nangkele. Nde yae Raei kaliare mokole kiyae, Maeko yae nebei kiyae ennekaende.

<sup>27</sup> "Nda hee Raei kena u eisa isasa alolo kale. Nebei aerene nda a lon mae ebeli borensinde, 'Ako Raei uwa rande menaibende bele nda hee yae Rare hole moloisobo?' Nebei mekai ban, rabuhine ban nebei ehee bukulu kaerebode aerene Reyae ndare mekale. <sup>28</sup> Ako, Wa Ro hili hensende mokoibo ba! Waei kena koyae hului Rare mokoufele."

Surgara a beufoke weunge. ((Yesus rambun emere-emere mokowolene Allah yae nda are eleukoke borowate.)) "Kelu, Raei nene waewae ro miyaeere kelewamale nane merau benen keleremikonde." <sup>29</sup> Nebei anuwaunge hebewate ro miyae a eleukokere borowatene elate, "Nebei kube neke." Nebeibe hiwa yo yae elate, "Ku ban, malaikatbe, nebei kiyaeere a weunge!"

<sup>30</sup> Yesus yae weumi, "Nebei a borauboke Raei foi naei ban, naeinya hesele mai foi naei abe eleukoke. <sup>31</sup> Nda kani kelana ro miyae naei walire hului kolommikonde ya na hului meuyeuboke. Nane merau walobo yun hukennehinde ya na hului meuyeuboke. <sup>32</sup> Nebeibe Rare nda kani kelara bumane nenaisijende hee yae, ro miyae nanemene Rare hila rabo halenaisele naeise yoboremile." <sup>33</sup> Yesus ohaline enaibongkonde herende naei abe nda ma yae haraungeboke eleukoke.

<sup>34</sup> Nebei ro miyae helen mae wainye, "Musale walora wali heere foloukoke homonane huwaimene borowande Wali Ondofolo mende Kiyae wali huba ban haei ban nekenende. Naendaewanenne Weyae eleyae, 'Allahle bokora meke ro miyae uware yeuboke Kiyae nda kani kelara bumane enainyeyende?' Allahle bokora meke ro miyae uware yeuboke Kiyae eleyae naeinye hele nde?"

<sup>35</sup> Yesus yae weumi, "Nda hee ferere Reyae hehere naemmile Kiyae mai nolone nekande. Nebeinye Reyae hehere naemale Kiyae namnan nekale yae Allahle isaei hebaende onaeinye yo wanen mayae yembombe belene, Raei a elale huluinye nekembe. Allahre onaeinye yo yae wali nibi foi isaeyeiboi. Nebei yo ouben hauben nolone orate wanen nekate. <sup>36</sup> Reyae hehere naemale Kiyae mai waline namnan nekande hee yae Rare hila rabo halensele. Nebei mekai yaere mayae na hului Reyae hehere naemale Kiyaele kelu omire yembombe." Nebei ara weumikokera Yesus nauware nunne enahngkonde anuwaufe ewole.

*Yahudi Ro Miyae Yesusre Hila Rabo Ehalei Nekewate*

<sup>37</sup> Yesus roko helen sele rambun emere-emere nda yo naei ijoko bene mokowole hororebe, nebeibe nda yo Yesusre hila rabo ehalei nekate. <sup>38</sup> Nebei mekai yaere Allahle yendo kayaalo Yesaya yae nda a moloukoke na hului yaeiboke, "Tuhan, ro miyae keli name mo

meyae humande are na hele yae elenaikonde nane merau hila rabo halenate. Nane merau Tuhan, ro miyae keli name mo

Waei elae wakere yakaumibokae?"<sup>‡</sup>

<sup>39</sup> Na bere Yesaya a eleukoke hului nebei yo na hele eleikoi, hila rabo ehalei rabuhine ban neyae nda Allah eleukoke are moloukoke,

<sup>40</sup> "Wali noube enainyehembondene Reyae onomibe isemile bele,

nda ro miyae ijoko yae ereiboi sului naeise

nane merau na u benera isaeyeiboi sului naeise

Allah yae ijoko kumba mokommibonde

na kena elae mokommibonde."§

<sup>41</sup> Yesusle uwa naeibe Allahle yendo kayaalo Yesaya yae nuleungekoke, rabuhine ban Yesus Wali Ondofolole nene waewaere neyae ijoko yae erebuke.

<sup>42</sup> Nebei a moloukoke hororebe ro miyae helen bele Yahudi yun-jun nolona hiwa yo bele fa kangkin bewate, Yesusre hila rabo halewainye. Nebeibe nda yo a yaka faeu yaka yae elenaikondere fe yae kowate. Rabuhine ban nda yo buhae hokowoumi Yesusre hila rabo halaeinye aerene Farisi holona yo yae ahenaimikonde Allahre ei mom-mom imaere oroi belene. <sup>43</sup> Nebei holona yo Allah yae nare kaemmile naeise kena ban, ro miyae yae nare kaenaimilere kena hele kaikoke.

<sup>44</sup> Hokoumeke ro miyae helende Yesus kaeneumi, "Rare hila rabo halaeise ro miyae Rare hila rabo halensele mo ban, nane merau Rare ukeufe mekale Kiyaere hila rabo halennele. <sup>45</sup> Nebei kiyae Rare ijoko erensele heene, Rare ukeufe mekale Kiyaere nane merau ijoko erennele. <sup>46</sup> Ro miyae hila rabo halaeisele yo yae Allahre onaeyinye holona yo naei wali oubenne orate wanen enekei naeise Reyae hehere naemaale Kiyae nda kani kelare hehe wanen mekale.

<sup>47</sup> "Raei a elalere borate yo nebeibe wali nebei suluinye ehakoiboi omokoinya, nebei wali mare Reyae hului okoloi. Rabuhine ban nda kani kelana ro miyae naei walire hului koloi-koloise mekale ban, naeyinya hele holere moloremibondere mekale. <sup>48</sup> Nde yae Raeinya a faeu wamalere borondere ahi yae elende nane merau Rare nensehindana, Raei euwara elale a faeu wa huba mokoikoi yane ehee bukulu mere emminonde kiyae niyae. <sup>49</sup> Rabuhine ban Raei elale a faeu Raei uwana a ban. Nebeibe Ako ukeufe mekale Kiyae mare ufembere ukeufe abe, nebei hului yae mare wamale. <sup>50</sup> Nane merau Reyae raeisaei sele Ako ufembere ukeufe a faeu wae wali hena bonare inyembe. Nebeibe Reyae elale a Maeko yae keleufekoke hului yae mare huwamale."

## 13

### *Yesus Na Moisa Orowate Yo Naei Ororo Bu Kuyuumikoke*

<sup>1</sup> Paskah raman bulau nobeungeboke hee Yesus naeisaei yeuboke nda kani kela nukembonde Naekole bokore ende hee na hului yeuboke. Naei holona ro miyaere nda kani kelana nekate yore kena buhae u buhae nekai sele hewoumi nane merau na hibi mo Naei herende yare kena buhae heumiyeumi.

<sup>2</sup> Yesus na moisa orowate yo bele huaena ramanne namman anewate. Walobo yun Yudas Iskariot, Simonbe kelu, Yesusre kelai nenende naeise kena haweungekoke. <sup>3</sup> Yesus naeisaei Naeko yae rambun nemene fomene Naei me kelee u keleene kinyeungekoke. Nane merau Neyae Allahlera nda kani kelare meke benen bukensinde Allahle bokore yae ende naeise Yesus naeisaei. <sup>4</sup> Ramande anewate anuwauye Yesus aunguke moi malo keuboke bu hobei naei malo yae na hehaei ranne heuboke. <sup>5</sup> Nebeisa bu anuwau mbainye rileuboke na moisa orowate yore huba raweuboke oro bune koimaeyeuimi, malo hehaei rande ikileuboke yae norona bure hobeumaeyeuimi.

<sup>6</sup> Meke Simon Petruslene mo, Yesusre weunge, "Tuhan, na man ban sele Weyae lon mae raei ororo bu kuyuefekontere!"

<sup>7</sup> Yesus yae weunge, "Nda heena me u mokawale weyae isaeyeihoi, ya hire weyae isaeyebonde."

<sup>8</sup> Petrus yae Yesusre weunge, "Tuhan, raei oro weyae bu ekuyeiye hele!"

Nebeibe Yesus yae weunge, "Reyae waei oro bu ekuyeihoi, Raei orale wali nibine wangkele ban."

<sup>9</sup> Simon Petrus yae weunge, "Tuhan, nebei wanenna raei oro mo ban nane merau me bele yun bele nemene kuyeiseko!"

<sup>10</sup> Yesus yae Petrusre weunge, "Ro miyae naei uwa bure koiboyole kiyae na uwa nemene ninay yoloiboyole. Nebeyinye benen nare bu ekuyei. Noro fen mo kuyennekonde. Mayae yolauboke yo, nebeibe nemene ban." <sup>11</sup> Nauware kelai nenende kiyae isaeyebokene, nda a eleukoke, "Meyae ninay yolauboke, nebeibe nemene ban."

<sup>12</sup> Yesus nda yo naei oro bu kuyuumikoke baeufoke mo, na malo hireukokera benen nekewole anuwauye eunguweuboke. Nebeisa mo weumi, "Naenda wanen, nda me u ma manemfa mare mokombokamale isaeyaeuboke? <sup>13</sup> Mayae Rare Guru yae Tuhan mae kaenaufe. Mai a na ijenbe wauye, Reyae Niyae. <sup>14</sup> Reyae mai Guru bele Tuhan bele Kiyae yae moro bu kuyekokamalene, mayae nebei sului mbai yae maise naeise oro bu kuyemembe. <sup>15</sup> Reyae nda me u mare kelaemale. Reyae mokoubokale hului nebei bune wane hamennele mokomembe. <sup>16</sup> Nda a faeu nana heselebe wamale, yebaei bubaei ro ban nekate, naei yun ro bele. Nane merau ukeunge ende kiyae naei anuwau bumana hele, eke elele kiyae naei anuwau ana hele. <sup>17</sup> Nda wamale nemene maisaeyinye mayae emmokombena, mai naeise foi sele rambun benate."

*Yesus Kelaise Nenende Kiyaere Yakauboke*

<sup>18</sup> Yesus benen weumi, "Reyae elerekonde a mayae nemene naei ban. Reyae mare eleubokamale, mai wali ma raeisaei. Nebeibe Allahle homofaena molaikokere na hului yembondere nda rambun bende, 'Rangkele nanembainye eramande anande kiyae oro seme kaembonde nebeisa oro yae elensehande'\* ((wanen Rare kelaise nenende)).  
<sup>19</sup> Nebei rambun embendene Reyae Wali Ondofolo yeubokalere na hele yae emelembene naeise, nda hee nebei naeise eyeiboi mo yae Reyae mare wamale. <sup>20</sup> Nda a faeu na helebe wamale, nde Reyae ufende ende ro miyaere ei anebondena, neyae Rare ei haweufe. Nane merau nde Rare ei hawensele kiyae, neyae ukeufele mekale Kiyaere eibe haweunge."

<sup>21</sup> Yesus nda a faeufe eleukokera wa na kenara beko hele hubawounge. Nebeisa weumi, "Nda a faeu na helebe wamale, mai nolora ro mbai Raei kelai nenende."

<sup>22</sup> Naei moisa orowate yo ijoko na ure-ure erewate fa yae bowate, onewate ndele abe elele. <sup>23</sup> Reyae ((Yohanes)), Yesus kena buhae heufe kiyae, Yesusle bokone nuweubokale nekwale. <sup>24</sup> Simon Petrus rare me yae isaei ikeufe Yesusre hinerensindere, "Ndebe naei sele Yesus elele?"

<sup>25</sup> Reyae Yesusle bokore nakeleufikale mo hinanale, "Tuhan, naei sele nde?"

<sup>26</sup> Yesus yae weumi, "Reyae feu bu kolaeinye yaufehindera isende ro, nebei kiyae niyae." Nebeisa Yesus feufe mo rouke nebei bu kolaeinya einye yaweufike mo, Yudas Iskariot Simonde kelure ikeungele. <sup>27</sup> Yudas feufe mo me ikileuboke bae, walobo yun na kena einye eweufike. Yesus yae weunge, "Waei benere nekete rambun hasale yae mokoibo!"

<sup>28</sup> Nebeinye ramanne nuwaikoke anewate yo hi yae ha yae isaeyeiboi sele rahene Yesus nda a ma faeu ma haraungeboko Yudasre ukeunge. <sup>29</sup> Yudas nebei holona roi kayaa hebele kiyae. Nebei aerene hiwa yo yae Yesus nda a mekai haraungeboko ukeungele eraman bulau naei raman bele roi yae rowende naeise yae u benera nekaimi, nebei banna kougna kalonare yeumikonde naei abe weunge era na u benera nekaimi. <sup>30</sup> Yudas nebei feufe mo rouke na hibi aloungekoko eukuke. Nebei hee reniai yeuboke.

*Yesus Yae Nuleungekoko Petrus Elengkonde, "Nare onaenale"*

<sup>31</sup> Yudas eukuke ewole mo, Yesus yae weumi, "Reyae Allahle bokora mekale ro miyae uware yeubokale Kiyae hili hebenaisele nane merau Allahre Raei walora hili hebenainyele naei hee hubabe raweuboke. <sup>32</sup> Allahre Raei eisa hili hebenainyelena, nebei sului mbai Rare Allah Naei eisa hili hebensele, nane merau na hibi mokombonde.

<sup>33</sup> "Mayae Raei kelu omi wanen yo, Reyae mangkele heki enekeikoi sului. Mayae Rare baensekombe, nebeibe Reyae Yahudi ro miyaere weumikokale a mbaibe benende mare wamale, Reyae erele anuwau mayae nebeise emei sului.

<sup>34</sup> "Reyae nda a eme mare ufembe, maise naeise kena buhae u buhae eise meise hembe. Reyae mare heyamale wanen mbai maise naeise hemmiyembe hele. <sup>35</sup> Maise naeise kena buhae hemembe walora ro miyae hiwa naeisaei inyaibonde mayae Raei moisa oraube yo."

<sup>36</sup> Simon Petrus yae Yesusre weunge, "Tuhan, Weyae makeise elere?"

Yesus yae weunge, "Reyae erele anuwau nda hee weyae Raei moisa ehakoibo sului. Nebeibe bona ya fokehonole Raei moisa eufehakoubonde."

<sup>37</sup> Petrus yae benen hineunge, "Tuhan, rahe lonne nda hee yae waei moisa ehakoibo sului yae warae? Waei aerene honaisebondena reyae be hinale."

<sup>38</sup> Yesus yae weunge, "Nana hesele weyae Raei aerene herelere kena koyae? Nebeibe Reyae nda na helebe wawale, ojo mukuu roko name a okoikoi mo, weyae Raei naeise roko name eleukonde, 'Nare onaenale.' "

## 14

*Yesus Bena Ya Honoufonde Wali Naeise Kelewoumi*

<sup>1</sup> Yesus yae weumi, "((Reyae erelere wamalene)) mai kena u isasa alalo okoijae hele. Allah Naei a elelere mayae hila rabo haleyaunge. Nebei mekai mbai Raei a elalere hila rabo halensele. <sup>2</sup> Maekole imae ei obe ei nekei-nekei anuwau helen ekaisonate. Nebei anuwau u yae rahe londe Reyae a yaka faeu yaka yae mare wemele? Mayae ennekembe anuwau mokoisaisae Reyae Maekole bokore erelere. <sup>3</sup> Mayae ennekembe anuwau mokorensandera, Reyae benen berehonde merele. Rabuhine ban Reyae erenekende anuwaufe yawerembombe emale mangkele nebeinye nanembainye emanekende naeise. <sup>4</sup> Reyae erele anuwau mayae nebei anuwaufe eke nibi maisaei yauboke."

\* 13:18 13:18 Mazmur 41:9

<sup>5</sup> Tomas yae weunge, “Tuhan, Weyae ele anuwau meyae maeisaei ban sele lonbe. Naendae mekai yae nebei anuwaufe eke nibi meyae isaeimabonde?”

<sup>6</sup> Yesus yae weumi, “Reyae Allahle bokore eke nibi Kiyae bele na hele no wali no. Ro miyae Raei walora mo Ako Allahre ronainyebonde, nibi hi u hele. <sup>7</sup> Rare ro raufeboube yae mayae nane merau Maekore ro raungeboube. Nda heera mayae Maekore ro raungeboke nane merau Nare eraungeboke.”

<sup>8</sup> Filipus yae weunge, “Tuhan, Ako Allahle uwa maere kelemebomae. Nebei na hului yae elande.”

<sup>9</sup> Yesus yae weunge, “Filipus, heki hele maengkele nanembaisa orandeke nebeibe Rare oroiwai a lon mae weyae eleyae! Nde yae Rare ijoko ereufekokena nebei kiyae Ako Allahre ijoko erekeunge. A koro mahi lon weyae warae, ‘Ako Allah maere keleimebo!’

<sup>10</sup> Reyae Maeko Allahle einye nane merau Maeko Allah Raei einye elale are na helere eleikoi koyae? Reyae wamale a faeu Raei u benena a faeu ban. Naeinya hesele Maeko Allah Raei uwa einye nekele Kiyae nebei rambun emere-emere mokole. <sup>11</sup> Reyae Maeko Allahle einye Maeko Allah Raei einye naeise Reyae wamale are hila rabo halembe. Nda a wamale aerene na hele eleikoinya, rambun emere-emere Reyae mokale eraube aerene nebei are na hele elengko. <sup>12</sup> Reyae nana heselebe wamale, nde yae Raei a elalere hila rabo haleufe kiyae, Reyae rambun emere-emere mokale ma na hului emmokonde. Raei mokalera neyae emekai bele emmokonde, rabuhine ban Reyae Maeko Allahle bokore erelerene. <sup>13</sup> Nane merau rahe rambun aerene mayae Raei Ro eisa yae Maeko Allah riyennelena, mai rambun riyembe huluinye Reyae mokorebonde. Nebei nibi yae Raei walora Maeko Allahre hili enainyehende. <sup>14</sup> Rambun nemene mayae Raei ro eisa riyembena, Reyae mokorebonde.

*Yesus Allahle Roh Inyemilere Weumi*

<sup>15</sup> “Mayae kena buhae Rare henselena, Raei wamale a huluinye hakombombe mokombe. <sup>16</sup> Mare holenemembe Ro hi Kiyae Ako Allahre riyerensinde, Neyae mare inyembe. Nebei Kiyae yae mare huba ban haei ban holenemembe naeise. <sup>17</sup> Neyae Allahle Roh, na hele no Kiyae. Nda kani kelana wali beko nibine orate ro miyae nebei Roh Kiyae ei ehawe sului, rabuhine ban nebei holona yo Nare ereiboi nane merau ro oroiboinye. Nebeibe mayae nebei Kiyae ro raungeboke, rabuhine ban Neyae mangkele nekaube nane merau mai einye Neyae ennekende. <sup>18</sup> Mare ako ban nake ban fa-fa wanen nekembere Reyae ewaeisi. Reyae erelera benen mai bokore berehonde merele. <sup>19</sup> Na heki ban mo nda kani kelana wali beko nibine orate yo Rare benen ereiboi, nebeibe mayae na hului Rare enserembe. Reyae wali hena bona bele nekalene, mayae nane merau wali hena bona nekemembe. <sup>20</sup> Nebei hee yae mayae isaeymbombe Reyae Maekole einye nekale nane merau mayae Raei einye nekaube, Reyae maei einye nekale. <sup>21</sup> Nde yae Raei a elale boronde mokonde kiyae, Rare kena buhaebe heufe. Rare kena buhaere hesele kiyae Maeko kena buhae ennehende. Reyae nebei sului mbai nare kena buhae herende nane merau Raei uwa naeise kelerembonde.”

<sup>22</sup> Yudas Iskariot nakobae Yudas yae Yesusre hineunge, “Tuhan, rahebe bewatene nda kani kelana wali beko nibine orate ro miyae Wauwa eyakaihoi, maere mo yakaumbondere?”

<sup>23</sup> Yesus yae weunge, “Rare kena buhaere haeise ro miyae, Reyae kelaemaele a usaei wasaei huluinye hakonde mokonde. Maeko nebei kiyae kena buhae hennele. Meyae nebei kiyaele bokore ale, nanembainye emanekende. <sup>24</sup> Nde yae Rare kena buhae eheinya nebei kiyae Reyae kelaenale a usaei wasaei huluinye omokoi yae nekende. Nebei ako faeuko huwamale boraube Raei kenara ban, nebeibe Rare ukeufele mekale Maeko Allah Kiyaelena.

<sup>25</sup> “Reyae namman mangkele nanembainye nekande hee yae nda a nanemene wamale. <sup>26</sup> Nebeibe Ako Allahle Roh, mare holenemembe Kiyae, Raei Ro yae wennele mende. Nebei Kiyae yae mare kelenembe nane merau mokonembe Reyae kelewamale a usaei wasaei nanemene mai u benene nekenayembe. <sup>27</sup> Reyae rei mai onomi foka mai kena einye nukamale. Rei mai onomi foka Raei uwana bele ma yae yaemale. Reyae yaemale rei mai onomi foka nda kani kelana wali beko nibine orate ro miyae yae yayembe wanen ban. Mai kena u isasa alalo okoiyae, buhae ohokoiyae.

<sup>28</sup> “Mayae borowaube Reyae nda abe uwamale, Reyae erele nebeibe mai bokore berehonde merele. Mayae na hele Rare kena buhae henselena, Reyae nda hee Ako Allahle bokore erelerene mayae rei mai engkombe, rabuhine ban Ako Allah buma reufina, Reyae ana. <sup>29</sup> Nanemene namman eyeiboi yae nda a uwamale. Nebei nibi huluinye enaibende hee, Rare hila rabo ensehalembe. <sup>30</sup> Benen ebi fere mo Reyae mare kelerembe, rabuhine ban nda kani kelana wali beko nibine orate ro miyae naei yun

melene.\* Nebeibe Raei uwara nebei kiyae elae ban sele. <sup>31</sup> Nebeibe na man sele nda kani kelana ro miyae isaainyate Reyae Ako Allahre kena buhae haenale nane merau Ako Allah ukeufe huluinye nanemene mokale.”

Yesus yae weumi, “Raei a elale hubabe mokanale. Mayae annu, eyae nda anuwaufa alomangkonde emalere.”

## 15

### *Anggur No A Ahuneboke*

<sup>1</sup> ((Yesus yae anggur o ha bele Naei wali nibine oronate yo naei wali ma bele a ahuneboke.)) Neyae nda wanen huwewoumi, “Anggur yoni-yoni maensa akaufe rorokate ekate na no hele Reyae Niyae. Maeko anggur no melemere raufike, holele, narele Kiyae Niyae. <sup>2</sup> Raei uwane roraikoke maensa akau anire omokoi yo Maeko yae folongkonde. Ani wang-wang mokonate naeise, anire kate maensa akau Neyae faeinyemmibonde. <sup>3</sup> Reyae kelewamale a walora mare faeinyembokamale. <sup>4</sup> Nebeinye, mayae Rangkele mbainye nane merau Reyae mangkele mbainye nekemale. Anggur no hebelene ororoiboi maensa akau nanaei ani omokoi sului, roraiboke maensa akau mo ani kate. Nebei sului mbai Rangkele mbainye enekeinya mayae anire omokoi sului.

<sup>5</sup> “Reyae anggur no niyae, mayae maensa akau. Nde yae Rangkele mbainye nane merau Reyae nangkele mbainye nekale kiyae, ani wang-wang engkonde. Rabuhine ban Raei uwane ororoiboinya, mayae rambun mbai omokoiboi sului. <sup>6</sup> Nde Rangkele mbainye enekei kiyae, maensa akau kikauboke wanen yeuboke. Nebei maensa heke ele moinye hayaete kala-kala baete. Nebei wanen maensa akaufe ro miyae yae arilenaisinde italo ranne hainyaikonde benate. <sup>7</sup> Rangkele mbainye nekemalena, nane merau Reyae huwamale a usaei wasaei hubara haeise yanembena, kenare kaube rambun Maekore riyennele hului mare inyembe. <sup>8</sup> Mayae ani helen emmokombena, Maekore hili enainyehende. Mai me u mokaube yae emmiyakambe mayae Raei moisa hakaufekoke maube yo.

<sup>9</sup> “Maeko yae Rare kena buhae heimeyeufe wanen mbai Reyae naei mekai mare kena buhae heimeyamale. Nebeinye mai wali Reyae kena buhaere haemale holona yo naei u mekai ma wanen mae nekembe. <sup>10</sup> Maeko weufe are Reyae hubara haeisa yananalene, Maeko Rare kena buhae heufe einye namnan nekale. Nebei sului mbai Reyae wamale a hubara haeisa yanannelena, Reyae kena buhaere haemaele ma yae nekembe. <sup>11</sup> Raeinya rei mai mai kena ei u einye hubannele nane merau mai kena ei u einye rei mai melei-melei emmelende naeise nebei a Reyae mare isaeyaemale. <sup>12</sup> Reyae wamale a nda niyae, Mai holona yore hi yae hire kena buhae henele, Reyae mare kena buhae heimeyamale wanen mbai. <sup>13</sup> Ro miyae mbai na kena buhae emekai bele kiyae, kena buhaere heumi holona yo aerene naei walire hole omoloi. <sup>14</sup> Reyae wamale a hubara haeisa yanannelena, Reyae kena buhaere haemale yo yae mare me baerele.

<sup>15</sup> “Mare benen Raei yebaei bubaei yae ekaenei. Rabuhine ban rowa mbai naei uwa naei are na yebaei bubaeise ehuweikoi sului. Nebeibe mare kena buhaere haemale holona yae Reyae kaenamale, rabuhine ban Maeko yae elewole a nanemene Reyae borowale hului mare nebei abe isaeyaemale. <sup>16</sup> Mayae Rare elaeufekoke ban nebeibe Reyae mare elembokamale, Raei holona yae me baemale. Reyae mare ukamale embe kakare eyeiboi ani foibe helen emmokombe. Nebei u mekai mokembena, rambun Raei Ro yae Ako Allahre riyennele yoni-yonire Neyae mare inyembe. <sup>17</sup> Nda a Reyae elae yae wamale, maise naeise kena buhae henele.

<sup>18</sup> “Nda kani kelana wali beko nibine orate ro miyae mare ikele konayembena, maisaei nekembe nebei yo na bere Rare ikele kowaise. <sup>19</sup> Mayae nda kani kelana wali beko nibine orate holona yo yae me baeyembena, naei holonane mare kena buhae henayembe. Mayae nebei holona yo naei ban nebeibe Reyae mare elembokamale, nebei wali beko nibira wekaunge. Nebei aerene wali beko nibine orate yo mare ikele kayembe. <sup>20</sup> Reyae uwamale are bene foi yae nekenayembe. Yebaei bubaei yoni-yoni na rowale na metete ban. Wali beko nibine orate yo hiwa Rare weitasi kowaisene, nebei wanen mbai mare weitasi konayembe. Ro miyae hiwa Raei ako faeuko huwamaele huluinye hakowaisene, nebei wanen mbai mayae huwembe are hakonate. <sup>21</sup> Reyae Wali Ondofolo yeubokalere mayae na hele elaubere aerene nebei yo yae mare u mekai beko mokonayembe, rabuhine ban Rare ukeufe mekale Kiyae nda yo yae oroiboinye. <sup>22</sup> Reyae ndare emei yae nane merau nda holona yore Allahre wali nibi naeise eweikoi yae, nebei ro miyae me beko u beko bele yo yae me ebaeiboi. Nebeibe nda hee nebei ro miyae naei u mekai beko bako mokatera weyei naeise a ban. <sup>23</sup> Nde yae Rare ikele konselena, Maekore ikele kounge.

\* 14:30 14:30 Yudas Iskariot holona walora neyae mende.



<sup>24</sup> Nebei holona yo nolone ro hi miyae hi yae roko mbai omokoiboi sului rambun Reyae omokoikoinya, nebei holona yore u beko bako bele yae me ebai. Nebeibe nda hee rambun emere-emere mokowale nanemene nebei ro miyae erewate hororebe, nebeibe neyae Rare ikele kowaise nane merau Maekore ikele kowainye. <sup>25</sup> Nebeibe Rare nebei holona ro miyae ikele kaise yae wali heere foloukoke homofae a naei naeise na hului yeuboke. Nebei homofae nda wanan molaikoke, 'Nda yo aere ban mare Rare ikele kaise.\*'

<sup>26</sup> "Mare holenemembe Kiyae Reyae Maekolera mai bokore ufende mende. Nebei Roh na hele no yeuboke, Maeko wennele abe mokole. Nebei Roh yae Raei naei a isaeinyemile. <sup>27</sup> Mayae naei mekai mbai ro miyae nanemenere Raei naei a isaeinyemile, rabuhine ban mayae na bemere hele kaenengkokamale homo mbainye orandeke nekande aereene.

## 16

### *Yesus Rambun Benate A Yakauboke*

<sup>1</sup> "Raei wali nibira wemembe belene, nane a nemene Reyae huwamale. <sup>2</sup> Mare Allahle ei mom-mom imaera hukenayembe. Na ya bele mensebonde ro miyae mai holona yore honatene, na uwa hubannele Allahre foibe mokoung. <sup>3</sup> Nebei holona yo Ako Allahle Rangkelere ro oroiboi aere nebei u mekai ma mokonate. <sup>4</sup> Nebei a wamale hului enaibendene, mayae bene nekenayembe Reyae nebei a mare wengkokamale naeise, Reyae nda hee yae nebei are mare wamale. Mayae namman homo mbainye Rangkele orowandene, nebei benate naei a faeu Reyae mare na bere holo yae ehuweikoi. <sup>5</sup> Nebeibe nda hee Rare ukeufe mekale Kiyae bokore erelere. Mai nolona hi yae Rare ehineisi, 'Makeise weyae elere?' <sup>6</sup> Reyae a wamale aere nebei mayae kena beko u beko kaube. <sup>7</sup> Na helebe mare wamale, mai foi naeisene Reyae erelere. Rabuhine ban Reyae einya, mare holenemembe Kiyae mai bokore emei sului. Nebeibe Reyae erelena, nebei Kiyae Reyae ufende mai bokore mende. <sup>8</sup> Neyae mende heena nda kani kelana wali beko nibine orate ro miyae naei kena einya nda naeise isaeinyemile: naei me u beko mokoimeyate naei, wali na helere haranainyende naei, walire hului emmikolonde naei. <sup>9</sup> Allahle Roh nebei holona yore me u bekobe mokate naeise isaeinyemile, rabuhine ban Raei a elalere hila rabo ehaleinye. <sup>10</sup> Allahle Roh nebei holona yore Reyae wali himaloungeboko yae nekewale naeise isaeinyemile, rabuhine ban Reyae Maekole bokore mekalene benen berehonde erele mayae Rare ereiboi sului.\* <sup>11</sup> Allahle Roh nebei u mekai beko bele holona yore Allah naei walire hului emmikolonde naeise isaeinyemile, rabuhine ban walobo yun nda kani kelana wali beko nibine orate yo naei yun kiyae Allah ehee bukulu wokeungene.

<sup>12</sup> "Raeinya a helen sele mare ufengkomberebe, nebeibe nda hee mayae onembe handambe belene, Reyae ehuweikoi. <sup>13</sup> Nebeibe Allahle Roh, na hele no Kiyae mende ya wa, Neyae na hele wali nibine yawenembe. Rabuhine ban Naei uwa naei abe elei, nebeibe a wennele Kiyaelena boronde abe enelende. Nane merau bena yane enaibende naei Neyae mare isaeinyembe. <sup>14</sup> Neyae Rare hili ensehebende, rabuhine ban Raeisa yarongkondebe mare isaeinyembe. <sup>15</sup> Maekole me einye honainye rambun yoni-yoni nanemene Raei bangka mo. Nebei aere nebei Reyae wamale, nebei Roh Raeisa yarongkonde hulube mare isaeinyembe. <sup>16</sup> Ya na heki ban mo erelerene, Raei be ijoko mayae erei nekembe, nane merau ya na heki ban mo mayae benen Raei be ijoko enserembe."

<sup>17</sup> Nebei a ma borowatene Yesus na moisa orowate hiwa yo naeise naeise hinate, "Neyae nda a eleukoke, 'na heki ban mo Raei be ijoko mayae ereiboi benen ya na heki ban mo benen Raei be ijoko mayae enserembe,' nane merau, 'Reyae Maekole bokore erelere.' Rahe mekaibe elele ban?" <sup>18</sup> Na hibi mo nda yo naeise naeise hinate rahe naeibe Yesus yae a yae haraungeboko weume, "Ya na heki ban mo." Neyae onaete hele.

<sup>19</sup> Yesus naeisai nda yo onaetene kena kate Nare hinenainyehindere. Nebeinye Yesus yae weumi, "Reyae a eleukokale, ya na heki ban mo Raei be ijoko mayae eyerei nane merau ya na heki ban mo benen Raei be ijoko mayae enserembe. Nebei a haraungebokale wamalebe mai nolone hi yae hire hineunge?" <sup>20</sup> Na helebe Reyae wamale, Nda kani kelana wali beko nibine orate ro miyae na kena rei mai sele enainyehubande, nebeibe mayae kena beko u beko hubannelene rime nei-nyei engkombe. Nebeibe mai kena beko u beko engkombe embaensonde hee mayae kena rei mai menjembombe hubannele. <sup>21</sup> Miyae mbai fare honondere hiyau kole hee kena beko u beko hubaunge. Nebeibe fa honolera na kena beko u beko haneikoyeunge, rabuhine ban ro miyae mbai nda kani kelane hongke, rei mai yae na kena aungebokene.

\* 15:25 15:25 Mazmur 35:19, 69:4

\* 16:10 16:10 Yesus wali beko nekeube yae, Naekole bokore ei sului.

<sup>22</sup> Mayae nebei sului mbai, nda hee mayae kena beko u beko yae ambokembe kaube. Nebeibe Reyae berehonde merele mangkele benen hubaimakondene, mai kena u rei mai ennehubambe. Nebei rei mai ro miyae hi yae mai kenara einyukeisai sului. <sup>23</sup> Nebei yara rambun yoni-yoni benen Rare eriyeyei. Na heselebe Reyae wamale, Raei Ro eisa riyennele rambunde Maeko mare inyembe. <sup>24</sup> Mayae roko mbai Raei Ro yae Maekore eriyeyei mo nekeimeyaube. Rambun riyenne, mayae enjarombe. Nebei mekai yaere mai kena einya rei mai ennehubambe melei-melei enaimelende.

<sup>25</sup> “Nda are nanemene Reyae a ahumbo-ahumbo yae mo mare huwamale. Na ya bele mensembonde Reyae a ahumbo-ahumbo yae benen mare ehuwei. Nebeibe Maekole u mekai naeise na yaka-yaka yae mare hufembe. <sup>26</sup> Nebei heera mayae Raei Ro eisa rambun riyennele, nebeibe benen mai naeise Maekore erendiyendere Reyae a elei. <sup>27</sup> Mayae Rare kena buhae haeufe nane merau Reyae Maekole bokora ukeufe mekalere mayae na hele yae elaube aere ne Maeko Nenaiejae mare kena buhae hembe. <sup>28</sup> Reyae Maekole bokora nda kani kela eise mekale. Nda hee Reyae nda kani kela nukerebonde, mekale anuwahu Maekole bokore benen berehonde erelere.”

<sup>29</sup> Na moisa orowate yo yae Yesusre wainye, “Nda hee ya wa na yaka-yaka yae weyae wamae, a ahumbo-ahumbo yae ehuwei. <sup>30</sup> Nda hee yae wa meyae isaeyaendeboke Weyae benate rambun waisaei bangka mo. Ro miyae u bene nekaima rambun Weyae waisaei mo, erabae nebei ro miyae Ware a ehineikoi. Nebei mekainye Weyae Allahlera mekale naeise na hele yae elande.”

<sup>31</sup> Yesus yae nda yore weumi, “Nda hee mayae nebei are hila rabo halaeufe! <sup>32</sup> Nebeibe nda hee mare here ware ungayembe yabe meufeuboke. Maise naeise mewaube imae obere yae bukembombe embe, nane merau mayae nukesebombe Renaei mo nekerele. Nebeibe Rembai ban, rabuhine ban Maeko Rangkele mbainye nekende.

<sup>33</sup> “Mayae rei mai onomi foka Raei einye enjarombe naeise Reyae nane a nanemene mare isaeyaemale. Nda kani kela einye me beko u beko hubannele, weitasi konayembe. Nebeibe mai kena u elae hebembe, rabuhine ban nda kani kela beko mere nulaiboke yo meleumihakamaele.”

## 17

### *Yesus Naeko Allahre Ebeli Bowoungue*

<sup>1</sup> Nebei a usaei wasaei huba mokoungkokera, Yesus yakure yae be weuweke wa elele, “Arai, nda hee na ya na hului meujeuboke, Ako Reyae Wa Kelu Niyae Ware hili ereisebeite naeise Rare hili hebeise! <sup>2</sup> Rabuhine ban Weyae kinyewarae ro miyaere wali hena bona isemile naeise Weyae Rare elae ikarae ro miyae nemene fomene mere mokoremile. <sup>3</sup> Wali hena bonana u mekai nda niyae: Weyae Allah hele mbai mo rora ronayete nane merau Yesus Wali Ondofolo, Reyae Niyae, Weyae ukarae mekale Kiyae rora ronaisele. <sup>4</sup> Arai, Weyae ukarae kalia Reyae riyau weubokale walora nda kani kela ranne Ware hili hebawale. <sup>5</sup> Arai, nda kani kela omokoi heene Waei bene Reyae nene waewae bele hebawale. Nda hee Wa kenda wameran bene nebei nene waewae mbai bele yae buma kaeisebo.

<sup>6</sup> “Arai nda kani kelana Rare kinyewarae ro miyaere Waei u mekai isaewamaele. Nebei yo Arai mere mokamae holona nebeisa Rare kinyeufbokae. Nebei holona yo Waei ako faeuko wamaele hului nye hakoimeyate. <sup>7</sup> Neyae nda hee yae wa isaeyaiboke Rare iwarae rambun nanemene Arai Waeisa bangka mo. <sup>8</sup> Arai, Waei ako faeuko Rare ukarae hufemilere na hului weumikokale. Nebei holona yo Waei ako faekore hila rabo halewate nane merau Reyae Waei bokora mekalere isaeyaiboke. Nda holona na hele yae elate, Arai, Weyae Rare ukarae nda kani kelare mewale. <sup>9</sup> Arai, Raei ebeli Ware bawale nda kani kelana wali beko nibine orate ro miyae naei ban. Naeinya hesele Rare kinyeufboka ro miyaere ebeli bawale. Rabuhine ban nebei yo Arai Weyae mere mokamae holona. <sup>10</sup> Rare kinyewarae yoni-yoni Arai Waei bangka mo. Arai, Weyae mere mokamae holona Raei bangka mo. Nane merau nebei yo eisa Arai Rare hili hebarae. <sup>11</sup> Nda hee Reyae nda kani kelara Waei bokore erelere, Rare kinyewarae holona ndane nukeremibonde nekenatere. Arai nene waewae bele Kiyae, nebei ro miyaere Waei Ro walora ei haweumile. Waei Ro eisa elae Weyae Rare ikaerae. Wangkele Rangkele mbainye nekende wanan nebei holona yo mbaise nekenate naeise Waei Ro eisa elae yae ei haweumile. <sup>12</sup> Nebei yo bele mbainye nekewande hee, Arai Waei Ro elae yae Rare kinyeufbokae yae nebei ro miyae hole moloumiyekale, kayaa hebeumiyekale. Yudas Allah bele waheneikonde kiyae mo Reyae hole omoloi. Nebei mekai yaere Waei homofae molaikoke abe na hului yembonde.

<sup>13</sup> “Nda hee Reyae Waei bokore male. Raei rei mai naei uwane melei-melei eremimelende naeise, Rare kinyeufbokae yo bele mbainye nekewande hee nane a weumi. <sup>14</sup> Arai, Waei ako faeuko nebei yore Reyae weumikokalere aisakoukokene, nda kani kelana wali beko nibine orate yo yae nare ikele kaimi. Rabuhine ban Reyae nda kani kelana wali beko nibine orate holona ro miyae ban nane merau nebei holona yo nebei sului mbai nda kani kelana wali beko nibine orate holona ro miyae ban. <sup>15</sup> Arai, nebei holona yo nda kani kelara yaroukonde naei abe Reyae riyawale ban. Nebeibe Raei ebeli bawale nebei yo hole moloumile, u mekai beko yae walobo yun beko emmimokombonde belene. <sup>16</sup> Raeinya wanen nebei holona yo nda kani kelana wali beko nibine orate holona yo ban. <sup>17</sup> Arai, Waei u mekai wanen nebei holona yore Waei ako faeuko yae na u mekai yolo-yolo mokoumibo. Waei ako faeuko na hele no. <sup>18</sup> Nda kani kelare Arai ukarae mekale wanen, Reyae nebei holonare ukamaele nda kani kelana wali beko nibine orate holona yo nolore enatere. <sup>19</sup> Nane merau nebei holona aere ne Raei u mekai yolo-yolo yae nekerele Waei u mekai wanen mbai. Nebei mekai yaere nebei holona yo naei u mekai Aei hului mbai yae nekenate.

<sup>20</sup> “Arai, Reyae Ware bawale nebei holona yo naeise mo ban. Nebeibe ro miyae Raei naeise hungatene hiwa yo Rare hila rabo halenaisele yo naeise bele ebeli bawale, <sup>21</sup> nebei yo nanemene mbaise inyaibondene. Nda kani kelana wali beko nibine orate ro miyae na hele yae elenate, ‘Weyae Rare ukarae nda kani kelare mekale’ naeise, Arai Weyae Raei einye nekeyae Reyae Waei einye nekale wanen mbai nebei yo bele Aei einye nekenatere waeimihi. <sup>22</sup> Eyae mbaise yendeboke wanen nda yo mbaise inyaibonde naeise, Arai Raei nene waewae kiteufebokaebe nda yore kinyewamaele. <sup>23</sup> Nebei holona yo u bene mbai mo nekenaimile nane merau wali nibi mbai mo oronate naeise, Reyae naei einye nekerele Weyae Raei einye nekele. Nda nibi yae nda kani kelana wali beko nibine orate ro miyae isaeinyaibonde, Weyae Rare ukarae mekale nane merau isaeinyaibonde, Weyae Rare kena buhae haerae wanen Rare kinyeufeboke yore kena buhae haemaale.

<sup>24</sup> “Arai, nda kani kela omokoiboi heena Weyae Rare kena buhae heufekokaene nene waewae bele kiteufebokae. Rare kinyeufebokae holona yo, Reyae erenekende anuwauinge nanembainye emanekendere nane merau nda holona yo Raei nene waewae ijoko enayerendere kena kale. <sup>25</sup> Arai, Weyae wali himaloungeboke Kiyae nda kani kelana wali beko nibine orate ro miyae Ware oroiboibe, nebeibe Reyae Ware rora roubokawale. Nda ro miyae isaeyaiboke Arai Weyae nda kani kelare ukarae mekale. <sup>26</sup> Waei kena buhae Rare haerae wanen mbai nebei yore Weyae kena buhae heumile naeise nane merau Reyae naei kena u einye nekerele naeise, Arai, Wa ro nebei yore isaeyumibokale nane merau isaesemile.”

## 18

### *Yesus Ikilaiboke*

*(Mat. 26:47-56; Mrk. 14:43-50; Luk. 22:47-53)*

<sup>1</sup> Yesus Naeko Allahre ebeli boungkokera mo, na moisa orowate yo bele eramande anewate imaera maibaleke alainyekoke Kidron wi reufire ekate. Nebeinya o ha zaitun heke mbainye Yesus na moisa orowate yo bele ayeuboke.

<sup>2</sup> Yudas, kelai rorele nebei anuwau naeisaei, rabuhine ban Yesus na moisa orowate yo bele roko helen nebeinye eyarilesiyate. <sup>3</sup> Nebei anuwaufe Yudas yae felayo homo mbai bele imam yun-jun bele Farisi bele yae ukaimile abu ako yo belere yaweumiboke. Nebei homona yo yae kaijuwe na isehe roraiboke bele na fela menda bele yaraikoke ewate.

<sup>4</sup> Yesus na uwa ranne benate naeise isaeyebokene, nebei yo naei bokore yae eunakeleufike mo hineumi, “Mayae ndere baeimeyaunge?”

<sup>5</sup> Nda yo yae wainye, “Yesus, Nazaret yona ro.”

Yesus weumi, “Reyae nda Niyae.” Yudas kelai rorele nebei nolone nangkele hebate. <sup>6</sup> Yesus ukeumi, “Nda Reyae Niyae.” Nebei hee nane yo moise yae kewainyele ane balewate.

<sup>7</sup> Benen Yesus hineumi, “Mayae ndebe baeimeyaunge?”

Nane yo yae wainye, “Yesus, Nazaret yona ro.”

<sup>8</sup> Yesus yae weumi, “Reyae nda Niyae yae wamale. Mayae nana hesele Rare baeimeyaufena, hiwa yo waemmihi ai.” <sup>9</sup> Nebei a ma eleukoke na bere ukeumile a na hului yembonde naeise. Neyae nda a eleukoke, “Arai, Rare kinyewarae yo mbai sambai Reyae ewaeisi Rangkele ewaheikoi.”\*

\* 18:9 18:9 Yohanes 6:3

<sup>10</sup> Nebeinye Simon Petrus ramiyaeli bele rowewekene na ramiyaelire mo nokey-obouboke imam kaban na yebaei bubaeibe nangkaei meube reufibe neufake ruke. Nebei yebaei bubaei na ro Malkhus.

<sup>11</sup> Yesus euweke Petrusre weunge, "Wa ramiyaeli na anuwaufe noinyo! Bu faere bele anerehinde wanen mae Maeko yae me u ehee bele ukeufe mokorebonde. Waei u bene nekayete nebei me u Reyae omokoi era?"

<sup>12</sup> Nebeisa nebei fela yun na keleena yo bele Yahudi yae ukaimile ekate abu ako yo bele Yesusre ikilaibokate ha yae na me rinainyekoke. <sup>13</sup> Na bere Yesus yawainyehoke Kayafas na miyae naeko Hanasle bere ekate. Nebei ralo yakama Kayafas imam kabande nekewole. <sup>14</sup> Na bere Kayafas mbai Yahudi yun-junde a usaei weumikoke, Na foi bele yo kaban yan kabande hole molombonde naeise karo ro mbai herende.

<sup>15</sup> Simon Petrus bele reya Yohanes rangkele nanembaisa Yesusre hakannekoke ewande. Imam kaban rare naeisaeninye, rangkele yae Yesus yawainyehoke ewate, homo mbaisa imam kabanbe obere ayandeboke. <sup>16</sup> Nebeibe Petrus mbaibe moinye na romau kelaeunge hebewole. Nebeinye reya moise eukukale, romau kayaare hebewole maengke fare a elendekoke mo, Petrus yaweungehokale eise endeuboke.

<sup>17</sup> Nda maengke fa Petrusre weunge, "Naendae wanen, weyae na hi ndi Ro naei moisa oraube kiyae niyae?"

Petrus yae weunge, "Reyae niyae ban!"

<sup>18</sup> Nebei hee hin manse meungeke hubawainye, Allahle ei mom-mom imae kayaa yo bele nebei imaena yebaei bubaei yo bele italo kolaibokatene akelewate. Petrus nangkele nebei italo mbainye akelewate.

<sup>19</sup> Imam kaban huba raweuboke na moisa orowate yo naei a bele naei meke a usaei kelewoumi naei a bele Yesusre hinewoungue.

<sup>20</sup> Yesus yae weunge, "Ro miyae nemene naei bene na yaka yae eyelewale. Yahudi ro miyae nanemene arileisiyele anuwau yoni-yonine keleyamaele. Allahle ei mom-mom imaene bele Allahre ei mom-mom imae na kaban sele kiyane bele keleyamaele, nun-nun wanen mae eleikoi mo. <sup>21</sup> Naendae wanenne weyae Rare hinarae? Raei ako faukore kelewamaele borowate yore hineimi. Neyae naeisaie rahe erabe elewekale."

<sup>22</sup> Yesus nebei a wanen eleukokene kayaare hebate nolora ro mbai Yesusre na bera mefae yae uke na a bele weunge, "Ae, mehinin ban sele ya, Weyae nebei wanen a yae imam kabande wanae!"

<sup>23</sup> Yesus yae weunge, "Raei a faeu na ijen ban eleukokalena, na ijen ban kayeero keleisebo! Nebeibe Reyae na ijen nda a eleukokalena, rahene weyae Rare mefae yae ukarae?" <sup>24</sup> Nebeisa Hanas ro miyaere ukeumile, Yesusre yawainyehoke, na me na ha rinaikoke bele yae imam kaban Kayafasle bokore yae ekate.

<sup>25</sup> Petrus nane italo kelaeunge mo namman hebewole. Nebeinya ro miyae yae wainye, "Weyae nda Ro Na moisa oraube na ro hi niyae era?"

Nebeibe Petrus isian mae eleukoke weumi, "Reyae niyae ban!"

<sup>26</sup> Imam kaban na yebaei bubaei na angkaeise neufake kiyae yohona yae Petrusre weunge, "Weyae niyaebe ya? Zaitun heke einye ndi ro bele nanembembane erekawale hebewoubel!" <sup>27</sup> Petrus benen weumi, "Reyae ban ma." Nebei haei yae ojo mukuu a koukoke.

*Yesus Pilatusle Bere Eke*

(Mat. 27:1-2, 11-14; Mrk. 15:1-5; Luk. 23:1-5)

<sup>28</sup> Na rene kaukau hele Kayafasle imaera Yesus yawainyehoke gubernur imae einya are kolainye obere ekate. Yahudi ro miyae agama huluinye nauwa niki bele inyaibonde belene, nebei imae eise ei, rabuhine ban Paskah ya kabanna eraman bulau nangkele anenaikonderene. <sup>29</sup> Nebei wanenne Pilatus moise eukuke hineumi, "Naendae wanen me u bekobe mokoubokene mayae nda rora ahunaunge?"

<sup>30</sup> Nda yo yae wainye, "Arai Gubernur, Neyae beko omokoiboi yae bae rahe londe waei bokore yawannehoube mande?"

<sup>31</sup> Pilatus yae weumi, "Yawennoho, menaeijae embe hinennele. Mai wali heere foloukoke honole huluinye ehee bukulu yennele."

Nane Yahudi ro miyae yae wainye, "Nebeibe ro hoi-soise maere ewaeisi tonbe." <sup>32</sup> Nda wanen maere Yesus naei herende ma naei a eleukoke na hului yembonde.

<sup>33</sup> Pilatus are kolainye obere beufoke eke Yesusre kaeneungekoke mo hineunge, "Weyae na hele Yahudi naei Ondofolo?"

<sup>34</sup> Yesus yae weunge, "Nda a ma faeu ma hinarae waei kenarabe hinarae, ro miyae hiwa yo yae Raei naeise ukayetene hinarae?"

<sup>35</sup> Pilatus yae weunge, “Weyae eraerae reyae Yahudi ban ro! Waei ro miyae bele imam yoni-yoni bele yae Ware raei me eise yae kinyaiseboke. Rahe me ube weyae mokoubokaene?”

<sup>36</sup> Yesus yae weunge, “Raei yo waku nda kani kelana ban ma. Nda kani kelana yae bae, Rare Yahudi naei me eise kinyaisebouboue aerene Raei holona yo han fela relaeinyele. Na hele Raei yo waku nda kani kelana ban, anuwau hina.”

<sup>37</sup> Pilatus yae hineunge, “Nebei wanenna, Weyae Ondofolo era?”

Yesus yae weunge, “Wenaiejae a ijenbe warae Reyae Ondofolo. Nebei aerene hongkaisele nane merau nebei aerene na hele naei are isaeisemibondere nda kani kelare mekale. Ro miyae na hele naei a isaeyaemaelere kena kate yo Raei a boraisele.”

<sup>38</sup> Pilatus yae hineunge, “Na hele naei a rahe era?” Nebei are mo hineungekoke, Pilatus imae eisa eukuke Yahudi ro miyaere weumi, “Reyae Naeinya beko mbai sambai ehubaikoi sele. <sup>39</sup> Nebeibe mai era hena honoyelene huluinye nda wanen: Paskah ya kaban mae kawana hebate ro mbai reyae hayeikoyanale. Mayae kena kaube mai naeise reyae ‘Yahudi naei Ondofolo’ haisengkondere?”

<sup>40</sup> Nebei yo kali ara nene kaenate wainye, “Neyae ban, maere Barabasbe hayeinyeko!” Barabas fa kangkin kowole ro.

## 19

<sup>1</sup> Nebeisa Pilatus eise eweufike ukeumile Yesusre rahuaere bonatere. <sup>2</sup> Felayo yae o isa bele na maensa yae ondofolo yoni-yoni hirate ma wanen fokoma wanen mbai mokaiboke roukate Yesus na yun danne obunainyebouke. Nebeisa malo fi kolei ma yae, nebei kanina ondofolo hirewate wanen, hirainyekoke. <sup>3</sup> Hi yae mele aukaka yae koung ro melaeyunge weunge: “Onomi foka, Yahudi naei Ondofolo!” Weyeunge rombae na mefae bele eiwele.

<sup>4</sup> Nebeisa Pilatus benen eukuke nane Yahudi ro helen miyae helen hebatereweumi, “Eren, Reyae mana mai bere yoise Yesusre yaufensonde menduwende. Mayae maisaei nekembe, reyae Naeinya beko mbai sambai ehubaikoi sele.” <sup>5</sup> Nebeisa Yesus yawainyehoke meukuke na malo fi kolei ma yae hirainyekoke, na yun fokoma isa bele yae obunainyebouke. Pilatus yae weumi, “Mai ro niyae erennebo!”

<sup>6</sup> Imam yun-jun bele na abu ako yo bele aiweke Yesusre erekainyele bae kaenate, “Ohaline bongko! Ohaline bongko!”

Pilatus yae weumi, “Yawennoho eme, menaeijae ohaline bongkombe. Nauware elaub beko mbai sambai reyae ehubaikoinye.”

<sup>7</sup> Yahudi ro miyae yae wainye, “Maei wali heere folaikoke honaime huluinye bae Neyae herende hele, rabuhine ban Naei uware Allahle Kelu yae eleukokene.”

<sup>8</sup> Nebei a boroukokene Pilatus buhae hele hokoungebouke. <sup>9</sup> Pilatus beufoke are kolainye obere eweufike, ukeumile Yesus yawainyehoke, ekate mo hineunge, “Weyae naei sele makeinye ro?” Nebeibe Yesus a mbai sambai ewei. <sup>10</sup> Nebeinye benen Pilatus yae weunge, “Weyae rangkele a faeu mbainye elei? Weyae oneyaene Ware bulaereibote naeise nane wanen ohaline boreikote naeise raei me einye mo honole?”

<sup>11</sup> Yesus yae weunge, “Allah nebei rambun ware ekinyeiboinya, weyae Raei uwa rande me ikileiboi hesele. Nebeinye Rare waei me einye kinyeubokete kiya na beko bako kabani hesele, waeisa.”

<sup>12</sup> Pilatus nda a wanen boroukoke bae, Yesusre bulaerennekondere relewoungel. Nebeibe Yahudi ro miyae kali kaenate, “Weyae nebei kiya bulaereungekondena, weyae nda kani kaban na Ondofolo Kaisarle kahili ban. Ro miyae nde yae nauware ondofolo yae elendena, neyae Kaisarle yokeijo.”

<sup>13</sup> Pilatus nebei a ma faeu ma boroukokene, ukeumile Yesus yawainyehoke eibaleke. Anuwau mbai na ro “Ruka Felaeikoke Anuwau” (Ibrani afaeu wae na ro Gabata) wali hului koloi-koloi ro naei angen nuwei ranne nuweubouke. <sup>14</sup> Nebei hee hu yaukanne ike (12) hului Paskah mon na uwa mokoisayaimi ya.

Pilatus yae Yahudi ro miyaere weumi, “Nda maei Ondofolo niyae.”

<sup>15</sup> Nda yo yae kaenate, “Hombo! Hombo! Ohaline bongko!”

Pilatus yae hineumi, “Rahene mai Ondofolo ohaline borekondere waufe?”

Imam yun-jun mae wainye, “Kaisar mbai ken maei Ondofolo.”

*Yesus Ohaline Baikoke*

*(Mat. 27:32-44; Mrk. 15:21-32; Luk. 23:26-43)*

<sup>16</sup> Nebeisa ohaline bonaikonde naeise Pilatus nda yore kinyeumbouke.

Nebeinye felayo Yesusre yawainyehoke ewate. <sup>17</sup> Yesus nenaiejae ohali na bakane kaeubouke aloungekoke anuwau na ro Yun Bo meke (“yun bo” Ibrani afaeunge

"Golgota").<sup>18</sup> Nebei anuwaunge Yesus ohaline baikoke. Ro bee bele nanembainye baikoke, hi na meli reufine hi na meubene Yesus na nolone.

<sup>19</sup> Yesusre baikoke ohaline Pilatus ukeumi nda raka homo ma molonaikonde mo ungate,

YESUS NAZARET YONA RO,  
YAHUDI RO MIYAE NAEI ONDOFOLO.

<sup>20</sup> Nebei raka homo Yahudi ro miyae helen kowate, rabuhine ban Yesus ohalire baikoke anuwau yora ahau ban, nane merau nebei homo Ibrani, Latin, Yunani afaeu wae molaikokene. <sup>21</sup> Imam yun-jun mae Pilatusre wainye, " 'Yahudi ro miyae naei ondofolo' naei yae omoloiyae. Nda wanen mae molokomae, 'Nda ro eleweke, Reyae Yahudi ro miyae naei ondofolo.' "

<sup>22</sup> Nebeibe Pilatus yae weumi, "Moloukokale hului yae naei mekai hononde."

<sup>23</sup> Yesus ohaline baikokera nebei felayo yae Na malo yaraikoke. Nebei malobe kelire wahaeikoke naeise naeise mbemba yaraikoke. Yesus Na uwa kelaeunge malo kaban rokate. Nebei malo bumara oke ane ehaikoi.

<sup>24</sup> Nebeinye nda felayo hi yae hire weunge, "Nda malo bohi-bohi yae efoloiyae. Men, eyae oye nihemakonde mo haimakonde neyae kelemmebonde ndelere yembonde."

Nebei ma mokaiboke yae wa Allahle homone molaikoke a na hului yembonde. Nebei homo nda wanen molaikoke,

"Raei malobe neyae wahaeikoke

nane merau raei malo kabande oye yae nihaeiboke."\*

Nebei felayo nebei mekai yae mokaikoke.

<sup>25</sup> Yesusre baikoke ohali kelaeunge Yesus nenake bele, Yesus nenake nauwake bele, Maria Klopasle miyae bele, Maria Magdalena bele, nebei anuwaunge hebate. <sup>26</sup> Nenake bele reyae Yohanes na moisa orowole kenare koufeke kiyae bele hebande Yesus erekeume heera, nenakere weunge, "Ana, nda waei fa." <sup>27</sup> Nebeisa Yesus rare eweke weufe, "Ndi Ana niyae." Nebei heera Yesus nenake raei imaene ei haweungekale.

*Yesus Hereke*

(Mat. 27:45-56; Mrk. 15:33-41; Luk. 23:44-49)

<sup>28</sup> Yesus naeisaei, benate rambun nanemene na hului yaeiiboke. Allahle homofae molaikoke na huluisi mokonnebonderene, Yesus elele, "Reyae bukibe kale ya."

<sup>29</sup> Nebeinye anggur bu faere mo honole. Nebeinye hebate yo yae kolaei mbai nebei bu yalene hakalune yawaisike. O ha mbai na ro hysop na maensa mbai nihaeiboke nebei hakalu roukate mo Yesus anensinde naeise euwa boneise yae mokainyeboke. <sup>30</sup> Yesus felaeueufike heera elele, "Ninae na hului yaeiiboke." Nebeisa na yun are noke, no u yeuboke hereke.

<sup>31</sup> Sabatre mokoisayainye yane yeubokene, nane merau nda kulunne sabat Paskah ya kaban rukene, Yahudi yun-jun ohaline baikoke here no na hibi hilonatere ahi hele elewate. Nebeinye Yahudi yun-jun ekate Pilatusre riyaenyehike ohaline hilate yo u hale herenate naeise, nore isenaikondera here no are yae onate. <sup>32</sup> Felayo yae ekate Yesus naei nanembainye ohaline baikoke ro bee naei oro bo beere nihaeikoke. <sup>33</sup> Yesus hilolere mekate bae erainye hereke. Nebeinye Yesusle oro bo eniheikoi. <sup>34</sup> Nebeibe felayona ro mbai yae na mena menda yae Yesus na kelengkera neke, na hibi ha bele bu bele balewate. <sup>35</sup> Nda wanen yeubokere reyae Yohanes ijoko yae ereubokale kiyae yae nda are huwamale. Nebei are mayae hila rabo bele yae halembe naeise reyae na helebe huwamale. <sup>36</sup> Allahle homona molaikokere na huluisi mokonainyebonde naeise, nebei u mekai mokaiboke. Nda wanen Allahle homofaene molaikoke, "Yesus nauwana bo mbai sambai einyiheikoi."† <sup>37</sup> Nebei homo einye nane merau molaikoke, "Nda yo mendare nekate kiyaere ijoko enainyekanende."‡

<sup>38</sup> Ro mbai Yusuf Arimatea yona Yahudi ro miyae, fene nunda-nunda Yesusre hakoungke oroweke. Nebei hee, neyae Pilatusre riwoungke Yesusle here no are onde naeise. Pilatus ehe koungkoke. Nebeinye here no roweise ekate. <sup>39</sup> Nikodemus, na bere Yesusle bokore reniai yae meke kiyae, nebeinye nangkele mekete. Nikodemus yae nda minyak fololo bele mur bele gahara bele 30 kilogram hului rouke eke. <sup>40</sup> Yahudi ro miyae here nore mokayeke hului yae hokolo bee Yesusle here nore minyak fololo bele yae rileinyekoke, malo lenan ((roi bumane yaroikoyate)) yae ruleisiko mo, kaeiboke ewote. <sup>41</sup> Yesusre ohaline baikoke anuwaunge heke mbai honole. Nebei heke einye rukara bulei mbai neme hele waeiboke. Nebei anuwau roko mbai here no erasi mo. <sup>42</sup> Nebei

\* 19:24 19:24 Mazmur 22:18 † 19:36 19:36 Mazmur 34:20 ‡ 19:37 19:37 Zakharia 12:10

ya Yahudi ro miyae Sabat ya naeise mokainyehake yane nane merau nda ruka bulei nobene, Yesus na here no nebeinye raisike.

## 20

*Yesus Aunguke*

*(Mat. 28:1-8; Mrk. 16:1-8; Luk. 24:1-12)*

<sup>1</sup> Nebei mon ya mbai nendo na rene kaukau fele hu enaeikoi mo Maria Magdalena ruka buleise elewole. Na ijoko erele bae ruka buleise ahaeikoke ruka kaban wekainyele. <sup>2</sup> Maria Magdalena noro mo habeleweke Simon Petrus bele reyae Yohanes Yesus na moisa orowole ro hi kenare kowoufe kiyae bele baeikoise eke, hubayaendekoke mo weume, "Tuhan Nauwa raisike ruka buleisa rokate. Meyae isian makeinye Yesus aitasike ban."

<sup>3</sup> Nebeinye Petrusle rangkele ruka buleise ekende. <sup>4</sup> Meyae nanembaisa hak-endekokebe, reyae hasale helene Petrusre moi wokanale. Reyae na bere yae nebei ahe buleise ekale. <sup>5</sup> Reyae ei eyeisi, na moisa hebale. Ruka bulei eise erale bae malo lenan uware rulainyehike mo nebeinye honole. <sup>6</sup> Simon Petrus moisa meumeruke na hibi ruka bulei eise neke eweufike. Ijoko erele bae malo uware rulaisike mo nebeinye honole. <sup>7</sup> Nane merau nebei malo Yesus na yunne rinainyekoke anuwau nenaeni enene oleukoke eke honole. <sup>8</sup> Nebeisa Reyae ruka bulei eise eweufikale. Yeuboke rambunde ijoko erewale nane merau hila rabo halewale Yesus waleuboke. <sup>9</sup> (Nda heki koko nekaimke Allahle homofae einya Yesus nulu yo mahe yora annunde hele naeise elaikoke meyae namman isaeyeihoi mo kandemeke.)

<sup>10</sup> Nebeisa Petrusle rangkele nebei ruka buleisa bukendeboke, nekewande anuwaufe ewonde. <sup>11</sup> Nebeibe Maria Magdalena ruka bulei kelaeunge hebewole na rime bele rimewole. Rimene rimele ijoko ruka bulei eise uwa niheufike erele. <sup>12</sup> Malaikat bee hele malo keleumon mae hireikoke, Yesusle here nore raisike anuwaunge angken mae roiboakebe erekeumi, hi yun wene hi oro wene.

<sup>13</sup> Nebei malaikat bee yae hineinye, "Ana, rahene rimeyae?"

Maria yae malaikat beere weumi, "Raei Tuhanbe nda bulei eisa roukate. Reyae isian makeinye ainyeneke ban." <sup>14</sup> Nebei a mekaisa eleukokera Maria na moise euweke erele bae Yesusbe na moinye hebele, nebeibe oroihoi sele nebei Yesus.

<sup>15</sup> Yesus yae weunge, "Ana, rahene weyae rimeyae? Ndebe weyae baenae?"

Maria yae u bene nekewainye heke kayaa ro yae eleukokene weunge, "Arai, weyae nda anuwaufa here no rokae a hine eitaufikaena, rare wise makeinye weyae eungenekae. Reyae nebei anuwaufa eitoufele."

<sup>16</sup> Yesus yae weunge, "Maria."

Na ro yae roungebokene Maria euweke Yesusre Ibrani afaeu wae weunge, "Rabuni!" (Na mekai "isaei hebaen bele ro".)

<sup>17</sup> Yesus yae weunge, "Rare me ikileisemae ba, rabuhine ban Reyae Ako Allahle bokore namman einye. Nebeibe Raei aka baeke wa bokore ele mo nda wanen mae weumile, 'Raei Maeko mai Arai, Raei Allah mai Allahle bokore erelere.' "

<sup>18</sup> Nebeisa Maria Magdalena eke, na moisa orowate yore weumi, "Reyae aei Tuhan erekanale." Nane merau Yesus yae ukeunge a nare weumikoke.

<sup>19</sup> Nebei mon ya mbai nendo be baheuboke yae Yesus na moisa orowate yo imae mbainye arileufike. Yahudi yun-jun fene, na imaena romau nanemene ahunaikoke. Nebei hee yae Yesus na nolone meufebenguke weumi, "Rei mai foi moi mai kena une kombe." <sup>20</sup> Na me bele na kelengke belene keleumi. Na moisa orowate holona naei Tuhan erekainyelene, rei mai sele kate.

<sup>21</sup> Roko bee nendo Yesus a weumi, "Rei mai foi moi mai kena une kombe. Maeko yae ukeufe mekale wanen nebei sului mbai Reyae mare ufembe embere." <sup>22</sup> Nebeisa eufou mauwoumi wa weumi, "Allahlena Roh yaroungko. <sup>23</sup> Mayae ro miyae naei u mekai beko u benera emmihanembe, Allah nebei sului mbai faeinyemmile. Ro miyae naei u mekai beko mayae u benera ehaneinya, Allah nebei sului mbai efaeinyeihoi."

<sup>24</sup> Tomas nane merau Didimus yae uwainye kiyae me bee oro nen bee bele Yesus na moisa orowate yo na hi niyae. Yesus meke hee hiwa yo arilaisike ya Tomas nangkele ban. <sup>25</sup> Nebei yo yae Tomasre wainye, "Meyae Tuhande ijoko eranneboke."

Nebeibe Tomas weumi, "Reyae namman na mena paku nou ereiboinya, na mena paku bulune raei me eneyeinya, nane merau na kelengke bulune me eneyeinya, reyae na helere eleikoi sele."

<sup>26</sup> Mon mbai nekaikoke mo, Yesus na moisa orowate yo benen nebei imae mbainye Tomas nangkele yae arilaisike. Romau nanemene ahunaikoke hororebe benen Yesus

na nolone meufebengukera ane melaeyeumi, “Rei mai foi moi mai kena une kombe.”  
<sup>27</sup> Nebeisa Yesus yae Tomasre weunge, “Nda Raei me niyae ereibo, waei me kala-kala neinye, nane merau waei me kala-kala kelengkera neinye. Nebei nibi yaere weyae ameyae yae elei, na hele yae mo elele.”

<sup>28</sup> Tomas yae Yesusre weunge, “Raei Tuhan, Raei Allah.”

<sup>29</sup> Yesus yae Tomasre weunge, “Rare erekaeraene weyae na hele yae eleukokae. Ro miyae namman ereiboibe nebeibe na hele yae enayelende yo, onomi foka yae hubanainyende.”

<sup>30</sup> Yesus na moisa orowate yo bene rambun emere-emere helen mokoweke, erayeke nda homo molandekokene omoloikoi. <sup>31</sup> Yesus Allah yae oro umaufe heraweungeboke Wali Ondofolo Kiyae nane merau Allahle Kelu mayae na hele yae elembe naeise, nane merau Nare hila rabo halennele yae mayae wali neme nekembe naeise, nda rambun yaeibo ke kayeero hiwa nda homone moloukokale.

## 21

### *Yesus Benen Na Uwa Yakauboke*

<sup>1</sup> Mainyekeukoke mo, meyae na moisa orowande yore roko hibe Tiberias bukoba habalane Yesus Na uwa yakaumibo ke nda wanen. <sup>2</sup> Ya mbai nda yo arilande hiki nekande: Simon Petrus, Tomas Didimus yae wainye kiyae, Nataniel Kana yona Galilea kanine, Zebedeusle fa-fa, Yesus na moisa orowate ro hi, reyae Yohanes. <sup>3</sup> Petrus yae weume, “Reyae kare baerendere.”

Meyae hiwa yae wanne, “Maengkele hakomakondere.” Kaisa andehaweuboke awandake. Nebeibe reniai koko baendemeki ka mbai sambai (efoisi mo) ikileiboi.

<sup>4</sup> Hu inyukui orowole yae, erewannele Yesus buhaeinye meufebenguke, nebeibe meyae isian nebei kiyae Yesus.

<sup>5</sup> Yesus yae weume, “Ei fa-fa, mayae ka bele?”

Meyae wanne, “U hele ya.”

<sup>6</sup> Yesus yae weume, “Ma kai meube reufire yae ma wau womo. Mayae ka bele yembombe.” Meyae na wau kai meube reufire wokande. Yobomabondere na hului ban, rabuhine ban ka helen selene.

<sup>7</sup> Reyae Yesus kena helere koufe kiyae yae Petrusre wanale, “Ndi aei Tuhan.” Petrus ndi naei Tuhan a boroubo ke hee bae, malo mbai kulaubokene nebei malore hireukoke honoungehike buna. <sup>8</sup> Meyae Yesus na moisa orowande hiwa yo kaisa nda wau ka yae maemae koukoke bele Petrusle moisa ohore yobandemaekae. Nebei ijen ohora 100 meter hului mo. <sup>9</sup> Meyae kaisa akowande hee ijoko erande isen ranne ka bele feu bele honate.

<sup>10</sup> Yesus yae maere weume, “Mainya ka manemfa ikilaukoke bele hiwa ndare yarongko mem ba.”

<sup>11</sup> Simon Petrus kainye eweufileukoke. Na wau ka kaban-kaban maemae koukokeri mo ohore yae yoboubo ke meke. Nanemene 153 hele. Nebei helen suluike na wau ekaneikoi. <sup>12</sup> Yesus yae weume, “Mem, eraman memane.” Na moisa orowande yo nolona hiwa kena kowande nda are hinemansinde, “Weyae nde?” Nebeibe na hului ban. Rabuhine ban meyae maesaei nebei Kiyae na hele aei Tuhan. <sup>13</sup> Nebeisa Yesus mai bokore eungakeufike feu bele ka bele yarowole wahewoume. <sup>14</sup> Yesus here nolora aungunukera nda roko name nendobe na moisa orowande yore uwa yakaumibo ke.

<sup>15</sup> Meyae eraman anandekokera Yesus yae Simon Petrusre hineunge, “Simon, Yohanesle kelu, waei kena buhae emekai bele Rare haerae nda yora?”

Petrus yae weunge, “Na hele Tuhan, Weyae waeisaei reyae Ware kena buhae haewale.”

Yesus yae weunge, “Raei obo yoku domba kelu u mekai wanen ro miyaere raman yeumile.”

<sup>16</sup> Yesus roko bee nendobe Petrusre hineunge, “Simon Yohanesle kelu, weyae Rare kena buhae emekai bele haerae?”

Petrus yae weunge, “Na hele Tuhan, Weyae waeisaei reyae Ware kena buhae haewale.”

Yesus yae weunge, “Raei domba u mekai wanen ro miyaere hole moloumiyende.”

<sup>17</sup> Yesus roko name nendobe Petrusre hineunge, “Simon Yohanesle kelu, weyae Rare kena buhae haerae?”

Yesus nebei a ma roko name nendo hineungene, Petrus kena beko hele hubaunge. Petrus yae weunge, “Tuhan, nanemene waeisaei bangsa mo. Reyae Ware kena buhae haewale naeise waeisaei.”



Yesus yae weunge, “Raei domba u mekai wanen ro miyaere raman yeumile. <sup>18</sup> Reyae na helebe wawale, hokolo fa nekewoyae hee wa yolu ha wenaiejae ikilewoyae nane merau ele mele makeise makeise waei kena hului yae eyewoyae. Nebeibe rorele meuyeubonde hee hiwa yore wa me neumiyende ha rinenayeikote, weyae kenare okoi anuwauye yaungayeisote embe.” <sup>19</sup> Petrus rahe ma yae enserendene Allahre hili ennehebende abe Yesus isaeyeungeboke. Nebeisa Yesus yae Petrusre weunge, “Raei moisa hakoibo.”

<sup>20</sup> Petrus na moise weke bae ereunge reyae, Yesus kena buhaere heufe kiyae, na moinye hakoubokale. (Reyae nane merau huae eramanne anewande heene Yesusle uwane baraubokale, are hineunghikale, “Nde yae Ware kelai nende?”) <sup>21</sup> Rare erekeufene Petrus yae Yesusre hineunge, “Tuhan, rahe ma yae nauware enjembonde?”

<sup>22</sup> Yesus yae weunge, “Reyae kena kale neyae na wali mo nekenende Reyae merele hene era, nebei wangkele elakonde a ban. Nebeibe weyae Raei moisa hakoisobo.” <sup>23</sup> Nebei a eleukoche Yesusle einye aka baeke holo nolone reyae eherei mo nekerele a eungeyoboukoke. Yesus yae nebei mekaibe eleukoke banbe, nebeibe nda a wanende Petrusre ukeunge, “Reyae kena kale na wali mo nekeube merele era, nebei waei a ban.”

<sup>24</sup> Reyae niyae, nebei bewate rambunde huweukokale nane merau moloukokale. Meyae maeisaei nda a eleukokale na hele.

<sup>25</sup> Yesus yae mahi-mahi mokowole, na helen omoloikoi. Nanemene mokoukoke na hubara rawandeboube mbemba mbemba mandemolokoube yae, reyae hubanale nda homo moloukoke yoni-yoni hononaterere nda kani kela anuwau ban yeuboube.

## YESUSLE ABU AKO NAEI AHUBA

<sup>1-2</sup> Onomi foka Teofilus, reyae ((Lukas)) na bere ware homofae mbaise moloukokale ikawale kiyae. Nebei einye Yesu Na me u meke mokowole bele Na a faeu meke kelewoumi bele huba raweubokera meke Allah yae surgare raneuweke iwole yane nemene yakaukokawale. Namman surgare ei yae, Na abu ako eleuko ke yo na me u mokonayende naei a usaei wasaei Allahle Roh walora keleumikoke baeufoke. <sup>3</sup> Neyae na hele waleubokere kelemibondere, hereke heera ya rorele u bee Na abu akore roko yae roko yae Nauwa yakaumikoke. Nebei mon mae Naei me kelee u keleene orulenaibonde nekenate ro miyae holona naei are Yesu kelewoumi. <sup>4</sup> Ya mbai nangkele ramanne anewate mo, Yesu nda a ukeumi, "Yerusalem yora kulun ewei ei. Nebeibe Allah are heteungekoke ((Roh)) inyembere mayae rakembe, nebei Roh mbai Reyae bere ukamale. <sup>5</sup> Bere Yohanes mare bu yae kongkokembe, nekemakonde ya heki ban mo, Allah mare Naei Roh yae konengkombe."

### *Yesu Yo Bumare Raneuweke Iwole*

<sup>6</sup> Yesu Na abu ako bele nanembainye arileufike nekate mo, Nare hinainye, "Tuhan, nda hee yae Weyae Israel naei yo waku benen aungenundere?"

<sup>7</sup> Nebeibe Yesu yae weumi, "Nebei Maekole isaei ya, mayae isaeyei boi sului. Nebei ya bele hu bele Maeko Nenaiejae Nelae wake hului yae merau raungehike." <sup>8</sup> Nebeibe Allahle Roh mai uwane anembombe hee mayae nemene elae rowembe. Mayae Raei mekai ma nekale naei are yakammiyembe Yerusalem yora, Yudea kani nemene, nane merau Samaria kanira embe nda kani kela na hubane haeyne ennehallengkombe. <sup>9</sup> Nebei ara weumikoke baeufoke mo, Na abu ako naei bene Yesu raneuweke iwolene, kanewainye mo, mangko yae meumiaheukoke.

<sup>10</sup> Yesu kaeiboke yelene namman kanewainye bele, ro bee na malo kelemun mae hirekoke na abu ako bokone mejakaiboke. <sup>11</sup> Hokolo bee yae weimi, "Ae, Galilea kanina ro miyae, rahene nebeyne hebaube mai ijoko yakure mo kanaube? Nane Yesu mbai mayae ijokore eraunge surgare mai nolora raneuweke ele wanen mbai Neyae benen bukensinde mende."

### *Matus Yudasle Anuwaufe Mokondere Roukate*

<sup>12</sup> Nebeisa nane yo Zaitun mokora baeiboke Yerusalem yore ewate. Nebei moko na ahau honole Yerusalem na noro bele eyewate. <sup>13</sup> Yerusalemde okate mo, nekewate imae bumana yowane yaeikiteke. Nebeyne arileufike ro nda niyae: Petrus, Yohanes, Yakobus, Andreas, Filipus, Tomas, Bartolomeus, Matus, Yakobus Alfeusle kelu, Simon (Zelot yae kaenainye kiyae), Yudas Yakobusle fa kayee. <sup>14</sup> Miyae maengke na hiwa yo bele Maria Yesu nenake nane merau Yesu naubake wa bele nemene Allahre ebelire bonainyelere nanembainye arileisiyele bainye.

<sup>15</sup> Ya mbai mewarileufike nekewate mo, (ro miyae Yesu hila rabo halewainye yo rorele u mehine mbai bele (120) hului) Petrus are elendere aunguke, <sup>16</sup> weumi, "Aka naei baeke naei, Allahle homofaena molowate a na bangka mo na hului benate hele. Na berei Allahle Roh yae Daudle euwara Yudas yae bene nembonde Yesu ikilenaibonde naeise a raufike. <sup>17</sup> Yudas aei holo mbainye orowande, neyae aengkele mbainye kaliare mokowande."

<sup>18</sup> Nda Yudas kelaise neuboke roi yae kani mbai rouke. Nebei anuwaunge bumara ruke hereke, na yarele kayeukoke, na kabuya nemene maibaleke. <sup>19</sup> Yerusalem yona ro miyae nemene nebei a naeisaei bangka mone, naei afaeu wae nebei anuwau ro bainyehoke, "Akeldama" na mekai "Ha Kani."

<sup>20</sup> Petrus yae weumi, "Mazmur homofaene nda a moloukoke, 'Ninae lon, naei nekele anuwau aku ban nau ban yeubo.

Hi yae ha yae nebei anuwaunge enekeijae.\*"

"Nane merau nda a hi moloukoke,

'Ninae lon naei angken nuwei hi yae yennuwembonde.†"

<sup>21-22</sup> "Nebeyne ro mbai roumale aengkele mbainye Yesu herekera waleuboke naei are humamiyendere. Nebei ro Yohanes bure kowoumi heera meke Yesu aei nolora raneuweke iwole heene, makeise-makeise Yesu orowekene aengkele homo mbainye hakoumeboka orandeke."

\* 1:20 1:20a Mazmur 69:25 † 1:20 1:20b Mazmur 109:8

<sup>23</sup> Nebeinye arilewole yo nolora ro bee yaraikoke. Ro hi ro na ro Yusuf nane merau Barsabas yae weyainye (Yustus yae kaeneyainye), na hi ro Matias. <sup>24-25</sup> Nebeisa Allahre nda ebeli bainyehike, "Tuhan, ro naei miyae naei kena u ei Weyae waeisaei bangka mo. Waei abu ako mande homora Yudas naei angken nuwei nukеuboke eufereke. Nebeinye Ware bayete, Yudas na u mekai beko mokouboke huluinye ennekende anuwaufe eke a bulure mokondere nda ro bee yarandekokera ro hi eleuboke kiyae maere keleimebo." <sup>26</sup> Nebeisa hokolo bee naei ro oye nihaeiboke Matiaslene ruke. Nebeinye Matiasre roukate Yesusle abu akore me bee oro nen mbai belere hakoumiboke.

## 2

### *Allahle Roh Oke Ya*

<sup>1</sup> Meke Yahudi naei ya kaban Pentakosta meuyeuboke hee, Yesusre hila rabore halaeinye ro miyae nanemene anuwau mbainye mo arilewole. (Nebei ya Yesus aungukera ya rorele u bee mehine mbai bele (46) hului yeuboke.) <sup>2</sup> Mewarileufike bele yakura borate alu baeijo kulun wanen neke owole. Nekate imae nebei kulun mae kili haka aunguke hebele. <sup>3</sup> Erewate bae, i faeu wanen bolaiبوke arilewole yo naei uwa ranne fayеke hebayeke. <sup>4</sup> Nebei ro miyae nemene Allahle Roh yae mekai aumibokera afaeu mahi-mahi huba rawaiبوke elewate.

<sup>5</sup> Nebei hee Yahudi ro miyae Allahle are hubara haeisa yanewainye holona kani hinehine nekayeke yo nemene Yerusalem yone nekewate. <sup>6</sup> Nebei kulun oke borowatene, ro miyae helen sele eleumeke. Yesusre hila rabo halaeinye yo naei afaeu wae elewate eleumeke yo borowatene, nebei yo onei-onei yae onewate, <sup>7</sup> fa yae bowate, ijoko kelei-kelei mo kelewate elate, "Nda Galilea kanina ro bangka mo, nebeibe afaeu mahi-mahi yae elate! <sup>8</sup> Rahe mabe yeubokene meyae borammile maei mewande yo yoni-yoni naei afaeu wae elate? <sup>9</sup> Eyae ro miyae nda kanira mewande: hiwa Partiar, Mediara, Elamda, Mesopotamiara, Yudeara, Kapadokiara, Pontusra, Asiar, <sup>10</sup> Frigiar, Pamfiliara, Mesirra, Libia kani Kirene kelaeunga; aei nolora hiwa Romara. <sup>11</sup> Hiwa Yahudi ro miyae, hiwa yo hi ro miyaebe Yahudi naei agamane kate yo, hiwa Kreta yokobara mewate, hiwa Arab kanira mewate. Nebei yo Allah rambun emere-emere mokole naei a aei afaeunge-afaeunge huwate, na yaka hele borande." <sup>12</sup> Borowate yo onei-onei yae onewate nane merau fa yae bowate yae naeise naeise hinata, "Nda naei sele naendaе wanan?"

<sup>13</sup> Nebeibe hiwa yo a wewe wanen mae kaimi elate, "Ae, anggur bu anaisike yae nekeumine yun yambi-yambi kate!"

### *Petrus A Usaei Uwoumi*

<sup>14</sup> Nebei a wewe kaimi a borokatene, Petrus nane merau abu ako me bee oro nen mbai bele afae yae hebaiبوke. Petrus yae huba raweuboke nebeinye arilewole ro miyaere a kaban don mae kaenele weumi, "Aka naei baeke naei Yahudi ro miyae nane merau Yerusalemne nekaube yo nemene, nda a isaeisembombere mangkaei foi-foi yae boron. <sup>15</sup> Nda yo yun yambi-yambi okoi, mai u benere nekayembe wanen ban. Rabuhine ban nda na rene hele, menemfa fere hukai mehine kelibe yeuboke. <sup>16</sup> Nendahina Allahle yendo kayaalo Yoel yae ndane baete naeise nda a moloukoke:

<sup>17</sup> 'Allah yae a weume,

moinya yane Raei Roh ro miyaere isemile.

Mai kelu omi kelune maengkene Reyae ufemile a faeu ungaimile.

Mai ro hokolo fa benate rambunde ijoko ka yae raneremibonde enairende.

Mai rorele yo benate rambunde Reyae isemile imene naline enaisononde.

<sup>18</sup> Nebei ya, Raei yebaei bubaei kelune maengkene Raei Roh aremibonde.

Reyae ufemile a faeu ungaimile.

<sup>19</sup> Yakune Reyae iwau mahi-mahi keleremile

nane merau iwau mahi-mahi hele Reyae nda kani kelane mokorele benate,

ha bele, i bele, nane merau ongkou na kobane-kobane.

<sup>20</sup> Hu wende ouben kika yembonde,

oko wende ha hasai wanen yembonde.

Tuhan Naei ya kaban nane merau Naei one hengko hehe bele kitennebonde ya namman emei hee yae

nebei iwau yoni-yoni benate.

<sup>21</sup> Nde yae Tuhan hole ennemolombondere riyennehindena,

wali hena bona endowende.'

<sup>22</sup> "Aka naei baeke naei Israel ro miyae nda wamale are boron, Allah na yaka hele yakambokembe, Yesus Nasaret yona Ro Naei bokore ukeunge eke. Mayae maisaei Allah Naei walora rambun emere-emere mokoimeyеle nane merau iwau mahi-mahire

keleimeyele. <sup>23</sup> Allah merau raungehike huluinye be hineuboke, Yesus mai me einye kinyeuboke. Mayae na hibi ro miyae nansau bele hakayengkokembe ohali ranne hauboke. <sup>24</sup> Nebeibe herewate yo nolora Allah yae waleungeboke. Neyae herera beko hubaungekoke nebeibe Allah raneungejeke, rabuhine ban Neyae here yae eheraweiboi ohono Kiyae. <sup>25</sup> Yesus yae Allahre a eleukoke naeise Ondofolo Kaban Daud nda a moloukoke,

'Reyae erekanale

Tuhan Allah Raei bene mo nekeimeyele.

Raei meube reufine hebelene,

Rare ekuseikoi emaheikoi.

<sup>26-27</sup> Weyae Rare nendon mae nulu yo mahe yone enukeiboi.

Reyae Waei eleuboke wekarae Kiyaele u melen u ha nendon mae kakare bendere Weyae ewaeisi.

Nebei aere ne Raei kena roweufehike.

Reyae rabo elae halerende

Weyae eleukokae a huluinye mokowende.

<sup>28</sup> Weyae Rare wali nibi naei

na helebe keleufebokae.

Weyae Rangkele mbainye orondene

Raei kena roweufiyefe.'

<sup>29</sup> "Aka naei baeke naei, aei yobe Daud naei uwa naeise na yaka lon mae reyae hufembe. Neyae hereke aimoloufakae. Na bulei aei nolone naman honoimeyele meke mana yane. <sup>30</sup> Daud neyae yendo kayaalo, nane merau naeisaei Allah a holo yae heteungekoke naei orona mena ro hi erengkonde Daudle yo anuwaufe yennuwembonde.

<sup>31</sup> Allah rahebe mokongkonde neyae naeisaei nekele. Nebei aere ne Daud nendahina nda a nuleungekoke elele, Allah Wali Ondofolo herendera nulu yo mahe yone Nare enukeiboi nane merau Naei u melen u ha nendon mae kanine beko ebei. <sup>32</sup> Nda Yesus mbai herekerabe Allah yae waleungeboke nebei rambun-rambun bewatere nemene enaei ijoko yae erewande. <sup>33</sup> Nda hee Allah Naei kendan wameran meube reufine na bumane haungeboke. Allah are heteungekoke hului Naei Roh ikeunge. Aka naei baeke naei, mana mayae boraube nane merau eraube rambun, nebei Roh mbaibe mana Yesus yae maei uwane kiteumeboke. <sup>34</sup> Daud surgare naei uwa ei nebeibe Daud yae eleukoke,

'Allah yae raei Tuhande weunge:

Raei meube reufine meinyuweibo,

<sup>35</sup> merele wa yokejore nemene mokoremikonde

woro keleere mo menayorulembonde.'

<sup>36</sup> "Nebei wanan mayae Israel ro miyae nda are isaeyembombe, Yesus mayae ohaline baukoke Kiyae mbaibe Allah yae Tuhande raneuweke nane merau Wali Ondofolore oro umau heraungeboke."

<sup>37</sup> Nebeinye hebate ro miyae nda a borokatene, na kena beko bele hubawainye. Petrus bele abu ako hiwa belere hinewaimi, "Aka naei baeke naei, rahebe meyae momabonde?"

<sup>38</sup> Petrus yae weumi, "Aka naei baeke naei, Allah yae mai beko bakora faeinyenembonde naeise, nulu kenembombe, Yesus Wali Ondofolole Ro yae bu konayembe. Allahle Roh mare ei anembombe hele. <sup>39</sup> Allah nebei a heteungekoke mai foi naeise, mai orona mena foi naeise, nane merau ahaunge nekate ro miyae Allah yae emmikaenngkonde yo foi naeise."

<sup>40</sup> Petrus nebei a wanende huwoumira benen nda a usaei weumiyoke, "Allahlena ehee bukulu nda hokolo me hilae u hilaere kate yo naei ranne wokera mauwa enfaembombe."

<sup>41</sup> Ro miyae helen sele Petrus yae huwoumi are na hele yae elewate, hila rabo halewate, na hibi bu kaimikoke. Ro miyae hilare rabore halewate yo helen sele bewole. Nebei ya mo ro miyae nemene 3.000 baraikoke.

<sup>42</sup> Menemfa hila rabo halewate ro miyae Yesus Naei abu ako kelewaima a usaei uwa nihaeinyehike yae boraimake nane merau homo mbainye oraimake wali mbainye nekaimake. Tuhande bene nekeisi-nekeisi raman bulau mokaimake nane merau Allahre ebeli bainyemeke. <sup>43</sup> Ro miyae nemene fomene na kena u einye yei yae kaimake nane merau roko helen Yesus Naei abu ako rambun emere-emere mokowate. <sup>44</sup> Hila rabore halaete yo na hibi riya mbainye mo arilewole, rambun-rambun naei yae eleikoi, nemenaese bewate. <sup>45</sup> Rambun-rambun, keren nale, roi naise hewate. Nebei roi ro miyae nemene na kalore molowoumi huluinye wahewaimi. <sup>46</sup> Na yane baei Allahre ei mom-mom imae na kaban sele kiyaele imaehoung mo ongko riya nekayeke. Na kena nime kena haba yae nane merau na rei mai yae imae hira-hira raman bulau anayeke.

<sup>47</sup> Allahre buma kaewainye, nane merau ro miyae nemene nare kena hele kowaimi. Na yane baei, Allah wali holere molowoumle ro miyae holonare barawoumine.

### 3

#### *Ro Mbai Noro Nimainyekoke Honoweke Onomi Rouke*

<sup>1</sup> Ya mbai nekewate hu oke hujoko namene, ebeli boi-boi hee mo, Petrusle, Yohanesle, Allahre ei mom-mom imae na kaban sele kiyaeere ewote. <sup>2</sup> Romau mbai na ro, "Buhi Wahi". Nebeinye ro mbai na hongkatera noro nimainyekoke honowekebe. Na yane baei Allahre ei mom-mom mate yore a ri-tise riyemmile naeise, hiwa yo yae kaeiboyate mate, nebei ijenne eisaiboyainye. <sup>3</sup> Petrusle Yohanesle Allahre ei mom-mom imaeere meneyembondere erekumi mo, nebei kiyae hokolo beere erabuhire inyenyelere riwoumi. <sup>4</sup> Hokolo bee na ijoko mokoiboke ereinyekoke mo, Petrus yae weunge, "Maere ereime!" <sup>5</sup> Nebei ro hokolo beere ereumi, na kena eisa elele rambun hire inyeiselere era.

<sup>6</sup> Nebeibe Petrus yae weunge, "Reyae roi ban hele. Nebeibe raei mena honole rambun ware isetere. Yesus, Nasaret kanina ro, Wali Ondofolo Naei Ro yae ainyu oroye!"

<sup>7</sup> Petrus na me meube reuffra ikileungeboke bae nane ro ewaunguke. Nebei heera noro bele oro hakalu bele elae halae yaeiboke. <sup>8</sup> Nebeisa honoisi yae honoungehike yeufebekoke, ele mele, bohire ele bohire mele kowole. Foi roukera Petrusle Yohanesle moisa hakoumiboke Allahre ei mom-mom imaere ayeuboke, aloungekoke ewole, honsihonsi koweke, Allahre buma koloungoke.

<sup>9</sup> Ro miyae erewainye nda ro oro aunguke orowole Allahre buma kaewoungue. <sup>10</sup> Ro miyae isaeyaeiboke elewate nda kiyae mbai Allahre ei mom-mom imae romau "Buhi Wahi" ne a ri-tise riyewole kiyae onomi rouke erewainyene, fa hele bowate.

#### *Allahre Ei Mom-Mom Imae Na Kaban Sele Kiyae Einye Petrus A Usaei Uwoumi*

<sup>11</sup> Nda ro Petrusle Yohaneslere hokoumiboke melae-melae beweke ikileukoke nebeinye obe mbai na ro "Salomole Obe" yae elate ijende. Hokolo name ekate bele ro miyae fa yae bowatene habeuwate ele yae naimiboke. <sup>12</sup> Petrus nebei yore erewoumi bae weumi, "Israel ro miyae yoni-yoni, rahene nda wanen mokandere mayae rambun eme hele yae elaube? Rahene ma ijoko maere mo ereyaumele? Mai u benera nekayembe nda rore maainya elae yae onomi ikannele. Na hele ban. <sup>13</sup> Aei yobe naei kamahe naei ei molowainye Allah, Abrahambe Allah, Ishakle Allah, Yakuble Allah, nebei Allah mbai meke na yebaei bubaei Yesusre buma kaeungeboke. Nebei Yesus mbaibe mayae hombombere kowaubene Pilatusre ikaungele. Pilatus hayennekondere mayae ahi yae elewaube. <sup>14</sup> Neyae Allah yae eleuboke wekeunge Kiyae nane merau wali himaloungboke Kiyaebe, nebeibe mayae Nare ahine. Pilatusre yoyae-yoyae molowaunge ro miyae hoi-soise howole robe ukaungele baleungekoke meukuke. <sup>15</sup> Ro miyae nemene naei wali no Kiyaeere mayae haubokaube, nebeibe menaei ijoko yae erewande nulu yo mahe yora Allah benen waleungeboke. <sup>16</sup> Nda ro eraunge Yesusle Ro einye hila rabo halaennele walora mai bene nda ro onomire rouke.

<sup>17</sup> "Aka naei baeke naei, reyae isaeyebokale mai ondofolo kose bele mangkele onewaube handawaubene Yesusre beko mokowaunge. <sup>18</sup> Allah nendahina yenjo kayaayo naei euwara are nuleungekoke Wali Ondofolo beko hubannekonde hele. Mai me u mokowaube walora Allah Naei a na ijenne maijeuboke. <sup>19-20</sup> Allah mai beko bakore faeinyenombombe naeise, nane merau wali rei mai bele inyemile naeise, nane merau nendahina a koloukoke hului Yesus Wali Ondofolo mai bokore Allah yae wennele mende naeise, mayae Israel ro miyae beko bakora nulu kenembombe nane merau Allahlere be bemo. <sup>21</sup> Yesus surgane mo nekenfonde, Allahle yenjo kayaayo u mekai yolo-yolo bele yo naei euwara nendahina a heteungekoke huluinye Allah nemene fomene neme mokonnebondera Yesus bukensinde mende. <sup>22</sup> Musa nane merau Yesusle naeise a eleukoke, 'Allah yendo kayaalo mbai raeinya wanen ro hi mai nolora ranenjende. Nebei yendo kayaalole a menelende nemene nou hembu. <sup>23</sup> Nda yendo kayaalo yae menelende a oboroi kiyae, Allahle homone mate yo nolora hukanainyehinde.'\*

<sup>24</sup> "Allahle yenjo kayaayo Semuelle heera benen na moisa yakaiiboke yo nemene nda heena mekannekande Yesus Wali Ondofolole abe nulainyemeke. <sup>25</sup> Allahle yenjo kayaayo naei a nulainyemeke nane merau aei yobe naei kamahe naeise Allah are heteumikoke, mayae Israel ro miyae foi naeise. Allah aei yobe Abrahambe nda wanen mae ukeunge, 'Waei orona mena walora nda kani kelana ro miyae nemene onomi foka enaiyaronde.' <sup>26</sup> Allah Na Yebaei Bubaei Yesus Wali Ondofolore oro umau

\* 3:23 3:23 Ulangan 18:15, 18-19

heraweungeboke heera, na bemere ukeunge mayae Israel ro miyae bokore meke mai u mekai beko mokoimeyaungera nulu kenembe walora onomi foka yae ei hawenembe naeise.”

## 4

### *Petrusle Yohaneslere Ikilaikoke*

<sup>1</sup> Petrusle Yohanesle ro miyae arilewolere namman ane weimi yae, imam-imam bele Allahre ei mom-mom imae na kaban sele kiyae kayaare hebate na yun bele Saduki ro miyae bele hokolo bee naei bokore mekate. <sup>2</sup> Petrusle Yohanesle yae kelewoimi Yesus herekera aungkene, na yaka yeuboke Yesusle walora ro miyae herate yo walenaibonde. Nebeise mekate yo na kena ikele, ki yae bewate. <sup>3</sup> Nebei yo hokolo beere ikilaikoke ekate kawa einye haeimikoke. Be baheubokene, hokolo bee na nebeinye ahaeimikoke hebeimeke ya heuboke. <sup>4</sup> Nebeibe ro miyae helen hokolo bee yae kelewoimi a borowate yo na hele yae elewate. Nane merau hila rabo halewate yo holona ro yoni-yoni baraikoke, nemene 5.000 hului yeuboke.

<sup>5</sup> Ya heuboke mo, Yahudi yun-jun bele Musale walora wali heere foloukoke homofaere isaeyaeiboke kelaeimi yo bele Yerusalemne riya arileufike nekwate. <sup>6</sup> Hanas imam kabande nebei hee nekwole, Kayafas yae, Yohanes yae, Aleksander yae, nane merau imam kaban Hanasle imae mbainya nekate yo bele nane merau hakaimiboke. <sup>7</sup> Petrusle Yohanesle nebei yo bere yawaimiboke ekete wa hinewaimi, “Ndele elae yae, ndele ro yae ndi ro na u nimainyekoke kiyaeere mayae onomi ikeunge?”

<sup>8</sup> Petrus, Allahle Roh yae aungebokene weumi, “Mayae Yahudi yun-jun arilauufike, <sup>9</sup> mayae nda ro kena nime haba yae foi mokenneboke nane merau onomi naendae wanen mae rouke are maere hinemmehimberene mana ya ndare yawaumeboke mekende? <sup>10</sup> Mayae nane merau Israel ro miyae yoni-yoni nda a mayae isaeyembombere borombo: Nebei Nasaret na ro Yesus Wali Ondofolo Kiyaele ro yae nda ro onomi fokare rouke mana mai bene meke hebele eraunge. Mayae nebei Yesusre ohaline baukoke, nebeibe Allah benen waleungeboke. <sup>11</sup> Nda Yesus mbaibe homofae yolo-yolone molaikoke,

‘Mayae imae hei-seise isaei hebaen bele yo na hului banne wokate rukabe

Allah yae nebei imae naei berei rukare mokouboke.\*”

<sup>12</sup> Nda kani kela ewole mewole ro miyaere wali hena bona yemmile naei elae Allah yae Yesusle me einye kinyewoungwe, nebei wanen elae hire hare eyei.”

<sup>13</sup> Hokolo bee buhae ohokoiboi ban mae a na bene-bene uwoiminye nane merau neyae isaei isaeyaeikoi ro hosorone, nebei yoyo koseyo fa yae bowate, a nou hewate, nda ro bee Yesusle moisa orowate yo. <sup>14</sup> Onomire rouke ro bele Petrusle Yohanes bele nanembainye hebatene, nebeinye yoyo koseyo a ban faeu ban yaeboke. <sup>15</sup> Hokolo name nebei riyare nekate obe eisa ukaimile aibaleke. Nebeisa na mo-mo riyane arileufike, naeise naeise elate, <sup>16</sup> “Naendae wanen mae nda beere mokomambondere? Amere eleikoi sului. Eya nemene aeisaei bangsa mo nane merau Yerusalemna ro miyae nemene isaeyaeiboke hokolo bee yae rambun mbai eme hele mokoiboke. <sup>17</sup> Nda abe heraeinyaimile bele, men, hokolo beere a romou han mae komamikonde benen ro miyae hiware Yesusle ro ehuweijae hele.”

<sup>18</sup> Petrusle Yohanesle benen ukaimile eise meyeuboke, a elae yae waimi, “Benen Yesusle ro eitoyi yae nane merau ekeleyijae!” <sup>19</sup> Nebeibe hokolo bee yae beiboke weimi, “Menaeijae hului rannehi, Allahle ro be ro yoinye mainya a waume bele Allah a weume bele, makeibe meyae hakakonde? <sup>20</sup> Rabuhine ban menaei ijoko yae erewonde bele angkaei yae borowonde bele rambunde naendae mekai yae eyelei anekendere?”

<sup>21</sup> Hokolo beere a huku-huku kowaimi wa benen hayaemikoke. Nebei yoyo koseyo hokolo beere ehee bukulure inyaimilere nibi ban erewate. Rabuhine ban ro mbai onomi roukene ro miyae helen sele Allahre buma kaewainye. <sup>22</sup> Onomire rouke kiyae na ralo yakama rorele u bee moi hayeukoke.

### *Hila Rabore Halewate Yo Allahre Ebeli Bowainye*

<sup>23</sup> Petrusle Yohanesle hayaemikokera homo mbainye orajeki yo bokore ekete, imam yun-jun bele Yahudi yoyo koseyo bele uwaimi a nemene huwoimi. <sup>24</sup> Hokolo bee yae elewote boraikokera nebei yo na kena mbai yae na a baluh wae Allahre ebeli bowainye, wainye, “Allah, kun wau bu yau neinya honate rambun-rambun Waei me yae mokowoyae. <sup>25</sup> Waei Roh yae Wa yebaei bubaei maei yobe Daudle euwara Weyae nda a elewoyae,

‘Rahene ro miyae na kanira-kanira

\* 4:11 4:11 Mazmur 118:22

aku ketele erabuhire eyeiboi mehinin mewalobe kolainye?

<sup>26</sup> Nda kanina kelana ondofolo yoni-yoni

felare relenainyelere mokoisa-mokoisa nekate,

ro miyae mere mokaimi yo mbainye mo arilele

Allahre nane merau Naei eleuboke Wali Ondofolore kerenainyekondere.<sup>†</sup>

<sup>27</sup> "Nda Daud eleukoke a wanenbe yeuboke. Nda yo einya ondofolo bee Herodesle Pontius Pilatusle nane merau Yahudi ro miyae ban bele Israel ro miyae bele nemene riya nekaikoke. Yesus, Waei yebaei bubaei yolo-yolo renden, Waei Wali Ondofolore eleubokae Kiyaeere bekore mokonainyebondere. <sup>28</sup> Neyae mokaiboke rambun nebei nemene Waei elae randa nane merau Waei are eleukokae huluinye yaeiboke. <sup>29</sup> Mana Allah Waei ijoko yae eramae maere a huku-huku kowaime. Meyae Waei yebaei bubaei Waei ako faekore huwemamiyendere maere be kaleimeha. <sup>30</sup> Allah Waei me neinye meu, Yesus, Waei yebaei bubaei nene waewae nekele Kiyaele Ro walora era yo buloo yo onomi yeumile, rambun emere-emere mokole."

<sup>31</sup> Allahre ebeli bainyehike mo, na nekate ijen oinyeu wae hinewole. Nebei yo arilewole nemene Allahle Roh yae maemae kounmikoke nane merau Allahle ako faekore buhae hokoiboi ban mae ro miyaere huwaimi.

### *Rambun Naeise Eleikoi*

<sup>32</sup> Nebei ro miyae hilare rabore halewate yo nemene na kena mbai u mbai. Nebei nolora hi yae naei rambun naei uwa mbai naei yae eleikoi. Nemene na mena-mena rambun honate nemena bangka mo. <sup>33</sup> Elae wake kaban sele nebei abu ako naei uwane keteumiboke. Nebei elae walora isaeyaeimiyeye, Tuhan Yesus herekera waleuboke. Allah nebei yore kena buhae kaban aere ban mae hewoumi. <sup>34</sup> Nebei nolora hi yae rambun kalo omoloiboi, rabuhine ban roko mbemba imae bele kani bele yo naei imae, kani, roi naise heiboyate na roise mo rowate mate <sup>35</sup> Yesus na abu ako naei bene raisiyaimi. Neyae hire-hire kalore molounge huluinye wahewaimi.

<sup>36</sup> Nebei sului mbai Yusuf, Lewile orona mena Siprus yokobana ro. Yesus na abu ako yae nare nane merau Barnabas yae kaenainyeke. ("Barnabas" na mekai "kena hara roroyeumi kiyae".) <sup>37</sup> Neyae nane merau naei kani roi naise heuboke. Nebei roi rouke meke nebei abu ako naei mene ikeumi.

## 5

### *Ananiasle Safirale*

<sup>1</sup> Ro hi na ro Ananias na miyae Safirale naei kani mbai roi naise heiboke. <sup>2</sup> Ananias kanina heiboke, na roibe bohi naei uwa naeise heraweuboke bohi rouke meke mere mokowaimi abu akore ikeumi. Nda wanen mokoubokere na miyae naeisaei.

<sup>3</sup> Nebeinye Petrus yae weunge, "Ananias, walobo yun meke waei kena ei nemene ikileuboke. Waei kanina heubokae roi waei kayee bele nunne raufikae. Weyae mehauwae Allahle Rohre ame-amebe beungekokae. <sup>4</sup> Roi naise eheiboi hee yae nebei kani waei. Meke naise heubokae heera nebei hului mbai roi waei. Waei kena eisa nebei merau beko helebe raungehikae. Rore miyaere baemae ban, Allahre weyae baenae!"

<sup>5</sup> Nebei ara boroukoke bae, Ananias ruke oke na hibi hereke. Ro miyae nebei iwaufe borowate yo buhae hele hokowoumi. <sup>6</sup> Nebeisa hokolo fa-fa mbemba mekate Ananias na nore mo malone rulaisike, nebeisa kaeiboke kanine aimoloufakae.

<sup>7</sup> Hujoko name hului nekaikoke mo, Ananias na miyae meweufige, yeuboke rambunde neyae isian. <sup>8</sup> Petrus yae riyeungehike, "Mana rare wise wa molo bele mai kanina heubokeubena roi naei kaban sului nda niyae?"

"Na hele, naei roi kaban sului niyae," Ananias na miyae yae elele.

<sup>9</sup> Nebeisa Petrus yae weunge, "Rahene mayae bee a mbainye eleukoke Allahle Rohre wabeunge? Ereimibo! Wa molole no moloisase ekate yo bukaiiboke romaunge hebate, benen ware kaenayeubote enatere."

<sup>10</sup> Petrus ane uwoung hee yae Ananias na miyae ruke oke noro kelene hereke. Nebei hokolo fa-fa mayeuboke erekainyele na no u yeuboke. Nebeisa kaeibokate ekate na molole kelaunge molaisakate. <sup>11</sup> Hila rabore halewate holona yo bele ro miyae hiwa nda iwau rilewolere angkaei borowate yo bele nemene buhae hele hokoumiboke kowate.

### *Yesusle Abu Ako Yae Rambun Emere-Emere Mokowate*

<sup>12</sup> Yesusle abu ako yae ro miyae nolone rambun emere-emere roko helen mokowate. Hila rabore halaete yo nemene na kena mbai yae Allahre ei mom-mom imaena "Salomole obe" nebeinye mo arileisiyate inyekewate. <sup>13</sup> Naendae wanen horore ro

<sup>†</sup> 4:26 4:26 Mazmur 2:1-2

miyae woke yo nda riyana yore hubara haesa yanewaimi, hiwa yo nebei holone enayembondere buhae yae hokowoumi. <sup>14</sup> Nebeibe Tuhan Yesusre hilare rabore halewainye yo rone miyaene emerei-emerei emerewole. <sup>15</sup> Petrus mende me ekatasinya, u alin fere nennebonde naeise, ro miyae era buloone kayeke yo na aka baeke yae na ijongku honson ranne kaewate nibi enene relewaimi honowate. <sup>16</sup> Yerusalem yo kaban honole enena fainya yo yoni-yonira ro miyae nekai hokowole. Nda ro miyae era buloone kayeke yo bele alo yae hawaimiyeke yo bele yawaimi mewate yo nemene onomi yarowate.

*Abu Akore Kawane Ahaeimikokera Maibaleke*

<sup>17</sup> Nebeisa imam kaban bele naei homone yaunge orowate Saduki holona yo bele kena hensen sele kowatene, me u mokonaibonde merau rainyehike <sup>18</sup> Yesusle abu ako riyana orowate yore ikilaiikoke, kawane ahaeimikoke. <sup>19</sup> Nebeibe reniai yae Allahle malaikat meke nebei kawa romau yoni-yoni raweukoke, nebeisa Yesusle abu akore mo nemene yaweumboke aibaleke. <sup>20</sup> Malaikat yae nebei abu akore weumi, "Eme, Allahre ei mom-mom imae na kaban sele kiyaena imaehoungue ensebembombe, Wali Ondofolore hila rabo enaiyehalende walora wali neme rowembe a faeu ro miyae helende huwemmile."

<sup>21</sup> Nebei abu ako malaikat yae ukeumi a huluinye hakaikoke, na rene kaukau fele ekate Allahre ei mom-mom imae na kaban sele kiyae na imaehoungue rore miyaere ekaikewaimi.

Nebei hee mbai, imam kaban bele naei homona yaunga orate yo bele ukaimile ekate. Yahudi yoyo koseyo (Yahudi yun-jun nemene) kaenaimikoke riyane arileufike nekewate yae felayore ukaimile kaware enate nebei abu akore yaungaimibonde na bere menatere. <sup>22</sup> Nebeibe felayo ekate bae, nebei kawa einye hebewate abu ako ehubayeiiko mo. Nda yo bukaiboke ekate riyane arileufike yore isaeyaeimiboke, <sup>23</sup> waimi, "Ekarande kawa romau ahunaikoke hului hebate. Kayaayo na romau bene hebate. Nebeibe kawa romau rawandeboke bae, nebei yo oloo." <sup>24</sup> Nebei Allahre ei mom-mom imaena kayaayo na yunde hebele kiyae bele imam yun-jun bele nda a borokatene bae, buhae yaraiboke na kena ura elate, "Rahe erabe benen menjembonde".

<sup>25</sup> Nebeisa mo ro mbai meke weumi, "Eren mayae kawane haeumikoke yo ndina, Allahre ei mom-mom imae na imaehoungue ekaisebate, benen ro miyaere ekaikelaeimi!"

<sup>26</sup> Nebeinye, Allahre ei mom-mom imae kayaare hebele yun na keleena felayo bele ekate, nebei abu ako yawaimiboke. Ro helen miyae helen ijokore raisike erate, nendon ruka yae nebei felayore hekelenaimile belene, nda kulunne nebei abu ako na mekai yae yawaimiboke.

<sup>27</sup> Imam kaban mae nebei abu ako na riyane a hinenaimikonde naeise, Yahudi yoyo koseyo bere yawaimiboke ekate. <sup>28</sup> Neyae weumi, "Nebei Ro kelaeumi meyae mare hee nekayembe. Nebeibe nda Yerusalem yo eise mainya a usaei yae eufureukoke. Mayae na hibi-hibi mo kelaeumi meyae nda Yesus Kiyare handeboke."

<sup>29</sup> Nebeibe Petrus bele abu ako hiwa yo bele waimi, "Meyae Allahre mo boromande hele, ro miyaere ban! <sup>30</sup> Yesus, mayae ohaline baukoke hereke Kiyae mbai, aei yobe naei kamahe naeite Allah yae benen waleungeboka. <sup>31</sup> Allah Naei meube me yae anuwau reufine raneujeke. Israel ro miyae naei beko bakora nulu kenaimile yore na beko bakora faeinyemmibonde naeise, Allah yae Naei Kelure nane merau Walilore raneujeke. <sup>32</sup> Meyae niyae, nebei a faeufe huweimeyande yo. Meyae nane merau Allahlena a weumi huluinye hakoyate ro miyaere Allah Naei Roh yeyeumi yae, nebei a faeufe huweimeyeumi."

<sup>33</sup> Yahudi yoyo koseyo arilewole yo nebei a borowatene, ikele hele kowate, nebei abu akore honaikondere merau kolowainye. <sup>34</sup> Nebeibe Farisi holona ro mbai nebei yoyo koseyo nekate riyana na ro Gamaliel, Musale walora wali heere foloukoke homofaere isaeyeboka kelaeimi holona ro bele ro. Neyae aunguke wa ukeumi, nebei abu ako ebi fere yaungaimibonde moinye enainyekende. <sup>35</sup> Nebeisa wa, riyana arileufike nekate yore weumi, "Aka naei baeke naei Israel ro miyae, nda yore mokommile me u bene foi yae nekenayengkomba. <sup>36</sup> Rabuhine ban, na bena hele ro mbai na ro Teudas elaeeyeboka meke, nauware kaewole. Ro miyae 400 hului nare hakainyekoke, nebeibe haiboka. Na moisa orowate yo here ware weuboka nane merau huba ban haei ban euweuboka. <sup>37</sup> Na heki ban mo, Yudas Galilea kanina ro yeuyakauboka ro holo mbai yaweumboka yo kelai yan kelai mokowate. Neyae nane merau haiboka, na moisa orowate yo here ware weuboka. <sup>38</sup> Nebei aerene reyae a usaei wamale, rabuhi-rabuhi nda ro miyaere omokojae, hayemmikonde. Naei a kelaeimi ro miyae naeinyana, rabuhi ban yembonde nanaei nundembonde. <sup>39</sup> Naei a kelaeimi Allahlena, mayae nare hun eraisi sului. Nendon Allahle yokeijore yengkombe bele."



<sup>40</sup> Gamaliellena a huluinye mo nebei yoyo koseyo hakaikoke. Yesusle abu akore kaenaimikoke mekate, ukaimile rahuaere mo baikoke, nebeisa a elae yae waimi, “Benen Yesusle Ro ehuweijae.” Nebeisa hayaeimikoke.

<sup>41</sup> Yesusle Ro aere ne beko hubanainyele yo yae Allah nare me baeumiboke aere ne, nebei abu ako yoyo koseyo bera na rei yae mai yae aibaleke ewate. <sup>42</sup> Na yane baei Allahre ei mom-mom imae na kaban sele kiyae imaehoungue nane merau ro miyae naei imaene-imaene Yesus na hele Allah yae oro umaufe herauungeboke Wali Ondofolo na a foi faeu foi kelewaimi.

## 6

### *Ro Mehine Bee Yaraikoke*

<sup>1</sup> Nebei hee yae Yesusre hakainyekoke yo benen helen sele baraimekene, Yahudi ro miyae Yunani afaeufe elate yo bele, Yahudi yondowa bele rilibo-rilibo haiwate. Yahudi Yunani afaeufe elate yo yae waimi, “Ya-ya raman ro miyae wahaemu hee, maei miyae nannalere eyeyei.” <sup>2</sup> Nebei aere nebei abu ako me bee oro nen bee bele Yesusre hakowainye hiwa yo bele kaenaimikoke mewarileufike wa, waimi, “Eyaе ramanne mo humfo wamfo bemale, benen Allahle ako faeukore kelemamilere mon ban yembondere na mekai ban sele. <sup>3</sup> Nebeibe aka naei baeke naei, mai nolora ro mehine bee bele isaei hebaen ma yae uwa harainyеboke nane merau Allahle Roh yae aumiboke yo elengko. Nda yo yaromakonde, yarele naeise neyae me mokonaimele. <sup>4</sup> Meyae wa Allahre ebeli boi-boise nane merau Wali Ondofolole walora wali nibi are kelemamiyende.”

<sup>5</sup> Nebei yo mewarileufike na rei mai yae abu ako yae elewate are be hinaibokera ro mbai na ro Stefanus Wali Ondofolole are hila rabo haleweke nane merau Allahle Roh bele aungeboke kiyae roukate. Nane merau nda yo bele yaraikoke: Filipus, Prokhorus, Nikanor, Timon, Parmenas, Nikolaus Antiokhia yona ro Yahudi agamane eweufike. <sup>6</sup> Nebei ro mehine bee Yesusle abu ako bere yawaimiboke ekate mo, ebeli Allahre bainyehike nane merau na mere nebei yo ranne kolaimikoke.

<sup>7</sup> Allahle a faeu hurewole nane merau Yerusalem yona Yesusle moisa hakowainye yo u hale hele emerei-emerei emerewole. Imam-imam helen solo Yesusle are hila rabo halewate.

### *Stefanus Ikilaiboke*

<sup>8</sup> Stefanus, Allah kena buhae aere ban mae heunge ro nane merau Allahle elae kiteungeboke ro, nebeinye ro miyae nolona rambun emere-emere roko helen mokowole. <sup>9</sup> Nebeinya Yahudi ro miyae Kirene yona yo bele, Aleksandriana yo bele, Kilikia kanina yo bele, Asia kanina yo bele, naei homo “ei mom-mom imaena yebaei bubaei ban” yae kaenewainye. Stefanus naei a hin-sin eibeko meibeko na waere-waere relewainye. <sup>10</sup> Stefanus yae weumi are hi yae ha yae ame-amere eleikoi sului nane merau kou kalo ehubaikoi sului. A faeufe elewolere isaei hebaen bele nane merau Allahle Roh yae nauwa keteungeboke.

<sup>11</sup> Nebeinye ekate, ro miyae hiware a moi-moi yae mokaimikoke nda wanen are enayelengkondere, “Naei a ma elewole borowannele Allahre nane merau Musalere aukakabe koui.”

<sup>12</sup> Nebei nibi yae nda holona yo mokowaimi ro miyae hosoro bele Yahudi yun-jun bele Musale walora wali heere foloukoke isaeyaeiboke kelaemi yo bele Stefanusre ikilaiboke, Yahudi yoyo koseyo riyane nekenate bere yobaiboke ekate. <sup>13</sup> Nebeisa ro miyae hiwa yawaimiboke, a na hele ban Stefanusle u rande hainyainyelere. Nebei yo yae elate, “Nda ro Allahre ei mom-mom imae na yolo-yolo anuwaufe nane merau Musale walora wali heere foloukoke homofaere aukaka na hibi-hibi koimeyеumi. <sup>14</sup> Maei angkaei yae borowande neyae huwoumi, ‘Nda Allahre ei mom-mom imae Yesus Nasaretna Kiyae yae mengkelambonde. Nebei sului mbai Musalena era hena aere kinyeumeboke yoni-yni Neyae mennebensonde.’ ”

<sup>15</sup> Yahudi naei yoyo koseyo arilewole nekate yo Stefanusre kang-kang mae kanainye, erainyele bae Stefanus na be malaikat be wanen mae hebele.

## 7

### *Stefanus Yahudi Naei Yoyo Koseyore A Na Bene-Bene Uwoumi*

<sup>1</sup> Imam kaban mae Stefanusre hineunge, “Ndi a ahunaiboke elate na hele?”

<sup>2</sup> Stefanus yae weumi, “Aka naei baeke naei nane merau arai naei yoni-yni mewaube mana borombo! Aei yobe Abraham Haran kanire ei mo Mesopotamia kanine nekewole hee yae, Allah nene waewae bele Kiyae yae meke weunge, <sup>3</sup> ‘Waei yo yan bele waka baeke wa bele nukeibo. Reyae kelereibote kanire elere.’

4 “Nebeinye Abraham Kasdim kani nukeungeboke kulun uke Haran yo Siria kanire ewole. Abraham naeko herekera Allah Abrahamde benen ukeunge nda Israel kanine meke, mayae nekaube kani mbai. 5 Nebei hee Allah Abrahamde nda kani reufi mbai sambai eyei, nebeibe Allah Abrahamde a heteungekoke nda kani nekande Abraham bele naei orona mena belere emmiyende, erabae nebei hee Abraham fa ban nekewole. 6 Allah nda a Abrahamde uwoungwe, ‘Waei orona mena meiko-meiko ro miyae wanen mae yo hi kanine enainyekende. Nebei yo naei me keleene nekenayende meuboi auboise konaimiyende na heki ralo yakama 400 enainyekengkonde. 7 Nebeibe Reyae meuboi auboise konaimile yore ehee bukulu isemile. Nebeisa waei orona mena menaibalende menate nda kanine Rare ei menaisemolonde.’ 8 Nebeisa Allah Abrahamde ukeunge nebei a heteungekokere na hele hila rabo halenayendere kelenaimile naeise, Abraham naei uwa nane merau norona mena bele kelu fa-fare ro u elan folonaimile. Abraham na kelu Ishak honokatera ya mehine name mo, na ro u elan neungehake. Ishak na kelu Yakub. Yakub na kelu wa me bee oro nen bee bele, aei Yahudi yoni-yoni yae arai henare wammile.

9 “Nebeibe aei arai hena naubake Yusufre kena hensan mae ikele yae kowainyene, roi naise haeiboke Mesir kanine, yebaei bubaeise eke nekewole. Nebeibe Allah kayaa hebeungeke, 10 Nane merau na kena bekore koweke nolora hole mouleungeke. Firaun, Mesir kani naei ondofolo, Allah na kena mokoungboke Yusufre foi mokoungke. Isaei hebaen na bumana hele Yusufre Allah ikeungene, Firaun Yusufre raneujeke Mesir naei kani kelare nane merau Firaunbe imae eise neyae me mokommilere.

11 “Na heki ban mo, moni mai kaban sele Mesir kani bele Kanaan kani belene meungeke kowate. Ro miyae weije kaeiboi ban kowate aei yobe naei raman baeumihoke. 12 Yakub borowole Mesir kanina gandum bele. Nebeinye na fa-fare (aei arai sena naei elande yore) ukeumi roko mbai nendo ekate. 13 Roko bee nendone ekate Yusuf na aka baeke ware naei u yakaumiboke weumi, ‘Reyae Yusuf niyae.’ Nebeisa wa, Mesir naei ondofolo Yusuf naei imae mbai obe mbainya yore ro roumiboke. 14 Na heki ban mo Yusuf naeko Yakubre nane merau naei imaena ekainyekate ro miyae fa-fa nemene 75 menatere kayaa ukeumi ekate. 15 Yakub kulun uke Mesir kanire ewole, nekeweke nebei kanine hereke. Nebei sului mbai aei arai hena naei nebei kani mbainye molowate. 16 Na no yaraikoke ekate, Sikhem kanine Abraham mae Hemorle fa-fa naeisa roi yae rouke bulei mbainye molowate.

17 “Abrahamde heteungekoke a yoni-yoni Allah na huluisse mokonnebonde hee nobewoungwe yae, aei yobe naei Mesir kanine na ro miyae emerewole. 18 Nebeisa ondofolo mbai, Yusufre naeisaei ban kiyae, Mesir kanire ondofolore ike nekewole. 19 Nebei ondofolo ike aei ro miyaere eiweitasi kowole. Aei yobe naei hurengkonde belene waeli hele bewoumi nebei heena honowate wayeu fa-fa hainyate nane merau honate.

20 “Nebei hee yae Musa hongkate, kelu kin foi hamai foi bu yae bu yae yawoungene, oko name Musa naekole nenakele imaene mo meinyarekoke. 21 Nebeisa Musa a moi bu moinya aitaufike yae Firaunbe maengke yae eke eungerouke, naei fa hele wanen mae naraweke. 22 Mesir kani naei isaei hebaen yoni-yoni Musare kelaeinyeke ane faeunge mene une mokowole nemene na foi mo.

23 “Musa ralo yakama rorele u bee yeuboke mo, na kena roukeunge na yoho Israel ro miyae na u mekai ekainyekate ma ereiboise ewole. 24 Eke bae, erele naei yona ro mbaise Mesirna ro yae rahuae bowolene, naei yona rore hakouboke nebei Mesirna rore houboke. 25 Musa naei u benera nekewainye elele, ‘Maei yoho naeisaei Allah rare ukeufe naei hayeikoise mekale,’ nebeibe na yoho naeisaei ban. 26 Ya heuboke mo, nebei wanen mbai Musa meke Israelna ro bee hanne howotere foise mokoneikondere uwoumi, ‘Aka baeke naei bee! Mayae bee aka baeke hele ya. Rahene ma ure-ure boube?’

27 “Nebeibe hande yobouboke ro yae Musare weunge, ‘Nde yae ware maei be yun be yebae hebeler nane merau maei walire huluisse koloumele rore roukayete?’ 28 Wenana Mesirna rore houboke wanan rare houfebondere mekale?’ 29 Nebei wanen borokene, Musa Mesir kanira hakauboke ewole Midian kanine meiko-meiko ro wanen mae nekeweke. Nebei kanina miyaebe rouke, kelu bee honoungkoke.

30 “Nekeukoke ralo yakama rorele u bee mo, Sinai moko kelaeunga a kala-kalane o kaei-kaei ken mbai i yae boloufike bewole nolora malaikat mbai Musale bokore meke. 31 Musa nebei wanen erewolene u bene baeiso-baeiso kowole. Isaeise rowendere nebei i kelaeufe nobewoungwe hee, Allahlena a weungebe borowole, 32 ‘Waei yobe Abraham, Ishak, Yakub, naeite Allah Reyae Niya.’ Musa fene wakune oinyeu wae hineuboke kowole, nebei i bewolere na ijoko erei.

<sup>33</sup> “Nda abe borole, ‘Nda kani orore hebeyae ijen yolo-yolone woro mehau hireukokae keiko. <sup>34</sup> Niniae fere Raei ro miyae Mesir kanine nekate naei beko mainyehubaukoke naei ereukokamaele nane merau naei ele kali boroubokamaele. Nebei aerene nare haisemikonde naeise Reyae mewakoubokale. Mana mei, Reyae ware ufete benen Mesir kanire bukeufinde elere.’

<sup>35</sup> “Nda Musa mbai Israel yoni-yoni yae ahi yae elewate wainye, ‘Nde yae ware mai be yun be yebaere hebelere nane merau mai walire huluse koloumele rorou kayete?’ Nebei Musa mbaise i faeu bulura malaikat yae Allahlena are uwoungae aei yobe naei be yun be yebaere yembonde nane merau holere molommibonde kiyae. <sup>36</sup> Nebei Musa mbai yae Israel ro miyaere Mesir kanira yaweumiboke maibaleke. Allah Musale walora Mesir kanine bele, bukoba kaban haisai yalene, nane merau mewate a kala-kalane ralo yakama rorele u bee rambun emere-emere meumokoukoke. <sup>37</sup> Nda Musa mbai yae Israel ro miyaere uwoumi, ‘Allah yendo kayaalo mbai raeinya wanen ro hi mai nolora wennele mende.’ <sup>38</sup> Nda Musa mbai aei yobe naei kamahe naei Israel ro miyae nolone a kala-kalane nekewole nane merau Sinai mokone ike malaikat yae are uwoungae. Eyae wali nibi foi nekemale naeise, wali heere foloukoke a faeufe Allah nebei Musa mbaise ukeunge.

<sup>39</sup> “Nebei wanen mokowolere aei yobe naei kamahe naei yoni-yoni ijoko erewainye hororebe, naei are angkaei oboroi kowate. Musare ahi yae elewate na kena u kowate benen Mesirre bukenate enatere. <sup>40</sup> Harunde wainye, ‘Maere ei moloi-moloise rambun hi mokoimebo. Nebei rambun yaere maere yawemmehonde emale. Rahebe nebei Musa aere Mesirra yaweumiboke mandebaleke kiyaele uwa ranne yeuboke meyae maeisaei ban.’ <sup>41</sup> Nebeisa sapi kelu be nulu hoime bahere enaimhononde naei mbai mokaiboke. Obo yoku hili era akau erare ongekoufe felenate naeise yarowate mewate nane merau naei me yae mokaiboke rambunde ei molonainyelere yo koi yo bae yae kowainye. <sup>42</sup> Nebeinye Allah moi buleumiboke nane merau waeumihike nenaiejae yakuna findelaufe maskare, okore, hure, ei molaimiyeke. Nebei naeise nda a yenjo kayaayo homofaene molaikoke,

‘Israel yoni-yoni,

ralo yakama rorele u bee bele a kala-kalane

mai obo yoku hili era akau erare bae

Rare ongekoufe felaufene!

<sup>43</sup> Hoime bahe Molokle fale bele findelau walobo Refanbe hoime bahe bele

mai me yae mokauboke rambun-rambunde eise molommlere yaraweke oraweke.

Nebei aerene Reyae mare Babel yo ahau buhau ekehonolene haisengkombere.’

<sup>44</sup> “Aei yobe naei kamahe naei a kala-kala nekewate heene, Allah eise memmihawende anuwau einyekate ijenne neyate. Nebei anuwau na ma Allah yae Musare keleungeboke huluinye neyate. <sup>45</sup> Nebei anuwau bele yae Yosua aei yobe naeite orona menare yaweumiboke, aei kani nekandena nekewate yo aei bene Allah hukeumihikere nukenaisandere ekate hee, nebei anuwau bele nemene rowayeke. Nebei anuwau Ondofolo Daud nekewole heene namman honoumeke. <sup>46</sup> Daudle wali Allah kena hele kowoungae nane merau Allahre riyewoungae kena kongkondena, Yakub yae bumare kaewoungae Allahle imae nembonde. <sup>47</sup> Nebeibe Daudle kelu Ondofolo Salomo yae Allah nekenende imae heuboke.

<sup>48</sup> “Nebeibe Allah ro miyae yae haeiboke imaene enekei. Allah nebei a elewole naeise Naei yenjo kayaayo homone nda wanen molaikoke,

<sup>49</sup> ‘Surga Raei kendan wameran niyae,

kani kela Raei oro hensen anuwau.

Rahe imaebe mayae Rare hensebombero?

Makei anuwaunge Reyae u no isebonde?

<sup>50</sup> Nda kani kelana rambun nemene fomene

Reyae mokowale.’

<sup>51</sup> “Aka naei baeke naei, ma yun elaekei sele. Mai u bene Allahre isian nekeyate ro miyae wanen. Mayae Allahle are oboroyei. Allahle Rohre moi yae mo buleyaunge, mai yobe naei yae kowate wanen. <sup>52</sup> Allah na yenjo kayaayo nemene fomene mai yobe naei yae weitasi kowaimi! Wali himaloungeboke Kiyae mendere a nulaiboke yenjo kayaayo haikoke. Nebei ro walire himaloungeboke Kiyae mbai Yesu Niyae. Menaiejae kelai nekaube hauboke. <sup>53</sup> Malaikat-malaikat walora Allah wali heere foloukoke a mare yae yengkokembe, nebeibe mayae ehakoiki hele.”

<sup>54</sup> Yahudi yoyo koseyo Stefanus elewole a nemene boraikokera na u bele hubainyehike na ikele han romou fefere Stefanusre kowainye. <sup>55</sup> Nebeibe Stefanus Allahle Roh yae maemae koungekoke kiyae. Na ijoko yakure kanele bae Allah Naei one hengko hehe naeukokebe ereke nane merau ro bele anuwau Allahle meube reufine Yesus hebele erewole. <sup>56</sup> Stefanus yae weumi, "Mai ijoko bumare kanen! Raei ijoko erale surga wekeunge. Yesus, Allah bokora meke ro miyae uware yeuboke Kiyaere eranale Allahle meube reufine hebele."

<sup>57</sup> Nebei are borate yo naengkaei ahunaikoke, na kali bele kaenewate Stefanusre na kulun bainye habelekainyele ikilaiبوکه, <sup>58</sup> yobaiboke, yo moise ekate, ruka yae ekaihainyane. Stefanusre rukare haiwainye yo naei malobe hokolo fa mbai na ro Saulus noro wene mo kolowate.

<sup>59</sup> Na rukane haiwainye yae Stefanus kaenele, "Tuhan Yesus, Ra unulu roweise!" <sup>60</sup> Nebeisa oro selen-selen mae oukoroukoke kali na kaban mae kaenele, "Tuhan, nda beko nebei yo ranne ehayejiae!" Nebei are mo eleukoke na hibi na no hokoukoke.

## 8

<sup>1</sup> Saulus nebei haibokere be hineumiboke.

### *Saulus Yesusle Are Hila Rabo Halewate Ro Miyaere Habelewate*

Nebei heera huba rawaiboke Yerusalem na jemaat einye ro miyaere weitasi kowaimilene, nebei abu ako riyana yo mo Yerusalem yone nekewate, ro miyae nemene Yesusre hila rabore halewainye yo helen heraeyeuboke, hiwa Yudea kanire bele Samaria kanire bele habelaeyeke. <sup>2</sup> Allahle a elelere ei hawainye yo hiwa mekate Stefanusle no elaisake kanine aimoloufakane nane merau na kena hele yae rime rimewainye. <sup>3</sup> Nebeibe Saulus huba raweuboke jemaatna ro miyaere herere wemmilere nibi mahi-mahi baewole, imaera obero eleiso akoibo kowole rone miyaene yobowole kawane mo hewoumi.

### *Yesuslena A Foi Faeu Foi Samaria Kanire Hureukoke*

<sup>4</sup> Nebei ro miyae heraeyeuboke ewate yo Yesuslena a foi faeu foi ewate ijenne na hibi huwaimiyeye. <sup>5</sup> Ro mbai na ro Filipus Samaria kanina yo mbaise eke, Yesus na hele Allah yae oro umaufe heraungeboko Wali Ondofolo Kiyaele ane nebei yona ro miyaere huwoumi. <sup>6</sup> Nebei ro miyae Filipus ane uwoumi borowate bele rambun emere-emere mokowole bele erewatene, ro miyae helen sele nda a elewokere maemumikoke borayoke. <sup>7</sup> Alo yoni-yoni hukewoumi, naei nekewate u bulura ele kali bele bayeke balayeke. Oro me nimaimikoke yo bele oro rebeisi-rebeisi kayeke yo bele helen onomi yarowate. <sup>8</sup> Nebei yona ro miyae rei sele kowate.

<sup>9</sup> Nebei yona ro mbai na ro Simon. Neyae heki hele Samaria ro miyaere mokoumiyeye na buloo aerere maekoyeumi ijoko kelei-kelei mo kelaeinyeke. Nenaiejae weumi, "Reyae nda woke ro hosoro nekate wanen ban ma." <sup>10</sup> Nebei yona ro miyae ebi kaban nare mo borainyeye, elate, "Nda ro walobore yeuboke, na ro Elae Kaban." <sup>11</sup> Ya heki hele naei me u mahi-mahi mokoumeke erewainyene, Samaria ro miyae na moisa mo hakowainye. <sup>12</sup> Nebeibe Filipus yae Allah merau raungehike Naei holona ro miyae Yesusle me kelee u keleene nekenate naei a foi faeu foi huwoumi. Nebei ro miyae nana hesele yae elewate yo Filipus na hibi bu kowoumi. <sup>13</sup> Simon nane merau nebei a na hele yae elewole, hila rabo halewole, bu koungeboko. Bura yeuketeteke heera Simon na hibi Filipusre hakoungeboko oroyeke. Filipus rambun emere-emere mokowolere Simon erewole, yei yae kowole.

<sup>14</sup> Samariana ro miyae Allahle a faeufe ((Yesusle naeise)) hila rabo halewate a Yesusle abu ako Yerusalemna nekate yo borokate. Nebeinye Petrusle Yohaneslere ukaimile Filipusle bokore ekete. <sup>15</sup> Petrusle Yohanesle ekete, Samaria ro miyaere Allahle Roh ei ammibonde naeise Allahre riyeinyehike. <sup>16</sup> Rabuhine ban, Samaria ro miyae nolone Allahle Roh hile rande oi mo, nebei yo manemfa fere Yesusle ro yae mo bu kaimikoke. <sup>17</sup> Nebeisa Petrusle, Yohanesle nda Samaria ro miyaere me koloimikoke wa, Allahle Roh ei aumiboke.

<sup>18</sup> Simon erewole Petrusle Yohanesle na me ndi ro miyae ranne koloikoyaimine, Allahle Roh yemmi. Nebeinye Simon roise mo rouke Petrusle Yohanesle bokore eke, <sup>19</sup> weumi, "Rare nebei mokoube elae yeise. Ro miyae nde-nde raei mere rarensinde kiyae, Allahle Roh na hibi rowende."

<sup>20</sup> Nebeibe Petrus yae weunge, "Allahlena rambun era yeumere roi yae na hului rowele u bene lon mae eleyae eye, wa roi bele beko yebobe! <sup>21</sup> Waei kena u yolo-yolo ban mae nekeyaene, maei Wali Ondofolole kaliare mokande ro homora weyae oroi sului. <sup>22</sup> Nebei u bene bekora nulu keweubo, Tuhande ebili boinye, Neyae waei u bene

beko nekeyayetera faeinyeneubote era. <sup>23</sup> Wa kena une bae kena hensen mae maemae kokokete nane merau u mekai beko yoni-yoni yae aefokete nekeyae.”

<sup>24</sup> Simon mae Petrusle Yohaneslere weumi, “Mayae bee, rare hakoisobo. Tuhande ebeli bonnihi mayae are eleube raei u rande yae emejiae.”

<sup>25</sup> Hokolo bee Allahle a faeu isaeyeimiyeke nane merau huweimiyekera Yerusalem yore bukeiboke ewote. Nane merau Samaria kanina yo ebibi helen honatere ewote hee yae Yesuslena a foi faeu foi huweimiyeye.

### *Filipus Bele Etiopia Kanina Ro Bele*

<sup>26</sup> Allahle malaikat mbai yae Filipusre meke weunge, “Ainyu aloinyeko! Yerusalem yora Gaza kanire eke nibi halaikoyole ijen ebun reufire yae fole.” <sup>27</sup> Filipus na hibi kulun uke ewole mo, nibi nolone ro mbai huhu boikoke. Nebei ro Etiopia kanire ikileuboke miyae Ondofolo Kandakena kiyae na hemboni relare ikileuboke ro, Yerusalemde Allahre ei moloikoise eke. <sup>28</sup> Nebei ro na yore bukeufike kereta einye nekeimeyele Allahle yendo kayaalo Yesayale homofaebe koimeyele. <sup>29</sup> Allahle Roh yae Filipusre weunge, “Ndi kereta mele kelaeufe yae nobeinyebo.”

<sup>30</sup> Filipus nebei kereta mele bokore yae hakauboke eke. Borole bae na ranna nekele ro yendo kayaalo Yesayale homofaebe koimeyele. Filipus yae nebei rore hineunge, “Weyae nebei homo koimeyeyaebe elale, na mekai haraungeboko waeisaei yeubokae?”

<sup>31</sup> Nebei ro yae beufoke weunge, “Isaeyeibo! Ro miyae hi yae rare keleufekoubere, reyae isaeyebole.” Nebeisa Filipusre riyeunge na kereta ranne yeukiteke nanembainnye roiboke. <sup>32</sup> Neyae Allahle homofaena nda kayeerobe koimeyele, “Domba nenaisandere yaweisoyainye ate wanen

Nare yawainyehoke,

domba kelu na mane folainye a ban faeu ban yeiboyole hebele wanen mae,  
nebei sului mbai Neyae a mun faeu mun hebende.

<sup>33</sup> Ro ban ro miyae wanen mae  
naei uwane enainyehayende

nane merau ro miyae walire hului koloyaimi wanen ban mae  
Nare enainyekolonde.

Nda kani kelara Na no enaitowendene,

nde yae Norona mena naei a nou ensende.”\*

<sup>34</sup> Nebei Etiopiana ro yae Filipusre hinewoungue, “Nda yendo kayaalo ndele abe elele, naei uwabe elele, hiwa yo naei?” <sup>35</sup> Filipus nebei koimeyele homofae ijenda huba raweuboke nebei rore Yesuslena a foi faeu foi huwoungue.

<sup>36</sup> Ewote nibi nolone bu koba mbai kelaeunge mo, nebei Etiopiana ro yae weunge, “Ndire ereibo, bu koba nare yale! Bu koufobondere raei kena kale, nebeibe raei walina rahebe kalo moloufe?”

<sup>37</sup> Filipus yae weunge, “Wali Ondofolo Naei a elelere hila rabo elae halelena, reyae na hului bu koreibote.”

Nebei Etiopiana ro yae weunge, “Reyae, Yesus Wali Ondofolo Kiyare hila rabo nana hele halaenale, Neyae Allahle Kelu.”

<sup>38</sup> Nebeinye kereta imoli mokoitore ukeunge yauboke. Nebeisa hokolo bee bure oyakoikoke, na hibi bu koungeboko. <sup>39</sup> Hokolo bee bura yeiketete heera Allahle Roh Filipusre kaeubokene, Etiopiana ro Filipusre ehubayeikoi. Etiopiana ro na yore na rei sele koweke ewole. <sup>40</sup> Filipus mbaibe Asdod yone uwa euwakauboke. Filipus oro molouboke yo ran yo randa ewole Yesuslena a foi faeu foi bele mo huweumiyeye eke Kaisarea yone.

## 9

### *Saulus Nulu Keungeboko*

<sup>1</sup> Nebei hee Saulus kena rokeunge Yesusre hakainyekoke ro miyaere honde hayendere u huku-huku kowoumi. Yerusalem yona imam kabanbe bokore eke, <sup>2</sup> Damsyik yona Yahudi naei ei mom-mom imae naei yun-junde yemmile homo riyeungehike. Nebei homone a wemmile naei yona Yesusre hakainyekoke ro miyae hiwa Saulus hubainyailkondena, neyae ikilengkonde, Yerusalemde yawemmile enatere. <sup>3</sup> Damsyik yore nobewoungue bele, yakura hehe Saulusre naeungekoke. <sup>4</sup> Saulus ane ruke bele, borole a mbai nare weunge, “Saulus, Saulus! Rahe aerene Rare weitasi koimeyare?”

<sup>5</sup> Saulus yae hineunge, “Tuhan, Weyae wende?”

\* 8:33 8:33 Yesaya 53:7-8

Beungehoke weunge, “Reyae Yesus, weyae weitasire koimeyarae Kiyae. <sup>6</sup> Mana ainyu Damsyik yore eyeisi. Weyae mokoubonde rambun nebei yone ngayekote.”

<sup>7</sup> Saulus naei homo mbainye mate yo onei-onei onewate. A bae boratebe, nebeibe ro miyae mbai sambai ijokore ereiboi. <sup>8</sup> Saulus aunguke na ijoko keleukoke, nebeibe na ijoko rambun mbai sambai ereiboinye Damsyik yore me yae ikilainyekoke ewate. <sup>9</sup> Ya name ijoko erei mo meungekeukoke, nane merau raman bu anei mo meungekeukoke.

<sup>10</sup> Damsyik yone Yesusre hakainyekoke na ro mbai na ro Ananias. Na ijoko raneungeboke erewole yae, Ananiasre Tuhan mae meke weunge, “Ananias!”

Ananias yae weunge, “Tuhan, reyae borale.”

<sup>11</sup> Tuhan mae weunge, “Nda hee yae na hibi kulun wele Yudasle imae nibi mbai na ro ‘ijen foijen selene hebelere’ eye. Ro mbai Tarsus yona na ro Saulus nebei ijende eumihineukonde. Nebei ro namman Rare ebeline boimeyeufe. <sup>12</sup> Saulus na ijoko raneungeboke yae erele ro mbai na ro Ananias, meke na me na u randa koloungekoke benen na ijoko kelengkode erendere.”

<sup>13</sup> Ananias yae benen weunge, “Tuhan, reyae borale nda ro Waei eleubokae wekaemae ro miyaere beko nekai sele Yerusalem yona mokoimeyeumi. <sup>14</sup> Mana ndana meke. Imam yun-jun mae homo ikainyele ndare meke Ware eise moloyayete ro miyaere ikilendere.”

<sup>15</sup> Nebeibe Tuhan mae Ananiasre weunge, “Eyeise mo eye! Reyae nare eleubokale Raei burelen boi-boise orondere. Ro miyae kani hi kela hina Yahudi ban yo belere naei ondofolo-ondofolo belere Israel ro miyae belere Raei are huwemmiyendere. <sup>16</sup> Reyae erengkelembonde Raei Ro aere neyae beko helen hubannekonde.”

<sup>17</sup> Na hibi Ananias eke nebei imaere eke eweufike na mere mo Saulusle ranne koloungekoke weunge, “Aka baek Saulus, Tuhan Yesus ndare mewoyae nibi nolone erekanae Kiyae yae ukeufe waei bokore mekale. Wa ijoko keleukonde erelere nane merau Allahle Roh ware ei aneibote.” <sup>18</sup> Ane uwoung hee Saulus na ijokora ka ningkei wanen mae kulauboke ruke. Na hibi na ijoko yoloungekoke erewole. Neyae aunguke mo, bu koungeboke. <sup>19</sup> Nebeisa raman aneukoke wa, na u elae rouke.

#### *Saulus Damsyik Yone Kelewoumi*

Yesusre hakainyekoke ro miyae Damsyik yona nekewate yo bokone Saulus ya name keli hului meungekeukoke. <sup>20</sup> Nebeisa Saulus na hibi ei mom-mom imaene eyeisiyele huweumi Yesus na hele Allahle Kelu.

<sup>21</sup> Ro miyae nemene Saulus nebei a wanen elewolene fa yae bowate. Nenaiejae elate, “Nda ro mbai Yesusre eise moloyainye ro miyae Yerusalemna yore bekore mokowoumi kiyae. Naendae wanen, ndare meke Yesusre hakainyekoke ro miyaere ikilende imam yun-jun bokore yobonde enatere?”

<sup>22</sup> Saulus nebei ro miyaere kelewoumi Yesus na hele Wali Ondofolo. Nebei a faeu elewole ro miyaere kena hauwoumine, Damsyik yona Yahudi ro miyae u bene baeso-baeso kowate naendae wanen mae Sauluslena a elelere na hele, na hele ban mae elenate.

<sup>23</sup> Ya heki holo mainyekeukoke mo, Yahudi ro miyae merau rainyehike Saulusre honaibondere. <sup>24</sup> Nebeibe Saulus nebei merau kolowainyelebe isaeyeuboke. Reniai rai nebei yo elere naebokene romau kaban-kabanne Saulusre honaibondere ereiko rakeiko kowainye. <sup>25</sup> Nebeibe reniai ya mbai, Saulus na moisa orate yo yae ela kaban einye aiboke. Yo elere naeiboke ranna ha yae nokainyele owole.

#### *Saulus Yerusalem Yone*

<sup>26</sup> Saulus Yerusalem yone eke nebeinya Yesusre hakainyekoke ro miyae bele mbainye yaungaibonderebe, nebeibe nare fe yae faewainye. Neyae elate Saulus u rundunbe bole. <sup>27</sup> Mainyekeukokera Saulusle bokore Barnabas meke Yesusle abu ako naei bokore yaweungehoke ekete. Saulus Damsyik yore ewole heene Tuhande erekeunge bele Tuhan Naei a Saulusre uwoung bele nane merau Yesusle ro yae Damsyik yone fere efaei sele kelewoumi bele nemene Barnabas huwewoumi. <sup>28</sup> Nebei wannene Saulus nebei yo bele nanembainye nekewate. Nane merau Yerusalem yo reufire-reufire Yesusle Ro yae Saulus fe efaei sele Allahle a faeufe kelewoumi. <sup>29</sup> Yahudi ro miyae Yunani afaeu wae elate yo bele naeise naeise a eibeko meibeko kowate, nebeibe Saulusre honaibondere relewainye. <sup>30</sup> Yesusre hakainyekoke ro miyae hiwa nebei a wanen borokate bae, Saulusre yawainyehoke Kaisarea yore ekate, nebeisa Tarsus yore hawainyekoke ewole.

<sup>31</sup> Saulus eke wa, nebei Yesusre hakainyekoke ro miyae Yudea kanina, Galilea kanina, Samaria kanina nemene buhae osaeiboke. Allahle Roh yae nebei ro miyae naei kena ure hara rorowoumi nane merau elae wake ikeumi. Tuhan mae weumi are ei hauwainye nane merau nebei holona ro miyae emerei-emerei emerewole.

*Petrus Lida Yora Mo Yope Yore Eke*

<sup>32</sup> Nebei hee Petrus yo ran yo randa oroweke. Roko mbai Lida yore eke, nebeinya Yesus Naei eleuboke wekeumi ro miyaere hubainyaikondere. <sup>33</sup> Lida yona ro mbai na ro Eneas. Noro me nimainyekoke na kewa ran yun make ranne mo honoweke ralo yakama mehine name bele. <sup>34</sup> Petrus yae Eneasre weunge, "Eneas, Yesus Wali Ondofolo ware onomi ikete. Ainyu wa kewa yun make yaroiko." Petrus ane uwounghe hee Eneas na hibi ewaunguke. <sup>35</sup> Ro miyae Lida yona Saron yona nemene Eneas oro bele orowolere erewainyele yo nemene Tuhan Yesusre na hele yae elewate hila rabo halewainye.

<sup>36</sup> Yope yona miyae mbai na ro Tabita. Nda miyae Yesusre hila rabo haleungeke. (Na ro Yunani afaeunge Dorkas.) Naei me u foi sele mokoweke nane merau hun ban wai ban ro miyaere roko helen hakoumiyeke. <sup>37</sup> Nebei hee era meukokokera mo hereke. Nebei no bu kainyebokera, yowa imae bumana rakane yaeinyeneke honowole. <sup>38</sup> Yope yore Lida yora ahau banne Petrus Lida yone ekenekele a Yope yona Yesusre hakainyekoke ro miyae borokate hee, ro bee ukaimile Petrusle bokore ekete, weinye, "U hale yae weyae hakoumebonde emalere!"

<sup>39</sup> Petrus aunguke hakoiboise mo hakoumiboke. Petrusre yawainyehoke yowa buma rakana kayeere ikate. Nebeinya miyae nannale (rora molaiikoke) yo nemene mekate Petrusre yanainyekoke, na rimahili bele haiwate nane merau Dorkas na waline nekewole heene malo yoni-yoni hawoumi bele Petrusre kelewainye.

<sup>40</sup> Petrus nebei yore ukeumi moise ai baleke mo, nembai oro selen-selen mae roroukoke Allahre ebeli bowounghe. Nebeisa Dorkasle no honolere be beufoke weunge, "Tabita, ainyu!" Dorkas na ijoko keleukoke, Petrusre erekeunge hee na hibi angenku nuweuboke. <sup>41</sup> Petrus na me nekeunge Dorkas mera ikileungeboke na hibi aungenuke. Nebei yona Yesusre hila rabo halewainye ro miyae bele nebei miyae nannale bele kaeneumikoke mekate, Dorkasre mo na mene kinyeumiboke. <sup>42</sup> Nda iwau rileuboke Yope yona ro miyae bele borowate. Nebeinye ro miyae helen Yesusre na hele yae elewate hila rabo halewainye. <sup>43</sup> Nebei yona ro mbai na ro Simon obo yoku rare haweke kiyaele bokone Petrus ya heki ban nekeukoke.

**10***Petrusle Korneliusle*

<sup>1</sup> Kaisarea yone ro mbai na ro Kornelius nekewole. Neyae Yahudi ro ban. Buloo felare be yun be yebaere hebewate nolora neyae Italia homo naei yunde hebewole. <sup>2</sup> Kornelius Allahle are hubara haeisa yaneungeke nane merau Nare ei moloungke. Nebei sului mbai naei imae ei obe einya yo. Ro miyae koufe kalore molowoumi yore eisako meisako nekai hakoumiyeke. Na yane baei Allahre ebeli bainyeke. <sup>3</sup> Ya mbai huare rai hujoko oke name hului yae na ijoko raneungeboke erewole Allahle malaikat na yaka yae erewounghe meke weunge, "Kornelius."

<sup>4</sup> Kornelius nebei malaikatre erekeunge na fe bele faewounghe weunge, "Erabuhi wanen, Tuhan?"

Nebei malaikat yae weunge, "Webeli kali boyeyae bele waei yei wahei kounge kalona yore yeyaemae bele nemene Allah be hineubokete nane merau Allah waei bene nekeungehike. <sup>5</sup> Mana ro miyae weimi Yope yore ai. Nebeinya ro mbai na ro Simon Petrus, ungainyele ndare mende. <sup>6</sup> Simon obo yoku rare hale kiyaele imae buhaeinya ekehebelene Simon Petrus ekenekele."

<sup>7</sup> Nebei malaikat Korneliusle are elete kiyae ewole mo, Kornelius na yebaei bubaei ro bee bele Korneliusle naei u kayaare hebeyate na robe na wali Allahle are hubara haeisa yaneungeke bele kaneumikoke mekate. <sup>8</sup> Kornelius nebei ime wanen ma kaeneungeboke ahubare mo huweumikokera, hokolo namere mo ukeumi oro molaiiboke Yope yore ewate.

<sup>9</sup> Ya heuboke rai sului hokolo name Yope yo nobewainye yae wa, Petrus imae bumare\* yeuketeke Allahre ebelire bonnelere. <sup>10</sup> Nebeisa moni yaroungkeke ramande anengkondere kenabe kowole. Nebeibe ramanne mokowate yae, Petrus na ijoko ranainyeboke ime wanen mae erele. <sup>11</sup> Yaku raweuboke bulura malo wanen kaeu mau ha yae na rayee kelira bayaeikoke, nda kanire nokainyele ole. <sup>12</sup> Neinye obo yoku mahi-mahi nda kanina oro kelire koyate yo, ara foyate yo, aye yoni-yoni. <sup>13</sup> Nebeisa a mbai weunge, "Petrus, ainyu! Foloi anei!"

\* 10:9 10:9 Yahudi naei ruka imae hena helen bumana rakane bunalo wanen mae mokoiboyate.

<sup>14</sup> Nebeibe Petrus yae weunge, “Na hului ban, Tuhan! Meyae Yahudi ro miyae naei era hena huluinye nebei obo yoku eli hohore nekeyande nane merau u nenere koyande raman. Reyae ya mbai aneikoi mo nekeyale.”

<sup>15</sup> Nebei a mbaibe benende weunge, “Allah yae onomire mokoungeboke rambun weyae elire enekeijae.”

<sup>16</sup> Naei wanen mbai roko name nendo keleungekokera nebei malo benende kaeuboke bumare ewole.

<sup>17</sup> Petrus u bene baeiso-baeiso kowole, rahe naeise nda wanen keleuboke erekole. Petrus namman u benene nekainye bele, Kornelius yae ukeumi ro name mekate. Simonbe imae kelaeiboke bene mekaisebate. <sup>18</sup> Nebeinya yore kaenaimikoke mo hinaimi, “Simon Petrus nda imaene nekele?”

<sup>19</sup> Namman Petrus nebei ime kaneungebokere na mekaise isaeyembondere u bene baeiso-baeiso kole yae, Allahle Roh yae a weunge, “Simon, ro name ware baimeyayete. <sup>20</sup> Ainyu oyakoibo nebei ro namere hakoimibo eme. Buhae ohokoiyae, nebei yo Reyae ukamaele mekate.”

<sup>21</sup> Nebeinye Petrus owakouboke, weumi, “Reyae nda niyae mayae baeufe kiyae. Rabuhi wanenbe ndare mekaube?”

<sup>22</sup> Hokolo name yae wainye, “Fela yunde hebele kiyae Kornelius yae maere ukeume ndare mekande. Neyae ro mbai na wali himaloungeboke nane merau Allahle are hubara haesa yaneyeunge. Yahudi ro miyae nemene nare ereibo kaneibo koyainye, naei ebeli Allahre bowounge Allah wo koungekokene. Allah Na malaikat yae meke, Korneliusre ukeunge ware rinyeufinde naei imaere elere. Malaikat yae ukeunge waeinya a faeu elelere Kornelius borombondere.” <sup>23</sup> Hokolo name Petrus yaweumiboke, nebei imaene reniai ya mbai ijongku hononaikondere.

Ya heuboke mo, Petrus hokolo name bele nanembaisa alainyekoke ewate. Yopena Yesusre hakainyekoke ro miyae hiwa nangeke hakaimikoke ewate. <sup>24</sup> Ya bee nendo Kaisarea yone aibaleke. Kornelius naei aka baeke, naei hokolo uneyau keke haha nemene kaenewoumi, Petrus naeise ereiko rakeiko kowaimi. <sup>25</sup> Petrus meke bae, Kornelius ara hele ruke Petrusre rore melaeyennebondere. <sup>26</sup> Nebeibe Petrus yae weunge, “Ainyu! Wangkele rangkele na hului mbai.”

<sup>27</sup> Korneliusle ane eleyete bele Petrus imae eise eweufike. Nebeinye erele ro miyae helen sele arilewole. <sup>28</sup> Petrus nebei yore weumi, “Mayae nemene maisaei bangka mo, meyae Yahudi ro miyae wali heere foloukoke huluinye Yahudi ban ro miyae bele mbainye enekei nane merau mbainye a elei. Nebeibe Allah meke rare keleufefoke ro miyae nde-nde nemene reyae niki bele kanau bele yae nane merau ele moise yae woke a yae eleyeijae. <sup>29</sup> Nebei aerene weyae ukamae ekatere reyae na rilibo ban mae mekale. Mana ya reyae isaieisibonderene a hinereisitere, ‘Rahere weyae kaeneufekokae mekale?’”

<sup>30</sup> Kornelius yae weunge, “Ya keli moise wokandene hu oke nda hujoko name hului yae raei imaene Allahre ebeline bowanale. Raei bene ro mbai yakaibo yae yakauboke, nambelae wili haleman. <sup>31</sup> Neyae wufe, ‘Kornelius! Waei ebeli kali bowanae Allah boroubokete. Nebei sului mbai waei yei wahei rore miyaere kouna kalona yore yeyaemae Allah u bene nekeungehike. <sup>32</sup> Nebei aerene mana ro hiwa weumile Yope yore enate Simon obo yoku rare hale kiyaele imae buhaeinye ekehebelene ekenekele. Ro mbai na ro Simon Petrus ungainyele ndare mende.’ <sup>33</sup> Nebei meraunge reyae na hibi ro ukamaele waei yaweisoise ekate. Weyae kena foinyene ndare mewoyae. Mana ya meyae nemene ndane Allahle bene arilewounge nekande. Allah rahebe a uwote maere weumele boromalere mekanekande.”

<sup>34</sup> Petrus yae weumi, “Nda hee yae wa reyae isaeyebokale Allah na hele ro miyaere be ijokone ereyei. <sup>35</sup> Allahle are hubara haesa yaneyainye nane merau me u foise mokoyate ro miyae Allah ei ammibonde, makei yona bele ban. <sup>36</sup> Aka naei baeke naei, maisaei nekaube Israel ro miyaere mo nda a foi faeu foi Allah uwoumi, ‘Yesus Wali Ondofolo nemene naei Tuhan, Naei walora ro miyae na hului kena foi u foi bele nekenate.’ <sup>37</sup> Aka naei baeke naei, Yudea kanine bewate rambun yoni-yoni mayae maisaei nekaube. Galilea kanira huba raweuboke Yohanes a faeu huwoumi, ‘Mayae nulu kembokembere kelebonde naeise bu konayengkomb.’ <sup>38</sup> Nane merau Allah yae Yesus Nasaretna Rore Naei Roh bele Naei elae wake bele uwa kiteungeboke. Allah Nangkele mbainye nekewotene, Yesus makeise-makeise orowole na me u foise mo mokowole, nane merau walobo yunbe me kelee u keleene nekayekene era buloo kayeke ro miyaere onomi yeumiyeke.”



<sup>39</sup> “Neyae Israel kani nemene nane merau Yerusalem yone rambun mahi-mahi mokowolere meyae ijoko yae erewande. Naendae wanen hororebe Neyae foi mokowolerebe, nebeibe ohaline baikoke haiboke. <sup>40</sup> Nebeibe ya name mo Allah yae mahe yora waleungeboke, benen Nauwa ro miyaere yakawoumi. <sup>41</sup> Ro miyae nemene ban, nebeibe meyae Allah bera eleuboke wekeume ro miyae Yesus benen waleuboke heera Nangkele raman bu anewande yo yae mo, ijoko erannekoke. <sup>42</sup> Nane merau Neyae maere ukeume Naei a foi faeu foise nane merau Nembai sele Allah yae a ukeunge herewate yo bele wali nekate yo bele naei wali hului kolommibonde naei a, ro miyaere huwemamiyendere. <sup>43</sup> Allahle yenjo kayaayo yae Naei a faeube isaeyaeimekoke. Nebei yo yae elewate, nde yae Yesus Naei abe elelere hila rabo halennelena, na beko neban ennefaeyembonde.”

<sup>44</sup> Petrus namman ane elele yae, nebei ro miyae angkaeise borate yo nemene Allahle Roh yae oke aumiboke. <sup>45</sup> Allahle Roh Yahudi ban ro miyaere aumibokene, Yope yona Yahudi ro miyae hiwa Petrusre hakainyekoke mewate yo nemene fa yae bowate. <sup>46</sup> Rabuhine ban, neyae borowate nebei ro miyae afaeu mahi-mahi elewate, Allahre buma kolowainyene.

Nebeisa Petrus yae elele, <sup>47</sup> “Eremmibo, nda yo aeinya wanen mbai Allahle Rohbe yaraikoke. Rahene nare bu nendon okoi?” <sup>48</sup> Petrus ukeumi Yesusle Ro yae bu konaimikonde. Nebeisa Petrusre riyaenyehike nangkele ya heki ban nekenaikonde.

## 11

### *Yerusalemna Ro Miyaere Petrus Isaei Ikeumi*

<sup>1</sup> Yesusle abu ako bele Yudea kanina ro miyae Yesusre hakainyekoke yo nemene bele Yahudi ban ro miyae Allahle a faeufe ((Yesusle naeise)) na hele elewate are angkaei boraiboke. <sup>2</sup> Petrus Yerusalemde eke heene, nebei Yahudi ro miyae Allahre hakainyekoke yo yae a yarewainye, <sup>3</sup> wainye, “Rahere Yahudi ban yo naei imaere oroyae nane merau raman bele mbainye ekawanaube?”

<sup>4</sup> Nebei a elayokene, Petrus nebei me u ebi kaban mokowole naei yeiboise yeubokera yakawoumi, <sup>5</sup> weumi, “Reyae Allahre Yope yone ebeline bowanale hee, raei ijoko beufehoke erewale malo wanen kaeu mau ha yae na rayee kelira bayaeikoke yakura nda kanire nokainyele owole, raei bokone yauboke. <sup>6</sup> Eise wekale hilowale, neinye obo yoku mahi-mahi nda kanina oro kelire koyate yo, ele moise woke koyate yo, rami yoni-yoni, aye yoni-yoni einye mo erewamaele. <sup>7</sup> Nebeisa borowale a mbai rare uwoufe, ‘Petrus, ainyu! Foloi anei!’

<sup>8</sup> “Nebeibe reyae beufokale wanale, ‘Tuhan, nebei meyae elire hohore, u nenere koyande raman, reyae ya mbai anaiki mo nekeyale.’

<sup>9</sup> “Nebeibe yakura borowale a faeu mbai benen rare weufe, ‘Allah onomire iwoumi rambun weyae eli yae u bene enekeijae!’ <sup>10</sup> Nebei wanen mbai roko name ereukokale, nemene na hibi kaeuboke yakure ewole.

<sup>11</sup> “Nebei hee yae, ro name Kaisarea yora ukaimile raei weise reyae nekewale imaere mekate. <sup>12</sup> Allahle Roh yae ukeufe mekate yore weyae na hibi hakoumibondere. Neyae Yahudi ban ro miyaene, weyae buhae ohokojiae! Nebei jemaatna aka baeke mehine mbai rare hakaisekoke Kaisarea yore ewande. Meyae nemene Korneliusle imaene andeuboke. <sup>13</sup> Nebeisa Kornelius naei imae einye malaikat meke yakaungeboke ahubabe maere huwewoume. Nebei malaikat yae Korneliusre weunge, ‘Ro hiwa weimi ai, Simon Petrus Yope yona ekenekele kiyaere ungainyele mende. <sup>14</sup> Nebei kiyae mende a ungengkombe yae weyae nane merau waei imae mbai obe mbainye nekeyaube yo bele wali hole molonembombe.’ ”

<sup>15</sup> Petrus benen ahuba ahuneungeboke huwewoumi, “Nebei ya ane huba raweubokale uwamaele mo, Allahle Roh aere aumeboke wanen mbai nebei are borowate yore aumiboke. <sup>16</sup> Nebeisa wa reyae u bene nekaisehike Yesus roko hi eleukoke, ‘Yohanes bu yae kowoumi, nebeibe mayae Allahle Roh yae konengkombe.’ <sup>17</sup> Nebei aere ne reyae isaeyeubokale, eyae Yesusre hila rabo halewannera Naei Roh ikeume. Nebei wanen mbai Yahudi ban ro miyaere Allah Naei Roh yeyoumi. Nebeinye reyae Allahre hee eneisai sului!”

<sup>18</sup> Nebei ahuba boraikokene, benen aku ohoi yeuboke. Nebei ro miyae Allahre bumare mo kolowainye. Nenaiejae elate, “Nebei wanenna Yahudi ban ro miyaere Allah waeumihike na beko bakora nulu emmikembonde yo wali hena bonare enaijaronde!”

### *Barnabasle Saulusle Antiokhia Yore Eketi*

<sup>19</sup> Stefanus haiboke heera, Yesusre hakainyekoke ro miyae beko hele hubawainyene, a hine a hine heraeyeuboke ewate. Hiwa nda anuwaufe yae habeleyeke: Fensia kanine, Siprus yokobane, Siria kanina Antiokhia yone. Nebei yo Yesuslena a foi faeu foi Yahudi

ro miyaere mo kelaemiyeye. <sup>20</sup> Nebeibe nda nolona Yesusre hakainyekoke ro miyae hiwa Siprus yokobara, hiwa Kirene kanina ro miyae Antiokhia yore ekate. Yahudi holona ban Yunani ro miyaere Tuhan Yesuslena a foi faeu foi kelaemiyeye. <sup>21</sup> Allah yae ei aumibokene, nebeinye ro miyae helen Yesusre hila rabo halewainye nane merau Tuhan mae elewole a huluinye hakowainye.

<sup>22</sup> Nda wanen bewole a eungeyouboke Yerusalem yona jemaat boraibokene, Barnabasre ukainyele Antiokhia yore eke. <sup>23</sup> Barnabas eke erewole nebeinya ro miyae Allah na hele kena buhae aere ban mae hewoumine rei sele kowole. Barnabas yae a usaei uwoumi Tuhan are weumi huluinye na hibi-hibi nekenayende. <sup>24</sup> Nda Barnabas na u mekai foi sele nane merau Allahle Roh yae maema koungekoke. Yesus Naei a elelere na hibi-hibi hila rabo hele halewolene. Nebei yona ro miyae helen sele yaweumiboke Yesusre hila rabo halenainyelere.

<sup>25</sup> Nebeisa Barnabas kulun uke Saulusle baeikoise Tarsus yore eke. <sup>26</sup> Saulusre hubayeikoke mo, na hibi yaweungehoke Antiokhia yore ekete. Nebei yona Yesusre hila rabore halaeinye yo nolone ralo yakama mbai nekeikoke. Ro miyae helen Yesusle are keleimiyeye. Antiokhia yone Yesusre hakainyekoke mewate yore huba rawaiboke Kristen ro miyae yae kaenewaimi.

<sup>27</sup> Nebei hee yae Allah are weumi huwate yo mbemba Yerusalem yora Antiokhia yore ekate. <sup>28</sup> Nebei yo nolona mbai na ro Agabus. Allahle Roh yae a weunge walora a relen harewole, nda kani kela Israel moni mai kaban sele memminendere. (Na hele Ondofolo Klaudius yae hebewole hee yae yeuboke.) <sup>29</sup> Yesusre hakainyekoke yo a mbainye elaikeke naeise-naeise rambun ufekoke huluinye rambun-rambun arilewate Yudea kanina Yesusre hakainyekoke ro miyaere inyaimilere. <sup>30</sup> Elaikeke hului mokaikokene, Saulusle Barnabasle nebei rambun arilaisike bele ukaimile Yudea kanina jemaat naei be yun be yebae bokore ekete.

## 12

### *Weitasi Kowaimi*

<sup>1</sup> Ondofolo Herodes nebei hee yae Yesusre hakainyekoke yore meuboi auboise kommilere hiwa yo ikileukoke. <sup>2</sup> Ondofolo Herodes yae ukeumi Yohanes na aka baeke Yakobusre rame yae haiboke. <sup>3</sup> Yahudi ro miyae yae nda wanen mokowolere erewate kena hele kowatene, benen Herodes yae ukeumi Petrus bele ikilenaibonde. Israel naei yobe naei kamahe naei Mesir kanine rotu ragi ban anaikoke bene nekei-nekei ya kabanne ((Paskah)) kowate ya yae yeuboke. <sup>4</sup> Petrusre ikilaiبوke na hibi kawane ahaeinyekoke, felayo raka keli naei kayaare hebewate. Raka mbai ro keli. Herodes merau raungehike Paskah ya kaban baensondera wa, nebei yona are kolaimi yo bene Petrusre a hinenainyelere.

<sup>5</sup> Nebeinye Petrus kawane mo ahaeinyekoke hebeumeke, nebeibe Yesusre hakainyekoke riya mbai imae mbainye Petrusle naeise Allahre ebeli na hibi-hibi mo bowainye.

<sup>6</sup> Ya hembonde Petrusre a koloikoise yawennehonde enate reniai Petrus rantai bee yae na me rinainyekoke kayaayo ro bee hele nolone ijongku honoumeke. Kawa romaunge, kayaa yo hiwa nane merau kayaa ayaeisake. <sup>7</sup> Allah na malaikat Petrus honole ijene yakaiboi meungeyakauboke. Nebei ijene hehe naeukoke. Malaikat Petrusre me yae neungehike aungke, "Ainyu hasale yae!" Petrus na mene rame ha rinewainye rubouboke ruke.

<sup>8</sup> Nebeisa malaikat yae weunge, "Wa ambelae bele oro mehau bele hireiko." Malaikat ukeunge huluinye Petrus nambelae bele oro mehau bele hireukokera malaikat benen weunge, "Ninae hireukokaena, rare hakoisobo." <sup>9</sup> Petrus nebei malaikatre hakoungeboko na hibi moinya meibaleke. Malaikat yae mahi-mahi mokowolere Petrus isian, na ijoko ka yae raneungeboko na be baete yae mo na u benera nekewainye. <sup>10</sup> Ekete kayaa yo raka mbai bee bele moi wokete, yore enayembonde besi yae mokaiboko romau kaban be rainyehike. Nebei romau kaban nenaiejae wekeunge, hokolo bee eibalekete, nibi fofu mbaisa aloinyekoke hee, nebei malaikat nundeiboi yae nundeuboko Petrusre nukeungeboko.

<sup>11</sup> Petrus naei une yeuboke naeise nebeisa wa u bene rouke, nebeisa elewole, "Mana reyae isaeyebokale. Herodesle me eisa nane merau Yahudi naei nun yoko yae merau kolowainye eisa Allah nana hesele Na malaikatre ukeunge raei hayeikoise meke."

<sup>12</sup> U bene nekainyekoke mo, Petrus aloungokoke Yohanes (nane merau Markus yae kaeneyainye) nenake Mariale imaere eke. Nebeinye ro miyae helen arilewole Allahre ebeline bowainye. <sup>13</sup> Bere bohina romaufa Petrus me kaba-kaba boukoke mo, maengke

mbai, yebaei bubaei, na ro Rode meke romaufe rawennebondere. <sup>14</sup> Petrusle a faeuko roungeboke, Rode rei yae aungebokene eise hakauboke eke, nebei romau bae eraweiboi. Nebei ro miyae einye nekate yore weumi, "Petrus moinya meke hebele."

<sup>15</sup> Nebei yo yae wainye, "Weyae keube koyae!" Naendae wanen hororebe Rode a na helene mo elae hebewole weumi ndi Petrus hele eke hebelebe, nebei yo yae wainye. "Nebei naei malaikat ya!"

<sup>16</sup> Nebeinye kolowainye, Petrus me kaba-kaba na boi-boi mo bowoke. Nebei ro miyae mekate romau rawaiboke Petrusre erekainyelene fangkengke yae bowate. <sup>17</sup> Are hinenainyelerebe, Petrus me kaukau koumikoke. Nebeisa Allah na mekai kawa eisa yawungehoke meibaleke ahubane huwoumi weumi, "Embe, Yakobus nane merau aei aka baeke hiwa yore huwemmikombe." Baeufoke bae, Petrus benen anuwau hire yae ewole.

<sup>18</sup> Ya heuboke na rene hele, nebei kayaa yo nolone aku keteuboke elate, "Petrusre rahe yae meke mokoungeboka?" <sup>19</sup> Nebeinye Ondofolo Herodes ro miyaere ukeumi Petrusre baewainye, nebeibe ehubayeikoi. Ondofolo Herodes nebei kayaaere hebewate yore a hineumikokera ukeumi honaikondere.

#### *Ondofolo Herodes Hereke Molowainye*

Nebeisa Herodes Yudea kanira eke Kaisarea yone eke nekewole. <sup>20</sup> Tirus bele Sidon bele yona ro miyae bele Ondofolo Herodes bele heki hele kena ikele nekaimike. Herodesle me keleene honole kanina raman nebei yo bee naeisa roi yae yaroyeumine, Herodesle bokore ekate foise mokonaikondere. Nebei yo bee na ro hiwa ekate Ondofolo Herodesle imae eise mere mokole ro na ro Blastus, a moi-moi yae mokainyekoke nare hakoumiboke. Nebeisa Ondofolo Herodesle bokore mekate.

<sup>21</sup> Are elaikoke ya, Herodes na yo malo yan malo keteungeboka ike na kendan wameranne yeunguweuboke, na ro miyae arilewole bene a na kaban mae kaenele. <sup>22</sup> Borowainye ro miyae naeise-naeise kaenate, "Nda walobo a faeukobe elele, ro hele miyae hele naei a faeuko ban!" <sup>23</sup> Allahre ei omoloiwai nebeibe naei uwa yae kaeubokene, Allah Na malaikat meke Ondofolo Herodesre me fae uke, na kendan wameranne hen mae kana yae nau nemene folaiiboke, hereke.

<sup>24</sup> Allahlena a foi faeu foi hurewole nane merau Yesusre hakowainye ro miyae emerei-emerei emerewole.

<sup>25</sup> Barnabasle Saulusle Antiokhiana yo naeinya rambun Yudeana Jemaat yun-junde waheimikoke baeufokera hokolo bee benen Yerusalem yora bukeibokete, Yohanes Markusre yawainyehoke nanembaisa ewate.

## 13

#### *Barnabasle Saulusle Yaraikoke*

<sup>1</sup> Antiokhia jemaatna ro miyae nolora hiwa Allah a weumi huwaimi meli mekai bele hiwa hiwa ro miyaere isaeise kelaeimi meli mekai bele. Nda na ro niyae: Barnabas, Simeon (u elan nokombi yae iwewainye), Lukijs (Kirene yona ro), Menahem (Ondofolo Herodesle nanembainye narewate), nane merau Saulus. <sup>2</sup> Ya mbai Allahre ei molowainye nane merau yarele me haeiboke nekewate yae, Allahle Roh yae a weumi, "Reyae mokoungihakale rambun mokoneyende naeise Barnabasle Saulusle kinyenseko." <sup>3</sup> Yarele me haeiboke nekewate nane merau Allahre ebeli bainyekoke wa, hokolo bee Saulusle Barnabasle u ranne me kolaimikokera ukaimile ewote.

#### *Siprus Yokobare Eket*

<sup>4</sup> Allahle Roh yae ukeumi ewotene, hokolo bee Barnabasle Saulusle oro moloiboke Seleukia yore ewote. Eket mo, na hibi bu wakara Siprus yokobare ewote. <sup>5</sup> Eket Salamis yone mo, Yahudi naei ei mom-mom imaene Allahle ako faeuko kelewoimi. Yohanes Markus hokolo bee hakoi-sakoise nangkele hakoumiboke ewate.

<sup>6</sup> Siprus yokoba oroiroke yaneikoke, ekete Pafos yone. Nebei yone Yahudina ro mbai na ro Bar-Yesus hubayaikoke. Na yun buloo maemae koungekoke. Nauware yendo kayaalo yae elewole. <sup>7</sup> Sergius Paulus Siprus yokobare Gubernur hebewole kiyae, nda Bar-Yesusre naei kahili. Nda Gubernur isaei bele hebaen bele ro. Allahlena ako faeuko borombondere kena hele kowolene, hokolo bee Barnabasle Saulusle kaeneumikoke. <sup>8</sup> Nebeibe hokolo beere Elimas yae (Bar-Yesus na ro Yunani afaeunge) ahei-aei yae ahewoumi, Gubernur Sergius Paulusre mokowoungue Yesusre na hele yae eleijae. <sup>9</sup> Naendae mekaisebe, Saulus (nane merau Paulus yae kaenainye kiyaere) Allahle Roh yae maemae koungekoke eke Elimasre na ijoko bele keungekoke weunge, <sup>10</sup> "Ei, walobo yunbe kelu, foise moise horoyae kalayae, ame-ame na no. Allahlena na hele

wali nibire weyae mekay horoyae kalayae. Makei yare me no yele? <sup>11</sup> Mana erei Allah ehee bukulure inyeterere! Wa ijoko roroneukonde hu ijoko ereiboi yae ya heki holo meungekeukonde.”

Nebei hee, Elimas na ijoko hubawounge mangko nokombi wanen mae feleungeboke. Elimas meka-meka baewole ro miyaere ikilembonde nare yawenainyehonde enatere baewoumi. <sup>12</sup> Gubernur Sergius Paulus nebei wanen yeuboke erewolene, Yesusre hila rabo halewounge, Yesusle a faeufe borowole eme hele yae elewole.

*Antiokhia Yo Pisidia Kanine Allahle A Kelewaimi*

<sup>13</sup> Pafos yora Paulus na kahili wa riyana bele Pamfilia kanina Perga yore ekate. Ndane Yohanes Markus, Paulus naeise nukeumiboke bukeufike Yerusalem yore ewole. <sup>14</sup> Paulus naei Perga yora alainyekoke Pisidia kanina Antiokhia yore ewate. Sabat yane Allahre ei mom-mom imaena ayeuboke nuwaikeke nekewate. <sup>15</sup> Musale walora wali heere foloukoke homo nane merau Allahle yenjo kayaayo molaikoke homone raikoke baeufoke mo, ei moloi-moloi imaena yun-jun mae Paulus nane merau na kahili wa riyana nare waimi, “Aka naei baeke naei, mayae na huluinya nda ro miyae na kena ure hara rorommilena, nebei a faeu huwengko.”

<sup>16</sup> Paulus aunguke me yae isaei ikeumi wa, huba raweuboke huwoumi, “Aka naei baeke naei Israel yoni-yoni, nane merau aei aka naei baeke naei Yahudi ban ro miyae Allahle are faeufe boroyaube hakoyaunge yo, rare boronsobo! <sup>17</sup> Israel yoni-yoni naei Allah aei yobe naei kamahe naeise eleumiboke wekeumi. Mesir kanine meiko-meiko yo wanen mae ekainyekewate hee yae Allah mokoumiboke yoho kabande yeuboke. Allah Naei elae wake kaban mae Israel yaweumiboke Mesir kanira maibaleke. <sup>18</sup> Ralo yakama rorele u bee a kala-kalane naei u mekai wa mekai beko nekaimekere Allah kena yae herauweumeke. <sup>19</sup> Nebeisa Kanaan kanina nekewate ondofolo mehine bee na ro miyae bele Allah houkoke hayeukokera nebei kani Israelre kinyewoumi. <sup>20</sup> Mesir kanire ayeubokera mekate Kanaan kanire mayeuboke, nemene fomene me baeimeke na heki ralo yakama 450.

“Kanaan kani waheumikoke baeufoke mo, Allah walire hului kolaimi yore kinyeumikoke. Walire hului kolaimi yo naei huba mokoikoinya kiyae Allahle yendo kayaalo Semuel niyae. <sup>21</sup> Nebei heene Israel Ondofolore riyewate. Kisle kelu Saul Benyaminbe orona menabe Allah kinyeumiboke. Ondofolore ralo yakama rorele u bee meufebeukoke. <sup>22</sup> Saul Ondofolora kereungekoke oke mo, Daudre raneuweke benen nebei anuwaufe haungeboke mokowole. Daudle naeise Allah nda wanen mae eleukoke, ‘Tsaite fa Daud erekanale Raei kenane eweufike. Raei kenare kale neyae mokombonde.’ <sup>23</sup> Daudle orona menara Israel naei Walilo Yesus Wali Ondofolo raneujeke, Allah are heteungekoke huluinye. <sup>24</sup> Yesus namman Naei kalia huba eraweiboi omokoi hee yae, Yohanes Israel ro miyaere a kaenewoumi weumi, ‘Mai beko bakora nulu kenayembe, bu kombombe.’ <sup>25</sup> Yohanes mokoukoke kaliare riyaufe bonnele hee, rore miyaere weumi, ‘Mai u benera nekayembe rare nde yae elauke? Reyae nebei mayae rakaunge Wali Ondofolo ban ma. U bene nekenayembe, nebei Ro raei moisa mende, Naei oro mehaufe reyae ekulaikoi sului, rabuhine ban Naei bene reyae yeisi raeiboi ban.’

<sup>26</sup> “Aka naei baeke naei Abrahambe orona mena yo nane merau aka naei baeke naei Yahudi ban yo Allahle are boroyaube hakoyaube yo ndane mekaufebaube yoni-yoni, Allahlena wali hole molommehonde a faeu ukeume huwemamilere. <sup>27</sup> Yesus mbai Wali Ondofolo Niyae Yerusalem yona nekewate ro miyae bele naei be yun be yebaere hebewate yo bele onewate handawate. Allahle yenjo kayaayo naei a faeu molowate Sabat ya yae kayeke borayeke. Nebei a faeu hului neyae isaei eyeiboi yae Yesusre haibokate. <sup>28</sup> Naendae wanen horo Nare honaibondere nibi baewate an, nebeibe ekate Pilatusre riyewainye nare honaibondere. <sup>29</sup> Allahle homofae molaikoke hului nemene maimokoukoka, nebei ohali randa roukate, rukara buleinye nekainyele. <sup>30</sup> Nebeibe herera Allah benen waleungeboke. <sup>31</sup> Ya helan ro miyae nangeke Galilea kanira Yerusalem yore mewate yore naei u yakawoumi. Nebei yo mbai naei ijoko yae erewate are Israel yoni-yonire ungaimiyendere. <sup>32-33</sup> Aka naei baeke naei, nda a foi faeu foi mare mekaiwayembe. Allah aei yobe naei kamahe naeise a heteumikoke hului Yesus herekera waleungeboke, aei foi naeise. Homofae Mazmur fasal bee nendone nda a Yesusle naeise molaikoke, ‘Weyae Raei fa,

mana yara Reyae waei Araise yeubokale.’\*

<sup>34</sup> Allah Yesusre herendera walennebonde, benen here hubayeikoi mo nekenende naei a nendahina Naei yendo kayaalo Yesayale homofaene nda wanen moloukoke,

\* 13:32-33 13:32-33 Mazmur 2:7

'Reyae Ondofolo Daudre are heteungekokale rambun yoni-yoni Ware isete nane merau onomi foka yae ei hawerewende.'†

<sup>35</sup> Nane merau nebei homofae Mazmur mbai anuwau hine Allah naeise nda wanen moloukoke,

'Waei eleubokae wekanae Kiyae

Nauware nendon kanine kaka bende naeise Weyae ewaeisi.'‡

<sup>36</sup> "Ondofolo Daud Allah ukeunge rambun-rambun mokoukoke baeufoke mo, hereke na yobe naei kamahe naeite bulei kelaeunge molaisake. Ondofolo Daud na u melen nemene kanine beko yaeiboke. <sup>37</sup> Nebeibe Yesus mbai Allah yae herekera waleungeboko, Nauwa kakare eyeiboi. <sup>38</sup> Nebeinye, aka naei baekae naei, mayae isaeisembombere Yesusle walora Allah beko bakore faeinyembonde a huwayembe. <sup>39</sup> Musale walora wali heere foloukoke hakowainye walora wali himalainyeboko yo yae me ebaei sului, nebeibe nde naei Yesusre hila rabo halenainyele yo wali himalainyeboko yo yae me baemmile. <sup>40</sup> Nebeinye wamale, aka naei baekae naei, angkaei foi yae borombe. Nda Allah yae elewole a Allahle yenjo kayaayo homofaene molaikoke hului mai nolone menjembonde belene, mauwa kayaa hebembe,

<sup>41</sup> 'Ro miyae aukakare koyaube yo,

ijoko foi yae eren,

ijoko kelei-kelei mo engkelembera enserembombe!

Mayae nekembe heene,

Reyae merele rambun hi mokorebonde,

nebeibe mayae na hele eleikoi sului.

Ro miyae kelekokayembe hororebe,

mayae namman a helere eleikoi.' "§

<sup>42</sup> Paulusle Barnabasle ei moloi-moloi imaera meibaleke yae, nebeinya ro miyae hokolo beere uwaimile benen nebei a mbaise bena Sabat yane ahuneneinyebonde. <sup>43</sup> Ro miyae nebei ei moloi-moloi imaera maibaleke bae, hokolo beere na moisa hakowaimi. Hiwa Yahudi ro miyae, hiwa Yahudi ban ro miyae nebeibe Yahudi agamane ayeuboko. Paulusle Barnabasle a usaei uwoimi Allah kena buhae aere ban heumine Naei a weumi huluinye nekenate.

<sup>44</sup> Are rainyehike Sabat yane, ro miyae nebei yo einya helen wanen arilewole, Allahle ako faeukore boronaterere mewate. <sup>45</sup> Nebeibe Yahudi ro miyae ijoko erewate ro miyae helen sele mewatene, kena hensan sele kowate. Paulus elewole are aukaka yae kowainye.

<sup>46</sup> Nebeibe hokolo bee, Paulusle Barnabasle, buhae ohokoiboi benen elayeiboko a na yaka-yaka yae uwaimi, "Na hele Allahle ako faeuko na bere hele mare kelemayengkombera. Nebeibe maei are moi bulewaume nane merau menaeijae a hokaukoke mayae wali hena bona eyaroinye, meyae nda hee mare nukemayembombe Yahudi ban ro miyae naeise emalere. <sup>47</sup> Rabuhine ban, Tuhan are ukeume, 'Reyae ware eleubokawale,

ro miyae Yahudi ban yore iseha wanen mae naeumihombere.

Nda kani kelana ro miyae nemene

wali hena a faeufe huwemmiyembe.' "¶

<sup>48</sup> Yahudi ban ro miyae nebei are borokate hee, rei aumiboko kowate Tuhan Yesuslena ako faeuko na hele elewate. Nebei ro miyae Allah a hokoukoke hului wali hena bonare enaijaronde yo, Yesusre hila rabo halewainye.

<sup>49</sup> Tuhan Yesuslena ako faeuko nebei kanine heraeueyuboko huwayeke. <sup>50</sup> Nebeibe na yona miyae maengke Allahre enera raisa yaneyainye yo bele rora raimi yo belere Yahudi ro miyae yae Paulusle Barnabasle naeise a beko huwaimikoke. Nebei Yahudi ro miyae hiwa yore moi hurewaimi hokolo beere weitasi kowaimile nane merau nebei kanira hukaimihike. <sup>51</sup> Nebei yo u mekai beko hele mokowatene isaeise roungate naeise nebeinya ro miyae bene Paulusle Barnabasle noro mehaunga kani bahe ruboinyeboko, nebeisa Ikonium yore ewote. <sup>52</sup> Yesusre hakainyekoke ro miyae Antiokhia yona yo rei mai bele nane merau Allahle Roh yae aumiboko bele maemae kouwaimikoke.

## 14

### *Ikonium Yone*

<sup>1</sup> Hokolo beere Antiokhia yone mokowaimi wanen mbai Ikonium yone mokowaimi. Yahudi naei ei moloi-moloi imaere hokolo bee ete eikeleimine, Yahudi ro miyae bele

† 13:34 13:34 Yesaya 55:3 ‡ 13:35 13:35 Mazmur 16:10 § 13:41 13:41 Habakuk 1:5 \* 13:47 13:47 Yesaya 49:6

Yahudi ban ro miyae bele nebei a faeu elewote na kena une akaibokene, Yesusre na hele yae elewate, hila rabo halewainye. <sup>2</sup> Yahudi ro miyae hiwa, Yesusre hila rabo ehalei yo yae, Yahudi ro miyae ban yore a huwaimikoke Yesusre hakainyekoke mate yore ikele konaimilere. <sup>3</sup> Nebei aerene Paulusle Barnabasle Ikonium yone heki holo nekeikoke. Allah ro miyaere kena buhae aere ban mae heumine Yesusre ukeunge meke a foi faeu foi be yae rabuleiboke huwewoimi. Nebei a faeu na hele yeubokere yakambonde naeise, Allah hokolo beere Naei elae wake kiteumiboke nane merau rambun emere-emere roko helen mokowote. <sup>4</sup> Nebei yona ro miyae holo beere kayee waheukoke. Hiwa Yahudi ro miyaere hakaimikoke, hiwa yo Paulusle Barnabaslere hakaimikoke. <sup>5</sup> Nebei Yahudi ro miyae bele Yahudi ban ro miyae bele naei be yun be yebaere hebewate yo bele merau kolainyemeke hokolo beere beko mokonaimikondere ruka yae hainyaimikondere. <sup>6</sup> Merau kolowainye hokolo bee isaeyeibokene, u hale yae hakaikoke Likaonia kanina yo bee Listrale Derbele nane merau nebeinya yo hiwa enena honate belere yae ewote. <sup>7</sup> Hokolo bee benen Yesuslena a foi faeu foi nebeinya ro miyaere ekeikelewoimi.

*Hokolo Bee Listra Bele Derbe Bele Yone*

<sup>8</sup> Listra yone ro mbai na honokatera noro nimainyekoke honoweke. Noro elae banne ele mele okoyei nekeweke. <sup>9</sup> Nda ro Paulus are eyelele ijenne nuweiboyole boroung, Paulus na ijoko erewoung nda ro na hila rabo randa na hulu onomi rowende. <sup>10</sup> Paulus ijoko erungokoke mo a na kaban don mae weunge, "Wenaero yo yae ainyu hebeikol!" Nebei ro honoungehike na hibi nenaero yo yae ele mele kowole.

<sup>11</sup> Ro miyae helen sele Paulus nebei rore augenuke ele mele kowole erewatene, Likaonia afaeunge kali yae elate kaenete, "Kunna waunga yo rore miyaere waijeukoke." <sup>12</sup> Nebeinye Barnabasre Zeus yae na ro baeynehoke nane merau Paulus are elewote kiyaene Hermes yae na ro baeynehoke. <sup>13</sup> Walobo Zeusle naei ei moloi-moloi imae Listra yo kelaeunge hebelen imam sapi mukuure mo yaweumiboke, o kui ha kui hokowole, nebei yona romau kabande eke. Nebei yona ro miyaere hakoumiboke nanembainye Paulusle Barnabaslere hili era akau erare hebenaimilere.

<sup>14</sup> Barnabasle Paulusle nebei wanen mokonaibondere isaeyeibokene, hokolo bee malore mo kaneikokete nebei ro miyae hebate nolore yae hakaikoke ete wa kaenete, <sup>15</sup> "Rahene maere nda wanen mokaume? Meyae ro miyae mangele na hului mbai. Aka naei baekae naei, meyae Yesuslena a foi faeu foi mare umayemberene ndare mekande. Rabuhi ban rambun hayennekombe. Allah nda yaku bele kani kela bele nane merau neinya rambun nemene mokouboke Kiyae a wembe huluinye nekembe. <sup>16</sup> Na bere hele nekewate ro miyaere Allah waemuhike wali naei kenana hului nekayeke. <sup>17</sup> Nebeibe Allah u mekai foise mokoyele Kiyae naeise aere isaeyemmele. Ya bumara moloyele ikembe nane merau ani foi era foi na ralone yakamane yeyembe walora Neyae kena nime haba mokowembe. Rei mai bele eraman era bele yae mai kenare moloyembe." <sup>18</sup> Nebei a Paulusle Barnabasle weimi hororebe, hili era akau era hebenaimilere mekate yo a hun koloi-koloi an.

<sup>19</sup> Na heki ban nekeikoke mo, Antiokhia yona bele Ikonium yona bele Yahudi ro miyae Listra yore mekate, nebei yona ro miyaere a huwaimikoke nare hakaimikoke. Nebei yo Paulusre ruka yae hayaeyekokera na hibi ara muli yae yobayeke. Na u benera Paulus hereke yae elaikokene, yo moinye wokate honowole. <sup>20</sup> Nebeibe Yesusre hakainyekoke ro miyae na u ele yae naeyebokere hebewate hee Paulus auguke benen Listra yo eise ewewifike. Ya heuboke mo Barnabasle nanembaisa kulun ukete Derbe yore ewote.

*Paulusle Barnabasle Antiokhia Yo Siria Kanire Bukeiboke Ewote*

<sup>21</sup> Hokolo bee Derbe yone Yesuslena a foi faeu foi huwoimi. Ro miyae helen sele Yesusre hila rabo halewainye. Nebeisa Listra yo bele Ikonium yo bele Antiokhia yo belere bukeiboke ewote. <sup>22</sup> Nebei yona Yesusre hakainyekoke ro miyae na hila rabo aiminuke nane merau moi hurewaimi Yesuslena a elelere hila rabo halainyele wali ma yae nekenayende. Paulusle Barnabasle nebei yore weimi, "Yesusle me kelee u keleene nekate holonare emayembonde naeise beko helen hubamangkonde hele." <sup>23</sup> Jemaatre bewate yone Paulusle Barnabasle nebei jemaat naei be yun be yebae yaroikoyote. Nebeisa ebeli meiboyainye nane merau yarele me heiboyainye mon nekeikoyatere wa, nebei be yun be yebae Tuhan rabore halaeinye Kiyaele me einye kinyeiboyainye. <sup>24</sup> Paulusle Barnabasle benen aloinyekoke ewote Pisidia kanira mo Pamfilia kanine ekete. <sup>25</sup> Perga yone Yesuslena a foi faeu foi huweimikokera, Atalia yore ekete.

<sup>26</sup> Atalia yora bu wakara beiboke Antiokhia yo Siria Kanire ewote. Na bere nebei anuwaunge Paulusle Barnabaslere kaliare mokonete naeise Allah kena buhae aere ban mae heumi Kiyaele me einye kinyaikoke nebei kaliabe nda hee yae riyau mekeiboinye.

27 Antiokhia yore ekete hee, nebei yona Yesusre hakainyekoke ro miyae arilaimihike. Hokolo bee naei wali walora Allah me u mokowole ahuba bele Allah nibi wekeunge Yahudi ban ro miyae na hului Yesusre hila rabo halenainyele ahuba bele huwewoimi.  
28 Nebei yona Yesusre hakowainye yo nolone heki nekeikoke.

## 15

### *Riya Kaban Yerusalem Yone*

<sup>1</sup> Ro miyae mbemba Yudea kanira mekate Antiokhia yona Yesusre hila rabore halaeinye yore kelewaimi, "Musa kelewoumi era hena huluinye ro uwa elan ofoloikoinya mai wali hole omoloiboi sului." <sup>2</sup> Paulusle Barnabasle nebei yo bele akure yeuboke howate. Nebei are Yesusle abu ako na hiwa bele nane merau nebeinya jemaat na be yun be yebae bele enayelengkonde naeise, Paulusle Barnabasle na ro hiwa bele yaraikoke Yerusalem yore enatere. <sup>3</sup> Antiokhia Jemaatna yo bele yo moinye ekate mo "Moro foi yae embe," a waimiyeke, nebei yo riyana kulun ukate Fenisia kanira Samaria kanire ewate. Nebei kani beene huwaimi, "Yahudi ban ro miyae helen Yesusre hakowainye." Yesusre hakainyekoke ro miyae nebei a borowatene rei sele kowate. <sup>4</sup> Yerusalem yone mekate hee, nebei jemaatna ro miyae bele Yesusle abu ako bele nane merau nebei jemaatna be yun be yebae bele na foi sele ei hauwaimile, hokolo bee walora Allah me u mokowole yoni-yoni nemene a huwaimi.

<sup>5</sup> Nebeinye Farisi holona ro hiwa Yesusre hakainyekoke yo yae afae yae yaeisureukoke, elate, "Yahudi ban ro miyae Yesusre hila rabo halaeinye yo na ro uwa elan folonaimikonde hele nane merau Musale walora wali heere foloukoke are hakonate hele."

<sup>6</sup> Yesusle abu ako bele nebeinya jemaatna be yun be yebae bele nebei are kolonainye naeise riya mewarileufike. <sup>7</sup> Heki hele isaei hira-hira elayoke wa Petrus afae yae aunguke weumi, "Aka naei baeke naei, mayae nemene maisaei ya naennaen hului moise hayaendekokene, Allah yae mai nolora rare eleufeboke Yahudi ro miyae ban yore Yesuslena a foi faeu foi keleremile boronate nane merau na hului Yesusre hila rabo halenainyele. <sup>8</sup> Ro miyae naei kena einyere royeumi Allah Naei Roh aere ikeume hului mbai nare ikeumi. Nda nibi yaere, meyae isaeyaendeboke Allah nare buhae heumikoke. <sup>9</sup> Allah be ijokore ereyei. Na hila rabo halaete walora na beko bako faeinyeumiboke. <sup>10</sup> Eyae nane merau aei yobe naei kamahe naei Musale walora wali heere foloukoke a huluinye eneki tonbe. Rahene mayae Yahudi ban ro miyaere waumile wali heere foloukoke a hului nekenate hele walora Allahre umalibe hubaunge? ((Rabuhine ban Allah nebei a ewei!)) <sup>11</sup> Nebei wanen mae omokojiae hele. Eyae hila rabo halaende Yesus Wali Ondofolo kena buhae aere ban mae heumene wali hole molommebonde, Yahudi ban ro miyae hului mbai."

<sup>12</sup> Paulusle Barnabasle walora Yahudi ban ro miyae nolone roko helen Allah rambun emere-emere mokowole ahuba huwoumine, nebeinye arilewole yo koro ban yaeiboke.

<sup>13</sup> Hokolo bee huwoumi a baeufoke mo, Yakobus yae weumi, "Aka naei baeke naei, rare boronsobo. <sup>14</sup> Simon manemfa aere weumekoke, Allah na bere hele Yahudi ban ro miyae nolora ro miyae hiwa eleukoke wekeumi Naei holona ro miyaere inyaibondere. Nebei me u walora Allah keleumeboke Neyae Yahudi ban ro miyaere nou heumi. <sup>15</sup> Allah na yenjo kayaayo nebei a eleukoke mbaibe homofaene nda wanen moloukoke,

<sup>16</sup> 'Reyae merele

Daud na yo waku ruke honole benen arenkunde.

Na ro miyae nemene arileremihinde

nane merau mokoremibonde benen yoho mbai yae nekenate.

<sup>17-18</sup> Tuhan Allah nendahnya merau raungehike are ro miyaere isaeyeumi Kiyae yae nda a eleukoke,

arileremihinde ro miyae

Tuhan kenare kole huluisse baenainyele

nane merau Yahudi ban ro miyae

Raei me kelee u keleene nemainyekende yo.' „\*

<sup>19</sup> Yakobus benen weumi, "Raei u benere nekaise nebei Yahudi ban ro miyae Allahle wali nibire oronate yore eyae oro halun ehayeijae. <sup>20</sup> Men, nda a usaei ma yae hormone molomakonde imamilere. Hoimere bahere eise molaimina raman aneijae. Yoko kaeimae nemene hee rorombe. Obo yoku ha einye heikoyeunge herele na melen aneijae, nane merau ha aneijae." <sup>21</sup> Rabuhine ban aei yobe naete kamahe naete heera meke nda heene bele na Sabatne baei ei moloi-moloi imaene Musale walora wali heere

\* 15:17-18 15:17-18 Amos 9:11-12

foloukoke a huweimeyate nane merau nebei homofaena mai yone-yone huweimeyate boromeyaube.

*Yahudi Ro Miyae Ban Yore Homo Molaikoke Ikaimi*

<sup>22</sup> Yesus naei abu ako bele nebei jemaatna be yun be yebae bele nane merau nebei jemaatna yo nanemene a hokaikoke ro hiwa naei nolora yaronaikonde Barnabasle Pauluslere hakonaimikonde nanembaise Antiokhia yore enatere. Yudas Barsabas yae wainye kiyaele Silaslere yaraikoke. Hokolo bee Yerusalem yore Yesusre hakainyekoke aka baeke naei be yun be yebae holona ro bele yo. <sup>23</sup> Homo mbai molaikoke nebei yo na mene ikaimile roungayendere. Nebei homone nda a molaikoke,

Aka naei baeke naei Yahudi ban ro miyae, Antiokhia yona, Siria kanina, Kilikia kanina, ekaunekaube yo! Meyae Yesus Na abu ako bele, jemaatna be yun be yebae bele, nane merau mai aka baeke wa bele naeise, onomi foka mare a melaeyayembe.

<sup>24</sup> Meyae a borowande ro hiwa maei nolora mai bokore ekate nane merau naeinya a usaei kelewayembere mayae onei-onei onaeube, erabae mai keleikoise meyae ro miyae mbai ewei ei mo. <sup>25</sup> Nebeinye meyae riya nekandekoke kena mbai yae ro hiwa yarandekoke nane merau ukammile buhaere haemmile Paulusle Barnabasle enete homone hakoneikonde mai bokore enatere <sup>26</sup> Hokolo bee Paulusle Barnabasle na wali buhae hokoiboi ban mae aei Tuhan Yesus Wali Ondofolole kaliare mokowote.

<sup>27</sup> Meyae homona molowande a naei euwa yae ungayembe naeise Silasle Yudasle mai bokore ukammile ate. <sup>28</sup> Allahle Roh nda a yakaumboke nane merau meyae kena foi hubannele mare Yahudi naei era hena yoni-yoni hakongkombere waeli ebei, nda holonabe emmokombe: <sup>29</sup> Hoimere bahere eise molonaimile na raman aneijae, ha aneijae, obo yoku ha einye hekoyeunge herele na melen aneijae, yoko kaeimae hee rorombe. Nda me u moi hayennekombena, mayae na foi sele hubannele. Nda heene, onomi foka!

<sup>30</sup> "Oro foi embe" a waimiyeke, nebei yo kulun ukate Antiokhia yore ewate. Nebei yona jemaat nanemene arilaimihike mo, nebei homo na mene ikaimile. <sup>31</sup> Nebei homofaene kaikokera jemaat na kena rei mai sele kowate, rabuhine ban nebei a na kena u harare rorumine. <sup>32</sup> Yudasle Silasle Allah weumi a hungeimile na meli mekai bele. Naei a eleikoke walora Antiokhia yona Yesusre hakainyekoke yo naei kena u bele naei hila rabo bele ainyunuke. <sup>33</sup> Yudasle Silasle Antiokhia yone heki holo nekeikoke mo, Antiokhiana yo yae ukeumi benen onomi foka yae bukaimiboke Yerusalemna Jemaat nolore enetere. <sup>34</sup> Nebeibe Silas naei kena kowole Antiokhia yone nekendere.† <sup>35</sup> Paulusle Barnabasle Antiokhia yone heki holo nekeikoke. Hokolo bee nane merau ro miyae hiwa helen baraikoke nanembainye Tuhan Na wali nibi are huwaimi nane merau kelewaimi.

*Paulus Barnabasle Kayee Moloikoke*

<sup>36</sup> Ya heki ban nekaikoke mo Paulus yae Barnabasre weunge, "Mei, naei foi sele eyae bukabon aei aka baeke Yesusre hakainye ro miyae Tuhanbe wali nibi are kelewammile yone yanne nekeyate na wali mare ijoko eramiyendere bukabonde alere." <sup>37</sup> Barnabas yae Yohanes Markusre yawennehondere kena kowole. <sup>38</sup> Nebeibe Paulus na kenara hubawoungwe Markus ehakoiyae, rabuhine ban Paulus naeise roko mbai na kalia riyau eweiboi yae Pamfilia yone nukeumiboke. <sup>39</sup> Hokolo bee Markusle kenana a oyeiboke kilewotene, kayee moloikoke. Barnabas Markusre yaweungehoke Siprus yokobare ewote. <sup>40</sup> Paulus Silasre yaweungehoke. Antiokhia yona Yesusre hakainye aka baeke hokolo beere Allah kena buhae aere ban heumi Kiyaele me einye kinyaimibokera kulun ukete ewote. <sup>41</sup> Paulusle Silasle Siria kani bele Kilikia kani bele yaneyeke yae jemaat-jemaatna ro miyae na hila rabo halewatere harane roroimiyake.

## 16

*Timotius Paulusle Silaslere Hakoumiboke*

<sup>1</sup> Paulus Derbe yore ekeri, nebeisa Listra yore eke. Nebeinye Yesusre hakoungboko ro mbai na ro Timotius. Nenake Yahudi maengke Yesusre hakainye holona, nebeibe naeko Yunanina ro. <sup>2</sup> Listra bele Ikonium bele yona ro miyae elewate Timotius ro u mekai foi. <sup>3</sup> Paulus kena kowole Timotius nare hakonnebondere. Nebeinye Timotiusle ro u elan Paulus neungehake, rabuhine ban nebei yona Yahudi ro miyae naeisaei Timotius naeko Yunaninane. Yahudi era hena huluinye nebei me u mokowobo. <sup>4</sup> Paulusle Timotiusle oroyeke yo yoni-yonine ro miyae Yesusle abu ako bele Yerusalemna Jemaatna be yun be yebae bele are hokaikoke huluinye enaihakonde naeise, nebei a isaeiwoimi. <sup>5</sup> Nebei a

† 15:34 15:34 Ayat 34 homofae hena hiwa baraiiboke, hiwa ebaraiiboi.



isaeiwoimine nebei jemaat yoni-yoni na hila rabo hara rorowoimi nane merau na yane baei nebei holona ro miyae emerei-emerei erewole.

*Troas Yone Paulus Naijoko Ranainyeboke Erewole*

<sup>6</sup> Paulus nanembaisa orate yo bele Yesuslena a foi faeu foi Asia kanire kelenaimikondere Allahle Roh ewaeisinye, ekate Frigia kani bele Galatia kani belene yanewate. <sup>7</sup> Ekate Misia kanina hee ranne Bitinia kanire enayembondere, nebeibe Allahle Roh yae ewaeisi. <sup>8</sup> Nebei aere ne Misia kanine enekei, nebeibe Troas yore ewate. <sup>9</sup> Troas yone reniai yae, Paulus naijoko ranainyeboke erewole, Makedonia kanina ro mbai meke na bene hebeunguke weunge, "U hale yae maere meime hakoibone!" <sup>10</sup> Paulus nebei wanenda ereke bae, meyae\* na hibi rambunde mo mokannehake Makedonia kanire emalere. Menaeijae kena une hubannekoke Allah aere moibe hureume Yesuslena a foi faeu foi nebei ro miyaere umamiyendere.

*Filipi Yone Lidia Yesusre Hila Rabo Halewoungue*

<sup>11</sup> Meyae bu waka kabanda ewande Troas yora nandehike, ekande Samotrake yone. Ya heuboke mo Neapolis yone andenoke. <sup>12</sup> Neapolis yora mo, Filipi yore oro yae ekande. Makedonia kani Roma naei keleene nekate, na yo bereinya Filipi niyae. Meyae ya kali name hului nebei yone nekandekoke.

<sup>13</sup> Sabat ya yeuboke mo, maei u benera nekewaime Yahudi ro miyae Allahre ebelire bonainyele naeise wi enene arilensinderene, meyae yo ele naeiboke moi wokande nebei wi enere ewande, nebei anuwaunge randeboke miyae maengke hokoumeke yo bele ane elewande. <sup>14</sup> Nebei miyae maengke nolora hi na ro Lidia Tiatura yona miyae malo maye-maye fi kolei ma naise hele nane merau Allahre eise moloyeungene. Allah na kena u kuseungekoke, Paulus yae elewole are na hele elewole. <sup>15</sup> Lidia nane merau naei imaena obena ro miyae bele bu kaimikoke. Nebeisa maere naei imaere emalere waeli hele beumoke weume, "Aka naei baeke naei, reyae nana hesele Yesusre hila rabo halanale a yae mayae elaubena, mana ya mayae raei imaene ensombere." Na hibi-hibi weumeyokene, ehe kannekoke naei imaene ekansonowande.

*Paulusle Silaslere Filipi Yone Kawane Haemikoke*

<sup>16</sup> Ya mbai nebei ebeli boi-boi anuwaufe ewande yae, maengke mbaibe hubayaendekoke. Nda maengke yebaei bubaeise nekeyele. Alo yae aungebokene, rambunrambun bena yane enaibendere na hului elende. Ro miyae naei wali nyae mehinin kolowoumine, naei rowa-roware roi nekai arileumiyeye. <sup>17</sup> Nebei maengke Paulus maengkele mewande moisa na hibi-hibi mo hakoumeboke. Na kali bele kaeneumeke elele, "Nda ro miyae Allah Hubalo Mandole yobe mate! Wali hole molombombe mekai keleikoise mate!" <sup>18</sup> Nda maengke na rokone baei meukaenukokene, Paulus na kena herauke an. Nebeinye Paulus beufoke nebei alore weunge, "Yesus Wali Ondofolole Ro yae ware wawale, nebei maengkele u bulura eituwe!" Na hibi are ukeungera nebei alo eukuke.

<sup>19</sup> Nebei maengke na rowa-rowa isaeyaeiboke roise yarate nibibe aheumikokene, Paulusle Silaslere ikilaikoke naise haete anuwaunge Filipi yona yoyo koseyo naei bere muli yae yobayeke hukaimiyeye ewate. <sup>20</sup> Nebei yo benen Paulusle Silaslere yawaimiboke ekate Roma naei ondofolo kose yo bene haimikoke waimi, "Nda Yahudina ro bee mekete aei yo ei mokoinyeboke aku nekai keteuboke. <sup>21</sup> Neyae ro miyaere moi huraimi eyae Roma ro miyae yae wali heere folaikoke asasi konate naei era henare hakonaimilere kelaemi."

<sup>22</sup> Nebeinya ro miyae helen nangeke yae Paulusle Silaslere habelekaimile. Filipi mere mokowaimi yo yae ukaimile hokolo bee uwana malore mo kayaeimikokera rahuae bowate. <sup>23</sup> Rahuae olaeimikokera yawaimiboke ekate kawa einye aimihekoke. Kawa imae yunde hebele kiyae ukainyele kayaa foi yae hebemmile. <sup>24</sup> Nebei wanen mae a ukainyelene, nda kawa yun Paulusle Silaslere yaweumiboke, einya hele yowane aheumikoke. Eneibalende belene, hokolo bee naei oro o bulune hireumiboke benen noro randa o hi yae heraweuokoke.

<sup>25</sup> Reniai nolo hului kawa einya hebate yo, Paulusle Silasle Allahre ebeli bowoinye nane merau hobolo mandu yae buma kaewoinyere maeumikoke borowaimi yae, <sup>26</sup> oinyeu kabani hele hineuboke, nebei kawa imae aehu bele nene kowole. Nebei kawa romau nemene rawaikoke. Kawa einya yore ikilewaimi rantai yoni-yoni bulaerewate. <sup>27</sup> Nebei kawa imae yunde hebele kiyae kulu-kulu yeuboke aunguke. Nebei kawa romau nemene rawaikoke erewolene, nane merau kawa einya hebate yo hakaikoke aibaleke

\* 16:10 16:10 Nda homore moloukoke Lukas nangkele hakoumiboke ewate.

u bene nekewainyene, na ure hombondere na ramere mo nekeyobouboke. <sup>28</sup> Nebeibe Paulus kali na kaban don mae kaeneunge, "Wauwa ohoijsae! Meyae nemene ndane namman nekande!"

<sup>29</sup> Nebei kawa imae yunde hebele kiyae, isehe ((lampu)) ukeumi rokate mekatera riyemihike hakauboke eise eke, noro me oinyeu hineuboke kowole wa Paulusle Silasle bene ane ruke. <sup>30</sup> Nebeisa hokolo beere yaweumiboke maibaleke weumi, "Hokolo bee, rahebe reyae mokorebondera wali hole molonsebonde?"

<sup>31</sup> Paulusle Silasle weinye, "Tuhan Yesusre hila rabo haleungele! Weyae nane merau waei imae ei obe einya yo nemene mai wali hole molonembombe!" <sup>32</sup> Nebeisa Paulusle Silasle Allah Na ako faeuko nebei kawa imae yunde hebele kiyae bele naei imae einya ro miyae belere kelewoimile. <sup>33</sup> Nebei reniai mo, hokolo bee yaweumiboke nauwana ha kuyemikokera, kawa yun bele na miyae fa-fa bele nemene bu kaimikoke. <sup>34</sup> Nebei kawa yun Paulusle Silasle naei imaere yaweumiboke ekate raman koloumikokene anewote. Neyae nane merau naei imaera yo Allahre hila rabo halewainyene, rei mai sele kowole.

<sup>35</sup> Rene ya heuboke mo, nebei yona mere mokaimi yo na abu akore ukaimile kaware enate Paulusle Silasle hainyaimikonde. <sup>36</sup> Nebei kawa yun Paulusre eke weunge, "Maei yona mere mokaimi yo ukaimi wangkele Silasle haimayengkombere. Mana ninne mebale mau foi yae ebel!"

<sup>37</sup> Nebeibe Paulus yae nebei felayore weumi, "Meyae Roma ro miyae ya. A okoloikoi ban mae ro miyae bene rahuae baimekokera yawaimiboke kawane ahaimekoke. Nebei me u Roma kanina wali heere foloukoke are asasibe koukoke. Mana ya ukaimi me yae ndara na maleu-maleu wae abalendere na mekai ban selene me yae ahi. Nebei yona mere mokaimi yore wemmile nenaiejae menate maere hainyaimikonde."

<sup>38</sup> Nebei abu ako ekate mere mokate yore nebei a hului mbai ukaimile. Nebei yo borokate Paulusle Silasle Roma ro miyaene buhae hele hokoumiboke kowate. <sup>39</sup> Nebei aere ne mere mokowaimi yo yae Paulusle Silasle bele foise mokonaikondere mekate, yawaimiboke kawa eisa maibaleke. Hokolo beere uwaimi nebei yora eneibalendere. <sup>40</sup> Paulusle Silasle nebei kawa imae nukeiboke, Lidiale imaere ewote. Nane merau Yesusle einye aka baeke ware hubayaeikoke yore, na kena u hara roroimikokera, hokolo bee kulun ukete ewote.

## 17

### *Paulusle Silasle Tesalonika Yone*

<sup>1</sup> Paulusle Silasle aloinyekoke ewote Amfipolis yora, nebeisa Apolonia yora ekete Tesalonika yone. Nebeinya Yahudi naei ei mom-mom imae mbai hebele. <sup>2</sup> Paulus eyewole ijenne nebei u mekai mokowekene eweufike. Sabat ya name hele Paulus na hibi-hibi nebeinya yo bele Allahle homofaene a molaikokere hamewainye <sup>3</sup> na yaka yae kelewoumi Allah merau raungehike hului nda Wali Ondofolo Kiyae mende, beko hubannekonde, herendera walembonde hele. Paulus yae weumi, "Nebei Yesus, reyae mare huwamale Kiyae mbai Allah yae oro umaufe herauungeboke Wali Ondofolo Niyae." <sup>4</sup> Yahudi ro miyae hiwa na hele yae elewate Yesusre hila rabo halewainye Paulusle Silasle kelewoimi ane hakowate. Yunani ro miyae Allahle are hubara haeisa yaneyainye yo bele nebei yona rora raimi miyae maengke bele helen sele hakowate.

<sup>5</sup> Nebeibe Yahudi yun-jun kena hensan sele kowatene, akure kitembonde naeise nai hei-sei anuwaunge nendon nekate ro miyaere yawaimiboke. Tesalonika yo ei mokainyeboke aku keteuboke. Naei kena kowate hokolo beere ro miyae bere yobonaikonde enete naeise, Paulusle Silasle baenaimikonderene Yasonbe imaere yae habelewate. <sup>6</sup> Ehubayaeikoinye, Yason nane merau Yesusle einye aka baeke hiwa yo belere nebei yona ondofolo kose bere muli yae yobayeke ewate. Na kali bele kaenate, "Nda yo a hine a hine akure mokoimeyaimi hoimeyate! Mana ya aei yo eise mayeuboke. <sup>7</sup> Yason mae nda yore naei imaere yae yaweumiboke ekate. Romana Kaisar yae wali huba man mokowoungere are neyae asasi koimeyate. Nda a yae elate, Ondofolo hi nekele, na ro Yesus." <sup>8</sup> Nebei a wanan mae uwaimile yae nebei ro miyae helen bele nebei yona ondofolo kose bele na kena eisa ki yae bewainye. <sup>9</sup> Nebei ondofolo kose yae Yason nane merau Yesusle einye aka baeke hi yore ukaimile hainyaimikonde naeise roi inyaimile mo, nebeisa hainyaimikonde enate.

### *Berea Yone*

<sup>10</sup> Reniai yeuboke mo, Yesusle einye aka baeke Paulusle Silaslere ukaimile Berea yore ewote. Nebeinye ekete mo Yahudi naei ei moloi-moloi imaene eyeuboke. <sup>11</sup> Tesalonikana ro miyae naei wali bele bannekoube Berea ro miyae kena nime kena haba, rabuhine ban na rei mai yae Yesuslena a foi faeu foi borowate nane merau Pauluslena a na helebe

weumi naeise isaeise roungatere, na yane baei Allahle homofaene hilayeke. <sup>12</sup> Yahudi ro miyae helen sele Yesusre hila rabo halewainye. Nane merau Yunani ro miyae helen miyae rore raimi yo bele Yunani ro hiwa bele Yesusre hila rabo halewainye.

<sup>13</sup> Yahudi ro miyae Tesalonika yona yo borokate Paulus naei Allahle ako faeuko Berea yone ekaikelaeimi hee, Berea yore ekate nebei yona ro miyae akure kitembonde naei moi hurewaimi. <sup>14</sup> Bereana ro miyae Yesusle einye aka baeke yo u hale hele hiwa yore ukaimi Paulusre bu haeise yae yawainyehoke ekate. Silasle Timotiusle mo Berea yone nekewote. <sup>15</sup> Paulusre yawainyehoke yo Atena yone hainyebokera, bukaiبوکه, Paulus yae Silasle Timotiusle u hale yae na moisa enete ukeumi bele ewate.

#### *Paulus Atena Yone*

<sup>16</sup> Paulus Atena yone Silasle Timotiuslere rakewoumi mo, erewole nebei yo eise hoime bahe yae maemae koukokene, na kenara beko hele hubawoung. <sup>17</sup> Nebei aerene, Paulus yae ei moloi-moloi imaene Yahudi ro miyae bele Allahre eise hawainyeke Yunani ro miyae bele Allahle homofaene a molaikokera Yesusle naeise kelewoumi. Nane merau naise haete ijenne ro miyaere Paulus yae nebei sului mbai kelewoumi. <sup>18</sup> Allahlena a foi faeu foi Yesusle naei bele herekera waleuboke naei bele a kelewoumine, isaei hebaen bele Eprikuras holona bele Stoa holona bele Paulus naei aku keteuboke. Nebei holo bee nolona hiwa yo yae elate, "Nda a wakure kole ro rahe abe keleumi!" Hiwa yo yae elate, "Nauwae, yo hi naei walobo yoni-yonibe keleumi." <sup>19</sup> Areopagus riyare nekate anuwaufe yae Paulusre yawainyehoke ekate. Nebei yo Paulusre wainye, "Maei kena kande waeyina kelaemae a usaei emere isaeimabondere. <sup>20</sup> Weyae wamae a faeu maei angkaeyine borande mahi helene meyae na mekai haranaere isaeimabondere." <sup>21</sup> (Nebei Atena ro miyae bele meiko-meiko ro miyae bele hu haibo-haibore rambun emere boronaterere bele kena hele ikowate. Nane merau rambun manemfana yakaiبوولere eyelewatere erenaibondere kena hele ikowate.)

<sup>22</sup> Nebei Areopagusne arilewole yo na bene Paulus yeufebunguke weumi, "Atena ro miyae, mare eramale agamare hubara manda hele mokaunge. <sup>23</sup> Rabuhine ban, mai yo einye ele melene kowekale yae, mai hoime bahe ei mom-mom imae helen ereukokale. Hili era akau erare felate itukai mbai ALLAH ISIAN KIYAELERE molaikokebe erekale. Nebei Allah mbai mayae ei moloyaunge, nebeibe mayae onaunge kiyaebe reyaere mare huwamale.

<sup>24</sup> "Allah nda kani kela bele neinya honate rambun ebi kaban mere mokouboke. Neyae kani kela bele yaku bele mere ikileuboke Tuhan. Neyae hoime bahe imae ro miyae yae heiboyatene enekei. <sup>25</sup> Rahe kou kalo moloyeungene ro miyae Nare rikenainyebondere? Neyae kou ban kalo ban kiyae. Ro miyaere Neyae mo no yeumine wali yobainye. Ro naei miyae naei kou kalo Neyae hakoyeumi. <sup>26</sup> Nda kanina kelana ro miyae ro mbaisa mokouboke (Adam), norona menara kani kela hine nekeyate. Allah mbai mehininde koloyeumi makei yare nane merau makei kanine nda ro miyae enainyekende. <sup>27</sup> Ro miyae yae Nare baenainyelene, hubainyaikonde era naeise Allah nemene fomene mokowole. Allah nana hesele aei walira ahau banne nekele. <sup>28</sup> Eyae no hayaende, nekeyande, oroyande, nemene Allah Naei einye mo. Nda a mainya a henare kolayeke yo hi eleukoke na hele, 'Eyae nemene Naei orona mena.' "

<sup>29</sup> "Nebeinye, eyae na hele Allahle orona menane, hoime bahe emas yae perak yae ruka yae ro miyae naei isaei bele meli mekai bele mokowate rambun wanen mae mayae Allahre hului okoloiyae. <sup>30</sup> Na bere kobure kowande ralo yakama Allah karo yae eleukoke, nebeibe mana ya nda kani kelane nekate ro miyaere weumi na beko bakora nulu kenaimibonde hele. <sup>31</sup> Rabuhine ban, Allah ukeunge ro mbai yae nda kani kelana nekate ro miyae naei walire na ijen mae hului kolommile naei ya mbai mokoungehake. Allah here yo nolora huluis kolommile ro aungenuke walora ro miyaere keleumikoke nebei ya na hele bende."

<sup>32</sup> Ro miyae herera anainyunde a borowatene hiwa Paulusre re yae harewainye. Nebeibe hiwa yo yae wainye, "Meyae kena hele kande, nda eleyae wanen roko hire weumekonde." <sup>33</sup> Nebeisa Paulus nebei riyara meukuke. <sup>34</sup> Nebei ro miyae nolora hiwa yo Paulus yae elewole ane hakaikoke, Yesusre hila rabo halewainye. Nebei nolora ro mbai na ro Dionisius Areopagus riyana ro. Miyae mbai na ro Damaris nane merau na ro miyae hiwa hila rabo halewainye.

## 18

#### *Paulus Korintus Yone*

<sup>1</sup> Paulus Atena yora kulun uke Korintus yore eke. <sup>2</sup> Nebei yone Pontus kanina Yahudi ro mbai hubayeikoke na ro Akwila. Akwila na miyae Periskilale manemfa fere Italia kanira

Korintusre mekete, rabuhine ban Kaisar Klaudius yae Yahudi ro miyae Roma kanira enaibalendere hukewoumine. Paulus hokolo bee hubayeikoise ewole. <sup>3</sup> Hokolo bee rone miyaene naei kalia fale neyei naei malo ruka-rukara hawote, Paulus haweke wanen mbai. Nebeinye Paulus hokolo bee naei imaene nekewate nane merau hakoumiboke hawate. <sup>4</sup> Sabat ya na yane baei Paulus ei moloi-moloi imaene eyewole Yahudi ro miyae bele Yunani ro miyae belere moi hurewoumi Yesusre hila rabo halenainyelere.

<sup>5</sup> Silasle Timotiusle Makedonia kanira meketene, Paulus nebei malo ruka-ruka hawolera heunguke, na yane baei Yahudi ro miyaeere kelewoumi weumi, "Yesus Niyae Allah oro umaufe heraungeboke Wali Ondofolo." <sup>6</sup> Nebeibe Yahudi ro miyae Paulusre oboroi benen aukaka bele kowainyene, nebei ro miyae u mekai beko mokowate naei iwau kelemmile naeise na malona mande mo heraeeyubokera weumi, "Mai u mekai wa mekai mokowaube walora menaeijae u mekai beko bele ro miyae yae me baenembe. Yesusle wali nibi a kelerembe naeise raei baka randa hayeubokale. Reyae nda heera Yahudi ban ro miyaeere keleremilere."

<sup>7</sup> Paulus na hibi nebei Yahudi ei mom-mom imaera meukuke ei mom-mom imae kelaenge hebele imaene eweufike. Nebei imae Yahudi na role imae ban nebeibe Allahre eise moloyeunge role, na ro Titus Yustus. <sup>8</sup> Krispus nebei ei moloi-moloi imae yunde hebewole kiyae bele na imae obena yo bele Yesusre hila rabo hawainye. Nebei sului mbai Korintus yona ro miyae helen Paulus a huwoumi borowate yo Yesusre hila rabo hawainye, nebeisa bu kaimikoke.

<sup>9</sup> Reniai mbai ijoko raneungeboke yae Tuhan Paulusre weunge, "Buhae ohokojiae! Na hibi-hibi huweumile, waei ei mali ahuneijae. <sup>10</sup> Reyae kayaa hebawalene, hi yae ha yae ware beko omokoiboi. Rabuhine ban, nda Korintus yo einya Raei holona ro miyae helen nekate." <sup>11</sup> Nebei aerene Paulus Korintus yone ralo yakama mbai bohi bele nekeukoke, Allahle ako faeuko kelewoumi.

<sup>12</sup> Galio Akhaya kani naei Gubernurre yeuboke hee, Yahudi ro miyae mbainye arileufike Paulusre ikilaiboke, yawainyehoke are kolainye ijende ekate. <sup>13</sup> Nda a yae nebei yo waimi, "Nda ro yae kelemi Allahre eise molomandere isohi hele aei era hena Musalena kelewoumi bele. Ro miyae mokoumi naeinya huluinye hakonaikondere!"

<sup>14</sup> Paulus are elengkondere mo, Galio yae a bere neufake Yahudi ro miyaeere weumi, "Ei, Yahudi ro miyae! Nda a mekaweleyaube ro beko mokouboube, rabuhi asasi koukoubere, reyae mare boromele. <sup>15</sup> Nebeibe nda mewaube ro kenane, a faeu kenane, mai wali heere foloukoke era hena kenabe releyaunge. Menaeijae mo kolonneko. Reyae ahi elale nebei wanen a koloi-koloise!" <sup>16</sup> Galio nebei yore moise yae hukeumihike aibaleke. <sup>17</sup> Nebei aerene nebei Yahudi yo ei moloi-moloi imae yunde hebele kiyae Sostenesre fainyekileukoke are kolainye ijen bene rahuae bowate. Nebeibe Galio nebei wanen yeuboke katere ijoko erei.

#### *Paulus Antiokhia Yore Beufoke Ewole*

<sup>18</sup> Paulus Korintus yone heki holo nekeukoke wa, nebeisa Yesusle einya aka baekere "nauwa bele" a weumiyeke, Akilale Periskilale hakoinyekoke bele Kengkrea yone bu kaisa naisike Siria kanire ewate. Paulus Allahle a holo koukokene, nebei yone na umaa folainyekoke (yun kombaalu yeuboke). <sup>19</sup> Efesus yone ekate mo, Priskilale Akwilale nukeumiboke, eke nebeinya ei moloi-moloi imaene eweufike, Yahudi ro miyae bele Yesusre hila rabo halenainyele ane elewate. <sup>20</sup> Nebei yona yo Paulusre riyewainye heki wanen nebeinye nekengkondere. Nebeibe Paulus ahi yae elewole. <sup>21</sup> Kulunde wende hee yae wa weumi, "Allah be hinembondena, reyae ndare benen merele." Nebei ara ukeumi, Efesus yora kulun uke bu waka kabande ewole.

<sup>22</sup> Kaisarea yone akouboke mo, Paulus nebei jemaatna ro miyae ro melaeyaeibokera, Antiokhia yore eke. <sup>23</sup> Nebei yone heki ban nekeukoke mo, Paulus kulun uke Galatia bele Frigia bele kanine yaneweke. Nebeinya Yesusre hakowainye ro miyae na hila rabo hawawaterere hara roroumiyeke.

#### *Apolos Efesus Yone Bele Korintus Yone Bele Nekeukoke*

<sup>24</sup> Na heki ban mo, ro mbai na ro Apolos Efesus yore meke. Neyae Yahudina ro, Aleksandria yone hongkate. Neyae a elei-eleise hiyei yae raneiboyole nane merau Allahle homofae nare huba man sele isaeyeungekoke, <sup>25</sup> nane merau Tuhan Yesusle wali nibi einye kelaainyekoke. Naenda wanen horo Yohaneslena bu kowaimire mo naeisaei yeubokebe, Apolos na kenara roweungehike kowolene Yesusle naeise a na ijen sele yae kelewoumi. <sup>26</sup> Apolos huba raweuboke ei moloi-moloi imaene eke buhae hokoiboi ban mae huwoumi. Nane merau Priskilale Akwilale neyae elewoke a boroinyokera, Apolosre yawainyehoke naei imaere ekete. Hokolo bee Apolosre Allahlena wali nibi na foi sele yae keleinyekoke.

<sup>27-28</sup> Nebeisa Apolos kena kowole Akhaya kanire endere. Efesus yona Yesusle einye aka baeke be hinaiboke nane merau homo mbai molaikoke ukaimi, Akhaya kanina Yesusre hakainye ro miyae Apolosre na foi yae yangainyehondere. Akhaya kanine eke hee, ro miyae naei bene Yahudi a elewatere horowoumi nane merau na yaka hele Allahle homofaena a kelewoumi Yesus Allah yae oro umaufe herauungeboke Wali Ondofolo Niya. Neyae kelewoumi a yae, nebeinya ro miyae Allah kena buhae aere ban mae hewoumi walora Yesusre hila rabo halewainye yore, Apolos helen sele hakowoumi.

## 19

### *Paulus Efesus Yone*

<sup>1</sup> Apolos Korintus yone nekewole hee yae, Paulus nebei kani bohi ara oroukoke eke Efesus yone. Nebeinya ro mbemba Yesusre hakainyekoke mate yore Paulus hubayaeikoke. <sup>2</sup> Paulus yae hineumi, "Yesusre be hinauboke na hele yae elaukoke hee, Allahle Roh yaraukoke?"

Nebei yo wainye, "Eyaroikoi, nane merau Allahle Roh nekele naeise meyae maeisaei ban."

<sup>3</sup> Nebei aere ne Paulus yae hineumi, "Nde kelewombe a hului yae mare bu kayengkokembe?"

Nebei yo wainye, "Yohanes kelewoume a hului yae."

<sup>4</sup> Paulus yae weumi, "Yohanes kelewoumi ro miyae na beko bako mokayekera nulu keumbokere kelenaimibondere bu konaimikonde. Ro miyae helende Yohanes uwoumi, 'Ebi fere raei moisa mende Kiyae Yesus. Nebei Kiyare hila rabo halennele hele.' "

<sup>5</sup> Nebei a borokatene, nebei ro miyae Tuhan Yesusle ro yae na hibi bu kowaimi. <sup>6</sup> Paulus na uwa ranne me kolowoumi bae, Allahle Roh naei rande oke. Nebei ro miyae afau mahi-mahi elewate nane merau Allah yae elewole a huwaimi. <sup>7</sup> Nebei ro holona nemene me bee oro nen bee bele.

<sup>8</sup> Oko name hele Paulus na Sabat yane baei ei mom-mom imaene eyeisiyele be yae rabuleiboyele a helee bele han belere kelewoumi. Allah merau raungehike Naei holona ro miyae Yesusle me kelee u keleene nekenate naei nebei yo na hele yae elenaikonde naeise, koli hele bewoumi. <sup>9</sup> Nebeibe ro miyae hiwa nebei nolora na kena eruwei, Yesusre hila rabo ehalei. Nda yona ro miyae bene Yesuslena wali nibire aukaka yae kowainye. Nebei aere ne Paulus nebei yore nukeumiboke. Yesusre hakainyekoke mate yo bele wekate, na yane baei Tiranus isaei hebaende keleumi yowainye arileisiyele, u bene yaroi-jaroi a eylewate. <sup>10</sup> Paulus na hibi-hibi mo kelemiyeke ralo yakama bee yeuboke, Asia kanine nekate yo, Yahudi ro miyae bele Yunani ro miyae bele, nemene Tuhan Yesusle wali nibi a boraikoke.

### *Skewale Kelu Fa-Fa*

<sup>11</sup> Paulusle walora Allah rambun mahi-mahi hele mokowole. <sup>12</sup> Erane buloone koube ro miyae Paulus roibure hobebe malo raitai yae, u yolure ikilele malo yae nebei erane buloone kayeke yo ate na uwa ranne raisiyainye na hibi hireiboyoung. Nebei buloo walobo na u buluna honoisiyeunge eituwele.

<sup>13</sup> Buloolo Yahudi ro miyaena yo ran yo randa oroyate ro miyae naei u bulura alo yoni-yoni hukewaimi. Nebei buloolo roko mbai umalire hubanainyehindere Yesusle Ro yae nebei alo yoni-yonire hukewaimi waimi, "Nebei Paulus yae huweumi Yesusle Ro yae, meyae mare hukemansimber!" <sup>14</sup> Skewa imam yunde hebewole kiyaele kelu fa-fa, nemene mehine bee bele, naei wanen mokowate. <sup>15</sup> Nebeibe alo yae weumi, "Yesusle Paulusle reyae raeisaei, mayae mende naei?" <sup>16</sup> Na u bulune alo bele nekele kiyae honoungehike Skewale fa-fare habekeumile na ikele u yae eyake meyake akewoumi. Skewale fa-fa na uwa ba bele nane merau malo na uwana kaneumikokene, na melan mae hakaikoke ewate.

<sup>17</sup> Yahudi ro miyae bele Yunani ro miyae bele Efesus yone nekate yo, nebei iwau bewate a borowatene buhae yaraiboke kowate. Nebeinye Tuhan Yesusle Ro buma hele kaewainye. <sup>18</sup> Yesusre hila rabo halewainye ro miyae helen sele mekate ro miyae bene na me u beko bako yakawate. <sup>19</sup> Buloo mokayeke yo helen sele na buloo naei homo bele yarowate mewate, ro miyae bene inye haiwate. Nebei buloo homofae inye haiwate roinye na kaban nemene kalia mokoukoube 50.000 roweube roibu hului. <sup>20</sup> Nebei merau waere Tuhan Yesusle wali nibi a hurewole nane merau ro miyaere kena bele hereumiyeke.

<sup>21</sup> Nebei iwau yoni-yoni yaeikokera Paulus nenaiejae a hokoukoke ende Makedonia kanira Akhaya kanira Yerusalem yore ende. Paulus yae elele, "Yerusalem yone ororekondera, reyae Roma yore erele hele." <sup>22</sup> Naei rikei sakoi ro bee Timotiusle Erastusle ukeumi Makedonia kanire ekete. Paulus nembai benen ya heki ban Asia kanine nekewole.

<sup>23</sup> Nebei hee hului yae Efesus yone Yesusle wali nibi kelaeimi kenane aku keteuboke. <sup>24</sup> Rabuhine ban, nebei yone ro mbai na ro Demetrius era moi-moi perakra mokoweke. Walobo (miyae) Artemisle imae fele-fele perak yae mokowole. Nda perak era moi-moi yae mokowate yo roi nekai yarowate. <sup>25</sup> Demetrius ro kayaa orouboke nebei kalia mbai a hine a hine mokowate yo bele arileumihike mo, weumi, "Aka naei baeke naei, mayae nemene maisaei nda kaliara mokandere roi helen yarande. <sup>26</sup> Mana Paulus yae meke elele a menaeijae angkaei yae boraube. Neyae keleumi ro miyae yae mokate walobo nebei walobo hele ban. Ro miyae helen sele neyae keleumi are hakainyekoke. Ndane, Efesus yone mo ban, ewole Asia kani bohi nemene uwoumi! <sup>27</sup> Maei kalia mokande ro beko yembonde. Nebei mo ban, walobo Artemis ro ban yembonde naei nekele imae erabuhi ban mae elenaikonde, erabae Asia kanine mo ban, eke meke nda kani kaban kela kabanna ro miyae nare buma kaeyainye, nare ro royainye."

<sup>28</sup> Nebei a ma borokatene, nebei yo na kena naume hele haneumiboke, na hibi kali lon mae kaenate, "Artemis, Efesus yo naei walobo kabanbe hebele!" <sup>29</sup> Nda aku keteuboke Efesus yo nemene nebu haebu heukoke. Nebei aku naufe hoimeyate yo na holone mekate. Gayusle Aristarkhusle Makedonia kanina ro bee Paulusre hakainyekoke nibire mewate yore ikilaikoke, huraimiyeke nebei yona yo koi yo baere kate obe kabanne ekate. <sup>30</sup> Paulus kena kowole nebei ro miyae bere endere. Nebeibe nebei yona Yesusre hakainye ro miyae ahi yae ukainye. <sup>31</sup> Asia kanire rora rowaimi yo, Paulus kahilire awaikoke yo, ro miyaere ukaimile enate Paulusre ungainyele nebei obene nauwa eyakajae.

<sup>32</sup> Nebei obe kabanne hebate yo a bulaeiboke alaeiboke. Hi yae ndibe elele, hi yae ndabe elele. Meleyae ro miyae onaete, rahene neyae nebeinye mekaisebate. <sup>33</sup> Yahudi ro miyae bere Aleksanderre na bere yae nainyehike ekene. Hiwa yo yae na u benera nekaimi Aleksander yae aku muli yobouboke. Aleksander naei uware me nokainyele are elengkondere me kaukau wae koukoke. <sup>34</sup> Nebeibe wekate erekainyele Aleksander Yahudina rone, Efesus ro miyae kali na bala mbaisa hebainyekoke kaenayoke, hu ijoko bee hului yeuboke, "Artemis, Efesus yo naei walobo kabanbe hebele!"

<sup>35</sup> Efesus yoyo koseyo nekate na yun aunguke aku are yae habaumiboke wa, weumi, "Efesus ro miyae, nda kani kelane ro miyae nemene naeisaei bangka mo Efesus yo mbai yae walobo Artemisle imae kayaare hebele nane merau ruka mbai Artemis naei uwa wanen yakura ruke oke. <sup>36</sup> Reyae ukamale a amere eleikoi suluinye, hilembo, nendon uwa ohojjae. <sup>37</sup> Nda ro bee yawaumiboke mekaube, neyae aei walobo imaebe yoko ebaeikoi nane merau na ro fe omokoi. <sup>38</sup> Demetrius naei kalia mbainye mokate yo bele ro hi miyae hi bele akure yeuboke are elenaikonderene, nebei ro miyaebe yawenaumibonde yoyo koseyo naei bokore ya menate. Mehininde raisiyainye ya, na imae na raweihoi yae hebeyele, are kolainye yoyo koseyo nanene nekeyate. <sup>39</sup> Nane merau rambun hi bele yae ma kena eisa haraungebokena, nebei naeise emale na yoyo koseyo bene a hokomakonde. <sup>40</sup> Rabuhine ban, mana ya bewate rambun eyae walangkabe wannejeke. Rabuhine ban Romawi ondofole aere ikileumeboke nekele kiyae na hului eyae aku ketanneboka a yae elengkonde. Nda aku nau keteubokere rahe a yae aere olemale?" <sup>41</sup> Nebei a nemene weumikokera, neyae ukeumi aibaleke ewate.

## 20

### *Paulus Makedonia Kanira Yunani Kanire Eke*

<sup>1</sup> Efesus yona aku keteuboke u yeuboke mo, Paulus nebeinya Yesusle are hakowainye holona yo arileumihike, na kena u hara rorumikokera nukeumiboke Makedonia kanire ewole. <sup>2</sup> Paulus Makedonia kanine yo ran yo randa oroweke, nebeinya ro miyaere kena u hara rorowoumi, nebeisa Yunani kanire eke. <sup>3</sup> Oko name Paulus nebei kanine nekeukoke. Nebeisa mokoungehake Siria kanire bu wakara kulun wende ende hee, a borouboke Yahudi ro miyae merau rainyehike nare honaibondere. Nebeinye nenaiejae a hokoukoke bukeufike Makedonia kanira yanefoke Siria kanire endere. <sup>4</sup> Paulus naei homo mbainye orate yo naei ro nda niyae: Sopater Pirusle fa Berea yona ro, Tesalonika yona ro bee Aristarkhusle Sekundusle, Gayus Derbe yona ro, Timotius, nane merau Asia kanina ro bee Tikikusle Trofimusle. <sup>5</sup> Nebei yo bere Troas yone ekate maere rakewaima. <sup>6</sup> Ragi ban feu anawate ya kaban kaikoke baeufoke mo, meyae bu waka kabanda

Makedonia kanina Filipi yora nandehike ewande. Ya maehae mbai mo, Troas yone nemene maengkele mbainye arilandehike. Nebei yone meyae mon mbai nekandekoke.

*Eutikhus Herekera Waleuboke*

<sup>7</sup> Sabtu ya huae mo, meyae nemene arileufike raman na riya mbainye anemakondere. Ya hembonde Paulus kulun wende enderene, nebeinya ro miyae bele a heki hele huwayoke, reniai nolo yeuboke. <sup>8</sup> Imae raka bumana kayeene meyae riyare nekewande anuwaunge, i helen sele roraikoke bewate. <sup>9</sup> Hokolo fa mbai jendela ranne nuweuboke borowoke, na ro Eutikhus. Paulus a heki hele huwoumine, nda fa imae raka name nendo na jendela ranne ijongku honouboke honowolebe, ruke oke, kaeibokate bae, nebei fa hereke. <sup>10</sup> Nebeibe Paulus are owakouboke nda fa na uwa ranne ruke mo, me yae aeungehoke, weumi, "Buhae ohokojiae, nda fa na wali!" <sup>11</sup> Paulus benen bumare yeuketeke, feu kayeukoke waheumikoke anewate. Paulus benende ahuba ahuneungeboko huwoumi na hewole wa, kulun uke ewole. <sup>12</sup> Ro miyae nebei hokolo fa waleubokere yawainyehoke, naei imaere ewate. Nebei yo na kena bele foi yaeiboke.

*Paulus Troas Yora Miletus Yore Eke*

<sup>13</sup> Meyae bu waka kabanda Asos yore bere ekande. Paulus are eleukoke huluinye neyae Asos yore yaunga nibira ara ewole. <sup>14</sup> Asos yone hubayaendekoke mo, Paulus bu wakara ifileukoke, Metilene yore ewande. <sup>15</sup> Ya heuboke mo meyae Metilene yora nandehike ewande Khios yokoba bena yale anuwaunge yandeboko. Ya bee nendo mo, Samos yone andenoke. Nebeisa ya heuboke mo, Miletus yone. <sup>16</sup> Paulus a hokoukoke Efesus yone ebarajae Asia kanine hekibe oromale belene. Naei kena kowole u hale yae Pentakosta ya kaban konate ya yae Yerusalem yore endere.

<sup>17</sup> Miletus yora Paulus a ukeumi Efesus yona jemaatna be yun be yebae Paulus nangekele hubainyaikondere. <sup>18</sup> Nebei yo mekate mo, Paulus yae weumi, "Aka naei baeke naei, nda Asia kanire mekale heera mangkele nekeimeyande raei wali ma mayae nemene maisaei. <sup>19</sup> Kena u ane raungehikale, rime yae a yae Tuhanbe kaliare mokowekale, erabae Yahudi ro miyae kelai nekatene, roko yae roko yae beko hubaungekale. <sup>20</sup> Mayae maisaei makei a mai foi naeise reyae ro miyae bene bele mai imae obene arilesiyaubene kelewamale bele. <sup>21</sup> Yahudi ro miyae bele Yunani ro miyae belere keimeyamaele Allah a ukeumi hului naei beko bakora nulu kenaimile nane merau Tuhan Yesusre hila rabo halenainyele.

<sup>22</sup> "Mana Allahle Roh moi neufehike huluinye Yerusalem yore erele. Reyae raisaei ban rahebe ndine raei u ranne yembonde. <sup>23</sup> Reyae raeisaei yo ran yo rande orowekale yae Allahle Roh na yaka yae uwoufe hului, rare beko yae enaisemokonde nane merau kawane enaisahengkonde. <sup>24</sup> Nebeibe Tuhan Yesus a ukeufe ro miyae hufemile Allah kena buhae aere ban mae heumikokene wali hole molommibonde nibi wekeunge. Nebei a foi faeu foise ro miyae keleremiyendere huba halerengkonendere, nda wali koko raei walire buhae ohokoi Naei ane mo hakorende.

<sup>25</sup> "Mai bokore ninai orowale Allah merau raungehike Naei holona ro miyae Yesusle me kelee u keleene nekenate a faeu huwamale borokaube yo nemene, nda hee reyae raeisaei benen mangkele ehubayeikoi nekemande. <sup>26-27</sup> Reyae na helebe wamale, Allah mehininde kolowoungue a nemene ninai mare weukokamalene, benen wali hole molommibonde a mai nolore hufemile naeise raei baka randa ruboungbokale. <sup>28</sup> Mai uware kayaa foi yae hebembe. Nane merau Allahle Roh yae ukembe hului jemaatna ro miyae nemenere kayaare foi hebembere. Domba kayalo hebeyele wanen mae mayae Allahle Jemaat kayaa hebembe. Allah Naei Kelule ha rileuboko yae nebei jemaatre Naei yae eleukoke. <sup>29</sup> Reyae isaeyebokale yoku han bele yae domba yoni-yonire here ware weiboyaimi wanen ame-amere kelaيمي yo hiwa menate elae relenainyende mai hila rabore bekore mokonayembere. <sup>30</sup> Hiwa yo mai nolora anainyunde ro miyae naei moisa hakonaikonde naeise, relenainyele Yesusle walora na hele wali nibi a nana yembonde. <sup>31</sup> Nebei aere ne mauware kayaa foi yae hebembe! Bene nekenayembe ralo yakama name hele reniai rai na ro yun fa yunne kelewamale, ya mon bohi rime yae meitimale.

<sup>32</sup> "Mana reyae Allah mare kena buhae aere ban mae hembe Kiyaele me eise kinyamale, Naei a wembe huluinye nekemembe. Naei a wembe hului nekemembe walora mai hila rabore anennumbe nane merau Allahle u mekai yolo-yolo bele nekate holona yore rambun foi yaronaikonde wanen mbai mayae yarongkombe. <sup>33</sup> Mai nolone nekeumekale hee, hiwa yo naei roise bele malo belere yarorekondere reyae kena okoi. <sup>34</sup> Mayae maisaei, raei wali rambun nane merau raei moisa orowate yo naei nemene raei roibuna mokowekale. <sup>35</sup> Raei me u mokoimeyale walora keimeyamale maei roibu walora ro miyae elae ban wake ban yore hakomamile hele. Tuhan Yesus Naei a faeu

eleukoke u bene nekenayembe, 'Riyei yaroi miyae ban, nebeibe yei wahei wali ma nekate ro miyae, onomi foka yae hubanainyende.' "

<sup>36</sup> Ara eleukoke baeufoke mo, Paulus nebei yo bele kani ranne oro selen-selen rororaikoke, Allahre ebeli bainyehike. <sup>37</sup> Kayeere molonate hee yae, Paulusre hahi yae ainyeboke rime nekai rimewainye. <sup>38</sup> Nare benen ehubayeikoi nekenayende a Paulus yae ukoumine nebeinye ro miyae kena beko hele hubawainye. Nebeisa Paulusre bu wakara hainyeboke ewole.

## 21

### *Paulus Yerusalemde Ewole*

<sup>1</sup> Nebei yo bele ro melaeyaendebokera Miletus yone nukammiboke bu waka kabanda hawandeboke Kos yokobare ewande, ya bee nendo Rodos yokobane ekande. Rodos yokobara Patara yore ewande. <sup>2</sup> Patara yone bu waka mbai Fenisia kanire endere hubayaendekokera, andehaweuboke ewande. <sup>3</sup> Siprus yokoba erewande, mai meli reufire yae honole, nebeibe meyae Siria kanire yae ewande. Meyae Tirus yone ewande, wakana rambunde kolonaikonderene, meyae nebeinye nokande. <sup>4</sup> Nebei yone ekande yawande yae, Yesusre hakainyebokere ro miyae naei bokore meyae ekande, ya mehine bee bele nekandekoke. Nebeinya yo Allahle Roh walora Paulus ukainyele Yerusalem yore eijae. <sup>5</sup> Nebeibe mai nekewande ya baeufoke, meyae kulun ukande ewande. Nebeinya Yesusre hakainyebokere yo, nemene na miyae fa-fa bele yo moise yae andebaleke isoufe mewande. Nebei buhaeinye ro miyae nemene oro selen-selende mo rorandekoke, Allahre ebeli bannehike. <sup>6</sup> Meyae ro melaeyaendebokera bu waka einye andehaweuboke. Nebei yo naei imaere-imaere bukaiboke ewate.

<sup>7</sup> Tirus yora nandehike Ptolemais yone andenoke. Nebeinye Yesusre hakainyebokere mate yo meyae hubayaendekoke, nangkele ya mbai nekandekoke. <sup>8</sup> Ya heuboke meyae kulun ukande ewande Kaisarea yone. Nebeinye ro mbai Yesuslena a foi faeu foi keleumi kiyaele bokore meyae ekande, na ro Filipus. Nebei kiyaele imaene ekannekewande. Nebei ro mehine bee bele Yerusalem yona jemaat yae yaraikoke, Filipus na ro hi neyae. <sup>9</sup> Na maengke fa-fa keli Allah weumi are huwaimi meli mekai bele yo.

<sup>10</sup> Nebeinye ya heki ban nekandekoke mo, Yudea kanira mewole Allah weunge are huwoumi meli mekai bele ro mbai na ro Agabus. <sup>11</sup> Neyae mai bokore meke Paulus naei u yolu ikilele rouke. Nebei u yolu yae Agabus na me orore rineukoke, elele, "Nda abe Allahle Roh yae eleukoke, 'Nda yolure ikilele kiyae naei wanen mbai Yerusalem yone Yahudi ro miyae yae ikilainyebokere, nebeisa Yahudi ro miyae ban yore inyaimile.' "

<sup>12</sup> Nebei wanen borokandene, maengkele Kaisarea yona ro miyae bele Paulus Yerusalemde endere a hee yae folowannele. <sup>13</sup> Nebeibe neyae weume, "Rahe naeise mayae rimaube nane merau raei kena beko hubarende naeibe mokaufebokere? Tuhan Yesusle arene ndine ikilenaibonde naeise honaibonde naeise rauwa mokoung-hakale."

<sup>14</sup> Paulus maeinya a uwannelere oboroinye, meyae benen a usaei elei. Meyae elande, "Ninae ya, Tuhan naei kenare kole huluinye yembonde."

<sup>15</sup> Ya heki hele ban nebeinye mandenekeukoke nebeisa mai rambun-rambun arilandeheke, kulun ukande Yerusalem yore ewande. <sup>16</sup> Kaisarea yora Yesusre hakainyebokere yo hiwa nanembaisa ewande. Ro mbai na ro Manason naei imaene meyae emahonondere. Manason Siprus yokobana ro, nendahina Yesusre hakoungboke.

### *Paulus Yakobusle Bokore Eke*

<sup>17</sup> Yerusalem yona Yesusle einye aka baeke, meyae ekandere na me ran u ranne kowaime. <sup>18</sup> Ya heuboke mo, Paulus maere yaweumeboke Yakobusle imaere ekande. Nebeinye Yerusalem yona jemaatna be yun be yebaere hebate yo nemene nebei imaene arileufike nekewate. <sup>19</sup> Ro melaeyemiboke mo, Paulusle walora Allah me u Yahudi ro miyae ban nolone ebibi kaban-kaban mokoweke nemene uwoumi.

<sup>20</sup> Paulus eleukoke baeufokera, ro miyae naeise-naeise Allahre buma kolowainye. Nebeisa Paulusre wainye, "Aka baeke Paulus, weyae isaeyebonde Yahudi ro miyae helen bun-bun sele Yesusre hila rabo halaeinye nane merau nemene Musale walora wali heere foloukoke are hubara haese yanainye. <sup>21</sup> Nda hee nebei ro miyae borokate weyae Yahudi ro miyae Yahudi ban ro miyae nolone ekainyebokere yore nda a kelaemae: Musale walora wali heere foloukoke a huluinye enekeijae, naei fa-fa ro uwa elan ofoloiijae, Yahudi naei era hena ehakoiijae. <sup>22</sup> Mana nebei Yahudi ro miyae isaeyebonde weyae ndana mekae. Naenda mekai yae mokomabondere? <sup>23</sup> Naei foi sele meyae wayete a hakoubondere. Ndane ro keli Allahre a holo kolainyebokere. <sup>24</sup> Nangkele embe, nanembaisa mauware faeinyembombere ongko felembombe. Na umaere mo



folonaimikonde naei roi weyae mokoubonde. Nebei wanende ro miyae naeise-naeise erenate elenate, nebei Paulus mbai Musale walora wali heere foloukoke a huluinye nekeyae. <sup>25</sup> Yesusre hila rabo halaeinye Yahudi ban ro miyae a hinenaimhindena, maeinya a hokandekokebe ninai homone molandekoke ikammile. Nebei homone wammile raman hoime bahere ei molonaimilena, neyae aneijae, ha aneijae, obo yoku ha einye heikoyeunge aneijae, yoko kaeimae okoyeijae.”

<sup>26</sup> Ya heuboke mo, Paulus nebei ro kelire yaweumiboke naei u bele faeinyaiaboke. Nebeisa u faeinyeiboi naei ya hului membaensonde Paulus Allahre ei mom-mom imae na kaban sele kiyae ereuweufike nebei yore isaei ikeumi. Nane merau makei hee naei u mbamba menate obo yoku hili era akau erare ongkou wae felenaibondere ukeumi.

*Paulus Allahle Imaene Ikilaiboke*

<sup>27</sup> Nebei ya mehine bee nendo huba halenainyekondere mo, Asia kanina nekate Yahudi ro miyae yae Allahre ei mom-mom imae na kaban sele kiyae einye Paulusre erekainyele. Nebeisa ro miyaere mokaimiboke aku kiteuboke nane merau Paulusre ikilainyekoke, <sup>28</sup> na kali bele kaenewate, “Woi, Israel yoni-yni maere hakommebo! Nda ro a hire a hire keleumiyekke nda rambun yoni-yni na foi ban: aei Yahudi ro miyae, nda Allahre ei mom-mom imae, Musale walora wali heere foloukoke a. Nda hee meke Yahudi ban ro miyae Allahre ei mom-mom imae eise yaweumi mate, mokainye yolo-yolo anuwau niki bele yeuboke!” <sup>29</sup> (Trofimus, Efesus yona ro erekainyele Paulusle yo eise nanembaisa meketene, ndi a wanan kaenate. Neyae u bene nekewaimi Paulus nda ro yaweungehoke Allahre ei mom-mom imae eise eyeuboke.)

<sup>30</sup> Yerusalem yo einya nemene ro miyae ki yae bewainye, na riyane holone na anuwau-anuwau habelewate mekate Paulusre ikilaiboke. Allahle imae eisa yobaiboke moise eukuke, nebei imae romau na hibi ahunaiboke. <sup>31</sup> Nebei akure mokainyeboke keteuboke yo Paulusre honaibondere relaeinye mo, ro miyae hiwa yo ekate Yerusalem yo ei nemene aku keteuboke a Roma naei fela yunde hebelere ukainyele. <sup>32</sup> Nebei fela yun naei keleena yo bele, na felayo bele yaweumiboke u hale me hale kulun ukate, nebei aku keteuboke ijende ewate. Nebei ro miyae nebei fela yun na felayo bele habelewate erewaimine, Paulusre nerahuae bowate bele hee nekainyele. <sup>33</sup> Nebei fela yun eke Paulusre ikileubokera felayo ro hiware ukeumi rantai yae raka bere rinainyekoke. Nebeisa fela yun mae hineumi, Paulus naei sele nde, rahebe neyae mekemokole. <sup>34</sup> Hiwa yo wainye nda wanan, hiwa yo wainye ndi wanan mekemokole. A bulaeiboke alaeibokene, nebei fela yun onei-onei onewole rahe erabe naei sele yeuboke. Nebeinye ukeumi Paulusre yawainyehoke felayo naei ongko imae kabande ewate. <sup>35</sup> Paulus yawainyehoke ekate nebei ongko imae kabande hebele oro walo ijenne akure yobaiboke yo Paulusre yokunaibondere wanan mae kowainyene, nebei felayo Paulusre na me bumane kaeibokate. <sup>36</sup> Nebei yo na holone balane na moisa mo hakaimikoke, na kali kali bele kaenayeke elate, “Hombombere ya!”

<sup>37</sup> Nare nebei ongko imae kaban eise enayembondere mo, Paulus yae nebei fela yunde weunge, “Na huluinya wangkele ebi fere a elakonde?”

Nebei fela yun mae weunge, “Naendae wanan, weyae Yunani afaeu waeisaei? <sup>38</sup> Nebei wanenna, weyae nebei Mesir kanina ro ban, manemfa-manemfa meke yore yande meke horowole nane merau nemene 4.000 na fela bele yaweumiboke a kala-kalare ewate kiyae?”

<sup>39</sup> Nebeibe Paulus yae weunge, “Reyae nebei kiyae ban, reyae Yahudina ro. Kilikia kanina yo na bereinye Tarsus yone honokaisele. Rare ebi fere waeisihi ndi ro miyaere a ufemikon.”

<sup>40</sup> Nebei fela yun be hineungeboka Paulus are elengkondere. Oro walo randa yeufebunguke mo, me yae kowoumi. Ro miyae nemene aku ban yaeiboke. Hilaiboke mo, Paulus nebei yo naei afaeu wae weumi:

## 22

<sup>1</sup> “Arai naei, aka naei baeke naei nemene, rahe aerene reyae relaenale a mare yakarengkombere. Mana borombo ba!”

<sup>2</sup> Borainye Paulus nebei yo naei afaeu wae elelene, nebei yo koro ban yaeiboke.

<sup>3</sup> Paulus yae weumi, “Reyae Yahudina ro, Kilikia kanina Tarsus yone hongkaisele. Nebeibe reyae Yerusalem yone kaban yeubokale. Aei yobe naei kamahe naeise wali heere folaikoke, Gamaliel isaei hebaen mae maemae koungekoke kiyae yae nemene ninai niheungehike kelewoufe. Aka naei baeke naei, mana yana mayae nda mekaungekaube wanan, Allahle kenane relewanale. <sup>4</sup> Nda Yesusle wali nibire hakowainye yore reyae weitasi yae kowamaele hiwa hokokale. Rone miyaene ikilewale

yobowale kawane ahewamaele. <sup>5</sup> Reyae wamale imam kaban bele Yahudi yoyo kosere bele mare na hului na hele yae ungayembe, rare homo ikaisele Damsyik yona Yahudi ro miyaere roweumi ekale. Nebei homo yaere nebei yona Yesusre hakainyekoke yore reyae nendon ikilerele ehee bukulu hainyaimikonde naeise, Yerusalem yore yaufemile enatere.

<sup>6</sup> "Reyae ewale nibine hu yaukanne hului Damsyik yo nobewanale mo, yakura hehe na roko mbai oke reyae ewale ijenne naeukoke a hehe hele yeuboke. <sup>7</sup> Reyae kani ranne na hibi rukale, borale a mbai rare weufe, 'Saulus, Saulus! Rahene weyae Rare weitasi hele koimeyarae?' "

<sup>8</sup> Reyae hinanale, " 'Tuhan, Weyae wende?'

"Nebei Kiyae mbai benen weufe, 'Reyae Yesus Nasaretina Ro, weyae weitasire koimeyarae Kiyae.' <sup>9</sup> Rangkele homo mbainye ewande yo nebei hehe naeukoke erewate, nebeibe rare uwoufe a neyae oboroiboi.

<sup>10</sup> "Nebeisa benen reyae hinanale, 'Tuhan, rahebe naei sele reyae mokorebonde?'

"Tuhan mae weufe, 'Ainyu Damsyik yore eye. Allah naei kenare kole weyae mokole rambun nebeinye ro hi yae ware ungete.' <sup>11</sup> Nebei hehe yae nekeufe reyae ijoko erei yeubokalene, Damsyik yore maei homo mbainya ewande yo yae rare mene yawaisehoke ewande.

<sup>12</sup> "Damsyik yone ro mbai na ro Ananias. Neyae ro mbai, Musale walora wali heere foloukoke na hubare haeisa yaneyeunge. Damsyik yona Yahudi ro miyae nare enera faisa yaneyainye. <sup>13</sup> Raei ereiboise meke, raei bokone meufebeunguke weufe, 'Aka baeke Saulus, waei ijoko erewoyae wanen benen erei!' Nebei heera rajoko onomi yeuboke, nare erewanale.

<sup>14</sup> "Nebeisa Ananias yae rare weufe, 'Aei yobe naei kamahe naete Allah ware eleubokete Naei kenare kole weyae isaeyebondere, nane merau wali himaloungeboke Kiyae ereungebonde, Naei a elende borole. <sup>15</sup> Waei ijokore erewoyae waei angkaei yae borowoyae hului ro miyae nemene kelemiyende. <sup>16</sup> Nda heera, heki ewabeijae! Ainyu wa u weimi bu konayeibote. Yesus ware hakoneibote are riyeungehinde waei beko bakore kuyeneikotere.'

<sup>17</sup> "Reyae Yerusalemde bukeufikale ekale, Allahre ei mom-mom imae na kaban sele kiyae ebeline ebwanale yae, ra ijoko raneufeboke. <sup>18</sup> Kanale mo Tuhanbe erekanale, rare weufe, 'U hale yae Yerusalem yo nukeibo, waei euwara Raei naei a faeu weumilena, nda yo oboroi.'

<sup>19</sup> "Reyae wanale, "Tuhan, nebei yo nemene rare naeisai mo. Na bere ei mom-mom imae eise reyae eyeisiyale, Waei moisa mate yore ikilewale rahuae bowale. <sup>20</sup> Nebei sului mbai Stefanus Waei ako faeukore heraeiwole ro, honaibondere reyae be hineubokamaele. Haiboke hee reyae nebeinye hebewale, nane merau nare haiboke yo naei malo reyae kayaa hebewale.'

<sup>21</sup> "Nebeibe Tuhan mae benende weufe, 'Eyei mo eye, Reyae ware ufete a hau bu hau Yahudi ro miyae ban yore elere.' "

<sup>22</sup> Ro miyae Paulus a elewokene angkaei alaesisike borayokebe, oke na huba mokoikoise mokoungokoke Yahudi ro miyae ban yore endere eleukoke ane bae, nebei ro miyae kali ukate felaisake kaenate, "Nebei ro hombombere ya! Nda kani kelane nekendere na mekai ban sele!"

<sup>23</sup> Na kenane ki yae bewainyene, kali kaenayeke, na malo bowate auwate kani man kela man ukate bumana ewolere <sup>24</sup> nebei fela yun erewolene, ukeumi Paulusre yawainyehoke felayo naei obe kabande ekate. Nebeinye enate rahuae buhae hokoibo-hokoibo wanen belere Paulus a yaka elengkonde, rahene Yahudi ro miyae nebei wanen ban kali nare kaenainye. <sup>25</sup> Paulus ha yae rinainyekoke rahuaere bonaikondere mo, Paulus yae nebei fela yun na bokone hebele kiyaeere hineunge, "Aei Roma ro miyae woke yore rahuae bonaikondera, nebeisa ame naei a hele naei kolonainye?"

<sup>26</sup> Nebei a nda fela koise borokene, eke nebei fela yunde weunge, "Rahe erare nda ro mokoungondere? Nda Romana ro ya!"

<sup>27</sup> Nebei fela yun eke Paulusre hineunge, "Rare weise, na hele weyae Romana ro?"

Paulus yae weunge, "Na hele, reyae Romana ro."

<sup>28</sup> Nebei fela yun mae benende weunge, "Reyae Roma ro miyaere isebondere roi helen sele haiwale!"

Nebeibe Paulus yae weunge, "Reyae na honokaiselera Roma ro miyaere yeubokale."

<sup>29</sup> Nebei heera felayo mekate Paulusre a hinainyehindere moise kainyehike. Nebei fela yun naeisai ban Paulus Romana ro. Neyae Paulusre rame ha yae rineungekokene, buhae hokoungoboke.

*Paulus Yahudi Naei Yoyo Koseyo Bene*

<sup>30</sup> Rahene nda Yahudi ro miyae Paulusre i ran fela ranne hayaete nebei fela yun isaeyembondere, ya heuboke mo, Paulusre hayaeyekoke nebei imam yun-jun bele Yahudi naei yoyo koseyo bele kaeneumikoke mewarileufike. Nebeisa ukeumi Paulusre yawainyehoke nebei ro riya nekate bene yeufebeunguke.

## 23

<sup>1</sup> Paulus nebei Yahudi yoyo koseyore ijoko neumiboke erewoumi wa, weumi, "Aka naei baeke naei, meke mana yane Allahle ro be ro yoinye raei kena une na ijen naeise weufe a na foi mo." <sup>2</sup> Paulus nebei a eleukokene, imam kaban Ananias Paulus na kelaeunge hebate yore ukeumi Paulus neuwabe mefae yae ahunainyeboke. <sup>3</sup> Paulus imam kabande weunge, "Allah ware mefae ma ungete, wa kena u foise yolo-yolore eleyae kiyae! Nebeisa meunguweubokae Musale walora wali heere foloukoke homofae huluisa raei walire hului raufehindere. Nda mefae ukamae ahunaiseboka walora Musalena a weyae asasibe koukokae."

<sup>4</sup> Nebei yo Paulusle kelaeunge hebate yo yae wainye, "Na mekai ban sele weyae Allahle imam kabande a beko yae weungelere!"

<sup>5</sup> Nebeibe Paulus beufoke weumi, "Aka naei baeke naei, reyae raeisaei ban neyae imam kabande hebele. Na hele, Allahle homofaene honole, mai yona yanna ondofole kosere a beko faeu beko eweyejiae."

<sup>6</sup> Paulus naeisaei yeuboke, nda Yahudi yoyo koseyo hiwa Saduki ro, hiwa Farisi ro. Nebeinye na a kaban mae Paulus weumi, "Aka naei baeke naei, reyae Farisina ro nane merau maeko Farisina. Rare mekaube ndane huluisa ranaisehindere, erabuhi aerene ban, herewate yo anainyunde reyae a hele yae elalene!"

<sup>7</sup> Nebei are mo eleukoke bae, Sadukine Farisine aku bumana nekate eke holo beere waheukoke. <sup>8</sup> (Saduki holona yo yae elate, ro miyae herate yo benen ainyui, malaikat ure yeuboke, unulu nane merau u. Farisi yae elate ro miyae herenate yo anainyunde, malaikat nekate, unulu nane merau nekate.) <sup>9</sup> Aku nau kaban sele keteuboke Farisi Musale walora wali heere foloukoke a isaeyaeiboke kelaeimi yo hiwa Paulusle aerene aku howate elate, "Rahe a fau me u beko mokouboke? Nauwae, unulu hi yae malaikat hi yae nare weungekoke era!"

<sup>10</sup> Nebei kali maleu-maleufa kaenewate kabanire bewole. Nebei fela yun buhae hokoungboka nendon Paulus na uwabe yo yobonate nolora beere wahengkonde bele. Nebeinye naei felayore ukeumi Paulusre nebei ro miyae nolora yawainyehoke, felayo naei ongko imae kabande ekate.

<sup>11</sup> Nebei reniai mo, Tuhan meke Paulusle bokone meufebeunguke weunge, "Paulus, buhae ohokojiae. Yerusalemne Raei ako faukore wamae hului mbai, nebei sului mbai Roma yone Raei a eumihuwende."

*Ro Holo Mbai Paulusre Honaibondere*

<sup>12</sup> Ya heuboke na rene mo, Yahudi ro miyae hiwa holo mbai mokaiboke. Nebei yo a holo yae kaikoke na moni mo nekenaimende, Paulus honaibondera wa bu anenaisinde raman anenaikonde. <sup>13</sup> Na ro helen nen holo wokainyele mewate yo rorele u beere moi hayeukoke. <sup>14</sup> Imam yun-jun bele Yahudi yun-jun bele naei bokore ekate waimi, "Meyae here wali. Raman bu anei mo nekemamende Paulusre homabonde wa, raman anemale. <sup>15</sup> Mana mangkele Yahudi naei yoyo koseyo bele fela yunde homo yae molongkombe riyennehimbe. Wennele Paulus benen mai bene yende na wali foi yae kolonainyekonde. Meyae nibine rakemahande, mende, na hibi homabonde."

<sup>16</sup> Nebeibe Paulus nemaenbe fa yae nebei mehinin kolowainye isaeyeboka. Eke felayo naei ongko imae kabanne Paulusre ukeunge. <sup>17</sup> Paulus nebei fela yunde hebate ro mbaise kaeneungekoke meke weunge, "Nda hokolo fa yaweinyoho mai yumbe bokore eu, naeinya a mbai rouke mekere wennelere." <sup>18</sup> Nebei fela yunde hebate ro yae nebei hokolo fare yaweungehoke ekete nebei fela yunde weunge, "Paulus, nebei ro kawane haennekoke kiyae, rare ukeufe nda hokolo fa waei bokore yaweungehokale meke, neyae a mbaise ungetere."

<sup>19</sup> Nebei fela yun nebei hokolo fare na mera ikileungeboka yaweungehoke enere nenaei wanen mae ekete hebeiboka hineunge, "Rare rahe are weufelere weyae mekae?"

<sup>20</sup> Nebei fa yae weunge, "Yahudi ro miyae a mokainyehake ware ungayete benen Paulusre yawennehombe Yahudi yoyo koseyo naei bere embere. Naei waeli bewate Paulus benende Yahudi yoyo koseyo bene naei beko mokowolere na foi yae hele halenainyekondere. <sup>21</sup> Nebeibe weyae nare ehakoimimae. Rabuhine ban, ro rorele u beere moi hayeukoke hului, na ro helen nen nibine nunne ahenaikonde nare

habenainyehandere. Neyae nemene a holo kaikoke, 'Eraman anei mo nekenaimende Paulus honaibonde wa, raman anenate.' Nda hee nebei yo nemene ninai mokainyehake, waeinya a hokoukondere rakate."

<sup>22</sup> Nebei fela yun mae weunge, "Rare nare mekae ukarae, hire-hire eyakaijae mo." Nebeisa nebei fare ukeunge ewole.

*Paulus Feliksle Bokore Yawainyehoke Ewate*

<sup>23</sup> Nebei fa ewole mo, nda fela yun na keleena ro bee kaeneumikoke mekete weumi, "Mayae ebe mokonehabe fela bele yo nemene 200, kuda randa felayo nemene 70, ro menda bele yo nemene 200. Ro miyae yarele me henayende nekemale hee, mayae kulun wembe Kaisarea yore embe. <sup>24</sup> Paulus yae efilengkonde kuda bele mokonnehambe. Na foi moi yae yawennehombe embe Yudea kani naei Gubernur Feliksle bokone." <sup>25</sup> Hokolo beere a weumikokera mo, nebei fela yun homo moloukoke ikeumi. Nda wanen mae na homo moloukoke,

<sup>26</sup> Gubernur Feliks, waei kendan wameranne reyae melaeyaewale. Onomi foka raeisa, Klaudius Lisias!

<sup>27</sup> Nda ro Yahudi ro miyae yae ikilaiboke, ebi fere bele riyau wainyeboube. Reyae borale neyae aei Roma yona yanna rone, nebeinye reyae raei felayo bele mekande hayaennekoke. <sup>28</sup> Rangkele isaeise roufelere rahene nare heiko-heiko kainye, reyae Yahudi naei yoyo koseyo bere yaweungehokale ekende. <sup>29</sup> Rahe aere ne kawane hebendere nane merau honaibondere reyae hinewale baewale ehubyeyikoi mo. Naei wali heere foloukoke a koimeyate aerebe, Paulusre heiko-heiko kainyemeke. <sup>30</sup> Fa mbai raei bokore meke isaei ikeufele, Yahudi ro hiwa merau rainyehike nare honaibonderene, reyae na hibi waei bokore yae ukamaele yawainyehoke ate. Nare ahunainye yore ukamaele waei bokore enate nda aku hate kolonnele.

<sup>31</sup> Nebei fela yun naei ukeumi a huluinye na hibi mokowate. Paulusre nebei reniai mo yawainyehoke ekate Antipatris yone. <sup>32</sup> Ya heuboke bae, kuda ranna yore naimihike Paulus naei ewate, nebeibe hiwa yobe bukaibokate. <sup>33</sup> Nebei felayo kuda randa Kaisarea yone ekate, nebei homore mo Gubernur Feliksre ikainyele, nebeisa Paulus naei mene kinyainyeboke. <sup>34</sup> Gubernur nebei homo koukoke baeufoke mo, Paulusre hinewoung neyae naei sele makeinya ro. Isaeiyeboke Paulus Kilikia kanina rone, <sup>35</sup> Gubernur yae weunge, "Foi, ware ahunayete yo ndare menate hee wa, reyae ware a hinereikote." Nebeinye ukeumi Paulusre Herodesle obe foinye kayaa yae hebenainyele.

## 24

*Yahudi Ro Miyae Paulusre Me Nokainyele*

<sup>1</sup> Ya maehae mbai nendo yeuboke mo, Imam kaban Ananias bele Yahudi yun-jun hiwa bele Kaisarea yore ekate. Tertulus, Roma kani naei wali heere foloukoke isaeito hebaendo are elele kiyae, nangkele ekate. Gubernur Feliksle bokore ekate Paulusle a hinainyekoke. <sup>2</sup> Paulus kaenainyekoke ike Gubernur Feliksle bene hebeungke mo, Tertulus Paulusre a ahunembondere a huba raweuboke uwoumi,

"Gubernur, nene waewae bele kiyae, waei yo waku ikaenekeyaene maei kani kela heki hele aku ban nau ban nekeimeyande. Waei isaei hebaen maere maei yo ei yan eise uke foi sele beimeyele. <sup>3</sup> Makeinye-makeinye nemene meyae ware buma kolayete, helen foi wayete. <sup>4</sup> Hekibe eleronde belene ebi fere hele maeinya Paulusle naei a elemakonde, weyae boroumebonde.

<sup>5</sup> "Meyae mannereukoke nda ro na wali u bulu-bulu mo. Makeinye-makeinye Yahudi ro miyae nolone aku keteiboyole neyae yonsi-yonsi mo. Agama mbai Nasaretra aunguke na be yun be yebaere neyae hebeunge. <sup>6</sup> Allahre ei mom-mom imae na kaban sele kiyae omokoi rambunbe meke mokowole yae, meyae ikilandeboke. ((Maei kena kowande maei wali heere foloukoke huluinye na wali hamemangkondere.))" <sup>7</sup> Nebeibe Lisias fela yunde hebele kiyae yae maei mera nukeufake. <sup>8</sup> Maere nda a waei bere roumale memale kolomandere ukeume. Nda ro na na hele yae hineungekondena, weyae isaeiyebonde maeinya a na helebe naei u ranne hayaende." <sup>9</sup> Nebeinya Yahudi ro miyae nekate nemene Paulusre me nokainyele. Nane merau Tertuluslena a elewolere na helere wokainyele.

*Paulus Feliksle Bene Naei U Aere Olewole*

<sup>10</sup> Gubernur Feliks Paulus are elengkonde naei u mekai yae koungekoke. Paulus aunguke mo weunge,

\* 24:6 24:6 Homofae henane hiwa ( ) reufi baraiboke hiwa ebaraiboi.

“Reyae isaese nekale weyae ralo yakama yae nda kanina ro miyaere mere koloimeyamae. Nebei aerene reyae rei mai hubanale waei ro be ro yoinye raei a faeu elerelere. <sup>11</sup> Wenaiejae hului koloinye, ya me bee oro nen bee bele hului reyae Yerusalem yore Allahre eise molorebondere ewale. <sup>12</sup> Nebei ekalene Yahudi ro miyae hiwa hanne howande naeise rare ereiboi. Nane merau ro muli yoborebonde akure ketembonde naeise Allahre ei mom-mom imae na kaban sele kiyaene, ei moloi-moloi imae hine-hine, makeinye-makeinye nebei yo ei yan einye, reyae omokoiboi. <sup>13</sup> Nane merau mana nda a faeu raei u ranne hayaete naeise neyae na yaka yae eyakaiboi. <sup>14</sup> Na hele, Gubernur, reyae ware na yaka yae ufetere, reyae Yesusle wali nibine hakoyanale. Nebei wanenne maei yobe naeite kamahe naeite Allahre reyae ei molanale. Nane merau Musale walora wali heere foloukoke homofaena a bele Allahle yenjo kayaayo homofaene molaikoke a bele reyae namman hila rabo halaele. Nda ro miyae ahuneyaise yo Yesusre hakainyekoke yo holore agama hi yae elate. <sup>15</sup> Naei rabo halaete wanan mbai reyae halaele, wali himalainyekoke ro miyae bele bekore mokowate yo nemene fomene herewatera Allah walemmile. <sup>16</sup> Nebei wanenne Allahle bene ro miyae naei bene reyae releyanale raei kena une na ijen naeise a weufe hului nekeyale.

<sup>17</sup> “Ralo yakama heki hului reyae Yerusalem yo oro alei meungekeukokale mo, reyae benen bukeufikale maei yone kou kalo yore roise isemilere mewale. Nane merau Allahre hili era akau erare obo yoku ongkou wae felerebonde. <sup>18</sup> Allahre ei mom-mom imae na kaban sele kiyae einye nebeinye mokowale yae rare uwa faeinyebokalere erekaisele. Ro miyae raei bokone helen sele ban hebewate. Nane merau nebeinye aku wanan yembondere u hele. <sup>19</sup> Yahudi ro miyae mbemba Asia kanira mewate yo erewamaele hebewate. Naei sele bae, neyae mate ware nda a wayete. Reyae me hila u hila koukokalene, na hele erekaisele. <sup>20</sup> Nebei aerene nda yo are roukate mekate yobe waeimihi nenaiejae ware wayeko rahe me hila u hilabe nda Yahudi yoyo koseyo bene raeinya erekaisele. <sup>21</sup> Nda a mbaibe reyae naei bene eleukokalebe: ‘Reyae hila rabo halaele herena yo anaiminunde!’ Nebei aerene mana reyae waei bene yawaisehoke mekande are kolomangkondere.”

<sup>22</sup> Feliks Yesusle walora wali nibire foi yae isaeyeubokene, nebei riya nekewate ahuneuboke. Feliks yae weumi, “Lisias fela yunde hebele mende wa nda kolaunge reyae a hokorekondere.” <sup>23</sup> Nebeisa nebeinya fela yun hi kiyae Paulusle kayaare hebele kiyaere weunge Paulus kayaa foi yae hebennele. Nebeibe ebi fere waeungehinde na kahili wafeu menate, naei riyeumi rambun inyainyele.

#### *Paulus Feliksle Drusilale Bene*

<sup>24</sup> Ya heki ban mainyekeukoke mo, Feliks na miyae Drusilale mekete. Na miyae Yahudi maengke. Feliks ukeumi Paulus ekate yawainyehoke meke. Yesus Wali Ondofolore hila rabo halenainyele walora ro miyae na walire hole molommibonde a huweungoke Feliks ninae boroungoke. <sup>25</sup> Paulus wali himalomambonde a bele, u mekai haramabonde a bele, moinya yane aei walire hului emangkolonde a bele, huwoumi yae Feliks buhae hokoungoboke, Paulusre weunge, “Ninae! Weyae nda heene mo kulun wele ele. Ya mbai mon molombondena, reyae ware kaendekote mele.” <sup>26</sup> Feliks Paulusre hainyengkondere na roise rakei-takei rakewole. Nebeinye Paulusre roko mbemba are elenetera kaenekoyoung.

<sup>27</sup> Ralo yakama bee nekaikoke mo, Perkius Festus Gubernurre yeunguweuboke Feliksle a bulure. Feliks, Yahudi ro miyae na kenare rowenderene, Paulusre ereungekoke kawane hebeweke.

## 25

#### *Roma Naei Kaisarle Bene Paulus Riyeumihike A Kolonainyekoondere*

<sup>1</sup> Ya name Festus Yudea kanine Gubernurre yeunguweuboke mo, Kaisarea yora kulun uke Yerusalem yore ewole. <sup>2</sup> Eke Yerusalem yone mo, nebeinya imam yun-jun bele Yahudi yun-jun bele Paulusle naei a bele uwainye naeise Festusre hubayaekoke. <sup>3</sup> Nebei yo merau rainyehike nibine menate yae Paulusre honaibondere. Nebeinye Gubernur Festusre a moi-moi bele mokowainye wainye, “Maere erabui foi mokoumebonde Paulus Yerusalemde yaungainyehonde enate.” <sup>4</sup> Nebeibe Festus yae weumi, “Paulus Kaisarea yona ikilainyekoke eke nekele, reyae na heki ban benen nebeise bukerehinde erelere. <sup>5</sup> Nebei aerene mai yun-jun yo mbemba rare hakonsoko ema. Na hele na me hila u hila mokowolena, Kaisarea yone ranaisinde kolomande.”

<sup>6</sup> Yerusalem yone ya mehine name, me bee hului nekeukoke mo, Festus benen bukeufike Kaisarea yore ewole. Eke nekewole ya heuboke mo, are kolonainyele riya mokouboke. Festus yae ukeumi Paulus yawainyehoke meke. <sup>7</sup> Nebei Yerusalem yora

Festusre hakainyeko me wate Yahudi yoni-yoni, Paulus yawainyehoke meke bae, ele yae nainyeboke. A mahi-mahi ehee bukulu ungainyonde a faeu naei u ranne mo haiwainye. Nebeibe hi yae ha yae nena ei ijoko yae erekeunge, nena ei angkaei yae boroubokere eleikoi mo.

<sup>8</sup> Paulus naei u aere olewole weumi, "Musale walora wali heere foloukoke a reya mbai sambai asasi okoikoi, Allahre ei mom-mom imae na kaban sele kiyaere, nane merau Roma naei Kaisarre."

<sup>9</sup> Nebeibe Gubernur Festus Yahudi ro miyae naei kenare rowenderene, Paulusre hineunge, "Ndi wanen waei u ranne mo hayaetene, weyae be hineubonde Yerusalem yone raei bene emale a kolomandere?"

<sup>10</sup> Paulus yae weunge, "Reyae Roma naei Kaisarle wakun danne nda nare hebale, nebei anuwaunge helere rangkele mangkele a kolomangkonde. Weyae waeisaei reyae Yahudi ro miyaere beko omokoiboi. <sup>11</sup> Nebei wali heere foloukoke honate a reya asasi koukokalena, hoiboi yae nendon honsebombe, reyae kena. Naeinya ahunaise a hele banna, hi yae ha yae Yahudi naei me eise rare ekinyeiboi sului. Reyae riyawale Kaisarle bene kolomangkonde."

<sup>12</sup> Nare a usaeise wainye yo bele eleukoke a hubainyeko mo, Festus yae Paulusre weunge, "Foi, weyae Kaisarle bene a kolonnekombere riyeyaena, Kaisarle bokore yaungayeufonde embe."

### *Paulus Ondofolo Agripale Bernikele Bene*

<sup>13</sup> Ya na heki ban mo Ondofolo Agripa nemaen Bernikele Kaisarea yore Festusle bokore be rasise ekete. <sup>14</sup> Nebei yone ya helen nekeneikonderene, Paulusle a koloimeyainye Festus Agripale yakaungeboko: "Ndana ro mbai Feliks yae kawara ehayeikoi. <sup>15</sup> Yerusalem yore ekale yae, imam yun-jun bele Yahudi yun-jun bele mekate rare Paulus na me hila u hila huwaisele. Rare ukaisele Paulusre ehee bukulu nehakaie sele isendere.

<sup>16</sup> "Reyae nare ukamaele Roma naei manne honolene, ro mbai waeisiyainye nare ahunainye yo bene naei u aere oleikoyolera wa, nebeisa a hokoikoyate. <sup>17</sup> Nebei aerene neyae mekate hee reyae benen hekire oyoboi, nebeibe ya heuboke na hibi reyae are kolonainyele riya huba raweubokale. Ukamaele nebei ro yawainyehoke meke. <sup>18</sup> Nare ahunainye yo maisebeuboko naei a faeu elayoke. Raei u benera nekewise Paulus naei beko mokowole mbai yakanaibonde, nebeibe mbai sambai eleikoi. <sup>19</sup> Naei agama kate naei abe eisi meisi yae elewate. Nane merau ro mbai hereke na ro Yesus, nebei Kiyaele kenane relewainye. Nare ahunainye yo yae elate nebei ro hereke, nebeibe Paulus yae elele, neyae wali bele nekele. <sup>20</sup> Nebei a kolowainyere reyae isaieisibondere na hului ban sele, onei-onei onewale. Paulusre hinewanale neyae be hinembonde nda a Yerusalem yone emangkolongkonde. <sup>21</sup> Nebeibe Paulus naei kena kwowole nda a kolainye Kaisarle bene, Kaisar nenaiejae hokongkonde. Nebei meraunge reyae ukamaele benen kawa einye hebende mende reyae ya mon roufele wa, Kaisarle bokore ufemile yaungainyehonde enate."

<sup>22</sup> Nebei ara boroukoke bae, Agripa yae Festusre weunge, "Raei bele nebei ro elele a bororengkon."

Festus yae weunge, "Wahenare weyae boroungbonde."

<sup>23</sup> Ya heuboke mo, Ondofolo Agripa nemaen Bernikele, yo koi yo bae yae yawaimiboko ongo imae kabande ayeuboko. Kaisarea yona fela yun-jun bele na yoyo koseyo bele nanembaisa nangkele ninai ayeuboko. Festus ukeumi Paulus yawainyehoke meweuifike. <sup>24</sup> Nebeisa mo Festus aunguke nebei yo arilewolere weumi, "Ondofolo Agripa, nane merau aei mewaube yo nemene, nda ro naei aerene Yahudi yoni-yoni yae mekate raisikate. Yerusalemna Yahudi nekate ro miyae bele ndana nekate Yahudi yo bele rare kali yae kaenewise nebei ro honaibondere. <sup>25</sup> Hoiboi yae honaibonde naeise reyae ereungekokale, nebeibe nda ro erabuhi beko omokoiboi. Naei kena kole Kaisarle bene kolonainyekonderene, reyae be hineubokale. Roma yore yaungainyehonde enate. <sup>26</sup> Nebeibe, Kaisarlere homone molorekondere Pauluslena a na hele reyae hinale, namman eyakaiboi. Nebei aerene reyae mai bere yaweungehokale meke, naei bereise Ondofolo Agripa weyae mekaere! Raei u benera elale nda wanenda kolomangkonde, reyae nebei randa homore molorekonde Kaisarlere ende. <sup>27</sup> Raei u benera nekaise elale niyae ban sele, ro mbai na aere eyakaiboi yae, nendon Kaisarle bere eyawei eijae."

<sup>1</sup> Nebeisa Agripa yae Paulusre weunge, “Meyae waemayeufinde waei a naei na hele eleukondere.”

Paulus na me bumare yae raneungejeke, nda wanen mae weumi, <sup>2</sup> “Ondofolo Agripa, reyae kena foi hubanale rabuhine ban raei a faeu nebei Yahudi yoni-yoni ahunaise, waei ro be ro yoinye a hele elerekondere. <sup>3</sup> Reyae raeisaei nekale, weyae Yahudi naei wali heere foloukoke bene a hena faeu fena bele nemene ninai isaeyekokae. Raei a elerondere wa kena hebaen mae boroufonde!

<sup>4</sup> “Yahudi yoni-yoni nemene naeisaei raei wali na fa-fana nekewale, raei kanine bele Yerusalem yone bele reyae ikale hokolore yeubokale. <sup>5</sup> Nendahina nebei yo rare naeisaei bangka mo nane merau kena konatena, na hului nenaiejae elenaikonde, reyae nendahina Farisi ro miyae hului yeubokale nekewekale. Nda Farisi holo maei agama naei wali heere foloukoke hakainyekoke naei elaekei sele. <sup>6</sup> Mana ya, Allah yae maebu naei maeko naeise a heteungekokere reyae hila rabo halaelene aerene ndane mangkele kolannele. <sup>7</sup> Ondofolo Agripa, nebei Allah are heteungekoke a mbai Israel yoni-yoni nebei naebu naei me bee oro nen bee bele yo bele naei orona mena bele ereiko rakeiko koimeyate nane merau Allahre reniai rai ei moloiimeyainye. Nebei a heteungekokere reyae rabo halaelene, Yahudi yoni-yoni rare ahuneyaise. <sup>8</sup> Allah ro miyae hereubera na hului waleungeboube. Rahene mayae na hului ban mae elaube?

<sup>9</sup> “Na bere hele raei u bene nekewaise nda Yesus Nasaret na Role homora hakaikoke mate yo na nibi a foloremikonde haisemikondere hele mokoungebokale. <sup>10</sup> Na hele Yerusalem yone naei merau reyae mokowale. Imam yun-jun elae yaeise, Yesus Naei eleukoke wekeumi ro miyaere raei kenana hului ikilale kawa einye ahewamale. Hoiboise honaibonde kiyae reyae nane merau bere hinewekale. <sup>11</sup> Roko helen ei moloi-moloi imaene reyae eyewale weitasi kamaele wamaele Yesusre moise bulenainyebondere. Raei ikele han nebei yore na beko hele, habeleyande yo hi kani bele eibalande.

<sup>12</sup> “Nebei nibi mbaibe reyae imam yun-jun naeisa elae ikaisele Damsiyk yore ewale. <sup>13</sup> Ondofolo Agripa, rai hu yaukanne hului yae nibi nolone ewale mo, hehe mbai yakura naeukoke owole hu hehere moi wokeunge. Oke na hehe reyae hebewale ijenne nane merau maei riyana mewande yo nemene ninai naeumekoke. <sup>14</sup> Nemene nebei ewande yo ane balekande. Nebeisa borale bae a mbai rare Ibrani afaeu wae weufe, ‘Saulus, Saulus, rahene Rare weitasi koimeyaere? Rare waei beko koufemendena, nebei ehee bukulu mbai wenaiejae hubaungehinde.’

<sup>15</sup> “Reyae hinewanale, ‘Tuhan, Weyae wende?’

“Tuhan mae weufe, ‘Reyae Yesus, weyae weitasire koimeyaere Kiyae. <sup>16</sup> Ainyu! Ware ranereuwende Raei yebaei bubaei yeubondere Raei uwa mana ya ware kelereibote. Mana yara Rare erarae nane merau bena ya honoifoyolene ware kelerewende, weyae ro miyaere huweumiyende. <sup>17</sup> Waei yo yan nolone nane merau Yahudi ro miyae ban yo naei nolone ware hole molorewende. Yo hi yan sire reyae ufete ele. <sup>18</sup> Ro miyae hakoumiyende walobo yunbe me kelee u keleene onei sandai bele wali nibira ungaibonde Allahle me kelee u keleene isaie hebaen bele wali nibire menate. Rare hila rabo halenaiselena, naei beko bako Allah faeinyembonde, Allah naei eleukoke ro miyae riyane hammikonde.’ ”

<sup>19</sup> “Ondofolo Agripa, nebei wanne reya Allahlera erekale huluinye hakoubokale male. <sup>20</sup> Ro miyaere na yaka yae reyae huwamaele naei beko bakora nulu kenaimile, Allah a weumi hului nekenate, nane merau naei me u mokonate walora ro miyae kelenaimele na hele wali bekora nulu kaimiboke. Nebei a Damsiyk yora, Yerusalem yora, Yudea kani yaneukokalera, ekale Yahudi ro miyae bande ekale huwamaele. <sup>21</sup> Nebei aerene Yahudi yoni-yoni Allahre ei mom-mom imae na kaban sele kiyaele imaehou einye rare ikilaiseboke honaisebondere kowate. <sup>22</sup> Nebeibe meke nda heene Allah nin kan roroufemekene, nda hee ro raimi bele, ro ban bele ro miyae bene hebale a wamale. Nda wamale a na bere Musa yae nane merau Allahle yenjo kayaayo yae a mehininde kolowainye mbai. <sup>23</sup> Naei a nda wanen molaikoke: Wali Ondofolo mende beko hubayengkonde. Neyae na berei sele herera walembonde. Hehe naeumikonde wanen mae Neyae wali neme wali nibi are Yahudi ro miyae belere Yahudi ban ro miyae belere kelemmüle.”

<sup>24</sup> Paulus namman ane nare elewoke mo, Festus aunguke kaeneunge, “Paulus, wa u keube aubokete koyae ya! Isaekae-isaekae wa uwa keu bele yeubokae koyae!”

<sup>25</sup> Nebeibe Paulus yae weunge, “Gubernur Festus, ware ro rawale, reyae keu okoi. Raei u bene foi moi sele, nane merau nda a faeu reyae na helebe elale. <sup>26</sup> Ondofolo Agripa nda a elale neyae naeisaei sele. Nebei aerene reyae fe efai nda a faeu naei ro be ro yoinye mekale eleyale. Nda rambun-rambun nunne ohono, na yaka yae bewatene, reyae raeisaei nekale nemene neyae ninai naeisaei bangka mo. <sup>27</sup> Ondofolo

Agripa, Allahle yenjo kayaayo naeinya a elewate weyae na hele rabo haleyae? Reyae isaeyeubokale weyae nane merau rabo haleyae!"

<sup>28</sup> Nebeisa Agripa yae Paulusre weunge, "Naendae wanen, waei u benera nekete a fofu huwele yae weyae mokoufobonde Yesusle moisa hakorebondere?"

<sup>29</sup> Paulus yae weunge, "A fofu, koko reyae Allahre ebeli banale, mana yara weyae Agripa nane merau mayae mekaube boraukokaubene nemene raeinya wanen yengkombe. Nebeibe nda rantai raei mena mayae ehubaijae!"

<sup>30</sup> Nebeisa bae Ondofolo Agripa, Gubernur Festus, Bernike, nebei yoni-yoni arilewole yo aufae ainyuke. <sup>31</sup> Ekate moinye bae naeise-naeise elate, "Nda ro hoiboise honaibonde naei, kawane hebende naei, me u beko omokoi."

<sup>32</sup> Ondofolo Agripa yae Gubernur Festusre weunge, "Nda ro Kaisarle bene a kolonainyekonde naeise eriyei yae, kawara hayaeyekoube eube."

## 27

### *Paulus Bu Wakara Roma Yore Ewate*

<sup>1</sup> Meyae Italia kanire bu kaisa haumabonde emalere a hokaikoke heene, Paulus kawane hebewate hiwa yo bele Yuliusle me einye kinyainyeboke ewate. Nda Yulius Roma naei Kaisarle felayo holona naei fela yunde hebewole. <sup>2</sup> Adramitium yona bu waka kabanda meyae hawandeboke ewande. Asia kanine yo mbembane nda waka ende yangkonde. Makedonia kanine Tesalonika yona ro mbai na ro Aristarkhus nda ewandene nangkele hakoumeboke.

<sup>3</sup> Ya heuboke mo, meyae Sidon yone andenoke. Yulius kena nime haba yae Paulusre waeungehike kalore molounge rambun riyemmihinde inyainyele naeise yaufe ewakouboke naei kahili wa bokore eke. <sup>4</sup> Sidon yora meyae benen nandehike ewande. Alu meke bera ukeumene, Siprus yokoba reufira alu ban habalara olaendeboke. <sup>5</sup> Nebeisa meyae bumoko nolora nandehake Kilikia kani bele Pamfilia kani bele honote bu habalara ewande Likia kanina Mira yone andenoke. <sup>6</sup> Nebeinye andenoke mo, Yulius eke bu kai mbai Aleksandria yora meke erekunge Italia kanire enderene, maere yaweumeboke nebei kai einye andehaweuboke.

<sup>7</sup> Ya heki hele ban meyae bumokone mo, yai-jai sele andeyaukoke nebeisa relaenneke ekande Knidus yo nobaenneboke. Alu namman nebei hulul rawolone, maei bere halaendeboke ewande ijen kabaennekoke. Nebeinye meyae Kreta yokoba reufi alu ban habalara olaendeboke, Salmone yomo moi wokande. <sup>8</sup> Nebei Kreta yokoba na habala fere alure relei-telei relaennekoke, ekande yaba mbai na ro Bu foi A foi yo Lasea yo kelaunga honole.

<sup>9</sup> Ya mon helen sele meyae hayewande. Yahudi naei ya kaban (yarele me heiboyate ya) moi hayaendekoke. Nebeibe alu hee ya hee meungekene, naei alu rawewole bumoko ahuneuboke. Paulus eke nebei bu wakare orate rora alu naei are isaeyumikoke. <sup>10</sup> Paulus yae weumi, "Aka naei baeke naei, eyae na hibi emalena, raisaaise nekale beko emabende. Rambun helen kalo wononde, rambun bele waka bele mo ban, aei uwa nane merau beko bemale." <sup>11</sup> Nebei fela yun hebewole ro, imoli mokoise mokole kiyae bele nebei waka rorele bele a ukeinyere rabo halewoumi, Pauluslena are oboro. <sup>12</sup> Nebei isou alu kaban heene waka yoroi-yoroise yabi-yabine, meleyae naei kena kate Feniks yone mo einyekate. Kreta yokobane Feniks yona wakare yorate isou na kaban sele kiyae, hi ebon waise beufoke yale, hi robon waise beufoke yale.

### *Alu Enaa Maken Bumokone Raweuboke*

<sup>13</sup> Nebei ya, hilo raweubokebe, kanda-kanda wanen kowole. Waka einya mokate yo yae elate, "Na hulul emale." Nebei aerene nebei yo kai hunde rannehinde rambun yobaiboke nandehike Kreta Yokoba habalara ewande. <sup>14</sup> Na heki ban mo, alu enaa maken nelaekesi sele yokobara raweuboke. <sup>15</sup> Meke maei waka ewandene bowole, alu meubere yae emalena, melihau. Nebeinye ninae alu yae haleumeboke ewande ijende yae beumeboke yandeke. <sup>16</sup> Kauda yokoba ebi ken honolene habala reufira olaendeboke wa, alure ebi fere ahaendekoke. Nebei bu wakana waka-waka ebi ken moisa yobandekere kaemabondere relei-telei relaennekoke mo, <sup>17</sup> kaendeboke waka kaban einye andeboke. Nda waka kaban kayengkonde belene ha yae aukainyele-aukainyele. Buhae hokoumiboke Afrika kani reufina ifau yabane kolommikonde belene, au olaendekoke, alu raweuboke ele meubere yae yandeke. <sup>18</sup> Alu eheinyui, na hibi-hibi rawolone, ya heuboke bae waka einya rambun-rambun hiwa bune hayewate. <sup>19</sup> Ya bee nendo waka einya mokate yo waka naei rambun-rambun bune nenaiejae hayewate. <sup>20</sup> Be baheiboyole, ya eiseiboyole heki hele hu ijoko findelau ijoko ereibo mo yandeke, alu na rawei-rawei mo raweweke. Walire kenabe, nebeibe here bene rannehike.



<sup>21</sup> Ya heki ban nebei yo raman aneikoi nekaimekate. Nebeisa mo Paulus eke nebei yo naei nolora hebeunguke weumi, "Aka naei baeke naei, raeinya elewale na Kreta yokobane yande yae, nda wanen beko mekande hubannele eyae ehubayeikoi. <sup>22</sup> Nebeibe, mai kena nda hee ehabajae. Hi yae ha yae nda mande nolora beko ebei, nda waka mbaike beko yembonde. <sup>23</sup> Rabuhine ban, mana reniai honale yae, raei Allah Naei me einye nekale Kiyae, reyae eise molanale Kiyae, Na malaikat meke raei bokore. <sup>24</sup> Meke rare weufe, 'Paulus, Kaisarle bene weyae a embe kolonnele naeise buhae ohokojae! Allah kena buhae aere ban mae heumi Kiyae, waei aerene nda ro miyae hawauboke maube nemene fomene na foi embe.' <sup>25</sup> Nebeinye reyae wamale, aka naei baeke naei, rei nendon kombe! Allah raei rabo halaenale Kiyae a rare ukeufe huluinye benate. <sup>26</sup> Nebeibe, eyae yokoba mbainya yabane emahabalande."

<sup>27</sup> Ya me bee oro nen keli bele (14) meyae namman Adria bumokone beumiboke yandeke. Reniai nolo hului yae, waka einye mokate yo yae hubainye waka yaba nobewoungue. <sup>28</sup> Nebei aerene rukane ha molaisike wokate bumoko na wauwau yalere hubainyehike. Na wauwau rorele u bee (40) meter hului. Na heki ban mo, benen ruka wokate oke. Roukate hubainyehike na wauwau rorele u mbai me bee bele (30) meter hului. <sup>29</sup> Nebei yo buhae hokoumiboke wakabe ruka ranne kolonnekonde belene, waka imoli bohira kai hunde rannehinde rambun keli hele hayaikoke, yare hembondere a mohi bua bowate. <sup>30</sup> Waka einye mokate yo na maleu-maleu wae waka eisa hakanaikondere mokainyeboke. Waka ebeubera kai hunde rannehinde rambunde hainyaikonde wanen mae ame-ame yae mokainyeboke, nebeibe einya waka mefa mbai yalebe bure bulaerainyeboke oke. <sup>31</sup> Paulus yae nebei waka kaban einya felayo bele na yun belere weumi, "Nda waka eise mokate yo waka nukenaikondena, mayae maube nemene fomene hi yae ha yae wali ei." <sup>32</sup> Nebeinye felayo nebei waka melae hara folaiiboke, nebei waka beuboke yaweke.

<sup>33</sup> Ya eyoloihoi mo, Paulus kayaa orouboke nemene ramande anenatere. Paulus yae weumi, "Aka naei baeke naei, ya me bee oro nen keli bele (14) mayae fe yae waku yae nekembene, raman euwa ban yaumeke. <sup>34</sup> Reyae riyamale, raman ebibi anengko. Nebei wanendere mai uwa benen elae yarongkombe. Nemene na foi mo, hi yae ha yae mai nolora enundeihoi." <sup>35</sup> Nebei ara eleukoke mo, Paulus feufe mo rouke nebei yo hebate bene Allahre helen foise ukeunge, wahewoumi Paulus huba raweuboke anewole. <sup>36</sup> Nemene fomene na kena rei aumiboke, raman anewate. <sup>37</sup> Nebei waka kaban einya mewande ro nemene na helen 276. <sup>38</sup> Nemene raman foi anaikoke mo, wakare fomambonderene gandum yoni-yoni hawewate nemene bune haiwate.

#### *Waka Ifau Haeijangkane Koloumikoke*

<sup>39</sup> Ya eiwo meiwo kowole mo, waka einya yo kani hubabe erekate. Rahe kani huba ban nebei yo onewate. Erate, kou mbai na ifau yaba bele beufake. Nebei wanen erekatene naei u benera elate, na huluinya waka nebeinye memahabalande. <sup>40</sup> Nebeinye kai hunde rannehinde rambun na ha folowate na ruka bele ruwaboungue ruwayeke. Imoli mokoinya hare mo bulaerainyeboke. Nebeisa neyae au waka ebeube bohina kiyae nainyejeke. Alu rawembonde halemmibonde yabare memale. <sup>41</sup> Nebeibe nebei waka meke ifaunge huneke. Ebeube bohi koloungekoke kusei mahei ban. Imoli bohi alu ruwae elae yae boukoke mohaeiboke.

<sup>42</sup> Felayo nebei kayaare hebeimeyaimi yore merau rainyehike honaikondere. Neyae buhae hokoumiboke nendon hiwa bura hikonaimaende yaufe yae hakanaikonde bele. <sup>43</sup> Nebeibe fela yun naei kena Paulusre hole molonnebonderene, nebei merau kolowainyere hee nekeumi. Ukeumi bure hikate isaei yo yae balenate yabare hikonaimaende, <sup>44</sup> hiwa yo nebei wakana o, ehufi-reufine ikilenate yabare menate. Nebei wanen mokandebokere nemene na foi yae yabane maendehebeuboke.

## 28

#### *Malta Yokobane*

<sup>1</sup> Meyae na be foi yoi foi yae maendenoke, isaeyaendeboke meyae Malta yokobane mekande. <sup>2</sup> Na ro miyae maere foi sele kowaime. Ya yae woke molowole, nane merau hin manse neke. Nebei aerene ise mo kolaiboke maere nemene yawaimbeboke ekande. <sup>3</sup> Paulus ye kelan-kelan arileukoke. I rande haiwole hee, rami mbai i naume hubaungehikene meukuke Paulus na mebe akeuboke. <sup>4</sup> Malta yokobane nekate yo Paulus na mene rami akeuboke hilowolene, naeise-naeise elate, "Nda kiyae robe howolene era, alune nare bumokona alura mekatebe, nebeibe nda kani kelana a hele no yae walire waenainyehinde endere nibi ban." <sup>5</sup> Nebeibe Paulus nebei ramire hineungekoke, i ranne oukuke, buhae ehubaisi. <sup>6</sup> Nebei yo naei u benera elate, ebi fere mo Paulus na me

ohulembonde, na heki ban mo nda ro hokonnekonde herende. Nebeibe rakekate an, rabuhi ma hi wanen Paulus nauwane eyeiboi mone, na u bene bele ma hi yae nekaimi elate, "Nda ro walobo ya."

<sup>7</sup> Meyae yabane maendehhebeuboke kelaeunge kani mbai Publius, nebei yokobare ondofolore nekele kiyaele. Na kena foi yae maere yaweumiboke naei kolo yo wanen mae ya name naei imaene mandenekeukoke. <sup>8</sup> Nebei hee naeko erane kowole. U naume, yarele-yarele rilewole. Paulus eke ereungeboko Allahre ebeli bounehike, nebeisa na mere mo koloungoke, na hibi nebei era kowole hireungeboko. <sup>9</sup> Nebei wanen borowatene, nebei yokobana ro miyae Paulusle bokore hokowole, nera buloore kayeke yo onomi yarowate. <sup>10</sup> Maere rambun nekai iwaima. Nane merau nemahinde emale hee yae bumoko naei inyale na hului hawaimekoke.

*Malta Yokobara Roma Yore*

<sup>11</sup> Oko name Malta yokobane nekandekoke. Waka mbai Aleksandria yora meke, nebei yokobane alu kaban heene yawole. Nda waka Kastorle Poluksle kainye-kainye honaikoke walobo bee naei ro yun mae mokaikoke. Nebei wakara meyae hawandeboko ewande. <sup>12</sup> Sirakusa yone andenoke, nebeinye ya name nekandekoke. <sup>13</sup> Sirakusa yora benen nandehike ewande Regium yone. Ya heuboke mo, alu hilo raweuboke, nebeisa na ya bee nendo Putioli yone andenoke. <sup>14</sup> Nebeinye ekande ro miyae hiwa Yesusle einye aka baeke hiwa hubayaendekoke. Maere yawaimeboko ekande nangkele ya mehine bee bele nekandekoke. Nebeisa ara Roma yore kulun ukande ewande. <sup>15</sup> Roma yona Yesusle einye aka baeke meyae ewande a borokatene, nebeinye ara mewate. Naise haete anuwau mbai na ro Apus nebeinye rakewaime, hiwa yo Kolo Imae Name anuwaunge rakewaime. Paulus meke hubayaekokate bae, Allahre helen foi nekai uwoung, na kena elae rouke.

*Paulus Roma Yone*

<sup>16</sup> Ekate Roma yone mo, Paulusre waeinyehike nembai nekewole. Felayona ro mbai ya kayaere hebewoung.

<sup>17</sup> Ya name nekandekoke mo, Paulus Yahudi nebeinye yun-junde kaeneumikoke mekate. Mewarileufike mo, Paulus yae weumi, "Aka naei baeke naei, reyae mbai sambai aei yore bekore omokoiboi, nane merau aei yobe naei kamahe naeite na era hena mokoimeyate reyae asasi okoikoi. Nebeibe rare Yerusaleme ikilaiseboko Roma naei me einye kinyaiseboko. <sup>18</sup> Neyae raei me u mokowalera erainyekoke, hoiboise honaisebonde naeise merau kolowainye namman banne hainyaisekondere a elewate. <sup>19</sup> Nebeibe, aei Yahudi yoni-yoni yae ahi hele elewate. Nebeinye reyae kena elae roukale Kaisarle bene kolomangkondere relewanale. Reyae nebei wanen mokoubokale aei ro miyaere mere norommiyonde kenane ban ahuneiboi kowale. <sup>20</sup> Nebei meraunge, aka naei baeke naei, reyae mare yawensokamale mekaube a faeu mbainye elemalere. Nebei Israel yoni-yoni rakewainye Walilo Henalo, nebei Kiyaele aerene reyae kawana ro wanen ha yae rinewise."

<sup>21</sup> Nebei yo wainye, "Homo mbai sambai waei naeise meyae Yudea kanira erowei. Nebei wanen aeinya ro hi yae mende waei are elende wanen meyae oboroiboi. Nane merau waeinya beko bako naei are neyae emeileikoi. <sup>22</sup> Nebeibe meyae kena kande waei rabore halaena Kiyaele a boromabondere. Meyae maesaei nekande ro miyae makeinya-makeinya Yesusre hakainyekoke yore a wewe yae koyaimi."

<sup>23</sup> Nebei yo Paulus naei riyare benen arilensinde naei ya rainyehike. Nebei ya Paulus nekele anuwaufe ro miyae nekai hokowole. Allah merau raungehike Naei holona ro miyae Yesusle me kelee u keleene nekenate a nemene na renera ele be eibaheiboyole ninae kelewoumi yakawoumi. Musale walora wali heere foloukoke homofaera bele Allahle yenjo kayaayo molaikoke homofaera bele yakawoumi Yesusre ro ronainyebonde hakonainyekondere Paulus na waeli hele bewoumi. <sup>24</sup> Hiwa yo Paulus elewolere na hele elayeke, hiwa yo ame yae elayeke. <sup>25</sup> Paulus nda a mbai ken ninae herawoung uwoumi, "A na helebe Allahle Roh yae Allahle yendo kayaalo Yesayale euwara mai yobe naei kamahe naeise ukeumi!

<sup>26</sup> 'Eye Yahudi yoni-yoni weumile:

Mayae na boroi-boroise mo borombe,

nebeibe isaei orowei,

Na kanei-kanei mo kanennelebe,

nebeibe ereiboi,

<sup>27</sup> Rabuhine ban, nda yo na kena ruka-ruka hele,

naengkaei fae yae ahunewate, na ijoko kunaikoke.

Nebei wanen ban mae yae,

na ijoko erenate, nangkaei boronate, na kenara isaeinyate,  
naei bekora benainyehondene,

Reyae onomi isemile.’ ”\*

<sup>28</sup> Na huba mokoikoise Paulus yae weumi, “Aka naei baeke naei, mayae isaeyembombe Yesusle walora Allah ro miyae wali hole molommibonde a nda hee Yahudi ban ro miyaere huwaimi, neyae boronate, hakonate!”

<sup>29</sup> Nebei anuwaufa ewate yo aku nau bele balayeke.†

<sup>30</sup> Imae mbai Paulus roi yae mokowole. Nebeinye ralo yakama bee nekeukoke. Naendae wanen horo Paulus Roma naei felayo kayaa hebewainyerebe, Paulus naei bokore orowate ro miyaere na rei mai yae ei hawewoumi. <sup>31</sup> Allah merau raungehike Naei holona ro miyae Tuhan Yesus Wali Ondofolole me kelee u keleene nekenate a bele Yesusle walora wali nibi a bele Paulus fe efaei huwoumi, yakawoumi. Hi yae ha yae nare aheikoi.

---

\* **28:27** 28:27 Yesaya 6:9-10 † **28:29** 20:29 Homofae hena hiwa ayat 29 baraiboke, hiwa ebaraiboi.

## ROMA

<sup>1</sup> Onomi foka, aka naei baeke naei Roma yona nekaube. Reyae Paulus, Wali Ondofolole kaliare mokale kiyae, nda homo moloukokale. Allah yae rare kaeneufekoke Yesus Wali Ondofolole abu akore yeubokale nane merau eleufekoke Naei a foi faeu foi ukeufere hufemilere. <sup>2-3</sup> Nendahina Allahle homofaene Naei yenjo kayaayo walora a heteungekoke nebei a foi faeu foi Naei Kelule naeise yakammibonde. Allahle Kelu ro miyae helere yeuboke, rabuhine ban ro miyae hului yae Yahudi Ondofolo kaban Daudle orona menara hononate. <sup>4</sup> Nare herewate yo u nolo u kaisa aungunuke yae Allah elae wake belere keleumiboke, nebei Kiyae Naei Kelu helere yeuboke nane merau Allahle u mekai mbaibe nekele. Naei Kelu aei Tuhan Yesus Wali Ondofolo. <sup>5</sup> Yahudi ban ro miyae kaenemamile Wali Ondofolo Naei a elelere hila rabo halenainyele hakonainyele naeise, Naei walora Allah maere kena buhae aere ban mae heumekoke nane merau Yesusle abu akore mokoumeboke. <sup>6</sup> Nane merau Yesus Wali Ondofolo Naei holone nekenate naeise, Allah kaeneumikoke ro miyae u nolo u kaisa mayae mangkele.

<sup>7</sup> Mayae Roma kanina Allah kena buhaere hembe nane merau kaenengkokembe ro miyae, Yesus Naei eleuboke wekeumi holone nekembe yore nda homofae reyae moloukokale. Reyae ebeli banale aei Ako Allahle Tuhan Yesus Wali Ondofolole mare kena buhae aere ban mae henembe nane merau rei mai haungembe.

<sup>8</sup> Nda homofae huba raweiboinye Wali Ondofolole walora mai naeise reyae Allahre helen foi wanale, rabuhine ban Wali Ondofolo Naei a elelere mayae hila rabo halaeunge nane merau nebei a naeise nda kani kelane a eungeyoboukoke. <sup>9</sup> Allah Naei Kelule a foi faeu foi yo ran yo randa raei kena u na maemae hele yae huweimeyamale yae Naei kaliare mokale. Neyae Naeisaei nekele mai naeise reyae ebeline Nare na hibihibi eibowanale. <sup>10</sup> Na yane baei nda a riyejanale, "Allah, Weyae kena koyaena, nibi weungende nda hee nebei Roma yona ro miyae ereiboise erele."

<sup>11</sup> Mayae Wali Ondofolore hila rabo elae yae halemembe naeise, reyae kena kaban kale mangkele hubaimakondere Allahre riyerensinde Naei Roh Naei meli mekai inyembe. <sup>12</sup> Raei mekai ma haraungebokale, eyae nanembainye Wali Ondofolo Naei a elelere hila rabo halaanne aerene aeise naeise kena u hara roromande. <sup>13</sup> Aka naei baeke naei, mai bokore erelere roko yae roko yae merau koloumekanale, nebeibe meke nda hee bele mai bokore erelere kabeimeyanale. Yahudi ban ro miyae helen yaweumibokale Wali Ondofolo Naei a elelere hila rabo halenatere. Mai u nolo u kainye ro miyae helen nebei wanen mbai yaweremikonde naeise, reyae mai bokore erelere. <sup>14</sup> Nda ro miyae nolone Wali Ondofolole kalia mokorekondere raei baka ranne honole: Yunani ro miyae, Yunani ro miyae bande, isaei hebaen bele yo, kobu yo. <sup>15</sup> Nebei aerene reyae kena kaban kale mayae Roma kanina nekaube yo bele Wali Ondofololena a foi faeu foi hufengkombere.

<sup>16</sup> Wali Ondofolole a foi faeu foi hufemile naeise reyae fe ehubaisi, rabuhine ban nebei a foi faeu foi walora Allahlena elae yae ro miyae Wali Ondofolo Naei a elelere hila rabo halaete yore holere molonaimibondere, na bereise Yahudi ro miyae nane merau Yahudi ban ro miyae bele. <sup>17</sup> Rabuhine ban nebei a foi faeu foi walora Allah yae yakauimiboke, Wali Ondofolo Naei a elelere hila rabo halenate ro miyae wali himalainyeboke yo yae me baemmile. Allah yae Na homofaene nda a eleukoke, "Wali himalainyeboke yo yae Reyae me baemale ro miyae, hila rabo halaeinye yae nekenayende."\*

### *Allahre Ehakoiboi Wali Ma*

<sup>18</sup> Allah surgana Kiyae na yaka yae keleumi ro miyae nanemene Naei are ei ehaweyei nane merau u mekai wa mekai beko mokate yore Neyae ikele koumi. Nebei ro miyae na u mekai wa mekai beko walora Allah Nauwa naei na hele are feleyainye. <sup>19</sup> Ro miyae nemene Allahle u mekai ma na hului isaenyaibonde, rabuhine ban Allah Nenaenjae ro miyaere keleumiboke. <sup>20</sup> Nda kani kela na beme fomore nuleungekoke heera Allah huba ban haei ban elae wake u mekaise, nane merau Neyae Allah helere, na yaka yakaimyeumi. Nebei u mekai yoni-yonire ro miyae ijoko ereiboi sului, nebeibe ro miyae Allahre oroiboi a yae elei sului naeise, Allah nulewole rambun yoni-yoni walora Na u mekai naeise yakaimyeumi. <sup>21</sup> Rambun yoni-yoni nuleuboke walora Allahle u mekaise ro miyae rainyeboke hororebe, nebeibe Nare Allah wanen mae hili ehebeyei nane merau Nare helen foi eweyei. Nebei u mekai ma ro miyae na u benebe kobu yaeiboke nane merau Allah yae keleumi are isaeyeiboi sului. <sup>22</sup> Nebei holona ro miyae naei uware isaei hebaen bele yae hubainyebe, nebeibe na kena u kobu yae feleumiboke.

\* 1:17 1:17 Habakuk 2:4

<sup>23</sup> Allah nene waewae bele Hubalo Mando Kiyaere ei omoloyei, bukainyehike ro miyae, aye yoni yoni, obo yoku na mane-mane, rami yoni-yoni, na be yoi ma mokate yoni-yonire ei moloyaimi.

<sup>24</sup> Nebeinye Allah waeumihike nebei ro miyae naei kenare kate u nenere koi-koi u mekai beko yae aeumifoke. Nebei u mekai beko yae naeise naeise uwa niki olaeinye, <sup>25</sup> rabuhine ban nebei u mekaise mokate yo Allahle na hele are moi bulaeinyeboke nane merau a ame-amene aisakoukoke. Nane merau rambun nemenere mere ure nuleuboke Allah, huba ban haei ban bumare kaenainyende Kiyaere ei omoloiboi, nebeibe Naei me yae u yae nuleuboke yoni-yonire ei molowaimi. Amin.

<sup>26</sup> Nebei aerene Allah waeumihike na bekore kena haehae kate fere koi-koi u mekaise na hibi mo mokoyate. Miyae maengkebe ro bele uwa mbainye hononate naeise bukainyehike na miyae maengke akobae bele na mekai ban mae uwa mbainye honate. <sup>27</sup> Nebei sului mbai ro yoni-yoni na miyae wa bele uwa mbainye hononatebe bukainyehike ro akobae bele kena haehae hele kate uwa mbainye honowate. Naei u mekai beko hele mokowate huluinye Allah yae ehee bukulu hayeumikoke, rabuhine ban Allah yae uwoumi a usaei huluinye ehakoiboinye.

<sup>28</sup> Bararebonde, nebei yo Allahre ronainyebonde naeise erabuhi ban mae elatene, Allah waeumihike naei u bene beko inyaihonde nane merau na mekai ban me u mokonate. <sup>29</sup> Nebei yo kena haehaere kate nda u mekai beko yoni-yoni na hibi-hibi mokonate: na ijen ban me u, ro miyae hiwa naei rambunde yaronatere bekore kena haehae kate, me u beko na bune-bune, kena hensin, ro miyae hoi-soi, han fela, ame-ame, ro kelai miyae kelai hiwa na waline beko benate me u, hiwa yo naei a beko a maehae-maehae huwate, <sup>30</sup> a nene a hufuu huwate, Allahre kena ikele, wali mekai ban, embei aiko, ukaei, nebei yo meli mekai beko naeise ayeukoke, ako nakere oboroyei, <sup>31</sup> foi naeise foi ban elate, naei a eleikoyele huluinye omokoyei, na aka baekere kena buhae ehoyei, ro miyaere yanekoi yase ban. <sup>32</sup> Nebei yo naeisaei sele Allah a ukeume na ijen sele nane merau nebei a hului nebei u mekai wa mekaise mokoyate ro miyaere beko mokommibonde. Naendae mekai horo naeisaei sele londebe, nebei u mekai beko na hibi mokoyate nane merau nebei u mekai mbaise mokonate ro miyaere be hinaimi.

## 2

<sup>1</sup> Nebei aerene weyae hiwa yo naei me ban u bande ijoko hoiboi mo koyae, Allahle bene waei uwa naeise aere oleyei sului. Hiwa yo yae mokate u mekai ma weyae mokoyaene, hiwa yore me noyamae hului mbai waei uware wenaiejae me nokanae. <sup>2</sup> Nane merau eyae aeisaei Allah na ijen sele nebei u mekai wa mekai wanende mokate yore me nommiyonde. <sup>3</sup> Nebeibe mayae ro miyae yae wayembe yo hiwa yo mokatere me nono molaumibe, nebeibe naei u mekai wa mekai beko mbai mokaubena, Allah yae mare me nonomombe hele. <sup>4</sup> Allah kena nime haba yae mare mokoyembe nane merau kena hebaen u hebaen mae mare me onoyoi. Mayae maisaei ban selene Allah merau raungehike, Naei me u foi yae mare moi hurenembe u mekai wa mekai bekora nulu kenembombe. Mayae Allah u mekai wa mekai foi yae mokoyembere rabuhi ban mae elaube! <sup>5</sup> Nebeibe mai kena elae u elae nane merau u mekai wa mekai bekora nulu kenembombere ahi yae elaube aerene, mai uware menaeijae ehee bukulu yun ran kaembaei ranne hainyembe naeibe abunaube. U mekai bekore mokate ro miyaere na ijen mae Allah me nommiyonde naei menjembonde heene, Naei ikele han hubanainyende hele. <sup>6</sup> ((Allahle homofaene molaikoke huluinye)), "Ro miyae na u mekai wa mekai mokowole huluinye Allah yemmikonde."<sup>\*</sup> <sup>7</sup> Ro miyae u mekai foi na hibi-hibi mokayeke walora uwa emmikaende naei bele be emmihinende naei bele nane merau wali hem ban kana ban belere baete yore, Allah yae wali hena bona emmiyende. <sup>8</sup> Nebeibe rore baete nane merau Allah uwoumi Wali Ondofolole na hele wali nibi are moi bulaeinyera wali nibi bekore hakainyele yo, Allah Naei romou fere-fere kolere enainyehubande. <sup>9</sup> Nda wali kokone u mekai wa mekai bekore mokayeke Yahudi ro miyae nane merau Yahudi ro miyae ban nanemene, kena bekore emmimokonde rambun na bune-bune enainyehubande. <sup>10</sup> Nebeibe u mekai foise mokayeke ro miyaere uwa emmikaende, be emmihinende, rei mai emmiyende, na bereise Yahudi ro miyaere nane merau Yahudi ban ro miyaere, <sup>11</sup> rabuhine ban Allah be ijokore ereyeinye.

<sup>12</sup> Musale walora wali heere folaikoke are naeisaei ban mae u mekai bekore mokayeke ro miyae, Musale walora wali heere folaikoke huluinye ban mae Allah bele wahenaikonde. Nane merau Musale walora wali heere folaikoke isaeyaeiboke yae u mekai beko mokayeke ro miyae, nebei a huluinye Allah yae me nommiyonde.

\* 2:6 2:6 Mazmur 62:12

<sup>13</sup> Rabuhine ban Musale walora wali heere folaikoke are huba man sele isaeyaeikoke yore wali himalainyeboke yae me ebaei, nebeibe Musale walora wali heere folaikokere hubara haeisa yanainye ro miyaere Allah yae wali himalainyeboke yo yae me baende.

<sup>14</sup> Yahudi ban ro miyae Musale walora wali heere folaikoke a naeisaei ban selebe, nebeibe honate huluinye mokonatena, neyae kelaيمي naei kena une wali heere folaikoke mbaibe honainye. <sup>15</sup> Naei u mekai wa mekai hului yae kelaيمي, Allah yae weumi wali heere folaikoke na kena u einye honainye. Naei kena u einye na ijen naeise weumi a, nebei ro miyae beko mokatene a ahuneumi nane merau Allah kenare kole hului mokatene aere oleumi. <sup>16</sup> Reyae huwamale a foi faeu foi huluinye, Allah yae Yesus Wali Ondofole walora ro miyae naei kena einye nunne heraweyate honoyate bele na u bene wa bene nekeyaimi belere hului emmikolonde. Nebei ya mbai u mekai beko mokayeke ro miyaere Allah ehee bukulu inyemile.

<sup>17</sup> Nauwae, waei uware nda naeise eleyae, "Reyae Yahudi ro miyae, reyae Musale walora wali heere folaikoke huluinye nekale, Allah bele mbainye nekendene uwa kaerele. <sup>18</sup> Musale walora wali heere folaikoke einya a usaei wasaei isaeyebokalene, Allahre kena foi mokorende naei raeisaei sele nane merau u mekai wa mekai foi naei, beko naei roiboyanale. <sup>19</sup> Ijoko foi yo yae ijoko kumba yore yawenaimile wanen, raei uware Allahre oroiboh ro miyae hiwa yore Musale walora wali heere folaikoke are nekate yore hehere naeremikonde naeise. <sup>20</sup> Musale walora wali heere folaikoke einya na hele isaei hebaen homone molaikoke are isaeyebokalene, Allahle naeise kobu yae eramaele yo bele hila rabo ehenaiboi yo bele reyae na hului keleremile." <sup>21</sup> Na foi ban sele weyae Yahudi ro miyae hiwa yore Musale walora wali heere folaikoke are kelaemaebe, nebeibe waei uware ekeleikoi! Weyae kelaemae, "Yoko ebaeiiae," nebeibe weyae yoko baeyae! <sup>22</sup> Weyae wamae, "Ro miyae bele miyae ro bele uwa mbainye ohonoijae," nebeibe weyae hiwa yo naei miyae bele uwa mbainye honeube! Weyae hoime bahe ei moloi-moloi se u nene yae koyae eleyaebe, nebeibe hoime bahere eise molaimi anuwaunga rambun yoko yae baeyae! <sup>23</sup> Musale walora wali heere folaikoke isaeyaeuboke aerene mai uwa bele kaeube. Nebeibe Musale wali heere folaikokere asasi kaeube yae Allahle Rore ane kolaunge! <sup>24</sup> Allahle homofaene nda wanen mae molaikoke hului nekaube: "Mai Yahudi ro miyae u mekai beko mokaube aerene Yahudi ban ro miyae u nolo u kainye Allahle Ro aukaka koyaunge."†

<sup>25</sup> Musale walora wali heere folaikoke are hubara haeisa yanannelena, ro u elan neisaise rabuhi bele yae elaube. Nebeibe mai ro uwa elan naisake hororebe, Musale walora wali heere folaikoke are hubara haeisa eyaneinya, Allah yae eneisai ro yae me baenembe. <sup>26</sup> Yahudi ro miyae ban Musale walora wali heere folaikoke are hubara haeisa yanenainyelenena, Allah nebei yore Musale walora wali heere folaikoke huluinye ro uwa elande naisake yo wanen mae me baemmile. <sup>27</sup> Nebei mekainya Yahudi ban ro miyae ro uwa eneisai yo nebeibe Musale walora wali heere folaikoke are hubara haeisa yanainye yo yae mayae Yahudi ro miyaere me nonomombe. Mayae Musale walora wali heere folaikoke isaeyaeuboke nane merau ro uwa elan neisayate hororebe, nebeibe Musale walora wali heere folaikoke are hubara haeisa eyanei. <sup>28</sup> Ro miyae Yahudi yo fa yan fa yae ronaimibondere, Yahudi era hena hakainye nane merau ro uwa elan nenaisande walora mo ban. <sup>29</sup> Yahudi yo fa yan fa bae Allahle ro be ro yoinye Musale walora wali heere folaikoke huluinye ro uwa elan naisake yo ban, nebeibe ro miyae Allahle Roh yae na u bene wa bene neme mokoumiboke yo. Nebei u mekai ma ro miyae naei uwa ei moloi-boise ro miyaera ban, nebeibe Allah yae ei ennemolonde.

### 3

<sup>1</sup> Nauwae, ro miyae hi elende, "Ro uwa elan neisayate era hena yae Allah kena foi omokoinya, rahe foi naeise Yahudi ro miyaere yaeiboke nane merau ro uwa elan neisayate?" <sup>2</sup> Na hele na foi naeise helen sele. Mbai nendo Yahudi yobe more Allah yae Naei a faeu ukeumi.

<sup>3</sup> Ro miyae na hului hinenate, "Yahudi ro miyae u nolo u kaisa hiwa yo Allah a elewolere hila rabo ehaleinya, naendaewananen, nebei u mekai beko mokowate yae na hului mokonnebonde Allah Naei are heteungekoke huluinye omokoiboi?" <sup>4</sup> Na hului ban! Allah yae elele a nanemene Neyae mokommile, nebeibe ro miyae nanemene ame-amere baete yo mo, rabuhine ban naei a elele hului omokoi. ((Na bere Yahudi Ondofolo Daud me u beko mokoubokene Allah nare ehee bukulu ikeunge. Allah naijen mokoubokere kelewoumi naeise)) homofae Mazmurne Daud yae Allahre nda wanen molaikoke,

† 2:24 2:24 Yesaya 52:5

“Weyae ro miyae naei u mekai beko naeise isaeyemmile hee  
neyae Waei are na ijen elenate naeise,  
nane merau ro miyae Ware hului kolonayetene Weyae nare meleumihande naeise,  
(rare kena nime haba yae mokoufebonde).”\*

<sup>5</sup> ((Nendahina Allah yae a heteungekoke, eyae Yahudi ro miyae weume are hakomalenana, foi mokommele.)) Nebeibe eyae wali na ijen ban nekandene, Allah nebei foi omokoi nane merau nebei walora Naei u mekai ma na ijen mo yakannele. Eyae Yahudi ro miyae yae Allahle u mekai ma na ijen mo yakannelene, naendae wanen, Allah ikele kolene aere ehee bukulu emmehayendere na ijen ban? (Nda ro miyae hului yae haraungeboko are elale, Allahlena ban.) <sup>6</sup> Nebei mekai ban, rabuhine ban Allah na ijen ban mae nekeube yae, Neyae nda kani kelana ro miyae naei walire hului okoloi sului. <sup>7</sup> Nauwae ro miyae hi elende, “Reyae Allahre ukanale a huluinye omokoinya, Allah namman ukeufe huluinye mokonsebonde. Nebei nibi yae raei ame-ame baelere Allah na hele mo elelere yakarendene, Allah emekai bele hili hebenainyele. Nebei aere ne rahene Allah yae ro miyae u mekai wa mekai beko wanen mae namman rare me nonsondere?” <sup>8</sup> Na ranna a na hele yeuboube, men, foi benate naeise eyae u mekai wa mekai beko mokoma! Meyae maeisaei sele nebei wali ma na mekai ban, erabae ro miyae hiwa maei a nene kate naeise ame-ame yae huwaimi, meyae ro miyae hiware nebei a ma huwaimi. Nebei ame-amere huwaimi ro miyae na ijen sele Allah me nommiyonde.

<sup>9</sup> Nebeinye naendae mekai elemakonde, eyae Yahudi ro miyae u mekai foi sele nda ro miyae hiwa nekatera? Nebei mekai ban, rabuhine ban meyae na yaka mokanneboko, Yahudi ro miyae Yahudi ban ro miyae nanemene naei beko bako mokatera Allah ma mbai yae me nommiyonde. <sup>10</sup> Allahle homofaene nda wanen molaikoke:

“Walire himalainyeboko ro miyae

hi ban hae ban yeuboko,

<sup>11</sup> Allah naeise isaeyeuboko ro miyae  
mbai sambai u hele.

Ro miyae hi yae ha yae Allahre ebaei mo.

<sup>12</sup> Ro miyae nanemene

Allah weumi ara wekate,

nemene fomene rabuhi ban yaeiboko,

foise mokole ro miyae hi u hele.”†

<sup>13</sup> “Na maningko auma bale-bale kaeweikoyainye  
here no kelen baete wanen.

Naei faeufa ame-ame melele.”‡

“Rami han bele ro miyaere beko mokaimi wanen,  
nebei ro miyae a nene a hufuu kate.”§

<sup>14</sup> “Ro miyaere olomo narulure a beko faeu bekore naeisa emereyeumi.”\*

<sup>15</sup> “Neyae ro miyae hoi-soise kena kate.

<sup>16</sup> Nebei yo eyewate ijenne

rambun yoni-yonire beko mokaimi

nane merau mokoyaimi

ro miyae hiware kena beko konate.

<sup>17</sup> Nane merau nangekele ro miyae hiwa bele rei mai yae nekenate naei mekai onaeikoke.”†

<sup>18</sup> “Nebei yo Allahre eise hawenainyele u bene enekeyei.”‡

<sup>19</sup> Nane merau aeisaei nekande Yahudi ban ro miyae mo ban, Yahudi ro miyae nangekele Allah nare me nommiyonde hee a mahi-mahire elei naeise, Musale walora wali heere folaikoke einye molaikoke a yoni-yoni Yahudi ro miyae nebei me kelee u keleene wali nekate yore mekai haraungeboko. <sup>20</sup> Ro miyae mbai Musale walora wali heere folaikokere hubara haesa yanewoungae aere ne wali himaloungeboko holona yae Allah me ebaei, rabuhine ban ro miyae mbai sambai nebei wali heere folaikoke a nemene ehakoiboi sului. Nana hesele nebei wali heere folaikoke yae eyae u mekai beko mokowande naeise isaeyaende.

<sup>21</sup> Nebeibe nda hee ro miyae naei wali himalonainyebonde naeise wali nibi neme Allah yae yakaumeboko, Musale walora wali heere folaikoke hului ban. Nebei wali nibi neme, Musale walora wali heere folaikokene bele yenjo kayaayo naei homone bele a yaka elaikoke. <sup>22</sup> Nebei wali nibi neme nda ma: Yesus Wali Ondofolo Naei a elelere Yahudi

\* 3:4 3:4 Mazmur 51:6 † 3:12 3:12 Mazmur 14:1-3, 53:1-3 ‡ 3:13 3:13a Mazmur 5:9 § 3:13 3:13b Mazmur 140:3 \* 3:14 3:14 Mazmur 10:7 † 3:17 3:17 Yesaya 59:7-8 ‡ 3:18 3:18 Mazmur 36:1

ro miyae bele Yahudi ban ro miyae bele hila rabo halaeinye ro miyae, Allah yae wali himalainyeboke yo yae me baemmile,<sup>23</sup> rabuhine ban ro miyae nanemene u mekai beko mo mokowate nane merau Allah kena ure kiteumiboke ma huluinye enekei.<sup>24</sup> Nebeibe nda hee Allah ro miyaere kena buhae aere ban mae heumikokene Yesus Wali Ondofolole ha yae na bako bakore aheukoke baeufoke aerene, Naei a elelere hila rabo halenate ro miyaere Allah yae wali himalainyeboke yo yae me baemmile.<sup>25</sup> Allah yae Yesus Wali Ondofolo kinyeumiboke naei ha rileuboke walora aei beko bako mokowandere hila rabo yae faeinyembonde naei nibi neme mbai mokouboke. Naei ha rileuboke yae nebei nibi neme elae yeuboke. Ro miyae nebei nibi neme huluinye Wali Ondofolo Naei a elelere hila rabo halenainye yo, na beko mokowate faeinyemmibonde. Allah Naei u mekai na ijenne nekeyele naeise kelemmibonderene, nebei me u mokouboke. Allah na kena u herangeboka nekewolene, waeumihike Yesus emei hee nekewate ro miyae naei u mekai beko mokowate huluinye ehee bukulu eyei.<sup>26</sup> Nebeibe nda hee Naei u mekai ijenne mo nekeyele kelemmibonderene, Yesus Wali Ondofolo Naei a elelere hila rabo halaete ro miyaere wali himalainyeboke yo yae me baeyeumi Kiyae, Allah Niyae.

<sup>27</sup> Nebeinye embei aikore komale naeise aere u hele. Naendae mekai, Musale walora wali heere folaikoke are hubara haeisa yanewannene Allah aere wali himalainyeboke ro miyae yae baeume? Nebeinye ban! Eyae Yesus Wali Ondofolo Naei a elelere hila rabo halaendene.<sup>28</sup> Eyae embei aiko okoi sului rabuhine ban meyae nda a na hele yae elande, "Wali Ondofolo Naei a elelere hila rabo halenate Allah wali himalainyeboke ro miyae yae me baeumi, Musale walora wali heere folaikokere hubara haeisa yaneyainyene ban."<sup>29</sup> Nebei Allah Yahudi ro miyae mo naei Allah ban. Nebei Allah mbai nane merau Yahudi ban ro miyae naei Allah!<sup>30</sup> Rabuhine ban Allah mbai selene, Yahudi ro miyae, uwa elande neisayainye holona, nane merau Yahudi ban ro miyae, uwa elan eneisai holona, Wali Ondofolo Naei a elelere hila rabo halaete aerene wali himalainyeboke ro miyae yae me baemmile.<sup>31</sup> Naendae mekai, meyae nebei wali himalainyeboke yo yae me baemmile nibi neme yae Musale walora wali heere folaikokere rabuhi ban elande? Nebei mekai ban. Meyae nebei wali heere folaikokere na hele elande.

#### 4

##### *Allah Wali Himalainyeboke Yo Yae Me Baemmile Nibi Neme*

<sup>1</sup> Abraham bae meyae Yahudi ro miyae naei yobe hila rabo yae wali himaloungeboka ro yae me baewoung kiyaele naeise u bene nekenaimela.<sup>2</sup> Abraham naei u mekai foi mokowole aerene Allah wali himaloungeboka ro yae me baewoungene, embei aikore na hului koube. Nebeibe Allahle ro be ro yoinye Abraham embei aikore okoi,<sup>3</sup> rabuhine ban Allahle homofaene nda wanen molaikoke, "Allah Naei a elewolere Abraham hila rabo halewole, nane merau Allah nare wali himaloungeboka ro yae me baeuboke."\*

<sup>4</sup> Ro miyae mbai kalia mokoikoyolena roibube yaeinye nendon mae ban, inyainyele hele.<sup>5</sup> Nebeibe ro miyae wali hole moloiboise u wake yae erelei, nebeibe Allah ro miyae beko bele yore wali himalainyeboka ro miyaere mokommile Kiyae Naei a elelere hila rabo halendena, nebei hila rabo halele yae Allah yae wali himalainyeboka ro miyae yae me baeunge.<sup>6</sup> Yahudi Ondofolo Daud nane merau a eleuko ro miyae me u ban mae Allah yae nare wali himalainyeboka ro yae me baeunge kiyae, onomi foka yae hubannende. Naei a nda mekai moloukoke:

<sup>7</sup> "Ro miyae na u mekai beko mokowate Allah yae faeinyemmibonde nane merau na u beko wa bekore aheungekoke baeufoke yo, onomi foka yae hubanainyende.

<sup>8</sup> Ro miyae na u beko wa bekore Allah me ebaei yo nane merau onomi foka yae hubanainyende."<sup>†</sup>

<sup>9</sup> Nebei a "onomi foka yae hubanainyende" Yahudi ro uwa elande nainyehake yo naei mo ban, nane merau Yahudi ban ro uwa elande eneisai yo naei. Rabuhine ban meyae na hele elande, Abraham Allah Naei a elewolere hila rabo halewoungene Allah yae nare wali himaloungeboka ro yae me baeuboke.<sup>10</sup> Makei hee yae Allah Abrahamde wali himaloungeboka ro yae me baewoung? Abraham na ro uwa elan nainyehake yae? Na hele namman mae.<sup>11</sup> Me baeungebokera Allah Abrahamde ukeunge ro u elan nenainyehande. Nebei elan nainyehake iwaufe yeuboke eneisai yane, Abraham Allah Naei a elewolere hila rabo halewolene Allah nare wali himaloungeboka ro yae me baeuboke. Nebei mekainye, ro miyae na hului wali himalainyeboka ro miyae yae me baemmile naeise hiwa yo ro uwa elan eneisai hee Allahle hila rabo halewainye yo naei yobere Abraham yeuboke.<sup>12</sup> Abraham na ro uwa eneisai hee yae Allahle a elewolere

\* 4:3 4:3 Kejadian 15:6 † 4:8 4:8 Mazmur 32:1-2



hila rabo halewole wanen, Yahudi yo hiwa ro uwa elande naimihakebe nebeibe Allahle a elelere hila rabo halaete. Abraham nane merau nebei u mekai ma ro miyae naei yobe niyae.

<sup>13</sup> Allah a hetewounge, Abraham bele naei orona mena bele nda kani kela yem-mikonde. Nebei a hetewounge Musale walora wali heere folaikoke Abraham hubara haesa yanewounge aere ne ban, nebeibe Allah Naei a elewolere hila rabo halewoungene. Nebei nibi yaere Allah wali himalainyeboke ro yae me baeungeboke. <sup>14</sup> Musale walora wali heere folaikokere hubara haesa yaneyainye ro miyaere Allah nda kani kela yemmikondena, Allah Naei a elelere hila rabo nakano halaenne, nane merau Allah are heteungekoke a bangkabe honate. <sup>15</sup> Wali heere folaikoke huluinye nekate ro miyae nebei are asasi konaikondena, ehee bukulu hainyemikonde. Nebeibe wali heere folaikoke u lon mae, asasi okoi nekande.

<sup>16</sup> Nebeinye Allah are heteungekoke rambun Naei kena buhae aere ban mae hemmile ro miyae yemmile naeise, ro miyae Naei a elelere hila rabo halaete yo yae yaronate. Nebei nibi yae Yahudi ro miyae Musale walora wali heere folaikokere hubara haesa yanainye yore mo ban, nebeibe Yahudi ban ro miyae Abraham wanen Allah Naei a elewolere hila rabo halaete yo yae nebei are heteungekoke rambun yaronate. Abraham mbai nebei holo bee naei yobe. Neyae hila rabo bele ro miyae nemene naei yobe. <sup>17</sup> Allahle homofaene nda a Abrahamde ukeunge, "Kani kela helen na ro miyae naei yobe ware raneuwekawale."<sup>‡</sup> Allah ro miyae herewatere waleumi Kiyae nane merau eyeiboi rambun Naei a elele hului baete yakate Kiyae. Naei a elewolere Abraham hila rabo halewole. Naei ro be ro yoinye Abraham aei yobere yeuboke.

<sup>18</sup> Allah yae Abrahamde ukeunge, "Waei orona mena helen enjembonde."<sup>§</sup> Naendae mekai horo fa honoise kabebuokebe, nebeibe na hibi mo Allah Naei a elewolere hila rabo halewokene Abraham kani kela helen naei yobere yeuboke. <sup>19</sup> Abraham nebei hee naeisaei sele naeisa benen naei orona menare eisoleisi hului, rabuhine ban uwa rorele u raungehike nane merau na ralo yakama rorele u maehae mbai (100) bewole, benen na miyae kiho. <sup>20</sup> Nebeibe Allah yae heteungekoke are Abraham kena wauwau okoinye, na hila rabo elae yarowole, nane merau Allahre na hibi-hibi hili hebeungeke. <sup>21</sup> Abraham hila rabo halewole Allah yae naei a heteungekokere na hului ennemokombonde <sup>22</sup> Nebei aere ne Allah Abrahamde wali himaloungeboke ro yae me baeuboke. <sup>23</sup> Nda a molaikoke, "Allah nare wali himaloungeboke ro yae me baele." Nebei are Abraham na uwa mbaise mo ban <sup>24</sup> nane merau aei naeise bele molaikoke. Eyae Yesus aei Tuhan herewate yo u nolo u kaisa aungunuke Allahre hila rabo halaenne yore, Allah nane merau wali himalainyeboke ro miyae yae me baeume. <sup>25</sup> Allah yae aei beko aere ne Yesus kinyeumbike haiboke. Nare hila rabo halemande yae wali himalainyeboke yo yae me baemmele naeise, Allah Yesusre herewate yo u nolo u kaisa aungunuke.

## 5

<sup>1</sup> Nebeinye eyae Wali Ondofolo Naei a elelere hila rabo halaenne yae Allah aere wali himalainyeboke ro miyae yae me baeumene, Allah bele foi nekande. <sup>2</sup> Yesus Wali Ondofolo Naei a elelere hila rabo halaenne walora Allah aere kena buhae aere ban mae heume wali hubanne. Nane merau kena u rei maibe roweumehike, rabuhine ban rabo elae halaende bena ya honoifoyolene Allah yae Na nene waewae aere keemmele. <sup>3</sup> Nebei aere ne mo ban, nebeibe beko hubaimeyaimere kena rei mai yae haweyume, rabuhine ban nebei beko hubamanende yae kena heraweumende Wali Ondofolole weume a huluinye mokomale naeise isaeimale. <sup>4</sup> Kena u heraweumende yae Wali Ondofolo weume a hului mokande wali ma nekande yae, Allah kena foise mokomanele u mekaise isaeimale. Allah kena foise mokonne u mekai ma wanen nekande yae aei rabo elae halaende Allah are nuleungekoke huluinye mokonde. <sup>5</sup> Allah are nuleungekoke huluinye mokondere rabo elae halemalene mehi hako ofolo, rabuhine ban Allah Naei Roh aumeboke walora aere kena buhae emereumi yae heumere aei kena uwe hubannele. <sup>6</sup> Na helebe wamale, aei wali aloiboi sului nekewande hee, Allah meraufe raungehike ya na hului yeubokene eyae, Allahle are ei ehawei ro miyae aere ne, Yesus Wali Ondofolo meufereke. <sup>7</sup> Yabi-yabi hele ro miyae wali himalainyeboke yo aere ne herende naeise ehe konde. Na hului roko mbemba hele ro miyae u mekai foi bele mokole kiyaele aere ne ro miyae mbai be rabulembonde herende. <sup>8</sup> Nebeibe Allah aere kena buhae hemmele naeise nda nibi yae keumeboke: Eyae u mekai beko yae namman aumefoke hurewande hee, Yesus Wali Ondofolore ukeunge aei aere ne meufereke.

<sup>9</sup> Wali Ondofolo na ha rileuboke yae nibi mbai mokouboke Allah yae wali himalainyeboke ro miyae yae baeume naeise isaeyaendebokene, emekai bele rabo elae halaende Allah ro miyaere ehee bukulu yemmikonde yane aere Wali Ondofolole walora hole molommebonde. <sup>10</sup> Rabuhine ban eyae namman Allah naei yokeijo nekewande hee Allah Naei hina fa hoi fa Yesus hereke walora Allah bele foi nekemande nibi mokoubokene, emekai bele Yesus waleuboke benen wali nekele walora aei wali hole molommende. <sup>11</sup> Nebei mo ban, Allah aei naeise foi mokoubokene kena u rei mai rowemmele. Aei Tuhan Wali Ondofolo, Allah bele foi nekemande nibi mbai mokouboke Kiyae, Allah aei naeise mokouboke yoni-yonire yakawoume.

<sup>12</sup> U mekai wa mekai beko ro mbai Adam meke walora nda kani kelare meweufike. Nane merau nebei u mekai beko mokowolene Allahle waheikoke, nane merau here yae aeungefoke. Adambe u mekai beko yae mokoumiboke ro miyae nemene u mekai beko mokonatene Allah bele wahenaikonde, nane merau here yae aumifonde. <sup>13</sup> Musale walora wali heere folaikoke namman eyei yae, nda kani kelana ro miyae u mekai wa mekai beko mokaimke. Nebeibe Allah nebei heena ro miyaere me onoyoi, rabuhine ban wali heere foloukoke namman eyei nane merau asasi kaikoke naei ekeleiboi sului.

<sup>14</sup> Allah u mekai beko mokowate ro miyae me onoyoi hororebe, Adam nekewole heera meke Musa nekewole heene ro miyae u mekai beko mokowatene Allah bele wahaeikoke nane merau heraiبوke, naendae wanen horore naei u mekai beko nenaie ma Adambera. Adam wanen mbai Yesus meke heera ro miyae hiwa naei walire haraungeboke.

<sup>15</sup> Nebeibe Allah aere ban mae ro miyae nibi neme ikeumi wali himalainyeboke ro miyae yae me baemmile naei bele Adam mae u mekai beko mokoubokene ro miyae Allah bele wahenaikonde nane merau herenate naei bele nenaie ma. Rabuhine ban ro mbai Adam mo u mekai beko mokouboke aerene, ro miyae helen Allah bele wahaeikoke nane merau herewate. Nebeibe emekai bele Allah ro miyae helende kena buhae aere ban mae hewoumi, nane merau nebei ro miyae helen naeise ro mbai Yesus Wali Ondofolo aere ban mae wali himalainyeboke yo yae me baemmile nibi neme mokouboke. <sup>16</sup> Benen Allah aere ban mae ro miyae ikeumi wali himalainyeboke yo yae me baeumi nibi neme naei bele Adam mae u mekai beko mokoubokene ro miyae herenate naei bele nenaie ma. Rabuhine ban Adambe me u beko mbai aerene Allah yae ro miyae naei walire hului koloumi me noyeumi. Nebeibe ro miyae helen u mekai beko mokowatera Wali Ondofolo aere ban mae wali ijen yo yae me baemmile nibi mokouboke. Nebei nibi walora Allah ro miyaere wali himalainyeboke yo yae me baemmile. <sup>17</sup> Naendae wanen horo Adam ro mbai ken u mekai beko mokouboke walora ro miyae nemene Allah bele waheyate nane merau hereyate, emekai bele Yesus Wali Ondofolo mbai ken walora ro miyae wali hena bona enainyehubande. Nebei wali hena bona u mekai bele nekate ro miyae Allah kena buhae aere ban mae heumilere isaeyaebokene, Wali Ondofolo Naei a elelere hila rabo halaeinye nane merau Allah wali himalainyeboke yo yae me baumi. <sup>18</sup> Nebeinye Adambe u mekai beko mokouboke yae ro miyae nanemene hele me nommiyonde wanen mbai wali hena bona u mekai hubanainyende naeise, Yesus Wali Ondofolo me u na ijen sele mokouboke yae Allah yae ro miyae wali himalainyeboke yo yae me baemmilere. <sup>19</sup> Allah ukeunge are Adam ehakoiboinye, ro miyae nanemene mokoumiboke u mekai beko bele yore yaeiboke. Nebei sului mbai Yesus Wali Ondofolo Allah ukeunge are hakowolene, ro miyaere mokoumiboke Allahle ro be ro yoinye wali himalainyeboke ro miyae yae baemmile.

<sup>20-21</sup> Ro miyae u mekai beko emekai bele mokonate belene, Allah yae Musale walora wali heere foloukoke a ikeumi. Na bere ro miyae nanemene u mekai beko mokowatene Allah bele wahaeikoke herewate wanen mbai, nda hee Allah ro miyaere kena buhae aere ban mae heyeyumi aerene na hului Wali Ondofolo Naei a elelere hila rabo halaeinye walora wali himalainyeboke yo yae me baemmile, nane merau wali hena bona u mekai enainyehubande naeise nebei u mekai beko emekai bele mokate ro miyaebe Allah na hului kena buhae aere ban mae heumi.

## 6

### *Aei Kena Kandere Haraima Elae Yoni-Yoni*

<sup>1</sup> Allahle kena buhae bele u mekai naeise rahe a yae elemakonde? Allah aere kena buhae aere ban mae emekai bele hemmende naeise, u mekai beko yae na hibi-hibi mokomandere? <sup>2</sup> Nebei mekai ban! Here no unulu bele waheikoke wanen eyae aei bekore kena kandere haraima elae bele wahaendekokene, na mekai ban sele nebei elae kelene nekemale. <sup>3</sup> Mayae nda naeise benen u benebe nekenayembe: eyae nanemene Yesus Wali Ondofolole einye bu kaimekoke hee, ro miyae naei bene wo kowande,

Yesu uwa neme rowende naeise na u melen u hare hereke wanen mbai, eyae Wali Ondofolo weume a hului neke male walora aei bekore kena haehae kandere haraime elae hakowande wali mara herandeboke. <sup>4</sup> Ako Allah Naei nene waewae walora Wali Ondofolore waleungeboke wanen mae eyae wali neme neke mande naeise, bu kaimekoke walora kelaemmiboke aei bekore kena kandere haraime elae hakowande wali ma benen eneke yei. <sup>5</sup> Yesu Wali Ondofolo hereke wanen mbai aei u mekai beko kena kandere haraime elae bele wahaendekokene, aisaiei nekande Yesu aunguke wanen mae wali neme Yesu bele mbainye neke mande.

<sup>6</sup> Eyae na hibi u bene nekenaimela hele, aei bekore kena kandere haraime elae u yembonde naeise nane merau naei yebaei bubaeise eyeiboi naeise, eyae na hele Yesu bele nanembainye ohaline baimekoke wanen bena heene u mekai bekore kena kandere haraime elae bele wahaendekoke. <sup>7</sup> Rabuhine ban ro miyae mbai herendena, nebei ro miyae bekore kena haehae kolere haraunge elaera me hayeungekoke. <sup>8</sup> Eyae aei bekore kena kandere haraime elae bele wahaendekoke Wali Ondofolo naei mbainye herandeboke wanenne, eyae hila rabo halaende Wali Ondofolo bele mbainye emanekende. <sup>9</sup> Rabuhine ban eyae aisaiei Yesu herekera aungukene, benen Neyae eherei sului, nane merau here Naei uwa rande elae ban. <sup>10</sup> U mekai bekona elae Naei uwa rande riyau weiboi naeise Yesu roko mbai hereke, benen eherei. Nebeibe nda hee Allahle mbainye kena foise mokonendere neke yei. <sup>11</sup> Nebei sului mbai mauwa bekore kena haehae kombere harayembe elae moi bulaungeboke, nane merau Wali Ondofolo Yesu hakaunge walora Allah kena foise mokonainyele naeise nekate yo yae me baembe.

<sup>12</sup> Nebeinye mai uwa einye u mekai beko benen aenemfombe bele, mayae u mekai bekore kena haehae koube hului nye omokojae. <sup>13</sup> Mai uwana melen bai yoni- yoni mbai sambai u mekai beko mokonaterere ewaeisijae hele. Nebeibe Allahre kena foise mokonembe naeise, ro miyae here nolora yarongkokembe wekembe benen wali ikembe yo wanen mae mauwa Allahre kinyennembe. Mai uwana melen bai yoni- yoni wali himalaungeboke me u mokate rambun mae Allahre kinyennebombe. <sup>14</sup> Bekore kena kaubere harayembe elae mare benen emeleisai, rabuhine ban mai wali Musale walora wali heere folaikoke keleene nekaube ban, nebeibe Allah mare kena buhae aere ban mae heme Kiyae Naei me kelee u keleene nekaube.

<sup>15</sup> Naenda mekai, eyae nda hee Musale walora wali heere foloukoke ana me keleene enekei nebeibe Allah kena buhae aere ban mae heme Kiyae Naei me kelee u keleene nekande aere, u mekai beko na hibi mo mokomandere? Nebei mekai ban! <sup>16</sup> Mayae maisaei sele ndere mai uwa yebaei bubaei wanen mae kinyaungebokena, mayae nebei kiyaei yebaei bubaei, naei a elele hului nye hubara haesa yanennele. Nebeinye yebaei bubaei wanen mae mai bekore kena kaubere harayembe elaere hakomembena, here no unulu bele waheikoke wanen Allah bele wahengkombe huba ban haei ban neke membe. Nebeibe bukainyehike yebaei bubaei wanen Wali Ondofolo Naei a elelere hakomembene wali himalainyeboke ro miyae yembombe. <sup>17</sup> Allahre helen foi wenne, rabuhine ban bere mayae u mekai bekore kena kaubere harawombe elae naei yebaei bubaeise yaeuboke, nebeibe nda hee kelewayembe a usaie mai kena u na maemae yae hubara haesa yanaunge. <sup>18</sup> Mayae bekore kena kaubere harayembe elae naei yebaei bubaeise nekewauba me hayengkokembe. Nda hee wali ijen neke membe naeise, Wali Ondofolore yebaei bubaeise yaeuboke.

<sup>19</sup> Reyae kelaemale a usaie isaeyembere kabewaungene, nda yebaei bubaei yae ahuneubokale. Na bere mai uwane barakate yoni- yoni bekore kena kaubere harayembe elae naei yebaei bubaei wanen mae kinyaungeboke, naei kena hului yae mokondera u mekai beko emekai bele mokowaube. Nebei wanen mae nda hee mai uwane barakate yoni- yoni Wali Ondofolo wali ijen mae nekenaterere kelemi Kiyae Naei yebaei bubaeise kinyennebombera Allahle kena foise mokonnele u mekai yae neke membe. <sup>20</sup> Rabuhine ban bekore kena kaubere harayembe elae naei yebaei bubaeise nekewaube heene, nondon wali ijen naei a usaie oboroi nekewaube. <sup>21</sup> Nebei u mekai beko mokowaube yoni- yoni nda hee mare mokombokembe fe hubaungele, rabuhi ban elaube, rabuhine ban nebei u mekai beko nanemene mokonaimibonde ro miyae Allah bele wahenaikonde huba ban haei ban nekenayende. <sup>22</sup> Nebeibe nda hee bekore kena kaubere harayembe elae me hayengkokembe nane merau Allahle yebaei bubaeise yaeubokene, Allahre kena foise mokaunge u mekai wanen mae neke membe nane merau wali hena bona u mekai hubaunge. <sup>23</sup> U mekai beko mokoyate ro miyae Allah bele wahenaikonde huba ban haei ban nekenayende, here no unulu bele wahaikoke wanen, nebeibe Allah yae aei Tuhan Yesu Wali Ondofolo bele mbainye nekate ro miyaere wali hena bona u mekai hubainye.

## 7

<sup>1</sup> Aka naei baeke naei, Musale walora wali heere foloukoke a mayae nanemene maisaei. Nebeinye mayae maeisaei, ro miyae mbai namman wali nekele hee yae mo nebei wali heere foloukoke a keleene nekele. <sup>2</sup> Na mekai ma mbai, wali heere foloukoke hului nye miyae mbai na molo namman wali nekele heena, ro hire ei sului. Nebeibe na molo herendena, nebei miyae na hului ro hire ende. <sup>3</sup> Nebei miyae na molo wali nekewole hee ro hine enelensondena, nebei miyae yoko miyae kaeimae miyae yae ungainyele. Nebeibe na molo herende hee ro hine enelensondena, yoko miyae kaeimae miyae yae ewei sului.

<sup>4</sup> Nebeinye aka naei baeke naei, mai naeise nebei mekai. Wali Ondofolole me kelee u keleene nekembe naeise Wali Ondofolo Naei u melen u hara hereke wanen mai bekore kena haehae kaubere harayembe elae hakowaunge wali mare herauboke nane merau Musale walora wali heere foloukoke a me kelee u keleene mayae aweuboke. Nda waline eyae Allah kena kole me u mokomande naeise, Yesus here u nolo u kaisa aunguke Kiyaele me kelee u kelee nekemale. <sup>5</sup> Rabuhine ban aei bekore kena haehae kandere haraime elae na me kelee u keleene nekewande hee, Musale walora wali heere foloukoke a moi hurewoume nebei elae hului nekewandene, eyae Allah bele wahaendekoke. <sup>6</sup> Nebeibe nda hee aei bekore kena kandere haraime elae bele wahendekoke yae ro miyae yae moloukoke Musale walora wali heere foloukoke are bulaeumeboko. Eyae ro miyae yae moloukoke homone hului ban nebeibe Allahle Roh yae nibi neme keleme hului Allahle kaliare mokomale naeise, Musale walora wali heere folaikokera bulaeumeboko.

<sup>7</sup> Nebeinya naendae mekainye, Musale walora wali heere foloukoke are beko yae elemakonde? Nebei mekai ban, rabuhine ban nebei wali heere foloukoke a walora mo raei u mekai beko mokowalere roungebokale. Nebei wali heere foloukoke homofaene nda a moloukoke, "Hiwa yo naei rambun rowelere kena haehae okojiae." Nebei molaikoke a yae mo reyaie isaeyebokale nebei me u beko yeuboke. <sup>8</sup> Musale walora wali heere foloukoke honole aere nebei uwa einye bekore kena kalere haraufe elae yae moi elaekei sele hurewoufe hiwa yo naei rambun roufelere kena haehae korele. Nebei wali heere foloukoke ohonoinya, aei bekore kena kandere haraime elae naei asasi kondé rambun u. <sup>9</sup> Na bere hele nebei wali heere foloukoke a isian mae nekewekale. Nebeibe ya mbai reyaie isaeyebokale Musale walora wali heere foloukoke homone nda a moloukoke, "Hiwa yo naei rambun rowelere kena haehae okojiae." Nebei hee reyaie isaeyebokale me u beko mokoimeyale nane merau Allah bele wahendekoke. <sup>10</sup> Nane merau isaeyebokale, raei u bene nekewaise wali hena bona yemmile naei wali heere foloukoke a mbai yae kelefefoke, na hele reyaie Allah bele wahendekoke. <sup>11</sup> Raei bekore kena kalere haraufe elae hului u bene nekewaise, Musale walora wali heere foloukoke are hakorele walora wali hena bona roufele. Nebeibe na hului banne, nebei elae mokoufepoke reyaie Allah bele wahendekoke. <sup>12</sup> Allahre kena foise mokomande u mekai naeise Musale walora wali heere foloukoke a yae kelaime, nebei a Allahlera nane merau nane rambunde kena haehae kate naei a Allahlera. Nebei a bee na ijen sele nane merau foi.

<sup>13</sup> Naendae wanen, nebei foi bele Musale walora wali heere foloukoke a mokoufepoke reyaie Allah bele wahendekoke? Nebei mekai ban! Raei bekore kena kalere haraufe elae beko hele bele isaieibonde naeise, foi bele Musale walora wali heere foloukoke a walora nebei elae mokoufepoke u mekai beko mokowale nane merau Allah bele wahendekoke. Nebei nibi yae Musale walora wali heere foloukoke a walora reyaie isaeyebokale raei bekore kena kalere haraufe elae na beko hele. <sup>14</sup> Eyae aeisaei Musale walora wali heere foloukoke a Allahle Rohra meke, nebeibe reyaie ro miyae melen u ha ura yeubokale nane merau raei bekore kena kalere haraufe elae naei yebaei bubaeise wanen nekale. <sup>15</sup> Raei u mekai beko mokalere renaeijae onaelene. Reyaie kenare kale u mekai wa mekai yoni-yoni omokoi, nebeibe reyaie ikelere kale u mekai yoni-yonibe eimokowale. <sup>16</sup> Nebeinye reyaie kenare okoi u mekai beko eimokowalena, reyaie wo kale Musale walora wali heere foloukoke foi yae. Rabuhine ban nebei wali heere foloukoke hului nebei me u bekore yeuboke are reyaie be hinale. <sup>17</sup> Nebei mekainye, raei kenare kale yae ban nebei u mekai beko mokale nebeibe raei bekore kena kalere haraufe elae yae. <sup>18</sup> Reyaie isaeyebokale raei bekore kena kalere haraufe elae einye foi naeise u hele, rabuhine ban raei kena u einye u mekai foi naei mokorelere kena eikowalebe, nebeibe reyaie mokoiboise na hului ban eisubawanale. <sup>19</sup> Kenare kale u mekai foi mokoiboise reyaie omokoyei, u mekai beko yoni-yoni kenare okoi kiyaebe eimokowale. <sup>20</sup> Reyaie kenare okoi u mekai beko yoni-yoni na hibi mo mokoyalene, nebei u mekai bekore reyaie kena kale aere ne mokale ban, nebeibe bekore kena kalere haraufe elae raei uwa einya nekele yae mokoufe.

<sup>21</sup> Raei waline na hibi-hibi foise mokorebondere kena kale, nebeibe mokorele hee bekobe raei waline nekele naeise isaeyaele. <sup>22</sup> Raei kena u einye Allah wali heere foloukoke are kena kaban kale. <sup>23</sup> Nebeibe reyae hubanale wali heere foloukoke hi yae elae hele raei u bene wa bene einye releimeyeunge. Nebei wali heere foloukoke yae raei kena une foi mokorele yoni-yni heraweyeuimi, nane merau raei uwane bekore kena kalere haraufe elae na yebaei bubaei yae mokoyeufe. <sup>24</sup> Reyae, ro miyae beko heere yae hubanale. Nde maenin mae raeinya beko kena kalere haraufe elae naei me kelee u keleene nekeimeyalera hole molonsebonde? Nebei elaere hakorebondena, reyae Allah bele wahaekonde. <sup>25</sup> Allahre helen foi wanale aei Tuhan Yesus Wali Ondofolole walora rare hole molonsebonde. Nebeinye raei u bene wa bene Allah wali heere foloukoke are yebaei bubaei wanen mae hakanale, nebeibe raei u mekai male kiyae bekore kena haehae kalere haraufe elae naei yebaei bubaei wanen mae hakanale.

## 8

### *Allahle Roh Weume A Huluinye Nekande*

<sup>1</sup> Allah yae ro miyaere wali himalainyeboko yo yae me baemmile nibi neme Wali Ondofolo yae mokoubokene, nda hee Yesus Wali Ondofolo bele mbainye nekate ro miyaere Allah me onoyoi, <sup>2</sup> rabuhine ban Wali Ondofolole walora Allahle Roh wali nemere ikeume Kiyae Naei elae yae aei bekore kena kandere haraima nane merau Allah bele wahemakonde elaera bulaereumeboke. <sup>3-4</sup> Ro miyae Musale walora wali heere foloukoke hakowainyele walora wali himalainyeboko ro miyaere inyaibondere na hului ban, rabuhine ban naei kena u elae banne, nebei wali heere foloukoke are hubara haeha eyanekoi sului. Nebeinye ro miyae beko mokoimeyatene herende aerene Allah na hina fa hoi fa ro miyae u mekai beko mokatene male u yambi u ma yae ukeunge meke. Nebei nibi yae wali himalainyeboko yo yae me baemmile nibire mokouboko. Eyae bekore kena kandere haraima elaere ehakoiboi nebeibe Allahle Roh Naei a elelere hakannele ro miyae na hului wali himalainyeboko yo yae me baemmele naeise, aei beko mokoimeyande aerene Allah yae Yesusre me nokeunge, aere me onoyoi.

<sup>5</sup> Ro miyae na bekore kena katere haraimi elaere hakoyate yo, nebei u mekai bekore mokonatere u bene mo nekeyaimi. Nebeibe Allahle Roh yae weumi are hakoyate yo, Allahle Roh yae kenare kole huluinye u bene nekeyaimi. <sup>6</sup> Bekore kena katere haraimi elae huluinye u bene nekaimi ro miyae Allah bele wahenaikonde, nebeibe Allahle Roh huluinye u bene nekaimi ro miyae wali hena bona u mekai nane merau rei mai hubanainyende. <sup>7</sup> U mekai beko naei u bene nekaimi ro miyae Allah naei yokeijo nekate, Allahlena wali heere foloukoke huluinye ehakoiboi nane merau ehakoiboi sului. <sup>8</sup> Bekore kena katere haraimi elae huluinye wali nekate ro miyae Allahre kena foise omokoiboi sului.

<sup>9</sup> Nebeibe mai kena u einye Allahle Roh na hele nekendena, mayae bekore kena kaube harayembe elae huluinye wali enekei, nebeibe Allahle Roh yae wembe huluinye wali nekembe. Nane merau Wali Ondofolo yae yeumi Roh kena u einye enekei ro miyae, Wali Ondofolole holona yo ban. <sup>10</sup> Yesus Wali Ondofolo mai uwa einye nekendena, u mekai beko mokaube aerene mai uwa herende, nebeibe Allah yae wali himalainyeboko yo yae mare me baembe aerene mai kena u einye wali hena bona u mekai hubaunge. <sup>11</sup> Nane merau Allahle Roh, Yesus Wali Ondofolore nulu yo mahe yora aungunuke Kiyae, mai kena u einye nekendena, nebei Roh yae mai uwa einye nekele here bele uwa kayeero benen wali neme inyembe.

<sup>12</sup> Nebeinye aka naei baeke naei, aei baka rannare Allahle Roh weume huluinye nekemala, u mekai bekore kena kandere haraima elae huluinye ban. <sup>13</sup> Mayae bekore kena kaubere harayembe elae huluinye nekembena, mayae Allah bele wahengkombe. Nebeibe Allahle Roh wembe a huluinye nekembe bekore kena kaubere harayembe elaere ehakoyeinya, mayae wali hena bona bele nekembe. <sup>14</sup> Allahle Roh a weumi huluinye hakainye ro miyae nanemene Allahle kelu omi, <sup>15</sup> rabuhine ban yebaei bubaei naei roware fe waku kainye wanen Allahlena Roh mare ikembe, mayae Allahre benen fe waku konembere omokoiboi, nebeibe Allahle kelu omire mokombokembe. Nebei Roh elae yae eyae Allahre "Ako" yae kaenanne. <sup>16</sup> Allahle Roh yae aei kena ure nda a mbai faeu mbai yae elele, "Mayae Allahle kelu omi." <sup>17</sup> Eyae nebei ma nekemalena, nane merau Allah naei kelu omire imabondena, Allah are hetewounge Na me einya honate rambun aere emmewahendere, Wali Ondofolo bele mbainye emayaronde. Nane merau Wali Ondofolo one hengko bele yae kiteungeboke wanen mae aere kitemmebonde naeise, eyae Naeinya hului beko hubamande hele.

<sup>18</sup> Reyae hubanale nda heena beko hubannele bele wali one hengko aere emmekelembonde bele huluisse erasi. <sup>19</sup> Allah yae nda kani kelana mokowole rambun yoni-yoni Naei kelu omi helere yakambonde naei yabe kena roweumihike rakeyate. <sup>20</sup> Rabuhine ban Allah nuleuboke rambun yoni-yoni na mekai yae foi mokonater nebeibe omokoi sului ma nekate, naei kena kate huluinye ban, nebeibe Allah mehauwae mokouboke. Allah kenare kole nebei rambun yoni-yoni nda yembonde naeise rabo elae halenayende: <sup>21</sup> neyae kakare inyaiyabonde u mekaisa hole emmimolombonde nane merau Allahle kelu omi nangkele mbainye one hengko emmikitende.

<sup>22</sup> Aeisaei sele miyae fa honondere hiyau kole kiyae nebei fa hononde naei u buhae kolene ele kali kole wanen nda hee bele yae Allah nda kani kelana mokowole yoni-yoni nemene ele kali kate. <sup>23</sup> Nebei yoni-yoni mo ban, nebeibe eyae Allahle Roh ikeume mende Naei kelu omi yae one hengko bele emmekitembonde yo. Aei uwa neme yemebonde yare kena roweumihike rakeimeyande yae, kena ei u eisa ele-ele kali-kali kande. <sup>24</sup> Aere hole moloumeboko heera rabo elae halewanne Allah yae nebei rambunde mokongkonde. Nebeibe ijoko yae erekande rambunde rabo elaeere omokoi sului. Naendae mekai yae ro miyae mbai naei me einya rambunde namman rabo halende? <sup>25</sup> Nebeibe eyae ijokore ereiboi rambunde emayaronde naeise rabo elae halemalene, aei kena u na hebaen-sebaen mae rakeimeyande.

<sup>26</sup> Aei rabo elae halaende yae aere hakoiboyeume wanen mbai Allahle Roh yae aei kena u yambire hakoiboyeume. Allahre ebeli bomande a mekai aeisaei banne, ro miyae a eleikoi sului ma ele kali yae Allahle Roh Nenaiejae aei naeise Allahre ebeli boyeungele. <sup>27</sup> Nane merau ro miyae naei kena einyare isaeyuboko Allah, Naei Roh yae haraungebokere Naeisaei, rabuhine ban Allah kenare kole huluinye Yesus Naei eleukoke wekeumi ro miyae aerene Allahle Roh aere oleyele.

<sup>28</sup> Eyae isaeyaendeboke Allah meraufe raungehike huluinye kaeneumikoke nane merau Nare kena buhaere heyainye ro miyae naei foise, nemene fomene benate rambunde Allah nangkele yae hakouboke mokoimeyele. <sup>29</sup> Wali Ondofolore hakonainyele ro miyaere Allah na beme fomona ro roumiboko, nane merau a hokoukoke Na aka baeke u nolo u kainye Naei Hina Fa Hoi Fa na bena Kiyaeere yembonde naeise, Nare hakonainyele ro miyae Na Hina Fa Hoi Fa u mekai wanende inyaiyabonde. <sup>30</sup> Na beme fomore Allah Na Hina Fa Hoi Fa u mekai wanen inyaiyabondere a hokoukoke holona ro miyaere kaeneumikoke. Nebei kaeneumikoke yo mbai Allah yae wali himalainyeboke yo yae me baeumiboko. Me baeumiboko yo mbai Allah yae one hengko bele kitemmbonde hele.

<sup>31</sup> Nebeinye, Allah haraungeboke mokowole naeise rahe a ma yae na hului elemakonde? Naendae mekai, Allah aei holone uwa engwenendena, ro wende na hului ban aei hande me wenjende? <sup>32</sup> Allah Naei Kelu mbai ken sele eheraweiboi enekei nebeibe aei aerene kinyeumiboko lonbe. Nebei aerene Nangkele mbainye nekemale me u mokomale naei rambun yoni-yoni bele nane merau Naei Kelu bele yemmele hele.

<sup>33</sup> Ro miyae mbai sambai Allah yae eleukoke wekeumi holona ro miyaere a ohoroiboi, rabuhine ban Allah Naei yae nebei holona ro miyaere wali himalainyeboke yo yae me baewoumine. <sup>34</sup> Ro miyae mbai sambai aere me onoyoi sului, malaikat-malaikat, walobo Wali Ondofolo, herekera benen nulu yo mahe yora aunguke Allahle kendan wameran meube reufine enekele Kiyae, aei aerene oleyele! <sup>35</sup> Ikele han mae, kena beko u beko yae, weitasi kaime yae, moni mai yae, hun ban wai ban mae, wali beko nolone yae, erahan mae, rambun mbai sambai yae Yesus Wali Ondofolole kena buhae u buhae heyemera aere kayee omoloiboi sului. <sup>36</sup> Allahle homofaene Ondofolo Daud aei wali ma naeise Allah nda wanen moloukoke:

“Waei holona ro miyae yae baeime aerene

maei wali na yane baei here bele mbembane nekeyande,

maere folonaimikonde domba yoni-yoni wanen mae me baeyaimé.”\*

<sup>37</sup> Nebeibe Yesus Wali Ondofolo aere kena buhaere heumekoke Kiyaele walora nebei u mekai wa mekai beko yoni-yonira eyae andemeleufake. <sup>38-39</sup> Reyae na hele yae hubanale, Tuhan Yesus Wali Ondofolole walora Allah kena buhae heumekokere kayee moloiboise nda yoni-yoni yae na hului ban sele: here, wali, malaikat-malaikat, walobo yoni-yoni, nda hee baete rambun, bena ya honoifoyolene benate rambun, elae bele wake bele yoni-yoni, bumane nekate yoni-yoni, ana nekate yoni-yoni, Allah mokouboke rambun yoni-yoni nemene.

*Paulus Kena Kowole Yahudi Ro Miyae Wali Ondofolore Ei Hawenainyele*

\* 8:36 8:36 Mazmur 44:22

## 9

<sup>1</sup> Wali Ondofolo bele mbainye nekandene, reyaе elale a yoni-yni na hele bangka mo, reyaе ame-ame ebei. Raei kena ei u eisa Allahle Roh yae isaеyeufelene, raei elale a na helere benate. <sup>2</sup> Raei kenabe ehekaei hubanale, reniai rai na hibi mo kena beko u beko koyale, <sup>3</sup> rabuhine ban raei kani mbai kela mbainya yo Wali Ondofolore ehakoiboinye. Nebei yo Wali Ondofolore hila rabo halenainyele naeise, raei uwa mokoungihakale Allah olomo nensebonde nane merau reyaе Wali Ondofolo bele wahaekonde. <sup>4</sup> Nebei ro miyae Israel orona mena nane merau Allah yae Naei kelu omi yae me baewoumi yo. Allah yae nebei ro miyae foi mokommile naeise nda me u yae mokowole: Naei nene waewae a kala-kalane kelewoumi, roko mbemba nare a hetewoumi, Musale walora wali heere foloukoke a ikeumi, Nare ei mom-mom imaene ei molonainyele mare yakaumbike, nane merau bena honoifoyole ya benate rambun yoni-yni nebei yore a hetewoumi. <sup>5</sup> Naei yobe naei kamahe naeite orona menara nda Yahudi kani kela mejikaboke. Naei orona menara Wali Ondofolo ro miyae uwa wanan mae meke. Wali Ondofolo Allah mbai, nanemene mere mokowole, Nare huba haеi ban bumane kaenainyende. Amin!

<sup>6</sup> Nendahina Allah yae Abrahamde a heteungekoke, orona mena helen inyaiбonde. Yahudi ro miyae helen Wali Ondofolore ehakoyeinye, nebei heteungekoke are elae ban abe raei mekai ma haraungebokale wamale ban. Rabuhine ban Yakuble orona mena ro miyae Israel kanina ro miyae yae elate yo nanemene Allah yae eleuboke wekeumi holona ro miyae mo ban. <sup>7</sup> Nane merau Abrahambe orona mena yae mo ban Allah yae eleuboke wekeumi holona ro miyaere inyaiбonde, rabuhine ban Allah nda wanan Abrahamde a ukeunge, "Isaklera ensolensinde yo waei orona mena yae enaimironde."\* <sup>8</sup> Nebei mekainye naei miyae honoungе kiyae yae honoukoke orona mena, Abrahambe orona mena yae Allah me ebaei, nebeibe Allah are heteungekoke huluinye Sarah yae honoke orona mena. <sup>9</sup> Rabuhine ban Allah nda wanan mae heteungekoke, "Reyaе merau raungehikale bena honoifoyole ya Reyaе benen merele mo, Sara ninae kelu fa hononde." † <sup>10-11</sup> Nebei mo ban, nebeibe Ribka aеi Yahudi yobe Isaklera kelu bee honoukoke. Nda kelu bee ohonoikoi yae, nane merau beko naei foi naei namman isaеyeiboi yae, <sup>12</sup> Allah meraufe raungehike hului yembonde naeise, Ribkare nda a ukeunge, "Bena fa kiyae moinya fa naei yebaei bubaeise yembonde."‡ <sup>13</sup> Nebei naeise Allahle yendo kayaalo nane merau nda Allah eleukoke a molaikoke, "Reyaе Yakubre kena buhaе herende, nebeibe Esaufe bae ikele yae korende."§

<sup>14</sup> Nebei aerene naendae wanan, Allahle u mekai na ijen ban mae umande? Nebei mekai ban, <sup>15</sup> rabuhine ban Allah yae Musare nda a ukeunge:

"Raei kena kale huluinye

ro miyae hiwa yanekoi yase yae ei eremihawende  
nane merau ro miyae hiwa

naei beko aerene Reyaе beko eremmokonde."\*

<sup>16</sup> Allah yae ro miyaere elengkonde ungemile naeise ro miyae yae kena ikowate huluinye ban, nane merau naei roibu yae baleumine ban, nebeibe Allahle kena nime haba huluinye ro miyaere isakowoumi. <sup>17</sup> Allahle homofae einye Allah nda a wanan mae Mesir naei Ondofolo Firaunde ukeunge, "Firaun, ware melereisate walora Raei uware kitaiseboke elae keleremibonde naeise, nane merau mokoremibonde Raei ro nda kani kela na hubane-hubane ro enaiseronde naeise, merau raungehikale huluinye ware Mesir kani naei ondofolore ranejeweke."† <sup>18</sup> Nebeinye Allah naei kenare kole huluinye eimokowoumi ro miyae hiwae yanekoi yase yae ei hawemmile nane merau ro miyae hiwa naei kena elae u elae eremimokombonde.

<sup>19</sup> Nauwae, ro miyae hi nda a elengkonde, "Na ijen ban sele Allah ro miyaere me nommiyonde, rabuhine ban ro miyae nde yae Allah Naei kena kole huluinye mokolere a horombonde?" <sup>20</sup> Nebeibe mayae ro miyae mende naei Allah Naei a elelere a horaube? Naendae wanan, nuleungekoke rambun na hului nuleungekoke kiyae a hinennehinde, "Rahene rare nda wanan mae nulewarae?" Na hului ban sele! <sup>21</sup> Ebere helaise isaеyaеiboke mokate ro miyae nebei kendaa naei me einya lonbe na hului selene nebei kendaa kobou mbaisa rambun ma bee mokoukoube, hi ro bele anuwaunge hononde, hi ro ban anuwaunge hononde.

<sup>22</sup> Allah na ijen ban mokole naeise ro miyae mbai eleikoi sului. Beko bakore Allah kena ikele nane merau beko bako mokate ro miyaere Allah na hingkin na yun ran kaembai ranne ehee bukulu emmihayende. Nebeibe Naei kena ikelere mokainye ro

\* 9:7 9:7 Kejadian 21:12 † 9:9 9:9 Kejadian 13:10, 14 ‡ 9:12 9:12 Kejadian 25:23 § 9:13 9:13 Maleakhi 1:2-3

\* 9:15 9:15 Keluaran 33:19 † 9:17 9:17 Keluaran 9:16

miyae, beko mokommikonde naeise nuleungekoke yare, Allah kena u yae heraweyele. <sup>23-24</sup> Eyae Yahudi ro miyaere nane merau Yahudi ban ro miyae, Allah yanekoi yase yae ei haweume yore, Allah mokoume hake one hengko bele surgane emanekende yore Naei one hengko emekai bele kelemmebondere. Nebeibe bekore mokate yore Allah kena u heraweyele yae mokommile walora Naei one hengkore keleyeume. <sup>25</sup> Allahle yendo kayaalo Hosea Yahudi yo bele Yahudi ban yo belere Allah kaenemmile naei nda a ma yae moloukoke:

“Raei holona ro miyae ban yo,

Raei ro miyae ro eremironde.

Reyae kena buhaere ehei nekayeke yoho,

kena buhae haemale yohona yae ro eremironde.”<sup>‡</sup>

<sup>26</sup> Nane merau,

“Nebeinya ro miyae Allahle ro miyae bande elaikeke anuwaunge, nebei ro miyaere

Allah wali bele Kiyaele kelu omi yae ro ronayembe.”<sup>§</sup>

<sup>27</sup> Allahle yendo kayaalo Yesaya yae Israel ro miyae naeise nda a moloukoke:

“Israel yohona kelu omi nau buhaeinya ifau helen nen hororebe,

Allah keli namebe hole emmimolombonde,

<sup>28</sup> rabuhine ban Tuhan are eleuko ke huluinye mokombonde nda kani kelana ro miyae nanemene

u hale yae na wali hului memmikolonde.”<sup>\*</sup>

<sup>29</sup> Yesaya be hokolona ro miyae naeise nda wanen eleuko ke,

“Allah Elaelo Wakelo aei orona mena wali hole moloihoi naei melaue ban mae yae

eyae nanemene nendahina Sodom yo bele Gomora yo bele na ro miyae wanen howekoube.”<sup>†</sup>

<sup>30</sup> Nebeinye aei a nda mekai yae elemakondere, Yahudi ro miyae ban wali himaloibo naeise ehineyei ebaeyeibe, nebeibe Wali Ondofolo Naei a elelere hila rabo halaete aerene wali himalainyeboke ro miyae yae Allah me baele. <sup>31</sup> Nebeibe Yahudi ro miyae wali himalommbonde naei Musale walora wali heere foloukokere hubara haesa yanainye hororebe, wali himalainyeboke ro miyae yae Allah me ebaei. <sup>32</sup> Rahene? Rabuhine ban wali himaloiboise nenaie u wake yae relaeinyene, Wali Ondofolo Naei a elelere hila rabo ehalei. Nebeinye Allah are heteungeko ke Yesus Wali Ondofolo nebei yo naei naleisi-naleisi rukare yeuboke. <sup>33</sup> Yesus oro naleisi-naleisi naei ruka kaban wanen yeuboke naeise Allahle homofaene nda a molaiko ke,

“Eren, Sion yore ekene ro mbai oro naleisi-naleisi naei ruka kaban wanen mae Reyae raufikale.

Nebeibe ruka wanen Kiyae Naei elele are hila rabo halenate yo mehi hako eifoloi.”<sup>‡</sup>

## 10

<sup>1</sup> Aka naei baeke naei, raei yoho mbai Israel ro miyaere Allah hole emmimolombonde naeise, reyae kena kaban kale nane merau Allahre yae eitiyewanale. <sup>2</sup> Raei ijokone eramaele huluinye wamale, Yahudi ro miyae na kena u maema koomikokene uwa harainyeboke yae Allahre baieinye, nebeibe Yesus kelewoumi wali nibi a huluinye ban. <sup>3</sup> Naei kobu huluinye wali himalainyeboke yo yae Allah me baemmile nibi isaeinyatere kena okoinye, nane merau naei kena kate huluinye wali himaloiboise nibi baewatene Allahlena wali himaloibo nibe neme a huluinye ehakoibo. <sup>4</sup> Ro miyae nemene na hului Wali Ondofolore hila rabo halaieinye wali himalainyeboke ro miyae yae me baemmile naeise, Wali Ondofolo Naei uwa kinyeungebo ke yae Musale walora wali heere folouko ke a yoni-yoni elae ban mokoungbo ke.

<sup>5</sup> Wali heere folouko ke are hubara haesa yaneunge aerene wali himalonainyele naeise Musa yae homofaene nda wanen molouko ke: “Nebei einye honate a nemene mokonate ro miyae, nebei suluinye wali hena bona nekenate.”<sup>\*</sup> <sup>6-7</sup> Ro miyae mbai sambai nebei wali heere folouko ke a huluinye nemene ehakoibo sului, nebeibe ro miyae wali himalonainyele naeise Wali Ondofolo Naei a elelere isakowate yo rilibo bele yae nda a elei, “Nde yae surgare yende?”<sup>†</sup> Nane merau, “Nde yae a bulu na wauwau hele kiyaere onde?”<sup>‡</sup> Nebei a mekai wali nibi keleiboise Wali Ondofolore baenainyele yawenainyehondere. <sup>8</sup> Nebeibe nebei ro miyae na hului nda a elende, “Wali Ondofolore hila rabo halennele a faeu mai uwa kelaeunga hele. Naei naeise mai

<sup>‡</sup> 9:25 9:25 Hosea 2:23    § 9:26 9:26 Hosea 1:10    \* 9:28 9:28 Yesaya 10:22-23    † 9:29 9:29 Yesaya 1:9    ‡ 9:33 9:33 Yesaya 8:14; 28:16    \* 10:5 10:5 Imamat 18:5    † 10:6-7 10:6-7a Ulangan 30:12    ‡ 10:6-7 10:6-7b Ulangan 30:13



euwa yae na hului elemembe nane merau mai kena u einye na hului nou hembe.”§ Nebei a mbai meyae mare huwayembe. Nebei a nda wanen huwayembe, “Wali himaloiboi naeise Wali Ondofolo Naei a elelere hila rabo halemba hele.”<sup>9</sup> Mai euwa yae Yesus Wali Ondofolore Tuhan mae wo kaube nane merau mai kena u eisa Yesus Wali Ondofolo here u nolo u kaisa Allah yae aungunuke yae na hele elaubena, Allah yae hole enemolombombe.<sup>10</sup> Ro miyae kena u eisa hila rabo haleikoyatene, wali himalonainyele. Nane merau neuwa yae ro miyae naei bene wo koikoyatene, Allah yae wali hole emmimolombonde.<sup>11</sup> Allahle homofaene Wali Ondofolo naeise nda wanen weume: “Nare hila rabo halaeinye ro miyae mehi hako eifoloi.”\*<sup>12</sup> Allah yae Yahudi ro miyae bele Yahudi ban ro miyae bele me u mbai mokommile. Yesus Wali Ondofolo ro miyae nanemene naei Tuhan nane merau Nare hole molommibonde naeise riyenainyele yo, naei waline Naei foi emerei-emerei emerenende.<sup>13</sup> Nebei a naeise Allahle yendo kayaalo Yoel nda a moloukoke: “Ro miyae nde hole molommibonde naeise Tuhan Allahle riyenainyele yo, hole emmimolombonde.”†

<sup>14</sup> Nauwae, ro miyae hiwa nda a elenate, “Nebei Wali Ondofolore hila rabo ehalei ro miyae lonbe, naendae mekai yae hole molommibonde are riyenainyele? Nane merau Wali Ondofolo Naei a aleisi oboroiboi ro miyae lonbe, naendae mekai yae hila rabo halenainyele? Nane merau ro miyae Wali Ondofololena a foi faeu foise hi yae ha yae ehuweikoi ro miyae lonbe, naendae mekai yae Naei are enaiboronde.<sup>15</sup> Nane merau Allah yae Wali Ondofololena a foi faeu foise enaisuwende ro miyae ewei ei lonbe, naendae mekai yae nebei ro miyae enaisuwende.” Allah yae wemmile enate ro miyae naeise, Allahle homofaene nda wanen molaikoke, “Era foi ton, Allahlena a foi faeu foise rokate huweimeyate ro miyae!”‡<sup>16</sup> Nebeibe reyae wamale, Allah ro miyae ukeumi ekate Wali Ondofololena a foi faeu foi huwate hee, Israelna ro miyae nanemene kena rei mai yae ei aiboi. Allahle yendo kayaalo Yesaya (nda hee naeise) nda wanen moloukoke: “Tuhan, meyae nebei yore emamihuwende hee, ro miyae keli name mo maei huwande are na hele yae elenate!”§<sup>17</sup> Nebeinye, ro miyae Yesus Wali Ondofolore hila rabo halenainyele naeise, Wali Ondofololena a foi faeu foi boronate hele.

<sup>18</sup> Nebeibe Yahudi ro miyae naeise naendae mekai yae elerekonde, Wali Ondofololena a foi faeu foi huwatere oboroiboinye? Boraiboke hele, rabuhine ban Allahle homofaene Wali Ondofololena a foi faeu foi huwate ro miyae naeise nda wanen molaikoke, “Ro miyae ekainyekate anuwaunge bele, nebei a foi faeu foi aimihuweukoke.

Nane merau nebei a foi faeu foi,

nda kani kela na hubane haeinye ainyehayeukoke.”\*

<sup>19</sup> Nauwae, ro miyae hi nda abe hinamale, “Wali Ondofololena a foi faeu foise Israelna ro miyae isaeyeiiboi?” Reyae wamale Israel ro miyae isaeyiaibonde naei a Musa yae Allah nare ukeumi are nda wanen moloukoke,

“Yahudi ro miyae ban yore ei eremihawende walora

mayae kena hensan engkombere Reyae mokorembombe.

Nane merau ro miyae Raei naei isaeyeiiboi nekayeke yo walora

mayae ikele kommilere Reyae mokorembombe.”†

<sup>20</sup> Nane merau Allahle yendo kayaalo Yesaya be rabuleboke yae Allah a eleukokere moloukoke:

“Rare ebaei ro miyae yae

Rare hangkaisele.

Nane merau Raei uwa naeise a ehineyei ro miyae

Raei uwa yakaumibokale.”‡

<sup>21</sup> Nebeibe Israel ro miyae naeise Allah nda wanen mae elele,

“Na yane baei sele

kena elae u elae nane merau Raei wamaele a huluinye ehakoiboi yo Raei me ei aremibonde naeise nekeyale hebeyale.”§

## 11

<sup>1</sup> Nebeinye reyae hinale, “Naendae wanen, Allah Naei holona ro miyae Israel yohore moibe buleumiboke?” Nebei mekai ban! Rabuhine ban raei uwa Israelna ro, Abrahambe orona mena, Benyaminbe yohona (nane merau Allah rare moi ebulei).<sup>2</sup> Na beme

§ 10:8 10:8 Ulangan 30:14 \* 10:11 10:11 Yesaya 28:16 † 10:13 10:13 Yoel 2:32 ‡ 10:15 10:15 Yesaya 52:7

§ 10:16 10:16 Yesaya 53:1 \* 10:18 10:18 Mazmur 19:4 † 10:19 10:19 Ulangan 32:21 ‡ 10:20 10:20 Yesaya

65:1 § 10:21 10:21 Yesaya 65:2

fomere Allah eleuboke holona ro miyae lonbe Neyae moi ebuleiboi. Israel na be elae u elae abe Allahle yendo kayaalo Elia yae Allahre ukeunge Allahle homofae einye molaikoke are u bene nekenayembe. <sup>3</sup> Neyae nda wanen moloukoke, "Tuhan, neyae yenjo kayaayo howate, ware hili era akau erare ongekou wae felayete anuwau yoni-yoni kerewaimi. Weyae wamae are hakoyate ro miyae holora rembai sele nekalebe, nebeibe kena kaban kate rare honaisebondere."\* <sup>4</sup> Nebeibe Allah Eliare nda a yae beungehoke weunge: "Elia wembai ban. Ro miyae 7.000 hele namman Rare mo ei molaise yo Reyae hole molowamaele. Nebei yo walobo Baal be yoi ma mbai rambunde eise molonainyelere roko mbai oro selen-selen eitoroikoi nekeimeyate."<sup>†</sup> <sup>5</sup> Nebei wanen mbai nda hee Allah ro miyaere kena buhae aere ban mae heyeumi Kiyae yae Wali Ondofolore hila rabo halenate naeise, Yahudi ro miyae holo melae eleuboke wekeumi. <sup>6</sup> Allah ro miyaere kena buhae aere ban mae heyeumine, nebei ro miyaere eleuboke wekeumi, naei me u foi mokowatene ban. Ro miyae naei me u foinye eleuboke wekeumina, Allah ro miyaere kena buhae aere ban mae ehei.

<sup>7</sup> Nebeinye a fofo yae elale Yahudi ro miyae helen wali himalainyeboke yo yae me baemmile nibi yae baewatebe ehubaikoi sului, nebeibe Allah yae eleuboke wekeumi yo mo hubayaeikoke. Hiwa ro miyae Allah yae na kena u elaekei mokoumiboke. <sup>8</sup> Allahle homofaene nebei wali himalainyeboke yo yae me baemmile nibire ehubaikoi yo naeise nda wanen molaikoke,

"Meke nda hee bele Naei wali himalainyeboke yo yae me baemmile nibire isaeyeiboi naeise,

Allah mokowoumi na kena u bele na u bene wa bene bele osaeiboke, na ijoko kunaikoke, naengkaei roraimikoke."<sup>‡</sup>

<sup>9</sup> Nane merau Yahudi Ondofolo kaban Daud yae naei yokeijo naeise nda a Allahre riyungehike wanen:

"Waennihi

nebei yo naei kenare moloyaimi yoni-yoni

naei uwa naei walangkare enaiyembonde,  
nane merau oro halunde enaijembonde balenate,  
nane merau nare ehee bukulu inyaimile.

<sup>10</sup> Nebei yo waei kelaemae wali nibi are isaeyeiboi naeise  
na u benebe kobu emmimokonde

nane merau na moko ranne ehee bele rambun mae eumihawende  
na kambi wejei kaeiboi ban na hibi mo oronayende."<sup>§</sup>

<sup>11</sup> Yahudi ro miyae nebei mekai yae naleumihike balekatene, Allah moibe buleumiboke na hibi mo nekenayende a reyaee elei! Allah na mekai ma haraungeboka, Yahudi ro miyae u mekai beko mokowate aerene, kena hensen enaikonde naeise Yahudi ro miyae ban holona yo naei wali hole emmimolombonde. <sup>12</sup> Yahudi ro miyae u mekai beko mokowate, Yahudi ro miyae ban yore foi yoni-yoni Allah ei aumiboke. Nebeibe emekai bele Yahudi ro miyae bukenaidonde Wali Ondofolore hila rabo halenate hee, Allahle me einye u einye honate rambunde yemmikonde.

<sup>13</sup> Nda hee mayae Yahudi ro miyae ban yore reyaee wamale, Allah rare kaeneufekoke mai foi naeise Wali Ondofolore abu akore yeubokalene, mai aerene kalia mokalere na bereise eranale. <sup>14</sup> Nebei kalia yae reyaee rabo halaele raei yoho mbainya ro miyae, Yahudi yore, mokoremibonde kena hensen konayende, nane merau Allah yae hiwa yore hole molommibonde. <sup>15</sup> Allah Yahudi ro miyaere moi buleumiboke hee, Wali Ondofolo nibi mbai mokouboke nda kani kelana Yahudi ban ro miyae bele Allah bele foi nekenate. Yahudi ro miyae Wali Ondofolore hila rabo halenainyelene Allah benen Naei holona ro miyae yae me baemmile hee, ro miyae heraibokera benen walaeiboke wanen mae inyaibonde. <sup>16</sup> Na nere hele Yahudi era hena hului feu aleiboyate hee bohi mbai Allahre hili akau erare iwainye. Nebei hili era akau era bohi mbai mo Allah Naeinya, nebei feu kaban nane merau Allah Naei bangka mo. ((Nebei wanen mbai Yahudi yobe naei kamahe naei Allah yae Naei holona ro miyae me baewoumine, naei orona menare nane merau me baemmile. Nane merau o mbai na kambu foinya, na maensa yoni-yoni foi bangka mo. Nebei wanen mbai Yahudi yobe naei kamahe naei Allah ukeumi are hakowainyene, naei orona mena nane merau hakonainyele.))

<sup>17</sup> Zaitun nona maensa hiwa ruraikoke wanen Abrahambe orona mena Yahudi ro miyae hiwa Allah yae moi buleumiboke. Nebei maensa ruraikoke ijenne aye hibona zaitun maensa yaraikoke mekate zaitun meleme yae raisikene ahunainyeko wanen

\* 11:3 11:3 1 Raja-Raja 19:10, 14 † 11:4 11:4 1 Raja-Raja 19:18 ‡ 11:8 11:8 Ulangan 29:4; Yesaya 29:10 § 11:10 11:10 Mazmur 69:22-23

mae, mayae Yahudi ban ro miyae Wali Ondofolore hila rabo halaungene Allah Niyae Naei holona yo yae me baembe. Nebei zaitun meleme nebei nona kambu mbai yae maensa ahuneuboke yo raman anele, wali nekele. <sup>18</sup> Nebeinye, mayae nebei maensa yoni-yoni ruraikoke anuwaunge ahunayengkokembene, u maengkeu okojiae hele! U maengkeu kombena, bene foi yae nekenayembe mayae maensa yae nebei kambure raman enare, nebeibe kambu yae maensare eraman nareunge. <sup>19</sup> Mai u benera nda wanen elaube era, "Rare na hului ahunenaibonde naeise, nebei maensa yoni-yoni ruraikoke." <sup>20</sup> Nebei na hele. Nebei maensa ruraikoke wanen ro miyae Wali Ondofolore hila rabo ehaleinye Allah yae moi buleumiboke. Nebeibe mayae Wali Ondofolore hila rabo halaungene, mayae na hibi-hibi Allahle holona yobe nekaube. Nebeinye embei aikobe okojiae, nebeibe buhae yae hokonembe. <sup>21</sup> Rabuhine ban nebei no hele na maensa wanen Yahudi ro miyaere Allah moi buleumibokena, mare nebei sului mbai Wali Ondofolore na hibi-hibi hila rabo ehaleinya moi bulenembombe.

<sup>22</sup> Nebeinye eren! Allah Na kena foi u foi bele nane merau kena elae u elae bele ro miyaere mokoyeumi. Yahudi ro miyae Nare moi bulaeinyeboke yore Allah na kena elae u elae bele mokowoumi. Nebeibe mayae Yahudi ban ro miyaere Allah na kena foi u foi mokombene helen foi waungele wali ma nekembena, Nare na hibi kena foi u foi mokonembe. Mayae ma hi nekembena, Allah mare moi bulenembombe. <sup>23</sup> Nane merau Yahudi ro miyae Wali Ondofolore hila rabo enaisalendena, nebei zaitun no rureukoke mbainye benen ahunemmikonde wanen Allah Naei holona ro miyae yae me baemmile. Allah na hingkin benen ahunemmikonde. <sup>24</sup> U bene nekenayembe, mayae Yahudi ro miyae ban yo aye hibona zaitun no wanen yoni-yoni, nebeibe mai u mekai nenaie mabe na hului meleme yae raisi zaitun none ahunayembokembe. Nebeinye mayae maisaei Yahudi ro miyae zaitun melemena maensabe ruraikoke hayaikoke yo wanen, Allah nendon mekai yae bemmihonde nebei yo zaitun melemene ahunemmikonde.

<sup>25</sup> Aka naei baeke naei, Allah mare mo kena buhae hembe hubaungelene embei aiko okoi naeise, raei kena kale mayae nunne heraweuboke are isaeyembombere: Yahudi ro miyae holo mbai yun kaeng-kaen konaimende mende Allah meraufe raungehike Yahudi ban ro miyae Nare hakonainyebonde yo na hului yembonde yane. <sup>26</sup> Nebei nibi yaere Yahudi ro miyae nanemene na wali hole emmimolombonde nda a wanen molaikoke, "Ro miyae wali hole moloiboi Ondofolo

Yahudi naei yo kaban, Sion, naei ro miyae nolora mende.

Neyae mokommibonde ((Yahudi yobe)) Yakuble orona mena yo

benen Allah kena kole huluinye nekenate."<sup>\*</sup>

<sup>27</sup> Allahle homofaene anuwau hine Yahudi ro miyae naeise Allah nda a eleukoke:

"Reyae nda a heteungekokale,

naei u mekai beko yoni-yoni faeinyeremibonde."<sup>†</sup>

<sup>28</sup> Mai aerene Yahudi ro miyae Wali Ondofololena a foi faeu foi ehakoiboinye Allah naei yokeijo yae me baeumi. Nebeibe Yahudi naei yobe naei kamehe naeise a heteungekoke aerene Allah kenare koukoke huluinye Yahudi ro miyaere elembokembe, Allah nebei holonare na hibi mo kena buhae hemmiyende. <sup>29</sup> Allah yae Yahudi ro miyaere foi yoni-yoni a heteungekoke naeise, nane merau nare Naei holona ro miyaere eleuboke wekeumi naeise, Allah a eleukoke hului mokongkonde hele. <sup>30</sup> Yahudi ro miyae Allah weumi a huluinye ehakoi aerene nda hee Allah mayae Yahudi ban ro miyae, na bere Allah uwombe a huluinye ehakoyei yore, yanekoi yase yae ei hawembe. <sup>31</sup> Allah mare yanekoi yase yae ei hawembe wanen mbai Allah nare mokommibonde naeise, nda hee mayae bere nekewaube wali ma wanen Yahudi ro miyae Allah weumi a huluinye ehakoi. <sup>32</sup> Allah na hului yanekoi yase yae ro miyae nanemene ei hawemmile naeise, Allah waemihike ro miyae nanemene Naei weumi a huluinye ehakoyei wali ma nekatte.

*Allahle Foi Aerene Paulus Uware Roweungehike*

<sup>33</sup> Raei kena u roweisiyanale

rabuhine ban Tuhanbe isaei hebaen na bumana hele,

Naei a hokoukoke yoni-yonire ro miyae isaeyeibo sului,

Naei me u mokolere mbai sambai ehameikoi sului.

<sup>34</sup> "Mbai sambai Tuhanbe u benena nekainye isaeyeibo

nane merau roko mbai a usaei Nare ewei."<sup>‡</sup>

<sup>35</sup> "Mbai sambai Allahre rambun eyei benen Allah yae bennehondere elae moloye-unge."<sup>§</sup>

\* 11:26 11:26 Yesaya 59:20-21 † 11:27 11:27 Yesaya 59:20-21; 27:9 ‡ 11:34 11:34 Yesaya 40:13 § 11:35 11:35 Ayub 41:11

<sup>36</sup> Rabuhine ban nda rambun nemene Allah yae mokoukoke.  
 Naei elae yae nekate,  
 Nare bumane kaenainyele naeise nekate.  
 Nare mbaibe huba ban haei ban hili hebenainyele. Amin.

## 12

### *Allahle Kaliare Mokomale Wali Ma*

<sup>1</sup> Aka naei baeke naei, Allah yanekoi yase yae ei haweumene, reyaе moi huramale mauwa wali bele hili era akau era yolo-yolo wanen Allahre kinyennebo. Allah yae eleuboke wekeunge holona u mekai wanen mae nekembe. Nebei wali ma nekaube yae mayae na hele Allahre ei molaunge. <sup>2</sup> Nda kani kelana wali beko nibire ehakoiјae, nebeibe Allahre waennehimbe mai u bene nekenayembe neme yae mokonembombe. Nebei mekai yaere mayae isaeyembombe rahe me u mokonnelere Allah kena kole. Nane merau Allahle foi yoni-yoni belere Na kena foise mokonnele yoni-yoni belere wali ijen mae nekembe nibi belere mayae isaeyembombe.

<sup>3</sup> Rare Allah kena buhaе aere ban mae heufekokene reyaе wamale, mai u benene eisamekoi kayeerobe u benene enekeyeijae. Nebeibe Wali Ondofolo Naei a elelere hila rabo halaеubene Allah meli mekai ikembe yae mai uware hului kolonnele. <sup>4</sup> Aei uwa mbaise barakate hikaekate yo helen. Nebei yo kalia nenaеi nenaеi. <sup>5</sup> Nebei sului mbai eyae ro miyae helen hororebe, Yesus Wali Ondofolo Naei a elelere hila rabo halaendene uwa mbainye yaendeboke, nane merau eyae nebei uwane barandekoke yo mbainye nekemale. <sup>6</sup> Aere une-une Allahle Roh aere ban mae ikeume Na meli mekai yoni-yoni nenaеi nenaеi ma yarandekoke. Allah weunge are huwemmile meli mekai ikeumi ro miyae yae Allah weunge are hila rabo halate hului yae huwenate. <sup>7</sup> Ro miyaere hakommile naei meli mekai ikeumi ro miyae yae nebei sului yae mokonaimile. Ro miyaere a usaеi wasaеi kelemmle meli mekai ikeumi ro miyae yae nebei sului yae moknaimile. <sup>8</sup> Kena u hara rorommile meli mekai ikeumi ro miyae yae nebei sului yae moknaimile. Naei rambun ei wahe mei wahe waheumi meli mekai ikeumi ro miyae kena faere-faere yae wahenaimiyende. Bere ate naeise hiwa yore yawenaimile meli mekai ikeumi ro miyae yae nebei kalia kena maemaе yae mokonate. Hiwa yore yanekoi yase yae ei hawenaimile meli mekai ikeumi ro miyae yae kena rei mai yae mokonate.

<sup>9</sup> Ro miyaere kena buhaе u buhaе mai kenare na maemaе yae hemmile. U mekai bekora uwa wemembe, u mekai foise mo me bobo ikilennekombe. <sup>10</sup> Ako nake mbainya aka baeke wanen mae maise naeise kena buhaе u buhaе hembe nane merau mere mokayembe holo wanen ei hawemmile. <sup>11</sup> Mai baka ranne haiwayembe kalia yoni-yoni behuae ehenaеijae, Allahle Roh wembe a hului Tuhanbe kaliare mokomembe. <sup>12</sup> Mai kena rei mai yae nekembe, rabuhine ban rabo elae yae halaеube Allah nuleungeboke a huluinye mokonde. Beko hubanayembena, kena yae herawemembe. No ban hee ban mae Allahre ebeli bonnembe. <sup>13</sup> Yesus Naei eleuboke wekeumi ro miyae wali rambunde kalo molaimiboke yo naei wali rambun yoni-yoni na hului sului emmimokombe. Mai imaere menate ro miyae kena rei mai yae ei hawemmile, hononate anuwau bele mokonnehambe. <sup>14</sup> Mare weitasise konayembe ro miyaere olomobe ororommimae. Allahre ebeli bonnele nebei ro miyaere foi yoni-yoni yemmile. <sup>15</sup> Hiwa yo kena rei mai enaikondena, mangkele mbainye enjawembombe rei mai kombe, nane merau rime enaitimendena, mangkele mbainye enrimembe. <sup>16</sup> Mangkele mbainye foi yae nekembe. Mai u bene yae eisamekoi rambun yoni-yonire elеijae, nebeibe be ijoko erei yae ro ban ro miyae bele orombe. Mai uwabe isaеi hebaen emekai bele honayembe yae ehubaiјae.

<sup>17</sup> U mekai beko yae mokonayembe ro miyaere mayae u mekai beko yae ebeyeijae. Ro miyae nanemene ijende eraimi elenate me u mo mokomembe. <sup>18</sup> Na huluinya, mai wali ma na yane baei ro miyae nanemene kena foi u foi mokommile nekembe. <sup>19</sup> Aka naei baeke naei, u mekai beko mokayeboketere wenaеijae ebeyeijae hele. Naei foi sele Allahre waеungehinde ehee bukulu ennewonde. Rabuhine ban Allahle homofae einye Tuhan mae elewole are nda wanen molaikoke, "Reyaе na u mekai beko erembende. Reyaе ehee bukulu eremihayende."\* <sup>20</sup> Nane merau nebei homofaene nda are moloukoke,

"Mai yokeijo moni kondena, nare ramanbe yeungele anengkonde.

Buki kondena, bu yeungele anensinde.

Nebei u mekai yae eungemokondene

wa yokeijo na yun ranne isenbe hayeungekokaene fe eungemokonde."†

\* 12:19 12:19 Ulangan 32:35 † 12:20 12:20 Amsal 25:21-22

<sup>21</sup> Ro miyae hi ware u mekai beko mokoibokete yae meleneisate naeise mehauwae ewaeisijae. Nebeibe u mekai foi yae beungehondene naei u mekai bekore meleungehande.

## 13

### *Mere Mokate Yo Waimi A Huluinye Hakombe*

<sup>1</sup> Nda kani kelana mere mokaimi yoni-yoni nemene Allah yae raneujeke nane merau ma hi u helene, ro miyae nemene naei a keleene nekemembe hele. <sup>2</sup> Nebeinye mere mokaimi yo naei are be elae u elae konatena, nebei ro miyae Allah yae raneujeke mere mokaimi yoni-yoni naei are be elae u elae konate. Nebei ro miyae nenaiejae mokonaimile nebei mere mokaimi yo ehee bukulu hainyaimile. <sup>3</sup> Foise mokate ro miyae mere mokaimi yore fe efaejiae, nebeibe u mekai bekore mokate ro miyae fe faeimile. Mai kena kaube fe ban nekememberena, u mekai foibe mokomembera mere mokaimi yo yae mare uwa kaenayembe ei molonayembe. <sup>4</sup> Mere mokaimi ro miyae mai foi naeise Allahle kaliare mokate yore yaeiboke, nebeibe u mekai beko eumokoubondena, nare fere faeumile yo niyae. Mere mokaimi ro miyae Allahle yebaei bubaei u mekai beko mokoi-mokoi yore ehee bukulu hainyaimile. <sup>5</sup> Nebeinye mayae ehee bukulu ahi elaube aerene mo ban nane merau Allahle Roh yae mai kena une wembe aerene mare mere mokaimi yo waimi a huluinye hakombe.

<sup>6</sup> Bararebonde mayae pajak mokombe, rabuhine ban mere mokaimi yo Allahle yebaei bubaei yae me mokoi-mokoise na yane baei mokommiyende. <sup>7</sup> Mai baka ranne honayembe kayeero yemmile yore mayae yemmile hele. Pajakre yaronate yore pajak yae yemmile, cukaise yaronate yore cukai yae yemmile, eise emmihawembe yore ei yae emmihawembe, bere emmihinembe yore be yae emmihinembe.

### *Ro Miyae Hiwa Kena Buhae Hemmile*

<sup>8</sup> Hiwa yo naeinya rambun yaroyaube na hibi yae ahemembe. Kena buhae u buhaebe hi yae hire na hibi-hibi hennele, rabuhine ban ro miyae na ya-ya wali nibi mbainye orate ro miyae kena buhae u buhae hemmile yo, Musale walora wali heere foloukoke a nanemene hubara haesa yanaunge. <sup>9</sup> Nebei wali heere foloukoke nda a ukeume: ro miyae bele miyae ro bele uwa mbainye ohono naei, ro miyae ohoi naei, yoko ebaeyei naei, ro miyae hiwa naei rambun rowelere kena haehae okoyei naei. Mai uware kena buhae u buhae haeunge wanen mbai ya-ya mangkele wali nibi mbainye orau be ro miyae bele buhae hemmiyembena, wali heere foloukoke a nanemene mokaungeboke. <sup>10</sup> Ro miyae ya-ya wali nibi mbainye orau be yore kena buhae u buhae bele heumi kiyae yae nare u mekai beko yae omokoyeinye, kena buhae heyaimi ro miyae yae Musale wali heere foloukoke a nemene mokaikoke.

<sup>11</sup> Ya nobene benatere maisaeinye, na ranne moloukokale a huluinye nekembe. Mai wali ijongkune kaube wanen nekaubera annumbe, rabuhine ban eyae Wali Ondofolore hila rabo hengkelan randehikera haleimeyande nda hee wali holere molommebonde ya nobeungekoke. <sup>12</sup> Reniai koko na heki ban huba mokonnele wanen u mekai beko mokate ro miyae u nolo u kainye nekandera na heki ban eyae emayembonde, rabuhine ban Yesus benen mende ya nobeungekoke. Nebei aerene oubenne mokate me u beko yoni-yoni mokandera hee nema. Men, felayo rolonsan hehene fela hun raisiyumi rambun hirate yo wanen, walobo yunde hun ramansinde me u yoni-yoni mokomande. <sup>13</sup> Aei u mekai mokandere Allahle ro be ro yoinye na yaka yeubokene, eyae na mekai yae nekemale. Nda me u omokojiae hele: holoka beko kombe, keu bu mali, yoko kaeimae kombe, bekore kena haehae koyaube mokombe, han fela kombe, kena hensen kombe, <sup>14</sup> nebeibe Yesus Wali Ondofolo kena kole hului yae nekembe. Nebei yae mai wali einye ro miyae hiwa Yesusre erenainyele, Naei malo hireboubé wanen. Mai bekore kena haehae kaubere ehakoibojiae nane merau u bene enekeijae!

## 14

### *Maise Naeise Ei Hawemembe*

<sup>1</sup> Ro miyae Wali Ondofolo Naei elele a huluinye nekatene naei waline rahe me u mokonatere kena wauwau koyate yore, mai kena rei mai yae ei annebombe. Naei u bene nekainye are aukaka yae okonnemae. <sup>2</sup> Hi yae na hila rabo huluinye raman na bune-bune anende. Nebeibe hila rabo yambi kiyae na uwa hubaunge ofae reu wae mo na hului anende. <sup>3</sup> Raman na bune-bune anende ro miyae, anei ro miyae naei a nene okojiae. Ofae reufe mo anende ro miyae, raman na bune-bune anele kiyae naei walire hului okojiae, rabuhine ban Allah nare ei haweumi. <sup>4</sup> Nebei ro miyae Allahle yebaei bubaeibe nekate. Hiwa yo naei yebaei bubaei naei walire hului kolommile naeise mayae

mende ban sele. Nebei yebaei bubaei ruwende naei, enalonsande naei, na rowale isaei. Tuhau raman anate, aneikoi kenane ei hawayeumi ban, rabuhine Neyae na hingkin mokommile Nare hila rabo halenainyele.

<sup>5</sup> Hiwa yo yae hubainye, ya hiwa Allahre ei molomande naeise ya kaban yoni-yoni niyae. Hiwa yo hubainye, ya yoni-yoni nanemene Allahre eise molomande ya. Ya kaban naeise ro miyae nenaiejae naei u bene nekaimi ma hului kolonainyende hele. <sup>6</sup> Nde yae ya mbai Allahre ei mom-mom ya kaban nenaiejae hokoukoke kiyae, Allahre eise molonnele naeise mokouboke. Nebei sului mbai nde yae raman na bune-bune anende kiyae, nenaiejae hokongkonde Allahre be hinennele naeise anende, rabuhine ban nebei raman yoni-yoni Allahre helen foi wennele. Ofae reufe mo anende kiyae, Allahre be hinennele naeise anende nane merau Allahre helen foi wennele. <sup>7</sup> Ro miyae mbai na uwa mbai naeise wali enekeijae nane merau na u mbai naeise here omokojae. <sup>8</sup> Eyae wali nekande hee, Tuhande kena foise mokomande naeise nekemale. Eyae heremale hee, Tuhande kena foise mokomande. Nebeinye wali nekande, heremale eyae Tuhande holona ro miyaebe yaendeboke. <sup>9</sup> Wali nekande ro miyae naei nane merau heraiboke ro miyae naei Tuhau bere enjembonde naeise, Yesus Wali Ondofolo herekera nebeisa aunguke. <sup>10</sup> Nebeinye aka naei baeke naei, mai aka baeke Wali Ondofolore hila rabo mbaise halaube ya-ya wali ma hi nekate yore me onoyommimae nane merau aukaka yae okommimae! Rabuhine ban eyae nanemene Allah mere nommeyonde kendan wameran bene emahabende yo mo. <sup>11</sup> Nebei are aeisaei, rabuhine ban Allahle homofaene nda wanen molaikoke:

“Tuhau mae nda a elele,  
Reyae nana hesele wali nekalene,

Raei ro be ro yoinye ro miyae nemene fomene oro selen-selen menaitorongkonde nane merau Reyae Allahbe nekalere a faeuko nanemene wo konaikonde.”\*

<sup>12</sup> Nebeinye na yaka yeuboke aei u nolo u kainya ro miyae na me u mokayekere Allahle ro be ro yoinye naeise naeise wo enaikonde.

<sup>13</sup> Allah aei walire hului kolommekonderene, men, aeise naeise hila rabo mbainye halaende ro miyae hibe u mekai beko mokomale belene, eyae u mekai harannele beko omokoi yae nekemale. <sup>14</sup> Tuhau Yesus bele nekende huluinye reyae na hele yae elale, raman yoni-yoni anewande ranne Allah yae niki bele ro miyae yae me ebaei. Nebeibe ro miyae hi yae raman hiware anende naeise u mekai beko yae hubannelena, naei uware u mekai bekore yembonde. <sup>15</sup> Weyae aneyae raman mae mokoungebonde hila rabo mbainye halaube aka baeke na kena beko kondena, ro miyae kena buhae heumile wali ma weyae enekei. Weyae aneyae raman mae mai aka baeke naei aerene Wali Ondofolo hereke Rore beko omokojae. <sup>16</sup> Nebei sului mbai, waei aka baeke mbai u mekai beko mokombondera hiwa yo yae Allahle holona ro miyae naeise a beko huwenate belene, waei me u mokole yae waei aka baekere beko omokoi. <sup>17</sup> Allah merau raungehike hului Wali Ondofolole me kelee u keleene nekate wali ma, era hena are hakoyaimine ban, raman bu anatene ban, nebeibe Allahle Roh yae weume a hului nda wali ma nekemale: wali ijen bele, rei mai bele, kena foi bele nekemale. <sup>18</sup> Nebei wali ma nekate yae Wali Ondofolole kaliare mokole kiyae Allahre kena foibe mokounge, nane merau hiwa yo yae nebei kiyaeere ei hawenainyele.

<sup>19</sup> Nebeinye aengkele rei mai yae nekemale naeise nane merau Wali Ondofolo Naei a elelere na mekai yae hakomale naeise, kena na na maemae hele yae relemande. <sup>20</sup> Raman aerene, Allah yae kaenewoume Wali Ondofolore hila rabo halende ro miyaeere beko omokojae. Raman yoni-yoni anemale na foi bangka mo. Nebeibe na beko fere, aneyae raman mae hiwa yore mokoumibonde beko bele inyaibonde. <sup>21</sup> Naei foi sele Wali Ondofolore hila rabo mbainye halaenne yo na hila rabore bekobe mokoumibonde belene, nebei melen bele anggur bu bele raman ma hi bele mayae anejae.

<sup>22</sup> Mai raman bele bu bele haraungeboke naeise Allah bele mo a elakoube, ro miyae hiwa bele eleijae. Ro miyae na kena u einye foi hubayeunge hului mokole kiyaeere onomi foka yae hubannende. <sup>23</sup> Nebeibe ro miyae kena u wauwau yae kole ramanbe benen rouke aneukokena, Allah nebei ro miyaeere na kena une me nommiyonde, rabuhine ban nebei ro miyae Wali Ondofolo Naei a elelere hila rabo haleyeunge hului ban nebei raman bu aneukoke. Hila rabo haleyeunge hului ban mokole u mekaibe beko yeuboke.

## 15

<sup>1</sup> Mayae Musale walora wali heere foloukoke a keleene nda heene enekei naeise, hila rabo elae halaube yo hila rabo yambi yo naei are na hebaen-sebaen boromamile. Aei

\* 14:11 14:11 Yesaya 45:23

kena foise mokomambonde naei koli hara ebeijae. <sup>2</sup> Eyae mbemba mbemba aengkele ya-ya wali nibi mbainye orande yo na kena foise mokomamile. Naei hila rabore amminunde naeise nebei ro miyae naei foise mokomamile. <sup>3</sup> Rabuhine ban Yesus Wali Ondofolo Naei uwa foi naeibe Neyae bene enekei. Bukainyehike Allahle homofaene Wali Ondofolo yae Allahre nda a ukeunge: "Ware yae haranayeibote ungayete a beko yoni-yoni, Rare lon mae haraiseboke waise wanen hubawanale."\* <sup>4</sup> Kena yae heraumayende yae Wali Ondofolore hila rabo haleyanne walora nane merau Allahle homofae isaei-isaei isaeyaende walora eyae rabo elae halemande Allah nuleungekoke a huluinye mokonde. Nebei wali mare kelewaima naeise, Allahle homofaene a faeu yoni-yoni na bere yae molaikoke.

<sup>5-6</sup> Allah yae elae yemmele aei kena heraumabonde Naei kaliare no ban hee ban mokomale nane merau aei kenare aumenunde. Mayae kena mbai u mbai yae na hului na bulau wae aei Tuhan Yesus Wali Ondofolole Ako Allahre hili hebennele naeise, reyae Allahre riyanale mare hakonembombe Yesus Wali Ondofolo Naei a elelere hakonnele walora kena mbai u mbaise mokonembe nekembe.

<sup>7</sup> Allahre bumane enainyekaende naeise, Yesus Wali Ondofolo yae mare ei ambokembe wanen maise naeise hi yae hire ei hawemembe. <sup>8</sup> U bene nekenayembe, Allah Naei a elele huluinye mokolere kelemmile naeise, Wali Ondofolo Yahudi yebaei bubaei yae meke. Neyae mokoungeboke Yahudi yobe naei kamehe naeise Allah yae nuleumiboke are na hele yeuboke. <sup>9</sup> Nane merau Yahudi ban ro miyae Allah yanekoi yase yae ei hawewaimi aerene Allahre hili hebenainyele naeise, Wali Ondofolo meke. Nebei naeise Allahle homofaene Yahudi Ondofolo kaban Daud nda a Allahre ukeunge,

"Nebei aerene Yahudi ban ro miyae u nolo u kainye

reyae Ware bumane ereikaenete  
nane merau Wa Ro foi naeise

koi yae bae yae ereikote."<sup>†</sup>  
<sup>10</sup> Nane merau Allahle homofaene nda wanen molaikoke,

"Yahudi ban ro miyae men,  
Yahudi ro miyae bele rei mai mbainye emansukelendere."<sup>‡</sup>

<sup>11</sup> Nane merau,

"Mayae Yahudi ban ro miyae  
Tuhande bumane kaenne.

Nane merau ro miyae nanemene

koi bae bele yae Nare bumane kaenne."<sup>§</sup>

<sup>12</sup> Nane merau Allahle yendo kayaalo Yesaya yae elele,

"Yahudi yobe Isaite orona mena enaisonndera ro mbai enjakambonde,

Yahudi ban ro miyaere mere mokommile.

Naei elele are na hele inyaibondere

Yahudi ban ro miyae rabo elae halenainyele yae nekenate."<sup>\*</sup>

<sup>13</sup> Allah yae mokonembe rabo elae halemba Naei elele a hului mokonde. Allahlena Roh elae walora mayae rabo elae halemba Allah nuleuboke are na hele inyaibonde naeise, reyae Allahre riyanale Naei a elelere hila rabo halaeunge yae Neyae mai kena rowenensimbe nane merau rei mai bele yae haungemembe.

*Paulus Yahudi Ban Ro Miyae Nolona Kalia Mokowole Naeise*

<sup>14</sup> Aka naei baekae naei, mai naeise reyae kena wauwau okoi, rabuhine ban u foi yoni-yoni helen mainya honayembe, isaei hebaen yoni-yoni are isaeyaeukoke, nane merau na hului hi yae hire kelennele. <sup>15</sup> Bena kelewamale are benen u bene nekenayembe naeise be rabuleubokale nda homone moloukokale, rabuhine ban Allah kena buhae aere ban mae heufekoke nane merau <sup>16</sup> ukeufe Yesus Wali Ondofolole kaliare Yahudi ban yo u nolo ukainye mokorele. Allahle Roh yae Allahre kena foise mokonainyele u mekaise Yahudi ban ro miyaere mokommibonde nane merau nebei yo hili era akau era wanen mae Allahre kena foise mokonainyele naeise, Allah ukeufe imam wanen mae Naei Wali Ondofololena a foi faeu foi Yahudi ban ro miyaere eremihuwende.

<sup>17</sup> Yesus Wali Ondofolo bele mbainye nekendene, Allah ukeufe mokoimeyale kaliare embei aiko yae roweufehike kale. <sup>18-19</sup> Yesus Wali Ondofolo naei walora Yahudi ban ro miyae yaweremile Allah weumi a huluinye hakonainyele naeise, Wali Ondofololena a foi faeu foi huwamaele nane merau Allahle Roh elae yae ei aufebokene rambun emere-emere mokowale. Nebei bewate rambunde mo reyae a elerele, rambun hiwa a eyelele.

\* 15:3 15:3 Mazmur 69:9 † 15:9 15:9 2 Samuel 22:50; Mazmur 18:49 ‡ 15:10 15:10 Ulangan 32:43 § 15:11 15:11 Mazmur 117:1 \* 15:12 15:12 Yesaya 11:10

Wali Ondofololena a foi faeu foi huwamaele Yerusalem yora huba raweubokale ekale nibi yo yanne Ilirikum yone huba eungemokoukokale. <sup>20</sup> Reyae kena koimeyale Wali Ondofolore onewainye ro miyaere mo a foi faeu foi hufelere. Nebei wanen mae hiwa yo yae ainyunuke jemaat mbainye reyae jemaat hibe arenunde belene. <sup>21</sup> Bukainyehike, Allahle homofaene Wali Ondofolole naeise nda wanen molaikoike,

“Naei a kelaemi yo roko mbai ei aiboi yo

ijoko enainyerende

nane merau Neyae keleumi are roko mbai eiboroiboi ro miyae

enaisaeyembonde.”†

<sup>22</sup> Nebei kaliare mokowalene roko helen mai bokore erele naeise meungekabeukokale.

*Paulus Merau Raungehike Roma Yore Endere*

<sup>23</sup> Ralo yae yakama yae mai bokore erelere raei kena kalebe mon ban selene. Nebeibe nda hee nekale kanina kalia mokoukokale baeufokene raei uwa mokoungihakale mai bokore erelere. <sup>24</sup> Reyae merau raungehikale Spanyol kanire erelere. Reyae rabo halaele nebei kulunne erewende mangkele hubaimakonde rei mai mbainye emakonde. Nebeisa Spanyolre erele naei era inyale reyae rabo halaele mayae na hului hakonsebombe.

<sup>25</sup> Nebeibe Spanyol kanire ei mo, reyae nda hee Yesus Naei eleuboke wekeumi holona yo naei rambun arilaikoike bele Yerusalem yore roufendere. <sup>26</sup> Yerusalem yona Yesus

Naei eleuboke wekeumi ro miyae hiwa wali rambun kalo hele wokone, jemaat-jemaat Makedonia kanina bele Akhaya kanina bele kena kaban kowate hakonaimibondere.

Nebei yore inyaimile naeise rambun yoni-yoni arilaikoike. <sup>27</sup> Nda ro miyae kena rei mai sele yae hakonaimibondere, nana hesele naei baka ranne honole, rabuhine ban

bena Allah yae Yahudi ro miyaere naeisa foi yae mokomeyeumi. Nebeisa Allah nibi mbai mokuungeboke Yahudi ban ro miyae na hului Yahudi ro miyae wanen mbai Naei

foi kayee yaronate. Nebeinye Yahudi ban ro miyae na baka ranne huluinye Yahudi ro miyaere na wali rambun yoni-yoni yae hakonaimile. <sup>28</sup> Rambun nda yo yae arilaisikere

Yerusalem yona yore isemile kalia mokorekonde riyau ufebondera, reyae kulun ufele Spanyol kanire erele. Nebei hee mangkele hubaimakonde naeise, mayae nekaube kanire

erele. <sup>29</sup> Reyae raeisaei mai bokore erele hee, mai kalo moloungkokembe hului Wali Ondofolo raei walora na hului mokonembombe.

<sup>30</sup> Aei Tuhan Yesus Wali Ondofolo mangkele nekaube aerene, nane merau Allahle Roh elae yeume aeise naeise kena buhae hemamile aerene, Reyae riyamale mangkele

rangkele raei naeise Allahre ebeli bomanele: <sup>31-32</sup> Allah kena kole hului raei kena rei mai yae mai bokore merele nane merau mai nolone eyae kena foi u foi emansubande

naeise, Allahre ebeli bonnembe Yudea kanina Allahre hila rabo ehalei holona me eisa Allah hayensekonde, nane merau nda rambun roufende kayeere Yerusalem yona Yesus

Naei eleuboke wekeumi holona ro miyae na kena rei mai yae yaronakonde. <sup>33</sup> Reyae ebeli banale Allah rei mai onomi foka no Kiyae mare nanemene ei haungemembe. Amin.

## 16

*Ro Melaeyei-Melaeyese*

<sup>1</sup> Aei omi ken Febe, Kengkrea yone jemaatne kalia mokole kiyaere hakonnebombe naeise reyae riyamale. <sup>2</sup> Yesus Naei eleuboke wekeumi holona miyae yae ei hawennele.

Rambunde hakonnebombero rinyembena hakonnebombe, rabuhine ban neyae ro miyae helen hakowoumi nane merau rare hakowoufe.

<sup>3</sup> Priskile na molo Akwilale Yesus Wali Ondofolole kalia mbainye mokande yore raeinya ro melaeyemmibombe. <sup>4</sup> Rare holere molonaisebondere naei uware erabuhi

ban mae hubawainye. Nebei yo hakaisebokere helen foi weise reyae mo ban, aei aka baeke wa Yahudi ban ro miyae nanemene waimi.

<sup>5</sup> Nda yo Priskile Akwilale imaene eyarilaisiyele jemaatre raeinya ro melaeyemmibombe.

Aka baeke Epenetus reyae buhaere haenaale kiyaebe raeinya ro melaeyennebombe. Asia kanina Wali Ondofolore hila rabo halaeinye holona na bemena ro, Epenetus niyae.

<sup>6</sup> Maria mai naeise kalia elaekei sele relewoung kiyae bele raeinya ro melaeyennebombe.

<sup>7</sup> Nebeisa raei yoho mbainye kahili wa bee Andronikusle Yuniasle nanembainye kawane hebewande be bele raeinya ro melaeyemmibombe. Hokolo bee Wali Ondofolole

abu ako nolone rore rowaimi yo, nane merau reyae namman mae hokolo bee Wali Ondofolore hila rabo halewoinye.



<sup>8</sup> Ampliatius reyae Tuhan eisa buhaere haenale kiyae bele raeinya ro melaeyennebombe.

<sup>9</sup> Urbanus Wali Ondofolole kalia mbainye mokande kahilire nane merau Stakhis buhaere haenale kiyae raeinya ro melaeyemmibombe.

<sup>10</sup> Beko hubawounge hororebe namnan Wali Ondofolo Naei a elelere hakounge kiyae Apeles bele raeinya ro melaeyennebombe.

Aristobulusle imae einye me baeiboke yore raeinya ro melaeyemmibombe.

<sup>11</sup> Herodion raei yoho mbai kahili kiyae raeinya ro melaeyennebombe.

Narkisusle imae obe einya aei Tuhande hakainye yo bele raeinya ro melaeyemmibombe.

<sup>12</sup> Trifenale Trifosale aei Tuhanbe kalia elae hele releinye miyae beere raeinya ro melaeyemmibombe.

Aei Tuhanbe kali elae meumokoukoke miyae hi Persis buhaere haenale kiyae raeinya ro melaeyennebombe.

<sup>13</sup> Rufus Tuhanbe einye rore rainyeboke ro mbai nane merau nenake raei nake miyae wanen ma, na beene raeinya ro melaeyemmibombe.

<sup>14</sup> Asinkritus, Felgon, Hermes, Patrobas, Hermas nane merau hila rabo mbaise halaete aka baeke nanemene mbainye nekaube yo bele raeinya ro melaeyemmibombe.

<sup>15</sup> Filologusle, Yuliale, Nereus nemaenbe, Olimpasi, nane merau Yesus Naei eleuboke wekeumi holona yo nanemene nangkele nekate yore raeinya ro melaeyemmibombe.

<sup>16</sup> Yesus Naei eleuboke wekeumi holona wanen yo yae aeise naeise ro foi yae melaeyemande.

Wali Ondofolole jemaat-jemaat nanemene mare ro melaeyayembe.

#### *Ubene Nekei-Nekeise*

<sup>17</sup> Aka naei baeke naei, reyae moi hurerembe jemaat einye maise naeise a horonater mokaimi ro miyaere nane merau mare kelaeyengkombe Wali Ondofolole na hele a nanaei ma kelaemi ro miyaere ijoko robommile, naei nolora uwa wemembe.

<sup>18</sup> Rabuhine ban nebei u mekai ma ro miyaebe aei Tuhan Wali Ondofolole kaliare mokate ban, nebeibe na bekore kena haehae kate more ei moloyainye. Isaei hebaen isaeyiboi ro miyae holonare a yukaiei-yukaiei bele a moi-moi mokaimi bele yae ame-ame beyaimi.

<sup>19</sup> Ro miyae nanemene mayae Wali Ondofolo Naei a elelere hakaunge a boraikokene, raei kena roweisiyeufe. Nebeibe reyae kena kale foi mokombe naeise isaei hebaen bele ma yae uwa harannebombe, nebeibe me beko u beko mokombe naeisa kobu bele yae nekembe.

<sup>20</sup> Allah rei mai yeumi Kiyae na heki ban walobo yun kiyaele elae mohennebondera mai oro keleene menerulensinde.

Reyae ebeli banale Tuhan Yesus Wali Ondofolo yae mare kena buhae aere ban mae henembe.

<sup>21</sup> Timotius kalia mbainye mokonde kahili nane merau raei yoho mbainya kahili wa Lukiuslera, Yasonbera, Sosipaterlera mare ro melaeyayembe.

<sup>22</sup> Reyae Tertius, Paulus naeise nda homore moloukokale kiyae, aei Tuhanbe eisa mare ro melaeyamale.

<sup>23</sup> Gayus rare naei imaene ukeufe nekale kiyae nane merau nebei imaene arileisiyate jemaatna ro miyae nemene mare ro melaeyayembe.

Erastus nda yona roi mere ikileuboke kiyaele aei aka baeke Kwartusle mare ro melaeyayembe.

<sup>24</sup> Reyae ebeli bonale Tuhan Yesus Wali Ondofololena kena buhae aere ban mae mayae nanemene ei haungembe.\*

#### *Allahre Buma Kolo-i-Koloise*

<sup>25-26</sup> Aka naei baeke naei, reyae Wali Ondofololena a foi faeu foise huwengkokamale. Nebei a heki hele nunne honowate. Nebeibe nda hee yoho nemene Wali Ondofolore hila rabo halenainyele naeise, nane merau hakonainyele naeise, Allah Hubalo Mando yae Naei yenjo kayaayo naei homofaene ukeumi molaikoke, nane merau nda heene Wali Ondofolole naeise yakaumeboke. Nebei Allah na hului mokonembonde Wali Ondofolo Naei a elelere hila rabo elae yae halemembe, hakomembe. <sup>27</sup> Allah Nembai sele isaei no hebaen no, hi bele ban. Yesus Wali Ondofolole walora Allahre huba ban haei ban hili hebenainyende! Amin.

\* 16:24 16:24 Homofae hena helen ayat 24 nangkele ban.

## 1 KORINTUS

<sup>1-2</sup> Onomi foka, Allahle jemaat Korintus yona nekaube. Mayae Yesus Wali Ondofolo bele mbainye nekaube yae Allahre kena foise mokaunge u mekai bele nekeyembe. Mare Yesus Naei eleuboke wekeunge holona yo wanen u mekai nekemembere kaenngkokembe ro miyae naeise, nane merau makei-makeinye nekate Tuhan Yesus Wali Ondofolo yae hakommibondere kaeneyainye yo nanemene naeise, nda homo moloukokale. Eyae nemene Yesus Tuhande kaenannele.

Reyae Paulus Allah kena koukoke hului kaeneufekoke Yesus Wali Ondofolole abu akore yeubokale kiyaе bele aei aka baeke Sostenesle mare ro melaeyembe. <sup>3</sup> Meyae ebeli bannele Allah aei Ako Kiyaele nane merau Yesus Wali Ondofolo Kiyaele mare kena buhae aere ban mae henembe nane merau kena foi u foi mokonembe.

*Korintus Jemaatna Ro Miyae Aere Paulus Helen Foi Allahre Ebeli Bowounge*

<sup>4</sup> Mai naeise reyae no ban hee ban Allahre helen foi weyanale, rabuhine ban Yesus Wali Ondofolole eisa Neyae kena buhae aere ban hengkokembene. <sup>5-6</sup> Meyae Wali Ondofolole a mare huwayembe heene mayae boraukokere na hele yae elaukoke naeise meyae maeisaei, rabuhine ban mayae Wali Ondofolole wali nibi a faeu huwaube nane merau Naei isaei hebaen isaeyaeukoke. Wali Ondofolo bele mbainye nekaube yae Allah yeume foi yoni-yoni nemene mare ikembe. <sup>7</sup> Nebei aere mayae Yesus Wali Ondofolo benen mende uwa yakambonde yare rei mai yae rakaunge yae, Allahle Roh yeumi meli mekai yoni-yoni mai nolone kalo omoloiboi. <sup>8</sup> Tuhan Yesus Wali Ondofolo benen bensonde mende hee mare beko ewei sului u mekai ma yae hubayengkombe naeise, Nenaеijae mare hiron kayaa hebenembe elae inyemembe nebei ya huba mennemokonde. <sup>9</sup> Na Kelu Yesus Wali Ondofolo bele mbainye nekembe naeise, Allah yae mare kaenngkokembe. Nebei Allah mahire eyeiboinye, elewole huluinye mokongkonde.

*Jemaat Nolona Yoho-Yoho Kate*

<sup>10</sup> Aka naei baeke naei, aei Tuhan Yesus Wali Ondofolole Ro eisa nda a yae moi hramale, jemaat u nolo u kainye yoho-yoho yembonde belene, kena u mbai yae nane merau u bene wa bene mbai yae nekaubere hiyei ranemembe. <sup>11</sup> Nebei a wamale rabuhine ban Kloele imae einye nekate ro miyae jemaat nolone akure haube a rare huwaisekoke. <sup>12</sup> Reyae boroukokale mai jemaat u nolo u kaisa hiwa yo yae elate, "Meyae Paulusre hakannele." Hiwa yo yae elate, "Meyae Apolosre hakannele." Hiwa yo yae elate, "Meyae Kefasre hakannele." Hiwa yo yae elate, "Meyae Yesus Wali Ondofolore hakannele."

*Wali Ondofolo Walora Allah Naei Isaei Hebaen Bele Elae Bele Keleumi*

<sup>13</sup> Yesus Wali Ondofolo kayeere ewaheikoi sului! Reyae Paulus mai aere ohaline oboikoi! Raei ro yae mare bu okoikoi! <sup>14-15</sup> Ro miyae hi raei ro yae bu koungebokene raei moisa hakate ro yae hubannele belene, helen foi yae hubanale mai u nolo u kainye hire bu okoiboi, hokolo bee Krispusle Gayusle mo bu koumikokale. <sup>16</sup> (Na hele Stefanusle imae einye nekate ro miyaere reyae bu koumikokale, nebeibe raei u benera nekaisa benen ro miyae hiwa reyae bu okoikoi mo.) <sup>17</sup> Hiwa yore bu okoikoi mo, rabuhine ban Wali Ondofolo yae bure koremile naeise rare ewei emei, nebeibe Wali Ondofololena a foi faeu foise hufemile naeise ukeufe mekale. Yesus ohali ranne baikoke hereke a faeufe elae ban yembonde belere, nebei a foi faeu foi huwamaelere ro miyae naei isaei hebaen mae ban. <sup>18</sup> Rabuhine ban Allah bele wahaeikoke yo yae elate, "Yesus ohaline baikoke hereke aere holere moloumebonde nibi mokouboke a faeufe a bangka-bangkare yeuboke." Nebeibe eyae nebei a faeu huluinye, wali hena bona u mekai hubanene yo, aei wali einye nebei a faeu Allahle elaene yeuboke. <sup>19</sup> Allahle homofaene Neyae nda a mekai yae eleukoke,

"Isaei hebaen bele ro miyae

naei isaei hebaende Reyae beko mokoremibonde.

Nane merau ro miyae naei isaei hebaen mae walire hiyei ranate yore

Reyae mokoremibonde naei isaei hebaende rabuhi ban yembonde."\*

<sup>20</sup> Nda kani kelana isaei hebaen bele ro miyae bele, Musale walora wali heere folaikokere isaeyaeikoke kelaеimi holona yo bele, nane merau nda kani kela naei a melainde kolainye yo bele, nanemene na isaei hebaen huwaimi yore bele Allah yae na kobu kelemmibonde. <sup>21</sup> Allah Naei isaei hebaen huluinye, ro miyae nda kani kelana

\* 1:19 1:19 Yesaya 29:14

wali beko nibine orate yo naei isaei hebaen walora Allahre oroiboi. Allah kena koukoke Naei mokouboke nibi huluinye Wali Ondofolore hila rabo halenainye ro miyaere hole molommibonde. Nebei nibi a faeufe huwaimi hee, ro miyae nebei a faeufe a bangka-bangka yae elate. <sup>22</sup> Nebei nibi a na hele kelemmile naeise, Yahudi ro miyae rambun emere-emere koli-koli yaeikoke riyaimi nane merau Yunani ro miyae bae nda kani kelana isaei hebaen ma yae baete. <sup>23</sup> Nebeibe meyae huwammi Wali Ondofolo ohaline baikoke yae wali hena bona u mekai hubanainyende nibire mokouboke. Nebei a huwammi Yahudi ro miyae na hele elenaikondere kabewainye, rabuhine ban Wali Ondofolo ohaline baikoke mare ahi elate. Yahudi ro miyae ban yo yae nebei a faeufe a bangka-bangka yae elate. <sup>24</sup> Nebeibe Yahudi ro miyae bele Yahudi ban ro miyae bele Allah yae kaenewoumi yo Wali Ondofolore hila rabo halenainyele hee, Allahle elae wakere nane merau Allahle isaei hebaende isaeinyate. <sup>25</sup> Allahlena a bangka-bangkare ro miyae naei isaei hebaen mae ehameikoi sului nane merau Allahlena male yambire ro miyae naei elae bele yoni-yoni yae ehameikoi sului.

<sup>26</sup> Aka naei baeke naei, Allah mare kaenengkokembe heena mai u mekai nekewaube ma u bene foi yae nekenayembe. Ro miyae naei ijoko huluinye erewayembe, keli name hele mai nolona nda wali ma yae nekewaube; ro miyae naei isaei hebaen bele, ro bele rowayemba, ondofolo kose kelu omi. <sup>27</sup> Nebeibe isaei hebaen bele ro miyaere fere mokommibonde naeise, Allah mehauwae nda kani kelana wali beko nibine orate ro miyae yae eraimi kobu bele ro miyaere eleuboke, nane merau elae bele ro miyaere fe mokommibonde naeise, nda kani kelana wali beko nibine orate ro miyae yae eraimi yambi bele ro miyae eleuboke. <sup>28-29</sup> Ro miyae hi yae ha yae Allahle ro be ro yoinye u maengkeube engkonde belene, Allah mehauwae Naei holona yo inyaibonde naeise nda wali ma nekate yo eleuboke wekeumi: nda kani kela yae ro ban mae eraimi yore, me baei ban mae nekate yore, rabuhi ban erunge yore. <sup>30</sup> Allah Nenaiejae mokombokembe Yesus Wali Ondofolo bele mbainye nekaube. Wali Ondofolo yae mokuomeboka Allahle isaei hebaen aei kena une nekele. Naei walora Allahle ro be ro yoinye eyae wali himalanneboka yo yae me baeume, Allah yae eleuboka wekeumi holonare yaendeboka nekande, nane merau aei beko bako aheukoke baeufoka. <sup>31</sup> Allahle homofaene nda wanan molaikoke: "Kena u maengkeufe konde ro, Tuhanbe me u mokoubokere mo u maengkeufe konde."<sup>†</sup>

## 2

<sup>1</sup> Aka naei baeke naei, Allahle a faeufe hufembe naeise reyae mai bokore mekale heena ahuba huwamale baengko bele ma yae omokoiboi nane merau isaei hebaen bumana bele yae erenaisele wanan mae ekelei. <sup>2</sup> Rabuhine ban raei a hokoukokale huluinye mai bokone erenekende hee nda a faeufe mo hufembere, Yesus Wali Ondofolo ohaline baikoke hereke yae ro miyae wali hena bona u mekai hubanainyende nibi mbai mokouboka, a hi hi mare ewei. <sup>3</sup> Mai bokone ekale hee raei uwa yambi koloukeufe nane merau buhae hokoufoboka oro me oinyeu hineubokale kowale. <sup>4-5</sup> Ro miyae naei isaei hebaen aerene ban nebeibe Allahle elae aerene mayae Wali Ondofolore hila rabo halennele naeise, nebei a usaei wasaei mare kelewamale. Ro miyae naei isaei hebaen hului yae kena yon-jon a yae reyae ehuwe, nebeibe Allahle Roh elaebe kelebokamale.

<sup>6</sup> Mai nolona Wali Ondofolole eisa uwa henaiboka yore meyae Allahle isaei hebaen kelaemmile, nebeibe nda kani kelana wali beko nibine orate yo naei isaei hebaen bele nda kani kelana rabuhi ban inyaibonde mere mokaimi yo naei isaei hebaen bele meyae ekeleikoi. <sup>7</sup> Meyae nebei Allah yae nunne heraweuboka nowoke isaei hebaende huwayembe. Eyae na hului nene waewae bele nekemale naeise, nda kani kela Allah me enuleiboi heene Neyae nda isaei hebaen mokoungahake. <sup>8</sup> Nda heena ondofolo yoni-yoni nemene Allahle isaei hebaen isian nekewate. Neyae naeisaei yae nekate yae, Tuhan nene waewae bele Kiyare ohaline oboikoi sele. <sup>9</sup> Nebeibe, Allahle homofaene nda wanan molaikoke,

"Allahre kena buhae haeyne yore Neyae relahi yae mokoungahake rambunde ro miyae yae ijoko roko mbai ereiboi, angkaei yae oboroiboi,

nane merau ro miyae naei kena u eisa eyakaiboi nekeimeyate."<sup>\*</sup>

<sup>10</sup> Allah meraufe raungehike nunne honayeke rambunde Allahle Roh walora aere isaeyumeboka, rabuhine ban Allahle Roh yae rambun yoni-yoni nemene fomene hameyemine. <sup>11</sup> Ro miyae u bene nekainye rambunde nebei ro miyae na kena u mo naeisaei nekele, hiwa yo isian. Nebei sului mbai Allahle u bene nekainye rambunde ro

miyae yae isian, Allahle Roh mo Naeisaei. <sup>12</sup> Allah yae nendon iwoume rambun yoni-yoni nanemene eyae isaemabonde naeise, nda kani kelana wali beko nibine orate ro miyae naei isaei hebaen mae eyei, nebeibe Naei Rohbe ikeume. <sup>13</sup> Allahle Roh bele yore Allahle Naei are huwammilere.<sup>†</sup> Ro miyae naei isaei hebaen hului yae maere ekelei, nebeibe Allahle Roh yae keleume. Meyae Allahle Roh a weume nibi huluinye Naei na hele a faeufe ikelewammi. <sup>14</sup> Allahlena Roh ban ro miyae nebei Roh yae yakaumi are na hele elei, rabuhine ban nebei rambun yoni-yoni a bangsa-bangsa merau eraimi. Nebei ro miyae isaeyeboi sului, rabuhine ban nebei rambun yoni-yoni Allahle Roh walora mo hamenaimile. <sup>15</sup> Nebeibe Allahlena Roh bele ro miyae yae rambun nemene hamenaimile, nebeibe hiwa yo yae naei uware ehameikoi sului. <sup>16</sup> Allahle homofaene nda wanen molaikoke,

“Ro miyae mbai sambai

Tuhande a usaei wennekonde naeise,

u benena nekainyere isaeyaeiboinye!”<sup>‡</sup>

Nebeibe Allahle Roh ikelewoume Wali Ondofolole rambunde isaeyele wanen, meyae isaemale.

### 3

#### *Allahle Kaliare Mokate Yo*

<sup>1</sup> Aka naei baeke naei, reyae huwamale hee Allahle Roh are weumi huluinye nekate ro miyae wanen ban, nebeibe nda kani kelana wali beko nibine orate ro miyae manemfa hele Wali Ondofolore hakowaunge yo wanen mare kelewamale. <sup>2</sup> Nime hele fa wayeufe naeisoyaimi wanen mae a na foma-foma kelewamale, rabuhine ban mayae Wali Ondofolole einye uwa ehenaiboi nekewaube nane merau namman nekeimeyaube. <sup>3</sup> Namman sele nda kani kelana wali beko nibine orate ro miyae wanen mai u mekai mokoimeyaube. Mai u nolo u kainye kena hensen kaubene nane merau aku haubene mai wali namman sele nda kani kelana wali beko nibine orate ro miyae huluinye nekaube. Mayae ro miyae hosoro wali ma yae nekaube. <sup>4</sup> Ro miyae hi yae elende, “Reyae Paulusre hakanale,” nane merau hi yae elende, “Reyae Apolosre hakanale.” Nebei u mekai yae kelaumi mayae namman Wali Ondofolole einye wali ehenaiboi ro miyae hosoro wali ma mo nekaube.

<sup>5</sup> Apolos nde? Reyae Paulus nde? Meyae Allahle yebaei bubaeise nekande, Allah yae ukeume hului uwayembe walora mayae Wali Ondofolore hila rabo halewaunge.

<sup>6</sup> Reyae mai nolone bolu moloukokale, Apolos yae bu heraeyende, nebeibe Allah yae kitenate naei elae yeumi. <sup>7</sup> Nebeinye molate yo bele bure heraeyaimi yo bele rabuhi ban. Allah mbai kitenate naeise elaere yeumi Kiyae na ro bele. <sup>8</sup> Moloi-moloi holona yo bele bu heraei-seraei holona yo bele u bene mbai harainyeboke nane merau na kaliare mokowate huluinye na roibu enaijaronde. <sup>9</sup> Mayae Allahle heke wanen nekaube. Mayae nane merau Allahle imae wanen nekaube. Meyae bee Allahle kaliare mokende yo mo.

<sup>10</sup> Imae haete isaeito hebaendo imae aehure na mekaijae mokole wanen, reyae Allah kena buhae aere ban mae hewoufe kiyae a uwoufe yae Wali Ondofolole a foi faeu foi mare huwamale. Nebei imae aehu reyae yae raufikale. Hiwa yo na randa anainyununde. Reyae aehure raufikale ranne hende ro miyae na hende ma foi yae erennekonde hele. <sup>11</sup> Rabuhine ban Yesus Wali Ondofolo Nembai sele nebei imae naei aehure yeuboke, ro hi miyae hi yae aehu hire eraise sului. <sup>12</sup> Yesus Wali Ondofolo aehure yeuboke, imae ainyuise hiwa yo emas yae ainyunuke, hiwa perak yae, permata yae, o yae, ke yae hun mae, <sup>13</sup> nebei ro miyae imaere ainyainyure kaimi rambun yoni-yoni Yesus Wali Ondofolo mende heene na yaka hele yakanabonde. Nebei kalia mokowate naei rambunde i yae umali hubanaimihinde. <sup>14</sup> Ro miyae mbai imaere aungunuke rambun i naumene beko eyeiboinya, nebei ro miyae na roibu endowende. <sup>15</sup> Nebei imaere aungunuke rambun yoni-yoni i naumene hukelembondena, nebei ro miyae kalobe hubainyekonde. Naei uwa hole molonnebonde, nebeibe na mekai ma ro miyae i faeu kaban nolora eufaeuboke wanen.

<sup>16</sup> Mayae maisaei sele mai uwa Allahle imae obe nane merau mai uwa einye Allahle Roh nekele! <sup>17</sup> Nebei aere ro miyae nde Allahle imae horombondena, Allah nebei ro miyaere beko mokommibonde, rabuhine ban Allahle imae obebe Naei rambun hele honole. Mai uwa bae Allahle imae obebe nekaube.

<sup>18</sup> Mai uware ame-ame ebennemae. Mai u nolo u kainya hi yae naei uware nda kani kelana wali beko nibine orate yo naei isaei hebaen bele elendena, neyae Allahle isaei

<sup>†</sup> 2:13 2:13 Homofae hena hiwa nda a ma molaikoke, “Allahle Roh yae weume are huwammi.” <sup>‡</sup> 2:16 2:16 Yesaya 40:13

hebaen bele yembonde naeise, naei foi sele nebei u bene ma wononde nda kani kelana wali beko nibine orate yo eraimi kobu ro miyaere yembonde. <sup>19</sup> Rabuhine ban nda kani kelana isaei hebaende Allah kobu yae ereunge. Allahle homofaene nda ma molaikeke, "Allah waeumihike nauwa isaei bele hebaen bele elate ro miyae nebei isaei hebaen mae nauware walangkabe woke."\* <sup>20</sup> Nane merau nda wanen homofaene molaikeke: "Nauwa isaei bele hebaen bele elate yo yae mearufe koloyainye u bene wa bene nana hesele nanemene fomene rabuhire eyeiboi naeise Tuhan Naeisael."† <sup>21</sup> Nebei aerene nda kani kelana isaei hebaende isaeyaeikeke yore hakaumilene, uwa ekaeijae hele. Wali Ondofolo bele mbainye nekaube yae nemene fomene mai rambunde yeuboke. <sup>22</sup> Paulus, Apolos, Petrus, nda kani kela, wali, here, nda hee nekande, bona ya honoifoyole hee, nanemene fomene mai bangka mo. <sup>23</sup> Mayae Wali Ondofolole Naeise yaeuboke, nane merau Wali Ondofolo Allahle Naeise yeuboke.

#### 4

<sup>1</sup> Nebeinye, Wali Ondofolole yebaei bubaeise nane merau Allah nunne heraweuboke honayeke mearufe raungehike are faeufe humamiyendere maei baka ranne raumehike yo yae maere eremmele. <sup>2</sup> Ya-ya mokate huluinye, a faeu baka ranne raungehike ro are ukeunge kiyaele a huluinye hakonde mokonde hele. <sup>3</sup> Mayae, hiwa yo yae, nane merau renaeijae, raei walire mehinin raisi naeise rabuhi ban mae eranale. <sup>4</sup> Raei kena une na ijen naeise weufe a, foi mo weufe, nebeibe raei u mekai foise reyae eleikoi sului. Tuhan mae raei walire mehinin ransehinde. <sup>5</sup> Nebeinye Tuhan mende ya namman mae, mayae ro miyae hiwa naei walire mehinin okolijae hele. Tuhan mende yane ouben nolone u mekai beko felaimiyeke honayeke yoni-yoni Neyae a yakane mokommibonde, nane merau kena u einye mearufe kolainyeke u mekai nebei sului yae harainyeke yoni-yoni Neyae memmiyakambonde. Nebei hee yae wa Allah ro miyae hiwa naei uwa emmikaende (hiwa ehee bukulu emmihayende).

<sup>6</sup> Aka naei baeke naei, mayae maei walira isaeyembombere homone molaikoke hului mo ebaraijae naeise, raei uwane bele Apolosle uwane bele kelewamale. Maei u mekai hele isaeyembombena, ro hi ro bele rowaime yae nekendere mayae erei. <sup>7</sup> Ro mbai sambai mare ro bele rowainyere erei! Mainya honayembe rambun yoni-yoni nemene Allah yae ikembene, na mekai ban sele nebei rambun yoni-yoni mai u wake yae relewaunge yarowaube wanen uwa kaeube!

<sup>8</sup> Mai u bene nekayembe hului yae meyae kani hine nekewande yae, mai roibu walora wande yaeuboke, eba he bele ondofolo kosere yaeuboke nekaubere a yekele-yekelebe kamale. Reyae kena kale meyae na hului maengkele mbainye ondofolo kose yae nekemale naeise, mayae na hele ondofolo kose yae nekaube. <sup>9</sup> Rabuhine ban reyae hubanale meyae Wali Ondofolole abu akore Allah mokoumebokene ro ban sele yaendeboke. Herenate hele a rukene honaibonde anuwaufe atere hiwa yo yae isane erainye wanen mae kun waunga erate yo nemene malaikat yoni-yoni bele ro miyae bele maere isane eraime. <sup>10</sup> Wali Ondofolole aerene meyae kobu ro miyae yae eraume, nebeibe mai u bene nekayembe Wali Ondofolole einya mayae isaei hebaen bele ro miyaebe nekaube! Meyae male u yambi u ro miyae, nebeibe mayae elae wake bele ro miyae yae hubaungele. Maeise naeise be hineyaube, nebeibe maere be ehineiboi. <sup>11</sup> Meke nda hee bele yae moni mai buki releimeyannele. Malo kalo moloimeyumele. Rahuae olaime nane merau nekei-nekei anuwau ban orande. <sup>12</sup> Raman ufei-ufese roi yae bu baeyande. Maere a beko waimere meyae a foi yae beisoyammi. Maere weitasi kaimere meyae kena yae heraweyandene na hibi Wali Ondofolole hila rabo haleyanne. <sup>13</sup> Ro miyae maei naeise a hufuu wae huwatere meyae a nime a haba yae beisoyammi. Meke nda hee bele meyae ro ban nane merau retara wanen mae baeime.

<sup>14</sup> Nda homona moloukokale nanemene mare fere mokorembombe naeise ban, nebeibe mayae kena buhaere haemale kelu omi wanenne a usaese ufengkombe naeise. <sup>15</sup> Naendae mekai horo Wali Ondofolole einye mare holaeyembe yo helen, nebeibe mayae ako helen ban. Wali Ondofolole a foi faeu foi reyae mare huwamalene, reyae mai akore yeubokale. <sup>16</sup> Nebeinye reyae a usaei yae moi huramale raei bune wane hamennele. <sup>17</sup> Nebei aerene raei kelu wanen buhaere haenale kiyae, Timotius, nane merau Tuhan weunge a huluinye mokonde kiyae mai bokore ukanale endere. Neyae ende mo mokonembe reyae Yesus Wali Ondofolo bele mbainye nekande wali ma mare benen isaeyembombe. Nebei wali ma mbai jemaat nemene fomene kelewamaele.

<sup>18</sup> Reyae isaeyebokale mai nolona ro miyae hiwa reyae benen mai bokore ebeisoi emei hului yae hubainyene, embei aiko bele kate. <sup>19</sup> Nebeibe Tuhan kena kongkondena,

\* 3:19 3:19 Ayub 5:13 † 3:20 3:20 Mazmur 94:11

reyae na heki ban sele mai bokore erele. Nebei hee yae wa nebei u maengkeufe kate yo naei a elatere reyaе isaeisebonde nane merau Allahle Roh yae elae ikeumi, eyei ererebonde. <sup>20</sup> Rabuhine ban ro miyae na hele Allahle me kelee u keleene nekatere ro miyae a elate walora ekelei, nebeibe naei kalia Allahle elae bele mokate walora kelenaimile. <sup>21</sup> Mai kena naendaе mekai yae kaube, mai bokore merele rahuae boi-boi ha bele, mare kena buhae herembene kena u nime haba yae u mekai mokorembere. Menae yae mo elengko!

## 5

### *Jemaatna Ro Mbai U Beko Mokole Naei A Usaei*

<sup>1</sup> Ro miyae mbemba yeufike huwate mai jemaat nolone ro mbai me u beko hele mokouboke, naekole miyae bele uwa mbainye honowote. Nebei u mekai na beko hele, Allahre oroiboi ro miyae nolone omokoyei ma, <sup>2</sup> nebeibe mayae namman ukaei kaeube! Na hele mai baka ranne honole mayae kena beko u beko kombe, nane merau nebei me u mokouboke ro mai jemaat u nolo u kaisa hukennehimbe enduwende. <sup>3</sup> Naendaе wanen horo nda hee reyaе mai u nolo u kainye enekeibe, nebeibe mai naeise u bene helen sele nekaise. Reyaе mangkele mbainye nekande wanen nebei rore me nokanale. <sup>4</sup> Mayae Tuhan Yesusle Ro yae jemaat riya mokombombe hee reyaе kelewamale are u bene nekenaisimbe nane merau aei Tuhan Yesusle elae hubanensimbe yane, <sup>5</sup> nebei rore beko hubannele naeise walobo yunde kinyennebombe. Nebei mekai yaere naei bekore kena haehae kole haraunge elaere beko yembonde, nane merau Yesus Wali Ondofolo bensonde mende hee nare hle molonnebonde.

<sup>6</sup> Mai jemaatna uware kaeube u mekai foi ban sele. Ragi kaei-kaei yae tepung kaban mokoiboyeunge ohuleiboyele wanen mae, u mekai beko mokole ro mbai mokonnebonde mai jemaat kabanbe beko yembonde. <sup>7-8</sup> U mekai beko ro miyae mai jemaat nolora hukennehimbe, ragi male womombe wanen. Nendahina Yahudi ro miyae Mesir kanira aibaleke heena Allah ukeumi naei ragi nemene imaera hekelenaikonde nane merau bena fa-fare ohoise domba kelu honate yae imae romaufe na ha yae rilembonde. Nebei domba wanen mae Wali Ondofolo aei aerene haiboke. Nebeinya, men, Neyae mokouboke aerene eyae Yesusle einye aka baeke aeise naeise u bene yolo-yolo nekenaimbe Wali Wali Ondofolole na hele wali nibire hakomale bele yae rei mai komale. Mayae bekore benate me u omokoiyae, nane merau u mekai beko omokoiyae.

<sup>9</sup> Moise wokandena homo moloukokale einye mare a usaei ukamale, yoko kaeimaere koyate ro miyae bele homo mbainye oroyeiyaе. <sup>10</sup> Nda kani kelana wali beko nibine orate ro miyae nanemene nebei a ma haraungebokale ban. Nebei ro miyae nda me u mokate: yoko kaeimae koyate, ro miyae naei rambunde kena haehae koyate ame-ame yae yarate, hoime bahere ei moloyaimi. Nda kani kelane nekaubene, nebei ro miyae nolone orombe hele. <sup>11</sup> Nebeibe raei mekai nda a mare haraungebokale wamale, ro miyae Wali Ondofolole eisa mai aka baeke yeubokere elelebe nebeibe yoko kaeimae kole, ro miyae naei rambunde kena haehae koyele, hoime bahere ei moloumi, ro miyae hiwa naeise a beko faeu beko huwele, keu bu mali kole, ame-ame bele, nebei u mekai bele ro miyae mangkele homo mbainye oroiyae, nane merau raman mbainye aneiyaе.

<sup>12</sup> Jemaat moinya ro miyae na walire hului koloremile naeise raei baka ranne ban, nebeibe jemaat nolona ro miyae na walire hului kolommile naeise mai baka ranne honole. <sup>13</sup> Jemaat moinye ro miyaere Allah yae me emminononde. Nebeibe Allahle homofaene nda mekai molaiyoke, "Ro miyae u mekai bekore mokate yore mai u nolo u kaisa hukemmile!"\*

## 6

### *Jemaat Nolona Aku Nau Hatere Hiyei Raneiboi Naei A Usaei*

<sup>1</sup> Foi ban sele hila rabo mbainye halaеube yo mai u nolo u kainye ro hi yae naka baеkele aku nau hotena, nebei aku nau hote huluisе kolonaimikonde naeise wali ehimaloiboi yo naei bere eyewote, Yesus Naei eleuboke wekeumi yo bokore eyei. <sup>2</sup> Mayae maisaei sele, ya mbai Yesus Naei eleuboke wekeumi yo yae nda kani kelana yo naei walire hului kolonaimile. Nda kani kelana yo naei walire hului kolonaimile naeise mai me einye honatene, na yaka hele mayae na hului mai u nolo u kainya aku nau haubere menaeiyaе hiyei ranembombe. <sup>3</sup> Mayae maisaei sele, malaikati yoni-yonire eyae hului emamikolondene, nda kani kelane wali nekande u nolo u kainya baete yoni-yoni na hului foi yae hiyei ranemembe. <sup>4</sup> Nebei aerene jemaat u nolo u kainye u mekai wa mekai hiyei raneboise, walire hului kolonaimile naeise mai jemaatna yore elembombe,

\* 5:13 5:13 Ulangan 17:7, 19:19

erabae naei hila rabo elae ban. <sup>5</sup> Mare fe mokorembombe naeise, nebei a usaei wamale. Nauwae, aku nau haube are hiyei raneiboise mangkele hila rabo mbainye halaeube yo u nolo u kainye isaei hebaen bele ma yae u mekai haraungeboke ro mbai u hele nekaubene. <sup>6</sup> Nda hee mangkele hila rabo mbainye halaeube yo u nolo u kainye ro miyae bee aku nau honetena, Wali Ondofolore hila rabo ehalei yo na bene hiyei raneiboyaimi. Nebei mekai ban!

<sup>7</sup> Mai jemaat u nolo u kainye hi yae hi bele aku nau hote hiyei raneiboise jemaat moinya ro miyae bokore enete walora mayae kelaeumi Allahle Roh wembe huluinye enekei. Na foi sele mai aka baeke beko mokonembombe hee, ame-ame yae mai rambunde yarongkonde hee, kenabe herawembombe foi yae nekembe. <sup>8</sup> Nebeibe mayae ame-ame yae rambun yaraube nane merau u mekai beko mokaumi, mangkele hila rabo mbainye halaeube aka baekebere bele mokaumi.

<sup>9-10</sup> Mayae maisaei sele Allahle me kelee u keleena ro miyae foi hubanainyende rambunde u mekai bekore mokate ro miyae yae ehubaikoi sului. Mare ame-amebe wabenayensimbe bele, nda a wamalere borombe, nda u mekai ma ro miyae nanemene Allahle me kelee u keleene nekate ro miyae foi hubanainyende rambunde ehubaikoi sului: ro miyae yoko kaeimaere koyate, hoime bahere ei moloyaimile yo, ro miyae bele miyae ro bele mbainye hononate yo, ro akobae bele miyae akobae bele uwa mbainye honate yo, yokoyo, ro miyae naei rambunde kena haehae koyate yo, keu bu mali yo, ro miyae hiwa naeise a beko faeu beko huwate yo, ame-ame yae rambunde yarate yo. <sup>11</sup> Mai nolona hiwa yo na bere nebei u mekai wanen wali nekewaube. Nebeibe nda hee mayae nulu kembokembe naeise kelemmikombere bu yae kookokembe, nane merau Allahre kena foise mokonnele u mekai ma mokongkokembe, nane merau Allah yae ro miyae wali himalainyeboke yo yae mare me baeumbokembe.

#### *Uwa Bekobe Mokonnebombe Bele Naei A Usaei*

<sup>12</sup> Reyae Musale walora wali heere folaikoke a huluinye ehee bukulu hayemmera me ruboubokanale. Nebeibe rambun hiwa raei foi naeise ban. Rambun hi naei yebaei bubaeise yae nekerele naeise reyae ewaeisi. <sup>13</sup> Raman yarele foi naeise nane merau yarele raman foi naeise, nebeibe na beene beene Allah beko emmimokombonde. Aei uwa yoko kaeimae koi-koi naei ban. Naeinya hesele aei uwa Tuhande kena foise mokomanende naeise, nane merau Tuhan mae aei uware hole molonnebonde naeise. <sup>14</sup> Allah Naei elae yae Tuhande mo ban nulu yo mahe yora waleungeboke, nebeibe Neyae aei uware bele walemmebonde. <sup>15</sup> Mayae maisaei sele mai uwa Wali Ondofolo Naei melen bai holona yaeuboke. Nebeinye Wali Ondofolo Naei melen bai mbai uwa naise heyate maengke bele uwa mbainye ohonoijae hele! <sup>16</sup> Mayae maisaei sele ro mbai uwa naise heyate maengke bele uwa mbainye hononetena, nebei bee mbaise yeiboke. Rabuhine ban Allah homofaene nda mekai moloukoke, "Ro miyae bele uwa mbainye hononetera, mbai yae inyeibonde ((naei kena u aweneikonde))."\* <sup>17</sup> Nebeibe ro miyae Tuhan bele mbainye yeiboke kiyae, Tuhanbe kena u mbainye inyeibonde.

<sup>18</sup> Reyae mare wamale yoko kaeimae koi-koisa mai uwa wemembe. U mekai beko yoni-yoni hiwa, mokole kiyaele uwa moise mokoungue. Nebeibe yoko kaeimae kole kiyae u mekai beko naei uware mokoungue. <sup>19</sup> Mayae maisaei sele mai uwa Allahle Roh yae nekele anuwau. Nebei Roh Allah Nenaiejae mare ikembe. Mai uwa mai naei ban, nebei uwa Allahle naei. <sup>20</sup> Allah yae Yesusle ha yae mare yarongkokembe. Nebeinye mai uwa kaban mae Allahre hubara haeise yanennembe.

## 7

#### *Ro Miyaere Inyeibonde Naei A Usaei*

<sup>1</sup> Raei kena kale mainya homo ikaumile raei bokore roukate mekate einye molaukokene hinaufike are nda hee yae a ufembere. Ro mbai miyae erowej yae nekele naeise reyae foi yae hubanale. <sup>2</sup> Nebeibe yoko kaeimae yae wabenensimbene embalembe belene, naei foi sele ro miyae yaronate miyae rore enate. <sup>3</sup> Kewa ran yumake ranne u mbainye eitelebobe naei, ro yae naei miyaere boronnebonde nane merau miyae yae naei molore boronnebonde. Maise naeise na mekai yae hi yae hire mokonnebonde. <sup>4</sup> Rore miyaere yeubokene, miyae yae naei uwa kabande naei yae mo elei sului, nane merau na molole yae elende. Nebei sului mbai ro yae naei uwa kabande naei yae mo elei sului, nane merau na miyaale yae elende. <sup>5</sup> Nebeinye kewa ran yumake rande mbainye ma waere-waere okojae. Mon rowembe ebeli bonnembe aerene mo maise naeise uwa mbainye ohono naeise fonnekobe hee naei a merau rannehibe, a mbai elekobe. Nebeisa

\* 6:16 6:16 Kejadian 2:24

mayae u mekai bekore hun raisise elae banne walobo yunbe a yukaei yae wabenembe belene, bukebobe uwa mbainye ennekebe. <sup>6</sup> Mayae ro miyae yarombe naeise miyae rore embe naeise abe mayae mokombe naeibe, reyae wamale ban. Nebei naeise mai kenane heubokene, nda homone reyae a usaei lonbe wamale. <sup>7</sup> Raei kena kale naei foi sele reyae miyae an nekale wanan nanemene yembombe. Nebei meli mekai Allah yae maise naeise wahewombe, hiwa yo naei meli mekai yae haraumiboke ro bele miyae bele inyeibonde naei, hiwa yo miyae an mae nekenaikonde naeise ikeumi.

<sup>8</sup> Mayae miyae an bele ro ei nekaube yo bele rora molaukoke miyae nannale nekaube yo bele nda a usaei ma yae haraungebokale wamale, nda hee nekaube ma raeinya wanan nekale ma foi bele. <sup>9</sup> Nebeibe ro miyae rowende naeise miyae rore ende naeise kena eheraweiboi kombena, na foi sele ro miyae rowele miyae rore ele. Ro miyae bele uwa mbainye honete kena rowenensimbena, kena eheraweiboi kombe belene, naei foi sele ro bele miyae bele yengkombe.

<sup>10</sup> Rore miyaere yeiboke yore nda a raeinya ban, Tuhan Nenaiejae nda a mekai eleukoke, Miyae mbai na molore enukeijae hele. <sup>11</sup> Nebei miyae na molore nukennebondena, na ro ban mae mo nekenende hele. Ro ban wali mare ahi nebei miyae na molo nukeungeboke bokore benen bensonde hele. Ro holona mai miyae wa eneisijae hele.

<sup>12</sup> Hiwa yore nda a reyae yae wamale Tuhan mae ban, mayae Wali Ondofolo oroiboi heene ro mbai Yesusre hila rabo ehalei holona maengkere rouke, nebei maengke yae kena kole rore miyaere yeibokere wali mbainye nekenetere kondena, rouke ro nebei miyaere eneisijae hele. <sup>13</sup> Nane merau miyae mbai Yesusre hila rabo ehalei holona rore eke, nebei ro yae kena kole wali mbai nekenetere kondena, nebei miyae na molore eneisijae hele. <sup>14</sup> Rabuhine ban Yesusre hila rabo ehalei ro na miyaele walora Allah kena foise mokonnele u mekai yae nekende. Yesusre hila rabo ehalei miyae na molole walora Allah kena foise mokonnele u mekai yae nekende. Nebei mekai banna, na fa-fa Allah oroiboi yo yae nekenate, nebeibe naeko, nenakele walora na fa-fa Allah eleuboke wekeumi holona yore yaeiboke.

<sup>15</sup> Yesusre hila rabo ehalei ro nekeube miyae rokae bele here ungeterena, waennehimbe, a hun okoloiyae. Nebei benatena, mayae uwa wemembe. Kena foi u foi yae nekemalere Allah yae kaeneumekoke. <sup>16</sup> Tuhande hila rabore halaeunge miyae holona mai molo wa yawemmibombe Wali Ondofolore hila rabo halenainyele, ehalei naeise mayae isianne. Nebei sului mbai Tuhande hila rabo halaeunge ro holona mai miyae wa yawemmibombe Wali Ondofolore hila rabo halenainyele, ehalei naeise mayae isianne.

#### *Anuwau Bele Naei A Usaei*

<sup>17</sup> Allah kaenewombe heena nekewaube wali ma maise naeise na hibi mo harannele nekembe. Nda a ma yae jemaat nemene mokonatere ukamaele. <sup>18</sup> Ro mbai Yahudi naei era hena huluinye ro uwa elan nainyehake hee yae Allah kaeneungekokena, nebei naei u bene mahi-mahi enekeijae. Nane merau Yahudi naei era hena huluinye ro uwa elan eneisai yae kaeneungekokena, nebei era hena omokoi yae nekende. <sup>19</sup> Ro uwa elan nenainyehande bele eneisai bele rabuhire eyeiboi. Mere baemmile u mekai Allah weumi a huluinye hakombonde mokonde niyae. <sup>20</sup> Ro miyae Allah kaeneumikoke heena mokowate kalia ma huluinye mokonate. <sup>21</sup> Yebaei bubaeinye nekewoyae hee yae ware kaenekokete, nebei karo yae, nebei naeise u bene ehayejiae. Nebeibe rowa ban wali ma na hului nekelerena, rowa ban ma nekei. <sup>22</sup> Rabuhine ban yebaei bubaei mbai Wali Ondofolo kaeneungekoke heene, nebei kiyae Musale walora wali heere foloukoke huluinye ehee bukulu hayemmikondera me roubungeboke. Nebei sului mbai yebaei bubaei ban mae Wali Ondofolo kaeneungekoke heene nebei kiyae Wali Ondofolo Naei yebaei bubaei holonare yeuboke. <sup>23</sup> Allah mare Wali Ondofolole ha yae yaroungkokembene, nebeinye nda kani kelana ro miyae naei yebaei bubaeise eyeiboiyae. <sup>24</sup> Aka naei baeke naei, Allah bele mbainye nekaubene, Allah mare kaenengkokembe hee nebei wali nekewaube ma yae na hibi nekembe.

#### *Paulus Benen Ro Miyaere Yeiboke A Usaei Barauboke*

<sup>25</sup> Miyae maengke yeke rore ei nekate yo naeise Tuhan mae rare ewei. Nebeibe Tuhan Na yanekoi yase yae rare ei haweufene, reyae Naei weufe are hakoyanale ro yae raei u benene nekaise a hului yae ufembere. <sup>26</sup> Nda heena wali beko yoni-yoni nekeunge relannelene, reyae hubanale naei foi sele ro ban nekaube ma yae mo wali nekembe. <sup>27</sup> Miyae yaraokoke yo mai miyae wa huremmile naei u bene enekeijae nane merau eyaroikoi yo miyaere ebaejiae. <sup>28</sup> Nebeibe mayae miyaere yaromberena, nebei beko ban, nane merau maengke yeke rore enderena, nebei beko ban. Nebeibe miyae bele yo ro bele yo kena beko mokoung rambun yoni-yoni helen hubanainyele. Raei kena kale nebei beko yoni-yonira wemembe.



<sup>29</sup> Aka naei baeke naei, raei mekai ma nda mekaise haraungebokale, aei wali nekemale mon na fofu hele. Nebeinye, miyae bele yo miyae ban wali ma yae nekembe. <sup>30</sup> Kena beko u beko yo bele, kena roweisiyaimi yo bele kena nendon ma yae nekembe. Rambun roi yae yarate yo, nebei rambun na hibi naei rambun ban ma yae nekembe. <sup>31</sup> Nda kani kelana rambunde mokate yo, nebei rambun rabuhire eyeiboi wali ma yae nekembe. Rabuhine ban kani kela nda heena honole ma na heki ban mo ennundembonde.

<sup>32</sup> Reyae kena kale mayae buhae ohokoi wali ma yae nekembe. Miyae an yo na u bene wa bene Tuhanbe kalia naei mo einyekewainye, rabuhine ban neyae kena kole Tuhan kena foise mokonnelere. <sup>33</sup> Nebeibe miyae bele yo nda kani kelana rambun yoni-yonire u bene einyekewainye, rabuhine ban neyae kena kole na miyaere kena foi mokonnebondere. <sup>34</sup> Nebei ro na u bene wa bene beere waheikoyole. Nebei sului mbai miyae ro ban bele yo miyae maengke yele bele Tuhanbe kalia na u bene wa bene eleman sele weyele, rabuhine ban neyae kena kate na wali nanemene Wali Ondofolo nangkele mbainye nekenatere. Nebeibe miyae ro bele yo nda kani kelana rambunde u bene inyekewainye, rabuhine ban nebei miyae na molore kena foise mokonnebondere u bene eisayewoungene. <sup>35</sup> Reyae moloukokale a usaei nanemene mai foi naei. Mayae miyae eyaroi naei rore ei naei a hunbe kolamale ban. Reyae kena kale u mekai ijen mae nekembe nane merau Tuhan kenare kole kaliare mo mokomembe.

<sup>36</sup> Nebeibe ro mbai miyaere rowendere a hokaikokena, nebei maengke kena kaban rowenderene na mekai ban nekele nane merau na ralo yakama helen baraiyobolena, naei foi sele nebei maengke rowende. Nebei u mekai mokouboke beko ban. <sup>37</sup> Nebeibe ro mbai na kenara hokoukoke miyae an mo nekenderena, nane merau miyaere rowendere kena kaban okoi nebeibe na hului na kena herawembondena, nebei u mekai foibe mokouboke. <sup>38</sup> Nebeinye miyaere roke kiyae nebei u mekai foibe mokouboke nane merau miyae an nekele kiyae nebei u mekai na foi sele mokouboke.

<sup>39</sup> Miyae ro bele nekete kiyae na molo namman wali nekendena, nebei miyae na molo bele uwa mbai. Na molo herendena, nebei miyae na hului benen kenare konnele rone enelensonde, nebei ro Yesusre hila rabo halaeinye holonare yeuboke hele. <sup>40</sup> Reyae hubanale na foi sele nebei miyae benen rore ei yae nekenende, nane merau raei benera nekeufe Allahle Roh rare bele aufeboke.

## 8

### *Hoime Bahere Hili Era Akau Era Ongkou Felate Raman Anate Naei A Usaei*

<sup>1</sup> Mana reyaere hoime bahere hili era akau era wanende kinyeuboke raman naeise isaiesembondere. Nebei raman anate naeise eyae nemene isaei hebaen bele ro miyaere hubanne. Nauwa isaei hebaen bele erate ro miyae embeise aiko kate, nebeibe ro miyaere kena buhae haemi ro miyae nebei haemi ro miyaere na hila rabo amminunde. <sup>2</sup> Ro miyae nauware isaei hebaen bele elate yo, wali nekete naeise rambun helen na mekai yae isaeyeiboi. <sup>3</sup> Nebeibe Allahre kena buhaere haeyinye ro miyaere Allah isaeyeuboke nebei yo Naei holona.

<sup>4</sup> Nebeinya, reyaere hoime bahere hili era akau erare kinyainyeboke raman anate naeise nda a wamale, eyae aisaesai nekande hoime bahe yoni-yoni rabuhi ban ma nane merau Allah mbai ken sele. <sup>5</sup> Na hele yaku bumana nda kani kelana Allah yae, tuhan mae kaenaimi yoni-yoni helen bolen. <sup>6</sup> Nebeibe aei naeise Allah mbai ken. Neyae aei Ako, nda kani kela bele rambun neinya belere nuleungekoke Kiyae, Naei aerene eyae wali nekande. Nane merau aei naeise Tuhan mbai sele Yesus Wali Ondofolo Niyae. Naei walora rambun nemene mokowole nane merau Naei walora eyae wali nekande.

<sup>7</sup> Nebei Allahle naei are ro miyae nanemene isaeyeiboi. Na bere neyae nebei hoime bahere ei molaimiyeke aerene nda hee bele hili era akau erare kinyainyeboke ramande anenaikondena, na kena u einye na ijende naeise weunge a elae banne, beko mokaikoke wanen hubanainyele. <sup>8</sup> Naeinya hesele Allahre kena foise mokomande nibi raman mae walore eyeiboi. Anemakonde aneikoi nekemale aei uware foi naei, beko naeise omokoiboi.

<sup>9</sup> Nebeibe hoime bahere hili era akau erare kinyaiiboke raman anele yae mokommile hila rabo elae ban yore oro halunbe woumiyonde bele, buhae-buhae kombe. <sup>10</sup> Kena une na ijen naeise weunge a elae ban holona ro mbai weyae Wali Ondofolole wali nibi are isaeyeubokae rore erenete hoime bahere eise molaimi imaene aneyaene, nebei ro be rabulembonde na kena buhae-buhae yae konde nebei raman rowende anengkonde. <sup>11</sup> Waei isaei hebaen mae aka baeke hila rabo elae ban ro Yesus Wali Ondofolo naei aerene hereke kiyaele kena u naei ijen elele are asasi koukoke. <sup>12</sup> Nebei u mekai yae Wali

Ondofolole eisa aka baekere mokommile na kena une na ijen naeise weunge elae ban are asasi konatena, mayae Wali Ondofolo ro be ro yoinye u mekai bekobe mokombombe.

<sup>13</sup> Nebeinye reyaе anale raman mokoremibonde raei Wali Ondofolole einya aka baekere benen u mekai beko mokorembondena, benen oro halunbe reyaе ufenonde belene, reyaе benen walobore hili era akau erare kinyaiboke melen anei nekerele.

## 9

### *Wali Ondofolole Abu Ako Wali Ma Naei A*

<sup>1</sup> Reyaе Musale walora wali heere foloukoke huluinye ehee bukulu hayemmera me ruboufeboke. Yesus Wali Ondofolo naei abu akore yeubokale, Yesus aei Tuhande raei ijoko yae ereubokale. Raei kalia mokowanalera mayae Wali Ondofolore hila rabo halaeunge. <sup>2</sup> Naendae wanen horo ro miyae hiwa raei a nda wanen huwate, “Neyae Wali Ondofolole abu ako ban,” nebeibe mai bene reyaе abu ako hele. Reyaе huwamalera mayae Wali Ondofolore hila rabo halaeunge walora kelaeumi reyaе na hele Tuhambe abu akore yeubokale.

<sup>3</sup> Raei walire hului kolaisele ro miyaere nda a yae ufemile, <sup>4</sup> meyaе na hului raman bu anemale, <sup>5</sup> nane merau Wali Ondofolole abu ako hiwa bele Kefas bele Yesus naka baeke wa bele wanen Yesusre hila rabo haleunge miyae nangkele mbainye kolore orate wanen, meyaе na hului miyae bele oromale. <sup>6</sup> Rangkele Barnabasle na hului maei wali rambunde mai me eisa riyahinde, maei roibura mo ban yarakonde.

<sup>7</sup> Felayo nemene ro hi naei roibu yae wali rambun yennele wali ma buloo fela relaeinye. Anggur heke ro nemene bolure moloukokeranggur ani anate, nane merau kambang naei nime yobate yo nemene nebei kambang nime anate. <sup>8</sup> Reyaе ro miyae naei u bene a faeu huluinye mo eleikoi. Musale walora wali heere folaikoke homofaene nane merau a mbainye moloukoke. <sup>9</sup> Nebei homofaene nda a mekai moloukoke, “Lembu gandum ranne haungeboke oro yae alende hee, gandum ko rabingkaera balenate erendene kena kongkonde anenderena, neuwa ahuneijae”<sup>\*</sup> Lembure mo hole molommilere Allah nda a eleikoi. <sup>10</sup> Aei naeise Allah nebei a haraungeboke eleukoke, rabuhine ban na mekai sele moloi-moloise molate ro miyae nane merau anire malunate ro miyae rabo elae halenainyele nebei kaliara ani naei kayee yaronate. <sup>11</sup> Meyaе mai wali einye Allahle Roh naei ohaka meleme kolandebokene, na mekai sele maei wali rambunde mai me eisa yaromale. <sup>12</sup> Mayae ro miyae hiwa mai nolone kalia mokate yore wali rambunde yemmilene, na mekai sele mayae kena faere-faere yae maere yemmelere.

Naendae wanen hororebe ya-yana wali hului yae meyaе na hului wali rambunde mare riyemdale, meyaе eriyei yae nekande. Yesus Wali Ondofolole a foi faeu foi huweyaterere hun ramamihinde belene, maei kena kande nebei rambun yoni-yoni maei roibu yae yaromale. <sup>13</sup> Mayae maisaei sele, Allahle imae na kaban sele kiyae na einye kalia mokate yo nebei imae einya raman mae wali nekenate, nane merau Allahle hili era akau erare ongkou wae felainye anuwaunge kalia mokate yo nebei anuwaunga raman mae na wali nekenate. <sup>14</sup> Nebei sului mbai Tuhan a hokoukoke, Wali Ondofolole a foi faeu foi huwenayende ro miyae nebei a foi faeu foi hakonate ro miyae wali rambun inyaimile yae na walire nekenate.

<sup>15</sup> Nebeibe reyaе roko mbai raei wali rambunde mara eriyei nekale, nane merau nda homo moloukokalene nda hee yae mayae nebei rambun rare yensekombe naeise eharaboi omolokoi. Naei foi sele reyaе herele, raei wali rambunde mayae eyei yae mai nolone kalia mokate aerene uware ekaei. <sup>16</sup> Nebeibe Wali Ondofolole a foi faeu foi huwamalene rauwae ekaei sului, rabuhine ban nebei a foi faeu foi huwamaele naeise Allah yae raei baka ranne kinyeufebokene. Nebei a foi faeu foi ehuweinya, raei uwaube kabeukokale ensewonde. <sup>17</sup> Raei kenare kale huluinye nebei a foi faeu foi hufemilena, raei roibu nebei kalia mokorele walora hobensekonde. Reyaе kenara okoi hului nebei a foi faeu foi hufemilena, Allah nebei kaliare raei baka ranne kinyeufeboke huluinya mo mokorele. <sup>18</sup> Naendae wanen mae raei roibu hobensekonde? Nda niyae: reyaе na hului Wali Ondofolole a foi faeu foi wali rambunde mara eriyei yae hufemile, erabae huwamaele ro yae reyaе na hului wali rambunde riyerensimbe.

<sup>19</sup> Reyaе wali rambunde riyerensimbe me ruboufeboke nane merau hiwa yo naei yebaei bubaei enekeyei hororebe, ro miyae helen sele yaweremibonde Wali Ondofolore hila rabo halenainyele naeise, reyaе ro miyae nanemene naei yebaei bubaeise yae nekale. <sup>20</sup> Yahudi ro miyae Wali Ondofolore hila rabo halenainyele yaweremibonde menate naeise, reyaе Yahudi ro miyae yae nekale. Musale walora wali heere

\* 9:9 9:9 Ulangan 25:4

folaikoke me kelee u keleene nekate ro miyae Wali Ondofolore hila rabo halenainyelere yaweremibonde menate naeise, reyaе nebei a honatere hubara haеisa yanate ro miyae yae nekale, erabae nebei are me ruboufeboke. <sup>21</sup> Musale walora wali heere folaikokere ehakoiboi ro miyae Wali Ondofolore hila rabo halenainyelere yaweremibonde menate naeise, naei nolone reyaе nebei yo yae nekale. Na hele Allahle wali heere foloukoke na me kelee u keleene namman nekale, rabuhine ban raei wali Yesuс weufe a huluinye nekale. <sup>22</sup> Hila rabo elae ban yo reyaе na hului Wali Ondofolole a weumi huluinye nekenatere yaweremibonde menate naeise, naei u nolo u kainye nebei yo yae nekale. Nibi rahe ma eneharabole hiwa yore hole moloremibonde naeise, ro miyae nanemene na nekate wali ma yae eisaraiboyanae. <sup>23</sup> Wali Ondofolore hila rabo halaete ro miyae hubainye foi yoni-yonire rangkele hubarende naeise, Wali Ondofololena a foi faeu foi arene wali mahi-mahi yae nekale.

<sup>24</sup> Mayae maisai sele orore habelenate heene, nebei eyewate yo nanemene hakoikoyate nebeibe mbai kende na roibu hobenainyekonde. Nebeinye waei be haraungebonde roibure hobenayeubote ma yae hakaubonde. <sup>25</sup> Holoka konate yo elae bele relenainyekonde naeise, kena heraungaibonde yae uware elae mokonaimile. Ro miyae na hului bekore yembonde me buhaе yaronaikonde naeise, nebei u mekai mokoiboyate. Nebeibe eyae me buhaе bekore eyeiboi sului yaromakonde naeise, elae yae relaennele. <sup>26</sup> Nebeinye reyaе anuwau mbaise be haraungebokale habelale. Me rulu holokare kate wanen nondon ban reyaе oboi. <sup>27</sup> Reyaе ro miyaere Wali Ondofolole a foi faeu foise hufemile baensonde heene, reyaе me buhaе na hului yae roufele naeise raei uware elae relaenale haranale raei kena foise kale huluinye mokorele.

## 10

### *Hoime Bahe Naeise Angkaa Yoboumiboke*

<sup>1</sup> Aka naei baeke naei, nendahina aei yobe naei Mesir kanira aibaleke heena bewatere reyaе benen mare isaеisembombere. Nebei yo nanemene Allah nekewole mangko keleene orowate nane merau Allah yae bumoko wekeunge nolora oro yae faeimaеiboke. <sup>2</sup> Nda hee ro miyae bu koumi iwau yae kelaеimi Wali Ondofolo naei yunde hebele wanen, mangko iwau bele bumoko iwau bele keleimiboke Allah yae eleuboke Musa nebei ro miyae naei yunde hebende. <sup>3</sup> Nebei Mesir kanira aibaleke yo nanemene Allah yae iwoumi raman mbai yae anewate. <sup>4</sup> Nane merau nanemene Allah iwoumi bu mbai yae anewate. Nebei Allah iwoumi bu rukara rilewole. Neuwa Allah iwoumi rukara bu anewate wanen, na kena u rukara anewate. Nebei ruka mbai Wali Ondofolo. <sup>5</sup> Allah nare raman bele bu bele iwoumi hororebe, nebei ro miyae a mulun-mulun bele elewate. Nebei ro miyae helen na here no a kala-kalane heraеyaiboke honowate, rabuhine ban Allahle kena foise omokoinye. <sup>6</sup> Eyae isaemabonde nebei yo rambun beko kenabe yobaimikoke wanen aei kenabe yobommabonde belere, nebei rambun bewate. <sup>7</sup> Nane merau nebei yo yae hoime bahere Allah wanen ei molowaimi wanen mae omoloiјae. Nebei yo naeise nda wanen molaikoke, "Nebei yo kaban yan kaban raiboke, raman bu anaikokera ainyuke Allah kena ikelere mokainye me u kowate."\* <sup>8</sup> Nebei heene hiwa yo yoko kaeimae kowatene, ya mbai mo 23.000 ro miyae naei nolora heraiboke. Mayae yoko kaeimae okommae! <sup>9</sup> Nane merau nebei hee hiwa yo iwoumi ramande kena ban elewate yae Tuhande umali hubainyehikene, rami yae akewate herewate. Mayae Tuhande umali ehubbannemaе! <sup>10</sup> Nane merau nebei heena Allah foi mokowoumibe nebeibe hiwa yo a mulun-mulun bele elewatene, malaikat yae nebei yore houkoke. Mayae a mulun-mulun bele elemmae!

<sup>11</sup> Aei yobe u mekai beko mokowate wanen mbai eyae mokomale belene, nda yo naei uwane bewate yoni-yoni nanemene isaеimabonde naeise homone molaikoke. Eyae Allah meraufe raungehike huba mokoikoi yane wali nekande yo. <sup>12</sup> Nebeinye, u mekai beko yae wabenembe embalembe bele, hila rabo elae halaеube yae elaube ro miyae uwa kayaa bele yae hebembe. <sup>13</sup> U bene nekenayembe, mai wali einye wabenembe u mekai beko nemene ninae ro miyae hiware wabaimihike. Nane merau Allah Naei elele a huluinye mokole Kiyae. U mekai beko wabenengkombe yoni-yoni yae mai hila rabo beko mokonainyebonde naeise Allah ewaeisi. Nebei u mekai beko wabenensimbe hee omokoi naei nibi alonensambere Allah yae inyembe.

<sup>14</sup> Nebei arene, reyaе kena buhaere haemale aka baeke, hoime bahere Allah wanen mae ei omolommimae. <sup>15</sup> Nda a wamalere mayae isaеi bele hebaen bele ro miyae wanen mae ame-ame naei, na hele naei menaeijae hubannekombe. <sup>16</sup> Jemaatne roko yae roko yae kolaеi anggur bu bele yaroikoyande Allahre helen foi wannelera aneisiyande nane

\* 10:7 10:7 Keluaran 32:6

merau feu kayande aneikoyande. Eyae Nare hila rabo halaenne ro miyae aerene Yesus na ha rileungebokere helen foi umande naeise, nebei anggur bu anemale. Nebei feu anemakondene eyae Yesus bele mbainye nekande naeise wo kande. <sup>17</sup> Feu mbai ken selera eyae helen mae aneikoyande. Eyae uwa mbai yaendekoke, rabuhine ban eyae feu mbaisa nanemene anandekoke wanan ro mbai Yesus weume a huluinye nekande.

<sup>18</sup> Yahudi ro miyaere ijoko erem. Allahre hili era akau erare itukai rande ongkou felate raman anate ro miyae Allahre ei molainye. <sup>19</sup> Hoime bahere ei molowainye rambun bele nebei hoime bahe bele Allah wanan naei a reyae wamale ban. Na hului ban sele! <sup>20</sup> Allahre oroiboi ro miyae walobore ei moloiboise hili era akau era ongkou felaimi, Allahre ei molainye ban. Mayae walobo bele mbainye nekembe naeise, reyae kena ban sele. <sup>21</sup> Mayae Tuhan bena bele walobolena bele raman bele bu bele yembe bu anengkombe aneismbe wanan na kulun mbainye, Neyae wembe a huluinye enekei sului. <sup>22</sup> Nebei wali ma nekemalere relemakondena, Allah kena hensan konde. Allahle elaere eyae ehameikoi suluinye, na foi sele Naei kenare kole huluinye nekemala.

<sup>23</sup> Nda hee eyae Musale walora wali heere foloukoke a hului ehee bukulu hayemmera me ruboumeboke, nebeibe eyae kena kandere haraime yoni-yni nanemene foi ban nane merau aei Wali Ondofolole eisa aei aka baeke naei hila rabore ainuyi. <sup>24</sup> Hi yae ha yae naei uwa mbai naei foise mo oleijae. Hiwa yo naei foise bele olende.

<sup>25</sup> Obo yoku melen naise haete anuwaunga yae yarombene, walobore hili era akau erare mokainyeboke omokoiboi naei a ehineijae. <sup>26</sup> Rabuhine ban Allahle homofaene nda wanan molaikoke, "Nda kani kela einye rambun yoni-yni Tuhan Naei bangka mo."<sup>†</sup>

<sup>27</sup> Wali Ondofolore hila rabo ehalei holona ro yae raman mbainye anekobere rinyeisitena, waei kena koyaena, koloikokete raman nendon anele. Waei kena une na ijen naei wete a beko ungete belene, nebei ramande mekate nibi ehinei ebaeijae. <sup>28</sup> Nebeibe ro mbai yae ware ungete, "Nebei raman walobore hili era akau erare ongkou felainyebokera yaraikoke mekate," are ukete ro foi naeise, nane merau kena u na ijen naei weunge a hole moloungebonde naeise, nebei raman aneijae. <sup>29</sup> Raei wamale kena u na ijen naei wete a waei ban nebeibe are wete kiyaele naei. Musale walora wali heere foloukoke a huluinye ehee bukulu hayemmera me ruboufeboke, hiwa yo naei kena u na ijen naei weumi a yae raei walire hului okoloi sului. <sup>30</sup> Raman yoni-yni Allahre helen foi bele yae wanale anale lonbe, na mekai ban sele ro miyae hiwa nebei raman analene aukaka kaise.

<sup>31</sup> Nebeinye mayae raman bu anembe ma, me u nanemene mai u mekai wa mekai harannele mokombe ma, Allahre hili hebennele naeise mokombombe. <sup>32</sup> Yahudi ro miyae bele, Yunani ro miyae bele, Allahle jemaatna ro miyae bele, mai wali ma erenayembene oro halunbe wommiyonde bele, mai wali na mekai yae nekembe. <sup>33</sup> Ro miyae nanemene na hibi-hibi naei kena foise reyae relaenale wali ma bune wane hamenengkombe. Nebei yore hole molommibonde naeise, naei foise baele, raei foise ebaei.

## 11

<sup>1</sup> Raei u mekai wa mekai bune wane hamennele, reyae Wali Ondofolole u mekai wa mekai bune wane hamanale wanan.

*Allahre Ei Molainye Hee Yae Yunde Hirate Malo Naei A*

<sup>2</sup> Reyae mare buma kaemale, rabuhine ban raei uwa naei na hibi-hibi bene nekeyayembe nane merau raeinya a usaei yoni-yni kelewamale huluinye nekaube.

<sup>3</sup> Nda hee reyae kena kale nda wamale are mare isaeisembombere, ro yoni-yni mai yun Wali Ondofolo, miyae yoni-yni mai yun mai molo wa, nane merau Wali Ondofolole yun Allah. <sup>4</sup> Ro yoni-yni ebeli boi-boi hee nane merau Allah weunge a huwemmile hee, yun felei belena, nebei ro naei yunde febe mokoungue.\* <sup>5</sup> Nebeibe miyae yoni-yni ebeli boi-boi hee nane merau Allah weunge a huwemmile hee, yun felei banna, nebei miyae naei yunde febe mokoungue, naei yun hokoli wanan. <sup>6</sup> Miyae mbai nebei hee yun feleise ahi yae elendena, naei foi sele nebei miyaele umaa rurenainyekonde. Nebeibe miyae umaa rurenainkonde yae fe mokonainyebondena, naei foi sele nebei miyae yun felei bele yae felende. <sup>7</sup> Ro yoni-yni yun felei bele yae ende naeise na ijen ban sele, rabuhine ban ro yoni-yni na miyae fa-fa na yunde yaeibokene, Allah na me u mokole ma yae nekate nane merau Allah kenare kole hului nekate walora Allahre rore ronainyelere imokowainye. Nebeibe miyae mbai naei molo naei kenare kole hului nekele walora na molore rore ronainyelere imokowoungue. <sup>8</sup> Ro mbai nendo kiyae miyae naei uwana

<sup>†</sup> 10:26 10:26 Mazmur 24:1 \* 11:4 11:4 Nebei Korintus yona ro miyae naei era hena huluinye miyae rore ende heera naei yunde malo bele felenende.

yae omokoiboi, nebeibe miyae mbai nendo kiyae ro naei uwara mokouboke. <sup>9</sup> Nane merau miyae foi naeise ro mokouboke ban, nebeibe ro naei foi naeise miyae maengke mokouboke. <sup>10</sup> Nebei aerene miyae yoni-yoni na molo wa naei me kelee u keleene nekate naei iwaufe yun felei bele enate, nane merau malaikat yoni-yoni naei bene Allahre ebeli boyainye aerene.

<sup>11</sup> Nebeibe Tuhan bele mbainye nekande waline, ro na miyaere hakonnele hele nane merau miyae na molore hakonnele hele. <sup>12</sup> Rabuhine ban miyae mbai nendo kiyae ro naei uwana yae mokouboke hororebe, nebei miyae yeuboke heera ro yoni-yoni miyae naei kou bulu yahi bulura honate. Nebeibe rambun yoni-yoni nanemene Allahlera yaeiboke.

<sup>13</sup> Aka naei baeke naei, miyae-miyae yun felei ban mae Allahre ebeli boi-boise menaei hului kolonneko. <sup>14</sup> Ro miyae na helen sele na kena une hubainye ro umaa koko nekende naeise na mekai ban, nare fe mokoungue. <sup>15</sup> Nebeibe miyae maengke umaa kokona nebei naei embei aikore hebeunge. Miyae yun felei-feleise umaa koko ikeumi. <sup>16</sup> Nebei a wamalere ro miyae hiwa aku honatena, isaeyembombe meyae nebei u mekaise mo kelaemmi. Jemaat yoni-yoni nanemene nebei u mekai kelaemmi a hului nye nekate.

*Tuhan Yesusre Bene Nekeisi-Nekeisi Naei Raman Bulau*

<sup>17</sup> Mana u mekai hi naeise kelerembombere. Mai jemaat riya yoni-yoni arileyaubere ro miyae mbemba foi yae isubawainye, nebeibe ro miyae helen beko yae isubawainye. Nebei aerene mai jemaat riya arileisiyaubere a foi elei sului. <sup>18</sup> Nebei riya arileisiyaube einye aku kiteiboyole naei bele mai nolone yoho-yoho kaube naei bele a boroukokale. Nebei boroukokale a hiwara reyae na hele yae elale. <sup>19</sup> Yoho-yoho kombe walora Allah Naei kenare kole holona ro miyaere yakanaibonde naeise mai u benera nekenayembe era! <sup>20</sup> Mayae nana hesele riya mbainye hokoimeyele hee, Tuhande bene nekeisi-nekeisi naei raman bulaube mokoiboyaube ban? <sup>21</sup> Rabuhine ban raman bulaunge meyanaube hee, nebei raman maise maise einyuke meinyuke nukaube anaube. Nebeinye, hiwa yo na moni yae nekate, hiwa yo yun yambi-yambi neumi eikowate. <sup>22</sup> Nebei u mekai imokowaubere na mekai ban sele! Mayae imae bele lonbe, raman bu na hului yae anakoube ya! Mai u mekai mokaube yae kelaemmi Allahle jemaat ane hele kolaunge nane merau jemaat nolona hun ban wai ban yo belere fere mokommibombere kena kaube! Nebei mokaubene mai rabo halaubere bumane kaerembe a lon mae elaubere? Mare buma kaeiboise na hului ban sele!

<sup>23</sup> Nda wamale a Tuhan Nenaiejae keleufe, Tuhan Yesus kelaise nekate huae, feu mene roke, <sup>24</sup> Allahre helen foi ukeungera nebei feu kaiwole, na moisa orowate yore iwoumi wa Na a bele weumi, "Nda feu niyae yaron anen. Nda feu Raei uwa mai aerene kinyembokamale iwaufe yembonde. Raei bene nekeisi-nekeisire na hibi mo mokomembe." <sup>25</sup> Feunge anewatera Yesus kolaie mbai roke mo weumi, "Raei ha Allah are heteungekoke ro miyaere wali himalainyeboke yo yae me baemmile nibi neme elaere mokounguebokale wanen nda kolaainya anggur bu niyae. Na monne baei anensimbene Raei u bene nekenayembe." <sup>26</sup> Rabuhine ban na rokone baei mayae nda feu emanembe nane merau nda kolaainya bu emanembe mai aerene Tuhan hereke abe huwemembe Neyae benen bennehonde mende heene.

<sup>27</sup> Ro miyae nde Tuhande bene nekeisi-nekeisi naei raman bulaunga feu bele bu bele Tuhande ei ehaweikoi yae anengkonde, nebei ro miyae Tuhande haiboke ro miyae wanen mbai u mekai beko mokate. <sup>28</sup> Ro miyae naei uware nou hennebondera ya, nebeisa mende nebeinya feu bele bu bele yaronde anende. <sup>29</sup> Rabuhine ban nde yae Tuhanbe uwa melen bele ha bele bene nekeisi-nekeisire raman bulaunga feu bele bu bele Tuhande bene enekei yae anengkonde, nebei ro miyae naei uware nenaiejae Allahlena ehee bukulu naei uwa ranne nenaie hayeunge. <sup>30</sup> Nebei aerene mai u nolo u kainya hiwa male yambi koloukeumi, hiwa yo era buloo kate, nane merau helen solo heraikoke. <sup>31</sup> Nebeibe eyae bere holo yae aei walire hului kolomangkonde, aei uware Allahlena ehee bukulu ehubaikoi yae nekemale. <sup>32</sup> Nda kani kelana yo bele aengkele nanembainye mere nommiyonde bele, Wali Ondofolo nda hee aei walire hului koleume hului yae aei wali hiyei ranemmele naei me u mokole.

<sup>33</sup> Nebeinye aka naei baeke naei, Tuhande bene nekeisi-nekeisi naeise ramande anembere memarilensimbene, hiwa yore bele rakemmikombe. <sup>34</sup> Riya mbainye meyarilesiyaube hee, mai uware uware menaeijae ehee bukulu mokonnele belene, nde moni kondena na foi sele nebei kiyae na bere holo imaera raman anengkonde.

Reyae mai bokore merele hee yae a usaei hi bararebonde.

## 12

*Allahle Roh Yeumi Meli Mekai Yoni-Yoni*

<sup>1</sup> Aka naei baeke naei, reyae kena kale Allahle Roh yae meli mekai yeumi naeise isaesembombe. <sup>2</sup> Mayae namman Allahre oroiboi heena nekewaube u mekai ma maisaei sele. U bene foi enekeikoi yae mare wabayemsikembe a mun faeu mun hoime bahe yoni-yoni Allah wanende be hinaumiyeke. <sup>3</sup> Nebei aerene mayae isaeyembombe, Allahle Roh yae aiboyeunge ro nda are eleikoi sului, "Allah yae Yesusre olomo neungeboke." Nebei sului mbai Allahle Roh yae aiboi ro miyae nda are eleikoi sului, "Yesus Raei Tuhande nekele."

<sup>4</sup> Meli mekai na mane-mane wahewoumi nebeibe nanemene Roh mbaisa yeumi. <sup>5</sup> Hakoi-sakoi kalia ma na mane-mane nebeibe nanemene Tuhanbe mbaisa. <sup>6</sup> Aei wali einye rambun mahi-mahi eibewate, nebeibe Allah mbai yae nebei rambun yoni-yonire ro miyae naei wali einye nemene imokowole.

<sup>7</sup> Nanemene naei foise, ro miyae u mbemba mbemba naeinye Allahle Roh yae yakauumi. <sup>8</sup> Ro miyae mbaise isaei hebaen bele ma yae uwa harannebondere a naei meli mekai Allahle Roh yae yeunge, ro hire nebei Roh mbai yae isaei hebaen naei meli mekai yeunge, <sup>9</sup> ro hire nebei Roh mokoungue Wali Ondofolo Naei a hila rabo elae emekai bele halende, ro hire nebei Roh mbai yae erana buloona konate ro miyaere onomi yemmile naei meli mekai yeunge, <sup>10</sup> ro hi rambun emere-emere mokonde naei meli mekai yeunge, ro hire Allah yae weunge are huwemmile naei meli mekai yeunge, ro hire Allahlena Roh, walobo a elele kiyae ndere huluisse kolonnele naei meli mekai yeunge, ro hire afaeu mahi-mahi elende naei meli mekai yeunge, nane merau ro hire nebei afaeu mahi-mahi are yakammile naei meli mekai yeunge. <sup>11</sup> Nebei meli mekai yoni-yoni nanemene Roh mbai yae mokole. Nebei Roh kenare kole hului yae ro miyae mbemba-mbembare meli mekai iwoumi.

<sup>12</sup> Aei uwa buru melen bai helen. Nebei melen bai yoni-yoni mbainye ahuneikoyainye uwa mbaise yeiboyole. Nebei sului mbai Wali Ondofolole uwa. <sup>13</sup> Rabuhine ban eyae nanemene, Yahudi ro miyae, Yunani ro miyae, yebaei bubaei yo, yebaei bubaei ban yo, uwa mbainye eise Roh mbai yae bu koumekoke. Aei wali einye Allahle elae na hibi-hibi yaromale naeise, bu anande wanen mae, Wali Ondofolo yae eyae nemene naei Roh mbai ikeume.

<sup>14</sup> Aei uwa melen bai helen hayeukoke honande, mbai ban. <sup>15</sup> Oro yae nda mekai eleube, "Reyae me ban aerene rare nebei uwane ebaei," na hele nebei oro uwa kabanne namman me baeunge. <sup>16</sup> Angkaei yae eleube, "Reyae ijoko wanen banne rare uwa kabanne me ebaeijae," na hele nebei ijoko uwa kabanne namman me baeunge. <sup>17</sup> Nebei uwana melen bai nemene ijokore mo inyaibondena, nebei uwa angkaei oboroi sului. Nane merau nebei uwana melen bai nemene angkaeise mo inyaibondena, nebei uwa yae fololo bele rambunde ehuneisi sului hunensinde? <sup>18</sup> Nebeibe Allah kenare koukoke hului yae nda melen bai yoni-yoni naeise naeise nekenate anuwaunge ahunewoumi, uwa kabande yeuboke. <sup>19</sup> Nebei melen bai yoni-yoni faennekonde nenaeni nenaeni hononayendena, uwa mbaise eleikoi sului. <sup>20</sup> Mokoumboke hului uwa yoni-yoni melen bai helen honatebe, nebeibe uwa mbai.

<sup>21</sup> Ijoko yae mere nda a wanen ewei sului, "Reyae ware me baei ban erawale." Nebei sului mbai yun mae orore ewei sului: "Reyae ware me baei ban erawale." <sup>22</sup> Nebeibe melen bai hiwa yambi yae eraimi yo naeinya hesele nda uware na huluisse mokoiboyeunge. <sup>23</sup> Nane merau melen bai aei ijokone erande na ro ban kiyaere eyae ei hawanne. Aei uwana fe bele melen bai yoni-yonire buhae-buhae yae malo felammi, <sup>24-25</sup> nebeibe fe okoi melen bai yoni-yoni efelei. Uwa mbai einye nenaeni nenaeni nekenate belene, nda melen bai yoni-yoni hi yae hile nou henate naeise Allah aei uware huba man sele ahuneungekoke nane merau fe hubammi melen bai mokoungboke ei hawammi. <sup>26</sup> Melen bai mbai u buhae kondena, hiwa yo nanemene buhae konate. Melen bai mbai buma enainyekaendena, hiwa yo nanemene rei mai enaikonde.

<sup>27</sup> Mayae nanemene Wali Ondofolole uwa nane merau maise naeise nebei uware ahunaukoke melen bai yoni-yonire yaebuke. <sup>28</sup> Nebei mekai mbai jemaat einye Allah yae nda melen bai ma yo kaeneumikoke ukeumi Naei kaliare mokonate: mbai nendo abu ako, bee nendo Allah weumi are huwaimi yo, name nendo Wali Ondofolole wali nibi are kelaeimi yo, nebeisa rambun emere-emere mokate yo, era buloona yore onomire yaimi meli mekai bele yo, hiwa yore hakonaimiyende yo, hiwa yore me mokaimi na meli mekai bele yo, afaeu mahi-mahi elate yo. <sup>29</sup> Nebei yo nanemene abu ako ban, Allah weunge are huwaimi yo ban, Wali Ondofolole wali nibi a kelaeimi yo ban, iwau emere-emere mokate yo ban, <sup>30</sup> erana buloona ro miyaere onomi yaimi meli mekai bele yo ban,

afaeu mahi-mahi elate yo ban, nebei afaeu mahi-mahire yakayaimi yo ban. <sup>31</sup> Nebeibe mayae meli mekai emekai bele yarongkombe naeise relennekombe.

Nibi hi naei foi sele kayeero kelerembombe nebei meli mekai yoni-yni yarongkombe naeise relennekombera.

## 13

### *Kena Buhae U Buhae*

<sup>1</sup> Ro miyae naei afaeu yoni-yni bele malaikat yoni-yni naei afaeu bele nanemene na hului elale hororebe, nebeibe reyae hiwa yore kena buhae u buhae banna, a waku mo kaenale! <sup>2</sup> Allah weufe are hufemile meli mekai bele nekale, nane merau Allah nunne heraweuboke honate yoni-yni raeisaei bangka mona, isaei hebaen yoni-yni nanemene isaeyeubokalena, nane merau raei hila rabo elaekei sele huluinye elu yoise ufende raneije a hire nakeleisi eube hororebe, nebeibe reyae hiwa yore kena buhae u buhae ehei, reyae rabuhi ban mae nekale. <sup>3</sup> Raeinya honaisele rambun yoni-yni nanemene hele hun ban wai ban yore waheremikonde baensoube, nane merau ((Wali Ondofolole aere)) raei uwa waeremihinde inye hanaiseboube hororebe, nebeibe reyae kena buhae u buhae eheinya, nanemene raei foi naeise eyeiboi. <sup>4</sup> Kena buhae u buhae nda ma niyae: kena hebaen-sebaen, kena nime haba, kena hensan yoko-yoko ban, uwa ekaeyei, embei aiko ban, <sup>5</sup> wali mekai ban yae omokoi, uwa foise ebaei, ikele han u hale okoyei, hiwa yo beko mokoboyatere u benera nundeyaimi, <sup>6</sup> u mekai ijen ban naeise kena eroweisi, nebeibe na hele naeise kena roweisiyaimi. <sup>7</sup> Ro miyae hiware kena buhae haeimi yo yae nda u mekai mokonaimile: naei rora holaeimi, naei a elendere hila rabo halaemi, rabo elae halaete Allah nare foi mokonnele, kena u heraungate yae na hibi kena buhae henaimile.

<sup>8</sup> Kena buhae u buhae huba ban haei ban. Allah weunge are huwaimi meli mekai ya mbai huba mokonnekonde. A faeu mahi-mahi elate naei meli mekai ya mbai hennunde. Isaei hebaen nunne honate rambunde isaeyate naei meli mekai ya mbai enainyundembonde. <sup>9</sup> Rabuhine ban aei isaei hebaen na hee bele nane merau Allah weunge are hiyei eraneiboi yae huwammile. <sup>10</sup> Nebeibe na hiyei raneiboi kiyae mende ya, hiyei eraneiboi rambun yoni-yni nundenaibonde. <sup>11</sup> Reyae fa kaei-kaeinye nekewale heena a faeu elewale, u bene wa bene nekewaise, nou hewanale, fa-fa naei wanen mo mokowale. Reyae uwa henaubokalene, fa-fa heena nekewale wali yoni-yni nukeungebokale. <sup>12</sup> Nda heena aei uwa unulu nana wanen Allahle naeise eyae be nulure erate rambunne ijokore erande. Nebeibe na ya bele mensebonde be yoi mbembane wanen emarende. Nda hee raei isaei hebaen namman hiyei eraneiboi. Nebei hee yae wa, Allah raei uware isaeyufo na mbai reyae Allahle naeise isaesebonde.

<sup>13</sup> Nda wali nekande heene u mekai name hele hononayende nda niyae: Wali Ondofolore hila rabo halaenne, rabo elae halaende Allah are nuleuboke huluinya mokombonde, nane merau kena buhae u buhae. Nebeibe nda name nolona naei bereise hele kena buhae u buhae.

## 14

### *Benen Allahle Roh Yeumi Meli Mekai Naei A*

<sup>1</sup> Ro miyaere kena buhae u buhae hemmimembe nane merau Allahle Roh yae meli mekai yeyeumi relennele yarongkombe. Allah wembe are huwembe meli mekai na bereise yae erennele. <sup>2</sup> Rabuhine ban nde afaeu mahi-mahi elendena, nebei kiyae ro miyaere nebei a weumi ban, nebeibe Allahre weunge. Hi yae ha yae nebei a elelere onenate, rabuhine ban Allahle Roh na kena une elele hului yae nunna honayeke rambun huwele. <sup>3</sup> Nebeibe Allah nare weunge are huwoumi ro nebei a nda aere ro miyaere huwoumi: boronate ro miyae na hila rabo elae barambonde naeise, kena u hara rorommile naeise, nane merau kena foi mokommile naeise. <sup>4</sup> A faeu mahi-mahi elele ro miyae naei hila rabo mo annenunde. Nebeibe Allah yae weunge are huwaimi ro miyae jemaatna ro miyae naei hila rabo amminunde. <sup>5</sup> Reyae kena kale mayae nanemene afaeu mahi-mahi elembe, nebeibe kena kaban kale mayae Allah wembe are huwemmile. Jemaatna ro miyae naei hila rabo amminunde naeise Allah weumi are hungate ro miyae rambun na foi sele mokate, afaeu mahi-mahi elate yo mokatera. Afaeu mahi-mahi elende a ro miyae mbai na mekai bele wemmilena, nebei a faeufe elende na foi sului mbai.

<sup>6</sup> Aka naei baeke naei, reyae mai bokore merele mo, maisaei ban afaeu mahi-mahi yae ufembena, rabuhi ban yembonde. Nebeibe reyae mare Allah yae keleufe rambun eme yakarembombena, isaei hebaen hi kelerembena, Allah yae ukeufe are hufembena,

a usaei wasaei hi kelerembena, mare na hului hakorembombe. <sup>7</sup> Koise baere kate rambun seruling bele kecapi bele wali ban holona nebeibe kulun bele. Nebei rambun bee na mekai ban a koneikondena, ro miyae nebei koi baere ehakoiboi. <sup>8</sup> Nane merau felayo aminde ranele kiyae mokonainyehande naei are foi eweinya, felayo uwa mokoisa-mokoisa heere isaeyeiboi sului. <sup>9</sup> Nebei mekai mbai mayae ro miyae hire naeisaei ban afaeu wae wemmilena, waeyina a haraungebokae neyae isaeyeiboi sului. Nebei a yoni-yoni alu boyere mo wennele. <sup>10</sup> Nda kani kelana afaeu yoni-yoni buhi wahi nekai-sekai, nane merau ro miyae na foi isaeyinayibonde yo bele. <sup>11</sup> Raei naeise nebei a faeu na mekai ma haraungeboke elele reyae isaeyiboyna, nebei kiyaeere yo mei-meinya ro yae eranale, neyae rare yo hi yan sina ro yae ereufe.

<sup>12</sup> Mayae Allahle Roh yae yeumi meli mekai mai uwane kitenembombere relaeungene, naei foi sele nebei meli mekai jemaatna ro miyae naei hila rabo amminumbe naeise baembe.

<sup>13</sup> Nebei aerene afaeu mahi-mahire elendere meli mekai ikeunge kiyae, nebei a faeu elele mekai ma isaeyembonde naei meli mekai Allahre ebeline riyennehinde. <sup>14</sup> Rabuhine ban raeisaei ban afaeu wae ebeli borelena, Allahle Roh raei kena une elele yae mo ebeli boung, nebeibe raei u bene wa bene nebei ebeli balere naeisaei ban sele. <sup>15</sup> Nebeinye reyae naendae mekai yae mokorebonde ban? Naei foi sele na beene-beene mokorebondere. Allahle Roh raei kena une elele yae bele raei u bene wa bene nekenaisele yae bele ma beene-beene Allahre ebeli borende nane merau Allahre koi bae korenele. <sup>16</sup> Allahle Roh waei kena une elele huluinye Allahre bumane kaennelena, jemaat nolona ro miyae hiwa nebei a faeu naeisaei ban isaeyeiboi yo ehakoiboi sului. "Amin" elenate hee isaeyeiboi. <sup>17</sup> Naendae mekai horo waei ebeline helen foi Tuhande banae foi selebe, nebeibe mbainye arilaufike nekaube yo naei hila rabore ainyui.

<sup>18</sup> Reyae Allahre helen foi sele wanale, rabuhine ban reyae mbaibe afaeu mahi-mahi na helen eyelewale, mayae elaubera. <sup>19</sup> Nebeibe jemaat nolone, raei kena kale ro miyae hiwa bele yae a usaei keleremile na hului isaeyinayibonde a maehae mbai yae elerekonde, a helen sele mahi afaeunge mare ehakoiboi sului elerelera.

<sup>20</sup> Aka naei baeke naei nemene, fa-fa fele-fele naei u bene nekaimi wanen enekeijae. U mekai beko naeise fa-fa u bene hului yae nekenayembe, nebeibe nda wamale a naeise Wali Ondofolole eisa henauboke yo yae u bene nekenayembe. <sup>21</sup> Musale walora wali heere foloukoke homofaene nda wanen molaikoke,

"Tuhan mae elele,

'Yo hi yan sina afaeu mahi-mahire elate ro miyae naei walora

Reyae nda ro miyae a ufemile.

Nebeibe nda yo

Raei are namman oboroiboi yae nekenate.' „\*

<sup>22</sup> Nebeinye hila rabo bele yore ban nebeibe hila rabo ban yore afaeu mahi-mahi elate iwau wanende yembonde. Allah weunge are huwei-huweise hila rabo ban yo naeise ban nebeibe hila rabo bele yo naeise.

<sup>23</sup> Nebeinye jemaat nanembainye meyarilesiyele yae ro miyae nanemene afaeu mahi-mahi elembe, Allahle Roh yeumi meli mekai naeise isian ro miyae, hila rabo ban ro miyae mendena, nebei mekai elembe boronayembene mayae nanemene keube ambokembe kaube yae naei u benere nekenaimile. <sup>24</sup> Nebeibe mayae nanemene Allah wembe are huwembe hee, hila rabo ban ro miyae Allahle Roh yeumi meli mekai naeise isian ro miyae mendena, neyae u mekai beko mokate yore na hele elenate. Nebei huwate ro miyae naei bekobe, <sup>25</sup> nane merau na kena ei u einya nunne heraweweke honayeke rambun yoni-yoni na yakane menaiyakande. Nebeinye be are nende, Allahre ei molonnele, nane merau na hele yae enelende Allah mai u nolo u kainye nekele.

<sup>26</sup> Aka naei baeke naei, nebei mekainya nda hee mayae Allahre eise molonnelere memarilensimbe hee, hiwa yo hobolo mandube kelenaimile, hiwa yo Wali Ondofolole wali nibi a usaeibe kelenaimile, hiwa yo Allah yae keleunge rambun neme yakanaimile, hiwa yo afaeu mahi-mahi elenate, hiwa yo nebei afaeu na mekai yakanaimile. Nebei meli mekai nanemene jemaat hila rabore amminunde naeise mo mokonate. <sup>27</sup> Afaeu mahi-mahire elemberere kenana ro bee, name hubara hubara yae, hi elengkondera hi amun yembonde, nane merau ro hi bele yae nebei afaeu elaubera na mekai yakambonde hele. <sup>28</sup> Nebei afaeu elenate na mekaise yakambonde ro oloona, jemaat arilensinde nolone afaeu mahi-mahire elate yo a ban mae nekenate. Na kena u eisa mo naei uware ungainyele nane merau Allahre ungainyele.

\* 14:21 14:21 Yesaya 28:11-12



<sup>29</sup> Bee, name hului yae Allahle weumi are hungate nane merau hiwa yo nebei a elatere hului foi yae ranainyehinde. <sup>30</sup> Ro hi Allah weunge are huwele hee Allah yae ro miyae hire rambun neme keleungena, elele kiyae waennehinde na hi kiyae yae elende. <sup>31</sup> Mayae nanemene na hului isayembe nane merau kena hara roronembe naeise Allah weumi are ungaimile yo nanemene na huba hubara a elenaikonde. <sup>32</sup> Allah weumi are huwate yo na hingkin na kena une borate are herawenayende. <sup>33</sup> Jemaat nolona wali bulu malure Allah kena okoi nebeibe wali kena mbai u mbai belere.

Yesus Naei eleuboke wekeumi ro miyae jemaat naei riyane arilensimbe hee <sup>34</sup> miyae maengke a ban mae mo nekenate, a eleikoise ewaeisijae. Allah na bere hele ukeunge huluinye naei yunbe me kelee u keleene yae nekenate.† <sup>35</sup> A hinenainyehindere, nebei miyae maengke na molo ware imaene enaimihinende. Rabuhine ban miyae maengke mbai jemaat arileufike riyane a eleikoise na mekai ban sele.

<sup>36</sup> Allah yae mai walora Naei are eyakaiboi nane merau ro miyae hiwa helen Allahle a faeu boraikoke! <sup>37</sup> Ro miyae mbai naei uware Allah weunge are huwemmile naei meli mekai mokole, Allahle Roh yeumi meli mekai na hului hi bele mokole hubaungena, nebei ro miyae wo konde Allah yae ukeufe abe reyae moloukokale. <sup>38</sup> Nebei ro miyae Allah rare ukeufe moloukokale are wo okoinya, nebei kiyaele are oborommae.

<sup>39</sup> Aka naei baeke naei, Allah wembe are huwembe naeise kena kaban mae kombe nekembe, nane merau afaeu mahi-mahi elei-eleise a hun okolommimae. <sup>40</sup> Nebeibe nanemene na mekai yae nane merau na hiyei bele yae ranemmile mokombe.

## 15

### *Nulu Yo Mahe Yora Waleiboi Naei A*

<sup>1</sup> Aka naei baeke naei, nda hee reyae kena kale Wali Ondofolole a foi faeu foi na bere huwamale mbaibe benen mare isaesembombere. Mayae nebei a foi faeu foi na hele elaukoke nane merau Wali Ondofolo wembe a huluinye nekaube. <sup>2</sup> Nebei a foi faeu foi huwamale huluinye Wali Ondofolo Naei a elelere na hibi-hibi hila rabo halemembe yae mare hole molonemembe. Mayae na hibi-hibi hila rabo ehaleinya, bere nebei a foi faeu foi na hele elaukokere rabuhi ban yembonde. <sup>3</sup> Rare keulefokoke a mbaibe a na bereise ma yae reyae mare huwengkokamale. Nebei uwamale a nda niyae, “Yesus Wali Ondofolo aei beko aerene hereke, Allahle homofaene nulainyekoke hului. <sup>4</sup> Nebeisa Yesus a bulune molaisake, name nenja Yesus a bulura aunguke, Allahle homofaene nulainyekoke hului yae. <sup>5</sup> Petrusre Yesus uwa yakaungebokera mo nebeisa Yesus na moisa orowate yo me bee oro nen bee belere uwa yakaumiboke. <sup>6</sup> Mainyekeukoke mo Yesusle eisa aka baeke wa 500 hului na kulun mbainye Yesus uwa yakaumiboke. Nebei ro miyae na helen holo namman wali nekate, keli name heraiboke. <sup>7</sup> Nebeisa Yesus Nauwa Yakobusre yakaungeboke. Nekaikoke mo, abu ako nanemene Yesus Nauwa yakaumiboke. <sup>8</sup> Na huba mokoikoi nibi ma hi yae Nauwa rare yakaufeboke. Reyae Yesusre hila rabo halewanale nibi ma honoi ya namman mae hongkaisele fa wanen.”

<sup>9</sup> Reyae Allahle jemaatre weitasi kowamaele aerene abu ako kaenewoumira reyae me baei ban sele. <sup>10</sup> Nebeibe Allah rare kena buhae aere ban mae heufekoke aerene mai ijokore eraufe wanen mae raei u mekai nekale. Nane merau Allah rare kena buhae aere ban heufekokene Yesusle abu ako yae nekate yo nolora reyae kalia mokowale ehameikoi sului. Raei kena kale huluinye omokoi, nebeibe Allah raei walora ro miyaere kena buhae aere ban hewoumi huluinye mokowale. <sup>11</sup> Wali Ondofololena a foi faeu foi mbai raeisa, abu ako hiwa yo naeise huwate, nebei a mbaise mayae hila rabo halewaube.

<sup>12</sup> Nebeibe Yesus Wali Ondofolo nulu yo mahe yora aunguke naei a huwayembe lonbe, mai nolona ro miyae hiwa yo yae elate nulu yo mahe yore ate yo benen ainyui sului naei a na hele ban! <sup>13</sup> Ro miyae herate yo na hele benen nulu yo mahe yora ainyuinya, na hele Yesus Wali Ondofolo nulu yo mahe yora ainyui! <sup>14</sup> Yesus Wali Ondofolo na hele nulu yo mahe yore ainyuinya, meyae huwayembe a nane merau mai hila rabo halaube rabuhire eyeiboi. <sup>15-16</sup> Bararebonde na yaka yeuboube meyae Allahle naeise ame-ame yae huwammi, rabuhine ban meyae huwayembe Allah yae Yesus Wali Ondofolore nulu yo mahe yora aungunuke. Nebeibe herewate ro miyae nulu yo mahe yore ainyuinya, Allah yae Wali Ondofolo herekera ewaleiboi nane merau Neyae nulu yo mahe yora benen ainyui sului. <sup>17</sup> Yesus Wali Ondofolo herekera ainyuinya, mai hila rabo halaube rabuhire eyeiboi nane merau mai u mekai beko einye namman nekaube. <sup>18</sup> Nebei na helena, ro miyae eherei heena Wali Ondofolore hila rabo halewainye yae herewate yo bele Allah bele wahaeukoke honoimeyau. <sup>19</sup> Nda wali nekande naeise mo eyae rabo

† 14:34 14:34 Kejadian 3:16

Wali Ondofolore elae halaendena, aei wali baengko ban ro miyae hele, nda ro miyae nekatera.

<sup>20</sup> Nebeibe nda niyae na hele, Wali Ondofolo nulu yo mahe yora aunguke. Ani yelena yae kelaemi na heki ban ani wauwau yaronate wanen, Yesus aunguke yae kelewoumi Allahle holona ro miyae herewate yo na hele ainyainyu enaikonde. <sup>21</sup> Here naei ro mbaite walora mekene, nebei mekai mbai nulu yo mahe yora ainyainyu enaikonde naei Ro mbaite walora meke. <sup>22</sup> Ro miyae Adambe u mekai bele nekatene nanemene herate. Nebei sului mbai ro miyae Wali Ondofolo bele mbainye nekate yae herenatera walenaibonde. <sup>23</sup> Nebeibe nemene na hubara-hubara benate. Wali Ondofolo ani yelena wanen Kiyae na bere aunguke, nebeisa Neyae bennhonde mende Naei holona ro miyae anainyunde. <sup>24</sup> Nebeisa hubare mokonnele hee yae mere mokaimi yoni-yni nanemene hele Wali Ondofolo yae beko mokommibondera, Nondofolo one hengko belebe Ako Allahle me ei u einye kinyennebonde. <sup>25</sup> Yesus yae me mokommile mende naei yokeijo yoni-yni nanemene mokommibonde Naei oro kelee me keleene menayorulembonde. <sup>26</sup> Na yokeijo huba mokoikoinya bekore mokonnebonde kiyae, "here". <sup>27</sup> Allahle homofaene nda wanen molaikoke, "Neyae mokoungboke rambun yoni-yni nemene Naei me kelee oro keleene mayoruleuboke."\* Nebeibe na yaka yeuboke Allah yae rambun nemene fomene Wali Ondofolole me kelee oro keleene orulaiboke, nebeibe Allah Naei uwa ban. <sup>28</sup> Allah Nenaiejae rambun nemene me emmimokonde naeise nemene fomene Wali Ondofolole oro kelee me keleene menayorulembonde hee, Neyae Naeko Allahle oro kelee me keleene orulensinde.

<sup>29</sup> Wali Ondofolo herekera uwa neme yeuboke. Nebei sului mbai bu kayengkokembe heene mai uwa bune melayembokembere here wanen benen maujakaubokere wali neme wanen. Herewate yo ainyuinya, nda heena ro miyae herenate hee aerene bu kaimire rabuhi ban yeuboke. <sup>30</sup> Nane merau maei wali na monne baei beko nolone nekeyandere rabuhi ban. <sup>31</sup> Aka naei baeke naei, aei Tuhan Yesus Wali Ondofolo wembe a huluinye mai wali nekaubene kena roweisiyeufe. Nebei aerene na yane baei na hulul rare haiseboubé me u mate hororebe, kena yae heraweyale. <sup>32</sup> Na bere Efesus yone reyae Wali Ondofolole aerene obo yoku han bele ((u mekai wanen ro miyae)) oyendeboke relewonne. Herewate yo benen ainyuinya, nebei me u rabuhi ban. Herewate yo benen ainyuinya, waeungehinde Allahle homofaene moloukoke a benate: "Men, raman bu anemakonde,

rabuhine ban wahanare bae heremabondere lonbe!"†

<sup>33</sup> Kayaa hebembe! Ro miyae u mekai bekore mokate yo bele kahili awengkombena, nebei yo naei u mekai beko yae aungayeufote mai wali foi horombonde. <sup>34</sup> Nda hee yae mai uwa olomombombe, u mekai bekore hee nennele, rabuhine ban mai u nolo u kainya ro miyae hiwa na u mekai Allahre oroihoi wanen nekate. Mare fe mokorembombe naeise nda a ma yae wamale.

<sup>35</sup> Nebeibe ro miyae hiwa nda a mekai yae hinate era: "Herewate ro miyae naendae mekai yae benen anainyunde? Nane merau rahe uwa be yoi ma yae menate?" <sup>36</sup> Nebei a mekai na kobu hele hinaufike! Ohaka kanine moloisayate kaka eyeiboinye, benen hon buru ekitei sului. <sup>37</sup> Gandum haka nane merau o haka hi hi mayae kanine molaube nebei o haka mo nanemene. Kitenate yo ma hi hele, o haka ma ban. <sup>38</sup> Allah Nenaiejae nebei o haka kenare kole ma yae no fae ahunennekonde. O haka na mane-mane Allah no fae na huluinye eyahunewoungé. <sup>39</sup> No bele mokoume yo nanemene uwa ma mbai ban, ro miyae uwa ma mbai, obo yoku, aye yoni-yni, ka heu uwa ma nenaei nenaei. <sup>40</sup> Nebei uwa yoni-yni nda kani kelana naei. Surgana nekate yo naei uware kitewoumi yoni-yni na baengko nenaei ma nda kani kelana uware kitewoumira. <sup>41</sup> Hu, oko, findelau uware kitewoumi yoni-yni na baengko nenaei nenaei, nane merau findelau yoni-yni na hehe roroiboyate nenaei nenaei.

<sup>42</sup> Herewate ro miyae nulu yora mahe yora anainyunde yo naei uwa nebei mekai. A bulune molaisake uwa kakare enjembonde kiyae, nebeibe nulu yo mahe yora annununde uwa kakare eijeiboi kiyae. <sup>43</sup> Molaisaise ha u melen u male u yambi baengko ban uwabe a bulune aimoloufaké nebeibe baengko bele u elae u wake uwabe nulu yo mahe yora annununde. <sup>44</sup> Nda kani kela na nekenate naeise nuleuboke uwabe eimoloisayande, nebeibe nulu yo mahe yora annunde uwa nebei Allah bele mbainye surgana nekenate naeise nulembonde.

Nda kani kelane nekenate naei uwa nuleubokene, na hele Allah bele mbainye nekenate naei uwa nuleuboke. <sup>45</sup> Allahle homofaene nda wanen molaikoke, "Ro miyae na bemena hele mokouboke kiyae, Adam, melen u ha u yae uware ahunewoungé wali

\* 15:27 15:27 Mazmur 8:6 † 15:32 15:32 Yesaya 22:13

bele rore yeuboke.”<sup>‡</sup> Nebeibe huba mokoikoinya Adam, Wali Ondofolo Kiyae, walire yeumi Rohre yeuboke. <sup>46</sup> Na bemere melen u ha u kiyaebe meke. Nebeisa Allahle Roh bele uwabe aei nolone yakauboke. <sup>47</sup> Allah kanira Adamde mokouboke, nebeibe Yesus Wali Ondofolo surgara meke. <sup>48</sup> Nda kani kelana ro miyae na uwa yoni-yoni na bemere kanira mokouboke kiyae Adambena uwa wanen. Nebeibe surgana yo Wali Ondofolo surgara meke Kiyaele uwa wanen. <sup>49</sup> Eyae nda kani kelane Adambe uwa wanen uwa bele nekewande. Nebei mekai mbai surgara meke Wali Ondofolole uwa wanen uwa bele emanekende.

<sup>50</sup> Aka naei baeke naei, reyae nda a wamale, Eyae nda uwa melen u ha u yae Allah are heteungekoke Naei holona ro miyaere yemmikonde rambun yoni-yonire ehubaikoi sului. Nane merau kakare enaibende uwa kakare eibe rambunde erowei sului. <sup>51-52</sup> Angkaei borombo, Allah nunne heraweuboke honoweke abe wamale, eyae nanemene eisereiboi, nebeibe amin waku wanen rambun huba mokoikoi naei ranembonde hee yae waembin mae wembonde, eyae nanemene kakare ebei uwa yae bemmehonde. Nebei amin waku wanen rambun ranembonde mo, herewate yo kaka eyeiboi uwa yae amminunde nane merau eyae wali nekande yo bemmehonde. <sup>53</sup> Rabuhine ban aei uwa kakare benate kayeero kakare eibe uware bemmehonde hele, nane merau herande uwa kayeero wali hena bona nekenate uware bemmehonde hele. <sup>54</sup> Kakare benate uwa kakare eibe uware bemmehonde nane merau herande uwa wali hena bona nekenate uware bemmehonde. Nebei hee yae Allahle homofaene molaikoke nda a na hului inyaibonde, “Elae bele Kiyae mokounge here u yeuboke.”<sup>§</sup> <sup>55</sup> Nane merau Allahle homofaene nda wanen moloukoke:

“Here,

waei elae bele rena bele ube yeubokete!”<sup>\*</sup>

<sup>56</sup> Nda wali nekande yae u mekai beko mokandene Allah bele wahemakonde, nane merau Musale walora wali heere foloukoke a yae isaeyande beko bako mokate ro miyaere Allah ehee bukulu hainyemile. <sup>57</sup> Nebeibe Allahle helen foi umande! Neyae mokoungeboke Wali Ondofolo walora eyae Allah bele ewaheikoi.

<sup>58</sup> Nebeinye, kena buhae haemale aka baeke, kena u me bobo yae Wali Ondofolore hila rabo halemba. Tuhan wembe a huluinye na hibi-hibi Naei kaliare mokombe, rabuhine ban maisaei nekaube mai kalia mokaubere foi benate.

## 16

### *Jemaat Hiwara Eisakoi-Meisakoi Naei A*

<sup>1</sup> Yerusalem yona Yesus Naei eleuboke wekeumi ro miyae (moni mai nolone nekatene) hakommibombere roi arilemba naeise, reyae wamale Galatia kanina jemaat mokonate ma keleumikokale huluinye mayae mokombe. <sup>2</sup> Reyae merele heene nebei yore hakommibombe roise arilemba naei noube hembe bele. Na monne baei ya mbai nendo mayae jemaatna ro miyae nanemene ma roibuna ufeyaube yaroyaube na roi, kayee mbai wewe kommiyembe honole anuwaunge imaene kolomembe. <sup>3</sup> Reyae mai bokore erele hee mayae na hului yae erennele ro miyae rore romamibonde naeise, jemaatna yun-junde homone molorekonde ufemile mai mena una arilaukoke rambun bele homo isemile bele Yerusalem yone emmiyende. <sup>4</sup> Nebei heene nebei yore hakoremibonde naeise na mekai belena, rangkele nanembaisa emale.

### *Paulus Kolore Ende Naei A*

<sup>5</sup> Reyae Makedonia kanire erele heera mai bokore erele, rabuhine ban reyae merau raungehikala Makedoniar a ereyanensonderene. <sup>6</sup> Reyae erele yo yande mainya era inyale yae hakonsebombe naeise, nauwae, mai bokore Korintus yone heki holo nekerele, hin manse meinyele hee fombaensonde. <sup>7</sup> Reyae kena okoi nda kulunne mai bokore erelere noro ranne ban. Aei Tuhan ehe kongkondena, mai bokone heki holo nekerekonde. <sup>8</sup> Nebeibe reyae Efesus yone mo erenekende Pentakosta ya kaban baensonde. <sup>9</sup> Rabuhine ban naendae mekai horo oro halunde hayaeime yokeijo helenbe, ndane mon helen sele Allahle kaliare mokorele.

<sup>10</sup> Timotius mai bokore endena, fere ehubi naeise mayae ei annembombe, rabuhine ban neyae raeinya wanen aei Tuhanbe kalia mbaibe mokonde. <sup>11</sup> Mayae nemene nare rabuhi ban ro yae elembe bele, eibe annembombe. Neyae na hului raei bokore mende naeise naei kena u foi mokonnebombe. Reyae ndane mai yona aka baeke wa hiwa yo bele Timotius bele hubaimakondere rakeimeyamaele.

<sup>12</sup> Aka baeke Apolos moi elae yae hurewanale aei aka baeke wa hiwa yo bele mai bokore ende heene hakommibonde enate. Nebeibe neyae nda heere na hului ban mae hubaunge. Roko hi kulun hine mon belena, mai bokore na hului ende.

<sup>13</sup> Aka baeke, mauware kayaa foi hebembe, Wali Ondofolo Naei a elelere hila rabo elae bele halembe, be yae rabulembombe, kusei mahei ban nekembe. <sup>14</sup> Mai kalia nanemene fomene yanekoi yase bele yae emmokombe.

<sup>15</sup> Aka naei baeke naei, maisaei sele Stefanus naei imae ei obe einya ro miyae bele Akhaya yona ro miyae na bemere hele Wali Ondofolore hakowainye, nane merau nda hee bele Yesus Naei eleuboke wekeumi holona ro miyaere kena na maemae hele no ban hee ban hakoyaimi, ei haweyaimi. <sup>16</sup> Reyae moi huralale nebei ro miyae wanen yore nane merau ro miyae hi Wali Ondofolole kaliare mokate yore ei hawemmile. <sup>17</sup> Stefanus yae, Fortunatus yae, nane merau Akhaikus yae mekatene raei kenare roweufehike, rabuhine ban mayae mekaufele kalobe mekaimokaise nane merau <sup>18</sup> nda name raei kenare foi mokaise. Nebei sului mbai mai kenare foi mokayembe. Nebei u mekai ma ro miyae naei me ure yakammibonde.

*Huba Mokoikoi Naei Ro Melaeyeumi*

<sup>19</sup> Asia kanina jemaat-jemaat mare ro melaeyayembe. Akwilale, Priskilale, nane merau jemaat naei imaene arileisiyele yo bele Tuhanbe eisa mare foi sele ro melaeyayembe. <sup>20</sup> Ndana aka baeke wa nanemene mare ro melaeyayembe. Maise naeise ensubayengkombe anuwaunge Yesusle eisa aka baeke yae foi sele ro melaeyemembe.

<sup>21</sup> Nda mare ro melaeyerembe are reyae Paulus me yae moloukokale.

<sup>22</sup> Ro miyae Tuhande kena buhae eheinya, Allah yae ehee bukulu ennehayende. Tuhan mei ba!

<sup>23</sup> Reyae ebeli banale Tuhan Yesus mare kena buhae aere ban mae henemembe.

<sup>24</sup> Yesus Wali Ondofolole eisa mayae nemene reyae kena buhae haemale. Amin.

## 2 KORINTUS

<sup>1</sup> Onomi foka, Allahle jemaat Korintus yona bele Akhaya kanina Yesus Naei eleuboke wekeumi holona yo bele. Reyae Paulus, Allah kena koukoke huluinye Yesus Wali Ondofolole abu akore yeubokale kiyae bele aei aka baeke Timotius bele mare ro melaeyayembe.

<sup>2</sup> Meyae ebeli bonnelle Allah aei Ako Kiyaele Tuhan Yesus Wali Ondofolo bele mare kena buhae aere ban mae henembe nane merau rei mai inyembe.

### *Allah Aei Kena Foise Mokommele*

<sup>3</sup> Allahre ei molonnele. Neyae aei Tuhan Yesus Wali Ondofolole Ako. Neyae Ako, kena beko hubamande heene kena foise mokoyeume nane merau aei kena u harare roroyeume. <sup>4</sup> Ro miyae hiwa kena bekore enainyehubande yore eyae na hului Allahle elae walora kena u hara emamironde naeise, Allah aei kena bekone isubawanne hee aei kena u hara roroyeume. <sup>5</sup> Yesus Wali Ondofolo beko hubawoungue wanan aei waline beko hubamande. Nebei sului mbai Allah Wali Ondofolole kena u hara roroimeyeunge wanan Wali Ondofolole walora na hibi-hibi aei kena u hara rorommende. <sup>6</sup> Meyae kena beko emansubandana, mai foi naeise hubamande. Mai kena u hara roromayembe nibire isaeimale naeise nane merau mare holere molomayembombe naeise, Allah maei kena u hara eitoroume hee, mai foi naeise mokole. Nebei nibi yae Allah kelenembe mai kena u hara roronembe nane merau maeyina wanan mbai kena beko ennehubangkomba Neyae elae inyembe, mai kena u herawemembe Wali Ondofolore hila rabo halennembe. <sup>7</sup> Meyae rabo elae halaende mayae na hibi-hibi Wali Ondofolore hila rabo halennembe, rabuhine ban meyae maeisaei nekande meyae kena beko hubanne huluibe mangkele hubaunge wanan mbai, Allah maei kena u hara roroume huluibe mai kena u hara roronembe.

<sup>8</sup> Aka naei baeke naei, Asia kanine maei waline kena beko hubawannere meyae kena kande mangkele isaeyembombe. Maei uwane meumeneke kena beko ehakei sele hubawanne, maei wali naeise rabo ban yaendeboke. <sup>9</sup> Heremabonde naei a hokaikoke wanan mae hubawannele. Meyae maei uware yae rabo ehalei, nebeibe ro miyaere nulu yo mahe yore ainyainyure kommile Allahre mo rabo halennelere isaeimabonde naeise, nebei kena beko yae hubawoume. <sup>10-11</sup> Nana hesele na yane baei heremale wali mara Allah maere hole moloumekoke nane merau bena honoifoyle yane hole molommele. Nebei Allah mbaise rabo halaenne mai ebeli maei naeise embombe huluinye Allah na hibi-hibi maere hole molommele. Nebeisa ro miyae maei naeise ebeli bonainyele huluinye Allah maere foi mokommele aere ro miyae helen Allahre helen foi ungainyele.

### *Paulus Merau Mahire Raungehike Aere*

<sup>12</sup> Maei kena u na ijen naeise weume a yae huweume na bereise mangkele mbainye nekewande hee nane merau nda hee bele meyae na mekai yae nda kani kelane nekeimeyandene, maei uwa kaemale. Allah keleume hului Yesus Naei eleuboke wekeumi holona yo na u mekai ma yae nane merau u bene yolo-yolo ma yae nekewande. Nda kani kelana wali beko nibine orate ro miyae naei isaei hebaen mae ban, nebeibe Allah kena buhae aere ban mae hewoume Kiyae uwoume hului yae nekewande. <sup>13-14</sup> Maei mekai ma harannebokere nda homone mayae na hului kongkombe nane merau isaeyembombe ma yae meyae molande. Reyae rabo halaele mai nolone hiwa isaeyaeiboke wanan mayae nemene isaeyembombe, Tuhan Yesus ro miyae naei walire hului kolommikondere mende heene, mai aere ne maei uwa kaemale wanan mbai maei aere ne mai uwa kaembe.

<sup>15-16</sup> Maei aere ne mayae uwa engkaembe naeise, raei kena ura elae hubawanalene na bere merau raungehikale, Makedonia kanire erele. Nebei hee foi yoni-yoni roko bee nendo ei hawerembe naeise, na bere holo mai bokore erele. Nebeisa Makedonia kanire kulun ufele erelera, benen mai bokore berehonde merele. Nebeisa benen Yudea kanire erele hee, nibi naei rambun mayae hakonsebombe. <sup>17</sup> Erele naei kena u na maemae hele yae merau raungehikale! Nda kani kelana wali beko nibine orate ro miyae merau ranaisinde heene, nda a u bene bee ro miyae wanan hayaemi, "Ehe, niyae ban." Reyae merau rarensinde nebei wanan ban. <sup>18</sup> Allah are nuleuboke huluinye mokoyele Kiyaele Ro yae reyae are ukamale na kulun mbainye ehe, ehe ban a yae mare wamale ban. <sup>19</sup> Rabuhine ban reyae, nane merau Silwanusle, Timotiusle bele yae mai u nolo u kainye Yesus Wali Ondofolo Allahle Kelule naeise huwayembe hee, Yesus Allah weunge

a huluinye mokonde omokoi naeise meyae ehuwei. Neyae Allah weunge a huluinye mokole a mo elandeki. <sup>20</sup> Aei naeise Allah yae heteungekoke a yoni-yoni Wali Ondofolole walora nemene mokommekonde. Allah Wali Ondofolole walora foi mokoumebokene, ro miyae Allahre hili enainyehende hee, eyae emalende, "Amin." <sup>21</sup> Allah Nenaiejae mokoumeboke meyae are huwayembe yo bele mayae angkaeise boraube yo belere Wali Ondofolore hila rabo elae yae halaenne nane merau aere eleumeboke Naei kaliare mokomalere. <sup>22</sup> Naei holona ro miyaere eyae yaendebokere kelemmebonde naeise, nane merau aei naeise mokoungahake rambun nanemene emmeyende helere kelemmebonde naeise, Allah me nou heraweboube wanen aei kena u einye Naei Roh aumeboke.

<sup>23</sup> Reyae riyonale Allah yae raei kena u einyare isaeyeboke Kiyae mare yakanembombe nda a wamale na helere yaeiboke. Korintus kanina nekaube yo bokore erelerebe, nebeibe reyae kena ban sele a usaei elae hele ufembene mai kenara beko yae hubannele belene, reyae ei. <sup>24</sup> Makei are hila rabo halembelere helere meyae koli hara ebei, rabuhine ban Wali Ondofolo Naei a elelere hila rabo halaengene elae yae hebaube. Nebeibe mayae rei mai kombe naeise, kalia maengkele hakandekoke mokande.

## 2

<sup>1</sup> Nebei aere ne reyae a hokoukokale mai kena bekobe mokorembombe bele, roko benenne mai bokore reyae ei sului. <sup>2</sup> Rabuhine ban reyae mare kena beko yae mokorembombena, nde naei yae raei kena roungeisehinde? Mayae kena bekore mokombokamale yo yaere na hului raei kena rowensehimbe. <sup>3</sup> Reyae mai bokore erele hee mai baka ranne huluinye raei kena rowensehimbe yo yae raei kena bekobe mokonsebombe bele, bena homo nebei ma yae moloukokale. Raei kena elae hubanale raei kena rowensehinde mare mokorembombe mai kena rowenensimbe. <sup>4</sup> Nebei homore raei kena beko bele buhae angkala-angkala kowale nane merau ijoko ibo bele balewaisele yae moloukokale. Mayae kena bekore hubannele naeise nda a haraungebokale wamale ban, nebeibe mayae nanemene isaeyembombe raei kena buhae emekai bele mare haemalene.

### *U Mekai Beko Mokowole Rore Benen Ei Hawennele*

<sup>5</sup> Mai jemaatna u mekai bekore mokoukoke ro rare kena beko ebi mokoufeboke, nebeibe mare nanemene kena beko kaban mokombokembe. Nebei ro naeise reyae a helende elei. <sup>6</sup> Nebei u mekai ma rora mai nolona ro miyae helen mae a elae ukaungene mo, ehee bukulu na yun ran kaembai ranne ninae wokaungele. <sup>7</sup> Mayae nda hee nebei kiyaele u mekai beko mokoubokere u benera nundenengkombe nane merau nebei ro kena beko hele yembondene wali horombonde belene, na kena u hara roronnembe. <sup>8</sup> Nebei aere ne reyae moi huramale benen nebei kiyaeere kena buhae haeunge u mekai ma yae nare kelennele. <sup>9</sup> Mayae na hele raeinya a yoni-yoni wamale huluinye hakaube mokaube naeise, umalire hubarensimbere reyae nebei homobe moloukokale. <sup>10-11</sup> Mayae nekaube holona yo hiwa nebei ro beko mokoubokere u benera nundennekombena, mai foi aere ne reyae nebei role beko u benera nundensekonde. Walobo yun mon rowende aere mokommekonde naei me kelee u keleene nekemale belene, Wali Ondofolole ro be ro yoinye reyae nebei u mekai bekore u benera nundenaisekonde (u mekai beko na hele mokoubokena). Nebei a usaei wamale rabuhine ban walobo yun mae ro miyaere beko mokoumi me u yoni-yoni eyae aisaei yaendebokene.

### *Allah Are Heteungekoke Nibi Neme Ro Miyae Wali Himalainyeboko Yo Yae Me Baemmile Are Huwemmile Yo*

<sup>12</sup> Wali Ondofolole na a foi faeu foise hufemilere Troas yore ekale hee, nebeinye kalia mokorele naeise Tuhan nibi kaeu-kaeu fele wekeungele. <sup>13</sup> Nebeibe reyae isaisa alalo kowale, rabuhine ban aei aka baeke Titus nebei yone ehubayeikoinye. Nebeinye Troas yora erele naei a nebeinya ro miyaere ukamaelera kulun ukale Makedonia kanire ewale.

<sup>14</sup> ((Paulus nekewole heena yokejore meleumihake fela yun na felayo bele rora kaenainyele naeise, nebei yona ro miyae nolore homone aloiboyate oyorowate. Nebeinye oyorowate hee yae o ha fololo bele ongkou wae eisayeyaimi hanewate.)) Reyae Allahre helen foi wanale rabuhine ban Wali Ondofolole walora eyae Allahle yokejore melammile nane merau Wali Ondofolole a foi faeu foi nebei ongkou fololo faeungekoke beele wanen a hire a hire huweyate. <sup>15</sup> ((Nibi enene ro miyae fololo bele ongkou huneisiyate, isaeyaeiboke naei yona fela yun na yokejore meleumihake.)) Allahle ro be ro yoinye maere Allah ukeume Wali Ondofolo yae walobo yunde meleungehake are ro miyaere huwammile yo nebei fololo bele ongkou wanen. Wali Ondofolore hila rabo haleyainyene wali hena bona u mekai hubanainyele yo bele hila rabo ehaleinye

Allah bele wahaeikoke u mekai yae nekate yo bele u nolo u kainye ongkou fololo bele foisiyeunge wanen Wali Ondofololena a foi faeu foi huwemamile. <sup>16</sup> Ro miyae Allah bele wahaeikoke nekate yore, eyae no man fololo wanen, nebeibe wali hena bonare enainyehubande yore, eyae kembo fololo foi wanen. Ro miyae hiwa nda wanen u bene nekaimi, “Nebei kalia nde yae na hului emmokongkondere?” <sup>17</sup> Nebei Allah yae maere ukeume Wali Ondofololena a foi faeu foise ro miyae helen mae nai hei-sei rambun wanen mae mokainye ma yae meyae ehuwei, nebeibe Allahle ro be ro yoinye meyae Naei abu ako wanen mae mai u bene yolo-yolo yae mekai haranneboke huwayembe.

### 3

<sup>1</sup> Naendae mekai, meyae rore baemale naei wanen mae mai u huwande? Ro miyae hiwa bumare kolonaimilere homo raitainye molate wanen mare yayembe naeise meyae ro miyae hiware eriyei nane merau hiware yemmile naeise mare eriyei! <sup>2</sup> Mayaabe mai uware kaemale homofae wanen. Nebei homofae mai kena une homo moloumekoke nane merau ro miyae nemene nebei homofaene ikowate. <sup>3</sup> Wali Ondofolole a foi faeu foi mai nolone huwewayembe hee, Allah Walilole Roh elae mokombokembe mai kena ura na hele elaukoke. Mai u mekai neme nekeimeyaube hului nye kelaeumi Wali Ondofolo Naei kaliare mai walora mokole. Nebei homofae tinta yae ban nane merau ruka ranne molaikoke ban, nebeibe mai u mekai wa mekai neme yae.

<sup>4</sup> Mai wali neme walora mai kena u hara roroyeume Wali Ondofolo a weume hului mokande yae Allah kena foise mokannele. <sup>5</sup> Nebei kalia mokoi Boise mai uwana elae wake yae na hului mokomabonde a yae elei, nebeibe Allahlena elae wake kiteume yae mokande. <sup>6</sup> Allahlena elae wake yae maere kiteumeboke ro miyae wali himalainyeboke yo yae me baeyeumi are heteungekoke nibi neme a ro miyaere kelemamile. Nebei nibi neme Musale walora wali heere folaikoke a walora ban, nebeibe Allahle Roh walora. Musale walora wali heere folaikoke a hului nye ehakoiboi ro miyae Allah bele wahaeikoke nekate, nebeibe Allahle Roh weumi a hului nye hakainye ro miyae wali hena bona u mekai hubanainyele.

*Allah Are Heteungekoke Nibi Neme Ro Miyaere Wali Himalainyeboke Yo Yae Me Baemmile A Baengko Fereufake*

<sup>7</sup> Musale walora wali heere folaikoke a hului nye ehakoiboi ro miyae Allah bele wahaeikoke. Nebei a yae na hului ro miyaere beko mokowoumi hororebe, Israel ro miyaere Allah nebei a rukane moloukoke ikeumi hee, Allahle one hengko bele ei aungeboke. Allahle one hengko kitainyeboke hehe yae naeungekokene nebei hehe elae ban yeiboyole hororebe, nebeinye ro miyae Musale be yoise kanenainyebondere kabewainye. <sup>8</sup> Nebei wali heere folaikoke a meke heene Allahle one hengko hehe yae naeungekokebe, nebeibe emekai bele Allahle Roh yae Naei are heteungekoke nibi neme ro miyaere wali himalainyeboke yo yae me baeyeumi ana hului aei kena u einye Allahle hehe naemmele wanen a foi huwemmele. <sup>9</sup> Rabuhine ban nebei ro miyaere wali heere folaikokena mere noyoumi a baengko bele fereufakebe, nibi neme Allah ro miyaere wali himalainyeboke yo yae me baeyeumire emekai bele na baengko fereufake. <sup>10</sup> Nana hesele bena wali heere folaikoke a baengko fereufake yae hubawanne, nebeibe nda hee baengko ban mae elande, rabuhine ban nibi neme ro miyae wali himalainyeboke yo yae me baeyeumi a na baengko hele fereufake. <sup>11</sup> Wali heere folaikoke a na hibi mo ohonoyei nane merau elae ban kiyae baengko fereufakena, emekai bele yae na hibi mo hononende nane merau elae bele Allahle nibi neme ro miyae wali himalainyeboke yo yae me baeyeumi a baengko hele fereufake.

<sup>12</sup> Meyae rabo elae halaende Allah are heteungekoke a hului nye mokonde aere, meyae be bele rabulandeboke Wali Ondofololena a foi faeu foise huwande. <sup>13</sup> Meyae Musa yae mokouboke wanen ban. Israel ro miyae Musa na be yoi Allahle hehe naeukokere ijoko kanenainyebonde belene, na be yoise malo yae feleuboke. <sup>14</sup> Nebei mo ban, nebeibe Israel ro miyae naei u bene wa bene bele elae mokoumiboke. Meke nda hee bele Israel ro miyae Musale walora wali heere foloukoke ikowatebe, malo feleuboke wanen na kena une namman Allahle nene waewae naeise isaeyei kate, rabuhine ban Yesus Wali Ondofolo hila rabo halemande walora nebei malore obuleuboke wanen Allahle nene waewaere yakanaiibonde. <sup>15</sup> Nda hee bele yae Musale walora wali heere foloukoke homone ikowatebe, Allahle nene waewaere isaeyei, malo yae feleumiboke wanen na kena u bele feleumi. <sup>16</sup> Nebeibe ro miyae Wali Ondofolore hila rabo halennele hee, nebei malo obuleuboke wanen na u bene wewe konnekonde. <sup>17</sup> Tuhan Yesus Allahle Roh mbai. Makeinye ro miyae Tuhan Yesusle Roh weumi are hakainye yo, Musale walora wali heere foloukoke hului nye ehee bukulu hainyemikondera me ruboumiboke. <sup>18</sup> Nane

merau aei be yoi malo efelei yae be nulune erande merau, Tuhanbe nene waewaere ereyanne ro miyaeer mokuume Naei uwa nene waewae bele u mekai wanan ibewande. Tuhan Naei Rohre a weunge aere mahi mokommele walora Nenaiejae u mekai neme imokowoume.

## 4

### *Allahle Naeise Aei Kani U Kela U Yae Ro Romande*

<sup>1</sup> Nebeinye, Allah yanekoi yase yae ei haweyeume walora wali himalayneboke yo yae me baemmele nibi neme are kelaemmile kaliare ikeumene, meyae rabo ban ma yae enekei. <sup>2</sup> Maere fere mokommele me u yoni-yonire na moi-moi sele yae mokowandera hee nekande, ame-ame yae ebei, nane merau Allah yae ukeume a usaei wasaeise roko mbai na ijen ban mae ehuweikoi. Nebeibe Wali Ondofolo na hele wali nibi are na yaka yae huwayembene ro miyae nemene kena u einya bele huluisse kolommelene, isaeinyaibonde Allahle ro be ro yoinye meyae na ijen mokande. <sup>3</sup> Ro miyae hiwa Wali Ondofolole a foi faeu foi meyae huwandere nana yae elate hororebe, nebeibe Allah bele wahaeikoke ro miyae aerere na nana yae honole. <sup>4</sup> Allahle uwa mbai Wali Ondofolo nene waewae bele Kiyaele a foi faeu foi huwandere isaeieboi sului nane merau isaeinyate belene, Wali Ondofolore hila rabo ehalei ro miyae mere mokoumi walobo yun mae nebei yo naei u bene kabe raneumiboke.

<sup>5</sup> Maei uwa naei a faeube huwammile ban, nebeibe Yesus Wali Ondofolo na hele Neyae Tuhan a faeube huwayembe, nane merau meyae nebei Kiyaele aerene mai yebaei bubaeise yaendeboke abe huwammile. <sup>6</sup> Allah nda a ukeunge, "Ouben nolora hehe naengkonde hele!"\* Allah are ukeunge huluinye yeuboke. Wali Ondofolore rore roumabonde naeise nebei Allah mbai aei kena u einye hehe naeumekoke. ((Nendahina Israel ro miyae Musale be yoinye kanewainye yae Allahle hehe eraiboke wanan eyae Wali Ondofolo elele are isaeimale yae Allahle nene waewae isaeimabonde.))

<sup>7</sup> Allah bele Wali Ondofolo belere ranneboke naeise eba he wanan. Nebei eba he wanan isaei hebaen aei uwa kani u kela u mokoumeboke einye koloukoke. Maei elaeane ban nebeibe Allahle elae maei walora mokolere yakambonde naeise, Allah maere kani u kela u bele ro miyae ukeume Wali Ondofololena a foi faeu foi huwemmamile. <sup>8</sup> Maere enera faeisa beko mahi-mahi hubaime hororebe, Wali Ondofolole kaliare namman mokande. Rahe nibi yae Wali Ondofolole kaliare mokomalere meyae onaende handande hororebe, kena elae roweume Neyae maere hakommele. <sup>9</sup> Maere weitasi kaime hororebe, Allah maere enukeiboi, rahuae yae boikoyaimene ane balande honande hororebe, meyae eherei. <sup>10</sup> Wali Ondofolole wali maei kani u kela u wali walora yakaumi naeise, Yesus honaibondere kena kowate wanan mae ro miyae kena kate maere honaimelere. <sup>11</sup> Meyae here bele uwa nekande walora Wali Ondofolole wali yakambonde naeise, Naei kalia mokande aerene ro miyae na hibi-hibi maere honaimekondere relaeinye. <sup>12</sup> Ro miyae na hibi-hibi maere honaimekondere relaeinye, nebeibe maei kalia mokandene, mayae wali hena bona u mekai hubaungele. <sup>13</sup> Allahle homofaene Yahudi Ondofolo kaban Daud nda wanan moloukoke, "Reyae hila rabo halaennele aerene a eleukokale."<sup>†</sup> Allahre Daud hila rabo halewolene Allah uwoungae are huwoumi wanan, meyae Wali Ondofolore hila rabo halaennene Neyae weume are huwammile. <sup>14</sup> Rabuhine ban meyae isaeiyaendeboke Tuhan Yesusre here u nolo u kaisa aungunuke Allah Kiyae mbai yae aengkele Yesus Naei nanembainye ammenunde, nane merau mangkele yawemembebonde Yesusle ro be ro yoise yae emale. <sup>15</sup> Mai foi naeise nda wali ma nekande nane merau Wali Ondofololena a huwammile. Wali Ondofolole walora ro miyae helen Allah kena buhae aere ban mae hemmilene Allahre helen foi ebeli enainyebonde nane merau Allahre hili enainyehende naeise meyae nda wali ma nekande.

<sup>16</sup> Nebei aerene meyae rabo ban u mekai yae enekei. Naenda mekai horo maei melen u ha u beko bende, nebeibe maei kena une na yane baei na hibi-hibi neme beimeyande. <sup>17</sup> Rabuhine ban nda heena kena beko u beko foma-foma bele nda wali fofone hubannera Allah yae nene waewae bele uwa yemmele huba ban haei ban nekamale. Allah yemmele wali ma na foi sele nda kena beko u beko bele wali mara. <sup>18</sup> Nebei aerene ijoko yae ereiboi rambunde na hibi-hibi u bene nekaimela, ijoko yae erande rambunde u bene enekei, rabuhine ban ijoko yae erande rambun na hibi mo ohonoi, nebeibe ijoko yae ereiboi rambun huba ban haei ban hononayende.

\* 4:6 4:6 Kejadian 1:2-4 † 4:13 4:13 Mazmur 116:10



## 5

*Surgane Nekemale Naeise*

<sup>1</sup> Meyae maeisaei aei melen u ha u fale wanen nda kani kelane nekande beko yembondena, ro miyae me yae omokoiboi kayeerobe Allah mokoungehake surgana huba ban haei ban hebenende imae wanen uwa neme yemmekonde. <sup>2</sup> Nda hee fale wanen melen u ha u einye nekandene eyae kena beko hubanne, rabuhine ban eyae kena kaban kande surgana nebei imae wanen uwa bele emanekenderene. <sup>3</sup> Ro miyae mbai malo yae hireikoyelene melan enekei wanen nebei uwa neme bele nekemalene eyae unulu bangka mo enekei. <sup>4</sup> Eyae heremalene unulu bangka mo nekemalere kena okoi aerene ban, nebeibe aei surgana imae wanen uwa bele nekemalere kena kande aerene, nda fale wanen uwa bele namman nekandene kena beko yae nane merau ehee bukulu yae hubanne. Huba ban haei ban hononende rambun mae mokommibonde herenate rambunde u yembonde naeise, meyae surgana imae wanen uwa bele nekemalere kena kande. <sup>5</sup> Allah yae surgana imae wanen uwa bele huba ban haei ban nekemande naeise mokoumeboke bele nebei uwa neme yemmekonde belere kelemmekonde naeise, Naei Roh ikeume. <sup>6</sup> Allahle Roh maei kena u hara roroyeumene meyae kena rei mai yae nekande, erabae aeisaei nekande nda uwa melen einye nekande yae Tuhan nekele anuwaunge aengkele ban. <sup>7</sup> Aei kena u einye Wali Ondofolo Naei a elelere hila rabo halaenne walora wali nekande, Nauware ijoko yae erannene ban. <sup>8</sup> Reyae benen a elale, "Allahle Roh yae maei kena u hara roroyeume, nebeibe heremale walora maei kani u kela u nukemambonde Tuhan nekele anuwaunge nekemalere na foi sele yae elande." <sup>9</sup> Nebei aerene nda uwane nekandena, heremalena, eyae relemende Tuhande kena foise mo mokomande. <sup>10</sup> Rabuhine ban eyae nemene fomene wali hului kolommekonde naeise, Wali Ondofolole ro be ro yoise emale, eyae nda kani kelane uwa nekewande heena me u foi, me u foi ban mokowande hului na roibu yaromale.

*Ro Miyae Allah Bele Foi Mokonate Nibi Naei A*

<sup>11</sup> Meyae maeisaei Tuhan mae aei walire hului emmekolondene, Nare fe faeman. Nebei aerene meyae ro miyaere moi elae hureyammi Wali Ondofolore hila rabo halenainyele. Maei u mekai harannebokere Allah roumeboke nane merau reyae rabo halaale mai kena u einye maere raumeboke. <sup>12</sup> Ro foise baemale naeise maei uwa eharaiwai, nebeibe maei wali nekande mare isaeyembombera mayae na hului kena rowenensimbe maei are huwemmile naeise, maei wali mare yakambondere moloukokale. Maei wali mara isaeyembombene, ro miyae kena u yolo-yolo naeise rabuhi ban elate ijoko erate anuwau foi nekate nane merau rambun yoni-yoni bele aerene ukaei kaeyate yore mayae na hului wo foi kummile. <sup>13</sup> Meyae keube aumeboke kandena, Allahre kena foise mokomande naeise kande. Nane merau maei u bene foi yae nekemalena, mai foi naeibe mokande. <sup>14</sup> Wali Ondofolo aere kena buhae heumene, meyae kena kaban kande Naei kaliare mokomalere. Meyae isaeyaendeboke ro miyae nemene beko mokowate aerene ro mbai hereke, nebei mekai mbai ro miyae nanemene heraiwoke. <sup>15</sup> Walire nekate ro miyae naei uware kena foise mokonainyele naeise ban, nebeibe Yesus Wali Ondofolo ro miyae nemene foi naeise hereke, benen aungunuke Kiyaele kena foise mokonainyele naeise.

<sup>16</sup> Wali Ondofolo ro miyae nemene naei aerene hereke are hila rabo halaennene, nda kani kelana wali beko nibine orate ro miyae yae hiwa yore ijoko eraimi wanen mae meyae erei. Na bere Wali Ondofolore nebei ma yae erewanne, nebeibe nda hee benen nebei mekai ban. <sup>17</sup> Nebeinye ro miyae mbai Wali Ondofolo bele mbainye nekenetena, nebei ro miyae u mekai neme bele rore yeuboke, u mekai male kiyae u yeuboke. <sup>18</sup> Nda yoni-yoni nemene Allah yae mokoukoke. Wali Ondofolole walora Allah nibi mbai mokouboke Nangeke aengkele foi nekemale. Nane merau Allah a ukeume hului nebei foi nekemale nibi are humayende, <sup>19</sup> Wali Ondofolole walora Allah nibi mbai mokouboke nda kani kelana ro miyae Allah naei foi nekenate. Wali Ondofolo Naei a elelere hila rabo halaete ro miyae naei beko mokowate Allah me ebaei. Allah maere ukeume nebei nibi naei a faeu ro miyaere hungaimile. <sup>20</sup> Nebeinye meyae Wali Ondofolole Ro eisa huwammi, maei walora Allah yae huweumi wanen. Wali Ondofolole Ro eisa reyae mare moi huramale Allah bele foi mokongkombe. <sup>21</sup> Wali Ondofolo bele mbainye nekande ro miyaere Allah wali himalainyeboke yo yae me baemmele naeise, eyae beko mokande yo aerene Allah yae Wali Ondofolo beko omokoyei Kiyaere ehee bukulu wokounge.

## 6

<sup>1</sup> Meyae Allah Naei kalia mbainye mokande yo yae mare moi hurayembe Allah kena buhae aere ban mae hengkokembe Kiyaele a foi faeu foi huwewayembe borowaubebe rabuhi ban mae ereijae! <sup>2</sup> Rabuhine ban Allahle homofaene Allah yae a eleuko,ke, "Reyae merau raungehikale mare hakorembombe hee yae Reyae mai are boromboka-male, nane merau merau raungehikale holere molorembombe hee yae Reyae mare hakom-bokamale."\*

Reyae wamale, nda hee niyae Allah merau raungehike mare hakonembombere. Nda hee niyae Allah merau raungehike wali holere molonembombere.

*Paulus Wali Nekele Ma*

<sup>3</sup> Ro miyae hiwa maei wali ma oro halun wanen imabonde nekemalene moi bulenaibonde belene, maei u mekai na moi-moi sele mokanne. <sup>4</sup> Meyae Allahle yebaei bubaei hele yae nekande yo, maei me u nemene ikelewammi Allah weume a huluinye nekande. Nda u mekai beko meisubaima hororebe meyae kena yae herawandeke Wali Ondofolore hila rabo eisalewanne: kena bekore mokoume rambun eisubawandene, maei uwane beko ibewatene, kena beko u beko ikowandene, <sup>5</sup> rahuae baimene, kawane eyaheikoyaimene, han yo eisabelaeimene, kalia roi yae bu eibewandene, ijongku foi honoiboi ban eikowandene, moni yae einyekewandene. <sup>6</sup> Meyae Allahle yebaei bubaeibe nekandere kelemamile naeise nda u mekai ma bele nekame: wali yolo-yolo, Allahhena isaei hebaen bele, kena hebaen-sebaen, kena nime haba, Allahle Roh weume a huluinye nekande, kena buhae u buhae bele, <sup>7</sup> na hele a huwande, Allahle elae bele, wali ijen nekandene bekore hate erahan bele. <sup>8</sup> Nda u mekai yoni-yoni isubawannende hororebe Allahle kalia imokowande: be yae enaimehinende bele fe yae enaimemokonde bele, maei naei a foi yae ungaimela bele a beko yae ungaimela bele, Wali Ondofolole a foi faeu foi maei kena u na yolo-yolo yae isuwammibe nebeibe maere ame-amere baende ro miyae yae waime, <sup>9</sup> ro miyae maere ro raime nebeibe maere onaeime yae eyelewatebe, hereinye-hereinye nebeibe meyae namman wali nekande, rahuae baime hororebe nebeibe meyae ehereiboi, <sup>10</sup> kena beko u beko isubawanne hororebe nebeibe meyae na hibi mo rei mai ikowande, meyae hun ban wai ban nebeibe ro miyae helen sele Allah yae yemmila rambun foise yaronatere isakowammi, maei uware me bangka yae eraimebe, nebeibe Allah yae yemmila rambun foi yoni-yoni maainya honaime.

<sup>11</sup> Mayae Korintus yona jemaat ro miyae, maei kena ei u einye hubannele ma nanemene hele na yaka faeu yaka yae wayengkokembe. <sup>12</sup> Nane merau mai naeise maei kena u einye anuwau mon kaban sele mokannehake, nebeibe maei naeise mai kena u einye anuwau mon ban hele. <sup>13</sup> Raei kelu omi wanenne riyamale maei kena u wanen mbai maere bele yae mai kena u wemme.

*Wali Ondofolore Hila Rabo Ehalei Ro Miyae Bele Mbainye Oroijae*

<sup>14</sup> Yesusre hila rabo ehalei ro miyae bele mbainye mai walire eharaijae. Rabuhine ban hehe bele ouben bele nenaie nenaie ma wanen, Allahre kena foise mokainye ro miyae bele Allahre kena bekore mokainye ro miyae bele u bene mbai ban. <sup>15</sup> Na hului ban sele Yesus Wali Ondofolole bele walobo yun Belial yae rowainye bele mbainye nekenete. Wali Ondofolore hila rabo halaete yo Allah yemmila rambun nenaie ma, ehalei yora. <sup>16</sup> Allahle ei mom-mom imae bele walobole ei mom-mom imae bele nenaie nenaie ma, rabuhine ban wali bele Allah yae nekende imae eyae niyae ((nebeibe walobo nekate imae wali ban rambun niyae)). Allah Nenaiejae eleuko,ke: "Reyae nebei ro miyae bele wali mbainye nekemale nane merau naei u nolo u kainye eroronde. Reyae nebei yo naei Allahre isebonde, nebei yo Raei holona yore inyaibonde."† <sup>17</sup> Nane merau "Tuhan mae elele,

'Allahre ei ehawei ro miyae u nolo u kaisa uwa wemembe, wali nibi mbainye orojiae.

Allah wanen rambun hiware ei omolommimae,

Reyae mare ei arembombe.' "‡

<sup>18</sup> "Tuhan Elaelo Wakelo a eleuko,ke,

'Reyae mai Akore isebonde,

mayae Raei kelu omire yembombe.' "§

\* 6:2 6:2 Yesaya 49:8 † 6:16 6:16 Imamat 26:12 ‡ 6:17 6:17 Yesaya 52:11 § 6:18 6:18 2 Samuel 7:14

## 7

<sup>1</sup> Aka naei baeke naei, nebei Allah yae hetewoungwe are eyae isaeyaendebokene, men, uwa bele u bene bele nikire olaeime rambunde moi bulemale. Allahre ei molannene, men, Naei eleuboke wekeumi holona yo naei wali mare haramambonde.

*Rahe Aerene Paulus Kena Roweungehike*

<sup>2</sup> Mai kena ei u einye maere anuwau bele mokommebo. Meyae nda u mekai yae nekeimeyande: ro hi miyae hire meyae u mekai beko omokoiboi, beko mokonatere moi ehurei, rambun helende hononaimela naeise ame-ame yae ewabei. <sup>3</sup> Nebei a mai naeise elaubere reyae eweyei. Na bere reyae a ukamale wanen mbai wamale, mai kena u einye mare anuwau bele mokayengkokembene, herene waline maengkele mangkele homo mbainye oromale. <sup>4</sup> Raei kena elae hubanale mayae Wali Ondofolo wembe a huluinye nekaube. Mai naeise ukaei kaele nane merau kena aufenuke. U mekai beko yun ran kaembai ranne hayaeime hororebe, mai aerene raei kena na rei mai meleimelei eimelewole.

<sup>5</sup> Meyae Makedonia kanire ekande hee no yeiboi ban hubawande, enera faisa u mekai beko yoni-yni no ban hee ban nei yae nekaimela, fe waku nekeume kowande. <sup>6</sup> Nebeibe Allahre kena beko u beko kate ro miyaere na hibi-hibi homo mbai a mbainye orande Kiyae, Titus, meke walora maere kena aumenuke. <sup>7</sup> Titus mekene mo mai kena aumenuke nane merau mai bokone ekenekewole hee mayae naei kena aungenuke a huweumekoke. Titus maere nda a huweumekoke, "Mayae kena hele rangkele hubaimakondere, raei kena beko mokaufeboke u mekai bekobe mehi yae folaubee, nda hee raei aere bele olaube." Nebei u mekai ma mokaubene, rai kena roweufehike.

<sup>8</sup> Naenda mekai horo raeinya homo ikamale yae mokombokembe mai kena beko u beko hubawaunge, raei mehi hako ofoloi. Na bere reyae mehi hako foloukokale, nebeibe nde hee isaeyebokale raeinya homo moloukokalene mai kena u beko hubawaunge, nebeibe ya heki ban. <sup>9</sup> Nda hee raei kena rei mai sele kale mare kena beko mokombokamale aerene ban, nebeibe kena beko hubawaunge yae mare mokombokembe wali beko nekewaubere moi bulaungeboka uwa olomauboke. Allah kenare kole huluinye mayae kena beko kowaubene, mai homo molandekokera mare beko omokoiboi. <sup>10</sup> Allah mehauwae waesiyeyumi bekore mokate ro miyae kena beko u beko eikowaimine, wali beko nekewatera nulu kenaibonde bukenainyehinde nane merau Wali Ondofolo yae nare hole molommibonde. Nebei kena beko u beko mare mehi ofoloi. Beko mokate ro miyae kena beko u beko eikowaimine nulu ekeiboi yo Allah hele wahrenaikonde. <sup>11</sup> Eren, Allah mokombokembe kena beko u beko kowaungene nda rambun yoni-yni bewate: rilibo ban mae mai jemaat nolona beko yoni-ynire hiyei ranembombere, mai ro miyae meleyae foi mokauboke naeise maere isaeyembombere, nebei bewate naeise ikele yae kowaubere, Allah mare ehee bukulu inyembere buhae hokowombere, kena maemae hele Allah wembe a huluinye nekembere, mai uwa mokaungehake bekore mokouboke rore ehee bukulu hayennebombere. Na yaka lelewaunge nebei u mekai bekore mayae omokoi. <sup>12</sup> Raei mekai ma haraungebokale nebei homo mare moloukokale nebei beko mokouboke ro aerene ban nane merau bekore mokoungoboke ro aerene ban, nebeibe Allahle ro be ro yoinye isaeyembombe mayae na hele maere ei hawaume aerene. <sup>13</sup> Nebei u mekai mokaubene mai kena aumenuke.

Nane merau mai kena aumenukere baraumeboka. Titus maise eke heene mayae naei kena u hara rorowaunge rei mai kowolere erandebokene, emekai bele mai kena u roweumehike kowande. <sup>14</sup> Namman ei yae Titusre mai naeise a uwanale nane merau mai u mekai foise buma kaewamale. Nebei a yoni-yni uwanale nanemene mayae na hele mokoungoboka. <sup>15</sup> Titus mai bokore eke kulunna mare uwombe a huluinye na fe waku bele kowaube hakowaube nane merau na mekai yae ei hauwaungele. Nebei aerene na kena buhae mare emekai bele hembere. <sup>16</sup> Raei kena roweufehike, rabuhine ban kenara elae hubanale mayae nda kulunne na foi mo mokombe.

## 8

*Kena Faere-faere Yae Rambun Wahembe*

<sup>1</sup> Aka naei baeke naei, Allah na kena buhae aere ban mae heumine Makedonia kanina jemaat yoni-ynire hakowoumi naeise meyae mare isaemayembombere. <sup>2</sup> Na waline beko kaban hubawainye hororebe, na kena une rei mai kaban kowate. Hun ban wai ban nolone nekewate hororebe, kena faere-faere yae rambun hungkae melaeli hiwa yore hakonaimibondere ikaima. <sup>3</sup> Renaei ijoko yae erekamaele honowaimi huluinye iwaimi ban, meyae a eweibe naei kenara emekai bele iwaima. <sup>4</sup> Nebei yo maere na

ri-ti riwaimé meyae ehe komamikonde Yesus Naei eleuboke wekeumi ro miyae hiwae hakonaimibonde naeise. <sup>5</sup> Maei u bene nekewaime hului ban mokowate, nebeibe na bere naei wali Allahre kinyainyebokera Allah kenare kole huluinye meyae uwoumi are hakowate. <sup>6</sup> Makedoniana jemaat yoni-yoni nebei u mekai mokowatene, meyae Titusre moi hurewanne neyae mai nolone aere ban mae yei wahei rambunde arilenate naei kaliare huba raweubokene, neyae ahunennebonde mokongkonde baensonde. <sup>7</sup> Mai Korintus jemaatna ro miyae nda u mekai yoni-yoni na foi yae mokaube: Wali Ondofolore hila rabo halaunge, Naeinya a foi faeu foise huwaube, Naei isaei hebaen isaeyaeuboke, Naei kaliare kena maemae yae mokaube, maere kena buhae u buhae haeume. Nebeinya mai yei wahei aere ban mae wahembe me u emekai bele mokombe.

<sup>8</sup> Nebei u mekai mokombere a elae yae reyae mare ewei. Nebeibe hiwa yo Yesusle einye aka baekere kena buhae u buhae haemire mare kelerembombe yae, mon isembe nebei sului mbai mai yei wahei walora Yesusle einye aka baekere kena buhae u buhae hemmile. <sup>9</sup> Rabuhine ban mayae maisaei sele Yesus Wali Ondofolo aere kena buhae aere ban mae heume. Neyae hun bele wai bele Kiyae, nebeibe hun ban wai ban yembonde walora mayae na hului rambun bele yembombe naeise, Neyae hun ban wai ban yeuboke.

<sup>10</sup> Mai foi naeise reyae nda yei wahei naei a usaei wamale, ralo yakama moise wokandene hakoi-sakoi rambunde yei-yeise mayae huba raweuboke yo mo ban, nebeibe mai kenara na bemere yakauboke. <sup>11</sup> Huba rawauboke mai kena maemae kowaube mokowaube u mekai ma mbai huba mokonnekombe naeise, mai rambun honowayembe huluinye mai yei waheise huba halennekombe. <sup>12</sup> Yei waheise mayae kena kaubena, mai rambun honowayembe hului yennele yae Allahle kena foise mokaube, rabuhine ban Allah kena kole mainya ohonoi hului yae yennelere ban, nebeibe mainya honayembe hului yae yennelere.

<sup>13</sup> Mare ehee haisembe hiwa yore mai roibuna yae foma-foma mokoremile naei u bene yae eharaiboi, nebeibe yaeumi yo yarate yo na hului sului nekembe naeise. <sup>14</sup> Nda hee helende honayembe yo kalore molommiboke yore mai honayembe rambunda na hului mokommibombe. Nebeisa mayae kalo enemmolombe heene, helende hononaimile yo yae hakonayembombe. Nebei nibi yae maise naeise na hului-sului nekembe. <sup>15</sup> Allahle homofaene nda wanen molaikoke: "Helende abuneyate ro miyae ran-danne mo enekei. Keli namere abuneyate ro miyae kalo mo omoloyei."\*

<sup>16</sup> Reyae helen foi Allahre wanale, rabuhine ban Neyae Titusre mokuungeboka mare hakonembombere kena kole, raei kena kale ma mbai. <sup>17</sup> Rabuhine ban meyae riyanehike are be hineungebokene ban, nebeibe Titus naei kenare kole huluinye mai bokore ele. <sup>18</sup> Titusle mbainye enete ro meyae ukannele mai bokore enete. Nebei ro jemaat-jemaat nanemene eise molowainye kiyae, rabuhine ban Wali Ondofolole a foi faeu foi naei kaliare na hibi-hibi mokoyele. <sup>19</sup> Bararebonde, nebei ro Makedonia jemaat-jemaat yae elaeiboke kiyae maengkele nanembaisa mainya rambun arilaikoke bele roumande Yudea kanina yore emamiyende. Tuhande be hinannele naeise nane merau meyae kena maemae hele Yudea kanina jemaat yoni-yonire hakomamibondere kelaemmile naeise, nebei me u mokomakondere. <sup>20</sup> Ro miyae a mahi-mahi ahunenaimile belene, maei uwa kayaare mbainye emale nda rambun kaban na mekai yae emawahende. <sup>21</sup> Meyae na mekai yae mokande, Tuhande ro be ro yoinye mo ban, nebeibe ro miyae naei bene nebei sului yae mokande.

<sup>22</sup> Ro hi meyae ukannele Titusle holone hakommibonde enate. Nebei ro eisako meisako naeise roko yae roko yae umali hubannekokene, na yaka yeuboke na kena maemae Wali Ondofolo a weunge hului hakoyeunge. Nda hee mayae yei wahei rambun arilensimbe rambun Yudea kanire hawemande naeise hakommebondere neyae kena kaban kole. <sup>23</sup> Titusle a hinenayembena, neyae raei kahili mai foi naeise kalia mbainye mokonde. Ro hi ate naei a hinenayembena, na jemaat-jemaatra ukaimile mate nane merau naei u mekai mokate yae Wali Ondofolore be hinainye. <sup>24</sup> Nebeinya jemaat-jemaat na bene nebei ro nanemene kena buhae u buhae hemmile, nane merau ro miyae naei bene mai uware reyae kaewamale hului u mekai wa mekai foi mokombe.

## 9

<sup>1</sup> Yesus Naei eleuboke wekeumi ro miyaere hakaumi rambun yemmile enate naeise benen reyae homone omoloi sului, <sup>2</sup> rabuhine ban mayae kena kaube hakommile naeise reyae isaeyebokalene. Makedonia ro miyaere mai u mekaise bumane kaewalere nda a yae uwamaele, "Akhaya kanina ro miyae moise wokande ralo yakamane uwa

\* 8:15 8:15 Keluaran 16:18

mokainyehake yei wahei rambunde arilenaisinde inyaimilere.” Nana hesele mai kena maemae yae mokaube u mekaise ro miyae helen eraikokera nebei wanen mbai kena kaban kate nebei Yudea kanina ro miyaere hakonaimikondere. <sup>3</sup> Mai u mekai foi reyae bumane kaewamale are huwamale ame-amebe inyaibonde bele, nebeibe reyae wamale huluinye mai yei wahei abunyangkombe naeise, Titusre hakainyekoke ro hiwa bele mai bokore ukamaele enatere. <sup>4</sup> Mai bokore memale heene Makedonia kanina ro miyae nangkele hakonaimebondena, raei kena elae hubanale mai naeise uwamale huluinye yei wahei rambun omokoisai yae hubaimakondene meyae fe hubamansinde nane merau nebei fe mbai mayae hubannehimbe. <sup>5</sup> Mayae a nulauboke kena faere-faere yae nebei yei wahei abunyangkombe. Meyae fe hubamansinde belene, Titusle naeise bere holo yae moi hurewamaele yei wahei rambun mokonainyehande ereiboise enatere. Nebei nibi yae nebei yei wahei rilibo bele yae yemmikombe ban, nebeibe kena rei mai yae anembombe mai kena na faere-faere yemmikombe.

<sup>6</sup> Nda a niyae bene nekenayembe, heke ro mbai ohaka konda-konda heraeyendena, ani kelae-kelae ensokonde; helen enseraeyendena, ani helen ensokonde. <sup>7</sup> Ro miyae mbai kena une a hokoukoke hului yae yemmile, olomo narulu ban mae yoyae-yoyae molainyene ban mae, rabuhine ban kena rei mai yae yeyaimi yore Allah kena buhae u buhae heumi. <sup>8</sup> Nane merau mayae me u foi na bune-bune mokomembe yae mai wali rambun nemene na hibi-hibi hononayemembe naeise, Allah na hului Naei rambun foi nemene aere ban mae inyembe. <sup>9</sup> Allahle homofaene nda wanen molaikeke, “Allah rambun foi yoni-yoni hun ban wai ban yore waheyeumi; Naei ijen bele u mekai na hibi mo huba ban haei ban hononende.”\*

<sup>10</sup> Neyae heke ro naei o bolu bele nane merau ro miyae anenete raman belere mokoungehake Kiyae. Nebei Allah mbai yae mai yei wahei wahembe rambunde benen inyembe nane merau helen ennemokonsande. Nane merau Allah mokonnebonde mai yei wahei rambun na ijen mae wahengkombera ani helen enaisokonde. <sup>11</sup> Mayae na hului kena faere-faere na hibi-hibi yei wahei wahemembe naeise, Allah yae mai wali rambun nemene emekai bele yae inyembe. Nane merau mai yei wahei kena faere-faere mokommibombe ro miyae helen Allahre helen foi ungainyele. <sup>12</sup> Nda me u foi mokombombe yae Yesus Naei eleuboke wekeumi ro miyae naei kalo moloumire na hului sului mokommibombe mo ban, nebeibe nebei me u mokombombene ro miyae helen Allahre helen foi ungainyele. <sup>13</sup> Mayae nebei rambun wahaeumi yae kelemmile mayae na hele Wali Ondofolo wembe a huluinye nekaube. Mayae Wali Ondofololena a foi faeu foise huwami hului mbainye mokombombene, nane merau kena faere-faere yae Yudea kanina ro miyae belere ro miyae nemene belere rambun wahemmilene, ro miyae Allahre hili enainyehabende. <sup>14</sup> Nane merau hakommile yo Allahre ebeline bonainyele yae, mare kena buhae henayembe, rabuhine ban Allah mare kena buhae emekai bele aere ban henemembere. <sup>15</sup> Allahre helen foi umande, rabuhine ban aere a yae faeu wae eyakaiboi sului rambunbe ikeume.

## 10

### *Paulus A Yakauboke Neyae Na Hele Wali Ondofolole Abu Ako*

<sup>1-2</sup> Reyae Paulus Wali Ondofolole Ro eisa raei naeise a mbai nerembere. Mai nolona ro miyae hiwa raei naeise nda ame-ame a yae elate, “Paulus aengkele mbainye einyekande hee naei u mekai nime haba hele, nebeibe ahaufa eyewole bae are be yae rabuleiboyole weume.” Nebei are elate ro miyae nda kani kelana wali beko nibi a huluinye nekate. Mayae maisaei Allahre ro be ro yoinye Wali Ondofolo Nauwa ro ban sele hubawoung, nebeibe Allah uwoung hulu yae nane merau kena nime haba yae ro miyaere mokowumi. Reyae kena kale Wali Ondofolole u mekai wanen ro miyaere mokoremile, nebeibe reyae hubanale nebei ame-amere elate ro miyaere be bele rabulerebonde a elae ufemile hele. Reyae mare riyamale mai bokore erele heene mare be humbarebonde a yarerembe naeise mehauwae omokonsemale. <sup>3</sup> Na hele meyae nda kani kelane namnan nekande, nebeibe nda kani kelana yo felare rorate naei meli mekai yae omokoi. <sup>4</sup> Maei erahan nda kani kelana rambunda ban, nebeibe maei erahan Allahle elae yae Naei erahande kitemmebondene uwa hunde kolomamile nane merau a ame-ame yoni-yonire heraeimamile. <sup>5</sup> Allahre ronainyebonde nibire elere neyate u mekai kayeerome meyae horoyande. U bene naijen ban ro miyaere a usaei wasaei weyammi yae na kena hawammi Wali Ondofolole a weumi huluinye u bene nekenaimile. <sup>6</sup> Mai jemaatna ro miyae na hele Wali Ondofolo wembe a huluinye

\* 9:9 9:9 Mazmur 112:9

hakoimeyaungere eremayembombe heene, maei uwa mokannehake ehakoiboi yore ehee bukulu imamikonde.

<sup>7</sup> Mai ijoko bena erembe hului yae nekembe! Nauwa Wali Ondofolole Naeise yaeubokere elate ro miyae maei naeise nou hemmobo! Meyae nebei sului mbai Wali Ondofolole holonare yaendeboke. <sup>8</sup> Tuhan mae anuwau maere ikeumere reyae uware kaele naeise reyae fere ehubaisi. Nebei anuwau elae ikeume mare bekore mokomambombe naeise ban, nebeibe mare hakomambombe naeise. <sup>9</sup> Raeinya homo yoni-yoni yaemalere mayae buhaere hokonembe naeise u huku-hukube kamale yae erennele bele, mai foi naeise Tuhan anuwau elae bele ikeumene a huwamale. <sup>10</sup> Rabuhine ban ro miyae hiwa yae elate, "Paulusena homo yoni-yonina a nerabuhi bele nane merau elae bele. Nebeibe aei u nolo u kainyeye mbembane einyekewande bae, naei u mekai hosoro hele nane merau naei ahuba huwele ma baengko ban sele." <sup>11</sup> Nebei a meraufe elate yo isaeyiaibonde hele, kulunne mai u nolo u kaise erele bae reyae homo einye molowale a elae mbaibe ufengkombe.

<sup>12</sup> Meyae na hului ban sele maei uwa bele rore baete ro miyae bele hului ramansindere. Nebei yo u bene nekaimi hului yae naei uware uware hului kolaimine, neyae isaei ban hebaen ban hele. <sup>13</sup> Meyae na mekai bele mo maenaie uwa emakaende. Allah yae maei kaliare mokomalere hului raungehike naei mo uwa emakaende. Mayae Korintus yona ro miyae maei kaliare mokande anuwaunge aweuboke. <sup>14</sup> Mai nolone meyae kalia mokowandene na mekai sele uwa emakaende, rabuhine ban mayae ahau fele nekaube anuwaufe mekande Wali Ondofolole a foi faeu foi huwewayembe. <sup>15-16</sup> Allah yae maere ekinyeiboi kalia hiwa yo yae mokowatere meyae uwa ekaei. Meyae na hului mayae nekaube yo yande ahau buhau sele honate yo yande nebei a foi faeu foi emamihuwengkonde naeise, meyae rabo halaende mai hila rabo elae baranemembe yae meyae mai u nolo u kainye na hului kalia emekai bele emamokonde. Meyae kena okoi hiwa yo yae aimokoukena anine uwa emakaende bele. <sup>17</sup> Allahle homofaene nda wanen molaikoke: "Uware kaende ro, Tuhan mae naei uwara mokoengebokebe ennekaende."\* <sup>18</sup> Rabuhine ban Allah yae u mekai foi ereumi ro miyaere wali ijen nekate yo yae me baende, nauwa nenaiejae foi yae ereunge kiyae ban.

## 11

<sup>1</sup> Reyae rabo halaele naei foi sele raei kobu kalere kena yae herawembombe. Na hele mayae namman kena heraweimeyaube. <sup>2</sup> Allah mai naeise kena me yae heyele wanen reyae mare kena me yae heyale. Rabuhine ban mayae raei maengke yele reyae mare Wali Ondofolore molone hambokamale wanenne, reyae kena kaban kale Neyae wembe a huluinye nekembe. <sup>3</sup> Nebeibe reyae buhae hokoufe nendahina yobe Haware rami ame-ame yae wabeungehike ruke wanen mae, Wali Ondofolore u bene yolo-yolo mekai haraungeboke yae hubara haeise yaneyaungera a mahi-mahi kelaeimi walora mai u benere wabenayengkombe balemba bele. <sup>4</sup> Na bere meyae kelewewayembe a walora Yesusre ro raungeboke, nane merau Allahle Roh ambokembe, Wali Ondofololena a foi faeu foi na hele yae elaukoke. Reyae eramale hiwa yo yae mate meyae kelewewayembera Yesus hibe huwayembe, roh u mekai mahi nane merau a foi faeu foi mahi huwayembe. Nebei are meyae huwayembe wanen ban boraube hororebe, mayae kena yae herawaube nekaube nebei yore ehukei. <sup>5</sup> "Emekai bele abu ako" yae eraimi yora raei uware are holo yae ehubai. <sup>6</sup> Raei ahuba huwale ma meli mekai foi ban hororebe, isaei hebaen naeise nebei wanen ban. Raei u mekai nemene mokowale walora reyae isaei hebaen belere yakaimeyamale.

<sup>7</sup> Wali Ondofolole a foi faeu foi huwamale hee raei roibu mare eriyei. Naendae wanen, Allah mare rore ronembombe naeise raei uwa ane oitasiyanalere bekobe mokowamale? <sup>8</sup> Mai u nolo u kainye kalia mokowale hee, raei uwana kalore imolowoufe rambunde kaliare omokoi jemaat yae iwaise. Nebei jemaat naei roibe reyae yoko yae baewale wanen. <sup>9</sup> Nane merau mai u nolo u kainye nekewale hee mainya rambunde eriyei mo, rabuhine ban kalore moloufe rambun Makedonia kanira mate aka baeke yae na hului mokoiboyaisele. Nda hele bele mainya roi eriyei mo, benen eriyeyei mo nekerendere. <sup>10</sup> Wali Ondofolole na hele no Kiyae raei kena une nekelene, ro miyae raei wali rambunde mare eriyei aere ne uwa kaerele are Akhaya kanina ro miyae mbai sambai hee enei. <sup>11</sup> Reyae mare kena buhae ehei aere ne ban nebei wali ma yae nekererele. Allah yae Naeisaei nekele reyae mare kena buhae haemale. <sup>12</sup> Ro miyae hiwa Wali Ondofolole abu ako ame-ame elate yo raeinya wanen mbai maisa wali rambun yaratene ((maei anuwau elae bele mbai naeise)) na uware enaikaende bele, reyae mainya wali rambunde eyaroi.

\* 10:17 10:17 Yeremia 9:24

<sup>13</sup> Nebei ro miyae nda u mekai wanen nekate: abu ako wabu-wabu yae harainyele, ro miyaere ame-ame baeimi, Wali Ondofolole abu ako wanen mae uwa molaiboke orate. <sup>14</sup> Nebei u mekai mokoiboise eme banne, fa yae oboijae. Rabuhine ban walobo yun naei mekai haraungeboke Allahle a faeu na helere huwemmilere malaikat wanen mae uware molouboke. <sup>15</sup> Nebei aerene walobo yunbe yebaei bubaei yae Allahle yebaei bubaei wali himalainyeboke yo yae Allah me baemmile nibire kelewaimi yo wanen mae nauware ame-ame molonaiibonde naeise eme rambun ban. Nebei yo na u mekai beko mokoyate huluinye wali huba mokoikoi heene ehee bukulu emmihayende.

<sup>16</sup> Nebei a relahibe benen wamale, "Mayae rare ro kobu yae eleijae." Nebeibe reyae ro kobu a elaubena, rare kobu ro miyae yae wanen mae ei hawense, nane merau mon ebi fere waensihira raei uware ebi ken kaerebonde. <sup>17</sup> Nda u maengkeu koi-koi, Tuhan Nenaiejae huweumi na wanen reyae huwale ban, kobu ro miyae wanen mae huwale. <sup>18</sup> Ro miyae helen nda kani kelana wali beko nibine orate yo wanen naei uware kaeyatene, reyae ebi ken raei uware kaerebondere. <sup>19</sup> Mai uware isaei bele hebaen bele yae elaubebe, nebeibe kobu ro miyae naei a wayembere mai kena rei mai yae na hebaen-sebaen iborowaumi! <sup>20</sup> Mayae nda u mekai bele ro miyaebe ei hauwaumi: naei yebaei bubaeise mokayembe yo, mai rambunde ame-ame yae yarowate yo, u mbemba yae kalia mokombere mokayembe yo, nenaiejae anuwau bumane baete yo, me boi u boise konayemembe yo. <sup>21</sup> Nauwae mayae hubaunge, nebei u mekai ma mokoiboise meyae be erabuleiboi omokoiboinye reyae fe korele hele.

Nebeibe reyae ro kobu yae elale, "Ro miyae hiwa yo be yae rabulaiboke uware kaenate rambun reyae nebei rambun mbai be yae rabuleubokale uware kaerele." <sup>22</sup> Nebei yo Ibrani ro miyae yae elate. Reyae naei mekai mbai Ibrani ro miyae. Israel ro miyae yae elate. Reyae naei mekai mbai Israel ro miyae. Abrahambe orona mena yae nekatere elate. Reyae naei mekai mbai Abrahambe orona mena. <sup>23</sup> Nebei yo Wali Ondofolo Naei kaliare mokate yo yae elate. (Keunga ro miyae wanen mae elale.) Reyae nebei yore moi wokamaele. Nda weitasi kowaiselere ro miyae rare ehameikoi: kalia roi yae bu yae bewekale, kawa einye roko yae roko yae ahaeiseke, rahuae elae baiseke, kena beko isubawanalene hereinyen-hereinyen ikowale. <sup>24</sup> Yahudi ro miyae yae roko maehae mbai ha yae wowo koikoyaise erahuae olewaise, roko mbai mo 39 hului boikoyaise. <sup>25</sup> Roko name rantai yae erahuae olaeisekoke. Roko mbai ruka yae hayaeisekoke. Roko name naubu walaubune meyae ewande kai koloumekoke. Roko mbai reniai rai koko na bumokone mo nau wala yae hayeumeke. <sup>26</sup> Roko helen yo ran yo rande orowekale nane merau nda rambunda beko hubayewekale: wi bumaera, yokoyora, Yahudi ro miyaera, Yahudi ban ro miyaera, yo einye nekwelalera, yo moinye nekwelalera, naubu walaubura, nane merau ro miyae nauwa Wali Ondofolole einye aka baekere elatebe erabae niyae ban yora. <sup>27</sup> Nda wali ma isubawanale: kalia ehekaei no ban hee ban imokowale, roko helen ijongku ikabewanale, moni mai, buki, raman ban nekwale, manse, malo ban. <sup>28</sup> Nebei ehee mo ban raei baka ranne kaewale, nebeibe na yane baei jemaat yoni-yoni holeremile naei u bene na hibi-hibi raei kena une meinyeufe. <sup>29</sup> Jemaat nolona ro miyae male u yambi u hubanainyele aerene rangkele kena beko u beko hubarende, nane merau u mekai bekone naremmihinde balenate aerene raei kena naume hanensebonde.

<sup>30</sup> Rare moise hurewaise yae uware kaerelena, male u yambi u yae nekalere kelewaimi rambunde mo uwa kaerele. <sup>31</sup> Hubawanale rambun naeise Allah Wali Ondofolole Ako huba ban haei ban ro bumane kaenainyende Kiyae Naeisaei reyae mare ame-ame ebei. <sup>32</sup> Damsyik yona Ondofolo Aretasle me kelee u kelee me mokowumi kiyae yae rare ikilenaibonderene felayore ukeumi nebei yo yan kayaa yae hebewate. <sup>33</sup> Nebeibe yore naiboke ele bulu mbaisa anuwau mbainye aiseboke ele moise yae nokaisele are okale. Nebei mekai yaere ikilenaibonde yo naei me eisa efaeubokale.

## 12

*Paulus Naei Uware Rambun Emere-Emere Ijoko Ereuboke A Bele Naei Uwana Isa Hubawoungé Bele*

<sup>1</sup> Rahe foi tonde raei uware kaerele? Nebeibe Allah yae imene a uwoufe nane merau rambun eme yakaufoboke naeise a hufembere. <sup>2</sup> Ralo yakama me bee oro nen keli bele moi hayaendekoke rare Allah yae kaeufoboke surga name nendore ekale, ime naline, nda melen u ha u ube kaeuboke ewole naeise Allah mo naeisaei sele. <sup>3-4</sup> Reyae benenbe wamale, Rare kaeufoboke Firdausne ekale naeise nda melen u ha u yae, ime nalibe kaneubokale Allah mo naeisaei. Nebeinye ekale yae ro miyae yae ehameikoi abe ekaborowale nane merau ro miyaere ewaeisi elei naei a. <sup>5</sup> Nebei rambun yoni-yoni ewalere uwa kaerele, nebeibe raei uware ekaei. Reyae male yambi u yae nekale

aerene mo uwa kaerele. <sup>6</sup> Rambun hiwa naeise reyae na hului kobu yae ban, nebeibe na hele yae uware emekai bele kaerele. Hiwa yo rare bumana hele yae erenaisele belene, raei uwa ekaei. Reyae kena kale me u mokalera nane merau a huwamaelera ro miyae raei walire hului kolonaisele.

<sup>7</sup> Rambun eme hele Allah keleuwufe aerene emekai bele uwa erekaende belene, raei uwane beko hubarende rambun ikeufe, isa uwa bulune neufele wanen. Rambun walobo yun mae ukeunge meke rare mokonsebonde u bulu wa bulu beko hubarendere. <sup>8</sup> Nebei naeise reyae roko name hele Allahre meungeriyekokale nebei beko raei walira wennende. <sup>9</sup> Nebeibe Tuhan mae weufe, "Raeinya kena buhae aere ban mae ware haewale yae na hului, rabuhine ban Raei elae wake male yambi bele ro miyae naei uwara na yaka hele enaijakambonde." Nebeinye Wali Ondofolole elae wake raei ranne na hibi hononde naeise, reyae kena bele roweufehike raei male yambi yae nekale naeise uwa kaerele. <sup>10</sup> Nebei aerene Wali Ondofolole foi naeise nda rambun beko mokaise yae kena roweisiyaise: raei uwa male u yambi u yae ikowale, raei rore a yae isorowate, aukaka yae enaisekonde, kena beko u beko ikowale, weitasi eikowaise, kalo eisubawanale. Rabuhine ban male yambi hubanale hee Wali Ondofolole walora elae yeiboyale.

*Korintus Jemaatre Paulus Baka Ranne Huluinye Hubawounge*

<sup>11</sup> Mayae moisa elae huraufekokene, reyae kobu ro miyaere yeubokale. Mai baka ranne huluinye mayae raei naeise a foi elauwe, rabuhine ban naendae mekai horo rare me baei banbe, nebeibe "emekai bele abu ako" yae eraumi nolona mbai sambai rare ehameikoi sului. <sup>12</sup> Kena u yae herawewekale ma reyae Wali Ondofolole abu akore yeubokalere kelerembombe naeise, rambun emere-emere mahi-mahi mai u nolo u kainye mokowekale. <sup>13</sup> Jemaat hiwara ei hawewamaele ma mbai Reyae mare ei hawewamale, raei wali rambun mare eriyei me u mo nanaei ma. Nebei u mekai beko mokoubokale yae eraungena, ninnae u benera nundenengkombe!

<sup>14</sup> Nda roko name nendobe mai bokore erelere uwa mokoungihakale. Bena nekewale wanen raei wali rambunde mare eriyei, rabuhine ban mai uware honayembe rambunde baele banbe, nebeibe raei kena kale mayae Wali Ondofolo wembe a hului hakonnele naeise. Kelu omi yae ako nakere rambun ufenaimilere ban, nebeibe ako nake yae na kelu omire ufaimi. <sup>15</sup> Nebeinye raei honaisele rambun nemene rei mai yae isembe naeise nane merau mare hole molorembombe naeise, raei uwa kinyerembombe. Nebei kena buhae ma mare emekai bele haemalene, na mekai sele mai kena buhae u buhae mbai rare hensele. <sup>16</sup> Nebei naeise karo yae elale. Roko mbai raei wali rambun mare eriyei. Nebeibe mai u nolo u kaisa hiwa yo yae elauwe, "Paulus u bulu-bulure eweukoke. Aeinya rambunde yarongkondere ame-amebe wabeume." <sup>17</sup> Mai bokore ukamaele ekate ro miyae walora mainya rambun yaroukokale a yae elauwe? Na hului ban. <sup>18</sup> Naendae wanen, Titusre moi neungehikale mai bokore ende nane merau ro hi ukanale nare hakoungeboke ekete heena mainya rambun yaraikoke? Nebei mekai na hului ban! Maaisaei sele Titusle rangkele kena mbai nane merau mai foi naeise kalia mbai mekai mbai yae mokonde.

<sup>19</sup> Nda ma haraungebokale elalene, mai u benera elauwe maei aerene olele abe elele. Nebei mekai ban. Allahle ro be ro yoinye Wali Ondofolole kaliare mokandene meyae nda a mare wayembe. Mokoimeyande yoni-yoni nanemene mayae Wali Ondofolo wembe a hului mokombe naeise elae bele yembombe. <sup>20</sup> Reyae buhae hokoufe mai bokore erele heene reyae kenare kale wanen maisa ehubaikoi, nane merau mayae kenare kaube wanen raeisa ehubaikoi. Reyae buhae hokoufe nda u mekaibe mai u nolo u kainye hubaimakonde bele: a kilei-kilei, kena hensan, kena ikele, yoho yoho, a hufuu, a mongko-mongko, u maengkeu, nane merau wali hiyei eraneiboi yae nekaube. <sup>21</sup> Reyae buhae hokoufe mai bokore erele bae ro miyae helen mai u nolo u kainya bere wali niki bele nekewate, yoko kaeimae kowate, u mekai bokore kena haehae hele kowate mokate, nane merau nebei u mekai bekora namman nulu ekeiboi nekeimeyate. Nebei aerene mai bene Allah ane hele rare ensekolonde nane merau reyae kena beko u beko yae erekonde.

## 13

*Angkaa Yobowoumi*

<sup>1</sup> Nda roko name nendobe mai bokore erelere. Reyae merele hee Allahle homofaene molaikoke huluinya mokorele. Allahle homofaene nda wanen molaikoke: "Ro miyae me u beko mokoubokene a ahuneungeboke naeise a hokonaikondena, nebei me ure



eraikoke ro miyae bee name yakanaibonde helera hokonaikonde.”\* 2-3 Roko bee nendo mai u nolo u kainye nekewale hee nebei u mekai bekore mokowate yore ehee bukulu haisemikonde naei isaeyembokamale. Nda hee reyaе аhaunge nekale yae mare benen isaeyaemale. Wali Ondofolo na hele raei walora wembere iwau baеubene, reyaе benen mai bokore erele hee nebei u mekai beko mokowate yore bele u mekai beko mokate ro miyae hiwa bele reyaе ehee bukulu haisemikonde. Wali Ondofolo elae wake bele yae mokonembombe, male u yambi u yae ban. 4 Yesus Wali Ondofolo ro miyae naei male u yambi u bele yae ohaline baikoke hereke, nebeibe nda hee Wali Ondofolo Allahle elae yae wali nekele. Nebei sului mbai meyaе Wali Ondofolo bele mbainye nekandene Naei wanen male u yambi u nekande, nebeibe mai jemaat nolona me beko u beko mokate ro miyaere na mekai yae mokomamibonde naeise, Allah elae wake Wali Ondofolore ikeunge yae mokomale.

5 Mauware menaeijae hamenneko, mayae na hele Wali Ondofolo Naei a elelere hila rabo halaеube, ehalei? Nebei naeise ijoko foi eren! Maisaei nekaube, Yesus Wali Ondofolo mai kena une nekele. Wali Ondofolore hila rabo ehalei ro miyae naei kena une Neyae enekei. 6 Raei kena elae hubanale, mayae isaeyembombe meyaе na hele Wali Ondofolo Naei a elelere hila rabo halaende. 7 Meyaе Allahre ebeli banne Neyae mare hakonembombe mayae na ijen ban mae hului okoloi naeise. Maei kalia Wali Ondofolo ukeume hului yae mokandere hiwa yore kelaemmi naeise ban, nebeibe mayae Allah kena foise na ijen mokonnele naeise, naendaе wanen horo maei kalia Wali Ondofolo ukeume huluiyе ban mokande ma eraimе. 8 Wali Ondofolole na hele wali nibi a hului mo mokande. Nebei a asasi komangkonde me ure omokoiboi sului. 9 Meyaе elae ban nekande nane merau mayae na ijen mokombe naei elae bele nekaube hee, maei kena rei mai kande. Mai wali hiyei ranembokembe yae nekembe naeise, meyaе Allahre ebeli boyannele. 10 Reyaе erele heene Tuhan mae rare ikeufe anuwau yae mai u nolo u kaise nekate ro miyaere a usaei wasaei elae yae ufemile hele belene, namman ei yae nda homo moloukokale. Nebei anuwau elae bele ikeufe mai hila rabore arenunde naei, hororembombe naeise ban.

#### *Huba Mokoikoi A*

11 Homo huba mokoikoise nda a yae wamale, mai kena rei mai yae komembe, relenembe mai walibe himalennebombe yae nekembe. U bene mbai nane merau riya mbainye kena rei mai yae nekembe. Allah kena buhaе u buhaе melaеu nane merau rei mai melaеu mare ei haungemembe.

12 Wali Ondofolole einye aka baeke ma yae maise naeise ro foi melaeyemembe. 13 Ndana Yesus Naei eleuboke wekeumi ro miyae nemene mare ro melaeyayembokembe. 14 Meyaе ebeli bomande Tuhan Yesus Wali Ondofolo kena buhaе aere ban mae henembe, Allah yae kena buhaе u buhaе henembe, nane merau Allahle Roh mare ei hawenemembe.

---

\* 13:1 13:1 Ulangan 19:15

## GALATIA

<sup>1</sup> Aka naei baeke naei jemaat-jemaat Galatia kanine nekaube, mauwa bele! Reyae Paulus, Yahudina, Yesusle abu akore yeubokalere, ro yae miyae yae rare eleiboi, nane merau moi eneisi. Nana hesele Yesus Wali Ondofolo yae nane merau Ako Allah, Yesus ohaline baikoke herekera walire ikeunge Kiyaele, rare eleiseboke nda kalia are ukeisele.

<sup>2</sup> Aei aka baeke wa, rare moise huraise yo bele mare a melaeyayembe.

<sup>3</sup> Allah aei Ako Kiyaele Yesus Wali Ondofolo belere reyae nda a yae ebeli bamaele, Neyae kena buhae aere ban mae mare henemembe, nane merau kena foi u foi mokonemembe. <sup>4</sup> Allah aei Ako merau haraungeboke huluinye Yesus hakouboke. Aei beko bako aerene Na wali yokeijore ikeumi haiboke. Nebei nibi yaere nda heena wali bekora aere hole molommebonde. <sup>5</sup> Allah nembai huba ban haei ban mae hili hebenainyende. Amin.

### *Wali Nibi Mbai Sele*

<sup>6</sup> Mai u mekai haraungebokere reyae mahi hele hubanale. Wali Ondofolo mare kena buhae aere ban mae heungkokembe, mai wali nibi bekora kaenngkokembe. Mana Naeinya wali nibi a foi faeu foise mayae moi yae bulaeunge, hiwa yo naei a faeu huwayembe wali nibine aufakoukoke. Nebei yo yae mare abe wabayembe. <sup>7-9</sup> Naeinya hesele wali nibi a foi faeu foi hi u hele! Nebeibe mai nolona ro miyae hiwa Wali Ondofolole a foi faeu foi huwayembe boraubokere benainyehonde naei mekaibe harainyeboke. Naendae mekai horo meyae, malaikat surgana yae bena huwayembere benen wali nibi a faeu ma hi yae ungayende huwenatena, Allah yae nebei yore olomo rorommile. Reyae bere ukamale a mbai nda benen melaelibe mare roramale: Ro miyae nde nde yae wali nibi naei a faeu ma hi yae huwenatena, Allah yae nebei yore olomo rorommile.

<sup>10</sup> Menaeijae eraufe, ro miyae yae ei molonaisele naeise reyae ebaei. Allah yae be hinensele naeise reyae baele. Ro miyae naei foise kena haufemile naeise namman baerelena, reyae Allahle abu ako ban.

### *Paulus Yesusre Roungeboke Ma*

<sup>11</sup> Aka naei baeke naei, mayae isaeyembombe, Yesuslena wali nibi a foi faeu foi huwngkokamale, nebei ro naei miyae naeinya a ban. <sup>12</sup> Ro naei miyae naeisa reyae orowei, nane merau neyae rare eweikoi. Nebei wali nibi a foi faeu foi naei raeisaei ban nekwale rambunbe Allah yae keleufeboke, Yesus Wali Ondofolo naeise rare yakaufeboke walora keleufeboke. <sup>13</sup> Raei wali na bere agama Yahudi naei era hena huba man mokowanalere borowaube, Allahle jemaatre hoberekonderene waeli hele bewale. Eisa bele meisa bele habelewande, weitasi kowamaele. <sup>14</sup> Raei hokolo uniyau hi yae ha yae Yahudi naei agamana honate mokoi-mokoise rare ehameikoi, nane merau yobe naei kamahe naeitena era henare raei kena roweisiyeufe hubara haeise eijanewale. <sup>15</sup> Nebeibe Allah kena buhae aere ban mae rare heufekoke, menakele kou bulu yahi bulune nekwale hee rare eleufeboke, kaeneufekoke Naei abu akore isebondere. <sup>16</sup> Allah kena koukoke raei wali einye Naei hina fa hoi fa yakaufeboke. Yahudi ban ro miyae Naeinya a foi faeu foi eremihuwendae aerene Naei Fa yakaufeboke. Nebei naeise reyae hiwa naeisa a usaei eriyeyisi. <sup>17</sup> Nane merau Allah rare ekaeneikoi hee bere holo yae Yerusalem yone Yesusle abu akore yaieboke nekwate yo naei bokore reyae ei. Yesus uware yakaufeboke heera reyae oro moloubokale Arab kanire ekale. Nebeisa beufokale Damsyik yore mekale.

<sup>18</sup> Allah kaeneufekoke heera, ralo yakama name meungekeukokale mo, Yahudina ro Petrus hubayaekonderene Yerusalem yore ekale. Nebeinye ya me bee oro nen maehae mbai bele (15) nangele nekendekoke. <sup>19</sup> Yesusle abu ako hiwa yo reyae ehubaikoi. Ro hi Yakobus, Yesus nauwake mbai mo hubayendekoke. <sup>20</sup> Raei uwana yaieboke rambunbe homone molale Allahle bene reyae mare ame-ame ebei. <sup>21</sup> Nebeisa mo reyae Siria kani bele Kilikia kani belere ekale. <sup>22</sup> Nebei hee Yudea kanina Wali Ondofolole jemaat-jemaat raei rore mo naeisaei, raei be yoibe neyae ereiboi. <sup>23</sup> Ro miyae huwewatere mo raei naeise isaeiwate. Nda a mekai huwewate: reyae ro mbai nansau, bere Yesusre hila rabo halewate yore mehinin ban mae weitasi kowamaelebe, mana Yesusre hila rabo halaenale, Naei wali nibi a faeube huwamaele naendae wanen horo na bere nebei a faeufe hoherengkondere relewanale. <sup>24</sup> Yudea kanina jemaat-jemaat raei wali Allah foi mokoufoboke a borowatene, Allahre buma kolowainye.

## 2

*Paulus Yerusalem Yore Eke*

<sup>1</sup> Nebeisa ralo yakama me bee oro nen keli bele (14) meungekeukokale mo, benen Yerusalem yore ekale. Nebei kulunne Barnabas rare hakoufeboke, nane merau Titus yaweungehokale naei bele mbainye ekande. <sup>2</sup> Yerusalem yore ekale Allah na mekai yakaufeboke huluinye hakoubokale. Jemaat kaban be yun be yebae hebate yo riyane na mo-mo nekewate yae Wali Ondofolole a foi faeu foi Yahudi ban ro miyaere huwamaele a isaewamaele. Rabuhine ban reyae buhae hokowoufe nebei be yun be yebaei hebate yo raei a faeufe na hele ban elenate belene. Nebeinye elae halae releungekokale nane merau reilemeyanale roibu karobe balensekonde belene. <sup>3-5</sup> Nebei hee Yahudi ro holo mbai aei nolore ijoko-ijokore aei aka wanen baeke wanen wabu-wabu yae mekate. Eyae Yesusle einya nekande wali ma namman Musale walora wali heere foloukoke are hubara haeise yanannelere neyae ijoko roboikoise mekate. Na merau harainyeboke eyae benen Musale walora wali heere foloukoke are me ikilemabonde, benen naei yebaei bubaeise imakondere. Nebei ro holonare reyae mon ebi fen eyei. Rabuhine ban reyae kayaa hebale, Wali Ondofolole a foi faeu foi na hele are mayae borauboke, nebeisa wabenayengkombe Musale walora wali heere foloukoke are hubara haeise yanenembe bele. Raei kahili Titus, Yunanina ro, raei bele oroyende kiyae, Yahudi era hena hului ro uwa elan nenainyehandere nebei jemaat kaban naei be yun be yebae hebate yo yae a elekoi.

<sup>6</sup> Nebei be yun be yebae hebate yo Wali Ondofolole a foi faeu foi huwamaelere a eme wanen hi neyae ebaraihoi. Nebei be yun be yebae hebate yo naei yeisi raeihoi bele hororebe, reyae rabuhi ban mae erewamaele, rabuhine ban Allah be ijokore ereyei. <sup>7-8</sup> Yeisi raeihoi belere erewaimi yo yae na hele elewate Allah yae nda a foi faeu foi rare ukeufe Yahudi ban ro miyaere hufemilere, Allah yae Petrusre ukeunge Yahudi ro miyae nolone huwoumi wanen mbai. Yahudi ro miyae nolone Allah Petrusle walora me u mokoukoke wanen mbai Yahudi ban ro miyae nolone Allah raei walora me u mokowole. <sup>9</sup> Petrus, Yakobus, Yohanesle bele, jemaat kaban be yun be yebaere me baeiboke yo isaeyaeiboke Allah yae Naei uware nekele rambun rare keteufeboke, Naei abu akore Yahudi ban ro miyae nolone mokorele naeise. Nebeinye rangkele Barnabaslere me hinaimekoke, meyae bee Yahudi ban ro miyae nolone me u mokale, Petrusle holona yo Yahudi nolone me u mokonate. Nebei naeise neyae be hinaimeboke. <sup>10</sup> Na a relen a huwe bele rorowaime wa nda a bele haraimeboke waime, "Kounge kalone hubayainye yo bele yae emmihakombe." Reyae nebei me ma u mare raei kena maemae mokorendere.

*Paulus A Elae Yae Petrusre Weungekoke*

<sup>11</sup> Ya mbai Petrus Antiokhia yora meke u mekai beko keleuboke erekanale aerene na yaka faeu yaka yae a elae hele weungekokale. <sup>12</sup> Rabuhine ban, Petrus meke hee Yahudi ban ro miyae yo bele raman mbainye nondon anawate naendae wanen horo Yahudi era henara nebei me u asasi kaikoke. Nebeisa Yakobusle holona Yahudi era hena ro uwa elan folaimile a faeufe kelaime yo mekate erekeumi fene, Petrus uwa weke, Yahudi ban ro miyae bele raman mbainye anei. <sup>13</sup> Petrus nebei u mekai mokouboke erewatene, Yahudi ro miyae hiwa hakainyokoke. Nebeinye Barnabas naei bele nebei u mekai huluinye eufakouboke. Nebei Yahudi yo Yahudi ban ro miyae bele raman mbainye anei. <sup>14</sup> Na u mekai wa mekai kelewainye Wali Ondofolole a foi faeu foi a na hele huluinye ehakoibo erewamaelene, Petrusre na yaka ha yaka yae Yahudi ro miyae bene nda a elae yae uwanale, "Weyae Yahudina ro, Yahudi ban yo naei wali huluinye nekeyae. Rahene Yahudi ban yore moi huramae Yahudi naei wali mekainye nekenatere."

<sup>15</sup> Reyae Petrusre uwane ahunebokale uwanale, "Honaimekoke yoho bae na hele eyae bee Yahudina, eyae Yahudi ban ro miyae, beko bele neban bele yae me baende holona yo ban. <sup>16</sup> Aeisaei nekende Musale walora wali heere foloukoke are hubara haeisa yanandae aerene Allah yae wali himalainyeboke ro miyae yae me ebaeibo. Nana hesele bae Yesus Wali Ondofolo Naei a elelere hila rabo halennele walora Allah aere wali himalainyeboke ro miyae yae me baemmele. Nebei aerene, Wali Ondofolo Naei a elelere hila rabo haleyennelene wali himalenneboke yae me baeyeume, Musale walora wali heere foloukoke hubara haeisa yanewonnelene ban. Rabuhine ban, ro miyae nebei wali heere foloukoke are hubara haeisa yaneungele horore, wali himalainyeboke yo yae me ebaeibo. <sup>17</sup> Wali Ondofolo Naei a elelere eyae hila rabo halaennele walora wali himalainyeboke yo yae me baemmele naeise relemandebe, nebeibe aei wali einya namman me u beko mokoimeyendena, Wali Ondofolo yae aere wali nibi beko keleyeumene? Nebeinye ban sele! Rabuhine ban eyae Yahudi ro miyae bae Musale walora wali heere foloukoke a nanemene ehakoibo suluinye. <sup>18</sup> Reyae Musale walora

wali heere foloukoke yae wali himalonainyele nibire hila rabo ehaleinya, nebei nibire hororebonde. Neyae raei wali einye rabuhi ban yeuboke. Reyae nebei wali nibi benen hakorendena, na yaka hele nebei wali heere foloukokere asasi koukokale. <sup>19</sup> Reyae Musale walora wali heere foloukoke are hakowanale hee yae, isaeibokale nebei nibi walora wali himaloungeboke ro yae me ebaei sului. Nebei aerene hakowanale nibi aheukokale, Yesus Naei a elelere hakorenderene. <sup>20</sup> Allahle bene Wali Ondofolole ohali mbainye rangkele baimekoke. Nda heena wali bae raei ban, rabuhine ban Allahle Kelu Wali Ondofolo yae raei wali einye nekenende, Naei a elelere reyae hakale. Neyae kena buhae aere ban mae heufekoke, Nauwa kinyeumbokere raei aerene haiboke. <sup>21</sup> Allah kena buhae aere ban mae heufekokere, reyae erabuhi ban mae eleikoi. Rabuhine ban, wali himalainyebokere nibi hi u hele. Musale walora wali heere foloukoke a ikeumi walora ro miyae wali himalonainyebondena, Wali Ondofolo meke ohali ranne meufereke rabuhi ban yeuboube." Reyae nda a mekai Petrusre ukanale.

### 3

#### *Wali Himaloi-Himaloi A*

<sup>1</sup> Aka naei baeke naei, Galatia kanina nekaube, mayae na kobu hele. Yesus Wali Ondofolo aei aerene ohaline baikoke. Nebei a foi faeu foi mai bene na yaka ha yaka yae kelembokamale lonbe? Mana mayae benen Musale walora wali heere foloukoke are hakombombere kena kaube. Nde yae mare buloo molongkokembe? <sup>2</sup> Reyae mare a mbai hinerensimberere, "Naendae wanen, mayae Musale walora wali heere foloukoke are hubara haehisa yanaunge aerene, Allah Naei Roh mare ikembe?" Nebeinye ban! Mayae Yesusle a foi faeu foi borauboke, Yesus Naei a elewolere hila rabo halewaunge, nebei aerene Allah Naei Roh mare ikembe. <sup>3</sup> Rahene mayae nebei mekai kobu lon kaube? Mayae Allahle Roh walora wali neme huba rawauboke. Rahene mana mai uwa elae walora wali himalenembombere relaeunge? ((Musale walora wali heere foloukokere hubara haehise yaneyaube nibi walora?)) Na mekai ban! <sup>4</sup> Naendae wanen, Wali Ondofolole a foi faeu foi wali nibine hakaukokene, beko helen sele mai wali einye hubawaube? Mana mayae nebei a foi faeu foi ehakoinya, nebei yoni-yoni hubawaube nemene nendon inyaibonde. <sup>5</sup> Naendae wanen, mayae Musale walora wali heere foloukokere hakaube aerene Allah Naei Roh mare ikembe nane merau rambun eme hele mai nolone mokowole? Nebeinye ban! Wali Ondofolole a foi faeu foi borauboke, Nare hila rabo halewaunge aerene nebei rambun eme mokowole.

#### *Abrahambe Walira A Ahuneuboke*

<sup>6</sup> Aei Yahudi naei yobe mbai Abrahamde eremambon! Allahle homofaene nda wanen molaikoke, "Allah Naei a elelere Abraham hila rabo halewolene, Allah nare walire himaloungeboke ro yae me baeuboke."\* <sup>7</sup> Mayae isaeyembombe, Allah Naei a elelere hila rabo haleyate ro miyae Allah yae Abrahambe orona mena yo yae me baembonde. <sup>8</sup> Allahle homofae keleyeumi Yahudi ban ro miyae Naei a elelere hila rabo enaisalende holonare walire himalainyeboke yo yae me emmibaende. Nebei naehise nendahina hele Allah isaeyeboke. Allah yae Abrahamde nda a foi ukeunge, "Waei eisa nda kanina kelana ro miyae onomi foka hubanayende."† <sup>9</sup> Abraham Allah Naei a elewolere hila rabo halewolene, onomi foka hubawoungere. Nebei wanen mbai, nde naei yae Wali Ondofolo Naei a elelere hila rabo halaeinye, onomi foka yae hubanayende.

<sup>10</sup> Musale walora wali heere foloukoke yae naei wali alonainyere relaete yore Allah yae olomo nemmibonde, rabuhine ban Allahle homofaene nda mekai molaikoke, "Musale walora wali heere foloukoke homone molaikoke a nemene na hibi-hibi ehakoiboi kiyaere, Allah yae olomo nennebode."‡ <sup>11</sup> Na yaka hele Musale walora wali heere foloukoke yae Allah ro miyaere wali himalainyeboke yo yae me ebaeiboi. Rabuhine ban, Allahle homofae yae na yaka hele weume, "Wali himalainyeboke yo yae Reyae me baemale ro miyae, hila rabo halaeinye yae nekenayende."§ <sup>12</sup> Nebeibe Musale walora wali heere foloukoke are hakainye wali ma, Yesus Naei a elelere hila rabo halaeinye mekai ban sele. Nana hesele nde yae Musale walora wali heere foloukokere hubara haehisa yanende kiyaere, nebei are kelaeimi hului nekende hele.

<sup>13</sup> Musalena wali heere foloukoke na ijen foijen mae hakomabondere kabaennekoke. Hi yae ha yae ehakoiboi sului. Nebei aerene nemene fomene olomo yae aumefoke. Nebeibe Wali Ondofolo nebei olomo honowatere aheukoke baeufoke. Allahle homofaene nda wanen molaikoke, "O bumane nenainyende hilonde kiyaere olomo neungeboke."\*

\* 3:6 3:6 Kejadian 15:6 † 3:8 3:8 Kejadian 22:18 ‡ 3:10 3:10 Ulangan 27:26 § 3:11 3:11 Habakuk 2:4

\* 3:13 3:13 Ulangan 21:23

Wali Ondofolo aei aerene ohaline baikoke hee, Musale walora wali heere foloukokena olomo neumeboke Neyae kaeuboke. Nebei nibi yae aere neumeboke olomore aheukoke baeufoke. <sup>14</sup> Nda aerene Wali Ondofolo aei olomore aheukoke baeufoke: Allah are heteungekoke huluniye yae Yahudi ban ro miyaere Abrahambe orona mena ro mbai Wali Ondofolo Yesus meke walora foi mokommile, nane merau eyae Wali Ondofolo Naei a elelere hila rabo haleyannele walora Allahle Roh aere ammebonde.

*Allahle A Nuleungekoke Ekelaiboi Sului*

<sup>15</sup> Aka naei baeke naei, yana bana nekeyande u mekainye a ahundebondere. Ro mbai a heteungekoube na hului ban sele nebei a heteungekokere hi yae horombonde nane merau barannebonde. <sup>16</sup> Allah yae Abrahamde are heteungekoke Abraham naei u mbai naeise, nane merau naei orona mena ro mbai naeise. Allahle homofaene Abrahambe orona mena helen hurenende naei abe eleikoi. Abrahambe onsira ro mbai sele, Yesus Wali Ondofolo, nebei Kiyaele abe eleukoke. <sup>17</sup> Nda niyae mayae isaeyembombe! Allah na bemere hele Abrahamde nda are heteungekoke: Allah Naei a elelere hila rabo halenainyele yore, Neyae foi moi mokommile. Nebeisa Musale walora wali heere foloukoke a manemfa hele ralo yakama 430 moi hayaekoke ikeumi. Allahlena a Abrahamde heteungekokere nebei wali heere foloukoke yae ohoroiboi sului. <sup>18</sup> Rabuhine ban, Musalena wali heere folaikoke walora Allah Naei wali himalainyeboke yo yae me baemmile wali nibire eyei, nebeibe Allah hila rabo nibi mobe Abrahamde aere ban mae are heteungekoke walora nebei wali nibi ikeume.

<sup>19</sup> Nauwa mai kena ura hinaube, "Rahere Musale walora wali heere foloukoke ikeumi?" Nda aerene nebei wali heere foloukoke Allah yae Israel ro miyaere ikeumi, wali asasi kowatere isaewoumi honoumeke Allah yae are heteungekoke hului Abrahambe orona mena Yesus meke. Nebei wali heere foloukoke a Allah yae malaikat-malaikatre ukeumi enate Musale walora ro miyaere wemmilere. Musa walore beungehake ro yeuboke. <sup>20</sup> Walore beungehande ro mokoisayainye na mekai ro bee a mokoisayainyere. Nebei ro bee naei a elenate na elae nebei ro bee rande ruwele. Nebei ro beera hi yae horondena, nebei a eleikoke elae ban yembonde. Allahle a heteungekoke Naei u mbai yae mo eleukokene, elaekei sele yeuboke.

<sup>21</sup> Nebei mekainya Musale walora wali heere foloukoke a bele Allahlena a faeu heteungekoke bele isohi-sohi yaeiboke? Nebei mekai ban sele. Rabuhine ban, Allah yae wali heere foloukoke a mbai wali himaloi-himaloise himalonainyele naeise yemmilere haraungebokena, nebei a walora ro miyae walire himalainyeboke yo yae me baemmiboube. Nebeibe Allah nebei wanen wali heere foloukoke a omoloikoi. <sup>22</sup> Allahle homofae yae elele, nda kani kelana ro miyae beko neban keleene nekate, kawane hebewande wanen. Nebei aerene Allah wali nibi eme mokouboke. Nebei wali nibi mokouboke nda niyae: Allah are heteungekoke hului Wali Ondofolo Yesus Naei a elelere hila rabo haleyannele yore Allah wali himalainyeboke yo yae me emmibaende.

<sup>23</sup> Yesus Wali Ondofolo Naei a elelere hila rabo halaennele na yamnam emei yae, Musale walora wali heere foloukoke aei walire neyae kayaa hebeungemeke, kawane hebewande wanen, uware eweyei kowande aerene, mende Allah Yesusle einye hila rabo nibi kelemmebonde. <sup>24</sup> Nebeinye Musale walora wali heere foloukoke wali aloi-alo ro wanen yeuboke, eyae Wali Ondofolore hila rabo halemandere yaweumeboke. Nebeisa Naei a elelere hila rabo halemande walora eyae walire himalainyeboke yo yae me baemmele. <sup>25</sup> Mana Wali Ondofolo Naei a elelere hila rabo halaeinye nibi meumiyakauboke, Musale walora wali heere foloukoke yae benen aere kayaa ehebei.

*Allahle Kelu Omi*

<sup>26</sup> Yesus Wali Ondofolo Naei a elelere hila rabo halaeunge walora, mayae Allahle kelu omire yaeukoke. <sup>27</sup> Mayae Wali Ondofolore hakaungene bu kayengkokembe yo, Yesus bele mbainye oraube. Mai uware malo hiraukoke wanen mae Nangkele mbainye nekembe. <sup>28</sup> Eyae Yesus Wali Ondofolo bele mbainye nekemalene, Yahudina ro miyae, Yunanina ro miyae, yebaei bubaeise nekate yo, ro hosoro, ro holo, miyae holo, nemene Allah mbai yae me baeume. <sup>29</sup> Mayae na hele Wali Ondofolole holona yore yaeubokene, mayae nane merau Allahle bene Abrahambe orona mena yore yaeuboke, nane merau Allah are heteungekoke hului Naei kelu omire mokoungehake rambun mayae enjarongkombe hele.

**4**

<sup>1</sup> Nda wanen mae a ahundebondere. Ro mbai herendena, naei rambun-rambun honate na kelu benare nukeiboyoungue. Nda kelu fa roijando eyeiboinye ro hi miyae hi yae holaeinye. Nebei yo naei me kelee u keleene yebaei bubaei mokoyele wanen nekele.

Naendae wanen horo nebei imae obena honate rambun naei me einyebwe, <sup>2</sup> nebeibe kayaare isebewainye yo naei me kelee u keleene niheisiyeunge nekeikoyele. Naeko yae imaena obena rambun kinyenainyele ralo yakama raungehike na hului yeiboyole mo, nebeisa nebei rambun-rambun imae ei obe einya nebei fare kinyeiboyainye. <sup>3</sup> Aei wali na bere nebei fa mekai wanen mae nekewande. Wali Ondofolole a foi faeu foi oboroiboi hee, nda kanina kelana ei moloi-moloiwe molowammile era hena aere naei yebaei bubaei mokowaima. <sup>4</sup> Allah huluisse raungehike ralo yakama na hului yeuboke mo, Na Hina Fa Hoi Fare ukeunge nda kani ran kela rande meke, miyae naei kou bulu yahi bulura hongkate, Musale walora wali heere foloukoke a keleene niheungehike nekewole. <sup>5</sup> Allah Na Kelu Yesusre ukeunge meke Musale walora wali heere foloukoke naei a keleene nekeimeyate yo naei olomore ahengkonde baensonderene, nane merau eyae na hului Allah Naei kelu omi helere imabonderene. <sup>6</sup> Mayae Allahle kelu omire yaeukokene, Allah Na Kelule Roh ukeunge mai kena ei u eise meke. Naei Roh walora Allahre Ako yae ebeli bonnembe. <sup>7</sup> Benen mayae yebaei bubaei yo ban, nana hesele Allahle kelu omire yaeukoke. Mayae Naei kelu omire yaeuboke aerene, Allah Naei kelu omire mokoungehake rambun mare wahanembe.

<sup>8</sup> Bere Allahre isian nekewaube heene, walobo yoni-yni allah yae elaweke naei me kelee u keleene nekaweke, naendae wanen horo neyae Allah ban. <sup>9</sup> Nda hee mayae Allahre ro raungeboke. Na foi sele nda wanen mae elerekon, Allah mare ro rombokembe. Rahene mayae roko benenbe bukauboke nda kanina kelana mokoi-mokoiwe mokoyaimi era hena naei yebaei bubaeise yembombere kena kaube? <sup>10</sup> Yahudi naei era hena rabuhi bele ya kaban koyauwe nanemene huba man sele mokaumi. <sup>11</sup> Reyae buhae hokoufe mai aerene uwa hoiboi mo relewanale nendon rambun foi ban yembonde.

<sup>12</sup> Aka naei baeke naei, reyae mare moi huramale, raei wali mekainye hakongkombe. Reyae Musale walora wali heere foloukoke a keleene eniheisijae nekale. Reyae mai u nolo u kainye nekewale heene, raei wali mai wali ma wanen nekewande. Nebei hee mayae Musalena wali heere foloukoke a keleene eniheisijae nekewaube. Nebei hee rare na mekai yae mokowaufe. <sup>13</sup> Mayae isaeyembombe, raei uwana era buloo kowale aerene Wali Ondofolole a foi faeu foi na bemere mekale mare huwengkokamale. <sup>14</sup> Naendae wanen horo lon raei u buluna era buloo u nenere koi-koi ma kowale, umali wanende mare hubawombe, nebeibe Allahle malaikatere ei hawainye wanen mae rare ei hauwaufe. Na kaban sele Yesus Wali Ondofolo Nau wae meube ei hauwaungele wanen rare ei hauwaufe. <sup>15</sup> Raeisai sele nebei hee mai rei mai rowensikembe kowawere erewamale ijoko kelaeyeube era yae ma ijoko kelaekoube rare yaufekoube. Mana nebei rei mai rowensikembe makeinye eke honole. <sup>16</sup> Naendae wanen, a na hele ukamale aerene rare mai yokeijo wanen mae eraufe?

<sup>17</sup> Ro miyae hiwa merau beko rainyehike na kena roweumihike mare baeyembe. Na kena kate mayae rare moi bulensebombero. Mauwa wemembe naei kenare kate huluiyine mai kena rowensimbe mokombe. <sup>18</sup> Ro miyae hiware me u foise mai kena rowensimbe mokomberena, nebei foi sele. Nebeibe reyae mai u nolo u kainye nekerele heene mo ban, na rokone baei yae mokomembe. <sup>19</sup> Kelu naei omi naei, mai aerene miyae fare honondere rakele ma raei u bulu wa bulune u buhae benen hubanale, rakerende, Wali Ondofolo Naei u mekai wa mekai mai wali einye bende yakandere. <sup>20</sup> Reyae kena kaban sele kale mai bele nda hee yae hubaimakondere. Raeinya a na mekai bele yae erele hararembonde ufembe, rabuhine ban nda wanen ahaufa reyae onaele rahebe mokorebonde.

### *Hagarle Sarale*

<sup>21</sup> Mayae borombo ba, mai kena kaube Musale walora wali heere foloukoke a keleene mo nekembere yo, rahene nebei mekai ma haraungebokere mayae ehakoiboi? <sup>22</sup> Musale walora wali heere foloukoke naei yebaei bubaei yo bele naei yebaei bubaei ban yo bele naeise Allahle homofaene nda wanen mae ahuneboke moloukoke: Abraham naei kelu bee hele. Bena fa yebaei bubaeise nekewole maengkelena. Moinya fa Abraham naei miyae helelena, yebaei bubaei ban. <sup>23</sup> Yebaei bubaeise nekewole maengkelena fa, rabuhi ban mae hongkate. Na miyae hele, yebaei bubaei ban kiyaele fa Allah are heteungekoke huluiyine nebei fa hongkate.

<sup>24</sup> Nebei miyae beera eyae na hului a ahunemabonde elemakonde. Nebei miyae bee Allah Naei a bee heteungekoke wanen. Na bee nendo Sinai mokone Musale walora wali heere foloukoke a ikeumi. Nebei wali heere foloukoke yebaei bubaeise mokoumboke, rabuhine ban naei a nemene fomene ro miyae hakonayende hele. Nda a heteungekoke Hagarle uwane ahunemabonde. <sup>25</sup> Nda Hagar, Arab kanine eke honole Sinai moko niyae,



*Allahle Roh Yae Kelembe Huluinye Hakombo*

<sup>13</sup> Aka naei baeke naei, Musale walora wali heere foloukoke a hului ehee bukulu hayemmira me rubombokembe. Nebeibe mai bekore kena haehae kaube hului mokombe belene, wali kayaa bele hebembe. Maise naeise kena buhae eise meise yae hembere nane merau yebaei bubaei u mekai yae eisako meisako yae hakomembe. <sup>14</sup> Rabuhine ban Allah wali heere foloukoke nemene na no mbai sele nda niyae, "Kena buhae waei uware haenae wanen, nebei sului mbai ya-ya wali nibi mbainye oraube yore heumile." <sup>15</sup> Kayaa bele hebembe! Maise naeise a beko faeu beko elembena, me u beko mokombena, mai wali horombombe.

<sup>16</sup> Reyae mare wamale, Allahle Roh yae kelembe huluinye mai wali harannebombe. Nebei nibi yae mai u mekai bekore kena haehae koyaupe huluinye mayae ehakoyei. <sup>17</sup> Rabuhine ban, mai u mekai bekore kena haehae koyaupe bele Allahle Roh yae elele bele isohi-sohi. Allahle Roh aerene mai u mekai bekore kena haehae koyaupe huluinye mokombere kabeikoyaupe. Mai u mekai bekore kena haehae koyaupe aerene Allahle Roh Naei a eelere na hibi-hibi hakombere kabeikoyaupe. <sup>18</sup> Nebeibe mai wali Allahle Rohre waeungehike kelebena, Musale walora wali heere folaikoke a keleene enekei.

<sup>19</sup> Na yaka yaeiboke u mekai bekore kena haehae koyate nda niyae: yoko kaeimae, u bene beko, bekore kena haehae hele koyate mokoyate, <sup>20</sup> hoime bahere ei moloi-moloi, buloo aere mokoi-mokoi, kena ikele, a kilei-kilei, kena hensan, ikele han, na u mbaise mo bene inyekewainye, aka kayee baeke kayee molate, naei holona yo bele mo orate, <sup>21</sup> ro hi naei rambun yaronatere kena haehae kate, keu bu mali, u beko wa beko riyane mokoiboyate, nebei ma me u hiwa holobe. Nda yoni-yni naeise reyae nda homo bumane a relen a huwe rorowamale. Mana benen angkaa yobamale, ro miyae nde maenin nebei me ure mokoyate yo, Wali Ondofolole me kelee u keleene nekate yo holo eise eyeiboi.

<sup>22</sup> Allahle Roh yae keleumi mokate u mekai nda niyae: kena buhae u buhae, rei mai, kena foi u foi, kena hebaen u hebaen, a kena han kena ban, u foi wa foi, rabo halei-salei, <sup>23</sup> kena nime kena haba, nane merau u mekai harai-sarai. Nebei yoni-ynire kelambonde naeise hunde ranensinde a hi u hele. <sup>24</sup> Yesu Wali Ondofolole ro miyae yaeikoke yo, naei u mekai bekore nenaiejae ohaline baikoke wanen boukoke hereke, u mekai bekore kena haehae kole naeise hee roraikoke, uwa olomaiboke. <sup>25</sup> Allah Naei Roh yae keleume huluinye wali andene, mem, Naei are hakomale. <sup>26</sup> Uwabe isaei hebaen emekai bele honole yae ehubaijiae, kena ikele hire hire omokoiijae, nane merau kena hensan maise naeise okoyeijae.

## 6

*Kena Buhae U Buhae Yae Hembere*

<sup>1</sup> Aka naei baeke naei, ro miyae mbai na wali horombondena, mayae Allahle Roh Naei a eelere boroyaupe yo kena nime kena haba yae yawennehombe, nibi na helere bennehombe. Nebei u mekai beko yae wabenensimbe belene, mai uware na kayaa bele hebembe. <sup>2</sup> Ehee bele rambun eisako meisako yae fomammiyembe. Nebei mekai yaere Yesu Wali Ondofolole wali heere foloukoke mayae hakoyaupe. <sup>3</sup> Nde yae nauware rabuhi bele yae hubannele elende era bae niyae erabui ban selebe, nebei ro nauware nenaiejae ame-ame yaneunge. <sup>4</sup> Ro miyae mbai nenaiejae na me u mokole hului rannehinde, foinya, nebei aerene embei aiko konde. Ro miyae hi naei wali huluinye okoloijae. <sup>5</sup> Rabuhine ban, ro miyae mbai na wali ehee rambun nenaie baka ranne mo honole.

<sup>6</sup> Nde yae Wali Ondofolole a foi faeu foise kelaeyekoke isaeyeboke kiyae, naei rambun foi bele keleikoise keleungekoke kiyaere wahanete.

<sup>7</sup> Ma ure-ure ame-ame ebeijae. Allahre ro yae miyae yae ame-ame eyaneikoi sului. Hekene era meleme molande wanen, ro miyae mbai na mere ure mokole huluinye, na ani nebei suluiyane nenaiejae hokombonde. <sup>8</sup> Nde yae beko naei era meleme nda uwa bekore kena haehae koyate huluinye bolu kolondena, na ani niyae Allah bele waheneikondebe hubayengkonde. Nde yae era meleme bolu Allahle Roh yae kenare moloungue huluinye molonde kiyae, na ani niyae Allahle Roh walora wali hena bonabe hubayengkonde. <sup>9</sup> Me foi u foise no ban hee ban mokomande nane merau rilibo ehayeijae. Rabuhine ban na hibi mo mokomalena, ya mbai mendene eyae na ani hokomale. <sup>10</sup> Nebei aerene, wali namman nekande hee yae, men, aei me foi u foi ro miyae nemene mokomamile. Na kaban sele aei aka baeke Yesusle einye mbaise yaendeboke yore mokomamile.



*Ahumboi Naei A*

<sup>11</sup> Ijoko eren, nda ijenna homore na kaban-kaban sele raei me yae molale!

<sup>12</sup> Mai ro uwa elande folonayembere elae baete yo, ro miyae yae bumare kolonaimile naeise uwake yae relaeinye. Neyae Yesusre hakainyele aerene Yahudi ro miyae nare weitasibe konaimile belene, nebei a yae mare wabayembe. <sup>13</sup> Nebei yo, naei ro uwa elande folaimikoke holona yobe, nebeibe na hele nauwa Musale walora wali heere foloukoke are ehakoiboi. Naei kena elae hele kate mai ro uwa elande folonayengkombere. Nebei aerene, Yahudi ro miyae naei bene embei aiko konate. <sup>14</sup> Reyae embei aikore kale mbai sele nda niyae: Yesus aei Wali Ondofolo, aei aerene hereke. Naei here walora nda kani kelana rambun yukaei yae elate rambunde raei kena eijoboi nekale. Nane merau reyae yukaei yae eranale rambunde nda kani kelana ro miyae ahi elate. <sup>15</sup> Mai ro uwa elande folonayembena, omokoinya, rabuhire eyeiboi. Rabuhi belere yembonde kiyae nda niyae, Yesus Naei a elelere hila rabo halemmembe ro miyae nemere yengkombe. <sup>16</sup> Reyae ebeli banale, ro miyae nanemene nda kelaemale a huluinye wali nekate yore, Allah yae yanekoi yase yae ei hawemmile nane merau kena buhae hemmile. Nebei yore Allahle ro miyae Israel yae ro raiboke.

<sup>17</sup> Ahumboise reyae riyamale, hi yae ha yae rare kena bekore omokoi. Rabuhine ban, Yesusle aerene weitasise kowaise bayaa raei uwane namman honate. <sup>18</sup> Onomi foka, aka naei baeke naei, Reyae ebeli banale, aei Tuhan Yesus Wali Ondofololena kena buhae aere ban mai kena ure ei hawenemembe. Amin.

## EFESUS

<sup>1</sup> Onomi foka mayae Yesus Naii eleubokembe wekembe ro miyae, Efesus yone nekaupe, Yesus Wali Ondofolole a elelere hila rabo haleyaube yo. Reyae Paulus, Allahle kena huluinye Yesus Wali Ondofolole abu akore yeubokale. <sup>2</sup> Reyae ebeli banale aei Ako Allahle nane merau aei Tuhan Yesus Wali Ondofolole kena buhae aere ban mae mare henemembe nane merau mai kena foi u foi mokonemembe.

<sup>3</sup> Allah aei Tuhan Yesus Wali Ondofolo Naekole Ro buma kaenne. Neyae walobo yoni-yoni bele malaikat yoni-yoni bele naei bene Yesus Wali Ondofolo a weume hului nekande walora Naii me einye u einye honate rambun nanemene aere ikeume. <sup>4</sup> Nda kani kela namman omokoiboi yae Wali Ondofolo a weume hului nekemale naeise, Allah aere eleumboke. Naii holona ro miyaere imabonde naeise, nane merau Naii ro be ro yoinye aei naeise a beko eleikoi sului naeise, aere eleumboke. Allah kena buhae u buhae heimeyume nane merau <sup>5</sup> a hokouke eyae Yesus Wali Ondofolole walora Naii kelu omire imabonde, Naii kenare koukoke huluinye. <sup>6</sup> Allah kena buhae aere ban mae heumene aere Na Kelu buhaere heunge Kiyae ikeume. Nebei aerene Allahre buma kaenainyele hili hebenainyele. <sup>7-8</sup> Allah aere kena buhae aere ban mae emekai bele hewoumene, Naii isaei hebaen na bumana hele yae Yesusre ukeunge meke. Na uwana ha rileuboke walora aei beko bakore aheukoke baeufoke, nane merau Allah yae aei beko bako faeinyeumekoke. <sup>9-10</sup> Allah Na kenare foi mokonende naeise, merau raungehike hului Naii elengkonde yane surgana yoni-yoni bele nda kani kelana yoni-yoni bele nemene fomene Yesus Wali Ondofolo yae yunde yembonde. Nebei naeise nunne honowatebe, nebeibe Allah aere yakaumboke.

<sup>11</sup> Allah rambun yoni-yoni mokoyeumi Naii kenare kole huluinye inyaibonde. Na beme fome Allahle merau raungehike hului eyae Yahudi ro miyae eleumboke. Neyae a hokoukoke eyae Wali Ondofolo Naii holona yore imabondere. <sup>12</sup> Ro miyae Allahle nene waewaere buma kaenainyende naeise, meyae na bere Wali Ondofolole walora wali hena bona rabore halemande ro miyaere Allah yae eleumboke. <sup>13</sup> Nane merau mayae Yahudi ban ro miyae Yahudi ro miyae aengkele Wali Ondofolo Naii holone mbaise yaendeboke. Mayae Yahudi ban ro miyae Yesusle naeise na hele a foi faeu foi borokaube heene ehe yae kaukoke. Nebei a faeu wae Allah mare wali holere molombokembe. Nebei a foi faeu foi hakowaubene Allah are heteungekoke Roh mare aubokembe yae me noufe herawembokembe. <sup>14</sup> Maengke yeke angkaei bulu kunyeiboi hemboni yaeimi wanan Allah Naii Roh aumboke. Allah Naii Roh aumboke walora eyae isaeyandekoke, Allah na kelu omire yeumi rambun yoni-yoni aere yemmekonde hele. Naii Roh yae ei hawemmele mende miyae hemboni aheukoke baensonde wanan mae Allah Naii holona ro miyaere hole molommibonde. Nebei me u mokoubokene Allah nene waewae Kiyaere buma hele kaenainyele.

<sup>15</sup> Nebeinye, mayae Tuhan Yesus Naii a elelere hila rabo halaube a boroubokale nane merau Allah eleukoke wekeumi holona ro miyaere nemene mayae kena buhae u buhae haeyumi a boroubokale heera bae, <sup>16</sup> mai naeise reyae no ban hee ban Allahre ebeline banale heene helen foi eiwanale nane merau mai naeise bele eiwanale. <sup>17</sup> Nane merau reyae itiyawale aei Tuhan Wali Ondofolole Allah nene waewae Ako Kiyaere ro ronnebombe naeise, mare Naii Roh anembombe, nane merau nebei Roh yae isaei hebaen inyembe, nane merau rambun nemere yakanembe. <sup>18</sup> Nebei mekai yaere mai u bene wa bene wewe konengkombe nda rambun name isaeyombombe: mbai nendo, Allah mare kaengkokembene foi sele yoni-yoni hubayngkombere rabo elae halemembe; bee nendo, Naii eleukoke wekeumi holona ro miyae yae Allahre emekai bele hili hebenainyele; <sup>19-20</sup> name nendo, eyae Yesus Naii a elelere hila rabore halaende ro miyae aerene Allah kalia elae wake kaban mae mokole. Nebei elae wake kaban walora Wali Ondofolore nulu yo mahe yora aungunuke, nane merau walobo yoni-yoni bele malaikat yoni-yoni bele naei bene surgana anuwau Allah Wali Ondofolore meube reufine eungenuweuboke. <sup>21</sup> Walobo yoni-yoni bele malaikat yoni-yoni bele nane merau nda kani kelana ro miyaere mere ure ikilaiboke yoni-yoni bele holona nekate anuwaufa Yesus yae ekenekole anuwau ahau fele, buma hosoro. Nde maenin horo anuwau bumana nda heera fonde bena ya honoifoyolene, Yesusre kinyeungeboka anuwaufe nane merau ikeunge elae wakere hi yae ha yae ehameikoi sului. <sup>22</sup> Jemaat aerene, rambun yoni-yoni nanemene Allah mokoumiboke Yesusle me kelee u keleene orulaiboke nane merau Yesus naii yunde mokoungoboke. <sup>23</sup> Nebei jemaat Wali Ondofolole uwane

mokonbonde Wali Ondofolole uwa na hului yembonde nane merau nebei Wali Ondofolo Kiyae yae mokommibonde nemene fomene na hului inyaiyabonde.

## 2

### *Yahudi Ro Miyae Bele Yahudi Ban Ro Miyae Bele Holo Mbai*

<sup>1</sup> Mayae na bere hele here no unulu bele waheikoke wanen mae Allah bele wahaekoke nekewaube, rabuhine ban Allah Naei a elewolere oboroiboi nane merau u mekai beko na hibi-hibi mokowaube. <sup>2</sup> Nebei hee mai wali nda kani kelana wali beko nibine hakowaube, walobo yun naei are hubara haeisa yanewaunge. Ro miyae Allah Naei a elelere asasi koyate yo naei kena einye nebei walobo yun naei kaliare mokoimeyele. <sup>3</sup> Bere eyae nanemene nebei yo naei wali wanen. Nebei hee aei wali bekore kena haehae kandeke nane merau u bene beko yae nekandeke. Eyae Allah yae ehee bukulure hayemmele holona yo wanen mae nekewande. <sup>4</sup> Nebeibe Allah yanekoi yase bele Kiyae aere buhae hele heume. <sup>5</sup> Allah Naei a elewolere eyae asasi kandeke aere wahaendekoke nekewande hororebe, Allah mokoembeke wali neme bele ro miyae imabonde naeise Wali Ondofolo Naei a elelere hila rabo halemale. Allah kena buhae aere ban mae hewombene mare hole molombokembe. <sup>6-7</sup> Yesus Wali Ondofolole walora Allah aere kena nime haba yae mokoemekoke. Allah yae walobo yoni-yni bele malaikati yoni-yni bele naei bene aere waleumbeke nane merau anuwau bumane hele Yesus Wali Ondofolo Naei mbainye eumenuweuboke. Bena honoifoyole heena nekenate ro miyaere kelemmiyona Allah ro miyaere kena buhae na kaban sele aere ban mae heumile naeise, nda me u foi sele mokoembeke. <sup>8</sup> Allah na kena buhae aere ban mae hewombe yae Yesus Wali Ondofolo Naei a elelere hila rabo halaeunge walora mai wali hole molombokembe. Nebei rambun Allah Nenaiejae mokoembeke, mai me u mokowaubene ban. <sup>9</sup> Mai wali holere molombokembe naeise mai me u foi mokowaubene ban. Nebei mekainye aei u nolo u kainye ro miyae hi na uware ekaei sului. <sup>10</sup> Rabuhine ban eyae Allah yae mokowoume ro miyae. Na bere hele Allah me u foi yoni-yni mokingehake. Nebei me u foi yoni-yni mokomande naeise, eyae Yesus Wali Ondofolole walora ro miyae u mekai neme mokoembeke.

<sup>11</sup> Nebeinye mayae Yahudi ban ro miyae bene nekenayembe, mare Yahudi ban ro miyae yae honowayembe. Yahudi ro miyae na era hena huluiyine ro uwa elan mae neisayate. Nebei me u ro miyae yae mokowate, Allah yae ban. Mayae nebei era hena omokoinye, Yahudi ro miyae mare ele moinya yo yae ro royayembe. <sup>12</sup> Nebei hee mayae Wali Ondofolo bele wahaekokebe nekaube, Israel yohone me ebai. Allah yae Israel ro miyaere are heteungekoke Neyae weumi are hakonainyelena foi mokommile. Nebeibe mayae Yahudi ban ro miyaere Allah nebei are ewei. Mayae walire rabo ban nane merau Allah ban mae nda kani kelane nekaweke. <sup>13</sup> Mayae na bere Allahle wali nihi isian nekewaube yo. Nda hee Yesus Wali Ondofolo a huluinye nekaubene, Yesusle ha rileuboke yae mayae Allahle holona yore yaeuboke.

<sup>14-15</sup> Na bere Allah a ukeunge Musale walora wali heere foloukoke are Yahudi ro miyae hakowate. Yahudi ban ro miyae ehakoiboinye, nebei holo bee yokeijo yae nekewate. Nebeisa Wali Ondofolo meke kelewoumi Naei a elelere hila rabo halenate ro miyae wali hena bona yaronate, Musale walora wali heere folaikoke hubara haeisa yaneyainyelene ban. Nebei mekai yaere Yesus mokingeboke Musale walora wali heere folaikokere elae ban yeuboke. Naei merau raungehike Yahudi ro miyae bele Yahudi ban ro miyae bele Naei a elelere hila rabo halenainyele walora jemaat neme mbaise yembonde, rei mai nekenayende. <sup>16</sup> Ohaline Yesus Naei wali kinyeumboke, hereke, benen waleungeboke. Nebei mekai yaere Allahle ro be ro yoinye ro miyae naei beko bako mokandere aheukoke baefoke, nane merau Yesusle walora nebei Yahudi ro miyae nane merau Yahudi ban ro miyae Allah bele foi mokoumboke. <sup>17</sup> Yesus Wali Ondofolo meke mayae Yahudi ro miyaere bele Yahudi ban ro miyae belere huwengkokembere. Neyae eleukoke bere Yahudi ro miyae Allah ro rowainye, Yahudi ban ro miyae Allahle onewainye. Nebei yoho bee yokeijo yae nekewate. Nda hee Yesusle me kelee u keleene nebei yoho bee na hului aka baeke wanen holo mbainye nekenainyendere. <sup>18</sup> Yesusle walora eyae nanemene Yahudi ro miyae bele Yahudi ban ro miyae bele Roh mbai walora Ako Allah bele elande borande.

<sup>19</sup> Nebei mekainye mayae Yahudi ban ro miyae Yahudi ro miyae wanen mbai Allah Naei eleuboke wekeumi holona ro miyaere yaeuboke. Mayae yo meiko-meiko yo ban nane merau ele moinya ro miyae ban. <sup>20-21</sup> Imaere nda mekai heyate: mekele hu, nelae, wa, fena, yan, rambun hi bele ahuneiboyate. Allah Naei imae nebei wanen mae heuboke. Yesus Wali Ondofolo kose hu wanen. Yesus Naei abu ako bele Allah Naei

yenjo kayaayo bele mekele hu wanen. Yesus Naei me kelee u keleene orulaiboke ro miyae, wa, fena, yan, rambun hi bele wanen. Nebei rambun ha yae ahunenaibonde yae imaebe henate wanen, ro miyae Yesus Wali Ondofolo Naei a elelere hakainye yae Allahle holonare inyaibonde. Neyae Allahre ei mom-mom imae wanen yembonde. <sup>22</sup> Wali Ondofolo Naei a elelere hakaunge yae mayae Allah yae nekele imaebe namman heimeyembe, Naei Roh walora Neyae mai kena u einye nekeyle.

### 3

#### *Paulus Yahudi Ban Ro Miyae Nolone Kalia Mokole*

<sup>1</sup> Allah mokoungeboka Yahudi ro miyae bele Yahudi ban ro miyae bele holo mbai yeubokene reyae Paulus jemaat naeise ebeli banale. Reyae, Yesus Wali Ondofololena a foi faeu foi mayae Yahudi ro miyae ban yore huwamale aere ne kawane hebale. <sup>2</sup> Raei naei a mayae borokaube heera isaeyaeuboke. Mai foi naeise Allah rare ukeufe Naei kena buhae aere ban a faeu mare hufembere. <sup>3</sup> Allah meraufe raungehike nunne honayeke rambun rare yakaufeboka. Homo fofo ranna bere moloukokalene nebei naeise a ebimbin wengkokamale. <sup>4</sup> Nda homo mayae engkombe yae Wali Ondofolole uwa naei nunne honatere Allah rare yakaufeboka are na hului isaeyembombe. <sup>5</sup> Na bere nekewate ro miyaere Allah nunne honayeke a faeufe roko mbai ewei mo. Nebeibe nda hee Allahle Roh yae Allah Nenaie eleuko ke wekeumi abu akore bele Naei yenjo kayaayo belere nebei a faeu yakaumboka. <sup>6</sup> Nunne heraweuboka honaimeke a nda niyae: Wali Ondofolole a foi faeu foi walora Allah Naei kelu omire yemmikonde rambun yoni-yoni Yahudi ro miyae inyemile mbai Yahudi ban ro miyaere inyemile. Nebei yoho bee jemaat mbaise yeiboka. Nebei yoho bee Allah a heteungekoka hului Wali Ondofolo Naei a elelere hila rabo halenainyele walora wali hena bona yaronaikonde.

<sup>7</sup> Allah aere ban mae rare buhae heyeufe huluinye Allahlena elae raei uwa einye kalia mokowole. Nebei mekai yaere Naei a foi faeu foi huwei-suwei hufemiyende naeise reyae Yesus Naei kalia mokole rore yeubokale. <sup>8</sup> Allah eleuboka wekeumi holona ro miyae u nolo u kaisa reyae na ro ban sele kiyabe Allah kena buhae aere ban mae heufekoka. Allah ukeufe Yahudi ban ro miyaere Wali Ondofolole me ei u einye rambun emekai bele honate naei are hufemiyendere. <sup>9</sup> Nane merau Allah kani me kela mere mokouboka Kiyae ralo yae yakama yae merau raungehike Yahudi ro miyae bele Yahudi ban ro miyae bele holo mbainye mokommibonde. Nebei are Allah nunne heraweuboka honoumeke. Rare eleufekoka nda nunne honoumeke a faeufe ro miyae nanemenere isaesemilere. <sup>10</sup> Allah merau raungehike walobo yoni-yoni bele malaikat yoni-yoni bele holore Allahle isaei hebaan na bune-bune jemaat walora isaeyaimibonde. <sup>11</sup> Nebei rambun na bere hele Allah meraufe raungehike hului aei Tuhan Yesus Wali Ondofolole walora huba ban haai ban mokonende. <sup>12</sup> Nda hee eyae Yesusle me kelee u keleene nekandene nane merau Yesus Naei a elelere hila rabo halaennele walora eyae na hului be yae rabulemabonde nendon mae Allahre ebeli bomansinde nane merau rabo elae halennele Neyae aei are borommele.

<sup>13</sup> Nebeinye naenda wanen horore mekarelaenaene beko hubanale, reyae riyamale kena wauwau okojiae. Rabuhine ban mai naeise reyae relaenalene Allah mare buma kaenembe.

<sup>14</sup> Nebei aere ne Ako Allahle ro be ro yoinye oro selen-selen mae eitoroikoyale. <sup>15</sup> Surgana yoni-yoni bele nda kani kelana ro miyae bele Naei aere ne ro bele raimiboka. <sup>16-17</sup> Allah nene waewae bele Kiyaele me ei u einye honate rambun emekai bele yaeiboka. Nebei nolone Naei Roh. Reyae ebeli banale, Allah mokonnele Naei Roh yae mai kena u elae inyembe. Nebei nibe yae Yesus Wali Ondofolo Naei a elelere hila rabo halembe walora Neyae mai kena ei u einye nekenende nane merau mayae na yaka yae isaeyembombe Yesus Wali Ondofolo yae kena buhae u buhae heyembe. <sup>18</sup> Reyae ebeli banale mare nane merau Yesus Naei eleuko ke wekeumi holona yo hiwara nda rambun naeise isaeyembombere elae inyembe: Yesus Wali Ondofolole emekai bele kena buhae u buhae na kaeu-kaeu naei, na koko naei, na yaleufike naei, na wauwau naei, <sup>19</sup> ro miyae isaeyeboi ma Neyae ro miyae u mekai mahi-mahi kena buhae heyeumi. Wali Ondofolole kena buhae hei-seise na kaban sele na foi yae isaeyembombene Allah Naei me ei u einye honate rambunde mai kena eise maemae konengkombe.

<sup>20</sup> Allah buma kaenembe! Eyae ro miyae na hului rambun kaban sele u bene nekenaimela nane merau Allahre riyannelebe, nebeibe Allahle elae aei uwa einye kalia mokole walora na hului emekai bele mokongkonde. <sup>21</sup> Jemaat me u mokonate aere ne, nane merau Wali Ondofolo me u mokonde aere ne, Allahre rimolone yangkone hili hebenainyele. Amin.

## 4

*Holo Mbainye Nekate Naei*

<sup>1</sup> Reyae Tuhan Yesuslena a foi faeu foi huwamale aerene kawane hebahe kiyae. Mayae Allah yae mare kalia foi mokombe naeise kaenewombe yore reyae moi huramale, Allahle holona yo naei wali ma yae nekemembe. <sup>2</sup> Mai kena u ane rannehimbe nekemembe, kena nime haba nane merau kena hebaen-sebaen mae nekemembe. Mai nolona ro miyae u mekai nenaeni nenaeni hororebe mai kena buhae u buhae hi yae hire hemembe. <sup>3</sup> Nda wali ma elae relennembe Allahle Roh Naei a elelere rilibo ban mae kena mbai u mbai yae hakomembe, rei mai yae nekemembe. <sup>4</sup> Eyae Yahudi ro miyae yo bele Yahudi ban ro miyae bele nanemene jemaat mbainye, Allahle Roh mbai, nane merau eyae nanemene Allah kaeneumekoke ro miyae wali hena bona yemmelere rabo mbai halemanende, <sup>5</sup> Tuhan mbai aere mere mokoume, Wali Ondofolo mbai Naei a elelere hila rabo halaende, aei wali Wali Ondofolore kinyannekoke iwaufe mbai mo bu yae kaime, <sup>6</sup> nane merau Allah mbai ro miyae nemene naei Ako. Neyae nemenere me mokoumi nane merau Naei einye nekele, Naei walora me u mokole.

<sup>7</sup> Nebeibe Yesus Wali Ondofolo kena buhae aere ban mae heyeumene Naei me ure mokomale naeise meli mekai mahi-mahi aere mbemba mbemba ikeume. <sup>8</sup> Nebei meli mekai ikeumi naeise Mazmur homofaene nda a moloukoke, "Neyae kunsoboi waufoboi na bumana hele anuwaufe eke hee, ikileukoke yoni-yoni yaweumiboke,

nane merau meli mekai mahi-mahi ro miyaere ikeumi."\*

<sup>9</sup> Neyae nda "anuwaufu bumana helene" eke na mekai, na bere Neyae kani kela anuwau na ana hele okene. <sup>10</sup> Nemene fomene na me einye nekenayende naeise Yesus nebei ana hele anuwaufa oke Kiyae nda hee anuwau bumana helene ekenekele. <sup>11-12</sup> Nebei Yesus mbai Allah Naei kaliare mokonate naeise Allah yae eleukoke wekeumi ro miyaere mokommihande. Naei jemaat amminunde naeise Yesus ro miyaere meli mekai mahi-mahi kiteumiboke. Nebei yo nolone hiwa Yesusle abu ako, hiwa Allah weumi are huwate, hiwa Yesuslena a foi faeu foise huweyate yo, hiwa jemaatre holeyate yo, hiwa Allahle a faeu kelei-kelei yore yaeiboke. <sup>13</sup> Nebei nibi yae eyae nemene kena mbai u mbai yae Allahle Kelu Naei a elelere na hibi-hibi hila rabo halemale nane merau Nare na foi yae ro romambonde. Nebei heene eyae henandeboke ro miyaere imabonde nane merau Wali Ondofolo kena kole hului aei wali walora benate. <sup>14</sup> Nebei heene eyae aei wali kelu omi wayeu wanen mae enekei. Kelu omi na hele are foi yae isaeyeiboi. Bu mokona alu ruwae boye yae ndire ndare kounge wanen mae nebei kelu omi wanen ro miyaere ame-amere kelaeimi naei a mongko-mongko waimi yore hakoyaimi. <sup>15</sup> Eyae nebei kelu omi wanen ro miyae ma ban emanekende. Aeise naeise kena buhae emamihende yae a na hele emalende. Nebei mekai yaere aei Wali Ondofolo kenare kole hului yae eyae emaisaeyende nane merau me u emamokonde. Neyae jemaat na Yun Kiyae. <sup>16</sup> Aei uwa oro i me i ahuneyele, aei yunbe kena kole huluinye kaban raemabonde nane merau me u mokomale. Jemaat holona ro miyae uwa wanen yeuboke. Nebei wanen mbai ro miyae mbemba mbemba Wali Ondofolo kenare kole hului mokonate yae naeise naeise na hibi kena buhae kaban henayende.

<sup>17</sup> Reyae nda a Tuhan mae ukeufe abe wamale, Yahudi ro miyae ban yo hiwa Allahre oroiboinye u bene foi ban nekatte. Mayae nebei wali ma wanen benen enekeijae. <sup>18</sup> Na kena u elae katene kobu yae feleumiboke, isaei hebaen ban nane merau Allahle wali nibine oroyei. <sup>19</sup> Nebei ro miyae naei wali beko nekatene hiwa yo a beko waimi hororebe neyae fe okoinye, wali beko naeise na hibi-hibi kena haehae kate mokate.

<sup>20</sup> Nebeibe nebei nibi yae mayae Wali Ondofolore ro oroiboi. <sup>21</sup> Nana hesele mayae Yesusle naeise na hele are kelebokembe boraukoke yae Nare ro raungeboko. <sup>22</sup> Mare kelebokembe na bona hele u mekai bekore kena haehae kowaube yae wabensikembe mai walire horaweke. Mare kelebokembe nebei wali ma womombe hele, <sup>23</sup> nebeisa Allah waannehimbe mai kena u nane merau mai u bene wa bene nanemene hele neme mokonengkombe. <sup>24</sup> Mai wali ro miyae neme wanen mae nekemembe. Allah Naei u mekai wanen mae mokombokembe huluinye nekembere, mai wali himalembokembe nane merau u mekai nane hesele yolo yolombokembe.

<sup>25</sup> Mayae nanemene ya-ya wali nibi mbainye oraube yore ame-ame ebeijae nebeibe a na hele mo elembe, rabuhine ban eyae nanemene holo mbaiibe nekande. <sup>26</sup> Beko naeise kena ikele komembena, nebei kena ikele ewaeisijae mai kena u beko yembonde bele. Hu bele oyakoi yae nebei kena ikele foi mokombombe. <sup>27</sup> Kena ikele kaube walora walobo yun mare wabenensimbe balembe belene, mon eyeijae, kayaabe hebembe. <sup>28</sup> Ro miyae

\* 4:8 4:8 Mazmur 68:18

yokore baeyeke yo benen yoko ebaeijae. Me yae u yae kalia elae mokombe. Mai roibuna ufembe yae kalora nekate ro miyaere na hului wahemmile.

<sup>29</sup> Mai euwara a beko faeu beko eleijae. Ro miyae na hila rabo halaete kalo ekeumoloumire auminunde naeise, a faeu wae haraungebonde weumile. Rabuhine ban nebei a wanen wamae yae boronate yo na foi bele enaiyaronde. <sup>30</sup> Mai u mekai beko yae Allahle Rohre kena beko omokonnemae. Nebei Roh yae huba mokoikoi yane mare hole molonembombe iwaube Allah mauwane me nou herauboke. <sup>31</sup> Nebeinye nda me u nundenayengkombe, mai waline ohonoyeijae hele: kena beko u beko, kena ikele u ikele, ikele han hoi-soi, a hufuu, nane merau bekore benate me u. <sup>32</sup> Kena nime haba yae maise naeise kena buhae hembe. Nane merau Yesus Wali Ondofolole walora Allah mai beko mokowaubere faeinyengkokembe wanen hiwa yo naei beko mokonayembere u benera nundenayembe.

## 5

<sup>1</sup> Mayae Allah kena buhae u buhaere hembe kelu omi wanen mae relennele Allahle u mekaibe bune wane hamennembe. <sup>2</sup> Yesus Wali Ondofolo mare kena buhae hengkokembene Allahre hili era akau era fololo bele wanen mae aei aerene Nenaiejae Naei uwa kinyeungeboke. Nebei wanen mbai maise naeise kena buhae u buhae hembembe.

<sup>3</sup> Mayae ninae Allah eleuboke wekeumi holona ro miyae. Nebeinye mai u nolo u kainye ro miyae nda u mekai ma omokojiae hele: yoko kaeimae, me nene u nene, rambun arilei-arileise kena haehae koi-koi. <sup>4</sup> Mai u nolo u kainye ro uwa miyae uwa na a halei-salei a beko faeu beko eleyeijae. A bangka-bangka nane merau ro miyaere fe mokoi-mokoi a yako-yako okoyeijae, nebei ma a faeu na mekai ban selene. Naei foi sele foi naeise maise naeise Allahre helen foi wennembe. <sup>5</sup> Nda a wamalebe hila rabo halembe naei. Yoko kaeimae koyate yo, wali niki bele nekaimile yo, rambunde arilei-arileise kena haehae koyate yo (nda hoime bahere eise molaimi u mekai wanen) nebei u mekai bele yo Yesus Wali Ondofolole Allahle me kelee u keleene orulaiboke holona yo nolone nangkele ban, nane merau Allahle kelu omire yeumile rambunde nare eyei. <sup>6</sup> Ro miyae a bangka-bangka yae ame-amebe mare wabenensimbere mayae oboroijae hele. Rabuhine ban nebei mekai me u ma yae mokate yo Yesus Wali Ondofolole a eelere oboroi, nane merau nebei yore Allah yae beko mokommibonde. <sup>7</sup> Nebei yo bele mayae kahili wafeu okojiae homo mbainye orojiae.

<sup>8</sup> Na hele mayae na bere Allahre onewaungene ouben nolona yo nekewaube. Nda hee mayae Tuhanbe me kelee u keleene orulaubokene, mayae hehe nolona yobe nekaube. Nebei aerene kelu omi hehe nolona nekate wanen mae Yesus Wali Ondofolo Naei a elele huluniye wali nekemembe. <sup>9</sup> Rabuhine ban wali hehe einye nekatere nda ma: u mekai wa mekai foi yae nekenate, wali himalonaimikonde, a na hele elenate, <sup>10</sup> Tuhan kenare kole wali ma baembe isaeyinnye. <sup>11</sup> Allahre onaeyne ro miyae na kenare kole u mekai omokojiae! Naei foi sele mayae yakammibombe nebei ouben haubenna me u. <sup>12</sup> Rabuhine ban Wali Ondofolo Naei a eelere ehakoiboi yo yae anuwau nunne-nunne mokate me u, u nenere yakanate heene, boronate yo fe yae konate. <sup>13</sup> Wali Ondofolole wali nibi a usaei hehe merau. Nebei a usaei borate ro miyae foi naei, beko naei isaeyinate. <sup>14</sup> Rabuhine ban Wali Ondofolole wali nibi a usaeibe mokommile ro miyae foi naei, beko naei na hibi-hibi isaeyinate. Nebei aerene nda a yae eleyate, "Mayae ijongkune molonsikembe honowaube ro miyae Allah bele wahaeikoke walira annu!

Wali Ondofolo mai kena u einye hehe naenengkombere."

<sup>15</sup> Nebeinye mai wali nekembe ma kayaa foi yae hebembe, ro kobu miyae kobu wanen mae wali enekeijae, isaei hebaen bele ma yae uwa harainyeboke ro miyae wanen mae nekembe. <sup>16</sup> Nda hee beko hele nolone nekandene, ya mon rowelena, foi yoni-yoni mokole. <sup>17</sup> Nebeinye mayae kobu okojiae, nebeibe Allah kenare kole ma isaeyembombe. <sup>18</sup> Mayae keu bu mali okojiae, rabuhine ban nebei keu bu mare beko mokonembombe. Nebeibe mai uwa waennehimbe Allahle Roh yae ei anembombe, Naei me kelee u keleene nekembe. <sup>19</sup> Maise naeise homofae Mazmurna bele Allahre ei molonnele koi bae mahi-mahi bele kombe. Mai kena u eisa koi bae merau Allahre ei molonnye. <sup>20</sup> Rahe ma mai waline ensubayembe aei Tuhan Wali Ondofolole Ro yae Ako Allahre helen foi wennembe.

<sup>21</sup> Yesus Wali Ondofolore ei molonnele aerene maise naeise uwa ane nihennehimbe nekembe.

*Ro Bele Miyae Bele Nekenete Wali Ma*

<sup>22</sup> Miyae yoni-yni, Tuhan me kelee u keleene nekaube wanen mae mauwa ma molo wa naei me kelee u keleene nekembe. <sup>23</sup> Rabuhine ban Yesus Wali Ondofolo jemaat naei be yun be yebaere yeubokene, jemaatre hole molombondere nauwa yae kinyeumboke. Nebei sului mbai mai molo wa niyae mai be yun be yebaere nekatate. <sup>24</sup> Jemaat yae Wali Ondofolole me kelee u keleene orulaiboke wanen mae miyae yoni-yni mai molo wa naei me kelee u keleene na yane baei nekembe.

<sup>25</sup> Ro yoni-yni, Wali Ondofolo jemaatre kena buhae heungekoke wanen nane merau naei aerene Nauwa kinyeumboke beko hubaungekoke wanen mae mai miyae ware kena buhae hemmile. <sup>26</sup> Jemaatre yolo-yolo mokonnebondere Wali Ondofolo Nauwa kinyeumboke beko hubawoungue. Neyae nda nibi yae Jemaatre yolo-yolo mokoungboke: Jemaatna ro miyae Wali Ondofolole me kelee u keleene orulenate naeise nulu kemmibonde. Nulu keumbokere ro miyae hiware yakanaibonde naeise bu yae koumi. Wali Ondofolo Naei a elelere hakate walora jemaat wali himalainyekoke yore inyaibonde. <sup>27</sup> Nebei mekai yaere Wali Ondofolo mokonnebode nebei jemaat Na ro be ro yoinye me u bekore mokoyate yo ban, nebeibe yolo-yolo ma, nane merau hiwa yo nare a beko ewei sului wali ma nekenate. <sup>28</sup> Nebei sului mbai ro yoni-yni mai uware kena buhae haeumi wanen mbai mai miyaere kena buhae hemmile hele. Ro nde na miyaere kena buhae hennelena, nebei ro naei uwabe kena buhae heunge. <sup>29</sup> Ro miyae bae hi yae nauware ikele okoyei, nebeibe na hebaen-sebaen holeunge, kayaa hebeunge. Nebei u mekai wanen mbai Wali Ondofolo yae jemaatre holeumi, kayaa hebeumi, <sup>30</sup> rabuhine ban eyae jemaatna ro miyae Naei uware yaendeboke. <sup>31</sup> Allahle homofaene molaikoke, "Nebei aerene ro mbai miyae rowendene naei ako nake nukemmibonde na miyae bele mbaise inyeibonde. Nebei mekai yaere hokolo bee mbaise enejembonde."\* <sup>32</sup> Nebei ro naei miyae naei mokate u mekai a nunne honowate. Nebei wanen mbai Wali Ondofolo jemaatre Naei miyae wanen mae holeyeunge are nunne honate.

<sup>33</sup> Aei naei bele nda a honole, ro yoni-yni mai miyae wa waei uwa wanen mbainye kena buhae yae heungele nane merau miyae yoni-yni mai molo ware hubara haeisa yanemmiyembe.

## 6

### *Ako Nake Bele Fa-Fa Bele Nekenate Wali Ma*

<sup>1</sup> Kelu omi, mai ako nake naei elete a hubara haeisa yanemmile. Nebei wali mare Tuhan kena kole nane merau na ijen. <sup>2</sup> Allah a ukeunge Musale walora wali heere foloukoke homofaene roibu bele hobemmikonde a holora nda niyae mbai nendo, "Mai ako nakere hubara haeisa yanemmile." <sup>3</sup> Nebei are hakonnellena, nda a koloukoke, "Mai wali nda kani kelane foi moi nekembe nane merau wali heki ennekekombé."\*

<sup>4</sup> Ako yoni-yni, mai keli omire kena ikelere konate u mekai omokojae. Nare hole molommile nane merau aei Tuhanbe a usaei wasaeijae kelemmile.

### *Rowa Bele Yebaei Bubaei Bele Nekenate Wali Ma*

<sup>5</sup> Ya-ya kaliare mokoyaumi holona yoni-yni nda wali ma yae nekenate: mai rowa naei a elatere hubara haeisa yanemmile, nare fe bele faemmile, kena u na yolo-yolo yae hakommile. Mai u mekai harannebombe mai Wali Ondofolole a faeufe hakaube mokaube wanen mae mokommile. <sup>6</sup> Neyae be ranensimbe hee mo mai kalia mokaubere mauwa kaenembe naeise u mekai yae eharannemae. Wali Ondofolole yebaei bubaei wanen Allah kenare kole ma yae mayae kena rei mai yae mokommiyembe. <sup>7</sup> Nebei kalia na foi yae mokombe. Ro miyae yae aei Tuhande ei hawainye wanen mokombe, ro miyae hiware mokommile wanen ban. <sup>8</sup> Rabuhine ban mayae maisaei, ro miyae nde maenin yebaei bubaei holona bele yebaei bubaei holona banna bele me u foi sele mokonde aerene Tuhan naei roibu hobemmikonde.

<sup>9</sup> Nane merau rowa holona yo, mai kaliare mokayembe holona ro miyaere kena ijen mae mokommile, a huku-huku okojae. Bene nekenayembe mayae rowa holona yoni-yni nane merau kaliare mokayembe holona yoni-yni mai Yun mbai surgana ekenekele Kiyae. Neyae be ijokone ereyei.

### *Walobo Bele Fela Rorate Naei*

<sup>10</sup> Wali nemene nekaube einye Tuhan Naei elae wake rowei! <sup>11</sup> Walobo Yu kena koimeyele mare beko mokonembombere. Naei kenare kole hului mokonde belene, walobo yunde hun raisiyeumi naeise Allahlena erahan nemene rowembe. <sup>12</sup> Rabuhine ban nda heena mere mokate walobo yoni-yni bele eyae hande oibo-oibo ikowande,

\* 5:31 5:31 Kejadian 2:24 \* 6:3 6:3 Ulangan 5:16

ro miyae bele ban. Nebei walobo yoni-yoni angken nuwei raka mahi-mahi nuwate. Neyae nda kani kelana Allahre onaeinyene ouben hauben nekate ro miyae walora naei elae yae mokate nane merau surgana yoni-yoni nolone na hibi-hibi beko mokatere releyainye. <sup>13</sup> Nebeinye, walobo mare beko mokonengkombere merau kolonnele heene mayae elae yae hebembe naeise, Allahlena erahan walobore hun raisiyeunge rambun nemene mokombe. Mokombena, walobo elumbo halumbo kongkonde baensondera mayae namman na elae hebembe.

<sup>14</sup> Nda wanen mae kusei ban mahei ban mae hebembe: Mbai nendo Wali Ondofolo na hele wali nibine mo orombe. Romawi felayo naei yolu ha aefoyoungé buloore felare buheiko aleiko kole nane merau yoyo foma-foma, u hake-hake kole wanen mbai, Wali Ondofolo na hele wali nibine orate ro miyae walobo yoni-yonire elae yae hukenaimiyende. Bee nendo, mai wali alonnehambe. Romawi felayo rambun elaekei yae na nimokone feleikoyate hee fela ani na nimokore eyeisi sului. Nebei wanen mbai ro miyae wali himalainyeboko yo naei kena ure walobo beko yae omokoihoi sului. <sup>15</sup> Name nendo, mai wali uwa mokonnehambe ro miyae aka baeke wanen mae rei mai yae nekenatere Yesuslena a foi faeu foi huwembe. Romawi felayo oro mehau hiraikoke yae mokainyehake buloo felare roronatere wanen mbai, ro miyae nebei u mekai mbai mokainyehake yae walobore hun ranainyehinde. <sup>16</sup> Keli nendo, Yesus Naei a elelere hila rabo halembe. Romawi felayo ehu fela kiling mae fela i bele yoni-yonire kinyewate wanen, hila rabo bele ro miyae walobo nare me u beko mokonaimile hee na hului naei wali hun kolonainyele. <sup>17</sup> Maehae mbai nendo, Yesuslena wali hena bona wali nibire ehe kombe. Romawi felayo hokoma elaekei sele feleikoyate yae naei yun holere molowate. Nebei wanen mae mayae Yesusle wali hena nibire ehe kaube ro miyae walobo naei ame-ame are oboroyei. Allahle Roh mare wembe a yae walobore wennembe. Romawi felayo ramiyaeli yae felayo hire beko mokowaimi wanen mbai, Allah Naei elele a yae na hului mokonnebombe walobo yoni-yoni heraeymmihimbe enate. <sup>18</sup> Mehine bee nendo Allahle Roh a wembe hului mai ebéli mahi-mahi nemene na yane baei Allahre bonnembe. Na ranne moloukokale a isaeyaeubokene, Yesus Naei eleukoke wekeumi holona ro miyae nemene naeise u bene foi yae na hibi-hibi ebéli bonnembe.

<sup>19</sup> Allah Naei nunne honowate a nda niyae: Yahudi ban yo bele Yahudi yo bele Wali Ondofolo Naei a elelere hila rabo halenainyelena, wali hena bona enaiyaronde. Mayae ebéli bonnembe reyae nebei a foi faeu foi hufemile heene be rabulerebonde yae hufemile naeise, Allah yae Naei a wensele. <sup>20</sup> Nebei a faeu huwamale aerene reyae ndane kawane hebale. Ebéli bomembe reyae be rabulerebonde nebei a faeu rare ukeufe huluinye hufemile.

#### *Huba Mokoikoi A*

<sup>21</sup> Aei kena buhae haennele aka baeke Tikhikus raei uwana yaeiboke ma nane merau raei kalia mokale ma mayae isaeyembombe naeise nanemene mare huwenengkombe. Neyae Allahle kaliare Allah a weunge hului na hibi-hibi mokole. <sup>22</sup> Maei nekande ma isaeyembombe nane merau neyae mai kena foi u foi mokonengkombe naeise mai bokore Tikhikus ufende ende.

<sup>23</sup> Reyae ebéli banale mayae Yesusle einye aka baeke kena rei mai nekembe, nane merau Ako Allahle Tuhan Yesus Wali Ondofolole hakoneyembombe Wali Ondofolo Naei a elelere hila rabo halembe, nane merau maise naeise kena buhae hembe. <sup>24</sup> Reyae ebéli banale mayae nanemenere, aei Tuhan Yesus Wali Ondofolore na hibi-hibi kena buhae yae haeunge yore, Allah kena buhae aere ban mae henemembe.



## FILIPI

<sup>1</sup> Mai onomi foka Filipi yona Yesus Naei elembokembe wekembe holona yo. Mayae jemaat be yun be yebaere hebaube yo bele jemaat kaliare mokaube yo bele nane merau Yesus Wali Ondofolore hila rabo halaube ro miyae hosoro bele. Meyae bee Paulusle Timotiusle Yesus Wali Ondofolole yebaei bubaeise yendeboke mare ro melaeyayembe.

<sup>2</sup> Meyae ebeli bonnele aei Ako Allahle aei Tuhan Yesus Wali Ondofolole kena buhae aere ban mae mare henemembe nane merau mai kena u foi mokonemembe.

<sup>3</sup> Reyae Paulus na rokone baei mai bene nekeisiyeufene Allahre helen foi eiwewanale. <sup>4</sup> Nane merau na rokone baei, mayae nanemene naeise raei kena rei mai yae ebeli na hibi-hibi eibowanale. <sup>5</sup> Rabuhine ban mai bokore ekale heera meke nda heene bele, Yesuslena a foi faeu foi huwewamale are mayae hakoimeyaunge. <sup>6</sup> Allah yae mai kena u einye kalia foi hengkelen raufike. Allah raei kena u hara roroimeyeufe Kiyae Nenaie yae na hibi mo nebei kalia mokonemembe Yesus Wali Ondofolo benen mende heene. <sup>7</sup> Na ijen sele mai naei rei mai bele raei u benera nekenaisende, rabuhine ban reyae mare kena buhae heimeyamalene. Kawane hebale hee bele moinye nekwale hee bele Yesuslena a foi faeu foise hole molowanale nane merau a elae wamaele nebei a na hele yeuboke. Nebei mokale bele mayae nanemene rare hakowaufe. Allah rare kena buhae aere ban mae heyefu wanan mbai Neyae mare heyembe. <sup>8</sup> Allah naeisaei nekele Yesus Wali Ondofolo mare kena buhae heyembe wanan mae reyae mare kena buhae haemalene nane merau kena kaban kale mangkele hubaimakondere.

<sup>9</sup> Nane merau reyae ebeli eibowanale, Allah yae isaei hebaen na bune-bune inyembe nane merau nebei isaei hebaen bele ma hului yae mauware enneharambombe, mai kena buhae u buhae emerei-emerei emerenemembe, <sup>10</sup> nane merau mai u bene ijen mare haranembe. Nebei mekai yae mai u mekai yolo-yolo yembombe, nane merau hiwa yo yae mai naeise a beko ewei sului mende Yesus benen yakambonde heene. <sup>11</sup> Mayae Yesus Wali Ondofolo Naei a elelere hubara haesa yanaunge yae mai wali alonembombe nane merau Yesus kenare kole me u emekai bele mokombe. Nebei aerene Allahre hili ennehebembe nane merau buma ennekamembe.

### *Paulus Kawa Einye Hebele Kalia Ani Naeise*

<sup>12</sup> Aka naei baeke naei, reyae kena kale mayae isaeyembombe, reyae kawane haisekoke hororebe ro miyae helen Yesuslena a foi faeu foi boraikoke. <sup>13</sup> Mana nda kanina Ondofolo kabande imae kayaare hebate yo bele hiwa yo bele nanemene isaeyaeiboke, Yesus Wali Ondofolo kenare kole huluinye mokale aerene rare kawane ahaeisekoke. <sup>14</sup> Nane merau reyae kawane hebale aerene aei Tuhande hila rabo mbainye halaende aka baeke wa helen sele be rabulaiboke Yesuslena a foi faeu foise hungaimilere buhae-buhae okoi. <sup>15</sup> Na hele ro miyae holo mbai kena hensen mae kate aerene, nane merau rangkele are kilemalerene, Wali Ondofolo naeise huwate. Nebeibe holo holo nendo u bene foi yae harainyeboke huwate. <sup>16</sup> Nebei yo rare buhae haeisene nebei a foi faeu foi huwate. Neyae isaeyaeiboke reyae Yesuslena a foi faeu foise hole molorende naeise ukeufe mekale. <sup>17</sup> Nebeibe holo mbai nendo roro ronaimibondere aerene Yesus Wali Ondofololena a foi faeu foi u bene beko yae harainyeboke huwate. Naei u benera nekaimi nebei u mekai mokatere reyae kawa einye hebale bororebondene kena beko korele. <sup>18</sup> Nebeibe reyae karo yae elale, rabuhine ban naendae mekai horo Wali Ondofololena a foi faeu foi u bene foi yae, beko yae haranainyehonde hungayendene, raei kenare roweisiyeufe.

Nane merau reyae na hibi-hibi foi hubarennende, <sup>19</sup> rabuhine ban reyae raeisaei nekale mai ebeli baube bele Yesus Wali Ondofolole Roh hakoyeufe bele yae rare hole moloneisebonde. <sup>20</sup> Reyae rabo elae yae halaele wali bele nekerere, hererele raei uwa aerene Wali Ondofolore buma kaenainyele. Nebei aerene reyae fe okoi nebeibe be rabulerebonde Naei kaliare mokorele. <sup>21</sup> Rabuhine ban raei uwa bae wali nekerelena, Yesus Wali Ondofolole wali nibine ororele; hererelena, Allah raei roibu hobensekonde. <sup>22</sup> Nebeibe nda kani kelane wali heki nekerelena, mon kaban sele roufele Wali Ondofolole kaliare Naei kenare kole hului yae mokorele. Naei foi sele kiyaere elerebondere reyae onaale handale. Wali nekerere foi nane merau hererele foi. <sup>23</sup> Wali bele here bele rare reufira reufira ayeisekoke. Raei kena bae nda kani kela nukerebonde erele Wali Ondofolole mbainye anakondere. Nebei naei foi sele yae reyae hubanale. <sup>24</sup> Nebeibe mai aerene naei foi sele reyae na hibi mo nda kani kelane nekerere, <sup>25</sup> nane merau isaeyebokale Reyae hakoremembe mayae Wali Ondofolo Naei a elelere hila

rabo halemembe. Mai rei mai kaban komembe naeise nda kani kelane reyaе namman nekerele. <sup>26</sup> Nebeinye reyaе mai bokore berehonde erele hee Yesus Wali Ondofolo yae rare foi mokoufebokene mayae rei mai roungensimbe kombe.

<sup>27</sup> Rahe ma benate hororebe, mai walibe niyae Yesus Wali Ondofololena a foi faeu foi boraukoke huluinye nekembe. Nebei mekai nekembene, reyaе mai bokore erele, na ererende einya, ereboronde mayae nanemene u bene mbainye nekaube nane merau ro miyae Yesuslena a foi faeu foi kelaеumi huluinye hila rabo halenate naeise na hibihibi releyaunge. <sup>28</sup> Nebei u mekai releyaunge yae mai a keleyaumire na hele ban elate ro miyaere fe efaei u mekai yae ennekembena, nebei yo isaеinyaiбonde nare bekore emmimokonde iwaube yeuboke nebeibe mare holere molonembombe iwaube yeuboke, nane merau nebei rambunde Allah yae mokombonde. <sup>29</sup> Rabuhine ban Wali Ondofolole aerene mare mon ikembe Nare hila rabo halennelere mo ban nebeibe Naei aerene beko hubannembe, <sup>30</sup> raei uwane beko hubawanalere na bere mayae erewaufe nda hee boraube wanen. Mayae hakoyaufe yo, raei uwana beko hubayanale nanembainye relaennele.

## 2

### *Wali Ondofolole U Mekai Mare Bure Ware Hamenembe*

<sup>1</sup> Wali Ondofolo Nangkele mbainye oraubene mai kena ure hara roroyembe. Neyae mare kena buhaе u buhaе hembene kena foi u foi hubaunge. Allahle Roh mare ei hawembene homo mbainye oraube wali mbainye nekaube. Maise naeise kena nime haba yae nekembe nane merau ro miyae hiwa naei beko hubainye aerene mayae kena beko hubayaunge. <sup>2</sup> Nebei aerene, mayae kena mbai u bene mbai yae nekembe, maise naeise kena buhaе u buhaе hemembe, nane merau mekai mbai yae harannebombe nekembe. Nebei nibi yae raei kenare foi mokonsebombe. <sup>3</sup> Rore ronayembombere baembe naei, eise molonayembere relaeunge naei, me ube omokojiae. Mai u mekaibe harannebombe, maeise naeise kena u ane rannehimbe hi yae hire bereise yae erennele. <sup>4</sup> Mai uwa mbai naei foise mo u bene ehayeyijae, ro hi miyae hi naei foi bele yae u bene hayennele.

<sup>5</sup> Yesus Wali Ondofolole wanen mae mai u bene harannele nekembe. Neyae nda u mekai ma nekewole:

<sup>6</sup> Naendae mekai horo Yesus na hele Allahbe,  
nebeibe Allah bele mbai u mekai na hibi hononnelere erelei,  
nebeibe karo yae eleukoke.

<sup>7</sup> Nebeibe Nauware kitainyeboke one hengko bele nanemene ruboumiboke,  
Naei u mekai haraungeboke yebaei bubaei holonare yeuboke  
nane merau Nauwa ro miyae wanen mae yeuboke.

<sup>8</sup> Nauwa ro miyae wanen mae yeuboke hee  
Naei uwa eleman sele benen ane oungeraufike  
nane merau Allah kenare kowole huluinye ohaline baikoke hereke.

<sup>9</sup> Nebei aerene Yesusre na bumane hele Allah eungekaеuboke  
nane merau Yesusre nda ro miyae yoni-yoni naei ro raimera one hengko bele ro yae eungerouboke.

<sup>10</sup> Nebei mekai yaere Yesusle ro enaiborondene  
walobo yoni-yoni bele malaikat yoni-yoni bele nda kani kelana yo bele,  
nanemene oro selen-selen enaitorongkonde, enera faisa yanenainyende

<sup>11</sup> nane merau nanemene Yesus Wali Ondofolore Tuhan mae wo enaikonde.  
Nebei mekai yaere aei Ako Allahre hili hebenainyende.

<sup>12</sup> Reyaе buhaere haemale aka baeke, mai u nolo u kainye namman nekewekale hee bele nda hee ahaunge nekale bele, Wali Ondofolole a elelere mayae hakoyaube ma mbai Allah Elaelo Wakelore hubara haеisa yanaungene, Wali Ondofolole wali hena bona wali nibi are na hibi-hibi relenembe hakomembe. <sup>13</sup> Rabuhine ban Allah Naei merau haraungeboke me u mai uwa walora mokongkonde naeise, Allah Nenaеijae mai kena u einye Naei kena kolere mokonengkombe.

<sup>14-16</sup> Ro hi miyae hi yae mare a beko eweise me noyoi fende na hului ban naeise, nane merau u mekai yolo-yolo Allahle kelu omi wanen nekembe naeise, mai me u yoni-yoni rilibo ban mae emmokombe nane merau a kilei-kilei ban mae nekembe. Nda kani kela einye ro miyae meleyae wali nalaiboke horoyate yo ouben hauben nolone nekate nolone Wali Ondofololena wali nibi kelemmibomberene, mayae findelau wanen mae hehe naemmile. Nebei mekainye Yesus benen mende heene mai aerene reyaе na hului uwa erekaende, rabuhine ban reyaе ungfo wangfore kowekale yoni-yoni rambun foibe

mokaikoke. <sup>17</sup> Na bere Yahudi ro miyae Allahre hili era akau erare obo yoku ongkou wae felainyekoke heene anggur bu bele rilewate barainye.\* Nda hee Allahre ei moloiboise Yesus Naei a elelere boraube mokaube yae, mai hili era akau era wanen mae yeuboke. Naendae mekai horo reyae nebei anggur bu wanen mae heraeayaiseboubé mai hili era akau erare barauboke wanen mae hererelena, raei kenare roweufehike. <sup>18</sup> Raei kenare roweufehikene, mai kenare bele rowenensimbe.

*Rangkele Kalia Mbai Mokande Ro Miyae Naei*

<sup>19</sup> Raei rabo elae halaele Tuhan Yesus nibi wennendene, na heki ban mae Timotius ufende mai bokore endere. Neyae bensonde mende yae mai u mekai nekaube ma reyae bororebondene kenare foi mokonsebombe. <sup>20</sup> Ndane Timotius nembai ken rangkele nekande yo nolora mai foi naei u bene na hibi mo nekeyainye. <sup>21</sup> Hiwa yo nanemene naei uwa mbai naei rambunne mo baeyate ungo wangfo hele koyate, Yesus Wali Ondofolole kaliare omokoyei. <sup>22</sup> Nebeibe mayae Timotiusre ro raungeboko, neyae na hele kalia mokole ro. Yesuslana a foi faeu foi huwei-huweise rangkele mbainye kalia elae hele hakoufeboke mokowonde. Meyae bee ako bele kelu bele wanen yaendeboke. <sup>23</sup> Rare kawara hainyaisekondere isaeisebondera wa, Timotius mai bokore ufende ende. <sup>24</sup> Tuhan hakoimeyefene raei kena u hara roroimeyefene, rabo halaele na heki ban mo reyae erele mangkele emahubayengkonde.

<sup>25</sup> Aei aka baeke Epafroditus mai abu ako ukaungele raei hakoiboise meke kiyaeere reyae hubanale naei foi sele ufende benen bukensinde mai bokore endere. Meyae bee ako mbainya wanen. Raei kalia einye neyae baraiboyefu felayo wanen mae releyenle. <sup>26</sup> Reyae ufende benen mai bokore ende, rabuhine ban naei uwa era buloo kowole a eungeyoboukoke borokaubene neyae kena beko kole nane merau mangkele hubayengkombere kena kaban kole. <sup>27</sup> Era buloo hereinyen-hereinyen kowole naei a eungeyoboukoke. Nebei na hele nebeibe Allah nare mo ban yanekoi yase yae ei hawoungé, rare bele ei hawoufe. Rabuhine ban raei kena beko nda relaenalera eleman sele erekonde belene. <sup>28</sup> Nebei aerene mai bokore ufende bensonde ende naeise raei kena kaban sele kale. Rabuhire ban reyae raeisaei mayae nangkele hubayengkombene, mai kena rei mai anembombe kombe, nane merau mai naeise raei kena isaisa alalo okoi nekerele. <sup>29</sup> Mayae Tuhande hakaungene Epafroditusre kena rei mai yae ei anebombe. Naeinya wanen ro miyae nanemene mayae ei hawemmile. <sup>30</sup> Rabuhine ban Wali Ondofolole kaliare mokowole aerene ebi fere neyae hereube. Nane merau mayae ahaunge nekaubene rare hakaufeboube kalobe naei wali nou eheiboi ban mae helen sele hakowoufe, herere fe efaei.

### 3

*Wali Ondofolole Wali Nibi Huluinye Orombe Naeise*

<sup>1</sup> Aka naei baeke naei, rahe ma benate, yakanate, Tuhanbe eisa rei mai mo komembe. Reyae nda a na bere roko mbai moloukokale. Karo, benen nda naeise homone molorekonde. Nda a usaei mai wali hole moloiboi naeise.

<sup>2</sup> Mai nolone ro miyae hiwa kelaemi Musale walora wali heere foloukoke a huluinye ro holona naei ro uwa elan nenaisande hele. Nda are kelaeimi ro miyae u mekai bekobe mokate, wali niki bele yoku wanen yaiboke. Mai uware kayaa foi hebemembe, nebei ro miyae yae kelaemi a faeu oboroijae. <sup>3</sup> Na bere Allah ro uwa elan nainyehake ro miyaere Naei holona yo yae me baeuboke. Nebeibe nda hee eyae Allahle Roh aei kena eisa elele huluinye Allahre ei molomande nane merau Yesus Wali Ondofolore hili hebannele ro miyaere Allah me baeume, na hele ro uwa elan nainyehake ro miyae wanen. <sup>4</sup> Na hele Musale walora wali heere foloukoke a huluinye raei ro uwa elan naisehake, nebeibe reyae isaeyebokale nebei mekai mokatere Allah yae me ebaei.

Ro uwa elan folaimi yae wali hena bona yarate naei wali nibire yeuboube yae, hiwa yo hila rabo halaetera reyae na hului nebei wali nibire hila rabo emekai bele halerele. <sup>5</sup> Rabuhine ban rare honokaisele yara ya mehine name nenja yae raei ro u elan naisehake. Reyae Israel yohona ro, Benyamin imaena, Ibrani yo fa. Musale walora wali heere foloukoke na a mokoi-mokoise reyae Farisi holona ro. <sup>6</sup> Raei me u mokowale naeise, reyae Musale walora wali heere foloukoke are ehakoiboi jemaat yoni yonire weitasi kowamaele. Na bere raei wali himalorembonderene nebei wali heere foloukoke a ebi kaban mokowale, mbai sambai eheisoi sele.

<sup>7</sup> Na bere reyae u bene nekewaise Yahudi ro nekewalene, nane merau Musale walora wali heere foloukoke are hubara haesa yanewanale aerene, Allah yae rare me baewoufe.

\* 2:17 2:17 Keluaran 29:38-41

Nda hee yae Wali Ondofolore ro rowanalene nebei wali heere foloukoke a hului me u rabuhi ban eranale. <sup>8</sup> Benen bararembondere. Raei Tuhan Yesus Wali Ondofolo ro roungebokalere na bereise eranalene, nda kani kelana honowaise rambun yoni-yoni rabuhi ban mae elale. Nebei Kiyaele aere ne rambun yoni-yoni nanemene me ruboumibokale. Yesus Wali Ondofolo raeise yembondere nane merau Nangkele mbaise yaebondere nda kani kelana rambun yoni-yoni retara yae me baele. <sup>9</sup> Allah ukeume huluinye reyae Wali Ondofolo Naei a elelere hila rabo halerende. Nebei wali nibi yae Allah rare wali himalainyeboke ro miyaere me baeufe, Musale walora wali heere folaikoke are hubara haeisa yanewanale randa ban. <sup>10</sup> Reyae kena kale Wali Ondofolore ro rorembonde nane merau Allah yae Yesusre nulu yo mahe yora waleungeboke elae wakere isaesebonde. Naendae wanen horore rare weitasi konaisele, hererele, Allah kenare kole hului reyae mokorelere, Yesus mokowole wanen mbai. <sup>11</sup> Raei uwa nulu yo mahe yora ensewalembonde naeise, reyae nebei Wali Ondofolole naeise nda walina na bereise erenale.

<sup>12</sup> Nebei yoni-yoni nanemene mokorelere rauwa hiyei raneubokale yae elei. Yesus Wali Ondofolo yae kaeneufekoke Naei wali nibi a huluinye ororele. Reyae na hibi mo releimeyanale Naei a elelere hakanale. <sup>13</sup> Aka naei baeke naei, Neyae weufe are hakanale wali ma reyae nanman ehameikoi. Nebeibe na bere nekewale wali ma reyae u bene nundensekonde, nane merau raei uwa hararembonde, Yesus kena kole huluinye nekerele u mekai raei elae wake nanemene hele relaenale. <sup>14</sup> Allah Hubalo Mando kaeneufekoke Yesus Wali Ondofolo Naei a elelere hakorende walora Naei u mekai ma isebonde. Neyae kaeneufekokene reyae elae relaenale Naenya me buhae roufele. <sup>15</sup> Eyae Yesusle einye henandeboke ro miyae nebei u bene mbai nekeyaimele. Nebeibe mai u nolo u kainya u mekai hire u bene mahi nekenayensimbena, Allah Nenaenjae na hului sului nebei rambun naeise yakanengkombe. <sup>16</sup> Naei foi sele eyae nda hee bele yae Wali Ondofolo keleimeyume u mekai wa mekai wane hakomabonde.

<sup>17</sup> Aka naei baeke naei, raei u mekai kelaemale bune wane hakongko, ro miyae hiwa hakate wanen mbai. Nane merau mai u mekainye hakoyate yore foi yae ijoko eremmiyembe. <sup>18</sup> Rabuhine ban ro miyae helen Yesus Wali Ondofolo nekewole wali mare kena okoi, Nare yokeijo wanen. Yesus naendae wanen horo ohaline bonaikonde naeise Neyae isaeyebokabe, Allah kenare kowole huluinye na hibi-hibi mokowoung. Na bere reyae nebei yokeijo naeise wengkokamale. Nda hee ijoko ibo bele baleufe reyae benen nebei yokeijo na a wamale. <sup>19</sup> Nebei ro miyae beko emmimokongkonde. Nebei yo nda wali ma nekate: naei yarele ei mom-mom rambunde yaeiboke, fere koi-koi u mekaise ei molaimi, nda kani kelana wali beko mare mo naei u bene harainyeboke. <sup>20</sup> Nebeibe surga aei kani kela niyae. Nebei anuwaufa aei walilo Tuhan Yesus Wali Ondofolo benstone mendere kena maemae yae rakeyannele. <sup>21</sup> Allah yae Yesus Wali Ondofolore elae ikeunge nda kani kelana rambun yoni-yoni mokommibonde Naei me kelee u keleene menayorulembonde. Naei elae wake honainye walora mokommebonde eyae nda kani kelane nekande uwa kiyae bennehonde, Yesus Naei one hengko hehe bele uwa wanen imabonde.

#### 4

<sup>1</sup> Reyae kena buhaere haemale aka baeke, benen hubaimakondere kena kaban sele kale. Mayae Wali Ondofolo wembe are hakaungene raei kenare roweisiyeufe, rabuhine ban Allahle ro be ro yoinye mayae raei kuibae (me buhae) wanen yaebokke. Reyae benen wamale, Tuhan Naei a elelere hila rabo elae yae halemembe.

<sup>2</sup> Euodiale Sintikhele, mayae beere nda a usaei elae yae wabale. Tuhan Naei a elelere hila rabo mbaise haleubene foi mokoukobe, u bene wa bene mbainye nekebe. <sup>3</sup> Sunsugos raei kalia mbaike mokoyele kiyae ware riyawale, Euodiale Sintikhelere foi mokoneikondere weyae hakoumibonde. Hokolo bee bele Klemens bele ro miyae hiwa bele yae Wali Ondofololena a foi faeu foise huwammilere kalia elae hele rangkele mbainye mokandeke. Nebei yo naei ro wali henare enajjaronde homofaene molaikoke.

<sup>4</sup> Aei Tuhanbe einye rei mai no ban hee ban komembe. Benen wamale, rei mai no ban hee ban komembe! <sup>5</sup> Ro miyae nolone kena nime haba yae nekemembe. U bene enundeijae hele, aei Tuhan na heki ban benen mende. <sup>6</sup> Benate yakanate rambunde buhae ohokoiyae. Nebeibe mai kenare kaube ma nanemene ebeli yae Allahre riyennele. Nebei ebeli bonnelle mbai einye Nare helen foi wennele. <sup>7</sup> Allah Naei rei mai mokonnele nibi, ro miyae mbai sambai isaeyeboi nibi walora, Yesus Wali Ondofolo Naei a elelere hakombene mai kena foi u foi mokonemembe.

<sup>8</sup> Aka naei baeke naei, nda homo huba mokoikoise a mbai herawamale. Nda yoni-yonire nou ennehenembe hele: na hele naei, meli mekai naei, wali himaloi-himaloi

naei, wali yolo-yolo naei, kena buhae u buhae heyaimi naei, me u ei bele molonayembe naei, foi moi sele nemene naei, nebeise yae mo nou ennehembe. <sup>9</sup> Nane merau reyae mai bokone mokowalere isaeiwaube, yarowaube, borowaube, erewaube, nebei niyae mayae mokombe hele. Allah rei mai onomi foka no mare ei haungemembe.

*Paulus Filipi Jemaatre Helen Foi Ukeumi*

<sup>10</sup> Aei Tuhanbe eisa raei rei mai eufemeleke kale, rabuhine ban raei uwana hubanale naeise mayae bene nekensikembene benen rare hakaufefoke. Reyae raeisaei nekale mai u bene rare namman nekayembe. Bere mayae kena kaban kowaube raei wali rambunde hakonsebombero, nebeibe mon banne omokoiboi nekewaube. <sup>11</sup> Nda a mekai ma wamale raei uwana kalobe moloufene ban. Rabuhine ban enaibende ma foi, beko hubarende naei, reyae na hului kena foi yae nekerere. <sup>12</sup> Kalone wali nekerere naei bele kuikui maema nolone nekerere naei belere reyae ninae hubawanale. Rahe ma menaibendere, wandene, moni mainye, kalone, kuikui maemaene, reyae na hului kena foi yae nekerere. <sup>13</sup> Wali Ondofolo elaere ikeufe Kiyae walora reyae rambun nemene na hului mokorekonde.

<sup>14</sup> Nebeibe raei uwana kalore molowoufe hibe mayae fomaufefokene, u mekai foi selebe mokaufefoke yae hubanale. <sup>15</sup> Mayae Filipi yona ro miyae maisaei sele, roko mbai nendo Wali Ondofolole naeise a foi faeu foi mekale huwamaelera Makedonia kanina yo hine reyae nane merau huwamaele. Reyae Makedonia kanira kulun ukale ewale hee, mai jemaat mbaiibe rare nou haeufefoke, rambun bele hakaufefoke, hiwa yo ehakoiboi. <sup>16</sup> Nebei sului mbai Tesalonika yone nekewale hee roko helen kalo nolone ekanekewale hee, rare hakowaufe. <sup>17</sup> Mayae benen rambunde yensekombere reyae ebai. Nebeibe mai me u foi mokaufefokere baele, rabuhine ban nebei me u walora isaeisebonde Allah mai roibu ennehobengkombe. <sup>18</sup> Nda hee anerele naei bele hirerele naei bele nanemene maisa yaroukokale emekai bele honate. Rambun naei reyae helen, rabuhine ban Epafroditusre ikaungele meke bele roukale. Nebei rambun Allahre kinyainye hili era akau era fololo kaei mo wanen, Neyae kena kongkonde. <sup>19</sup> Reyae eise molanale Allah nene waewae bele Kiyae foi yoni-yoni melaeu Wali Ondofolole walora mai wali rambun emekai bele inyemembe.

<sup>20</sup> Allah, aei Ako Kiyare huba ban haei ban hili hebenainyende. Amin.

*Huba Mokoikoi*

<sup>21</sup> Yesus Naei eleuboke wekeumi ro miyae Naei a elelere hila rabo haleyainye holona ro miyaere raeinya ro melaeyemmibombe. Aka baeke rangkele mbainye nekande yo mare ro melaeyayembe. <sup>22</sup> Ndane Yesus Naei eleuboke wekeumi holona ro miyae mare ro melaeyayembe, na bereise Kaisarle imae wakun ranne kalia mokate yo mare ro melaeyayembe.

<sup>23</sup> Reyae ebeli banale aei Tuhan Wali Ondofolo mare kena buhae aere ban mae henembe nane merau Naei kena buhaere mai kena ei u einye hubannembe. Amin.

## KOLOSE

1-2 Onomi foka aka naei baeke naei Kolose yone nekaube, Yesus Naei eleuboke wekeumi ro miyae, Yesusre na hibi-hibi hakoyaungere reyae Paulus nane merau aei aka baeke Timotius bele mare ro melaeyayembe. Allah kena kole huluinye Reyae Wali Ondofolo Yesusle abu akore yeubokale.

Reyae ebeli banale aei Arai Allah kena buhae aere ban mae henembe nane merau kena foi u foi mokonembombe.

### *Helen Foi Naei Ebeli*

<sup>3</sup> Meyae roko helen aei Tuhan Yesus Wali Ondofolo Naeko Allahre mai naeise ebeline ibowande, helen foi sele weyannele, <sup>4</sup> rabuhine ban meyae borandekoke aei Tuhan Yesus Wali Ondofolore hila rabo haleyaungele nane merau Yesus Naei eleuboke wekeumi ro miyae nemene kena buhae heyaumile. <sup>5</sup> Wali surgane ennekembere rabo elae haleyaubene, Yesusre hila rabo haleyaungele nane merau Yesus Naei eleuboke wekeumi ro miyaere kena buhae heyaumile. Na bena a na hele, Wali Ondofolole a foi faeu foise huwewayembe, mayae angkaei boraukoke. <sup>6</sup> Nebei heera isaeyaeuboke na hele Allah mare kena buhae aere ban mae heyembene me u foi mokoimeyaube, nane merau Wali Ondofolore hila rabo halaeyinye ro miyae helen baraimeyate. Nebei wanen mbai baete makeinye makeinye ro miyae Yesusle a foi faeu foise eiborate ijenne. <sup>7</sup> Mayae nda a foi faeu foi Epafraslera boraukoke. Wali Ondofolo a weunge hului kalia na hibi-hibi maengkele mokoyanda nane merau maei naeise mokoyele. Meyae nare kena hele kannele. <sup>8</sup> Neyae isaeyeumeboke mayae Allahre Roh elae yae hiwa yore kena buhae heyaumi. <sup>9</sup> Nebei a mekai meyae borandekoke heera mai naeise na hibi-hibi Allahre ebeli bannele. Meyae Allahre riyannele Naei Roh yae Naei isaei hebaen bele ma yae mauwa haranembe nane merau nda wali einye foise mo kelenembe. Nebei wanen mae Naei kenare kole ma isaeyembombe. <sup>10</sup> Meyae nda inyaibonde naeise ebeli boyannele: mai wali mekai Yesus Naei eleukoke wekeumi holona yo naei wali mekaise yembombe, mai wali Allah kena foise na hibi-hibi mokonnele, mai me u foi mokombera rambun foi inyaibonde, nane merau Allahre na foi yae ronnebombe. <sup>11</sup> Meyae riyannele Allah mare elae baranembe, naei bumana hele elae huluinye. Nda elae walora mayae na hului nda wali ma nekembe: wali beko hubanembe hororebe na hibi-hibi Wali Ondofolore hila rabo halennele, kena hebaen-sebaen mae nekembembe, nane merau mbai rei mai rowenensimbe yae <sup>12</sup> aei Araise helen foi na hibi-hibi wennembe. Rabuhine ban Neyae elengkokembe nane merau mare ranenjekembe Naei hehe bele yo wakune emembombe, nebeinye mokoungehake rambun Yesus Naei eleuboke wekeumi yo holona bele hubannele. <sup>13</sup> Walobo yunbe me kelee u keleene nekewandene ouben hauben nolone orowandera Allah yae wekeume yaweumeboke Allah na kenare koyeunge Kelu Yesusle me kelee u keleena yo holo einye haumekoke. <sup>14</sup> Yesusle walora aei beko bako aheukoke baeufokene, aei walina u mekai beko yoni-yoni faeinyeumekoke.

### *Yesus, Ondofolo Na Bumana Hele*

<sup>15</sup> Ro miyae ijoko ereiboi sului Allah Nauwa mbai Kiyae Yesus Niyae. Yesus na bena Kiyae yeuboke, Naei anuwau buma reufina, nuleuboke rambun nemene fomene ana mo, <sup>16</sup> rabuhine ban Allah Yesusle eisa rambun nemene fomene mokoukoke. Nda kani kelana ro miyae na hului ijoko yae erate rambun bele, ro miyae ijoko ereiboi sului surgana rambun bele, nane merau malaikat holo naei Yun-jun bele, walobo holo naei Yun-jun bele, Yun-jun nemene fomene, Yesusle walora Allah mokoukoke, nane merau Yesusle foi naeise mokoukoke. <sup>17</sup> Yesus na bere hele nekewole, nda rambun-rambun hi nemene fomene moisa mo yakawate. Nemene fomene beyate Naei elae walora. <sup>18</sup> Yesus jemaat Yunde yeuboke. Neyae na huba raweiboi Kiyae. Nulu yo mahe yora ainyuke holo yo Neyae na bena Kiyae yeuboke, nemene fomene naei Ondofolore yembonde naeise. <sup>19</sup> Allah kena rei mai yae a hokoukoke Naei me einye u einye honate rambun nemene Yesusle einye honate, <sup>20</sup> nane merau Yesusle walora nibi mokombonde nda kani kelana bele surgana bele nemene fomene na hului Nangkele foi mokommikonde. Yesus ohaline baikoke na ha rileuboke yae nda nibi mokouboke.

<sup>21</sup> Na bere, mayae Allah kena kole hului ban nekewaube, Nare oroiboi. Allah Na yokejijo wanen nekewaube, rabuhine ban me u beko mokowaubene nane merau u bene beko nekewayembene. <sup>22-23</sup> Yesusle a foi faeu foi mayae boraukoke nane merau nda kani kelana yo nemene aimihuweukoke. Mayae Yesusle a foi faeu foi hila rabo elae halemembe nane merau neinye honate a benatere rabo elae halemembene, Yesus hereke

walora Allah mare foi mokombokembe. Nebei nibi yae Neyae mokouboke mai wali alombokembe ma nane merau bekore ewei sului ma Naei bene hanembombe naeise. Yesusle a foi faeu foi reyae Paulus yae ro miyaere na hibi-hibi huweyamaele.

### *Paulus Naei Kalia Ma*

<sup>24</sup> Jemaat Wali Ondofolo uware yeuboke. Jemaat aerene reyae beko hubanale nebeibe rei maibe roweisiyeufe, rabuhine ban nda kani kelane nekewole heene jemaat foi naeise Wali Ondofolo beko hubawounge wanen mbai nda hee jemaat foi naeise reyae beko hubanale. <sup>25</sup> Reyae Paulus jemaat na kaliane mokale, rabuhine ban nebei naeise Allah yae rare a ukeufe. Nane merau Allah yae rare a ukeufe Naei ako faeuko nemene fomene mare huwerengkombe. <sup>26</sup> Nebei ako faeuko aei abu naei arai naeite heena nunne honaimekene naeisaei ban, nebeibe mana Allah yae a hokoukoke Yesus Naei eleuboke wekeumi yore nda ako faeuko nunna honaimeke yakaumiboke. <sup>27</sup> Allah merau raungehike Yahudi yo bele Yahudi ban yo bele na hului nda nunna honaimeke ako faeuko isaeyiaibonde, naei wali einye foi moi mokommiyende. Nebei ako faeuko Wali Ondofolo na bumane hele Kiyae naeise, na nore beunguke nda niyae: Wali Ondofolo mangkele nekembene, mayae na hului rabo elae haleme Naei nene waewaere mayae hubannele. <sup>28</sup> Meyae Wali Ondofolole ako faeuko isaei hebaen eisa ro miyae nemene huweyammile, a usaei waeisaei weyammile. Yesus Naei eleuboke wekeumi ro miyae naei wali hiyei rannaibonde mo Allahle bene hamamibonde naeise, mayae nda kalia mokande. <sup>29</sup> Reyae elae hele baele nda kalia mokalere baensonderene Wali Ondofolo yae yeueufe elae randa mokale.

## 2

<sup>1</sup> Reyae Paulus yae wamale mai naeise, Laodikia na jemaat naeise, nane merau ro miyae hiwa namman maengkele ehubayeikoi yo naeise, reyae releimeyanale naei mayae isaeyembombe. <sup>2</sup> Nebei ro miyae na hului Allahle a nunna honaimeke, Wali Ondofololena a, na foi yae isaeyiaibondere nane merau nebei isaei hebaen hului nekenatene foi hubanainyende naeise, reyae merau haraungebokale naeise naeise u bene wa bene mbai yae kena buhae u buhae henate walora na kena u hara rorionate. <sup>3</sup> Wali Ondofolo eisa Allahlena isaei hebaen nemene fomene na foi bangka mo nunna honate. <sup>4</sup> Ro miyae hiwa mare a ame-ame yukaei walora kobube mokonayembombe belene, reyae nda a wamale. <sup>5</sup> Naendae mekai horo lon reyae mai bokora ahau nekale, mai naeise hubanale bae mangkele mbainye nekande wanen. Nane merau reyae rei mai kale, rabuhine ban mai u bene wa bene mbai yae nekaube nane merau Wali Ondofolore hila rabo elaekei sele haleyaunge.

### *Yesus Mangkele Nekemembe, Ame-Ame Bele Ro Miyaere Kayaa Hebemembe*

<sup>6</sup> Mana Wali Ondofolo Yesus mai Tuhan mae a elaubene, mayae Nangkele mbainye nekemembe. <sup>7</sup> Mayae inyale bele kambu bele Naei einye bembe. Naei a wembe hului wali mekai nekemembe. Mare kelewayembe hului Nare hila rabo elae halennele nane merau na hibi-hibi Allahre helen foi wennele. <sup>8</sup> Kayaa hebembe, hiwa yo a na hele banbe, a yu bele yae kelenayengkombe mo, mai u benere aenemfombe bele. Nebei a kelaeimi ro miyae naei era henana nane merau nda kani kelana agama heere folaikoke are honaimina. Nebei a ro miyae naei u bene nekaimira keleyaimile, Wali Ondofololena ako faeukora ban. Nebei aerene naei a keleyaimile na hele ban. <sup>9</sup> Nebei wanen a ehakoyejae, rabuhine ban Wali Ondofolo Nauwa einye Allahle me einye u einye honate rambun nanemene nekate mo. <sup>10</sup> Wali Ondofolo bele nekaubene, Allah Naei me einye u einye honate rambun mai waline haungembe. Wali Ondofolo Na anuwau bumana hele Kiyae, ro miyae holo bele walobo holo bele mere ure mokoyate yun-jun holona bele nemene Naei keleene. <sup>11</sup> Wali Ondofolo bele mbainye nekaube walora mai u mekai beko ro uwa elande neisayate wanen mokombokembe. Ro miyae yae uware hee enesai, nebeibe Wali Ondofolo yae mai u mekai beko hee nensakembe. <sup>12</sup> Mayae bu kayengkokembe heene Wali Ondofolo Yesus mangkele a bulune nanembembane molayengkokembe wanen. Nebeisa Allah Yesusre herewate yo nolora waleungeboke Kiyaele elaeere hila rabo halewaube walora mayae Yesus bele walauboke. <sup>13</sup> Na bere mayae Allah bele wahaekoke nekewaube, rabuhine ban beko bako na hibi-hibi mokowaubene. Mai u mekai beko ro uwa elande nensande mekai omokoiboibe, nebeibe Allah mare hakowombe. Naendae mekai horo mayae beko bako belebe, Allah Wali Ondofolore wali ikeunge heene, Allah nane merau mare wali ikembe. Aei beko bako mokowande Allah yae nda wanen faeinyeumboke: <sup>14</sup> Musale walora wali heere foloukoke a eyae roko helen ehakoibo, nebeibe me u beko mokowande. Nebei me u beko a bele aei ehee bukulu a bele homone molaikoke. Nebei homo Allah nda nibi

yae keukoke, Yesusre baikoke ohali ranne nebei homo Allah yae boukoke. <sup>15</sup> Walobo holona yun-jun naei elaeere Allah yae yambi mokoumiboke. Yesus ohaline baikoke benen waleuboke iwau rileuboke ro bene miyae bene yakaiboke, Allah yae walobo yun-jun holo naei elae meuferaukoke.

<sup>16</sup> Nebeinye, hiwa yo nda rambun mae mai wali hului kolonayembena, nare oborommiae: eraman bele bu belera, Yahudi agama einye ya kaban-kabanda, oko neme koi baera, sabat ya naeisa a beko elenaikondena. <sup>17</sup> Nebei rambun yoni-yoni Wali Ondofolole wali nibi a nulu wanen yaeiboke. Nebei nulu na bere meke, uwa hele Wali Ondofolole eisa. <sup>18</sup> Mai roibure u inyaibonde belene, ame-ame merau wae nauwa ane rannehinde ro miyae nane merau malaikat-malaikatre ei molaimi ro miyae mayae, ewaeisijae mai hila rabo haleyaungere beko mokonnebonde. Nebei u mekai wanen yo a kang-kangna kaneumikokere a helen elele, bekore kena haehae koyatere haraumi elae mokoumi aere ban mae nauware kaete, <sup>19</sup> erabae na wali ha Tuhan Wali Ondofolo bele mbainye ahuneikoi. Aei uware oro i me i ahuneyele aei yunbe kena kole kabande raemabonde wanen Wali Ondofolo aei Yunde yeuboke Kiyae mokoungue jemaat uwa nemene bere enate, Allah kenare kole mekai.

<sup>20</sup> Mai kena u Wali Ondofolo bele mbainye hereiboke nane merau nda kani kela na agama heere folaikokera me rubongkokembe, rahene mayae nebei wali heere folaikoke a naei me kelee u keleene nekaube? <sup>21</sup> Nebei wali heere folaikoke a nda wanen keleyayembe, "Nda mere ikileijae, nda faeu wae efelaeyejiae, nda me ehubayejiae." <sup>22</sup> Nebei wali heere folaikoke a, ro yae miyae yae mene une mokoimeyate nane merau u bona nekeimeyate, u inyaibonde, rabuhine ban ro miyae yae waimibe keleyaimi, Allahlena a ban. <sup>23</sup> Ro miyae hiwa nebei wali heere folaikoke are isaei bele hebaen bele elate. Nebei kelaeimi a hului nda me u mokonate: ro miyae ei molonaimile hele, ame-ame wanen mae uwa ane ranainyehinde, uwa nenaiejae weitasi konaimile. Nebei me u mokonatebe, nebeibe naei kena haehae koyatere are eheraweiboi sului.

### 3

#### *Yesus Kenare Kole Wali Ma*

<sup>1</sup> Mai kena u bele Wali Ondofolo bele nulu yo mahe yora annukembene, Wali Ondofolo Allahle meube reufi surgane enekekele Kiyae kena kole rambunde mo u bene nekenayembe. <sup>2</sup> Mai u bene wa bene na hibi-hibi Naei kena kole rambun naeise mo harannebombe nekembe, nda kanina kelana naei yae ban, <sup>3</sup> rabuhine ban mai kena u herauboke, nda hee Wali Ondofolo bele Allahle bokone nekaube. <sup>4</sup> Wali Ondofolo yae mare wali yembe. Neyae benen nene waewae bele uwa yae yakaihoise mendene, mayae nane merau Nangleke yakambombe. <sup>5</sup> Nebei aerene mai uwa nda kani kelana nekaube na u mekai beko nda wanen menaeijae hee roromembe: yoko kaeimae, wali niki belere u bene nekayembe, kena bekore haehae koyauwe me u, bekore kena kaube, rambun yarombere kena haehae kaube (rabuhine ban nda wanen mokombombena, hoime bahe wanen ei moloi-moloise yembonde). <sup>6</sup> Nebei me u beko omokoyejiae, rabuhine ban nebei u mekai bekore mokate yore Allah yae ehee bukulu emmihayende. <sup>7</sup> Na bere, mayae Allahre ehakoiboi heena, mayae nda me u beko mokowaube. <sup>8</sup> Mana, ikele okoyejiae, ikele yae a eweyejiae, ro kelai miyae kelai hiwa na waline beko benate me u omokoyejiae, ro miyae hiwa naei a hufuufe ehujewijae, a niki bele mai euwara eweyejiae, <sup>9</sup> maise naeise ame-ame eyaneijae. Nebei me u beko omokoiiae, rabuhine ban mai u mekai beko bele na me u beko mokowaube bele mayae hayaungekoke, <sup>10</sup> Allah yae mokoukoke u mekai neme yaraukoke. Mayae Allahre na foi yae ronnebombe naeise, Allah mokoyembe mai u mekai nemere Naei u mekai wanen yembombe. <sup>11</sup> Nebei wanen bewatene Yahudi holo, Yahudi ban holo, ro uwa elande folowaimi holo, ro uwa elande ofoloikoi holo, kani hi holo, yangku holo, yebaei bubaei holo, yebaei bubaei ban holo, nebei holona nemene mbai yeuboke. Na bereinya hele Kiyae Wali Ondofolo Niyae, Naei ro miyae nemene na wali einye nekele.

<sup>12</sup> Mayae Allah yae elengkokembe wekembe, Naei u mekai yolo-yolo wanen nekaube, mare kena buhae hengkokembe ro miyae nda u mekai ma nekembe: hiwa yo naei kalore hakommiyembe, maise naeise me u foi mokomembe, mauwa ane rannehimbe, kena nime haba yae nekemembe, maise naeise kena yae heraumembe. <sup>13</sup> Mai jemaat einya u bene nenaeni-nenaeni nekeyayembene, ikele okoyejiae. Ro miyae mare me u beko mokayembokembena, nebei me u mai u benera nundenayengkombe. Yesus mai beko bako mokaukokere faeinyembokembe wanen mae ro naei miyae naei beko bakore mai u benera nundenayengkombe. <sup>14</sup> Na bereise hele maise naeise kena buhae hemembe. Nda wanen mae mayae holo mbaise yembombe wali nibi mbai oromembe. <sup>15</sup> Wali Ondofolo



ro miyae nangeke mbainye foi moi rei mai nekenate Kiyae. Nebeinye waennehimbe Wali Ondofolo mokonembe maisae naeise foi moi rei mai nekemembe, rabuhine ban holo mbainye foi moi rei mai nekemembe naeise Allah yae mare elembokembe. Allahre helen foi na hibi-hibi wennembe. <sup>16</sup> Mayae Wali Ondofolo a wembe hului na hibi-hibi nekemembe. Hiwa yore isaei hebaen bele ma yae uwa haraungeboke yae kelemmille, angkaa yobommile! Mai kena einye Allahre helen foi wennele ma mekai Mazmur bele hobolo mandu bele a koi-koi mahi-mahi bele komembe. <sup>17</sup> Mai a elemembe bele mai me u mokomembe bele Yesusle me kelee u keleene nekaube wanen mae mokombe. Yesus nibi mokouboke walora aei Arai Allahre helen foise wennembe.

<sup>18</sup> Miyae miyae holona yo, mai molo wa naei me kelee u keleene nekemembe, aei Tuhan Yesus kenare kole hului.

<sup>19</sup> Ro miyae bele holona yo, mai miyae ware buhae hemmiyembe, na kenabe beko omokoyeijae.

<sup>20</sup> Fa-fa holona, mai ako nake naei a ungayembe nemene hakommiyembe, rabuhine ban nda me u yae mokonnebombe aei Tuhan Yesus rei mai konde.

<sup>21</sup> Ako naei holona, mai fa-fare a elaekei helen sele eweyeijae, na hibi-hibi kena beko konayende belene.

<sup>22</sup> Kaliare mokoyate yo, mai rowa naei a ungayembe nemene fomene hakommiyembe, ijoko erenembe heene naei kena yoboiboise hakommikombere mo ban, nebeibe na rokone baei mai kena na rei yae mai yae hakommiyembe, aei Tuhan Yesusle me kelee u keleene nekaubene. <sup>23</sup> Mai mokoyaube kalia nemene foi yae mo mokomembe, aei Tuhan Yesus naei kalia mokoyaube wanen mae, ro naei miyae naei kalia ma ban mae. <sup>24</sup> Rabuhine ban mayae maisaei nekaube Allah Na kelu omi naei mokoungahake rambunde aei Tuhan Yesus yae mai roibu yae inyemberene. Mayae kaliare mokaunge kiyae nana hesele Tuhan Yesus Niyae. <sup>25</sup> Allah be ijokone ereyei. Ro miyae beko mokonatena, naei me u huluinye na roibu emmiyende.

#### 4

<sup>1</sup> Rowa-rowa nekaube holona mai kaliare mokate yore na ijen mae mokommiyembe, rabuhine ban mayae maisaei mai Rowa hele surgana nekele Kiyae.

<sup>2</sup> Mayae Allahre ebeli na hibi-hibi bonnembe, mai u bene na yolo-yolo yae bonnele, mai kena eisa helen foi wennembe. <sup>3</sup> Maei naeise ebeli bonnembe Allah yae romau rawembonde Wali Ondofolole nunna honate a meyae na hului yakamakonde naeise. Nda hee Yesusle a huwewekalene reyae kawane hebale. <sup>4</sup> Ebeli bonnembe reyae nda a raei baka ranne raufehike huluinye ro miyae hiware na yaka yae ufermile.

<sup>5</sup> Mai wali mekai Yesusle holo moinya ro miyaere isaei hebaen bele ma yae uwa haraungeboke yae mokommiyembe. Nebei holona hubayengkombena, relenembe rambun foi bele benate. <sup>6</sup> Mayae isaeyembe rahe a mayae na hului ro miyae hiwa ungayembe naei are bukemmiyembe naeise, mai a kena buhae hei-sei merau wae elemembe, yu foi mokombondere hae heraeikoyate wanen mae a elemembe.

#### *A Humboise*

<sup>7</sup> Raei waline maijeukoke naeise Tikhikus yae nemene isaeinyembombe. Neyae aei aka baeke mbai reyae buhaere haenale. Neyae na hibi-hibi rare hakoyeufe aei Tuhan Yesus na kaliare mokole. <sup>8</sup> Reyae nare ukanale mai bokore endere, maei walina yaeikoke a mare huwengkombe naeise nane merau mai kena u hara roronembe naeise. <sup>9</sup> Tikhikusle Onesimusle mai bokore enetere. Onesimus mai nolora meke, maei aka baekere yeuboke, maei kaliane na hibi-hibi maengkele mokoyande. Hokolo bee yae maei walina yaeikoke are mai nolone huwenyengkombe.

<sup>10</sup> Aristarkhus, rangkele kawane hebende ro, mare ro melaeyayembe. Markus, naei yoho mbai Barnabasle, mare ro melaeyayembe. Naei naeise reyae mare a ninane ukamaele. Neyae mai bokore mendena foi yae ei annebombe. <sup>11</sup> Yesus, nane merau Yustus yae kaenainye, mare a melaeyembe. Maei Wali Ondofolole me kelee u keleene nekate yo holona kaliane mokande yo nolone nebei hokolo name mo Yahudina, raei kenare foi imokowaise.

<sup>12</sup> Epafra, mai yona ro Wali Ondofolo Yesusle kaliane mokoyeunge, mare ro melaeyembe. Neyae ebeli na hibi-hibi Allahre eiboungelae mai hila rabo elaekei sele halembere, nane merau Allah kena kole hului na hibi-hibi nekemembere. Neyae eiboungelae mai wali hiyei rannebombe, nane merau Allahle ako faeuko mai kena u einye na hele yae elembe. <sup>13</sup> Neyae mai naeise u bene na hibi-hibi nekainyele, nane merau Laodikia yona yo naeise bele Hierapolis yona yo naeise bele. Naei kalia mokowolere raei ijoko yae ereukokale.

<sup>14</sup> Aei aka baeke Lukas, kenare kannele dokter kiyaele, Demasle mare ro melaeyayembe.

<sup>15</sup> Aei aka baeke Laodikia yona nekate yo bele, ndine miyae Nimfare bele, naei imae einye arileisiyate jemaatre bele, maeisa ro foi melaeyemmibombe.

<sup>16</sup> Nda homo mai jemaat nolone kongkombe mo, nibi mokongkombe Laodikia yona jemaat bele konaikonde. Laodikia naeise homo moloukokale mayae rowembe mai jemaat nolone bele kongkombe.

<sup>17</sup> Arkhipusre a wennele, "Tuhan Yesus a ukete kaliare foi yae mokoukonde baensonde."

<sup>18</sup> Reyae Paulus mare ro melaeyerembombe. Nda homo hubare mokorekondere raei me yae moloukokale. Bene nekenayembe reyae ha rinenaisekoke wanen mae namman kawane hebale.

Reyae ebeli boyanale Allah mare kena buhae aere ban mae ei haungemembe.

## 1 TESALONIKA

<sup>1</sup> Onomi foka, aka naei baeke naei Tesalonika yona jemaat nekaube. Mayae Allah aei Ako Kiyae bele Yesus Wali Ondofolo aei Tuhan Kiyae bele naei holona yo nekaube. Reyae Paulus, Silwanus na ro hi Silas bele, Timotius bele mare ro melaeyayembe. Meyae ebeli bannele Allah aere ban mae kena buhae henemembe nane merau rei mai inyemembe.

<sup>2</sup> Meyae roko helen Allahre ebeli boyannelene mai naeise weyannele, <sup>3</sup> rabuhine ban, meyaee na hibi-hibi u bene nekaime aei Arai Allahle bene mayae Yesusle ako faeukore hila rabo halauebene, kalia mokaube. Nane merau maise naeise buhae eise meise yae heyaubene, kalia mokaube. Mayae Aei Tuhan Wali Ondofolo Yesus Kiyae benen mendere rabo elae halauebene, Naei a elele na hibi-hibi hakoyaunge.

### *Yesusle Wali Einye*

<sup>4</sup> Aka naei baeke naei, Allah mare kena buhae heyembe nane merau Naei holonare elembokembe naeise meyaee maesaei. <sup>5</sup> Rabuhine ban meyaee Yesusle ako faeuko mare huwayengkokembe heena a naungehu yae ban, nebeibe Allahlena Roh elae bele yae maei kena eisa hubawanne Allahle a meyaee huwewande na hele. Mayae maisaei mo, mai foi naeise mai nolone maei wali ma haranneboke nekewande. <sup>6</sup> Mai wali bukaungehike, maei wali bele aei Tuhan Yesusle wali bele bune wane hameimeyaunge. Naendae wanen horo ro miyae mare weitasi kowayemberebe, Allahle Roh yae mokombokembene Yesusle ako faeuko na rei mai yae boraukoke. <sup>7</sup> Nebei nibi yae wali foi nekenate mare mayae Makedonia kanina bele Akhaya kanina bele Yesusre hakoyainye ro miyaere kelaeumiboke. <sup>8</sup> Aei Tuhan Yesusle ako faeuko mai nolora eungeyoboukoke Makedonia bele Akhaya bele kanine mo ban, nebeibe ro miyae makeinya-makeinya yo isaeyaeiboke mayae Allahre hila rabo halaeunge. Nebei aerene nebei are meyaee hiwa yore ewei. <sup>9</sup> Maere na foi yae yawaumeboke a, nane merau na bere hoime bahere ei molowaumilera bukauboke nda hee Allah wali nekele bele a na hele elele bele Kiyaeere ei molaunge a, neyae huwaimi. <sup>10</sup> Nane merau mana mayae Allahle Kelu Yesusre mahe yora waleungeboke Kiyae benen surgara mende rabo halaube. Neyae u mekai beko ro miyaere Allahle romou han kommilere aere hole molommebonde.

## 2

### *Paulus Naei Wali Ma*

<sup>1</sup> Aka naei baeke naei, mayae maisaei mo meyaee mai u nolo u kaise ekandere nendon ban. <sup>2</sup> Mai bokore meyaee ei hee yae, Filipi yone beko hubannekoke, maere fere mokonainyebondere a beko yae uwaimela. Nebeibe Allah maere be kaleumehakene, meyaee Naei a foi faeu foi huwayembe, naendae wanen horo ro miyae maei a elewandere ahenaimekondere relewainyele. <sup>3</sup> Ro miyae Yesusre hila rabo halenainyeleri meyaee jobowammile heene, a na hele mo elewande, maei kena u yolo-yolo, ro hi miyae hire ame-ame yae eyanei. <sup>4</sup> Yesusle a foi faeu foi yo hire huwemamiyendere Allah maere na rabo bele halewoume. Nebei aerene, maei a eleyande ro miyae kenare roumalere ban nebeibe Allahle kenare roumalere, aei u benere nekaime foi naei beko naei Neyae naeisaei mo. <sup>5</sup> Mayae nemene maisaei mo, meyaee a yu bele yae mare omokoi, nane merau a moi-moi yae mainya rambun-rambunde yemmelere mare ewei. Allah nenaiejae maere hiloume. <sup>6</sup> Maere bumare kaemmele naeise mokande ban, nane merau ro hi miyae hi yae maere bumare kolonaimelere ban. <sup>7</sup> Meyae Wali Ondofolo Yesusle abu akore yaendebokene, rambun-rambun na hului mare riyayemberebe, nebeibe meyaee wali nime haba mai nolone nekewande, kelu omire miyae mbai holele wanen mae meyaee mare holewayembe. <sup>8</sup> Meyae mare buhae hele hewayembene, Allahlera a foi faeu foi mare huwewayembe mo ban, nane merau mai foi naeise mokowande. Meyae mare kena buhae hele hewayembe. <sup>9</sup> U bene nekenayembe hele aka naei baeke naei, meyaee Allahlena a foi faeu foi huwewayembe heena, menaeijae reniai rai kalia mokandekoke mai wali rambunbe yaromayengkombe belene.

<sup>10</sup> Mai ijoko yae maere erewaume, Allah nebei sului mbai. Mayae Wali Ondofolore hilare rabore halaeunge yo nolone nekandekoke heene, maei wali yolo-yolo nekewande, na foi mo mokowande, hiwa yo yae maere a bekore ewei sului. <sup>11</sup> Mayae nemene maisaei mo, naeko yae na kelu omire mokoumi wanen mae, mare mokowayembe. Meyae mare a usaei uwayembe, mai kena einye foi kowayembe, <sup>12</sup> moi hurewayembe Allahle kena

kole hului yae mai wali nekemembe. Mare kaenewombe Yesusle me kelee u keleene nekembe nane merau Naei nene waewae hubannele.

<sup>13</sup> Meyae Allahlena ako faeuko elewande mayae borowaube heene mai kena une elaubé, nda ako faeuko ro miyae naeisa ban, na hele Allahlena. Nebei aerene roko yae roko yae mai aerene Allahre helen foi ebéli boyannele. Na hele nda ako faeuko Allahlra meke nane merau mayae Wali Ondofolore hilare rabore halaéunge yo nebei ako faeuko mai wali einye na foi mokole. <sup>14</sup> Mayae aka naei baeke naei, Allahle Wali Ondofolo Yesusle Yudea kanina jemaat naei bune wane hamewaunge. Neyae Yahudi yo yae weitasi kowaimi hubawainye wanen mbai mayae mai yona yanna yo yae beko mokowayembe hubawaunge. <sup>15-16</sup> Aei Tuhan Yesus bele na yenjo kayaayo bele Yahudi ro miyae yae haikoke nane merau maere weitasi koyaimé. Yahudi ban ro miyae na hului wali hena bonare yaronaikonde naeise meyae Wali Ondofolole a foi faeu foi huwammine, Yahudi ro miyae maei are henaimenunde naei nibibe baeimeyate. Allah kenare okoi ma mokate nane merau ro miyae nemene fomene bekore mokonaimibonde naei emerei-emerei emereumine, Allahle ikele han naei rande oke.

<sup>17</sup> Aka naei baeke naei, mangkele nekewandera maei uwa here ukaimé hee, mai u bene mo namnan nekeimeyaimé. Maei kena kaban mangkele hubaimakondere. <sup>18</sup> Nebeinye meyae benen hubaimakondere relaennele. Reyae, Paulus, roko mbemba releukokanale bukerehindere, nebeibe walobo yun mae maere hee neumehake.

<sup>19</sup> Meyae rahere rabo elae halaende? Rahene me buhaere rakande nane merau rei mai kande? Yesus benen mende yare, rahe aerene maei uware roweumehinde? Na hele mayae niyae. <sup>20</sup> Mai aerene meyae anuwaw bumane nekande, rei mai kaban kande.

### 3

<sup>1-2</sup> Mai bokore emalere kabaennekokene, meyae Timotiusre ukannele mai bokore endere, mae mo-mo Atena yone nukumeboke nekemé. Neyae aei Yesusle einye aka baeke, Allah nare ukeunge huluinye ro miyaere aei Wali Ondofolole a foi faeu foise huweyeumi. Mayae Wali Ondofolore hila rabo halaéungere elaeere inyembe naeise, meyae nare ukannele endere. <sup>3</sup> Hila rabo elae halembena, ro miyae mare weitasi kayembe hororebe, mayae namnan elae hebembe. Mayae maisaei Allah waumihike ro miyae aere weitasisé konaimelere. <sup>4</sup> Meyae na bere holo yae mai nolone nekewande heene aere weitasi konaiméle naei isaei ikayembe. Na hele maere weitasi kowaimé. <sup>5</sup> Nebeinye reyae buhae hokowoufe walobo yun kiyae mai hila rabo halaéubere wabenembene, maei kalia mokowande erabuhí ban yeiboi bele era. Reyae mai hila rabo haleyaunge mare raeisaei ban yeubokalene, raei kena ehékai sele hubawanale. Nebei aerene Timotius mai bokore ukanale endere.

<sup>6</sup> Mana Timotius mai bokone nekewauberá bukeufike meke mai a foi faeu foi maere huwewoume. Naeinya a elewolé mayae Allahre hila rabo elaekei sele halaéunge nane merau ro miyaere kena buhae u buhae heyauumi. Nane merau Timotius maere uwoume mayae maei u bene mo nekeyayembe, kena kaban sele kaube mangkele benen hubaimakondere, maei kenane nebei sultu mbai releyannele. <sup>7</sup> Aka naei baeke naei, meyae a borandéboke mai Wali Ondofolore hila rabo halaéunge kaban selene, maei kena kaeumeboke naendae wanen horo mahi-mahi helen maere kena beko mokoyaimé nane merau ro miyae maere weitasi koyaimé. <sup>8</sup> Mayae Wali Ondofolore hila rabo na hibi-hibi haleyaungene, meyae onomi foka bele nekande. <sup>9</sup> Meyae roko helen mai aerene Allahre helen foi weyannele, rabuhine ban meyae nebei ebéli walora Allahle bokore eyewandena, mai aerene meyae rei mai kaban hubaisiyanne. <sup>10</sup> Meyae benen mangkele hubaimakondere, mai hila rabo kalo moloyembere elae imayembe naeise, reniai rai Allahre ebéli boyannele.

<sup>11</sup> Mana meyae ebéli bannéle Allah aei Arai Kiyae bele Yesus aei Tuhan Kiyae bele meyae mai bokore emalere nibi mbai ungenende. <sup>12</sup> Nane merau meyae ebéli bannéle, mare kena buhae haeyembere emerei-emerei emerende wanen mae Allah mare mokonembombe maeise naeise ro miyae nemene kena buhae hemmilere emerei-emerei emerende. <sup>13</sup> Aei Tuhan Yesus bele Naei eleuboke wekeumi yoni-yoni bele menate heene mare me onoyoi, nebeibe mai wali na yolo-yolo yae aei Arai Allahle bene ensembombé naeise, reyae ebéli banale Allah yae mai kena u elae inyembe.

### 4

#### *Yesus Kenare Kole Wali Ma*

<sup>1</sup> Huba ahumboise, aka naei baeke naei, na bere meyae mai bokone nekewande heene, Allah kena foise mokonnele wali mare meyae kelaeyengkokembe. Mayae na hele nda

wali ma nekaube. Mana aei Tuhan Yesus naei Ro eisa meyae a moi bele hurayembe wayembe nebei wali ma na hibi-hibi holennembe. <sup>2</sup> Maeinya a uwayembe aei Tuhan Yesusle ro yae yayengkokembere mayae maaisaei mo.

<sup>3</sup> Allah kena kole mayae Naei eleuboke wekeumi holona wali ma yae nekembe, yoko kaeimae okoyejiae. <sup>4</sup> Miyae maengke mbainye nekembe wali ma Allah kenare kole hului ma yae nane merau ro miyae hiwa ei moloyei ma yae mayae nemene u mekai harannembe naeise isaeyembe. <sup>5</sup> Allahre onaeynye yo yae bekore kena haehae kate huluinye mokate wali ma enekeijae hele. <sup>6</sup> Miyae yaromembena, ro mbai na aka baekere beko yae omokoyejiae, ame ame eyaneyejiae hele. Allah yae nda me u mokonaibonde yore ehee bukulu emmihayende. Na bere meyae angkaa yoboiboise mare nda a usaei yae uwayembe, <sup>7</sup> rabuhine ban Allah yae aere kaeneumekoke wali yolo-yolo nekemalere, u bekore omokojiae. <sup>8</sup> Nda Allahlena ako faeuko, ro miyae naei ban. Nde naei yae nebei ako faeuko moi ungainyondena, nebei yo ro miyaere moi bulaeinye ban, Allah Naei Roh yolo-yolore yeyembe Kiyaere moibe bulaeinye.

<sup>9</sup> Yesusle eisa hila rabo mbai haleyaube aka baeke mare buhae heyaumire maisaeinye, Allah yae nda naeise kelewombene meyae homo hi nda naeise omoloikoi. <sup>10</sup> Mayae na hele Makedonia kanina Yesusle einye aka baeke mare kena buhae heyauumi. Nda kena buhae heyauumi foi, nebeinye meyae moi huremayembe nda naeise emeremembe. <sup>11-12</sup> Allahre isaeyei boi yo mare foi yae elenate naeise, nane merau hiwa yore wali rambun mayae a ri-ti yae riyemmiyembe belene, moi huremayembe meyae kelewayembe wanen mae nda wali ma nekembe: wali aku ban nau ban, mai kalia mokombe mauwa rowenensimbe, mai wali rambun menaeijae baemembe.

#### *Yesus Benen Mende Heene*

<sup>13</sup> Aka naei baeke naei, meyae kena kande herewate yo naeise isaeyembombere, rabo ban nekate yo kena beko koyate wanen mae mayae okoyei naeise. <sup>14</sup> Eyae hila rabo halaende Yesus herekera waleuboke. Nebeinye eyae hila rabore halaende herewate yo na waline Yesusre hila rabo halewainyene, Allah mokonnebonde Yesus benen mende heene nda yo hakonainyekonde mbainye enainyekende. <sup>15</sup> Aei Tuhan Yesus naei a eleukoke wanen mae meyae huwayembe. Herewate yo na bere Yesusre hubainyaikondera nebeisa eyae wali nekande yo Yesus mende heene emahubayende. <sup>16</sup> Malaikat yun kiyae kali bonde bele, Allah naei amin wanen rambunda mendanende bele, Yesus benen mende Naei a yen kolommile surga onde. Nebei hee yae Yesusre hila rabo halewainye yae herewate yo na bere walenaibonde. <sup>17</sup> Nebeisa mo eyae ro miyae nebei heene na wali nekemale yo Tuhan naei bumane emahubayengkonde naeise, herewate yo bele nanembaisa mangko eise emayembonde aei Tuhanbe bokone nekemande huba ban haei ban. <sup>18</sup> Nda a maise naeise elembe huwembe yae mai kena u rowenensimbe.

## 5

<sup>1</sup> Aka naei baeke naei, Yesus mende hee naei bele na ralo yakama naei bele meyae omoloi, <sup>2</sup> rabuhine ban maisaei mo, aei Tuhan Yesus mende ya yokolo yokore reniai yae imae hi obe hire ele nebei imaena obena yo isian nekate hee wanen mae. Naei wanen mbai aei Tuhan Yesus mende. <sup>3</sup> Nebei hee ro miyae yae elenate, aei wali na foi mo buhae-buhae okoi nekande. Nebei hee miyae fa hononondere na roko mbainye buhae hubaisiyeunge wanen mbai beko kaban u hale hele memmifelensande. Nebei ro miyae ehakoikoi sului. <sup>4</sup> Mayae aka naei baeke naei, ouben hauben nolone nekaube ban. Yokoyo mate heene kulu-kulu yeiboyaube, nebeibe Yesus benen mende ya mayae nebei wanen kulu-kulu eyeiboi. <sup>5</sup> Mayae Allah hehe yae naeyembe yo, yabe heuboke nekaube reniai ouben hauben naei yo ban. <sup>6</sup> Nebeinye eyae ro miyae ijongkune honate kayaa ehebei wanen mae enekeijae, ijoko elae hebemale, u bene foi yae nekenaimеле. <sup>7</sup> Ro miyae ijongkure reniai yae honoyate. Bu elae mali yo reniai yae aneyate. <sup>8</sup> Eyae ya heuboke nekandena yo, men, u bene foi yae nekenaimеле. Felayo buloo fela malo hokoma bele naei uwa holere keteiboyounge hebele wanen, walobo yun aere bekobe mokommele belene, Wali Ondofolole a elelere hila rabo halemale, wali hena bona inyemelere hila rabo elae halemale, ro miyaere kena buhae hemamiyende. <sup>9</sup> Allah merau raungehike Na romou ikele han konde eyae ehubasi naeise, aei Tuhan Wali Ondofolo Yesusle walora hole molommebonde. <sup>10</sup> Neyae aei aere ne hereke, eyae wali namman nekande yae, heremale yae Yesus benen mende yane Nangkele nanembainye emanekende naeise. <sup>11</sup> Nebeinye maise naeise eisako meisako hakomembe nane merau mai kena foi u foi nekembe yae mai hila rabo annunumbe. Na hele nda hee bele yae mayae nebei me u wanen mokoimeyaube.

*Yesus Kenare Kole Wali Ma*

<sup>12</sup> Aka naei baeke naei, mai jemaatna be yun be yebae mai nolone kalia elae mokoyate, aei Tuhanbe einye mare wali nibi harayayembe, nane merau a usaei wasaei weyayembene. Meyae riyayembe nebei yore ei molommiyembe. <sup>13</sup> Mai naei kalia mokoyatene, nda be yun be yebae buhae hemmiyembe. Maise naeise wali foi yae nekemembe. <sup>14</sup> Aka naei baeke naei, meyaе moi hurayembe, kalia omokoyei yore angkaa yobommile. Buhae-buhae koyate ro miyaere kena elae yemmiyembe. Elae ban wake ban nekate yore hakommiyembe. Ro miyae hiwa bele kena hebaen u hebaen mae nekemembe.

<sup>15</sup> Kayaa hebembe, hiwa yo mare me u beko mokonayembena, nebei yore nebei me u hului mbai yae ebukeyeijae. Mayae relennembe me u foi mai holo einya yore mokommile, nane merau moi holona nekate yore bele mokommile. <sup>16</sup> Mayae na hibi-hibi mo rei mai kombe, <sup>17</sup> na hibi-hibi Allahre ebeli bonnele, <sup>18</sup> nemene fomene mai waline benatere Nare helen foi wennembe, rabuhine ban Allah kena kole Yesus Wali Ondofolo bele mbainye nekembe mayae nebei me u mokombe.

<sup>19</sup> I kebeikoyate wanen Allahle Roh Naei a elelere rabuhi ban ebeijae. <sup>20</sup> Allah yae ro miyae walora ungayembe are beko eleijae. <sup>21</sup> Nemene fomene umali hubannehimbe, foi kayee ikilennekombe, <sup>22</sup> beko kayeera uwa wemembe.

*A Humboise*

<sup>23</sup> Reyae ebeli banale, Allah Naei u mekai wanen mare mokonembe. Aei Tuhan Wali Ondofolo Yesus mende heene mare me onoyoi naeise, reyaе riyanae Allah mare kena u yolo-yolo hele mokonengkombe, nane merau mai kena u bele, mai uwa bele hole molonembombe. <sup>24</sup> Allah mare kaenengkokembe Kiyae Naei a elewole hului mokoyele, Neyae mare hole molonembombe.

<sup>25</sup> Aka naei baeke naei, maei naeise Allahre ebeli bonnembe. <sup>26</sup> Aei aka baeke hire, foi moi sele maeisa ro melaeyemmibombe. <sup>27</sup> Aei Tuhan Yesus Na Ro eisa reyaе mare wamale, nda homofae aei aka baeke wa nemene kommikombe.

<sup>28</sup> Meyae ebeli bannele aei Tuhan Yesus Wali Ondofolo mare nemene kena buhae aere ban mae henembe.

## 2 TESALONIKA

<sup>1</sup> Onomi foka aka naei baeke naei, Tesalonika yona jemaat nane merau Allah aei Aki Kiyae bele Yesus Wali Ondofolo aei Tuhan Kiyae bele Naei holona yo nekaube. Reyae Paulus bele, Silas na ro hi Silwanus yae ro royainye kiyae bele, Timotius bele, mare ro melaeyayembe. <sup>2</sup> Meyae ebeli bannele aei Arai Allah bele aei Tuhan Yesus Wali Ondofolo bele kena buhae aere ban mae henemembe nane merau mare rei mai inyemembe.

<sup>3</sup> Aka naei baeke naei, mai baka ranna huluinye roko helen Allahre ebeli einye mai naeise helen foi weyannele, rabuhine ban mai hila rabo Yesusre haleyaunge emerei-emerei emereyembe, nane merau maise naeise mai ure-ure kena buhae hei-sei emerei-emerei emereyembe. <sup>4</sup> Nebei aere ne mai uwa roweumehike wanen mae Allah naei jemaat hiware mai naeise a huweyammile. Meyae huweyammile, mayae Yesusre hila rabo na hibi-hibi mo haleyaunge nane merau me u foi mokoyauunge, naendae wanen horo ro miyae hiwa mare beko mokoyayembe weitasi koyayemberebe.

### *Allah Ro Miyae Naei Walire Memmikolondere*

<sup>5</sup> Nda hee Yesusle me kelee u keleene nekate yo holo aere ne mayae beko hubayaungene, na bona honoifoyole yane Allah nebei holo naeise mokoungelake rambun foi mare inyembe. Nebei nibi yakambondene Allah na ijen mae walire hului koloyeumi. <sup>6</sup> Allah na ijen nekeyele, mare weitasi yae konayembe yore ehee bukulu yae hayemmiyende nane merau <sup>7</sup> mangkele maengkele no emayembonde naeise, weitasi aere koyaimo yo hee nemmihande. Nebei hee mbai aei Tuhan Yesus yakambonde i bulo-bulo eisa na malaikat-malaikat nelae wake bele surgara onate. <sup>8</sup> Allahre onaeinye yo bele aei Tuhan Yesusle a foi faeu foise ehakoyei yo bele Neyae onde ehee bukulu hayemmikonde. <sup>9</sup> Nebei ro miyaere Yesus yae huba ban haei ban mae ehee bukulu hayemmiyende. Yesusle bokore nebei ro miyae ei sului, nane merau Yesusle one hengko nene waewaere ehubaikoi sului. <sup>10</sup> Nebei ya mbai Yesus benen mende Naei eleuboke wekeumi yo Nare hila rabo halaeinye ro miyae yae Nare hili hebenainyele nane merau bumare kolonainyele naeise. Mayae nebei nolone ennekaembe, rabuhine ban Yesusle a faeu mayae borowaubere hila rabo halewaungene.

<sup>11</sup> Nebei a maeisaei nekandene, roko helen Allahre mai naeise ebeli boyannele. Yesus a wembe hului mokombere kaenengkokembe. Meyae riyeannele Naei a wembe hului mokaubene, Allah rei mai yae me buhaere inyembe. Meyae ebeli boyannele mai merau foi rannehimbere, nane merau Yesusre hila rabo haleyaube aere ne me u foi mokongkombere, Allah Nelae wake walora yembonde. <sup>12</sup> Allah bele aei Tuhan Yesus Wali Ondofolo bele kena buhae aere ban mae heyembene, mai wali walora Yesus Naei ro bumane ennekaembe naeise, nane merau Yesusle walora mai ro bumane enayengkaembe naeise, mayae ebeli boyannele.

## 2

### *Hubare Halennekonde Ya*

<sup>1</sup> Aka Naei Baeke naei, aei Tuhan Yesus Wali Ondofolo benen mende ya naeise, nane merau Allah aere Yesusle bokone arilemmehinde naeise, meyae mare wayembe buhae ohokoyeijae. Ro hi miyae hi a mahi-mahi yae mare ungayembe <sup>2</sup> aei Tuhan Yesus benen beufoke meke, nebeibe naei a oboroijae. Neyae ungayembe Allah yae Paulusle holonare nebei a yakaumiboke, Paulus naei nebei a elaeikokebe, nebei a homone molaikoke. <sup>3</sup> Ro miyae naei ame-ame yanenate oboroijae, rabuhine ban Yesus benen emei heene, ro miyae nekai sele Allahle ako faeuko moi hainyate nane merau ro nansau fele\* Allah yae yakanembonde. Nebei ro nansau fele Allah meraufe raungehike yane beko mokonembonde. <sup>4</sup> Nebei ro nansau fele yakambonde heene Allah naei yokeijo na kaban selere yembonde. Neyae mende walobo holona yore nane merau nda kanina kelana eise moloyaimi rambun-rambunde are yae heraweumibonde. Naei me u na beko hele mokombonde nda niyae: Allahle imaebe enesinde, naei imae wanen mae nuwembonde, naei uware Allah yae elende. <sup>5</sup> Bene nekenayembe nda abe mangkele nekewande hee reyae isaeyembokamale.

<sup>6</sup> Mana mayae maisaei nda ro nansau fele rahe yae aheyeungele. Aheyeunge kiyae mayae nane merau maisaei. Nebei ro nansau fele Allah yae merau raungehike ya mo yakambonde. <sup>7</sup> Mana walobo yun nunda-nunda yae ro miyaere a moi-moi mokoyeumi Allahlena a weumire nukenainyebondere. Nebeibe nda ro nansau fele ahei-aei

\* 2:3 2:3 Markus 13:14

aheyeunge kiyae na hibi ahennele, mende Allah yae aheyeunge kiyae enere wennende. <sup>8</sup> Nebeisa mo, Allah yae nebei ro nansau felere yakannebonde. Nebei rore Yesus benen mende heene Naei eufou wae beko mokonnebonde, Na uwa wili halaman mae nda rore elae ban mokonnebonde.

<sup>9</sup> Nebei ro nansau fele menyakambonde heene, walobo yun nelae wake yennele me u mahi-mahi helen Allah mokole wanen mokonde. <sup>10-11</sup> Nebei ro nansau fele naei me u walora Yesusre ehakoiboi ro miyaere ame-ame helen yanemmile. Nda ro miyae bekore enayaronde, rabuhine ban Wali Ondofolole na hele wali nibi are neyae kena ban. Nebei aere ne Allahle elae walora nebei yore mokommibonde nda ro nansau fele a ame-ame elendere na hele yae elenate. <sup>12</sup> Na huba mokoikoi yane nemene fomene a na helere ame-ame elenate nane merau bekore kena haehae konate yore Allah yae me wonnonde.

<sup>13</sup> Aka naei baeke naei Allah kena buhaere hembe yo, mai baka ranna huluinye ebeli einye roko helen Allahre mai naeise helen foi weyannele, rabuhine ban Allah na hele mare na bere hele elembokembene nda walora wali hena bona inyembe: Naei Roh yae mare mokonsambe Allahle yolo-yolo u mekai wanen nekembe, nane merau Wali Ondofolole na hele wali nibi a faeu mayae hila rabo halembe. <sup>14</sup> Meyae Yesusle a foi faeu foi huwayengkokembe walora Allah mare kaenengkokembe wali hena bona yarongkombere, nane merau aei Tuhan Yesus Wali Ondofolo Naei nene waewae mayae na hului hubannele. <sup>15</sup> Nebei aere ne, aka naei baeke naei, mai hila rabo elaekei yae halemembe, nane merau maeinya kelewayembe a huluinye mo hakomembe mokomembe. Nda abe mai euwe yae uwayembe nane merau homone bele molowande.

#### *Maise Naeise Ebeli Boi-Boi*

<sup>16</sup> Aei Tuhan Wali Ondofolo Yesus bele aei Arai Allah bele aere kena buhaere heyeime Yore meyae ebeli bannele. Yesus yae kena buhae aere ban mae mayeume walora aei kena einya foi hubamande huba ban haei ban, nane merau wali hena emmayaronde naeise rabo elae halemale. <sup>17</sup> Meyae ebeli bannele Neyae mai kena u hara roronembe, nane merau me u foi mokomembe naeise bele, a foi faeu foi elemembe naeise bele elae inyemembe.

### 3

<sup>1</sup> Mana, aka naei baeke naei, mai naeise mayae Allahre ebeli bonnembe, aei Tuhan Yesusle ako faeukore u hale yae faennekonde hungayende mai hila rabo haleyaube wanen ro miyae boronate yo nebei sului mbai halenate. <sup>2</sup> Nane merau ebeli bonnembe, maere bekore mokaime yo mera hole molommele, rabuhine ban Yesusre hila rabo haleyainye yo nemene ban.

<sup>3</sup> Aei Tuhan Yesus naei a eleyele huluinye mokoyele. Neyae mokonembe mai hila rabo elaekei sele halennembe nane merau walobo yun me ei u eisa mare hole molonembe. <sup>4</sup> Mayae Yesusre hila rabo haleyaungene, meyae mare rabo halaende mai a mare ukayembe huluinye mokoyaubere na hibi mokomembe. <sup>5</sup> Meyae ebeli boyannele aei Tuhan Yesus kelenembe Allah mare kena buhae heyembe naeise, nane merau mokonembe Yesus a wembe hului hakonembe, Neyae Allah a weunge hului na hibi-hibi hakoyele wanen mbai.

#### *Yesus Kenare Kole Wali Ma*

<sup>6</sup> Aka naei baeke naei, aei Tuhan Yesus Wali Ondofolole Ro einye a elaekei yae wayembe, ro miyae kaliare omokoyei yo nane merau maeinya a faeu wali nibine ehakoiboi kiyae, nebei u mekai yo bele homo mbainye oroyeijae. <sup>7</sup> Mangkele nekewande hee, ijoko ɛrewaumele meyae kalia no ban hee ban mokandeke. Mayae maisaei sele nebei u mekaiɛe hakombe mokombe. <sup>8</sup> Nebei hee meyae ro miyae naeinya ramande karo yae anei. Rambun bele raman bele ro miyaere eriyei naeise, meyae reniai rai yae kalia mokowande. <sup>9</sup> Meyae Allahle kaliane mokowandene mai naeise ya-ya wali rambun na hului mare riyayembebe, nebeibe meyae eriyei. Wali nibi foi mare kelewayembere naeise, meyae kalia elaekei sele yae mokowande. <sup>10</sup> Na bere meyae mai nolone nekewande hee, mare a elae yae uwayembe, mere ure kaliare omokoi yore raman eyei aneijae. <sup>11</sup> Meyae nda a wayembe, rabuhine ban meyae borandekoke mai nolone ro miyae hiwa kaliare omokoibe, nebeibe na a helen eleyelene ro hi miyae hi kalia foi omokoi sului. <sup>12</sup> Aei Tuhan Yesusle Ro walora, ro miyae kalia omokoi yore meyae a elae yae wammile na wali foi benainyehonde hele, ya-ya wali rambunde naei roibuna yae yaronayende.

<sup>13</sup> Mayae aka baeke hiwa yo na hibi-hibi mo foi mokombe, kena ban ebeijae. <sup>14</sup> Ro hi miyae hi nda homofaere ehakoiboi kiyaere yakannebombe, nangekele homo mbainye



oroyeijae. Nebi wanan mae mokonnebombene neyae fe hubannehinde. <sup>15</sup> Nare yokeijo wanan mae omokonnemae, aka baeke wanan mae mokonnele, angkaa yobonnele.

*A Humboise*

<sup>16</sup> Aei Tuhan Yesus ro miyaere rei maise yeyeumi. Meyae riyeyannele na yane baei Neyae rei mai inyemembe naeise, nane merau mangkele nanembainye nekemembe naeise.

<sup>17</sup> Mana, reyae Paulus, rembai nda ro melaei-melaeise raei me yae mo homo hubane mokanalene molale, raei homofae nemene molowale wanan mbai. Raei homo moloyale ma nda mekai.

<sup>18</sup> Reyae Allahre ebeli banale, aei Tuhan Yesus Wali Ondofolo kena buhae aere ban mae mare henembe.

## 1 TIMOTIUS

<sup>1-2</sup> Onomi foka Timotius. Weyae Wali Ondofolo Naei a elelere hila rabo halaenaene reyae ware kelu hele yae erawale. Reyae Paulus, Allah aei Holelo bele Yesus Wali Ondofolo bele rare ukeisele huluinye Yesus Naei abu akore yeubokale. Eyae hila rabo halaende Yesus Wali Ondofolo wali hena bona yemmele Kiyaeere yeuboke.

Reyae ebeli banale Allah aei Ako Kiyaele Yesus Wali Ondofolo bele ware kena buhae aere ban mae heneyete, yanekoi yase yae ei haweyete, rei mai inyeyete.

<sup>3</sup> Reyae Efesus yora kulun bowale Makedonia kanire erelere hee yae ware moi hurewawale Efesus yone uwa heraweungele nekele. Nebeinya ro miyaere wali nibi na ijen ban ekelejiae nane merau <sup>4</sup> Yahudi yo mei-mei relime bele na yobe kamahe bele u bene enekijae weyae a elae weumile naeise nekele. Nebei a yoni-yoni mokommile ro miyae u bene nenaeni nenaeni nekenaimile, Allahle kaliare omokoyei. Wali Ondofolo Naei a elelere hakainye ro miyae walora Allah kaliare mokole. <sup>5</sup> U bene bele kena u bele yolo-yolo yae nekate ro miyae, Wali Ondofolo Naei a elelere na hele hila rabo halaeyele yo, naeise naeise kena buhae u buhae haemile. Ro miyae nebei wali ma nekenate naeise, nebei a elae weumile. <sup>6</sup> Ro miyae hiwa nebei mekai walira aiweke yo a bangsa-bangsa mo huwate. <sup>7</sup> Nebei yo Musale walora wali heere foloukoke are kelaemi holona ro miyaere inyaibondere kena hele kate. Nebei homofae be bele rabuleiboyate kelaemibe, nebeibe a na haraungebokere onaete nane merau nebei kelaemi a na mekaise, nenaenjae isaeyei boi.

<sup>8</sup> Eyae isaeyaendeboke Musale walora wali heere foloukoke a na meli mekai yae mokomalena, na foi bele. <sup>9</sup> Nane merau eyae isaeyaendeboke Allah yae Musale walora wali heere foloukoke a ro miyae wali himalainyeboko yo naeise ikeumi ban nebeibe nda u mekai ma yo naeise: yun laeibo-laeibo koyate naei yun-junde oboroibo yo, walire eharai boi sului yo, Allah Naei elele are ei ehaweyei yo, me u beko mokoyate yo, Yesus Naei eleuboke wekeumi holona u mekai ban yo, Wali Ondofolole wali nibire aukaka kainye yo, ro miyae ako nakere hoyate yo, ro miyaere hoyate yo, <sup>10-11</sup> yoko kaeimaere koyate yo, ro akobae bele uwa mbai hononete yo, ro miyaere ikilenate naise henate yo, ame-amere yaneyate yo, a na hele ban rambunde na hele yae elate yo, nane merau u mekai hiwa Wali Ondofolole wali nibi a faeu hului ban. Wali Ondofololena a foi faeu foi hufemiyende naeise, Allah eise molanne Kiyae rare eleufeboko. Nebei a faeu na foi sele.

<sup>12-13</sup> Aei Tuhan Yesus Wali Ondofolo rare elae ikeufe Kiyaeere helen foi sele wanale, rabuhine ban naendae mekai horo reyae Yesusre aukakare kowanale kiyae, Nare hakowainye holona yore weitasi koumiyekale, nane merau ro nansau nekewale, Allah rare yanekoi yase yae ei hawewoufe. Nebei hee reyae Yesusre hila rabo ehaleinye nebei yoni-yoni mokowalere onewale handawale. Naendae wanen horo reyae nda wali ma nekewale, Allah yae Naei a elelere hila rabo halaete yo yae erekeufe nane merau a ukeufe Naei kaliare mokorelere. <sup>14</sup> Aei Tuhan Wali Ondofolo na kena buhae u buhae aere ban mae rare heufekokebe melei-melei melele. Neyae elae ikeufe Naei a elelere hila rabo halewale nane merau ro miyaere kena buhae u buhae hewamaele.

<sup>15</sup> Reyae na helebe wamale, nda are hila rabo halen: Yesus Wali Ondofolo beko bako bele ro miyaere hole molommibonde naeise nda kani kelare meke. Nebei ro miyae nolona reyae, Paulus, beko bako yae eufemeleke kiyae. <sup>16</sup> Reyae nebei u mekai yae nekewale hororebe, Yesus Wali Ondofolo yae reyae u mekai na beko hele nekewale kiyaeere yanekoi yase yae ei hawewoufe. Ro miyae Nare hila rabo halenate wali hena bona enajjaronde yo ijoko erenate Yesus Wali Ondofolo kena hebaen-sebaen na kaban sele nekele naeise, Neyae rare yanekoi yase yae ei hawewoufe. <sup>17</sup> Mana raei kena rowanale yae elerekonde, Allah, Ondofolo Hubalo Mando, huba ban haei ban be hinenainyende, hili hebenainyende. Neyae Allah mbai mo, ijoko yae ekamboi, wali huba ban haei ban Kiyae. Amin.

### *Allah Yae Paulusre Kena Buhae Aere Ban Mae Heungele*

<sup>18</sup> Timotius raei kelu wanen yeubokae. Na bere jemaat be yun be yebae hebate yo yae Allahle Roh ukeumi a walora waei naeise a nulainyekoke. Weyae nebei a usaei hakoumile walora Wali Ondofolo wali nibi aere ne han felare weyae na mekai yae releungele naeise, reyae nda homofaene molale benen nebei nulainyeboko are wawale. <sup>19</sup> Nane merau weyae releungele yae Wali Ondofolo Naei a elelere hila rabo haleungele nane merau kena u yolo-yolo yae huba haleungekonde naeise, nebei a wawale. Ro miyae

hiwa Wali Ondofolo Naei a elelere oboroiboinye, naei kena une beko hubanainyele nane merau naei hila rabo mohi-mohi kamai-kamai yaeiboke, kakai ruka ranne ruwae yae hayeukokene beko yembonde wanen. <sup>20</sup> Nebei nolona ro bee Himeneusle Aleksanderle. Na hibi mo Allahre aukaka koneinyele belene, hokolo bee walobo yunbe me einye kinyeungebokale.

## 2

### *Ei Moloi-Moloi Naei A Usaei*

<sup>1</sup> Reyae moi huramaele, Yesusre hakainye ro miyae hiwa yo nanemene na kou kalo naeise Allahre ebeli bonainyele nane merau naei foi aere ne Allahre helen foi ungainyele. <sup>2</sup> Aei wali aku ban nau ban nekemalere ne, nane merau Allah kenare kole wali ma na mekai yae nekemalere ne, ondofolo yoni-yni naeise nane merau aere eise haweyaimela yun-jun nanemene naeise ebeli bonnele. <sup>3</sup> Nebei me u foi nane merau aei Walilo Allah kena kole. <sup>4</sup> Allah Naei kena kole ro miyae nanemene hole emmimolombondere nane merau Wali Ondofolole na hele wali nibire isaeinyabonde. <sup>5</sup> Rabuhine ban Allah mbai mo, nane merau Allah bele ro miyae bele a elenate naeise walore beungehake Kiyae mbai sele, Yesus Wali Ondofolo Niyae. <sup>6</sup> Aei u mekai beko mokowandere ehee bukulu hayemmele helene, Wali Ondofolo aei ehee bukulu fomaiboi naeise Naei uwa yae kinyeuboke. Nebei me u Allah merau raungehike yane ro miyaere a eungeyoboukoke. <sup>7</sup> Allah rare ukeufe nebei are Yahudi ban ro miyaere hufemile nane merau keleremile, ro miyae Yesus Naei a elelere hila rabo halenainyelena, wali hena bona enaiyaronde. Nebei naeise na helebe wamale, reyae ame-ame ebei.

<sup>8</sup> Reyae kena kale ro yoni-yni na kena u yolo-yolo yae ikele han ban mae ebelire bonainyele. (Na bere Yahudi ro miyae nane merau me bumare kaeiboyainyele yae ebeli bowainyele.)

<sup>9</sup> Reyae kena kale miyae maengke nauware molombonde rambun ijokore oyoboibo ma yae hirenate. Nda mekai yae uware omoloiyae: uma bukuneufike yae, emas yae, mutiara yae, ijokore kabesei-kabesei holona yae, uware omoloiyae. Nane merau malo roi bumana hele yae uware ehireijae. <sup>10</sup> Miyae maengke naei ofae kaemae uware molonate nda niyae: u foi wa foi, Allahre eise molainye miyae maengke yae mokoyate wanen mae.

<sup>11</sup> Miyae maengke a usaei wasaeise isaeinyate hee, be elae u elae okoiyae, kena u ane ranainyehinde nekenate. <sup>12</sup> Ro yoni-ynire miyae maengke yae a usaei wasaei kelenaimile naeise nane merau miyae yae ro yoni-yni naei yun-junde inyaibonde me mokommile naeise melihau fele eranalene, reyae ewaeise sele. <sup>13</sup> Rabuhine ban Allah yae Adamde bere mokouboke, nebeisa Hawa. <sup>14</sup> Nane merau Allahlena a ukeumire asasi koukoke kiyae Hawa yae, Adam mae ban. <sup>15</sup> Miyae maengke Wali Ondofolo Naei a elelere hila rabo halennele bele, ro miyaere kena buhae hemmile bele, nane merau Allah kena kole hului na wali haranaimilena, kelu omi hononate hee Allah nare hole moloumiyeumi.

### *Jemaatna Kayaare Hebate Ro Bele Jemaatna Kaliare Mokate Yo Bele Naei A Usaei*

## 3

<sup>1</sup> Nda elate are rabo yae halen: ro miyae jemaat kayaare hebate holonare yembondere kena konde kiyae, kalia foibe kena koukoke mokondere. <sup>2</sup> Nebeinye, jemaat kayaare hebate holona ro na u mekai hiwa yo naei a beko eleikoi kiyae. Naei u mekai nda ma yae nekende hele: na miyae mbai mo, bu elae roko helen anei, nauwa kayaa foi hebele, wali eise molainye ma yae nekele, imaere mate ro miyaere ei haweumi, Wali Ondofolole wali nibi are na hului kelemmile, <sup>3</sup> keu bu mali ban, wali nansau banbe nebeibe nime haba, hande okoyei, roi mali ban, <sup>4</sup> naei imae obe einye foi yae me mokommile, na kelu omire kelemmile naei elende are hubare haesa yanainyele. <sup>5</sup> Rabuhine ban ro miyae mbai naei imae einye foi yae me mokoiboise naeisaei banna, naenda wanen mae Allahle jemaatre na hului na foi yae me mokommibonde? <sup>6</sup> Jemaat kayaare hebate holona ro manemfa hele Yesusre hakoungeboke ro holona yae ban, rabuhine ban nauwa isaei rabo-rabobe halendene nalennehinde ruwende belene. Na bere hele Allah yae walobo yunde nauwa isaei rabo-rabobe halewolene, ehee bukulu ikeunge wanen mbai nebei rore yennele. <sup>7</sup> Fe koi-koi belene nane merau walobo yun mae walangka wokene hembonde belene, nebei jemaat kayaare hebate holona yo naei u mekai jemaat moinye ro miyae yae foi erainye mare nekenate hele.

<sup>8</sup> Nebei sului mbai jemaat kaliare mokonate yo nda u mekai wanen nekenate hele: naei wali ma nekenate hiwa yo yae ei molonaimile, faeu kai bee ban, bu mali ban,

rambunde ame-ame yae abuneyate holona ban. <sup>9</sup> Nebei yo na kena u yolo-yolo yae Wali Ondofolole na hele wali nibi are hila rabo elaekei sele halenainyele hele. <sup>10</sup> Nebei yo nda ma yae eleukonde: na bere mon fofu yeumile neyae Allahle kaliare mokate mare foi yae ereumibonde. Nare a beko eleikoi suluinya, waeumihinde jemaat kaliare mokonate.

<sup>11</sup> Nane wanen mbai nebei jemaat kaliare mokate holona na miyae wa na u mekai nda wanen nekenate: na wali ma nekate hiwa yo yae ei molonaimile, a nene a hufuu huweyate holona ban, bu elae roko helen anei, elate a nemene mokate.

<sup>12</sup> Jemaat kaliare mokole holona ro na miyae mbai yae mo, nane merau naei imae obe bele na kelu omi bele foi yae me mokommile hele. <sup>13</sup> Jemaat einye kalia foise mokoyaimi ro miyae ro bele ronaimile, be hinenaimile. Naei kena u einye isaeinyaibonde Yesus Wali Ondofolo Naei a elelere na hele hila rabo halaeyine.

<sup>14-15</sup> Allahle imae obe einye ro miyae wali ma nekenatere weyae isaeyebonde naeise, reyae nda homone mo moloukokawale. Na heki ban mo reyae waei bokore erelere naeibe rabo halale, waberekondena, mokoukonde ma mayae ninae isaeyembe. Nebeinye nebei imae obe Allah wali bele Kiyaele jemaatre yeuboke. Nebei jemaat Wali Ondofolole na hele wali nibi a faeu naei kose hu mekele hu wanen yeuboke. <sup>16</sup> Nana hesele Yesus Wali Ondofolo Allah kenare kole hului mo nekewole nibi nunne honole. Yesus nda wali ma nekewole:

Naei uwa yakaiboise ro miyae uwa yae yakaumeboke,

Allahle Roh yae Neyae Allahlera mekere a yae eleuko,

Malaikat yae Nauware ijoko ereungeboke,

nda kani kelana ro miyae Allahre oroiboi yo nolone Naei are huwewaimi, ro miyae nda kani kelana Nare hila rabo halewainye,

Allah Nare kaeuboke nene waewae bele anuwaunge eungehauboke.

## 4

### *Timotius Nauwa Naei A Usaei*

<sup>1</sup> Allahle Roh yae na yaka yae elele huba mokoikoi ya nobennebonde heene, ro miyae hiwa Wali Ondofolo Naei a elelere hila rabo halaeyinera ungayende. Nebei ro miyae ame-amere kelaemi rohre boronaimile, walobo yoni-yni yae kelaemi ane enaisakonde. <sup>2</sup> Nebei are kelaemi yo na u mekai u bee wa bee, beko bakore mokoyate yae na kena une na ijen naeise weunge are elae ban mokainye. <sup>3</sup> Nebei yo yae kelaemi ro miyaere eyaroiyae, miyae rore eijae, nane merau raman hiwa aneijae. Nebei kelaemi are ame-ame baete, rabuhine ban Wali Ondofolore hila rabo halaeyinera ro miyae Naei na hele wali nibi are rainyeboke yo Nare helen foi yae ungainyelera anenaikonde naeise, Allah nebei raman mokouboke. <sup>4</sup> Rabuhine ban Allah yae mokouboke rambun nanemene foi bangka mo, mbai sambai eli hohore enekei. Nebei raman aerene Allahre helen foi wennele, anembe, <sup>5</sup> rabuhine ban Allahle ako faeuko bele aei ebeli banne bele yae nebei raman Allah eleuboke wekeunge rambunde mokoiboyunge, eli hohore eyeiboi.

<sup>6</sup> Timotius, aei aka baekere nda wawale are no ban hee ban isaeyeu milena, weyae Wali Ondofolole kaliare mokate holona ro foise yeubonde. Eraman uware elae yeumi wanen mae Wali Ondofolo Naei a elelere hila rabo haleimeyeyae bele Naei wali nibire kelaemi are hakoimeyeyae bele wa kena ure elae mokoimeyayete. <sup>7</sup> Relime yoni-yni bele miyaenale yoni-yni naeinya ame-ame ahuba huwate belera wauwa wewende. Allah kenare kole huluinya wali ma na hibi mo wauwa releungele. <sup>8</sup> Nda uwana melen na foi nekenate naeise holoka hoube me u mokammile, nebei foi na hee bele. Nebeibe Allah kenare kole hului wali ma nekemala, nebei ro na foi sele. Rabuhine ban nebei wali ma nekemalena, nda hee wali nekande na foi benate, nebei sului mbai wali bena yane. <sup>9</sup> Nebei wawale are na hele naei, nare hila rabo halen. <sup>10</sup> Meyae no ban hee ban mae relaennele, rabuhine ban meyae Allah wali no Kiyaeere rabo halaennele. Neyae ro miyae nemene holere molommibonde, na bereise Wali Ondofolore a elelere hila rabo halaeyine yo.

<sup>11</sup> Nda homo ranne moloukokale are ro miyae hiwate huweumile nane merau na foi yae isaeyeu milena. <sup>12</sup> Ro hi miyae hi yae ware hokolo fa huluinya ane enaikolote naeise ewaeisijae hele. Waei a faeu wae, u mekai wa mekai yae, yanekoi yase yae, hila rabo haleyae yae, wali yolo-yolo haranae yae, hila rabo bele ro miyae waei wali ma bune wane hamenayete naeise nekele. <sup>13</sup> Reyae namman waei bokore ei mon, na hibi-hibi Allahle homofae ro miyae nolone kole. Nebei homofae naeise huweumile, isaeyeu milena. <sup>14</sup> Na bere jemaatna be yun be yebae hebate yo riyane mere waei yunne rayeufikete,

waei uwa naeise a nulainyekoke. Nebei walora Allah ware elae ikete. Nebei elae yae kalia na hibi mokowende.

<sup>15</sup> Ro miyae nanemene erenate Wali Ondofolo yae na hibi isaei hebaen ware baranete Naei kaliare mokole naeise, nebei kalia na mekai yae na hibi-hibi mokole. <sup>16</sup> Waei u mekai wa mekai bele nebei a usaei kelaemaale belere kayaa foi yae hebele. Naendae wanen horore beko hubanayete, no ban hee ban mokole. Rabuhine ban nebei mekai mokolene, waei uwa hole moloungebonde nane merau ro miyae nanemene waeinya wamae are borate yo bele hole moloumibonde.

## 5

<sup>1</sup> Timotius, rorele holonare oku yane roroijae hele. Waei a eleyae boronetera ako wanen mae mokoungele. Hokolo fa-fa ro holonare ako mbainye wanen mokoumile. <sup>2</sup> Nane merau miyae nannale, ana wanen mokoumile, nane merau miyae maengkere waei emaan wanen waei u bene wa bene na yolo-yolo yae mokoumile.

<sup>3</sup> Jemaatre a weumile, miyae nannale na hele kou kalo bele holonare be hinenaimile nane merau hakonaimiyende. <sup>4</sup> Nebei miyae nannale holona kelu omi bele ohobi olouwa belena, nebei yo Wali Ondofolole wali nibi huluinye naei ako nakere, naebu naeise holonaimile. Naei me u foi walora ako nake bele naebu naeise bele fa-fane narayeke u foi wa foi benaimihonde. Nebei wali mare Allah kena koyele. <sup>5</sup> Kou kalo bele miyae nannale hele kelu ban omi ban ohobi ban olouwa ban kiyae na rabo Allah mbaise mo haleyeunge. Allah hiron kayaa hebennele naeise, reniai rai ebeli boyeunge. <sup>6</sup> Nebei miyae nannale mbai wali bekore kena haehae kole hului nekendena, wali nekende hororebe Allahle waheikoke, unulu here no bele waheikoke wanen.

<sup>7</sup> Ro miyae hiwa jemaatna miyae nannale holona yo naei a beko elenate belene, nda ukawale a huluinye ro miyaere isaeiyumile: <sup>8</sup> Ro miyae mbai naei aka baekere eholei, na bereise naei imae ei obe einya mbainye nekate yore eholei enareinya, nebei kiyae Wali Ondofolole wali nibi are na hele ban elende. Nebei kiyae na beko hele, hila rabo ban nekeyate yora.

<sup>9</sup> Jemaat yae holerate miyae nannale ro hawembere nda holona bele mo hawengkombe: na ralo yakama rorele u name (60) moi woke, bere na ro molo bele wali ijen mae nekeikoke. <sup>10</sup> Na u mekai foi mokowolene ro rowainyele holona hiwa nda niyae: kelu omi meufoleukoke, naei imae obere mate yore ei hauwoumi, Yesus Naei eleuboke wekeumi yore foi mokowoumi, beko hubainye yore hakoumiyeke, me u foise na hibi-hibi mokowole.

<sup>11</sup> Miyae nannale namman na hokolona ro ehawejiae. Rabuhine ban ro kena kongkondera Wali Ondofolole kalia mo mokonaterena kena okoi, rore enelensonde. <sup>12</sup> Nebei aerene nare ehee bukulu inyaimile, rabuhine ban na bere Wali Ondofolole kalia mo mokonaterena a hokaikokebe nebei huba haei ehaleikoi. <sup>13</sup> Nebei hee mbai behuae henaenata ro miyae naei imaere eleiso akoibo kate. Nebei mo bande nebei a mongko-mongkone kate, hiwa yo naei a faeu nangkele yae elate, na mekai ban a huwate harate. <sup>14</sup> Nebeinye raei kena kale nebei miyae nannale namman na hokolona, rore enelensonde, kelu omi bele yembonde, naei imae obe foi yae holende, aei yokeijo walobo yun kiyae mon rowende jemaatre fo mokommele belene. <sup>15</sup> Nebei u mekai ma miyae nannale nolora hiwa Wali Ondofolole wali nibira wekate walobo yunde hakainyele.

<sup>16</sup> Miyae yoni-yoni Wali Ondofolore hila rabo halaeinye holona naei imae einye miyae nannale nekendena, hakonaimile hele, jemaat nebei miyae nannalere hakonaimilere ewaesisijae hele. Nebei mekai yae jemaat na hului miyae nannale u mbai wa mbai yore mo hakonaimile.

<sup>17</sup> Timotius, jemaatre keuleumile, naei be yun be yebae hebate holona yo be hinemmile nane merau naei wali rambun yemmile, na bereise no ban hee ban ahuba huweyaimi nane merau a usaei waesisaei keleyaimi yo. <sup>18</sup> Rabuhine ban Allahle homofae weume, "Kerbau gandum kaliane mokole hee neuwara ahennema. Neyae na hului nebei gandum anende,"\* nane merau "Kaliare mokonde rore na roibu yemmiyembe."†

<sup>19</sup> Jemaatna be yun be yebae hebate holona ro mbai naei a beko ungetena, ro miyae bee name nebei are moi eneisinya, oboroijae hele. <sup>20</sup> Na hele beko mokombondena, jemaat bene a elaekei weungekonde hele. Nebei mokoubondene ro miyae hiwa u mekai beko mokonate belene, buhae hokommibonde.

<sup>21</sup> Timotius Allahle bene, Yesus Wali Ondofolole bene, Allah yae eleukoke malaikat yoni-yoni bene, nebei a wawale huluinye nanemene mokoumile, be ijoko ereijae.

\* 5:18 5:18a Ulangan 25:4 † 5:18 5:18b Lukas 10:17

<sup>22</sup> Jemaat yun-junde mokoumibondere naei uwa ranne me koloumikonde naeise, hale-hale okojiae hele. Ro miyae naei me u beko mokate wangkele omokojiae! U mekai yolo-yolo yae nekele.

<sup>23</sup> Waei yarele naeise nane merau roko yae roko yae era buloo koyaene, bu bangka mo aneijae, anggur bu ebi ken bele yae baraungebonde aneufinde.

<sup>24</sup> Ro miyae hiwa naei beko bako na yaka hele yaeiboke, ehee bukulu hubanainyele mare erainye. Nebeibe ro miyae hiwa yo naei beko bako nunne honate, bena fokohonole yane yakanate. <sup>25</sup> Nebei sului mbai me u foi na yaka yaeiboke nane merau me u foi hiwa na nunne mo bena honoifoyole hee yakanai bonde.

## 6

<sup>1</sup> Kaliare mokaimi ro miyae, rowa yoni-yoni na mekai sele be hinenaimiyende hele. Nebei mekai yaere ro miyae yae Allahle Rore nane merau aei a usaei wasaei kelaemmire beko yae eleikoi sului. <sup>2</sup> Rowa yoni-yoni hiwa Allah mbaise hila rabo haleainye wanenna, nare na foi yae be hinenaimiyende rabuhine ban Yesusle einye neyae aka baekere yaeiboke. Timotius, a keulumile nebei roware na foi sele yae mokonaimile, rabuhine ban neyae nebei sului mbai Wali Ondofolo Naei a elelere hila rabo haleainyene, nane merau kahili foise yaeibokene, neyae nebei foi nolone nekenate.

<sup>3</sup> Ro miyae hi aei Tuhan Yesus Wali Ondofololena kelewoume a usaei wasaeise nane merau Naei wali nibi are na hele ban elendena, nane merau a ame-ame yae kelemmilen, <sup>4</sup> nebei kiyae nauware isaei rabo-rabobe halele nane merau mbai sambai naeisaei banbe. Neyae u bene mahi-mahi nekaimi are nane merau are kilenatere mokommile are kena kaban boronde. Nebei a yoni-yoni ro miyaere mokommile nda u mekai ma nekenate: kena hensan, ikele han, a beko beko, ro ro miyae miyae, <sup>5</sup> nane merau u bene beko ro miyae Wali Ondofolole na hele wali nibire onaeinye yo nolone nebei a yae naeise naeise akure honatere mokaimile. Nebei yo u benera nekaimi Allah kenare kole huluinye nekenatena, rambun helen yaronate.

<sup>6</sup> Nebeibe Wali Ondofolo kena kole hului nekemale nane merau aei wali rambun na hului elemale wali ma nekandena, Allahle ro be ro yoinye onomi foka yeuboke. <sup>7</sup> Rabuhine ban eyae nda kani kelare me bangka mewande, nebei sului mbai nda kani kelara emabalende hee rambun yoni-yonire eyaroikoi sului. <sup>8</sup> Aeinya raman anemale malo hiremale hononaimelena, ninae, nebei sului yae nekemale ya. <sup>9</sup> Ro miyae nde roi helen yarongkondere kena haehae kondena, naei uwabe nanaei kabeukoke. Nebei roi umali elae yae hubanaimile nane merau walangka wokene heuboke. Ro miyae roise yaronate naeise na hibi-hibi u bene nekenaimilena, naei wali einye kalo nekai hubanaimile. <sup>10</sup> Rabuhine ban roise kena kaban kate u mekai yae mokoumi ro miyae u mekai wa mekai beko mahi-mahi mokate. Roise kena kaban kowate aerene aei holona ro miyae hiwa Wali Ondofolo Naei a elelere hila rabo haleainyera wekatene, na kena ure nanaeijae kabaekoke.

<sup>11</sup> Timotius, weyae Allahle holona ro, nebei u mekai wa mekai bekora wauwa wewende. Weyae baele u mekai nda niyae: wali ijen, Allah kena kole hului nekele, Wali Ondofolo Naei a elelere hila rabo haleungele, ro miyaere kena buhae heumile, beko hubaungele hororebe no ban hee ban Wali Ondofolore hakoungel, kena nime haba yae nekele. <sup>12</sup> Wali Ondofolo Naei a elelere hila rabo haleimeyeyae naei nana hesele yae releungele. Allah kaeneukokete waei hila rabo Wali Ondofolo Naei a elelere haleungele naeise ro miyae helen bene wo kookokae heena, wali hena bona ikete. Nebei wali foi einye nekele. <sup>13</sup> Timotius, Allah wali nemenere yeumile Kiyaele bene nane merau Yesus fe efaeiboi ban Ondofolo Pontius Pilatusle bene Wali Ondofolo yae Naei uware yakauboke Kiyaele bene reyae wawale: <sup>14</sup> Aei Tuhan Yesus Wali Ondofolo na uware meijakambonde heere Naei wali nibi a hului na mekai yae nekele nane merau nebei sului yae mokoungel. <sup>15</sup> Allah onomi foka na no nekele, Nembai sele me mokoumile, Ondofolo yoni-yoni naei Ondofolo, mere mokaimi yoni-yoni naei Yun nekele. Allah yae Naei a hokongkonde ya Yesus Wali Ondofolo yakannebonde. <sup>16</sup> Allah Nembai sele here ban Kiyae, hehe elae bele naeumile nolone ekenekelene, hi yae ha yae onobeikoi sului, ro miyae yae roko mbai ereiboi nane merau ereiboi sului. Nebei Allahre mo be hinenainyele bele, elae wake bele huba ban haei ban nekenende. Amin.

<sup>17</sup> Nda kani kelana rambun helende honaimi holona ro miyaere a elae yae weumile na uware bumane ekaeijae nane merau kaka inyai bonde rambunde rabo ehaleyaij, nebeibe Allahre mo rabo halenainyele. Eyae rei mai nolone nekemale naeise Allah rei mai mokoume rambunde kena faere-faere yae waheyume. <sup>18</sup> Rambun bele ro miyaere weumile nda u mekai ma nekenate: me u foi mokonate, ro miyaere hakonaimile, kena faere-faere yae nekenate, naei hun bele wai bele yae hiwa yore hakonaimilere

be hinenai bonde. <sup>19</sup> Nebei me kai yaere bena ya fokehonole naei rambunde arilenate naei aehube raufike, mende yane wali hena bona yaronate, wali na foi sele.

<sup>20</sup> Timotius, Allah yae ware kinyeuboke kaliare na ijen mae mokole. Ro miyae Allah ban a bubu huwate nane merau ame-ame kaenainyele isaei hebaen bele are oboroyejjae, waei uwa wewende. <sup>21</sup> Rabuhine ban ro miyae hiwa nebei are hakowaimine Wali Ondofolo Naei a elelere hila rabo halaetera wekate.

Reyae ebeli banale Allah yae kena buhae aere ban mare henete.

## 2 TIMOTIUS

<sup>1-2</sup> Onomi foka Timotius, weyae raei kelu wanenne kena buhae haewale. Reyae Paulus, Allahle kena huluinye Yesus Wali Ondofolole abu akore isebondere kaeneufekoke. Allah yae are nuleungekoke Yesus Wali Ondofolo Naei a elelere hila rabo halenainyele ro miyaere wali hena bonare yemmile ako faeukobe reyae huwamale.

Raei ebeli Ako Allahle aei Tuhan Yesus Wali Ondofololere bamaele ware kena buhae aere ban mae heneyete, yanekoi yase yae ei haungeyete, kena foi u foi yae mokoneyete.

### *Be Bele Rabuleubonde Wali Ondofolole Kaliare Mokole*

<sup>3</sup> Maeko naei maebu naei yae Allah eise molowainye wanen mbai raei kena u na yolo-yolo hele yae eise molanale. Reniai rai ebeline eibowanale hee, waei naei u bene nekeisiyefene eibowanale. <sup>4</sup> Heere ukende heena wa kena beko u beko ijoko ibo bele yae balewayetere namnan u bene nekaise. Mana raei kena rei mai yae maemae konsekondere wangkele benen hubayaekondere. <sup>5</sup> Mana Allahre helen foi wanale, rabuhine ban reyae u bene nekaise na bere angken Loisle ana Eunikele Yesus Naei a elelere hila rabo halewoinye wanen mbai, weyae Yesus Naei a elelere hila rabo haleyae. <sup>6</sup> Nebeinye reyae ware isaeyawale na bere waei uwa ranne reyae me koloukokawale hee Allah ware meli mekai ikete. Mana reyae benen wawale nebei meli mekai na hibi-hibi mokole. <sup>7</sup> Rabuhine ban Allah Naei Roh ikeume yae aere mokommebonde fere faemale naeise ban. Nebeibe Neyae nda ma mokoumele: eyae elae wake bele imabonde Wali Ondofolole kaliare mokomale, ro miyaere kena buhae hemamile, nane merau wali na hului Allahle isaei hebaen hului yae hiyei ranemande.

<sup>8-12</sup> Nebeinye aei Tuhan Yesus Naei a yakaiboi naeise fe ehubaijae. Allah aere hole moloumboke nane merau kaeneumekoke u mekai yolo-yolo bele nekemayende. Aei me u foi mokandebokene ban, nana hesele Nenaiejae haraungeboke huluinye nane merau aere kena buhae aere ban mae hemmele aerene Allah nebei me u foi mokouboke. Nda kani kela omokoiboi heena Allah yae meraufe raungehike Yesus Wali Ondofolo aere na kena buhae aere ban mae hemmele. Nda hee Yesus Wali Ondofolo aei walilo meke, here elae ban mokoungboke, nane merau Naei a foi faeu foi walora wali hena bona nibi yakameboke. Nda wanen mae Allah aere kena buhae hewoume. Nebei a foi faeu foi hufemiyenderene nane merau keleremiyenderene Allah rare eleufeboke naei abu akore yeubokale. Nebei aerene reyae beko hubanale nane merau kawane bele haeisekoke. Nebeibe reyae fere ehubai, rabuhine ban reyae Yesusre roungebokanale, Nare hila rabo halaenale. Reyae isaeyubokale Naei kinyeufeboke hufemile Wali Ondofolole wali nibi are Yesus na hului hole molonnele, Neyae bensonde mende yane. Yesusle aerene rare kawana haeisekoke eraufene fe okojiae. Allahlena elae yae yeume walora reyae huwale wanen mbai, weyae Tuhan Yesusle a foi faeu foi huwele naendae wanen horo ro hi miyae hi beko mokonayete.

<sup>13</sup> Reyae kelewamale wali nibi naei a foi faeu foi me nene u nene ban naei borowoyae, nebei mbaibe keuumile. Weyae Wali Ondofolo Naei a elelere hila rabo halaenaene ro miyaere kena buhae u buhae heumile. <sup>14</sup> Nebei wali nibi naei a foi faeu foise reyae ware kelewawale nane merau Allah ukete ro miyaere huweumilere. Allahle Roh aei uwa einya nekele elae yae nebei a foi faeu foise hole molonnele.

<sup>15</sup> Weyae waeisaei sele ro miyae Asia kanira hakaisekoke mekande yo nanemene aiweke rare nukaiseboke. Nebei holona ro bee Pigelusle Hermogenesle bele.

<sup>16</sup> Reyae Allahre ebeli banale Onesiforus naei imae ei obe einya yore yanekoi yase yae ei hawemmile, rabuhine ban neyae mbaibe roko yae roko yae raei kenare rei mai haweyeufo. Reyae kawane hebale naeise naeisaei selebe, neyae fere ehubasi oyorowole.

<sup>17</sup> Roma yone meke hee rangkele hubayaekondere eisure mesure hurewole baewoufo wa hubayendekoke. <sup>18</sup> Efesus kanine rare helen sele hakowoufo naeise weyae waeisaei banka mo. Nebeinye reyae ebeli banale aei Allah na Kelu Wali Ondofolo bensonde mende nda kani kelana ro miyae huluisse memmikolonde yane, Allah yae Onesiforusre yanekoi yase yae ei ennehawende.

## 2

<sup>1</sup> Weyae, Timotius, raei kelu wanende yeubokae, Wali Ondofolo kena buhae aere ban mae heimeyumene elae ikeume. Nebei elae yae mokoi. <sup>2</sup> Bena Yesusle ako faeuko ro miyae helen bene elewale borowoyae. Nebei ako faeuko mbai huwate hului yae nekate u mekai bele ro miyaere na foi yae keuumikonde. Nebei ro miyae na hului meli mekai



bele yore kelenaimikonde. <sup>3</sup> Felalo mbai na u mekai foi kiyae naei wali beko hubannele naeise u benere enekei, kena yae herawele na yun elele are hakombondere relennele. Nebei wanen mae aengkele Yesus Wali Ondofolo naei a elelere hakomabonde naendae wanen horo wali beko hubannele. <sup>4</sup> Na fela yun kena foise mokonebonderene, fela beu bene eiseibeiyate. Ro hosoro holona naei rambunne humfo wamfo okoi. <sup>5</sup> Nane merau holokare eiseibeiyate kate yo, holoka einya u mekai konate naei ukaimile nanemene huba mokonainyekondere. Elaekei sele hebate yore yaeimi roibu na hului rowende. Nebei sului mbai Yesus Naei a elele nemene hakoubonde. <sup>6</sup> Heke ro miyae kalia elae mokoikoyelere na bemena ani foi moi yaroikoyole hele. <sup>7</sup> Raeinya a wawale ware nou henete. Rabuhine ban nda a nanemene isaeyeubonde naeise Allah yae mokonebote.

<sup>8</sup> Nda niyae bene nekenayete: Yesus Wali Ondofolo Yahudi naei Ondofolo kaban Daudle orona mena Kiyae nulu yo mahe yora aunguke. Nebei Kiyaele a foi faeu foibe kelaewale. <sup>9</sup> Nebei aerene beko hubanale, nane merau me hila u hila mokole ro wanen lon ha yae wowo kowaise. Nebeibe Allahle ako faeuko ha yae wowo okoiko sului. <sup>10</sup> Allah yae a hokoukoke Yesus Wali Ondofolo yae yeumi wali hena bona enaiyaronde ro miyae naeise nda beko hubanalere kena yae herawale. Nebei ro miyae huba ban haei ban buma kaenaimiyende. <sup>11</sup> Waei kena heraubonde, rabuhine ban nda a eleukoke na hele,

Wali Ondofolo hereke wanen aei kena kandere Naei me einye kinyemanelena,

Wali Ondofolo bele mbainye wali emanekende.

<sup>12</sup> Wali Ondofolole aerene weitasi kaimere kena yae heraumannena,

Wali Ondofolo aengkele mbainye mere emamokonde.

Wali Ondofolore onaenne yae emalendena,

Wali Ondofolo aere oneume yae enelengkonde.

<sup>13</sup> Wali Ondofolo Naei a elelera emawende hororebe,

Wali Ondofolo aere Naei a huluinye mokommende.

Rabuhine ban Wali Ondofolo Naei a elelere mbai eheisoi,  
nebei sului mokonnele hele.

<sup>14</sup> Nebei Yesus Naei ako faeuko kelei-keleise kelenaimile ro miyaere nda a ukawale hului yae weyae roko yae roko yae benen u benere nekenaimilere weumile. A faeu kenane kilate yore Allahle ro be ro yoinye a usaei foi sele yae weumikonde. Rabuhine ban a bele yae kilate rambun foi ban sele, boronate ro miyaere beko bele mokonaimile. <sup>15</sup> Weyae kalia foi mokole ro yae Allah erete naeise releungele. Nebei kalia mokoyaere fe ehubasi naeise, Naei ako faeuko na ijen mae keleumile. <sup>16</sup> A bangka-bangka Allahlena ban a faeu wae eweijae. Rabuhine ban nebei wanen are na hibi-hibi huwate ro miyae Allah kenare okoi me u beko na hibi-hibi barayainye. <sup>17</sup> Buloo u buluna uware beko mokoikoyoungue wanen mae nebei yo naei kelewaimi a jemaatre beko mokoikoyainye. Nebei a faeufe elate holona ro bee Himeneusle Filetusle. <sup>18</sup> Nda ro bee wali nibi na hele kelaemmira wekete. Neyae ame-ame yae wabaimi, herewate ro miyae anainyunde ya moibe wokande lonbe. Nebei a bangka-bangkare borowate ro miyae hiwa a ameamere hila rabo halaete. <sup>19</sup> Nebeibe Allah yae a nuleungekoke aehure raufike wanen ninae hononende nane merau ekuseikoi sului. Nebei aehure raufike Allahle homofaene a nda mekai molaikoke: "Naei holona ro miyaere Allah yae ro royeumi,"\* nane merau "Ro miyae nde naei Yesus naei Tuhan mae elenate yo, na u mekai beko mokoyatere nukennebode hele."

<sup>20</sup> Imae kaban mbainye rambun na mane-mane eisonowate, hiwa perakra, hiwa emasra, nebei sului mbai hiwa ora hara, hiwa kani kendaara. Rambun foi kayeero, ro bele ro miyae yarate mokate. Rambun foi sele ban kayeero na yane baei yarate mokate. <sup>21</sup> Ro miyae mbai nenaiejae na wali beko moi bulennebondena, Allah Naei kaliare nebei yo walora na hului mokonde. Neyae rambun foi holona wanen Allahle holona ro miyaere yembonde. Uwa mokounguhake Allahle kaliare na hului mokonde.

<sup>22</sup> Kelu maengke hokolo yae bekore kena kate u mekaisa uwa wewende. Allah Naei a eleukoke huluinye waei walire alounguele. Yesus a elelere hila rabo halele, ro miyaere kena buhae heumile, kena foi u foi yae nekele. Ro miyae kena u yolo-yolo yae Allahre ei moloyainye yo bele mbainye nebei wali ma mbai relennekombe. <sup>23</sup> A kobu-kobu naeise a ekileijae. Rabuhine ban waeisaei sele nebei a kobu-kobu kilenatera hande na hului honate. <sup>24</sup> Allahle yebaei bubaei ro miyae holona han felare okoyei sele. Neyae ro miyaere kena nime haba yae ei hawemmile, na hului ro miyaere a usaei waeisaei kelemmle, na kena u einye rilibo ehayei. <sup>25</sup> Neyae kelemmi are na hele ban elate ro miyaere naei kena nime haba yae a usaei waeisaei kelemmle. Rabo haleyae nebei ro

\* 2:19 2:19 Bilangan 16:5

miyaaere Allah kena kommikondena na u mekai beko mokowatera mon yemmile nulu kenainyebonde, Wali Ondofolole na hele wali nibi a isaeyiyaibonde, <sup>26</sup> nebeisa na wali ronainyebonde. Nebei mekai yaere walobo yun kenare kole hululise mokonainyendere walangka yaleungehakera unyayende.

### 3

#### *Huba Mokoikoi Yane Ro Miyae Naei Wali Nda Mekai Inyabonde*

<sup>1</sup> Timotius, bene nekenayete, huba mokoikoi yane u mekai wa mekai beko hele mahi-mahi menaibende. <sup>2</sup> Rabuhine ban ro miyae na u mekai wa mekai nda ma inyabonde: naei u mbaise mo kena buhae henaimile, roise kena kaban konate, ukaei sele, ro miyae naei ro foise horonaterere kena hele konate, ako nakere oboroi, helen foise eweyei, Allah kenare kole wali mane enekei, <sup>3</sup> na aka baekere buhae eheyeyi, hiwa yo naei beko bako u benera hanemmikondere kena ban, a hufuu huwenate, na u mekai eharai boi, nansau, foise kena ban, <sup>4</sup> ro miyae kelaise mokate, mokombonde rambunde u bene foi yae enekeikoi, nauwa isaei bele ro yae kaenate, nda kani kela naei yukaei bele rambunde kena kaban konate. Allahre kena okoyei, <sup>5</sup> ro be miyae bene Allahre eise melonainyebile nebeibe Allahre elae ban mae elenate. Nebei u mekai bele ro miyae holora uwa wemembe. <sup>6</sup> Rabuhine ban nebei u mekai holona ro miyae hiwa yo naei imae eise na maleu-maleu wae ate, miyae maengke u mekai kobu yo beko yae maemae kouwimike nane merau bekore kena haehae hakonaimilere kate yo naei kena u hawaimi. <sup>7</sup> Naendae mekai horo nda miyae maengke a usaei kelaeimire na hibi-hibi boratebe, nebeibe Wali Ondofolole na hele wali nibi are isaeyei boi. <sup>8</sup> Na bere hele Allahre yendo kayaalo Musale are Yonesle Yambresle na hele bande huwote wanen mbai, maleu-maleu wae ate Wali Ondofolole wali nibi kelaeimire na hele ban mae huwote. Nebei yo na u bene beko mo nekeyaimi. Allah nare moi buleumiboke, rabuhine ban Naei a elelere hila rabo ehaleinye. <sup>9</sup> Nda hee nebei ame-amere kelaeimi yo naei ame-ame na hibi mo ebeyei. Rabuhine ban Yonesle Yambresle na kobu yakauboke ma mbai, nda yo na kobu ro miyae nanemene enaisayembonde.

#### *Paulus Yae Timotiusre A Usaei Uwoungwe*

<sup>10</sup> Nebeibe weyae, Timotius, nda rambun raei naeise isaeyebokae: Yesuslena a foi faeu foi kelewamaele, wali foi nekewale, merau harawanale ro miyae Yesusle naeise isaemisile, Yesus Naei a elelere hila rabo halewale, kena na hebaen-sebaen nekewekale, ro miyaaere kena buhae u buhae hewamaele, naendae wanen horore beko hubanalere kena yae herawale Wali Ondofolo a elelere na hibi-hibi hila rabo halaenale. <sup>11</sup> Weyae ijoko erewoyae ro miyae rare weitasi kowaise, reyae beko hubanale. Antiokhia yone bele Ikonium yone bele nane merau Listra yone rare beko mokowaisebe, nebeibe reyae Yesusre moi ebulei, weitasi kowaisera Tuhan mae hole moloufoboke. <sup>12</sup> Na hele, ro miyae nde maenin Allah kenare kole hului Yesus Wali Ondofolo Naei a elelere hakonate mane na wali haraungeboko kiyae weitasi enainyekonde hele. <sup>13</sup> Nebei hee mbai ro miyae beko neban bele yo nane merau ame-ame bele yo bele na u mekai beko yae emmimelende. Neyae ro miyae hiware ame-ame wabenaimile nane merau nauware ame-ame wabenaimile. <sup>14</sup> Nebeibe weyae Timotius, a usaei wasaei na hele ware kelaegekokete bele na hele eleyae belere me bobo ikileungekonde, rabuhine ban waisaei sele nde naei yae nebei isaei hebaende kelewayete yo. <sup>15</sup> Bene nekenayete, weyae na kaei-kaei selera Allahle homofae roungebokae. Nebei homofae na hului Yesus Wali Ondofolore hila rabo halaeinye walora wali hole moloikoyeumi naei isaei hebaen inyete. <sup>16-17</sup> Allah Naei kaliare mokate ro miyae u mekai foi moi na mane-mane mokonaterere na foi yae mokommihande naeise, Allahle homofae einye molaikoke a faeu nanemene Allah yae nuleungekoke. Nebei a faeu na hului ro miyaaere wali mekai ban nekenaterere isaeyemmile, wali beko naeise angkaa yoboumle, u mekai wa mekai foise alommile, nane merau wali himaloi-himaloi himalonaimile naeise kelemmikonde.

### 4

<sup>1</sup> Allahle ro be ro yoinye nane merau Yesus Wali Ondofolo benen mende yo waku nembonde, nda kani kelana ro miyae walire nekate yo bele, herewate yo bele, naei wali hululise kolommikonde Kiyaele ro be ro yoinye nda a niyae elae yae wawale: <sup>2</sup> Yesus Naei wali nibi naei a foi faeu foi huweumile hele. Ro miyae boronate naeise kena, kena ban weyae keleumile naeise uwa mokoisa-mokoisa yae nekele. A helee bele han bele yae angkaa yoboumle. Homo mbai a mbainye oromembe, beko mokonate holonare a usaei elae yae weungele, nane merau foise mokonate holonare moi hureumile. Nebei mokole hee na hebaen-sebaen mae na mekai bele yae huweumile. <sup>3</sup> Rabuhine ban bona

honoifoyole ya mendene Wali Ondofolole na hele wali nibi a kelaeimilere boronatebe, nebeibe ro miyae kena okoi. Nebei holona ro miyae naei kenare kate huluinye hakonaikonderene, nebei are kelaeimi yo helen abunenate. <sup>4</sup> Nda yo Wali Ondofolole na hele wali nibi are angkaei me yae felenaikonde, nebeibe relime a huba nondon huwatere angkaei alenaisinde boronaimile. <sup>5</sup> Nebei mekai benate hororebe wauwa kayaa foi hebele, beko eungehubandere kena yae herawewende, Yesuslana a foi faeu foi huwamaere Allahle yebaei bubaei wanenne kalia foi yae huba haei eungehaleukonde. <sup>6</sup> Rabuhine ban ya na heki ban reyaе hererele nda kani kela erennukembonde. Raei uwa bae hili era akau era bu rilei-rileise huba raweuboke ma yae nekale. <sup>7</sup> Oro habelei-sabeleise habelaete ro nahaufa habeimeyele huluisse rainyehike hee na foi yae menensindena na roibu inyainyele wanen mae, reyaе Yesus Naei kalia elae haelae meungerelekoukanale nda hee hubare halerengkondere nobeungekokale. Yesus Naei a elewolere reyaе hakoumekale. <sup>8</sup> Oro habelei-sabeleinya ro bere eyeisiyele kiyae roibu inyainyele wanen mae wali hului emmikolonde heene Tuhan mae rare yensele. Rabuhine ban Tuhan ro miyae na walire na ijen mae hului kolommile Kiyae, reyaе Naei a elewolere hila rabo halewanalene wali himaloungebokale ro yae me baensebonde. Nebeibe rare mo yensele ban, ro miyae nanemene Wali Ondofolo mende yare kena haehae hele koyate hila rabo haleimeyate yo bele nemene yemmile.

#### *Ahumboi Naei A*

<sup>9</sup> Timotius, nibi baeukonde hasale holo yae raei bokore mele. <sup>10</sup> Rabuhine ban Demas nda kani kelana wali beko nibire kena kowolene eukuke, rare nukeufeboke, Tesalonika yona ewole. Kreskes, Galatia kanina ewole, nane merau Titus, Dalmatia kanina ewole. <sup>11</sup> Lukas nembai namman rangkele nanembainye nekende. Timotius, Markusle bele yaweungehonde mebe, rabuhine ban neyaere nda kalia wanende foi yae rare hakonsebonde mokale. <sup>12</sup> Tikhikus bae reyaе ukanale Efesus yore eke. <sup>13</sup> Na bere Troas kanine Karpusle imaene reyaе nukeubokale u moise hirale malo. Timotius, weyaе mele heene nebei malo bele, raei homofae yoni-yoni, na bereise homofae obo yoku elanne mokate yoni-yoni, nanemene wa mene roweufemende.

<sup>14</sup> Aleksander, tembagare mokole ro, u mekai beko hele mokowoufe. Na u mekai wa mekai mokowoufe huluinye Allah nare ehee bukulu ennewonde. <sup>15</sup> Naei u mekai haraungene wauwa kayaa hebele yae nekele, rabuhine ban aeinya a usaei waeisaei kelaemmile horommebondere na hele ban a yae kelewoumi.

<sup>16</sup> Roko mbai nendo raei uwa are kolaimi yo riya bene yobaiseboke ekalere hi yae ha yae ehakoiboi, raei foi naei are eleikoi. Nanemene nukaiseboke. Reyaе rabo halaele nebei u mekai kelaiseboke yore Allah yae beko ewei. <sup>17</sup> Nebeibe Allah rare hakoufebokaе raei bokone hebewole wanen mae Naeinya elae yae moi neufehike ro miyae helen bene be rabuleubokale Yesuslana a foi faeu foi nanemene nebei kena nime haba bele are Yahudi ban ro miyae bene na hului kelewamaele. Nebei mekai yaere obo yoku singa euwara yobaisebokaе wanen mae here me eisa hole moloufebokaе. <sup>18</sup> Nane merau honaisebondaе naei merau koloyainyera Allah wewe kongkonde, na foi moi yae rowensele, Naei yo yan surgane ensehansebondaе. Allahre huba ban haei ban hili hebenainyende. Amin.

#### *Ro Melaeyei-Melaeyese*

<sup>19</sup> Timotius, Priskile Aukilale bele nane merau Onesiforus naei imae einye nekate ro miyae bele a melaeyeumibonde. <sup>20</sup> Erastus nda hee Korintus yona eke nekele. Nane merau Trofimius na uwa era buloo kowolene Miletus yone reyaе nukeungebokale. <sup>21</sup> Weyae Timotius nibi baeukonde hin manse emeinyei hee raei bokore mele. Ebulus, Pudes, Linus, Klaudia, nane merau aei aka baeke hila rabo mbaise halaenne holona ware Timotius ro melaeyete.

<sup>22</sup> Allahre reyaе ebeli banale Yesus Wali Ondofolo waei kena u ei haungete, Naeinya kena buhae aere ban mae henete.

## TITUS

<sup>1</sup> Onomi foka Titus, raei kelu wanen kiyae. Reyae Paulus, Allah yae eleufeboke Naei kaliare mokorelere nane merau Yesusle abu akore isebondere. Allah ukeufe Naei eleukoke ro miyaere yaufemibonde Yesusre hila rabo halenainyele naeise, nane merau nebei ro miyaere Wali Ondofolole na hele wali nibi a isaemisile naei wali Allah na kenare kole huluinye nekenate naeise. <sup>2</sup> Neyae nebei ako faeuko hakonatena, na hului wali hena bona yaronatere rabo elaekei sele yae halenate. Allah ame-ame ebeyei. Nda kani kela omokoiboi heena Allah nda wali hena bona naei a eleukoke. <sup>3</sup> Nebeisa Allah kenare koukoke ya Naei kaliare mokoyate yo huweyaimi walora Naei a eleukoke yakaumiboke. Aei Walilo, Allah, rare ukeufe Naei a eleukokere ro miyaere hufemiyendere.

<sup>4</sup> Titus, nda homofae waei naeise moloukokale. Weyae raei kelu wanen, rabuhine ban reyaee Yesusle ako faeuko huwewawale walora Yesusre hila rabo halewanae. Reyae ebeli banale aei Arai Allah bele aei Walilo Yesus Wali Ondofolo bele ware kena buhae aere ban mae heneuwete, rei mai haungewende.

### *Jemaat Be Yun Be Yebae Hebate Yo Naei U Mekai*

<sup>5</sup> Kreta yokobane ware nukeubokawale, nebei yokobana huba omokoikoi kaliare hiyei raneubonde naeise, nane merau nebei yo yoni-yoni honatena jemaat naei be yun be yebae hebenate yo eleumikonde naeise, reyaee keleukokawale wanen mae mokoukonde. <sup>6</sup> Nda u mekai wanen yo be yun be yebae eleukonde: ro na u mekai foinye hiwa yo naei bekore eleyei sului, na miyae mbai mo, na fa-fa Yesusre hila rabo haleiyainyele, yun kaeng-kaen ban, meyaya ban, na yun-junde boroyaimile. <sup>7</sup> Jemaat naei kayaare hebele kiyae hiwa yo naei walire a bekore elei sului, rabuhine ban Allahle kaliare neyae mokonderene. Naei u mekai nda wanen: ukaei ban, ikele walaa-walaa ban, bu elae mali ban, han muli ban, rambun ame-ame yae arilei-arileise arileyei. <sup>8</sup> Bararebondere naei u mekai nda wanen: naei imaere obere menate ro miyaere ei hawemmile foi mokommile, foi moise kena ikowole, naei u bene foi yae mo mokoyele, na wali himaloungeboke, naei wali Allah yae eleuboke holona u mekai wanen nekeyele, naei bekore kena haehae koyatere ehakoyei. <sup>9</sup> Nebei ro Yesusle ako faeukore eyae kelewannelere hila rabo elaekei sele halende, neyae na hului Wali Ondofolole wali nibi a yae jemaatna ro miyaere alommile naeise, nane merau Yesusle ako faeuko na hele ban keleyaimi yore na u bene ijn alommile naeise.

### *Ame-Ame Kelaeimi Yo Naei U Mekai*

<sup>10</sup> Nebei yokobana ro miyae helen sele naei yun-junde oboroyei, a bangka-bangka mo eyelewat, ro miyae hiwa hiware ame-ame yaneyaimi. Nda ro miyae wanen helen Yahudina. <sup>11</sup> Naeinya ahuba ame-amebe huwaimi yae mokaimi imae ei hiwa nemene Yesusle a na hele ban mae elate. Nebei mekaise mokaimi yo neuwa ahuneumibonde. Ro miyae naei rambun abun-abun naeibe wabaimi inyaimile naeise, nebei ro miyae ame-amebe kelaeimi. <sup>12</sup> Kreta Yokobana yendo kayaalo mbai a eleukoke, "Kretana ro miyae a ame-ame nake, obo yoku hangkei wanen, kaliare omokoyei, eraman malire mo koyate." <sup>13</sup> Nebei a eleukoke reyaee na hele yae elale. Nebei mekainye reyaee wawale, Yesusre hila rabo elaekei sele halenainyele naeise, nare a elae yae angkaa yoboumle. <sup>14</sup> Nare angkaa yoboumle Yahudi naei ahuba bangka-bangka Wali Ondofolole na hele wali nibi are moise bulaeinye ro miyae naei a waimilere oboroyei naeise. <sup>15</sup> U bene bele kena u bele imokowoung ro miyae na u bene na u yolo-yolona, rambun-rambun nanemene yolo-yolo mo; ro miyae na u bene bele na kena u bele niki mo, Yesusre hila rabo ehaleyeyi, rambun-rambun nanemene niki bele mo. Nebei ro miyae na u bene beko yaeiboke, beko mokonatebe nebeibe na kena u eisa foi yae hubanainyele. <sup>16</sup> Naendae mekai horo lon neyae Allahre rainyeboke yae elenatebe, nebeibe meyae maesaie neyae Allahre oroiboi sele, rabuhine ban naei u mekai nda ma: me u bekone, na u mekai u nene yae wa, Allahle afaeufe ehakoyei, nane merau me u foi naeise mokonatere na hului ban.

## 2

### *Yesus Kenare Kole Wali Ma*

<sup>1</sup> Titus ware wawale, Wali Ondofolole wali nibi a mo keleumile. <sup>2</sup> Nda mekai yae keleumile: be hokolona ro holo bu elae roko helen aneyejiae, naei wali ma nekenate hiwa yo yae ei molonaimile naei, u bene foi yae mo mokonate, Wali Ondofolo a elelere

hila rabo elae yae halenainyele, ro miyaere kena buhae hemmile, naendae wanen horo beko hubanaimile na hibi-hibi Wali Ondofolore hila rabo halenainyele. <sup>3-5</sup> Be hokolona miyae-miyaere nebei sului mbai jae nda a keleumile: na wali Yesusre ei moloyainye wanen mae nekenate, ro miyae hiwa yo naei naeise a nene a huftuu ehuweijae, bu elae mali okoyei, foise mo kelenaimile. Nebei mekai yaere nebei miyae wa na hului miyae-miyae hokolore nda wali foise a kelenaimile yaungaimile: na molo ware na fa-fare kena buhae henaimile, na u bene foi yae mo mokonate, u beko omokoyei, imae einya kaliare foi mokonate, na kena u nime haba nekenate, na molo wa naei a kelee faeu keleene nekenayende. Nebei u mekai jae mokonatena, ro miyae hiwa yo yae Allahle ako faeukore aukaka okoyei.

<sup>6</sup> Nebei sului mbai wa moi hokolona kelu fa-fare a ijen mae alommile, na u bene foi yae mo nekenate. <sup>7</sup> Titus wa wali foi naei na hibi-hibi yae mo mokole, ro miyae hiwa wa waline erenatene nebei bune wane hakonate. Weyae a helee bele han bele wamae ma mae ei molonayete naeise keleumile. <sup>8</sup> Nane merau a na ijen mae mo keleumile, hiwa yo ware me nonaiwotere na hului ban. Weyae nebei merau keleumilena, waei a keleyamae ahire elate ro miyae fe yae konate. Nebei mekai yaere aere a beko ewei sului.

<sup>9</sup> Kalia yore nda a keleumile: na yane baei na rowa naei a wemmilere hakonainyele, kalia nanemene na yunde mokonainyele rei mai konde, a na baeinye-baeinye eweijae, <sup>10</sup> na rowale rambun-rambun yoko yae ebaeijae, na u mekai na yane baei ijenne mo nekenate. Na wali nda merau na hibi-hibi mo nekenatena, Allah aei Walilole are kelenaimilene hiwa yo na kena yobonaimile.

<sup>11</sup> Titus, weyae nebei wali nibi keleumile, rabuhine ban Allah na kena buhae aere ban mae heyeumene Yesusre nda kani kelare ukeunge meke, Naei einye ro miyae nanemene wali hena bonare na hului yaronate. <sup>12</sup> Yesusle wali nekewole ma yae aere keleyeume aei bekore kena haehae koyandere ehakoyei, nebeibe Naei kenare kole mo hakomale. Nda hee nekande aei wali alomande, foi mo mokomale. Allah naei kenare kole hului mokomande. <sup>13</sup> Nda wali ma yae nekemale aei rei maise mokommekonde rabo halaende Kiyae rakemane. Aei rei maise mokommekonde rabo halaende Kiyae nda Niya: Allah Walilo, Wali Ondofolo Yesus, na bumana hele Kiyae Nauwa wali halaman ma mae benen bensonde mende. <sup>14</sup> Nana hesele ro miyae naei me beko u beko mokowate huluinye ehee bukulu emmihayendera hole molommebonde naeise, nane merau ro miyae kuyemmile Naei holo mbaise mokombonde naeise, Yesus mehauwae na wali kinyeumboke. Ro miyae holo mbai me foi u foise mokonatere kena kaban koyate yore Yesus baele.

<sup>15</sup> Bumane homo moloukokalena are keleumile. A na ijen mae ro miyaere aloumille, na me u beko mokatere a helee bele han bele yae angka yoboumille. Ro miyae hiwa yo yae ware ane enaikolote naeise ewaeisijae.

### 3

<sup>1-2</sup> Titus, Yesusre hakoyainye ro miyaere isaeyumile nda a u bene foi jae nekenaimile: kani me kela mere ikilaiboke yo bele na yun-jun hiwa yo bele naei a keleene nekenate nane merau naei a hakonaimile, nauwa foi mokonate naeise mokonainyehande, a beko ro hi miyae hi naei ehuweijae, naeise naeise rei mai bele nekenate, wali na mekai yae nekenate, naeise naeise kena u ane rainyehike yae mokonate.

<sup>3</sup> Na bere hele aei wali u mekai koby heene nekewande nda wanen: ro miyae hiwa naei are oboroyei ehakoyei, hiwa yo a ame-ame yanaimike, aei bekore kena kowande nane merau nda kani kelana foi bele yu bele erande rambun aei walire ikileumekoke, ro kelai miyae kelai hiwa na waline beko benate me u mokowande, ro miyae hiwa yo naei rambun yaromakondere kena haehae kowande, ikele aese naeise kowande.

<sup>4-5</sup> Naendae mekai sele aei u mekai nebei wanenbe, nebeibe ya mbai aei Walilo Allah yae keleumboke Na u mekai nime haba nekeimeyele nane merau aere kena buhae heyeumele. Neyae aere hole moloumeboka, aei wali foi nekewande aere ne ban, nebeibe Neyae yanekoi yase yae ei haweumekokene. Aere holere moloumeboka nibi nda wanen: Allah yae aere kuyemekoke Naei holone haumekoke, Naei Roh yae wali neme ikeume.

<sup>6</sup> Allah yae Wali Ondofolo Yesus aei Walilole walora Naei Roh aei waline aumboka. <sup>7</sup> Eyae Naei fa-fa helere imabonde naeise, nane merau wali hena bona yaromalere rabo elae yae halemande naeise, Allah nebei me u mokouboka. Na kena buhae aere ban mae heumekokene aei wali himaloumeboka walora eyae na hului naei fa-fa helere imabonde.

<sup>8</sup> Homo moloukokawalene na bumana a nemene na foi bangka mo, hila rabo halen. Nebeinye Titus, Allahre hila rabo halewainye ro miyae me u foi na hibi-hibi mokonayende naeise, reyae kena kale weyae nebei a elae yae keleumile. <sup>9</sup> Nebeibe a

bangka-bangka, han hoi-soi a ma eleijae. Abu naei arai naeitena yo mei-mei huwate aere ne bele, Musale walora wali heere foloukoke aere ne bele a ekileijae. Rabuhine ban nebei mekai a kileyate yae foise eyei, rambun foi omokoiboi. <sup>10</sup> Ro miyae holo mbai mokombonde naeise ame-ame kelemmile kiyaere angkaa yoboungebonde. Neyae hee eneinya, benen angkaa yoboungebonde. Oboroiboi mo kondena, nebei ro bele wali nibi mbainye oroyeijae. <sup>11</sup> Mayae maisaei nebei mekai ro na u bene yeli-yelibe yeubokene, u mekai beko mokoyele. Neyae naeisaei sele na me u beko mokolera nauware beko yeungebe, nebeibe namman mokoimeyele.

*A Humboise*

<sup>12</sup> Artemas yae, Tikhikus yae, nebei beera hire ufende waei bokore ende. Neyae ende heera, Titus, weyae releungekonde Kreta yokobara kulun wele na hibi raei bokore Nikopolis yore mele, rabuhine ban raei kenara hokoukokale hin manse mennende heene oko name keli hului nebeinye erenekengkonde. <sup>13</sup> Ro bee Zenas wali heere folaikokere isaeyeukoke kiyaele Apolosle Kreta yokobare kulun ungete enete hee, naei kolo rambun-rambun ijoko foi yae erengkombe nane merau na hului-sului jae hakoumikombe. <sup>14</sup> Nane merau Yesusre hakoyainye ro miyae na wali rambun na hului-sului hononaimile naeise bele na wali rambun kalo eimoloi naei bele isaeyiaibonde helene kalia me u foi mokonate.

<sup>15</sup> Rangkele nekande ro miyae ware ro melaeyaeyete. Nebeinya Yesusre hila rabo haleiyainyene maere buhaere haeimele yore ro melaeyeumibonde.

Reyae ebeli banale Allah mare kena buhae aere ban mae henemembe.

## FILEMON

<sup>1-2</sup> Onomi foka aka baeke Filemon, weyae maei kahili hele nane merau Wali Ondofolole kalia mbainye mokande ro. Onomi foka Apfia Yesusle einye emauen, Arkhipus aei kahili Wali Ondofolole felayo wanan kalia mbainye mokande kiyae, nane merau aei aka baeke wa waei imaene jemaat arileisiyele yo. Reyae Paulus, Tuhan Yesus Wali Ondofolole a foi faeu foi huwale aerene kawane hebale kiyae. Reyae bele aei aka baeke Timotius bele mare ro melaeyayembe. <sup>3</sup> Meyae ebeli bonnele aei Ako Allahle Yesus Wali Ondofolole mare kena buhae aere ban mae heneyembe nane merau mare kena foi u foi mokoneyembe.

### *Paulus Filemon Naeise Helen Foi Huwole*

<sup>4</sup> Filemon, na rokone baei ebeli eibanale waei bene nekeisiyeufene Allahre helen foi sele eiwewanale, <sup>5</sup> rabuhine ban reyae boroimeyale weyae Yesus Naei a elelere hila rabo halaenae nane merau Yesus Naei eleuboke wekeumi holona yore kena buhae haemae. <sup>6</sup> Raei ebeli Allahre boyanale weyae Yesus Naei a elelere hila rabo halaete ro miyae bele nibi nanembainye orombe nane merau wali nanembainye nekembe yae Allah ikeume rambun yoni-yoni na foi yae isaeyele. Wali Ondofolore hili hebenainyele naeise Allah aere nebei rambun ikeume. <sup>7</sup> Aka baeke Filemon, Yesus Naei eleuboke wekeumi holona ro miyaere kena buhae u buhae haemaene reyae rei mai kale nane merau raei kena hara roweufehikae, rabuhine ban nebei yore kena foi mokowamae.

<sup>8-11</sup> Nda hee reyae rorele yeuboke. Yesus Wali Ondofololena a foi faeu foi huwewekale aerene kawane haeisekoke hebale. Na bere Onesimus ware yebaei bubaeise mokowekete. Neyae hakauboke raei bokore meke. Kawane nekewekale yae Onesimusre Wali Ondofolole a foi faeu foi huwanale. Nda hee Wali Ondofolo Naei a elelere hila rabo haleungene, raei kelu wanan yeuboke. Nebeinye Filemon, reyae riyawale Onesimus waei bokore mendene ei haweungele, Wali Ondofolole eisa aka baeke wanan mokoungale. Wali Ondofolole Ro einye reyae na hului ware a elae yae ufete, nebeibe ware kena buhae haewalene Onesimusle naeise na foi yae riyawale. Na bere neyae waei ro be ro yoinye rabuhi ban yeuboke, nebeibe nda hee u mekai foi bele nekele. Rare helen hakoimeyefe wanan neyae na hului ware hakonete. Nane merau neyae aei Yesusle aka baekebe nekele.

<sup>12</sup> Raei kena eisa kelu hele wanan kena buhae heungele kiyae, Onesimus, waei bokore nda hee yae ukanale bensonde endere. <sup>13</sup> Yesuslena a foi faeu foi huwamaelene kawane mekahebale heene, waei ukanae na wanan neyae rare hakonsele naeise raei kena kale neyae ndane nekende. <sup>14</sup> Nebeibe nda hee waei bokore Onesimusre ufende ende. Nebei nibi yae weyae kena koyae na hului raei naeise me u foi mokoubonde Onesimusre ufende rare hakonsele, reyae a elae yae ufete aerene ban. Raei kena kale aerene ndane nekenende naeise Onesimusre ewei. <sup>15-16</sup> Nauwae, Onesimusle wangkele wali mbainye waei yebaei bubaei yae ban, nebeibe kena buhae haenale aka baeke yae nekebe naeise, ya fofu ken waei u nolo u kaisa uwa weke ahaunge ekenekewole. Nda hee reyae nare kena kanale. Neyae ro u mekai foi nekelene, nane merau Yesusle einye waei aka baeke nekelene, weyae emekai bele kena koungele.

<sup>17</sup> Nebeinye rare Wali Ondofolo Naei kalia mbainye mokende aka baeke yae ereufelena, rare ei hawarae wanan mae Onesimus bensonde endere ei haweungele. <sup>18</sup> Onesimus nekewole heene waei rambun yoko yae baewolena, nane merau iwanae rambun aheikoise na hului banna, nanemene raei ranne kinyeubonde. <sup>19</sup> Nda homone raei me yae moloukokale. Reyae na hele elale nebei kou kalore renaeijae aherekonde baensonde. Nda a u bene nekenayete raei walora weyae wali neme bele nekeyae. Reyaebe yae Wali Ondofolole a foi faeu foise kelewwale.

<sup>20</sup> Aka baeke Filemon, reyae rabo halaele Tuhan Wali Ondofolo Naei a elelere hila rabo mbainye halaendene Onesimusre ei haweungele. Nebei nibi yae raei kena foi mokoufonde. <sup>21</sup> Nebei wanan hubanalene nda homo moloukokale. Reyae hubanale riyawale huluiyae weyae hakoubonde nane merau emekai bele mokoubonde.

<sup>22</sup> Filemon, nane merau nda mon reyae riyawale raei erenekende anuwau bele waei imaene mokoungehande. Rabuhine ban reyae rabo halaele waei imaene arileisiyate jemaat ebeli bangele huluiyae na heki ban mo kawara hainyaisekonde, reyae mai bokore erele.

<sup>23</sup> Epafras, Yesus Wali Ondofolo aerene rangkele nane kawa mbainye hebende kahili yae mare ro melaeyembe. <sup>24</sup> Nane merau raei kahili wa kalia mbainye mokande yo, Markus, Aristarkhus, Demas, Lukas, nebei ro keli mare ro melaeyayembe.

<sup>25</sup> Reyaе ebeli banale Tuhan Yesus Wali Ondofolo mare kena buhae aere ban mae henembene mai kena ure foi hubannele.



## IBRANI

### *Allah Na Kelule Walora Huwele*

<sup>1</sup> Bena heena roko helen Allah Naei yenjo kayaayo walora a faeu mekai mahi-mahi yae eyae Yahudi ro miyae aei yobe naei kamahe naeise Allah uwoumi. <sup>2</sup> Nebeibe nda hee huba mokoikoi yane, Allah Na Kelule walora aere a ukeume. Na Kelule naeise Allah a hokoukoke Na me einya honate rambun yoni-yoni Naei me einye enaisononde Kiyae, nane merau Naei walora Allah nda kani kela bele kun wau bele mokouboke Kiyae. <sup>3</sup> Naei Kelu Allahle nene waewae mbai nane merau Allahle u mekai bele nekele. Rambun nemene fomene Na Kelu elae bele wake bele a elele yae hara nekeunge. Neyae Ro miyae naei beko bako faeinyemmibonde naei nibi mokoubokera Allah surgana nene waewae bele Kiyae Na meube reufine eunguweuboke. <sup>4</sup> Nebeinye Allah yae Naei Kelu yae roungebokene, malaikat yoni-yoni yae ehameikoi sului. <sup>5</sup> Rabuhine ban roko mbai “Weyae Raei Kelu.

Mana ya yae Reyae waei Ako helere yeubokale.”\*  
Nane merau malaikatle naeise nda mekai yae a eleikoi,

“Reyae naei Akore ereyembonde,  
Neyae Raei Kelure enjembonde.”†

<sup>6</sup> Nane merau Allah Na Kelu Hina Fa Hoi Fa nda kani kelare yakaumiboke hee, Allah nda mekai yae eleukoke,

“Allahle malaikat nemene Nare ei molonainyele hele.”‡

<sup>7</sup> Malaikat yoni-yoni naei a nda mekai yae Allah eleukoke,  
“Naei kaliare mokate malaikat yoni-yonire mokommile

alu baei yo bele i faeu belere inyaibonde.”§

<sup>8</sup> Nebeibe Allah Na Hina Fa Hoi Fa Naei a nda mekai yae eleukoke:  
“Allah,

Waei kendan wameran huba ban haei ban hononende,  
na ijen mae ro miyaere me eumimokonde.

<sup>9</sup> Weyae u mekai na ijende harayainye yore  
buhae heimeyamae

nane merau me beko u bekore mokate yore  
ikele yae koimeyamae.

Nebei aerene minyak\* Waei yun ranne rileuboke yae

Allah Waei kahili wafeu nekatera Ware anuwau bumane raneujekete  
nane merau rei mai sele mokowote.”†

<sup>10</sup> Nane merau Allah a eleukoke,

“Weyae Tuhan na beme fomere nda kani kela bele yaku bele  
Waei me yae u yae mokoubokae.

<sup>11</sup> Nebei yoni-yoni mokowoyae

nanemene malo male wanan menayembonde beko benate,  
nebeibe Weyae Tuhan mahire eyeiboi nekewende.

<sup>12</sup> Nda kani kelana malo male wanan mae Weyae oleungekonde,  
neme beungehonde hononende.

Nebeibe Weyae mahire eyeiboi

nane merau Waei ralo yakama huba ban haei ban.”‡

<sup>13</sup> Malaikat mbaise Allah yae nda wanan mae eleikoi,

“Weyae Raei meube reufina ro bele anuwaunge meinyuweibo  
mende Reyae Waei yokeijo yoni-yoni beko mokoremibonde

Waei oro hensen anuwau wanan mae enajembonde.”§

<sup>14</sup> Nebei malaikat Allahle kaliare mokate roh yoni-yoni, nane merau wali hena bona enaiyaronde yore eise haungaimile naeise Allah ukeumi.

\* 1:5 1:5a Mazmur 2:7 † 1:5 1:5b 2 Semuel 7:14 ‡ 1:6 1:6 Ulangan 32:43 § 1:7 1:7 Mazmur 104:4 \* 1:9 1:9a  
Ro mbai ondofofo ranenajendere Yahudi ro miyae nebei ro naei yunde minyak rilewate. Oro umau heraukoyainye  
Buyaka era hena na mekai mbai. † 1:9 1:9b Mazmur 45:6-7 ‡ 1:12 1:12 Mazmur 102:25-27 § 1:13 1:13  
Mazmur 110:1

## 2

<sup>1</sup> Nebeinye Allah yae Naei Kelule walora a uwoumene, nebei are nou hemande hele. Nandolo yae yoboungwe wi enene hebele kiyaele a elae ban yeiboyole wanen Allah ukeume a elae ban yembondera u benera nundenaimekonde belene, nebei are nou hemande hele. <sup>2</sup> Malaikat yoni-yonire ukaimi Musale walora wali heere foloukoke are asasi kaikoke yo bele hubara haesa eyanei yo bele nebei a huluinye ehee bukulu hayaimikoke. <sup>3</sup> Nebei mekai bewatene, Allah yae ikeume holera molommebonde nibi na foi sele a faeufe moi bulemandena, Allah aere me nommeyonde hele. Nebei a faeu na bemere Tuhan Yesus Nenaiejae isaeiwoumi. Nebeisa angkaei borowate yo aei bokore nekate yae elewate nebei a faeufe na hele. <sup>4</sup> Naei kaliare mokate ro miyae walora iwau yoni-yoni emere-emere emekai bele mokowate nane merau Naei kena koukoke huluinye Naei Rohle meli mekai ro miyaere wahewoumi walora Allah kelewoumi nebei a faeu na hele.

*Yesus Na Aka Baeke Wanen Mokouboke*

<sup>5</sup> Eyae are elande kani kela neme ennenulengkonde Kiyae mere enaimimokonde naeise malaikat yoni-yonire Allah ekinyeiboi. <sup>6</sup> Allahle homofae einye ro hi nda wanen haraungeboke moloukoke,

“Allah,

ro miyae yoni-yoni bele naei orona mena bele me ebaei ban yobe nekate, nebeibe Weyae nare ijoko foi sele roboyamae.

<sup>7</sup> Weyae ro miyaebe mokoumibokae

malaikat yoni-yoni nekate anuwaufa ebi fere ane oumiraufikae.

Nare hilire enaimihebende naeise

nane merau bere enaimihinende naeise

mokoumibokae.

<sup>8</sup> Nane merau Weyae nuleubokae yoni-yoni

naei me kelee u keleene orulenaibondere mokoumibokae.”\*

Allah mokoumiboke rambun nemene fomene ro miyae naei me kelee u keleene nekenate, nebeibe nda hee rambun nemene fomene ro miyae naei me kelee u keleene nekate eyae ijoko ereiboi. <sup>9</sup> Nebeibe nda hee Yesus ijokore erannele Kiyae. Ya na foho hele Allah yae mokoungboke malaikat yoni-yoni nekate anuwaufa are oungeraufike. Nebeibe nda hee Neyae beko hubawoungera hereke benen waleubokene, Ondofolo yae Nare hili hebeyainye nane merau be hineyainye. Allah kena buhae aere ban mae heumi u mekai ma nekelene, ro miyae aere Yesus hereke. <sup>10</sup> Allahle kena foise mokonnele naeise nemene fomene yaeiboke, nane merau Allahle elae wake walora nemene fomene yaeiboke. Allahle u mekai huluinye na mekai yae mokonnelene, Naei ukeunge meke ro miyaere hole molommile Kiyae wali hiyei ranembonde naeise, beko hubawoungwe. <sup>11</sup> Ro miyaere mokommile Allahre kena foise mokonainyele u mekai wanen nekenate Kiyae bele, nebei u mekai ma nekate ro miyae bele, Ako mbai. Nebei aere Yesus fe ban sele nebei ro miyaere Naei aka baeke wa yae elele. <sup>12</sup> Yesus yae Allahre weunge,

“Reyae, Weyae wende abe

Raei aka baekere eremisaeyende

nane merau jemaat u nolo u kainye

koi bae yae Ware ei ereimolote.”†

<sup>13</sup> Nane merau Yesus yae eleukoke:

“Reyae kena elae eisubawanale Allah Naei elele a huluinye mokorende.”‡

Benen Yesus yae Allahre weunge,

“Eremobo, Reyae nane merau Rare kinyeufeboke kelu omi bele ndane hebande.”§

<sup>14-15</sup> Walobo yun here mere ikileuboke kiyaere beko mokonnebonde naeise, nane merau ro miyae na wali koko herere fe faimeyate yo Neyae na hului nebei fera hayemmikonde naeise, Allahle kelu omi melen u ha u mbai yae Yesus yeuboke. <sup>16</sup> Na yaka yeuboke Yesus malaikat yoni-yonire hakoumi ban, nebeibe Abrahambe orona mena yae me baeumi yore hakoumi. <sup>17</sup> Yesus ro miyaere yanekoi yase yae ei hawemmile nane merau Allah a weunge hului mokole imam kabande yembonde naeise, nane merau nibi mbai mokombonde ro miyae naei beko bako mokaimekere Allah faeinyemmibonde naeise, nebei me u mokombondere Yesus Na aka baeke wanen mbainye yembonde hele. <sup>18</sup> Yesus Naei uware umalire hubainyehike heene beko hubawoungene, Neyae na hului umalire hubanaimiyende yore hakommiyende.

\* 2:8 2:8 Mazmur 8:4-6 † 2:12 2:12 Mazmur 22:22 ‡ 2:13 2:13a Yesaya 8:17 § 2:13 2:13b Yesaya 8:18

## 3

*Yesusle Anuwau Na Bumane Musalera*

<sup>1</sup> Nebeinye Allah yae elembokembe wekembe holona aka baeke, Yesus bele mbainye surgane nekembere kaengkokembe ro miyae, Yesusle naeise nou hennene. Neyae Allahle Abu Ako nane merau aei imam kaban mae wo kande Kiyae. <sup>2</sup> Allahle holona yore imae a yae ahuneuboke. Na bere Allah elewole a huluinye Yahudi ro miyae foi naeise Musa kalia mokoweke wanen mbai, Allah elele a huluinye Yesus Naei a elelere hakainye ro miyae foi naeise mokoumi. <sup>3</sup> Yesus na nene waewae huluinye yeise raeiboi emekai bele Musalera, rabuhine ban imaere nuleuboke kiyae na yeisi raeiboi emekai bele nebei imaere aungunuke kiyaelera. <sup>4</sup> Imae ainyuise na ro miyae bele, nebeibe Allah yae rambun yoni-yoni nemene mokowole. <sup>5</sup> Musa Allahle holona yo naei yebaei bubaei wanen nekewole, Allah uwoungwe huluinye mokowole yae bena ya naei wali are huwewoumi. <sup>6</sup> Nebeibe Yesus Wali Ondofolo Allahle Kelu yae Allahle holona yore Allah weunge hului yae me mokoumi. Eyae kena wauwau okoinya, nane merau Allah elele a huluinye mokondere rabo elae halemandena, eyae Allahle imae obe niyae.

<sup>7</sup> Nebeinye Allahle Roh yae nda a eleukoke hului mokombe:

“Nda ya, mayae Raei ako faeuko wamalere boraubena,

<sup>8</sup> abu naei arai naeite wanen mae kena elae u elae okonnemae.

Nendahina a kala-kala anuwaunge nekewate yae,

Allah umali hubawoumi heena kena elae u elae yae nekewatene,

Allahle uwoumi a huluinye ehakoiboi.

<sup>9</sup> Nebei anuwaunge abu naei arai naei ralo yakama rorele u bee hele iwau mahi-mahi mokowole na ijoko yae erewate hororebe,

Raei elele a huluinye mokorele naeise umali hubawaise.

<sup>10</sup> Nebei aerene nda yore reyae ikele han kowamaelene nda a yae eleukokale:

‘Nebei yo na kena einye u einye bae wali nalaiبوکه nibire hakoyate

nane merau Raeinya wali nibi kelewamaelere isaeyeiboi.’

<sup>11</sup> Nebeinye Ra kena ikele yae nda a holo kowamaele:

‘Nebei ro miyae Raei mokoungihakale no yeiboi wali nibire eisubaikoi sului!’ ”\*

<sup>12</sup> Aka naei baeke naei, mauware kayaa hebembe benen u mekai beko mokomembera Wali Ondofolo Naei a elelere hila rabo ehaleinye, Allah wali bele Kiyaere moi bulennebombe belene. <sup>13</sup> Nebeibe eyae nammann elande, “Nda ya” yae mai u nolo u kaisa hibe mai bekore kena kaubere harayembe elae ame-ame yae mokonembombe kena elae u elaebe yembonde belene, na yane baei a usaei wasaei maise naeise homo mbai a mbainye oromembe elemembe. <sup>14</sup> Na bemena Wali Ondofololena a foi faeu foi borowande hee, Allah a elele huluinye mokolere hila rabo elae halenda hului nekemalena, Yesus Wali Ondofolo bele mbainye nekemale. <sup>15</sup> Bene nekenayembe nda Allahle homofaena a na ranne moloukokale mbai,

“Nda ya, Raei ako faeuko wamale mayae boraubena,

kena elae u elae yae okonnemae,

abu naei arai naei yae Allah yae umali hubawoumi heena Naei uwoumi are ehakoiboi nekewate wanen.”†

<sup>16</sup> Yo maenin nde naei Allahle ako faeuko borowate hororebe, be elae u elae yae Allahre kowainye? Musa yae Mesir kanira yaweumiboke fowate ro miyae mbai niyaebe ya! <sup>17</sup> Nane merau yo maenin nde naei ralo yakama rorele u bee hele Allahre kena ikele u ikelere mokowainye yo? Nebei u mekai beko mokowate ro miyae a kala-kala anuwaunge heraikoke yo! <sup>18</sup> Nebei be elae u elaeere kowate yore Allah nda a yae a holore koukoke, “Nebei ro miyae Raei mokoungihakale no yeiboi wali nibire eisubaikoi sului?” Allah nebei a mekai haraungeboke eleukoke! <sup>19</sup> Nebeinye eyae isaeyaendeboke nebei yo Allah yae uwombe are hila rabo ehalei aerene, Naei mokoungehake no yeiboi wali nibi hubaikoise Allah ewaeisi sele.

## 4

*No Yele Wali Nibi*

<sup>1</sup> Israel ro miyae Kanaan kanire ayeuboke heene Allah are heteumikoke Naei a wemmile huluinye nekenatena, Allahle mokoungehake no yeiboi wali nibire enaisubayengkonde. Nebei wanen mbai nda hee Allah aere are heteumekoke Naei weume a huluinye nekemalena, Naei mokoungehake no yeiboi wali nibire emahubayengkonde. Nebei aerene mai u nolo u kainya ro miyae hibe nebei wali nibira engwenende belene,

\* 3:11 3:11 Mazmur 95:7-11 † 3:15 3:15 Mazmur 95:7-8

aei uwa kayaa bele hebemale. <sup>2</sup> Rabuhine ban Musale heena wali nekewate ro miyaere nebei a foi faeu foi uwaimi wanen mbai, aere no yeiboi wali nibi naei a foi faeu foi huwaime. Nebeibe nebei yo naei uwane akeiboi ma yae nekewate, rabuhine ban neyae a foi faeu foise borowate hororebe, nebeibe Allahle a elewolere hila rabo ehaleinye. <sup>3</sup> Eyae Allah mokoungahake wali nibi a foi faeu foise hila rabo halaende yo no yeiboi wali nibi na foi naeise isubawanne. Allah yae hila rabo ehalei holona yo naeise nda a wanen eleukoke:

“Nebeinye Ra kena ikele yae nda a holo koukokale,

‘Nebei ro miyae Raei mokoungahakale no yeiboi wali nibire eisubaikoi sului!’ ”\*  
Allah nda a eleukoake, erabae nda kani kela mokouboke heera Allah nebei kalia hiyei raneungeboke. <sup>4</sup> Ya mehine bee naei Allahle homofae einye nda wanen molaikoake, “Mehine bee nenja Allah kalia yoni-yoni mokowole riyau weuboke, no yeuboke.”†  
<sup>5</sup> Nane merau na ranna wanen benen nda a moloukokale, “Nebei ro miyae Raei mokoungahakale no yeiboi wali nibire eisubaikoi sului.”

<sup>6</sup> Allah are heteumekoke hului ro miyae hiwa nebei wali nibi hului nekenatene, nebei anuwaunge no enajende. Nane merau nebei wali nibi naei a foi faeu foi bere huwaimikoke borowate ro miyae Allah uwoumi a huluinye ehakoiboinye, nebei yo no yeiboi wali nibi eisubaikoi. <sup>7</sup> Nebeinye eyae na hului no emayembonde naeise, benen Allah moise haiwande ralo yakama Ondofolo kaban Daudle walora ya hi a eleukoke “mana ya” niyae. Allah yae “mana ya” naeise nda wanen eleukoke, “Mana ya Naei ako faeuko boraubena, mayae kena elae u elae okonnemae.”‡

<sup>8</sup> Nendahina Israel ro miyae naei be yun be yebae Yosua Allah are hetewoungue Kanaan kani na foi selere yaweumiboke. Nebei ro miyae na hele no yeiboi wali nibi na foi naeise hubainyefoube yae, benen Allah ya hi naei a eleikoi. <sup>9</sup> ((Nebeibe Allah yae no yeiboi naeise benen Yahudi Ondofolo kaban Daudle walora huwoumi.)) Nebeinye Allahle holona yo naeise no yeiboi wali nibire mokoungahake, ya mehinen bee nenja no yeiboi ya wanen. <sup>10</sup> Nde naei Allah mokoungahake no yeiboi bele wali nibi hului nekate yo, Allah Naei kalia mokowolera no yeuboke wanen, nebei yo na wali himalainyeboke yo yae me baemmile naei kalia yoni-yoni mokayekera no yaeiboke. <sup>11</sup> Nebeinye, men, aei u nolo u kainya ro miyae hibe aei yobe naei Allah Naei elele are hila rabo ehalei wanen mae nendon moi ungainyonde bele, relemande nebei no yeiboi bele wali huluinye nekemande. <sup>12</sup> Rabuhine ban Allah Naei elele a wali bele elae bele. Ramiyaeli be moi henen bele yae u bulu wa bulu nele wanen, Allah Naei elele a kena ei u einye nele, u bene nekaimi yoni-yoni belere u bene haraimi yoni-yoni belere hului koloyeumi. <sup>13</sup> Allah yae mokouboke rambun yoni-yoni mbai sambai Allahle ijoko bera enundeiboi. Allah aei wali naeise wo emangkonde Kiyae Na ro be ro yoinye nanemene wewe molaiboke, a yaka yaeiboke.

#### *Yesus, Imam Kaban Kiyae*

<sup>14</sup> Yesus Allahle Kelu surgane ekenekele Kiyae nda hee aei imam kabande yeuboke. Nebeinye, ro miyae hiwara huwammi wanen mae, Allahle Kelu Naei a elelere na hibi-hibi hila rabo halemande. <sup>15</sup> Rabuhine ban aei imam kabande yeuboke Kiyae aei male u yambi ure hubaungehikene, aei kou kalo elakonde are borole. Aei wanen mbai umali hubawoungue, nebeibe u mekai beko omokoiboi mo. <sup>16</sup> Nebeinye aei wali emangkabende hee aere yanekoi yase yae ei emmehawende nane merau kena buhae aere ban mae emmehende naeise, men, kendan wameran na bumane helere kena elae hubanne yae ema. Nebeinye nekele Kiyae ro miyaere kena buhae aere ban heumi.

## 5

<sup>1</sup> Imam kaban yoni-yoni ro miyae naei are Allahle elenete naeise, ro miyae u nolo u kaisa yaraikoke. Allahre inyainyele rambun nane merau ro miyae naei u mekai beko faeinyeiboise obo yoku bele nebei imam hili era akau erare Allahre ongkou wae ifelewainye. <sup>2</sup> Nebei imam kaban ro miyaene nane merau u mekai beko belene, nebeinye ro miyae kobu bele Allah mokoungahake wali nibira wekate yo belere kena nime haba yae ei hawemmile. <sup>3</sup> Nebei aere ro miyae hiwa naei beko mokowatene mo ban nebeibe naei uwa naei beko mokowole bele obo yoku yae ongkoufe feleiboyole.

<sup>4</sup> Ro miyae hi nauwa imam kabande yembonde naei, nenaiejake nauware ekaeiboi sului. Nendahina Allah yae Harunde kaeneungekoke wanen, imam kabande yembonde ro miyaere Allah yae kaenennekonde. <sup>5</sup> Nebei sului mbai imam kabande yembonde

\* 4:3 4:3 Mazmur 95:11 † 4:4 4:4 Kejadian 2:2 ‡ 4:7 4:7 Mazmur 95:7-8

naeise, Yesus Wali Ondofolo Nauware Nenaie ekaeiboi. Allah Nenaiejae kaeuboke naeise nda a mekai yae weunge,  
 “Weyae Raei Kelu Fa

mana ya Reyae Waei Akore yeubokale.”\*

<sup>6</sup> Allahle homofae reufi hine Allah nda wanen eleukoke,  
 “Imam Melkisedekle wanen

Weyae imamde yeubonde rimolone yangkone nekewende.”†

<sup>7</sup> Ro miyae uwa wanen mae Yesus nda kani kelane nekewole hee, here me eisa na hului hole molonnebondere Allahre ebeli kali rime bele a bele bowounge. Allah uwounge huluinye uwa haraungeboka nekewolene, Yesus naei ebeli bowounge are Allah boroungboka. <sup>8</sup> Yesus Allahle Kelu hororebe, beko hubawoung walora Allah weunge a huluinye nekendere Yesus isaeyeungekoke. <sup>9</sup> Yesus na wali hiyei raneungebokera, ro miyae Neyae weumi a huluinye nekate yo nanemene naei wali hena bona no Kiyae, Yesus Niyae. <sup>10</sup> Nane merau Allah yae Yesusre imam kabande raneujeke, imam kaban Melkisedekle wanen.

<sup>11</sup> Yesus imam kabande yeuboka naei mekaise meyae a helen mare isaemamberebe, nebeibe mayae hasalere isaeyeiboinye yabi-yabi hele kelemangkombere. <sup>12</sup> Na hele mayae hiwa yore kelemmile naei hee yeubokebe, nebeibe mayae namman sele hiwa yo naeisa na bemena kelewawembe a mbaibe isaeyembere kena kaube. Mayae wayeu fa wanen nimene namman anaube, raman elae na hului ban. <sup>13</sup> Nde namman nimene anele kiyae fa wayeu wanen u bene nekaimi, wali himalainyeboka yo yae me baemmile nibi are na foi yae isaeyeiboi. <sup>14</sup> Raman elae ro miyae uwa henaiboyate yo naei. Nebei ro miyae na waline foi naei beko naei hului raisise nenaie nenaie isaeyaeiboka.

## 6

<sup>1</sup> Nebeinye, Wali Ondofololena a na bemena kelewaimbe nukemabonde, Wali Ondofolole einye henamabonde naei a usaei wasaei kelaime hakomakon. Aei hila rabo aehure raimehike naei a na bere kelewaimbe nda niyae: Allah bele wahanaikonde u mekai beko mokatera nulu kenainyebonde naei, Allahre hila rabo halenainye naei, <sup>2</sup> bu kaimi naei, ro miyae uwa ranne me kolaimile naei, ro miyae nulu yo mahe yora anainyunde naei, nane merau huba ban haei ban ehee bukulu enainyehubande naei. <sup>3</sup> Allah kena kongkondena, nda hee eyae Wali Ondofolole einye henamabonde naei a usaei waeisaeibe kelemamile.

<sup>4</sup> Nde maenin neyae nda rambun hubawainye: na bere Wali Ondofolole wali hena bona nibi na a foi faeu foise isaeyaeiboka, nane merau hehe yae na kena u einye naeumikoke, roko mbai surgana foi yoni-yoni hubawate, Allahle Roh aumiboka, <sup>5</sup> Allah yae elele a na foi yoni-yonire hubawainye, bena honoifoyole yane Allah me u mokonende naei elae hubawainye, <sup>6</sup> nebeisa Yesus Wali Ondofolore moi bulaeinyebokena, na hului ban sele nebei ro miyae a usaei ungainyekondera bensonde na beko bakora benen nulu kennebonde. Rabuhine ban nenaiejae Allahle Kelure benen ohaline bate wanen moibe bulaeinye nane merau mokainyeboka ro miyae bene fe mokoinye.

<sup>7</sup> Meyae ro miyae bele kani kela bele nda wanen mae ahunemabonde: kani kela ya yae mololene bu fileungene mere ure mokole kiyae naeise o haka ha haka ani mokate, nebei ma kani Allah foi yoni-yoni yeunge. <sup>8</sup> Nebeibe kani kela fonom kaiwa mo fatena, nebei kani rabuhi ban yeuboka, na hului olomo yae nennebonde, inye ungayonde bengkonde baensonde.

<sup>9</sup> Aka naei baeke naei, nebei a usaei wanen wayembe hororebe, mai uwane eyeiboise maei kenara elae hubannele, rabuhine ban Wali Ondofolore hila rabo haleyaungene, Allah hole moloyemmi ro miyaebe nekaube. <sup>10</sup> Mayae Yesus Naei eleuboka wekeumi ro miyaere kena buhae hewaumine, nda hee bele hakoimeyaumi. Nebei nibi yae mayae Allahre kena buhae hewaunge. Allah u mekai na ijen mo mokole Kiyae, mai me ure naei u benera enundeikoi sului. <sup>11</sup> Meyae kena hele kande Allah hualungekoke a huluinye mokondere rabo elae halembe naeise, nebei me foi u foi na hibi-hibi mokomembe. <sup>12</sup> Mayae behuaebe ehenaiejae, nebeibe ro miyae na hebaen-sebaen mae Wali Ondofolo Naei a elelere hila rabo halaete walora Allah are heteungekoke rambunde yarate ro miyae bune wane hamennenbe.

<sup>13</sup> Yahudi ro miyae rore rowainye yobe Abrahamde Allah a heteungekoke. Allahre hi yae ha yae ehameikoi suluinye, Allah naei Ro yae a holo koukoke. <sup>14</sup> Neyae eleukoke, “Na hele, Reyae foi yoni-yoni yae ware ereisawete, nane merau waei orona

\* 5:5 5:5 Mazmur 2:7 † 5:6 5:6 Mazmur 110:4

mena mokoremibonde helen bolen hurende nalende.”\* <sup>15</sup> Abraham na hebaen-sebaen rakeweke wa Allah are heteungekoke hului rouke.

<sup>16</sup> Ro miyae hi a holo kaikoke rambun naeise yembonderene, ro bele rore kaeneikoye-unge. Nebei mekai yaere are kilate rambun foi mokoiboyate. <sup>17</sup> Allah kena kookoke Naei are heteungekoke rambun enaiyaronde ro miyaere yakammibonde Naei meraufe raungehike huluinye enaibende helene, a holo kookoke. <sup>18</sup> Eyae Allah mokoungehake wali nibire oromale naeise wali beko nibi nukandeboke nane merau Allah nuleuboke a huluinye mokondere rabo elae halaende. Aere kenare ammenunde naeise Allah amename ebei sului Kiyaele a heteungekoke yae bele a holo kookoke yae bele Abrahamde ukeunge a elae mokoungoboke. Nebei Allah eleukoke a bee ma hi omokoi sului. <sup>19-20</sup> Allah nane merau Abrahamde a heteungekoke naei orona mena walora nda kani kelana ro miyae nemene foi yaronate. Wali Ondofolo Abrahambe orona mena yae mekene, eyae na hului Allah heteungekoke are rabo elae hele halemande, rabuhine ban Wali Ondofolole walora foi yarandekoke. Neyae Allah bele mbainye nekete. Melkisedek wanen imam kabande huba ban haei ban mokonende.

## 7

### *Imam Kaban Melkisedek*

<sup>1</sup> Nendahina nda Melkisedek Salem yona Ondofolo nane merau Allah kunsoboi waufoboi anuwau nekele Kiyaele imamde yeuboke. Abraham Kanaan kanina ondofolo-ondofolo bele buloo fela relewainye yore meleumihakera bukeufike mewole hee, Melkisedek naei bokore eke, Allahre riyeungehike Abrahamde foi yoni-yoni yennele. <sup>2</sup> Nda Melkisedekre Abraham mae meleumihake yo yanna eba he roweimekebe me bee kayeero be nare kinyeungeboka. Melkisedekle ro na mekai “wali ijen ondofolo” nane merau Salem yona ondofolo na mekai “rei mai ondofolo”.

<sup>3</sup> Melkisedek ako ban nake ban yoho yongko ban na wali huba ban haei ban, Allahle Kelu wanen rimolone yangkone Allahle imamde nekenende. <sup>4</sup> Naei anuwau bumane helere eren, Abraham mae fela yae eungereleukoke eufawekoke yo yan na eba he yarowolera me bee kayeero Melkisedekre kinyeungeboka! <sup>5</sup> Musale walora wali heere foloukoke a yae imam-imam Lewile yohona yore ukeumile, na aka mbai baeki mbai naeisa ufenayende rambun me bee kayeero enayarilende, erabae nebei ro miyae Abrahambe orona mena lonbe. <sup>6</sup> Melkisedek Lewile yohona banbe nebeibe Abrahamera me bee kayeero yaroukoke. Nane merau nebei Abraham, nare Allah yae are heteungekoke kiyae mbaise Melkisedek yae Allahre riyeungehike foi yoni-yonire yennele. <sup>7</sup> Eyae aisaie nare Allah foi yoni-yoni yennelere riyeungehike kiyae ana nebei are eleukoke kiyaelera. <sup>8</sup> Yahudi naei imam holona naei yoho yongko naei ufenayende rambun me bee kayeero yarayeke yo nanemene fomene herenayende, nebeibe Abrahambe me bee kayeero yaroukoke kiyae Melkisedek wali rimolone yangkone nekenende. <sup>9</sup> Eyae na hului elemakonde Lewile orona mena yo Israel ro miyae naei ufenayende rambun me bee kayeero yarowate holona, Abrahambe walora me bee kayeero Melkisedekre ikeunge. <sup>10</sup> Rabuhine ban Abraham na fela roroukoke roibuna me bee kayeero Melkisedekre ikeunge hee Lewi ohonoi hororebe, bena honoifoyole yane Abrahambe orona mena yae honongkonde.

<sup>11</sup> Nendahina Musale walora wali heere foloukoke a yae ukeumi Lewile yohonare Allahle imam holonare inyaibonde. Harun imam kaban mbai nendo naei orona mena naei wanen mbai imam kaliare enaimokonde. Lewile holona imamde mokowate walora Allah yae ro miyaere wali himalainyeboka yo yae me ebaei suluinye, Allah yae Melkisedekle wanen imam mae ukeunge meke, Harunbe holona imam wanen ban. <sup>12</sup> Nane merau imam kaliare mokate naeise ma hi yeubobe yae, nebei imam kalia mokate naei wali heere foloukoke na ma hi yae bukainyehiube. <sup>13</sup> Aei Tuhan Yesusle abe ndane haranale wamale Kiyae Lewile yohona ban nane merau naei yohora ro hi roko mbai itukai naei imamde mokate kalia omokoiko mo. <sup>14</sup> Na yaka hele, aei Tuhan Yesus Yehuda yohona nane merau Yehuda yohona imam kaliare enaimokonde naei roko mbai Musa a eleiko mo. <sup>15</sup> Melkisedekle wanen imam kaban hibe Allah ranewekera, na yaka yeuboka Allah yae Musale walora wali heere foloukokene imamde mokate naeise ma hi mokouboka. <sup>16</sup> Nda imam kaban naei yobe hakowainye Musale walora wali heere foloukoke huluinye imamde ranaijeke ban, nebeibe Na wali here yae bekore omokoi sului Kiyaebe ranaijeke. <sup>17</sup> Nda imam kaban naeise Allahle homofaene nda a mekai eleukoke,

“Imam Melkisedekle wanen

\* 6:14 6:14 Kejadian 22:17

Weyae imamde yeubonde rimolone yangkone nekwende.”\*

<sup>18</sup> Nebei mekai, bena Musale walora wali heere foloukoke huluinye imamde mokate naei Allah yae wekeunge, rabuhine ban ro miyae u yambine, nebei a hului enekei sului. Nebei are rabuhire omokoiboi. <sup>19</sup> Musale walora wali heere foloukokere hakowainye yae Allahle ro be ro yoinye ro miyae mbai sambai wali himaloiboise omokoiboi sului, nane merau nda hee Allah imam kaban neme raneujeke. Naei walora eyae rabo elae halemale na hului Allah bele mbainye nekemale.

<sup>20</sup> Allah a holo koukoke yae Yesus Wali Ondofolo mbaibe imam kabande raneujeke. Na bena imam holona yo a holo ban mae raneijate. <sup>21</sup> Nebeibe Yesus imam kaban ranenjendere Allah nda a holo yae koukoke, “Reyae a holo kale

nane merau nebei are mahi yae eibukeisi.

Weyae niyae rimolone yangkone nekwende imam.”†

<sup>22</sup> Nebei a holo koukoker Allah are heteungekoke nibi neme ro miyaere wali himalainyeboke yo yae me baemmilere Yesus yae elae mokoungeboka. Nebei nibi neme a na foi sele, Musale walora wali heere foloukoke ara.

<sup>23</sup> Holo kaban sele Musale walora wali heere foloukoke huluinye imamde bewate, rabuhine ban mokowate monda herewate, wali rimolone yangkone enekeikoi. <sup>24</sup> Nebeibe Yesus wali rimolone yangkone nekenenderene, imamde huba ban haei ban mokonende. <sup>25</sup> Nebei aerene Yesus na hului Naei walora Allah bele mbainye nekenate ro miyae nanemene hele hole molommibonde, rabuhine ban Allahle ro be ro yoinye nebei yo aere olemmile naeise Yesus wali rimolone yangkone nekenendere.

<sup>26</sup> Nebei wanen imam kaban na hului aere na hibi-hibi hakommele. Naei u mekai nda wanen nekele: Allah Naei naeise Nare eleuboke wekeunge, Nare a beko ewei sului, u mekai yolo-yolo, me nene u nenere kate ro miyae holone ebaeiboi, nane merau kunsoboi waufoboi ranne ekaikaeyne. <sup>27</sup> Yesus imam hiwa yo wanen ban. Nebei imam holona yo na yane baei obo yoku ha yae nenaiejae naei beko bere faeinyeiboyelera yo kaban naei beko bako faeinyeiboyoumi. Nebeibe Yesus ro miyae beko mokowate aerene Naei uwa kinyeumboka ohaline baikoke yae, roko mbai mo faeinyeumboka me u rimolone yangkone hononende. <sup>28</sup> Musale walora wali heere foloukoke a huluinye elae ban ro yoni-yoni holora imam kabande kaeiboyate nekele. Nebeibe Musale walora wali heere foloukoke a ukeumi hee mon nekwatera Allah Na Kelu imam kabande raneujeke naeise a holo koukoke. Naei wali hiyei raneungebokene, imamde rimolone yangkone mokonende.

## 8

*Allah Are Heteungekoke Nibi Neme Ro Miyaere Wali Himalainyeboka Yo Yae Me Baeyeumi*

<sup>1</sup> Eyae elande a yoni-yoni na no nda niyae, reyae na ranne moloukokale wanen imam kaban bele nekande. Neyae nene waewae bele Allah surgana ekenekele Kiyaele kendan wameran meube reufine nuweuboka ekenekele. <sup>2</sup> Nane merau Neyae surgana ei mom-mom imae na hele kiyae imam kabande ekemokole. Nebei ei mom-mom imae ro miyae yae ainyunuke ban, Tuhan Allah Nenaiejae aungunuke.

<sup>3</sup> Allahre ani era bele obo yoku bele hili era akau erare ongkou felemmile naeise, imam kaban yoni-yoni raneijate. Nebei aerene Yesus ongkou felembonde naei rambunde rowende hele. <sup>4</sup> Nda kani kelane Yesus nekeube ya imamde eyeiboi sului, rabuhine ban Musale walora wali heere foloukoke hului hili era akau era ongkou felei-felei imam holona yo ninae ranaimijeke nekewatene. <sup>5</sup> Nebei imam mokowate ei mom-mom imae surgana ekaisonate ei mom-mom imae na bune wane hamainyeko. Nebei naeise Musa ei mom-mom imae anennunde hee, Allah na bere nda wanen mae Musare ukeunge, “Ware elune keleubokawale imae bune wane hameungekonde heubonde hele.”\* <sup>6</sup> Yesus nda kani kelane imamde omokoi nebeibe surgane mokolene, Naei imamde mokole naei emekai bele bena imam holona yo mokowatera. Allah are heteungekoke nibi neme ro miyaere wali himalainyeboka yo yae me baeyeumi a rande Yesus imamde mokole. Nebei nibi Allah a elaekei sele heteungekoke ranne, Musale walora wali heere foloukoke yae ehameikoi sului.

<sup>7</sup> Musale walora wali heere foloukoke nibi mbai nendo kalo omoloiboinya, roko bee nendore nibi nemere a eheteikoi sului. <sup>8</sup> Nebeibe Yahudi ro miyae naei u mekai kalore hubayeukokene, Naei yendo kayaalo Yeremiale walora Allah nda a elae yae eleukoke,

\* 7:17 7:17 Mazmur 110:4 † 7:21 7:21 Mazmur 110:4 \* 8:5 8:5 Keluaran 25:40

“Ya mbai mensembonde,

Israel yoho bele Yehuda yoho bele<sup>†</sup> nibi neme ro miyaere wali himalainyeboke yo yae me baeremile are heterengkonde.

<sup>9</sup> Naebu naei naeko naei Mesir kanira yaweumibokale maibaleke mewate heena Musale walora wali heere foloukoke nibire a hetewamaele wanen ban, rabuhine ban nebei a heteungekokale huluinye nebei yo enekei nane merau Reyae moi buleumibokale.

<sup>10</sup> Bena ya mendene,

Reyae nda wali himalainyeboke yo yae me baeremile nibi Israel ro miyaere a heteremikonde.

Nebei yo naei u bene wa bene einye Raeinya wali heere foloukokale are haufemile nane merau naei kena u einye nebei a eremolongkonde.

Reyae naei Allahre isebonde,

nebei yo Raei ro miyaere inyaibonde.

<sup>11</sup> Tuhande ronainyebonde naei a usaei wasaei ro miyae mbai nangkele ya-ya wali nibi mbainya orate yore nane merau naka baikere ekelei,

rabuhine ban nebei ro miyae kaban-kaban fele-fele nanemene Rare ronaisebondene.

<sup>12</sup> Nebei ro miyae naei u mekai beko mokatere Reyae faeinyeremile nane merau na beko bako yoni-yni benen Raei u benene enekei.”<sup>‡</sup>

<sup>13</sup> Allah yae nda a heteungekoke ro miyaere wali himalainyeboke yo yae me baemmile nibire “neme” eleuboke yae bena a heteungekoke, Musale walora wali heere foloukoke nibi, male yae mokouneboke. Na heki ban nibi male kiyae nundenate howalenate.

## 9

### *Ongkou Felei-Felei Rambun Male Bele Neme Bele*

<sup>1</sup> Bena Allah a heteungekoke ro miyaere wali himalainyeboke yo yae me baemmile nibi a yae ei mom-mom me u mekai naei, nane merau nda kani kelana ei mom-mom imae ananyununde naei, keleumikoke. <sup>2</sup> Nebei hului yae ei mom-mom imaere haei boke, neinye yowai bee folaikoke. Yowai mbai nendone oro bele isehe boloi boyate mehinene bee rambun bele, Allahre hili era akau era na feu bele nebei feu kolate anuwau bele, honate. Nebei yowai Allahle yolo-yolo anuwau wae rowainye. <sup>3</sup> Yowai bee nendo nebei imae heere naisake malo kaban moinya, Allahle yolo-yolo hele anuwau wae rowainye. <sup>4</sup> Nebei yowai einye o ha folole bele ongkoufe felate anuwau emasra mokai boke bele, emas yae feleuboke Musale walora wali heere foloukoke a na homofae hawaikoke anuwau bele, honote. Nebei are hawaikoke anuwau einye nda rambun honate: kolaei emas nendahina Allah iwoumi raman mana bele, Harunbe mehukun onsi bele, Musale walora wali heere foloukoke are molaikoke ruka yoni-yni bele. <sup>5</sup> Nebei are hawaikoke anuwau walamba rande Allah nene waewae Kiyaele malaikat ma yae cherubim yae rowainye bee hebate. Nebeibe nda hee nebei rambun yoni-ynire meyae na foi yae ehameikoi sului.

<sup>6</sup> Nebei mekai yae nanemene mokainyehakera, na yane baei imam holona yo na kalia mokoiboise nebei imae bene reufina yowai eyeibo meyeibo kate. <sup>7</sup> Nebei imae eise reufinare eyeisise imam kaban mo eyeisiyele, ralo yakama mbai roko mbai sele. Nane merau eyeisiyele kulun na mene obo yoku ha bele Allahre hili era akau era wanen roweyele. Nebei imam kaban na me u beko mokowole bele Israel ro miyae na kobo yae me u beko mokowate bele Allah faeinyeiboi naeise mokoiboyole. <sup>8</sup> Nebei mekai yae Allahle Roh yae kelewoume nebei ei mom-mom imae namman honowole yae ro miyae hosoro Allahle bokore na yolo-yolo hele anuwaufe enate nibi eyakaiboi. <sup>9</sup> Nebei ei mom-mom imae einye me u nda heena nekande ro miyaere isaieibe keleume, hila era akau era yoni-yni bele obo yoku eifolate ongkoufe felayeke bele yae ro miyae beko mokowatera naei kena u yolo-yolo mokoiboise na hului ban. <sup>10</sup> Nebei raman bu ongkoufe feleikoyate bele uware bu kuikoyate era hena na bune-bune bele uwa moi naei era hena mo, eke Allah nibi neme yakabo ke heene.

<sup>11</sup> Nebeibe foi yoni-yni yaeibo ke naei imam kabande yembondere Wali Ondofolo meke heene, ei mom-mom imae neme meukuke. Nebei ei mom-mom imae ro rainyeboke nane merau hiyei raneungeboke, Yahudi naei ei mom-mom imaera, ro miyae me yae omokoiboi nane merau nda kani kelane Allah yae nuleungekoke rambunda mokaibo ke ban. <sup>12</sup> Huba ban haei ban naeise Yesus Wali Ondofolo naei roko mbai sele Allahle yolo-yolo hele yowaise Naei uwana ha bele yae eweufike, obo yoku kambing bele sapi kelo

<sup>†</sup> 8:8 8:8 na mekai Yesus Naei eleuboke wekeumi holona ro miyae nemenera. <sup>‡</sup> 8:12 8:12 Yeremia 31:31-34



bele ha yae ban. Naei uwana ha rileuboke yae ro miyae naei beko mokowatere aheukoke baefoke. <sup>13</sup> Yahudi naei agama huluinye kambing ha bele sapi mukuu ha bele nane merau sapi nafe kelu haneiboyate na ondowai bele yae ro miyae uwa ranne heraeikoyate na hului era hena huluinye niki bele ro miyae uwa moi mo yolo-yolo mokowaimine, <sup>14</sup> emekai bele Allahle kaliare mokomale naeise Yesus Wali Ondofolo hare rileuboke Kiyae Naei a elelere hila rabo halaenne yae aei kena ure faeinyemmele. Allah Hubalo Mandole Roh ukeunge huluinye me beko u beko ban Wali Ondofolo Nauwa hili era akau era wanen mae Allahre ongkou feleungeboke. Aere Allah bele kayee molommebonde naei u bene bekore Wali Ondofolo na hului faeinyemmebonde.

<sup>15</sup> Allah a heteungekoke wali himalainyeboke yo yae me baemmille nibi neme a ranne Allah bele ro miyae bele a elenate naeise, Wali Ondofolo yae walore beumehake Kiyare yeuboke. Allah yae kaenumikoke ro miyae Naei kelu omire a heteungekoke huba ban haei ban honate rambun yoni-yoni enaiyaronde naeise, Allah nebei me u mokouboke. Ro miyae Musale walora wali heere foloukoke are asasi kayeke beko bakore ahengkonde baensonde naeise Yesus hereke.

<sup>16</sup> Eba here kinyeiboyeunge homo rouke kiyae, nebei homore mokouboke ro hereke naei homo kelemmibonde yae mo rambun rowende. <sup>17</sup> Rabuhine ban nebei ma homo mokouboke ro na wali nekendena, nebei homo rabuhire eyeiboi. Nebei ro herende yae wa, nebei homo erabuhi bele yembonde. <sup>18</sup> Nebei aerene ha bele yaere Musale walora wali heere foloukoke a elaere yeuboke. <sup>19</sup> Israel ro miyaere Allah yae ukeunge wali heere foloukoke a nanemene Musa ukeumi heera, sapi kelu ha bele kambing ha bele bu bele yae Musa rouke aleungekoke. Nebeisa domba ma hasai ma bele o ha hysop maensa bele yaroukoke yae nebei homofae bele Israel ro miyae belere nebei ha yae heraeiwoumi. <sup>20</sup> Musa yae weumi, "Allah ro miyaere wali himalainyeboke yo yae me baemmille nibi heteungekoke mare ukembe huluinye nekembe a, nda ha yae nebei are elae mokanele."\* <sup>21</sup> Nebei wanen mbai ei mom-mom imae bele ei mom-mom imae kaliare mokate rambun nanemene ha yae heraeiwoumi. <sup>22</sup> Musale walora wali heere foloukoke hului Allah ro be ro yoinye rambun helen sele holona ha yae yolo-yolo mokoikoyaimi. Nane merau me u beko faeinyeiboise ha yae rilembonde hele, nibi hi u.

<sup>23</sup> Nebei mekainye Allah ukeumi huluinye nda kani kelana rambun Naei ro be ro yoinye yolo-yolo mokonate naeise, nendahina surgana bune wane hamewaimi obo yoku ha yae mokowaimile, nebeibe surgane wali himaloungeboke Ro na ha ya mokoumiboke. <sup>24</sup> Rabuhine ban Wali Ondofolo Allahle ei mom-mom imae hele wanen ro miyae ainyunuke ei mom-mom imaere eweufike ban, nebeibe aei aerere olende naeise surgane eweufike, Allahle ro be ro yoinye ekehebele. <sup>25</sup> Nane merau Wali Ondofolo Nauwa roko mbai mo kinyeungebokera surgane eweufike, Yahudi naei imam kaban mae, na ralone yakamane baei, ro miyae beko mokowatere ahengkonde baensonde naeise, Allahre ei mom-mom imaena Allahle yolo-yolo hele yowaise obo yoku ha yae yarate ate wanen ban. <sup>26</sup> Nebei mekai yae yae nda kani kela mokoubokera Wali Ondofolo roko yae roko yae Nauwa kinyeumimeube beko hubaunge. Nebeibe nda huba mokoikoi yane, Yesus roko mbai kenbe meke beko mokowande faeinyeiboise meufereke. <sup>27</sup> Allah merau raneungehike ro miyae roko mbai sele herende, nebeisa naei walire Allah huluisse emmikolonde wanen, <sup>28</sup> ro miyae helen bolen naei beko bakore kaeuboke naeise Yesus Wali Ondofolo roko mbai Naei uwa kinyeumiboke haiboke. Nane merau Neyae roko bee nendo bennehonde mendene, ro miyae naei beko bako kaeiboise ban, nebeibe ro miyae Nare rakeimeyainye yore hole molommibonde naeise mendere.

## 10

### *Wali Ondofolo Roko Mbai Mo Ro Miyae Aerene Haiboke*

<sup>1</sup> Musale walora wali heere foloukoke a yae Allah are heteungekoke nibi neme ro miyaere wali himalainyeboke yo yae me baeyeuimi are nana ma yae kelewoumi, nebei nibi neme hele ban, u nulu na mokoung rambun keleumi wanen. Nebei aerene Musale walora wali heere foloukoke huluinye ro miyae Allahre eise molonainyelere mate yo na hului ban sele obo yoku na ralone yakamane baei imam walora Allahre ongkoufe felenayende walora naei wali himalonaibonde. <sup>2</sup> Na hului yae, benen ro miyae roko yae roko yae obo yoku yae ongkoufe efelei, rabuhine ban Allahre eise molowainye ro miyae na beko bako roko mbai faeinyeumikokera benen na beko bako mokowatene kena une beko ehubaikoi. <sup>3</sup> Nebeibe obo yoku na ralone yakamane baei ongkoufe feleyate yae mokowoumi ro miyae na u mekai beko u benera namman isaeyeyeuimi. <sup>4</sup> Rabuhine ban sapi mukuu bele kambing bele naei ha yae ro miyae naei beko mokowatere faeinyeiboise

\* 9:20 9:20 Keluaran 24:8

na hului ban sele. <sup>5</sup> Nebei aerene Yesus Wali Ondofolo nda kani kelare meke hee, Ondofolo kaban Daud moloukoke wanen Yesus yae Allahre weunge, "Allah Ware obo yoku bele ani era bele ongekoufe felaeimekete nane merau hili era akau era iwayete Weyae kenare okoi, nebeibe hili era akau era wanen Raei uwa Weyae mokoungihakae kinyerebonde naeise kena koyae.

<sup>6</sup> Ro miyae naei beko mokowate faeinyeiboi naeise obo yoku yae Ware ongekoufe feleikoyate nane merau hili era akau ere iwayete, Waei kena foise omokoi.

<sup>7</sup> Nebeisa Reyae elale, 'Allah ereisebo, Raei uwa Waei homofaene molaikoke huluinye Reyae Waei kenare koyae huluinye mokorele naeise mekale.' <sup>\*</sup>

<sup>8</sup> Na ranne moloukoke a hului Wali Ondofolo yae Allahre eleukoke, "Ro miyae naei beko mokowaterere faeinyeiboi naeise Ware obo yoku ongekou wae feleikoyaterere nane merau hili era akau era iwayetere Weyae kena okoi nane merau Waei kena foise omokoiboi." (Naendae wanen hororebe Musale walora wali heere foloukokera nebei me u mokonate hele.) <sup>9</sup> Nebeisa Yesus eleukoke, "Ereisebo, Waei kena koyae hului mokorele naeise mewale." Nebeinye, bena Allah yae Musale walora wali heere foloukoke horouboke, nebeisa wali nibi neme yae auboke. <sup>10</sup> Yesus Wali Ondofolo Allah kenare kowole huluinye Naei uwa kinyeuboke hereke. Nebei me u roko mbai mo mokouboke walora eyae Naei a elelere hila rabo halaenne ro miyaere Allah me baemmyende, Naei kena foise mokomande yobe nekande.

<sup>11</sup> Yahudi agama naei imam yoni-yoni na yane baei naei kalia mokoyate, roko yae roko yae obo yoku yae Allahre ongekoufe feleyainye, nebeibe beko mokowaterere mbai sambai efaeinyeiboi sului. <sup>12</sup> Nebeibe Yesus Wali Ondofolo ro miyae naei beko mokowate aerene roko mbai, obo yoku ongekoufe felewate wanende, Naei uwa yae Allahre kinyeungebokera Allahle meube reufine ekenekele. <sup>13</sup> Nebei heera Yesus Wali Ondofolo na yokeiji yoni-yoni Allah mokommibonde naei oro kelee me keleene menayorulembonde yabe rakeimeyele. <sup>14</sup> Rabuhine ban roko mbainya uwa kinyeungeboke yae Allah yae huba ban haei ban Wali Ondofolo Naei a elelere hila rabo halaeinye ro miyaere Allahle u mekai wanen nekate yo yae me baemmyende.

<sup>15</sup> Nane merau nebei naei Allahle homofaene Allahlena Roh yae aere a isaeyumeboke. Nda mekai yae eleukoke:

<sup>16</sup> "Bena ya mendene Reyae nda a heteremikonde.

Bena ya mendene Raeinya wali heere foloukokale ro miyae naei kena u einye haufemile nane merau naei u bene wa bene einye eremolongkonde."<sup>†</sup>

<sup>17</sup> Nebeisa baraungeboke eleukoke,

"Na beko na bune-bune mokowaterere

Raei u benera ensenundengkonde."<sup>‡</sup>

<sup>18</sup> Nebei beko yoni-yonire faeinyeubokamale benen nebei naeise obo yoku yae ongekoufe efelei.

<sup>19-20</sup> Nebeinya aka naei baeke naei, Yahudi naei Allahre ei mom-mom imaene yowai heere naisake malo kaban wanen Yesusle uwa yeuboke. Naei ha rileuboke yae nebei malo wekeunge nane merau wali bele nibi nemere yeuboke. Yesusle walora aere waeumehike Allahle bokore yolo-yolo hele anuwaufe na hului be rabulemabonde emambonde. <sup>21</sup> Nane merau Allahle imae ei obe eise Yesus aei imam kaban mae me u eke mokole. <sup>22</sup> Nebei aerene men, nda u mekai ma yae Allah bele mbainye nekemale: na hele Allahle naeise kena kande yae, Wali Ondofolo Naei a elelere na hele hila rabo halaennele yae, kena u yolo-yolo bele nekemale yae. Nda nibi yae aei kena u yolo-yolo mokomande. Aei beko mokowande faeinyembondere nibi mbai mokombonde naeise Yesus Na ha yae rileuboke na hele elandene, nulu kemmebonde. Na hele nulu keumebokere kelemamile naeise bu konaimebonde. <sup>23</sup> Men, rabo elae halemande Wali Ondofolo Naei a elelere hila rabo halaeinye ro miyaere Allah yae wali himalainyeboke yo yae me baeumi, rabuhine ban Allah are nuleungeboke huluinye mokole. <sup>24</sup> Nane merau men, uwa nou hemambon, rahe nibi yae hi yae hire moi hurennele kena buhae u buhae yae hemamile nane merau u mekai foi yoni-yoni yae mokomale. <sup>25</sup> Aei u nolo u kainya hiwa yo yae ki baeiboke Allahre ei mom-mom imaera moise kainyehike nekayate u mekai wanen okojiae, nebeibe eyae na hibi-hibi homo mbai a mbainye oromande, rabuhine ban eyae aesaai Tuhan mende ya nobeungekokene.

<sup>\*</sup> 10:7 10:7 Mazmur 40:6-8    <sup>†</sup> 10:16 10:16 Yeremia 31:33    <sup>‡</sup> 10:17 10:17 Yeremia 31:34

<sup>26</sup> Eyae isaeyaendeboke Wali Ondofolo aei beko mokowandere faeinyemmebondere nibi mbai mokombonde naeise hereke, nane merau Allah yae Naei a elelere hila rabo halaeinye ro miyae wali himalainyeboke yo yae me baemmele. Nebeibe mehawuae na hibi-hibi u mekai beko mokomalena, nebei beko mokomale faeinyeiboi naei hili era akau era hi u. <sup>27</sup> Nebei wali ma nekandena, buhae yae hokommele rakemale Allah me nommeyondera Naei yokeijo bele italo naumene hukelenaimekonde. <sup>28</sup> Ro miyae mbai Musale walora wali heere foloukokere asasi koikoyelena, ro miyae bee name yae ijoko hiloiboyainyene kena buhae ban mae hoiboyate. <sup>29</sup> Allahle Kelure oro yae hayaeikoke ro miyae beko emekai bele mokowate. Yesus Na ha rileubokene Allah yae nebei ro miyaere Naei u mekai wanan nekate yo yae me baeumiboke Naei a heteungekoke huluinye, nebeibe nebei ro miyae Yesusle hare rabuhi ban mae me baete. Nane merau nebei ro miyae yae Allahle Roh nare kena buhae aere ban mae hewoumi Kiyaele me u foi naeise a beko huwoumi. Nebei u mekai ma ro miyaere Allah ehee bukulu na beko hele yun ran kaembabei ranne emmihayende. <sup>30</sup> Eyae aeisaei Allah nda are eleukoke Kiyae: “Reyae ro miyae na me u huluinye ehee bukulu eremibensonde Kiyae, mokorebonde hele.”<sup>§</sup> Nane merau Neyae eleukoke: “Tuhan Naei holona ro miyae naei walire hului emmikolonde.”\*

<sup>31</sup> U nene hele wali bele Allah yae ehee bukulu hainyemilere enainyehubande.

<sup>32</sup> U bene nekayengko, na bere mai nolone hehe naeukoke wanan mayae Wali Ondofololena a foi faeu foise boraukoke. Nebei heene mayae beko hubawaunge hororebe Wali Ondofolo elele a huluinye na hibi nekewaube. <sup>33</sup> Roko hi ro miyae hosoro naei bene mai naeise a beko huwaimi nane merau weitasi kowayembe. Roko hiwa ro miyae hiwa mai beko hubawaunge wanan mbai hubawainye yore hakowaumi nangele orowaube. <sup>34</sup> Kawane ekaisebate yo yae kena beko hubainye ma mbai mayae hubawaunge. Nane merau mai rambun yoni-yoni yo hiwa yarowatererebe mai kena rei mai yae nekewaube, rabuhine ban mayae maisaei Wali Ondofolole einye foi bele huba ban haei ban nononende rambun bele mai naeibe honayembene.

<sup>35</sup> Nebei aereene mayae na hibi-hibi rabo elae halemembe Allah nuleungeboko a huluinye mokole, rabuhine ban nebei wali ma yae mai roibu kaban yarongkombe. <sup>36</sup> Allah kena kole hului mokongkombera Naei are heteungekoke foi yoni-yoni enjarombe naeise, mai kenane herawemembe Wali Ondofolo wembe a huluinye mokomembe. <sup>37</sup> Rabuhine ban Allahle homofaene nda wanan molaikoke:

“Allah yae eleukoke, ‘Mendere rakaunge Kiyae na heki ban mende. Naei mende ya moise yae oyoboi.

<sup>38</sup> Nebeibe wali himalainyeboke yo yae Reyae me baele ro miyae

Raei a elalere hila rabo halenate nekenate.

Nebei ro miyae moi kenehindena,

nebei kiyae Raei kena foise omokoiboi.’”<sup>†</sup>

<sup>39</sup> Nebeibe eyae moise yae kemansinde Allahle bele emawahende yo ban. Nebeibe eyae Wali Ondofolo Naei a elelere hila rabo halaennele ro miyae, wali hena bona u mekai hubannele yo.

## 11

### *Allah Naei A Elelere Hila Rabo Halewainye Ro Miyae Na Wali Ma*

<sup>1</sup> Rahebe “hila rabore” elande? Nda miyae: eyae kena elae hubanne rambun hila rabo halaenne hului enaibende hele nane merau nda hee yae eyae ereiboi rambun na hele honate. <sup>2</sup> Nebei hila rabo mane nendahina nekewate ro miyaere Allah ro bele ro yae me baeumiboke.

<sup>3</sup> Allah a elewolere hila rabo halaenne walora eyae aeisaei nda kani kela Allah a eleukoke yae yaeiboke, na mekai rambun nanemene erande yoni-yoni ereiboi rambunda mokouboko.

<sup>4</sup> Nendahina nekewate ro miyae naei hila rabore eremabondere. Allah Naei a elewolere hila rabo halewoungue walora Habel hili era akau era na foi sele kayeerober Allahre kinyeungeboko, naka baeke Kain mae kinyeungebokera. Nebei aereene Allah yae Habel naei hili era akau era naeise huwole heene, nare wali himaloungeboko ro yae me baewoungue. Habel hereke hororebe, a namman elele. Rabuhine ban Allah Naei a elelere hila rabo halemande nibire namman keleimeyemene.

<sup>5</sup> Henokh Allah Naei a elewolere hila rabo halewoungue walora Allah yae nare rouke, here neyae ehubasi. Nebeinye ro miyae hiwa baewainye nebeibe nare ehubaikoi, rabuhine ban Allah yae nare kaeubokene. Namman ekaeiboi yae Allah Henokhle naeise

nda a eleuko, “Na wali Raei kena foise mokoufe.” <sup>6</sup> Allah Naei a elelere hila rabo ehaleinya, ro miyae hi yae ha yae Allahre kena foise omokoiboi sului. Rabuhine ban ro miyae nde Allah bele mbainye nekenete kiyae nda naeise hila rabo halende hele: Allah nekele, nane merau ro miyae Nare baeyainye holonare foi emmiyende.

<sup>7</sup> Nuh Allah Naei a elewolere hila rabo halewoung walora ijoko yae ereiboi hambun Allah yae keleungebokene ei haweunge bele. Naei imae einye ro miyae halewe molommibonde naeise Nuh kai kaban sele mokoungehake. Neyae Allah Naei a elewolere hila rabo halewoung walora nebei kani kelana wali nibi bekone orowate ro miyaere me nokeumi. Nuh Allah Naei a elewolere hila rabo halewoung walora Allah nare wali himaloungeboke ro yae me baeuboke.

<sup>8</sup> Abraham Allah Naei a elewolere hila rabo halewoung walora Allah a ukeungere hakouboke. Allah kaeneungekoke nekwole yora enduwende, Abraham nane merau orona menare Allah yae yennele kanire endere. Naenda mekai horore ende anuwau naeisaei banbe, neyae kulunde mo uke ewole. <sup>9</sup> Allah Naei a elewolere hila rabo halewoung walora Allah are heteungekoke kani kelane kolo ro wanen mae Abraham ekenekewole. Neyae naei orona mena Ishakle Yakoble bele nebei a heteungekoke emmikinyembonde kanine fale heuboke nekwate. <sup>10</sup> Rabuhine ban Allah yae meraufe raungehike rukara aehure hembonde kusei mahei ban yo yande Abraham rakewolene.

<sup>11</sup> Allah Naei a elewolere hila rabo halewoung walora naenda mekai horo Abraham rorele yeuboke nane merau Sara kihobe, fa honoke, rabuhine ban Abraham na hele yae eleuko Allah are heteungekoke Kiyae na hului mokombonde. <sup>12</sup> Nebei aerene rorelene kelu omi nuleiboise na hului ban elewatebe, nebeibe ro mbaisa yoho kaban heraeyuboke. Na helen yakuna findelau helen nen buhaeinya ifau helen nen mere ebaeikoi sului.

<sup>13</sup> Allah Naei a elewolere hila rabo halewoung yae nebei ro miyae nanemene Allah are heteungekoke rambun yoni-yonire eyaroikoi yae heraboke, nebeibe naei hila rabo huluiyere erewaimi, ahaufa ei hauwaimi. Nebei yo wo kowate ele moinye kolo ro miyae yae nda kani kelane mekainyekate. <sup>14</sup> Nebei mekai a faeufe elate ro miyae kelaemi yo yan kani kela naeinya hele mare baimeyate. <sup>15</sup> Yo yan kani kela nekewatera nukaiboke u benebe enekei, rabuhine ban mon helen sele lonbe na yo yan nukaibokere baeiboube ate. <sup>16</sup> Nebeibe nebei ro miyae kena haehae hele yo yan mbai naei foi sele kiyae, surgana yo foi yan foi niyae. Naei elewole are hakowainyene, nebei ro miyae naei Allah yae enaineronde naeise Allah fe okoi. Nda holonare Allah yo foi yan foi mbai mokoungehake.

<sup>17</sup> Allah Naei a elewolere hila rabo halewoung walora Allah umali hubaungehike heene Abraham kena ure mokoungehake naei kelu Ishakre obo yoku ma yae Allahre onkoufe felennebonde. Allah yae Abrahamde a heteungekoke naei orona mena yae helen benayendebe, nebeibe Abraham rilibo ban mae na kelu mbai kende kinyennebonde, <sup>18</sup> erabae Allah yae Abrahamde a ukeunge, “Nda Ishaklera weyae na hului are heteukokawale orona mena yo kaban yan kaban eufoleufinde.” <sup>19</sup> Abraham u bene nekewainye, Allah elae wake bele Kiyae na hului herewate ro miyaere amminunde. Na hele Abraham mae herewate yo naei u nolo u kaisa wanen Ishakre benen rouke.

<sup>20</sup> Allah Naei a elewolere hila rabo halewoung walora Ishak Allahre riyeungehike Yakuble Esaube na wali eneinyekende heene foi yoni-yoni yae ei hawemmiyende.

<sup>21</sup> Allah Naei a elewolere hila rabo halewoung walora Jakob herendere nobeungekoke hee yae Allahre riyeungehike Yusufle kelu wa beere foi helen ei hawemmiyende, nane merau afae aunguke o mehukunne barauboke yae Allahre ei molowoung.

<sup>22</sup> Allah Naei a elewolere hila rabo halewoung walora Yusuf na wali huba mokoikoi ya nobeungekoke yae, Israel ro miyae Mesir kanira enabalende naei a isaeyemiboke, nane merau Yusuf na bo roungayende naei a usaei ukeumi.

<sup>23</sup> Allah Naei a elewolere hila rabo haleweinye walora Musa hongkatera na heki oko name naekole nenakele nunne herawaiiboke nekeukoke, rabuhine ban nebei fa kin foi hamai foi erewainyene nane merau hokolo bee Mesir kanina ondofolole are asasi koneikondere buhae ohokoi.

<sup>24</sup> Allah Naei a elewolere hila rabo halewoung walora Musa holaeisike kaban yeubokera, nare Ondofolo Firaunde maengkele fa yae ro melaeyenainyelere ahi hele elewole. <sup>25</sup> Wali kuikui maemae hena bona ban beko yae feleumiboke hubawainyere ahi eleuko, nebeibe mehauwae Allah mere mokoumi holona yo bele nanembainye beko nangkele hubawainyele. <sup>26</sup> Musa hubawoung, “Naei foi sele Allah yae are heteungekoke Wali Ondofolole aerene weitasi kaisele, Mesir kanina eba he kinyaiselera,” rabuhine ban Musa bena yana roibu enneyendere rabo elae halewoungene. <sup>27</sup> Allah Naei a

elewolere hila rabo halewounge walora ondofole ikele han kondere buhae hokoiboi ban Mesir kanira Musa kulun uke ewole. Na kenabe heraweweke Allah uwounge are hakowounge, rabuhine ban na kena une Allah ijoko yae ereiboi Kiyaere erewoungene. <sup>28</sup> Allah Naei a elewolere hila rabo halewounge walora Musa Paskah ya kaban mbai nendo me nuleuboke, here malaikat mende hee Israel naei bena kelu fa-fare hongkonde belene, Musa yae Israel ro miyaere ukeumi domba folonate na ha naei imae romau buma reufine hobenate.

<sup>29</sup> Allah Naei a elewolere hila rabo halewainye walora Israel ro miyae Kolsum bu wewe koumikoke, kani randa alainyekoke reufine na hului faimaebokene. Nebeibe Mesir ro miyae reufire fonaimaembondere fowate yae, bu yae eumifelebokene heraiboke.

<sup>30</sup> Allah Naei a elewolere hila rabo halewainye walora Israel ro miyae Yerikho yore yanewainye, ruka fena naiboke ya mehine bee bele yanainyekokera kereufoke oke.

<sup>31</sup> Allah Naei a elewolere hila rabo halewounge walora uwa naisse heweke maengke na ro Rehab na yona Allah uwoumi are oboroiboi ro miyae hiwa bele nanembainye ohoikoi, rabuhine ban Israel naei ijoko-ijoko Yerikho yore mekayerewate yore ei foi sele yae aumibokene.

<sup>32</sup> Reyae na hului a na hibi-hibi huwerele nebeibe reyae mon ban mae hubanale. Gidion, Barak, Simson, Yefta, Daud, Semuel, nane merau Allahle yenjo kayaayo, nebei yo naei ahubabe reyae namman ehuweikoi. <sup>33</sup> Allah Naei a elewolere hila rabo halewainye walora nebei ro miyae nda me u mokowate: Neyae yo kaban yan kaban faiseraweukoke, me u na ijen mokowaimi, Allah yae are heteungekokere yaraikoke yae hubawainye, singa euwa muluwaimi, <sup>34</sup> i naume elae habaimiboke, ramiyaeli faeufe hole moloumiboke, naei uwa male yambira elae bele yaeiboke, kani hiwa bele buloo fela relewainye heene elae bele yaeiboke nane merau be rabuleumiboke na yokeijo na felayore here ware molaimiboke, <sup>35</sup> nake miyae yoni-yni naei aka baeke buhaere hewaimi yo heraibokera waleumibokene benen maisubayekoke. Bena yane amminundera wali naei foi sele kayeerore enaiyaronde naeise, ro miyae hiwa Allahre onaeinye a yae elenaikondene hainyainyekondere ahi elewate, nebeibe waeimihike weitasi konaimilere. <sup>36</sup> Nebei ro miyae hiware a kaban mae aukaka kowaimi, erahuae olewaimi, ha yae wowo kowaimira kawane ahewaimi. <sup>37</sup> Nebei ro miyae hiwa ruka yae hekelewaimine heraiboke, gergaji yae folowate fo bee bee, ramiyaeli yae kuinyawate herewate. Hiwa yo hun ban wai ban, domba bele kambing bele wa yae malore hiraiiboke, u mekai beko hubawainye, weitasi kowaimi. <sup>38</sup> Allahle ro be ro yoinye nda kani kelana wali beko nibine orate ro miyae na yeisi raeiboi ana hele nebei ro miyaera. Neyae a kala-kalane bele elune yoinye bele yanewate, nane merau ruka bulune bele kani bulune bele nekewate.

<sup>39</sup> Nebei ro miyae Allah Naei a elewolere hila rabo halewainyene Allah yae naei naeise a foi elewole hororebe, hi yae ha yae Allah are heteungekoke rambun orawei. <sup>40</sup> Nebei holona bele aengkele naei walire alonainyehande naeise, aei naei wali haraiiboise rambun yoni-yni na foi sele Allah merau raungehike (wali nibi, imam kaban, rambun hiwa bele).

## 12

### *Allahlera Wali Hiyei Raneumi Naei A*

<sup>1</sup> Allah Naei a elewolere hila rabo halewainye ro miyae helen yanaimekoke ijoko isa eraime aerene, men, aere oro halunde hayeyeume rambun bele u mekai beko yoni-yni mokoimeyande bele aei uwane aeimefoke rambun nanemene rubomambon. Holoka kate ro miyae no ban hee ban habelaete wanen mae, eyae kena heraumale yae Wali Ondofolo a weume huluinye mokomabon. <sup>2</sup> Aei ijokobe Yesusre yae eremande, Naei bune wane hamemande. Neyae Allah Naei a elewolere hila rabo halemande yae nekemale naeise kelewoume nane merau na hibi-hibi kelemmele. Neyae Naeisaei Allahle bokore rei mai yae nekenenderene, kena herauboke yae ohaline baikoke, fere koi-koi here ma. Ohaline baikoke u buhae hubawoungene, rilibo ban mae hereke, nebeisa Allahle kendan wameran meube reufine ekenekele. <sup>3</sup> Mai hila rabo elae ban yembombe bele, nane merau kena u wauwau enjembombe bele, mayae Yesusre yae u bene nekenayembe. Beko mokowate yo yae Nare me beko u beko mokowainyebene, nebeibe kena heraweubokene Allah uwoungene ane hakouboke. <sup>4</sup> U mekai beko aefoyombene relewaunge kulunne roko mbai mai ha erileiboi. <sup>5</sup> Allahle homofae aei kena rowemmehinde a mayae Allah Naei kelu omi yae ukembere u benera nundenengkombe bele, "Kelu naei omi naei,

mai be elae u elae huluinye Tuhan mai walire hiyei ranenembombe me u moko-nengkombere

rabuhi ban eleijae!

Nane merau Neyae a usaei wasaei elae ungembene, kena beko okojae!

<sup>6</sup> Rabuhine ban Tuhan buhaere heyeyumi ro miyaere wali hiyei ranemmibonde me u yae mokoyeyumi nane merau Naei kelu omi yae me baeyele ro miyaere ako nake wanen ehee bukulu eijewoumi.”\*

<sup>7</sup> Beko hubannelena, Allah mai walire hiyeibe ranembe yae erennele, Allah Naei kelu omi wanenne mare mokombe. Kelu omi nemene na walire ako yae hiyei raneyaimi.

<sup>8</sup> Ro miyae nemene na be elae u elae huluinye na wali hiyei ranenaimibonde me ure hubainye. Allah nebei u mekai wa mekai ma mare omokoinya, mayae Naei kelu omi ban nebeibe kai fa-fabe nekaube. <sup>9</sup> Bararembonde naei, nda kani kelana ako aei walire hiyei raneyaima hororebe, eyae ei hawammine, emekai bele Ako Allah aei kena ure holele Kiyae Naei weume are hakomale hele. Nebei wali ma nekemalena, wali hena bona u mekai hubamande. <sup>10</sup> Mon na heki ban aei kani kelana ako na kena foi yae hubainye yae aei walire hiyei meiraneikoyaima. Eyae na hului Naei wanen u mekai yolo-yolo yae emanekende naeise, Allah aei foi naeise aei walire hiyei meiraneikoyoume. <sup>11</sup> Ro miyae hiwa aei wali mare hiyei ranenaimelene kena foise ehubaisi, kena une buhae komale eimokowaime. Nebeibe mon bele emarowende mo, eyae walire hiyei ranaimboke ro miyaere wali himalainyeboke yo yae erenaimela nane merau rei mai komale.

<sup>12</sup> Nebei aerene orore habelaete yo na hibi-hibi oro habelaetene oro i me i elae yarete wanen mae, relennembe Wali Ondofolo Naei a elelere hila rabo elae bele halemembe.

<sup>13</sup> Mai nolona orore rebate ro miyae oro beko hele inyaibonde bele nebeibe onomi yaronate naeise, mai oro nibi hiyei ranembo wanen Wali Ondofolo wembe a huluinye nekembe. Nebei na mekai, mai jemaat nolone hila rabo yambi ro miyae Wali Ondofolole wali nibine enaleisi ebalei nebeibe elae bele benate naeise, mai walire Wali Ondofolo wembe a hului yae hiyei ranembo.

<sup>14</sup> Ro miyae nanemene mangkele rei mai yae nekembe naeise, nane merau u mekai yolo-yolore uwa haranembe naeise, elae relennembe. Nebei u mekai ban ro miyae Tuhande ijoko eyereiboi sului. <sup>15</sup> Maise naeise uwa kayaa bele hebembe mai nolona nda me u keli yembonde bele: mbai nendo, ro miyae Allah kena buhae aere ban mae hembene naeise ehubaikoi; bee nendo, ro miyae mbai mai u nolo u kainye kena u ikele bele yae ro miyae helende mokommibonde aku hombe nane merau Allahre ei ehawe yae nekenate; <sup>16</sup> name nendo, ro miyae hiwa yoko kaeimae konate; keli nendo, nendahina nekewole ro Esau Allahre ei ehawe kiyae wali ma wanen nekembe bele. Neyae kelu bona kiyae yae rowende foi yoni-yoni raman hote mbai aerene naei uwakere kinyeungeboke. <sup>17</sup> Mayae maisaei, naeko herendere kowole hee yae Esau kena koukoke nebei rambun foi yoni-yoni naekolera rowendere meke hee, na hului ban mae ukeunge. Na beko mokoubokere foi mokoiboise rime yae a yae kowole hirewole hororebe, naeko u bene ma hire eyeiboi, nebei rambun eyei.

<sup>18</sup> Mayae huba raweuboke Allah ro miyaere wali himalainyeboke yo yae me baeyeyumi nibi neme huluinye nekewaube hee, Israel ro miyaere Allah yae Musale walora wali heere foloukokere yemmile elure mayae emei. Nebei elu ro miyae na hului me ramewainye. Nebei heene nebei elu ijawi-jawi bewolera, ouben kika bewole, alu bondilin rawole, <sup>19</sup> me bae hayeiboi ma amin waku wanen rambun kulun raneuboke. A mbai elae hele eleukokene, borowate yo ri-ti riwainye benen nebei a mare eleijae, <sup>20</sup> rabuhine ban nebei a ukeumire buhae hele hokoumbokene. Nda a mekai yae ukeumi, “Nda elune obo yoku, ro miyae, uwa baranaibonde yo nanemene ruka yae hainyaimikonde hele.”† <sup>21</sup> Nane merau Israel ro miyae erewate yoni-yoni u nenere koi-koi mane Musa yae elele, “Reyae buhae hele hokoufebokene oro me kulu wai roukale kale.”‡

<sup>22</sup> Nebeibe mayae nda anuwau mare mekaube: Sion elu, surgana Yerusalem yo, wali bele Allahle yo yan, malaikat helen bolen hokoumeke rei mai kate anuwau, <sup>23</sup> Allahle bona Fa Naei jemaat na holona ro miyae, naei ro surgana aimoloukoke yo bokore. Allah ro miyae nemene naei walire hului kolommikonde Kiyaele bokore nane merau nendahina wali himalainyeboke ro miyae nda hee naei unullure hiyei raneumiboke yo hokoumeke bokore mekaube. <sup>24</sup> Nane merau Yesusle bokore nane merau na ribleuboke hare mekaube. Yesus Allahle ro be ro yoinye ro miyae aere oleyeyumi, Allah are

\* 12:6 12:6 Amsal 3:11-12 † 12:20 12:20 Keluaran 19:12-13 ‡ 12:21 12:21 Ulangan 9:19

heteungekoke ro miyaere wali himalainyeboke yo yae me baeyeumi nibi neme a huluinye. Nendahina Kain naubake Habel houboke. Yesusle ha rileuboke na foi sele Habelra, rabuhine ban Yesus ha rileuboke yae Allahle ro miyaere wali himalainyeboke yo yae me baeyeumi nibi nemere elae mokoungeboke, nebeibe Habelle rileuboke ha yae mokoumbiboke ro miyae Kainde honaibondere.

<sup>25</sup> Bene foi yae nekenayembe, Allah mare are wembe Kiyaeere moi ebuleijae. Rabuhine ban Allah nda kani kelane are uwoumi Kiyaeere moi bulainyeboke ro miyae me noumiyokene, emekai bele aere Allah surgara weume Kiyaele a oboroyei moi yae bulemande yore me nommeyonde. <sup>26</sup> Allah nda kani kelane are eleukoke hee, Naei euwana a yae nda kani kela kuseungekoke. Nebeibe Allahle homofaene nda hee naeise Neyaa a heteungekoke, "Benen roko mbai nda kani kela mo kuserengkonde ban nebeibe surga bele." § <sup>27</sup> "Roko mbai" a mekai haraungeboke, nuleuboke na elae ban yoni-yoni nanemene wennende, ekuseikoi kiyaebe hononende.

<sup>28</sup> Eyae hubamande naeise Allah yae ekuseikoi emaeheikoi yo neme yan nemere mokoungihakene, men, Allahre helen foi umanende nane merau na mekai yae Nare ei hawannele bele euwa kaeu-kaeu mo kaeumale yae ei molomande, <sup>29</sup> rabuhine ban "aei Allah i faeu-faeube nekele, beko yoni-yonire faeinyele."\*

## 13

### *Huba Mokoikoi A Usaei*

<sup>1</sup> Maise naeise ako nake mbainya aka baeke wanen mae mai kena buhae haeube hole molonnele. <sup>2</sup> Kolo ro miyae mai imaere menate yo ei hawemmile naeise u benera enundeijae hele, rabuhine ban nebei u mekai ma mokaibokere ro miyae hiwa onaeikoke naei imaene malaikatbe ei hauwaimi. <sup>3</sup> Kawane ekaisebate ro miyae u bene nekenayembe, mangkele kawane hebaube wanen mae hubaungele. Nane merau weitasise kaimi ro miyaere u bene nekenayembe, mauware nebei weitasi kayembe ma yae hubaungele.

<sup>4</sup> Mai nolone ro bele miyae bele mokaimiboke mbainye yaeiboke naei hubara haeisa yanennele nane merau ro bele miyae bele mbainye honote naeise Allah kena kole yae erennembe, rabuhine ban ro miyae bele miyae ro bele mbainye hononate yo, nane merau yoko kaeimae kate yo bele Allah yae me nommiyonde. <sup>5</sup> Roi naei yebaei bubaeise mayae ebeijae hele. Honayembe hului yae mai kena molonnebombe nekembe, rabuhine ban Allah nda a eleukoke,

"Reyae ware eiwaeisi

nane merau Reyae ware einyukeiboi sele."\*

<sup>6</sup> Nebei aere ne eyae be yae rabulemabonde elemale,

"Allah Niyae raei hakoiboi Rone,

reyae fe efaei.

Ro miyae rare me beko u beko omokoi sului!"†

<sup>7</sup> Mai be yun be yebae, Allahle ako faeukore mare huwayembe yore, u benene nekenayembe. Na wali nekwate ma bele herewate ma bele nou hembe, nane merau na hila rabo halewate ma bure ware hamennembe. <sup>8</sup> Yesus Wali Ondofolo mahire eyeiboi nekele, wena, mana, nane merau huba haei ban.

<sup>9</sup> Raman naeise a usaei mahi-mahi kelaeyembere mare Wali Ondofolole wali nibire onengkombe naeise ewaeisijae. Naei foi sele Wali Ondofolo kena buhae aere ban hembe Kiyae Naei a elele yae mai kena u hara roronembe, era henana ramande anembe a yae ban. Era hena huluinye raman anate ro miyae naei uware rabuhi ban sele. <sup>10</sup> Nendahina Musale walora wali heere foloukoke a hului u mekai beko faeinyeiboise Allahre ei mommom imaere ro miyae yae obo yoku yaraikokate mate. Nebeinya imam itukai ranne ongekoufe feleiboyatera, nebeinya ro miyae na melenda anaikoke. Obo yoku ro miyae na beko bako faeinyeiboise haiboke wanen mae Yesus ro miyae na beko bako aere ne haiboke. Yesus Naei kaliare mokate ro miyae bele na bere imam yoni-yoni bele nena ei nena ei ma. Yesus na kaliare mokate ro miyae nebei haiboke Kiyaeere aneikoi sului.

<sup>11</sup> Musale walora wali heere foloukoke a huluinye ralo yakama mbai roko mbai imam kaban mae obo yoku mbai hili era akau erare onkou wae feleyate. Ro miyae u mekai beko faeinyembondere nebei obo yoku na ha hila era akau era yae Allahle yolo-yolo hele yowaise roweyle. Nebeisa obo yoku uwa bangkare mo yo moinye i yae beikoyate. <sup>12</sup> Nebei mekai mbai Naei ha rileuboke yae mokommibonde ro miyae Allahre

ei hauwainyele naeise, Yesus beko hubawoungwe. Ro miyaere wali himalainyeboke yo yae me baeyeumi nibi neme mokombonderene Yesus yo moinye haiboke, Yahudi era hena huluinye Allahre ongekoufe felembondere obo yoku folate nibi yae ban. <sup>13</sup> Nebei aerene men, eyae yo moise emabalende wanen Musale walora wali heere foloukoke a huluinye hakoimeyannere nukemambon, Yesusre aukaka kowainye ma nanembainye aengkele aukaka enaimekonde. <sup>14</sup> Rabuhine ban nda kani kelane eyae na hibi mo nekemande yo yan ban, nebeibe Allah mokoungwehake yo foi yan foi menyembonde kayeerobe eyae baimeyande.

<sup>15</sup> Nebeinye na bere Allahre ei molonainyele naeise, Yahudi ro miyae obo yoku ongekou wae felewainye. Yesusle walora Allahre ongekoufe felemande wanen mae ro miyae naei bene aei euwara bele yae Allahle ro bumane kolomande. <sup>16</sup> Me u foi mokoi-mokoise nane merau yei wahei wali eisako meisako naeise mayae u benera nundenengkombe bele. Nebei me u mokande yae aei obo yoku yae ongekoufe felemande wanen Allahre kena foise mokomande.

<sup>17</sup> Mai be yun be yebae naei a borommiyembe, ungayembe huluinye mokombe, rabuhine ban nebei ro miyae mare kayaa hebayembe naeise Allahle bene wo enaikongkonde hele. Na kalia kena beko u beko yae ban nebeibe kena rei mai yae, nebei kalia mokonate naeise ungayembe huluinye mokombe, rabuhine ban nebei kalia kena beko yae mokonatena, mare foise omokoiboi sului.

<sup>18</sup> Maei naei bele ebeli bonnembe. Maei kena u na yolo-yolo hele yae hubamande, nane merau maei me u nemene mokandere bere hineyaima wali mare nekemalere kena kaban kande. <sup>19</sup> Raei u mbai naeise mare riyamale, reyae hasale holo mai bokore bukensehinde erele naeise Allahre ebeli bonnele.

<sup>20</sup> Aei Tuhan Yesus Naei ha rileuboke yae mo, Allah are heteungekoke huba ban haei ban wali himalainyeboke yo yae me baeyeumi nibi neme elae mokouboke. Naei ha rileubokene Allah Yesusre nulu yo mahe yora aungenuke nane merau jemaat yoni-yoni naei be yun be yebaere ranuejeke. Reyae Allah rei maise yeumi Kiyaere ebeli banale, <sup>21</sup> Naei kenare kolere mokonnele naeise, foi bele meli mekai mare kitenembombe. Nane merau reyae ebeli banale, Yesus Wali Ondofolole walora Allah kenare kole ma aei kena u einye mokommekonde. Wali Ondofolo mbaibe huba ban haei ban hili hebenainyele. Amin.

<sup>22</sup> Aka naei baeke naei, nda homo koko hele ban, nebeibe reyae riyamale kena na hebaen-sebaen mae a usaei wasaei wamale huluinye ei annebombe.

<sup>23</sup> Aka naei baeke naei, maisaei nekembe aei aka baeke Timotius kawane hebewolera hayainyekoke. Na heki ban mo raei bokore mendena, reyae benen hubaimakondere Timotius yaufensonde nanembaisa mai bokore ale.

<sup>24</sup> Maei a melaeyayembe nebeinya mai be yun be yebae holona bele Yesus Naei eleuboke wekeumi holona yo belere wemmile. Nane merau aei aka baeke Italia kanina yo mare a melaeyayembe.

<sup>25</sup> Reyae ebeli banale Allah kena buhae aere ban mae mare nemene henembe.



## YAKOBUS

<sup>1</sup> Onomi foka mayae yoho me bee oro nen bee bele yo hi yan hine faeungekoke nekeyaube yore. Reyae Yakobus, Allahle Tuhan Yesu Wali Ondofolole yebaei bubaei yae, ro melaeyamale.

### *Wali Kalo Bele Nekate Naei*

<sup>2</sup> Aka naei baeke naei, mai waline kena beko mokonembombe rambun yoni-yoni ennehubambe heene mai kenabe na rei mai yae mo kombe. <sup>3</sup> Rabuhine ban mayae maisaei mai hila rabo halaengere u mali bele yae hubanayembe walora kena mauferawekoke yae na hibi-hibi Wali Ondofolole a wembe hului mokombe u mekaise isaeyembe. <sup>4</sup> Nebei u mekai isaeyaeuboke hee mayae henauboke ro miyaere yembombe. Mai wali himalainyeboko yo wanan nekembe nane merau Wali Ondofolole a wembe huluinye mo nekembe. <sup>5</sup> Mai nolona ro miyae hi na isaei hebaen kalo moloungena, Allahre riyennehinde, nebei isaei hebaende a yae ohoroiboi Na kena faere-faere yae yennele. <sup>6</sup> Nebei isaei hebaende riyensinde ro miyae Allah yennelere hila rabo halende hele, kena u wauwau okoi yae. Rabuhine ban ro miyae kena u wauwau koyate yo naei u mekai nau buna alu raweiboyole ruwae boye yae ndire ndare kounge wanan. <sup>7</sup> Kena u wauwau koyate ro miyae Allahlena rambun yoni-yoni riyeungere Allah yennele naeise rabo nendon ehalei yae hele. <sup>8</sup> Naei u bene bee nekele, ya hi ma hi mokole, ya hire bae ma hi mokole.

<sup>9</sup> Mayae Yesu elele are hila rabo halaenge aka baeke holona yo hiwa eba he bele hiwa eba he ban nekate. Eba he ban nekaube yo, rei mai kon. Rabuhine ban Yesu Naei a elelere mai hila rabo kusei mahei ban mae halaubene, Allah mare ro bele ro miyae yae me baeyembe. <sup>10</sup> Eba bele he bele ro miyae nane merau rei mai kon, rabuhine ban mayae eba bele he bele hororebe yebaei bubaei ro miyae yae nekaube. Hun ban wai ban ro miyae bele mangkele Wali Ondofolole wali nibine oraube. Yesu Naei a elelere hakaube aere Allah mare ro bele ro miyae yae me baeyembe. Eba he bele ro miyae hun hobo arokou wanan herenate. <sup>11</sup> Hun hobo arokou hu naume yae nekeungene na arokou otaikoke nane merau na baengko fereisayeunge kiyae bele nundeiboyate. Nebei sului mbai eba bele he bele holona yo humfo wamfone konate hee yae herenate.

<sup>12</sup> Ro miyae kena bekore mokonnele rambun yoni-yoni menainyehubande heene kena yae heraweubonde na hibi-hibi Wali Ondofolole a weunge hului yae mokondena, nebei ro onomi foka hubanainyele. Rabuhine ban Allah are heteungekoke hului ro miyae Nare buhaere haeyenyeke yore wali hena bona yae me buhaere inyemile. Nebei sului mbai Wali Ondofolole a weumi hului mokate ro miyae naei kena bekore mokoung rambun bele baensondera Allah yae wali hena bona me buhaere inyemile.

<sup>13</sup> Ro miyae mbai bekore mokombondere umali hubannele hee, Allah yae umali hubaunge a yae eleijae. Rabuhine ban beko yae Allah umali ehubaisi hului nane merau ro miyaere Allah umali ehubayei. <sup>14</sup> Nebeibe ro miyae u mekai beko yae wabeisiyeunge eituwele kiyae nebei ro miyae nenaiejae na bekore kena haehae kole mokondere elae yae yoboiboyeunge nane merau aefoyoungene. <sup>15</sup> Naei bekore kena haehae kole mokondere elae huluinye hakoiboyolene, u mekai bekobe ninai hengkelen raisiyele mokole. Nebei u mekai beko uwa henaiboyole bae, here no unulu bele waheikoke wanan nebei ro miyae Allahle waheneikonde.

<sup>16</sup> Aka naei baeke naei reyae buhaere haemale yo, kayaa foi hebembe! A ame-amere ehakojiae. <sup>17</sup> Ako Allah yakuna hehe yoni-yoni mokouboke Kiyae. Unulu yoni-yoni mahi ibewate nebeibe Allah nebei wanan ban, ma hire eyeiboi. Rambun na foi sele nemene Allahlera wate. <sup>18</sup> Na bere Yahudi ro miyae ani yele na Allahle kayeene imam yoni-yonire iwaimi. Allah kena koukoke hului Naei mokoukoke rambun yoni-yoni nolora eyae Naei kayee yelena imabonde naeise aere eleuboke wekeume. Wali Ondofolo Naei a elelere hila rabo halemandere kena u neme ikeume, fa manemfa honate kena u neme wanan.

### *Boroukokae Yae Mokole*

<sup>19</sup> Aka naei baeke naei, reyae buhaere haemale yo, nda a isaesembombere borombo, Yesu Naei a elelere u hale yae borombo, u hale eleyejiae, nane merau ikele u hale okoyejiae. <sup>20</sup> Rabuhine ban Allah kenare kole ro miyae Yesu Naei a elelere hakonate yae na wali alonainyele. Nebeibe ikele konate yae ro miyae na wali aloisai sului. <sup>21</sup> Nebeinye mai u bene niki bele u mekaise bene enekeijae nane merau bekore kena haehae koimeyaube hului omokoyejiae. Yesu Naei a elelere mai kena une isaeyaeuboke.

Nebei are kena nime haba yae ei hawennele, rabuhine ban nebei a elele yae na hului mai wali hole molonombombe. <sup>22</sup> Yesus Naei a elele huluinye mayae mokombe hele, angkaei boroi-boroise mo oboroiyae. Rabuhine ban a boraukoke hului omokoyeinya, menaeijae mai uware ame-amebe baeunge. <sup>23</sup> Ro miyae mbai Yesus Naei a elelere angkaeise mo boroube nebei a elele huluinye ehakoi omokoinya, nebei ro miyae na be yoi be nulune ereuboke wanen. <sup>24</sup> Nane fen nare ereukoke elebe na hibi hele na be yoi be nulune kaneungeboke mare haneungekoke. <sup>25</sup> Yesus Naei elele are hiyei raneuboke wali heere foloukoke a mbai, hakainye ro miyae Musale walora wali heere foloukoke hului ehee bukulu hayemmera me ruboumiboke. Nde yae nebei a faeu elelere nou henende nane merau hubara haesa yanennelena, nebei u mekai mokole ro miyae onomi foka hubanainyende.

<sup>26</sup> Ro miyae mbai Allahre hubara haesa yanewounge kiyae yae nauware hubaungebe nebeibe na faeu kayaa foi ehebeinya, nebei ro miyae nauware nenaie ame-amebe beunge. Nebei me u mokowole rabuhi ban yeuboke. <sup>27</sup> Aei Ako Allahle ro be ro yoinye me u na hele nane merau na foi nda niyae: miyae nannale holona bele ako ban nake ban fa-fa bele hakonaimile, ei haungaimile, nane merau nda kani kelana wali beko nibire moi bulenainyebonde.

## 2

### *Be Ijoko Erei Naeise*

<sup>1</sup> Aka naei baeke naei, Yesus Wali Ondofolo aei Tuhan nene waewae bele Kiyae Naei a elelere hila rabo halaube yo yae, ro miyaere be ijokone ereyeijae. <sup>2</sup> Ro hi hun bele wai bele kiyae cincin emas neweube nane merau malo foi hireukoube meube nane merau ro hi hun ban wai ban malo kaka yae hireukoube meube mai Allahre ei mom-mom imaere meyeuboube. <sup>3</sup> Nebeibe malo foi cincin emas neweube kiyae mo mayae ei hawaungele waunge, “Ndi angken nuwei foi ranne nuweibo.” Malo kakare hireukoke meke kiyae waunge, “Ndiine afae yae hebei, nda wa ranne raei oro kelaeunge nuweibo.” <sup>4</sup> Nebei u mekai mokaubene mo, na yaka yeuboke mayae aei hila rabo mbai halaende holona ro miyae nolore be ijokone eraube, nane merau u bene beko yae ro miyaere hului kolaumi.

<sup>5</sup> Aka naei baeke naei reyaere mare buhaere haemale yo boron, nda kani kelana ro miyae yae hun ban wai ban mae hului kolaumi yore Allah eleuko ke Yesus Naei a elelere hila rabo emekai bele enainyehalende holonare yaeiboke nane merau yo wakure kinyemmibonde. Nebei yo waku mbai Allah yae are heteungeko ke Nare buhaere heyainye holona yore emmikinyembonde. <sup>6</sup> Nebeibe mayae hun ban wai ban ro miyaere me baei ban mae eraube, erabae hun bele wai bele ro miyae yae mare heraweyayembe nane merau mere nonaimombere nda kanina yun-jun naei bere muli yae yobayembe. <sup>7</sup> Nebei holona ro miyae yae mai Tuhan Yesus Wali Ondofolole yeisi raei boi bele Ro aukaka koyainye.

<sup>8</sup> Allahle homofae einya molaiko ke Musale walora wali heere folouko ke a na yo me yan mere mokoubo ke kiyae nda niyae: “Mai uware haeunge wanen mangkele ya-ya wali nibi mbainye oraube ro miyaere kena buhae hemmile.”\* Nebei u mekai mokombena, mayae na ijenbe mokaube. <sup>9</sup> Nebeibe mayae be ijokore erembena, nebei u mekai bekobe mokaube nane merau Musale walora wali heere folouko ke are asasibe kaube. <sup>10</sup> Rabuhine ban nde yae wali heere folouko ke are hubara haesa yaneungele, nebeibe mbai ken sele asasi kongkondena, nebei kiyae yae wali heere folouko ke a nanemene hele asasi kouko ke. <sup>11</sup> Rabuhine ban Allah yae eleuko ke, “Ro bele miyaere nane merau miyae bele rore uwa mbainye ohonoijae.”† Nebei Allah mbai yae eleuko ke, “Ro miyae ohoiyae.”‡ Mayae nebei mekai ro bele miyaere nane merau miyae bele rore uwa mbainye ohonoiko ke nebeibe ro miyae houbondena, wali heere folaike ke are asasire kaube holona yore yembombe.

<sup>12</sup> Nebeinye, Yesus naei a elelere hakainyene Musale walora wali heere folouko ke hului ehee bukulu hayeumira me ruboumiboke holona ro miyae naei wali nekaube, ro miyaere be ijoko ereyeijae. Rabuhine ban Yesus Naei a elelere hakouba be huluinye mai walire hului kolonengkombe. <sup>13</sup> Hiwa yore yanekoi yase yae ei ehawe ro miyaere Allah nebei suluinye naei walire hului kolommile. Yanekoi yase yae ei hawaimile u mekai ro miyae kelaeimile Yesus Naei a elelere hakainye, Allah ehee bukulu emmihayendere fe efaei.

### *Na Hele Hila Rabo Halaeyne Naei*

\* 2:8 2:8 Imamat 19:18 † 2:11 2:11a Keluaran 20:14 ‡ 2:11 2:11b Keluaran 20:13

<sup>14</sup> Aka naei baeke naei, rahe naei tonde mauware elauwe, “Reyae Yesusle a elelere hila rabo halaale,” nebeibe Naei a huluinye omokoiboi. Naendae wanan, nebei hila rabo halaeweunge ma yae mai wali hole molonnebonde? <sup>15</sup> Mai nolona aka baeke mbai malo ban nane merau eraman kalo wokeunge eraunge. <sup>16</sup> Nebeibe mai nolona hi yae weunge, “Oro foi yae ele, malo ken foi yae hireiko, nane merau eraman ken foi aneiko uwa reubonde,” nebeibe naei uwana kalore mouloung rambun eyei. Rahe foi naeise a bangsa mo waunge? <sup>17</sup> Nebei sului mbai, hila rabo halaende me ban u banna, nebei hila rabo rabuhi ban yembonde!

<sup>18</sup> Ro hi miyae hi yae eleuwe, “Weyae Yesus Naei a elelere hila rabo haleyae, nebeibe reyae me ube mokale.”

Weyae Wali Ondofolore hila rabo halaenaere me ban u ban mae hila rare keleufebonde. Reyae Wali Ondofolore hila rabo halanalere me u mokale yae ware kelereibote. <sup>19</sup> Weyae na hele eleyae Allah mbai ken sele. Nebei foi sele. Nebei sului mbai walobo yoni-yoni Allah mbai yae elate nane merau nebei aerene kulu wai rokate kate.

<sup>20</sup> Mayae ro kobu miyae kobu hele. Me ban u ban hila rabo halaeweunge rabuhi ban sele lon mae nda hee reyae kelerembombere. <sup>21</sup> Aei yobe Abraham me u mokouboke aerene Allah yae wali himalainyeboko yo holona yae me baeuboko. Rabuhine ban Allah yae ukeunge, “Wa kelu Ishak hili era akau erare itukai ranne Rare ongkou wae feleubonde.” Abraham rilibo ban mae Allahle are hakouboke. <sup>22</sup> Mayae eraunge, naei hila rabo halewole bele naei me u bele mbainye yeiboko. Naei hila rabo halewole naei me u mokouboke yae na hului sului mokoungboko. <sup>23</sup> Nebei mekai yaere Allahle homofaena nda a na hului yeuboko, “Abraham Allahle a eleukokere hila rabo halewoungene wali himalainyeboko yo holona yae Allah me baeuboko,”<sup>S</sup> nane merau Abrahamde Allah Naei kahili yae eleukoko. <sup>24</sup> Nda hee na yaka hele yeuboko Yesus Naei a elelere hila rabo halaete huluinye me u mokate yore wali himalainyeboko ro miyae holona yae Allah me baeumi. Me u omokoinya, na hila rabo rabuhi ban yembonde.

<sup>25</sup> Nebei sului mbai Rahab uwa naise heweke kiyae Israel yohora ijoko-ijkore mekate yore naei imaene ayeubokene ei aumiboko nane merau hakoumiboko nibi hira ukeumi bukaiboko ewate. Neyae Allah Naei a eleukokere hila rabo halewolene nebei me u mokouboke aerene, Allah nare wali himalainyeboko yo holona yae me baeuboko.

<sup>26</sup> Nebeinye nda ro miyae uwa nekande unulu banna, nebei ro miyae hereke. Nebei sului mbai aei hila rabo halaende me ban u banna, nebei hila rabo hereke.

### 3

#### *Faeu Naei A Usaei*

<sup>1</sup> Aka naei baeke naei, mai nolone wali nibi isaei hebaende kelemmle ro holonare yembombere helen kena okoiyae. Rabuhine ban maisaei sele eyae isaei hebaende kelaemmle ro miyae, aei walire be bele humbanbonde hului kolommele. <sup>2</sup> Eyae nanemene beko meleyae mokoyande. Ro miyae nde ane faeunge beko eleikoinya, nebei kiyae wali himaloungeboko, na hului na uwa kaban kenare kole u mekai beko mokondere hun rannehinde.

<sup>3</sup> Kuda mbai aei kenare kande huluise hakombonderene ha euwara umannonde. Nebei ha yae kuda nauwa kaban aei kenare kande ma na hului imoli bomansinde. <sup>4</sup> Nau buna kainye eyae hului ramansinde. Kaban sele nane merau alu elae yae bere ate horore bae, imoli mokoi kaei-kaei sele ken mae na hului imoli mokoinya kiyaele kena huluinye hakoubobe. <sup>5</sup> Nda faeu nebei sului mbai. Nda uwa kabanna ahunewoume neyae na kaei-kaei sele hororebe, embei aikore neyae emekai bele eisalewole. Nebei sului mbai i isen kaei-kaei yae o ha kaban na hului i yae bekoube baeufoube. <sup>6</sup> Nda faeu i wanan beko mokoikoyele. Aei uwana melen bai nolone faeu na beko hele. I faeu mbai na hului o ha yoni-yoni beko mokommibonde wanan mae faeu na hului ro miyae naei walire beko mokommle. Walobo yun narakana kiyae faeu yoni-yonire moi elae hureumile a beko hele elenate.

<sup>7</sup> Obo yoku han bele han ban yoni-yoni bele, aye, rami kani randa foyate holo, nau buna obo yoku ka heu yoni-yoni, naei u mekai nekatera mekai hi na hului benainyehonde nane merau mokommle ro miyae kenare konde ma yae na hului hakombonde. <sup>8</sup> Nebeibe ro miyae naei faeu hi yae ha yae imoli oboisi sului. Neyae nansau fele, hunde erasi sului nane merau beko nore yeuboko.

<sup>9</sup> Nebei faeu wae aei Ako Allahre ei molannele, nane merau nebei faeu mbai yae Allah Naei bene yoinye nulewoung ro miyaere olomo rorammi. <sup>10</sup> Nebei euwa mbaisa

foi naei a bele olomo naei a bele baleyeunge. Aka naei baeke naei, nebei na ijen ban!<sup>11</sup> Naendae mekai, bu no mbaisa bu horo bele bu hae bele na hului eitilewote. <sup>12</sup> Aka naei baeke naei, na hului ban sele ara nora zaitun ani mokonde. Nane merau anggur nora ara ani mokonde. Nebei sului mbai hae bele bu no na hului ban sele bu hosoro yae ebalei mei.

<sup>13</sup> Aka naei baeke naei, ro miyae nde mai nolona isaei hebaen bele ma yae nauwa haraungeboke? Naei foi sele nebei kiyae wali yana bana foi mokonde yae nane merau kena u ane nihennehinde nekende yae naei isaei hebaen bele ma yae nauware haraungeboke u mekai kelemmibonde. <sup>14</sup> Nebeibe mai kenara kena hensen bele kena ikele bele nane merau rore ronayembombere baemembena, mauware ekaeijae, nane merau na hele naei are na hele ban mae elemmae. <sup>15</sup> Nebei isaei hebaen ma u mekai surgara ban, nebeibe nda kani kelanara. Nebei isaei hebaen ma u mekai ro miyae bekore kena haehae koyatera meke nane merau walobo yunda meke, Allahle Rohra ban. <sup>16</sup> Rabuhine ban kena hensen bele yo, nane merau ro baei-baeise baeyate bele yo, wali aku nau hate nane merau u mekai beko yoni-yoni na mane-mane mokate.

<sup>17</sup> Ro miyae surgara isaei hebaen rowele kiyae na u mekai nda ma: yolo-yolo, wali rei mai belere kena kole, mekai bele, a usaei boroi-boyole, hiwa yore yanekoi yase yae ei hawaimi, me u foi mokonende, be ijoko ban, be bee bee ban. <sup>18</sup> Wali rei mai nekate ro miyae hiwa yore rei mai bele wali ma naeise kelenaimiyende. Nebeise kelaemi ro miyae hakonaimile ro miyae helen wali himalainyeboke yore inyaibonde.

## 4

### *Nda Kani Kelana Wali Beko Nibi Huluinya Orate Naei*

<sup>1</sup> Aka naei baeke naei, rahene mai nolone kena ikele kaube, han oyeiboyaube haube? Nebei naei sele mai kena ura! Mai bekore kena haehae kaubere harambe elae yae mai kena une releungele u mekai beko mokombere. <sup>2</sup> Mai kenare kaube hului rambunde rowemere, nebeibe erowie sului. Ro miyae hiwa yo naei rambunde kena hensen mae kaube rowemberene nare hoiboyaube, nebeibe rowembe nibi haraungeboke na hului ban. Mayae han mae fela yae oyeiboyaube relaunge, nebeibe kena elae yae moloiboyaube rambun yoni-yoni eyaroi-koi, rabuhine ban nebei rambun naeise Allahre eriyaisinye. <sup>3</sup> Nebei rambun naeise Allahre riyeyaunge horore nebeibe mayae erowie, rabuhine ban u bene beko yae riyeyaubene. Mai merau kolaunge Allah inyembe rambun nda kani kelana yukaei yoni-yoni mo yarongkombe mai kenare molonembombere.

<sup>4</sup> Mayae ro miyae yoko kaeimae kate wanen Allahre mokaungele yo nda a isaeyaeuboke: nda kani kelana wali beko nibire kena kaubena, Allahre kena ikele yae kaunge. Nda kani kelana wali beko nibire kena kate ro miyae Allahle yokeijore yaeiboke. <sup>5</sup> Mayae maisaei Allahle homofaene na hele nda a mekai molaikoke, "Mai kena une kena haehae koweke rambun yoni-yonire yarongkombere." <sup>6</sup> Nebeibe Allah kena buhae aere ban mae heumekoke na elae bele, mai kena u elae ban. Nebei aerene Allahle homofae nda wanen molaikoke,

"Ro miyae uware kaeyate embei aikore koyate yore

Allah wali ehakaie ijewoumi,

nebeibe kena u ane nihaeinyehike nekate ro miyae

Allah kena buhae aere ban mae hemmikonde."\*

<sup>7</sup> Nebei aerene Allahle me kelee u keleere orulembombe. Walobo yunde hukuennele. Nebei u mekai harannebombene walobo yun mare nukenembombe na fere habele-nende. <sup>8</sup> Allah a wembe hului nekemembena, Allah mai kena u einye nekenende. Kani man ruboiboise mere bu yae kuyeikoyate wanen mae beko bakore mokaube ro miyae meyayare kaube wali nukennebombe. Nane merau kena wauwau koyate ro miyae mai kena ure yolonnebombe. <sup>9</sup> Nebei u mekai beko mokaukokera uwa olomombombe, mehi hako nana hesele folombe, ijoko ibo bele yae balenayembe. Rere haraweke u mekai bennehombe rime yae rimembe. Nane merau rei maise kawewe wali bennehombe kena beko u beko yae yembombe. <sup>10</sup> Allahle ro be ro yoinye mai kena u ane nihensimbena, Allah yae mai uware kaenembe.

<sup>11</sup> Aka naei baeke naei, maise naeise a beko faeu beko eweijae. Allah yae Musare ukeunge wali heere foloukoke a mbai ro miyaere ikeumi. Naei a nda wanen mae eleukoke, "Mai uware haeunge wanen mae mangkele ya-ya wali nibi mbainye oraube ro miyaere hemmile." Nde yae naka baekere a hufuufe huwemmile, wali heere foloukoke a hufuu huwemmile. Nde yae naka baeke naei wali hului ranensinde kiyae, nebei wali heere foloukoke abe hului koleunge. Mayae wali heere foloukoke are hului

\* 4:6 4:6 Amsal 3:34

rannehimbena, nebei wali heere foloukoke a keleene enekei yembombe. <sup>12</sup> Allah mbai ken mae wali heere foloukoke mokouboke nane merau Neyae mo wali hului emmikolonde Kiyae. Nebei Kiyae mbai yae wali holere molommibonde nane merau beko emmimokonde Naei me einye mo honole. Nebeinye weyae wende, mangkele ya-ya wali nibi mbainye oraube ro miyae mbaise hului kolamae?

<sup>13</sup> Mayae nda a wanende elauhe yo, "Mana yae, wahenare, eyae yo maeninde kulun umale, rambun nai hei-seise emalere, nane merau rambun emahende roi emarilende. Nebeinye ralo yakama mbai emanekengkonde." <sup>14</sup> Nebeibe wahena ya mai waline benate yakanate naei maisaei ban sele nekaube. Aei wali rahe ma yae elauhe? Nda wali nekande ongkou wanen manemfa fere yakauboke erannele mo, nebeisa na hibi hele nundeuboke. <sup>15</sup> Naeinya hesele nda wanen mae mayae elembe, "Tuhan kena kommekondena mayae wali emanekende, ndi rambun bele nda rambun bele na hului emamokonde." <sup>16</sup> Nebeibe nda hee mayae ukaei embei aiko yae kaube elewaube. Nebei u mekai ma na beko hele. <sup>17</sup> Nebeinye ro miyae mbai Allah a ukeunge me u foise mokonde naeise naeisaei selebe, nebeibe omokoinya, nebei kiyae me u bekobe mokole.

## 5

<sup>1</sup> Mayae ro miyae keren bele nale bele yo, u buhae wa buhaere ennerelembe ya nobeungekokene mai uwa rimebe rimenne. <sup>2</sup> Mai keren nale arilaweke hengkelen raufike kaka baete. Nane merau malo neme na mane-mane arilaweke fereli yae folaiboke, malo male wanen yaeibo. <sup>3</sup> Emas, perak yoni-yoni ehi yae felaiboke. Nebei rambun helen hiwa yo naei roibu walora arilewaubene, naei ehi aerenge mare ehee bukulure enensayembe, nane merau nebei ehi yae mai uwa melen i yae anenembe wanen anenengkombe. Huba mokoikoi ya be rannehike hee lon nae, mai uwa mbembare nebei rambun yoni-yoni arilewaube. <sup>4</sup> Erembo! Mai hekene ani erare maluwayeke yo naei roibu ohobeikoi, ame-ame yae baemuyekene eyeyei. Nebei yo naei rime a Allah elae bele wake bele Kiyae angkaei borokeumi. <sup>5</sup> Mai wali nda kani kela einye kuikui maemae nolone nekewaube. Obo yoku nenaisandere raman foi yae naraumi nuku-nuku baete wanen, mai uware menaeijae u mekai bekore kena haehae hele rowensikembe mokaweke. Allah ehee bukulu inyembe hee mayae u bene enekeisi. <sup>6</sup> Wali himalainyeboko ro miyae mare a beko ewei hororebe, mayae ehee bukulu nebei yo naei yun ran kaembai ranne hayaeumi nane merau haube hayeube.

### *Kena Hebaen-sebaen Bele Nekate Naei*

<sup>7</sup> Aka naei baeke naei, aei Tuhan roko bee nendo bensonde mendere rakaubene, mai u mekai heke ro ya molondere ereiko rakeiko kole nane merau ani era maluwembondere rakele wanen mae na hebaen-sebaen mai kena u nekembe. <sup>8</sup> Nebei sului mbai mai kena u na hebaen-sebaen ereiko rakeiko konnele nane merau Wali Ondofolore hila rabo elae halennele, rabuhine ban Tuhan bensonde mende ya nobeungekokene. <sup>9</sup> Aka naei baeke naei, Allah hila rabore halaennele Kiyae mare me nomomombe belene, maise naeise olomo narulu ororoijae, nane merau hi yae hire a beko eweijae. Bene nekenayembe, ro miyae naei walire hului memmikolonde Kiyae mende ya nobeungeboke, romau bene meke hebele wanen.

<sup>10</sup> Aka naei baeke naei, beko hubayembe heene, kena u na hebaen-sebaen mae herawemembe. Tuhan Allahle Ro yae are waimiyeke yenjo kayaayo naei u mekai harainyeboko nekewate bune wane hamennembe. Nebei ro miyae beko hubawainyele horore bae, Allahle ako faeuko na hibi-hibi huwaimi. <sup>11</sup> Nana hesele nebei holona ro miyae weitasi kowaimi hee, naei kena u herawainye na hibi-hibi Allah a uwoumi hului mokowate. Neyae onomi foka yae ei hauwoumi ro miyae yae erammile. Na bere hele Ayub beko hele hubawoungue hororebe, na kena herawoungue Allah a uwoungue hului hakoungue. Mayae naei u mekai boroyaube nane merau Tuhan Allah yae rambun foi mokoungehake Ayubre kinyewoungue naei mayae maisaei. Tuhan Allah kena buhae hei-sei Kiyae nane merau yanekoi yase yae ei hawei-sawei Kiyae.

<sup>12</sup> Aka naei baeke naei, a elauhe hului mokombe. Surga ro yae, nda kani kela ro yae, nane merau rambun hine yae, a holo okoijae hele. Na fokai fere niyae na "ehe" koukonde "niyae banna" okoijae, rabuhine ban nebei rambun a holo yae koyae na ijen ban aerene Allah mare me nomomombe belene.

### *Hila Rabo Bele Ebeli Boi-Boise*

<sup>13</sup> Mai nolona ro miyae kena bekore mokoyeumi rambunde hubanainyelena, nebei naeise Allahre ebeli bonnehinde. Ro hi miyae hi kena rei mai hubannelena, Allahre ei moloi-moloise koi bae yae konnele. <sup>14</sup> Mai nolona ro miyae mbai era buloone kondena, jemaat be yun be yebae hebate yore kaenemmikonde menate. Nebei yo yae era buloone

kole kiyare Tuhanbe Ro einye minyak na uwane hobenainyekonde, Tuhan onomire yennele naei ebeli bonainyehinde. <sup>15</sup> Tuhan Naei a elelere hila rabo halenainyele hului ebeli bonainyelene, era buloone kole kiyae onomi yennele. Tuhan benen elae yennele. Nebei ro me u beko mokoukoke era, nebei ro naei me u beko Tuhan faeinyennebonde. <sup>16</sup> Nebei aerene onomi yarongkombe naeise, mai uware-uware beko mokaube naei maise naeise wo kombe nane merau maise naeise ebeli bombe. Wali himalainyeboke ro miyae yae ebeli bonnele hee, naei ebeli bonnele elae bele nane merau naei riyeufike hului benate.

<sup>17</sup> Allahle yendo kayaalo Elia, eyae ro miyae nekande wanen mbai. Neyae kena maemae kowole yae ya omoloi naeise ebeli boungelikene, ralo yakama name bohi bele ya omoloi mo nekaikoke. <sup>18</sup> Nebeisa benen ya molonde naei ebeli boungelikene, yaku wewe koukoke ya woke molowole. Nda kani kelana o meleme ha meleme ani hurewaimi balayeke.

<sup>19</sup> Aka naei baeke naei, mai nolona ro miyae mbai Wali Ondofolole walora na hele wali nibira wenendena, ro miyae hi yae a usaei wennele bukennehinde. <sup>20</sup> Bene nekenayembe nda niyae: Ro miyae hi nebei beko bako imokowole kiyare a usaei wennekonde nane merau nebei ro miyae naei u mekai beko mara bukennehindena, nebei rore hole molonnebonde. Rabuhine ban neyae ebukei nekendena, here no unulu bele waheikoke wanen nebei ro miyae Allahle waheneikonde. Nane merau bukennehindena, nebei ro miyae naei beko yoni-yoni Allah faeinyembonde.

## 1 PETRUS

1-2 Onomi foka mayae Allah yae elembokembe wekembe ro miyae Pontus kanine, Galatia kanine, Kapadokia kanine, Asia kanine, Bitinia kanine, kolo yo wanen mae faeungekoke nekeyaube. Na bere Ako Allah yae roubokembene, mare elembokembe wekembe. Mayae Yesus Wali Ondofolole a elelere hakombe naeise, nane merau Naei ha yae mai kena u yolo-yolo mokonembombe naeise, Allahle Roh yae mokombokembe mayae Allahle u mekai wa mekai huluinye yaeboke.

Reyae Petrus Yesus Wali Ondofolole abu akore yeubokale. Reyae ebeli banale Allah emekai bele yae kena buhae aere ban henembe nane merau rei mai inyembe.

### *Aei Rabore Halemande Rambun*

3-4 Allah aei Tuhan Yesus Wali Ondofolole Akore bumane kaemanende, rabuhine ban Neyae nda nibi yae aere yanekoi yase yae ei hawewoume: Yesus Wali Ondofolo ro miyae herewate nolora aunguke walora mokuemboke aei kena ure benen neme honoumekoke. Nebei aerene aei wali nekande yae wali hena bona emayaronde naei bele Allah yae rambun foi yoni-yoni mokingehake naei belere eyae rabo elae halaende. Nebei rambun yoni-yoni kakare eyeiboi, bekore eyeiboi, ure eyeiboi, nane merau mai naeise surgane koloukoke ekaisonate. <sup>5</sup> Wali Ondofolo Naei a elelere hila rabo haleyaunge walora Allahlena elae yae mare ei hawenembe mende huba mokoikoi yane Wali Ondofolo menjakombonde, mare hole molonembombe. <sup>6</sup> Na ranna moloukokale aerene mayae rei maibe roukembe, naenda mekai horo nda hee mare u mekai mahimahi yae wabayembe hubaunge aerene kena beko u beko kaube era. <sup>7</sup> Mayae Wali Ondofolore na hele yae hila rabo halaeungere kelennebombe naeise, nebei yoni-yoni hubaunge. Emas hele i yae yolonnebonde rambunde na hului beko mokonnebonde. Nebeibe mai hila rabo emasre moi wokeunge. Mayae Wali Ondofolore na hele hila rabo halembena, Naei uwa yakaiboise benen mende heene mare buma kaenayembe, nene waewae yembombe, be hinenayembe. <sup>8</sup> Wali Ondofolore mayae roko mbai ijoko ereiboi hororebe, nebeibe kena buhae u buhae Nare hewaunge. Nda hee Nare mayae ijoko ereiboibe, nebeibe Naei a elelere hila rabo halaeungene, mayae Allah yae ikembe rei mai kaube. Nebei rei mai a mehininde mae eraise sului. <sup>9</sup> Nane merau mayae Wali Ondofolo Naei a elelere hila rabo halaeungene, kena u einye wali neme hubaunge.

<sup>10</sup> Nebei wali neme isaeyaiibondere na bena hele Allahle yenjo kayaayo, Allah kena buhae aere ban mae mare henengkombe naei a nulainyekoke yo, naei kena u elaekei sele baewainyele isaewainyele. <sup>11</sup> Wali Ondofolole Roh nebei yenjo kayaayo walora Yesusre beko enainyehubande naei bele nebeisa hili enainyehende naei bele are nuleungekoke. Nebei mekai benate naeise nane merau maki yare enjembonde naeise isaeyaiibonde, neyae na hebaen-sebaen hamewainye. <sup>12</sup> Nebei yenjo kayaayo Wali Ondofolole naeise a nuleungekoke, nebeibe Allah nare isaeyumiboke nebei a bena honoifoyole hee mai foi naeise, nebei yendo kayaa yo foi naeise ban. Nebei nulainyekoke a bele, Wali Ondofolole a foi faeu foi surgara ukeunge meke Allahle Roh walora ro miyae mare isaeyaiikembe a bele, mbai. Nebei nulainyekoke rambun nda hee baetere malaikat yoni-yoni yae isaeyaiibondere kena hele kowate.

### *U Mekai Yolo-Yolo Nekei-nekei Naei A Usaei*

<sup>13</sup> Nebeinye mai u bene hiyei ranembombe nane merau mauwa kayaa foi hebemembe. Yesus Wali Ondofolo benen yakambonde heene mare foi yoni-yoni aere ban mae inyembe naeise, mai rabo halei wauwau okoiyae. <sup>14</sup> Mai wali Allah kenare kolere mokate kelu omi wanen mae nekembe. Mai wali na bere hele Allahre onewaunge, kobu yae felembokembe, bekore kena haehae hele kawekene mokaweke, wali huluinye benen enekeiyae hele. <sup>15</sup> Nebeibe nda hee u mekai wa mekai yolo-yolo yae nekembere mare kaenengkokembe, Allahle u mekai yolo-yolo wanen mbai. <sup>16</sup> Rabuhine ban Allahle homofaene nda mekai molaikoke, "Mayae u mekai yolo-yolo yae yembombe, rabuhine ban Reyae Allah u mekai yolo-yolo Kiyae."

<sup>17</sup> Mayae Ako Allah be ijokore isian Kiyae ebeline eibaunge. Ro miyae na u mekai wa mekai mokowate huluinye walire hului kolommile. Nebeinye mai wali nda kani kelana nekate yo naei wali beko nibine oroyeyiae, nebeibe Allahre hubara haeise yanennele. <sup>18-19</sup> Rabuhine ban mayae maisaei, abu naei arai naeitena ani ban wali mare kinyewayembe nekawekera Wali Ondofolo Naei eba he yae eyaroikoi sului, nebeibe ha yae yarongkokembe. Eba he na hului beko mokonainyebonde, emas bele perak bele wanen. Na bere Yahudi ro miyae naei beko bakore domba kelu ha

yae faeinyawaimi wanen mae Wali Ondofolo Domba Kelu na uwa baengko hele ma kalo ban sele wanen haiboke, Naei ha yae mare yarongkokembe. <sup>20</sup> Allah Na merau haraungebokere mokonde naeise, nda kani kela omokoiboi heena Yesus Wali Ondofolore Allah eleuboke wekeunge. Nebeibe mai foi naeise nda hee hubare mokonnele ya yae Neyae uwa yakauboke. <sup>21</sup> Allah yae Yesus Wali Ondofolore here u nolo u kaisa aangunuke nane merau hili hebewoungue. Nebeinye, Wali Ondofolo Naei a elelere hila rabo halaeunge walora mayae na hele Allahre hila rabo halaeungele nane merau rabo elae halaeungele Neyae wali hena bona inyembe.

<sup>22</sup> Wali Ondofolo na hele wali nibi are hubara haeisa yaneimeyaube walora mai kena ure yolo-yolo mokowaunge nane merau Yesusle einye aka baekere na hele kena buhae hemmile. Nebeinye, maise naeise kena u eisa kena buhae kaban mae hemembe. <sup>23</sup> Rabuhine ban mayae fa manemfa honate wanen mai kena u benen neme honongkokembene, wali nemebe nekaube. Allahlera nebei wali neme ijewoumi, huba ban haei ban ako faeuko Wali Ondofolole walora huwoumi. Nebei ako faekoure hila rabo halaeube yae mayae Allah bele ewaheikoi, nebeibe wali hena bona ennekemembe. <sup>24</sup> Rabuhine ban Allahle homofaene nda mekai yae molaikoke, Ro miyae nanemene hun hobo wanen.

Nane merau uware kitaimiboke rore royaimile yoni-yoni nanemene hun hobo arokou wanen.

Na heki ban hele hun hobo kalatene, na arokou bele otate balate.

<sup>25</sup> Nebeibe Allahle ako faeuko huba ban haei ban hononende.\*

Nebeinye Wali Ondofolole a foi faeu foi na bere mare huwayengkokembe.

## 2

<sup>1</sup> Nebeinye nda u mekai wa mekai moi bulemmibombe: bekore benate me u, ameamer bei-beise, u mekai u bee wa bee, ro hi naei rambun yaroi-yaroise kena kaban, hiwa yo naei bekore a huwei-huweise. <sup>2-3</sup> Tuhan mare wali neme ikembe. Nebei wali neme foi mayae niniae hubaungehike. Mai wali neme Allahle kena kole hulul nekembere isaeyembe naeise, fa wayeu manemfa honate nimere kena kole wanen ma yae Wali Ondofolo Naei a elelere Allahle Roh walora borombere kena komembe.

*Yesus Naei Uware Walire Yemmile Ruka Yae Ahuneuboke*

<sup>4-5</sup> Ro miyae yae erabuhi ban mae hubawainyene wokate rukabe Allah yae eleuboke wekeunge walire yeumi Ruka na foi sele yae ereunge. Nebei Ruka Niyae Yesus Wali Ondofolo. Yesus Naei a elelere hila rabo halennele yae mayae walire yaumi ruka wanen yembombe. Ro miyae imae rukara haete wanen mae Allah yae Yesus walora mokombokembe Naei holona ro miyaere yembombe, nane merau Allah Naei u mbai naei imam holonare yembombe. Yahudi yobe naei imam yoni-yoni yae hili era akau era Allahre onkoufe felayeke. Nebei wanen mbai mayae Yesus kena kolere mokaunge yae Allah kenare kole hili era akau erabe yennele. <sup>6</sup> Rabuhine ban Allahle homofaene Allah yae Yesusle uware ruka yae ahuneuboke. Naei holona ro miyae Sion yo yae ahuneuboke. Nda mekai molaikoke:

"Ereibo, Reyae ruka mbai eba he yae eyaroikoi sului ma eleubokale wekanale Sion yore berei ruka wanende beungenukale.

Ro miyae Nare hila rabo halaennele yo mehi hako ofoloyei."\*

<sup>7</sup> Nebeinye mayae Nare hila rabo halaeube yo mai ro be ro yoinye nebei ruka foi sele, eba he yae eyaroikoi sului. Nebeibe ro miyae Nare hila rabo ehalei yore Allahle homofaene nda mekai molaikoke:

"Imaere haete isaei bele hebaen bele yo yae wokate rukabe na bereinye rukare yeuboke,"†

<sup>8</sup> nane merau nebei homone molaikoke:

"Nebei ruka yae ro miyaere mokommile orore nalemmihinde ana balenate."‡

Nebei ro miyae Yesus Naei a elelere ehakoiboinye nalemmihinde balenate. Nane merau Allah yae merau raungehike nebei yo nalemmihinde balenate.

<sup>9</sup> Nebeibe mayae nebei wanen ban. Mayae Allahre onewaungene ouben hauben nolone nekewaube hee, Allah kaenengkokembe nebei walira maubaleke, Naei hehe foi sele nolone maweuboke. Ro miyae bene Allahre buma kaennele naeise, Allah mare elembokembe nda ma ro miyaere yembombere: Wali Ondofolole imam holona ro miyae,

\* 1:25 1:25 Yesaya 40:6-8    \* 2:6 2:6 Yesaya 28:16    † 2:7 2:7 Mazmur 118:22    ‡ 2:8 2:8 Yesaya 8:14



Allahre mo ei molainye yohona ro miyae, Naei holona hele ro miyae. <sup>10</sup> Mayae na bere Allahre onewaungene, mare yanekoi yase yae ei ehawe. Nebeibe nda hee Allah mare yanekoi yase yae ei haweimeyembe, nane merau Naei holona yore yaeuboke.

<sup>11</sup> Reyae kena buhaere haemale aka baeke, nda kani kela mai kani hele ban, nebeibe kolo ro miyae nane merau ele melere oroyate ro miyae wanenbe nekaube. Nebei aerene reyae mare moi huramale nda kani kelana wali beko nibi naei rambunde kena haehae hele mokombere koyaubera mai uwa wemembe. Nebei rambun yoni-yni mai kena une han fela wanen mae relainyele. <sup>12</sup> Nauwae, Allahre oroiboi yo mayae beko mokaube are elenatebe, nebeibe mai u mekai foi mokombe erenayembe naeise, foi sele u mekai harannele. Nebei u mekai nekaubene, Allahre onaeinye yo naei kena u einye Allah bele emmihubayengkombe heene Nare hili enainyehende.

*Mai Be Yun Be Yebae Naei A Keleene Nekembe*

<sup>13</sup> Tuhan kenare kole ma mokombe aerene, ro miyae nolone mere mokonaimele be yun be yebaere hubara haesa yanemmile. Mai kanina ondofolo na kaban sele bele <sup>14</sup> nane merau ondofolo yae ukeumi mekate gubernur yoni-yni bele naei are hubara haesa yanemmile. Gubernur yoni-yni ro miyae me u beko mokate yore ehee bukulu inyaimile naeise, nane merau me u foi mokate yore bumane kaemmile naeise. <sup>15</sup> Rabuhine ban Allah kena kole, mai me u foi mokombe yae ro miyae kobu a wakure koyate yo naei euwa mulemmibombe. <sup>16</sup> Musale walora wali heere foloukoke a huluinya ehee bukulu hayemmera mare me rubombokembe. Nebeinye me rubombokembe naeise isaeyaubokene u mekai beko benen omokoyei, nebeibe Allahle kaliare mokate yo holona wanen mae wali nekembe. <sup>17</sup> Ro miyae nanemene na mekai yae mokommiyembe, hila rabo mbainye halaube aka baekere kena buhae hemmiyembe, Allahre hubara haesa yanennele, mai kanina Ondofolo kabande be hinennele.

*Wali Ondofolo Beko Hubawoung Wali Ma*

<sup>18</sup> Mayae kaliare mokoyaumi holona mai rowa yoni-yni naei me kelee u keleene nekaubene ro rommile. Nime haba bele u mekai holona rowa yoni-yni mo ban, rowa nansau holona bele nebei foi mokommile. <sup>19</sup> Ro miyae mbai na mekai ban mae beko ennehubande, nebeibe Allah kena kole huluinye kena yae herawele na hibi foi mokole. Nebei u mekai ma Allah foi yae me baele. <sup>20</sup> Mayae u mekai beko mokombombene erahuae olenayengkombe u buhae, kena yae herawembombe relennelene mauware kaenayembe naeise yae ehubaijaa. Mayae u foi wa foi mokaubene beko hubaungelere kena yae herawaubena, Allah nebei u mekai ma foi yae me baele. <sup>21</sup> Nebei wali mare Allah mare kaenengkokembe, rabuhine ban Wali Ondofolo mai aerene beko hubawoung. Neyae kelebokembe wali bune wane hamennembe. <sup>22</sup> Allahle homofaena Wali Ondofolo naeise nda a molaikoke:

“Neyae me beko u beko ban

nane merau Naei euwara ame-ame a ehubaikoi.”<sup>§</sup>

<sup>23</sup> Na yun dan kaembaei ranne a haufau wae okowainyelerebe, Naei euwara a haufau wae ebeisoi; u buhae wa buhae relewoung hee beko yae bemmihondere a huku-huku okoi. Nebeibe Neyae Allah na ijenne wali hului koloumi Kiyaele me einye mo Nauwa kinyewoung. <sup>24</sup> Eyae me u beko na hibi-hibi mokomalere kena kandera umanende naeise, nane merau wali ijen nekemale naeise, Naei uwa melen ohaline baikoke eisa aei beko bakore eleufake. Wali Ondofolo nauwana bauwau yae mare onomi ikembe. <sup>25</sup> Rabuhine ban mayae na bere obo yoku domba yaweiboi ro banne nalauboke wanen, nebeibe nda hee mayae bukauboke, mai unulu eise hawenembe Be Yun Be Yebaele moisa hakaungekoke.

### 3

*Ro Bele Miyae Bele Mbainye Nekenete Ma*

<sup>1-2</sup> Miyae holona mai molo wa naei me kelee u keleene nekembe. Mai molo wa nolona hiwa Tuhan Yesus Naei a eelere ehakoiboi holona. Mayae Allahre hubara haesa yanaunge bele u mekai yolo-yolo yae nekaube belere mai molo wa ijoko robonayembene, mainya a ban mae yawemmibonde Yesusre hila rabo halenainyele. <sup>3</sup> Umaa bukenaube bele me bula oro bula emasra uware moloyaube bele malo foi-foi buhi wahi hireyaube bele yae mauware baengko fereisayaunge ma yae ehubaijaa. <sup>4</sup> Nda ofae kaemae niyae mai uware rilennebombe, kena nime haba nane merau a horoi-soroi ban u mekai yae nekembe. Nebei niyae mai ofae kaemae bekore eyeiboi yoni-yni yae rilembombe.

Nebei wali mare Allah rabuhi bele yae me baele. <sup>5</sup> Rabuhine ban nebei mekai yae nendahnya Allahle holona miyae-miyae yae uwa naei ofae kaemaere rilayeke yae na molo wa naei me kelee u keleene nekewate. <sup>6</sup> Sara nebei wanen mbai Abrahambe a hubara haeisa yanewounge nane merau rowa yae Abrahamde kaenewounge. Mayae fe efaei yae me u ijen mokombombena, mayae Sarale orona menare yaeuboke.

<sup>7</sup> Nebei sului mbai ro yoni-yoni mai miyae wa elae ban holo naeise isaeyaeubokene, na mekai yae mangkele nekembe. Ro rommile, rabuhine ban miyae holona mangkele Wali Ondofolo kena buhae aere ban mae hembene mare nemene wali neme ikembe. Mai ebeli bonnelle yoni-yonire oro halunde enensayembe belene, nebei wali ma yae emkombe.

*Wali Foi Nekembe Aerene Beko Hubanayembe*

<sup>8</sup> A fofu ken wamale, nda wali ma maise naeise nekembe: Wali Ondofolole wali nibi homo mbainye orombe, mai nolone kou kalo naei are boromembe, aka baeke wanen mae kena buhae u buhae hembe, ro miyae hiwa naei beko aerene mangkele kena beko hubannele, kena ane rannehimbe, <sup>9</sup> u mekai beko yae keleneibote kiyae beko yae ebeisoijae, a haufau wae okoneikotena benen a haufau wae okojiae, nebeibe Allah foi yoni-yonire yemmile naeise riyemmile. Rabuhine ban Allah aere foi yoni-yonire inyemele naeise kaneumekoke. <sup>10</sup> Allahle homofae einye nda mekai yae molaikoke:

“Ro miyae nde wali foise kena kole nane merau nebei ya koko foise hubannelerena, nebei kiyae a beko faeu beko elei naei bele ame-ame ebei naei belere na faeu kayaa hebenende hele.

<sup>11</sup> U mekai beko mokolera uwa ahaufe yae wenende nane merau u mekai foi bele mokonde hele.

Wali rei maise baende relennele hele.

<sup>12</sup> Rabuhine ban wali himalainyeboke ro miyae Allah ijoko roboumi nane merau nebei ro miyae ebeli boyainye are angkaei aleisiyele boroumi.

Nebeibe ro miyae bekore mokoyate yore Allah moi buleiboyoumi.”\*

<sup>13</sup> Mayae foi mokommilere kena kaban kaubena, ro miyae mbai sambai mare beko omokoyei. <sup>14</sup> Nebeibe mayae foi mokaube aerene u mekai beko yae hubanayembe hororebe, onomi foka yae hubannembe. Allahle homofaene nda a molaikoke, “Bekore mokoyembe ro miyae fe efaeijae nane merau buhae okoyeijae.”† <sup>15</sup> Nebeibe mai kena ei u einye Wali Ondofolore mai Tuhan wanen mae waennihi neken. Ro miyae hiwa yo yae wali hena bona yarongkombere hila rabo halaeubere hinenayembe kulunne wemmile naei a mokoisa-mokoisa yae nekembe, kena nime haba yae nane merau mekai bele kelembe. <sup>16</sup> Mayae Wali Ondofolole einye wali ijen mae nekaube aerene mai rore horonaibondere a beko faeu beko ungayembe era. Nebei ro miyae na a beko uwayembe fe hubanainyele naeise, mai kena u na hibi-hibi yolo-yolo hubaunge yae nekembe. <sup>17</sup> Allah mare beko hubanayembere kena koube, na foi sele foi mokombe aerene, beko mokombene ban. <sup>18</sup> Rabuhine ban Wali Ondofolo ro miyae naei beko bako faeinyemibonde naeise, roko mbai hereke. Mare mokonembombe Allahle ro be ro yoinye u mekai foi yae me baembe naeise, wali himaloungeboka Kiyae ro miyae wali ehimaloiboi yo naeise hereke. Naei uwa herekebe, nebeibe Naei Roh na hibi wali nekewole. <sup>19</sup> Neyae Roh uwa yae eke nulu mahe yoni-yoni Allah yae kawane aheumikoke ekaisebate yore a foi faeu foibe eke huwoumi. <sup>20</sup> Nebei nulu mahe yoni-yoni, na bena hele Nuh nekewole heena Allahle ako faeuko uwaimi huluinye ehakoi nekewate ro miyae naei nulu mahe. Nuh kai kaban mokowole heena Allah na hebaen-sebaen hele rakeumiyeke. Nebei kai kaban einye ro miyae mehine name hele mo nebei bu kaban ufekokera hole moloumiboke. <sup>21</sup> Nuh naeise bu ufeuko einye hole moloumiboke wanen nda heena ro miyaere bu kaimi yae hole moloumibokere kelaeimile. Bu kaimi bae aei uwa ranne niki olaendekokere kuyemmekonde naeise ban, nebeibe Allahre a wanne a hokandekoke Wali Ondofolo Naei a elelere hila rabo halemale yae aei kena u yolo-yolo yae nekemale naeise. Yesus Wali Ondofolo here u nolo u kaisa aunguke yae ro miyaere hila rabo nibi yae hole moloyeumile. <sup>22</sup> Nda hee Yesus Wali Ondofolo surgana ekenekele. Neyae Ako Allahle kendan wameran one hengko bele anuwau na meube reufine eunguweuboke, nane merau malaikat yoni-yoni bele walobo yoni-yoni bele naei yun-jun nanemene Naei me kelee u keleene orulaiboke nekate.

## 4

*Wali Neme Naei*

\* 3:12 3:12 Mazmur 32:12-16 † 3:14 3:14 Yesaya 8:12

<sup>1</sup> Yesus Wali Ondofolo u buhae wa buhae releungekoke aerene, mayae Naei u mekai wa mekai haraungeboke ma mbai mai u mekai wa mekai harannele, rabuhine ban uwa buhae releikoyeunge kiyae benen u mekai bekore omokoyei. <sup>2</sup> Nebei u mekai bele ro miyae nda kani kelane nekenfonde hee wali bekore kena haehae katere ehakoyei. Allah kenare kole huluinye hakonayende. <sup>3</sup> Mon heki moise haiwande heena Allahre onaeinye holona ro miyae yae kenare kayeke mokayeke huluinye mayae nda me u mokowaube: bekore kena haehae hele kowaube mokowaube, bekore kena haehae hele na hibi-hibi kowaube, yun yambi-yambi kowaube, holoka beko riyane kowaube, bu elae mali holonane hakowaube kowaube, hoime bahere u nenere koi-koi u mekai yae ei molaimibe mokowaube. <sup>4</sup> Nebeibe nda hee mayae Allahre onaeinye holona ro miyae naei u mekai beko huluinye ehakoi omokoi erayembene, fa yae bate, mare a beko-beko yae aukaka kayembe. <sup>5</sup> Nebei u mekai beko mokate ro miyae naei u mekai wa mekai mokowate huluinye Allah Wali Ondofolore wo enaikongkonde hele. Nauwa mokoungehake wali nekate yo bele herewate yo bele walire hului kolommikonde. <sup>6</sup> Nda aerene Yesuslena a foi faeu foi herewate yo u nolo u kainye bele ekaisuwate: naei uwa wali bele ro miyae wanen mbai walire hului kolommikonde, nebeibe naei unulu Allah kenare kole huluinye wali enainyende.

<sup>7</sup> Nda kani kelana rambun yoni-yoni naei huba mokoikoi ya meungenobeukoke. Nebeinye, mayae na hului Allahre ebeli bonnele naeise u bene foi yae nekembe nane merau mauwa kayaa foi hebemembe. <sup>8</sup> Nebeibe nda bereinya u mekai niyae, kena buhae u buhae nana hesele yae hi yae hire henele. Rabuhine ban eyae kena buhae u buhae hemalene, ro miyae naei u mekai beko helen selere na hului u benera nundenaimende. <sup>9</sup> Maise naeise rilibo ban mae mai imae ei obe einye eisawe meisawe hawemembe. <sup>10</sup> Allah yae aere ban mae ikembe meli mekai na mane-mane maise naeise Allahle a wembe huluinye eisako meisako yae hakomembe. Allah nebei mokombe walora nemene naei foise ro miyaere waheumi. <sup>11</sup> Mai nolona ro miyae a yae faeu wae jemaatre huwemmilena, Allahlena ako faeuko weunge wanen mae ro miyaere huwemmile. Ro miyae mbai hiwa yore ei hawemmilena, nebei kiyae Allah ikeunge elae yae hiwa yore ei hawemmiyende. Rambun nemene benate yae Wali Ondofolo walora Allahre na hului bumane enainyekaende naeise, nebei wali ma nekembe. Allahre huba ban haei ban hili hebenainyende, elae wake bele nekenende Kiyae. Amin.

#### *Wali Ondofolore Hakannelene Beko Hubamande*

<sup>12</sup> Reyae kena buhaere haemale aka baeke, emas inye haneiboyate yolo-yolo yembonde wanen, mayae buhae hubaunge walora umali hubayembe. Nebei u buhae wa buhae hubaunge aerene, fa yae oboijae nane merau mai uwa ranne baete yoni-yoni eme yae eleijae. <sup>13</sup> Yesus Naei nene waewaere yakambonde hee mayae rei mai ensukelembe naeise, Yesus beko hubawoungene wanen mae mayae beko hubaungene rei mai kon. <sup>14</sup> Yesus Wali Ondofolole Ro aerene mare a beko ungayembena, mayae onomi foka yae hubannele, rabuhine ban Allahlena Roh nene waewae bele Kiyae mai kena u einye nekelene. <sup>15</sup> Na mekai ban sele mai nolona hi yae ha yae nda aerene beko hubanainyele: ro hombonde aerene, yoko baekoke aerene, me beko u beko mokouboke aerene, nane merau hiwa yo naei aere nangeke a kilate aerene. <sup>16</sup> Nebeibe Wali Ondofolole me kelee u keleene nekate holona yae baembe aerene beko hubanayembe na fe okojiae, nebeibe mayae Yesus Wali Ondofolole holona yae me baeyembe aerene Allahre hili ennehebembe. <sup>17</sup> Nda kani kelana ro miyae na walire Allah hului kolommikonde ya na hului yeuboke. Na bere Allah naei imae ei obe einya yora huba rawembonde hului kolommikonde. Nane merau hului kolommikondere aei holonara huba rawembondena, Allah yae ikeume Wali Ondofolole a foi faeu foi huwayekere ehakoiboi yore me emminononde hele. <sup>18</sup> Allahle homofae einye nda mekai molaikoke:

“Wali himalainyeboke holona ro miyaere

hole moloiboise yabi-yabi helena,

Allah a elelere ei ehaweyei yo bele u mekai bekore mokayeke yo belere

hole omoloiboi sului?”\*

<sup>19</sup> Nebei aerene na foi sele Allah kenare kole huluinye beko hubanayembe ro miyae Allah mare mokombokembe Kiyaele me einye mai uwa kinyennebombe, me u foi na hibi yae mokomembe. Neyae are eleikoyole huluinye mokoiboyole.

## 5

*Jemaatna Be Yun Be Yebae Hebate Yo Naei A Usaei*

\* 4:18 4:18 Amsal 11:31

<sup>1</sup> Reyae Yesus Wali Ondofolo beko hubawoungere ijoko yae ereubokale, nane merau Yesus mende heene reyae nanembainye nene waewaere isebonde. Reyae mangkele mbainya be yun be yebae hebate holona ro mbai nekale yae mayae jemaat u nolo u kainye be yun be yebae hebate yo holore nda a wamale: <sup>2</sup> Allah yae kaenewoumi holona ro miyae mare kinyewombe yore kena rei mai yae holembe narembe. Mokommile hele ma ban, nebeibe mayae kena kaube ma yae narembe, Allah kenare kole huluinye. Nebei yo naeinya rambunde abunele naei ma yae kalia eharaiboi omokojiae, nebeibe ei haweumilere kena kaban kaube ma yae haraungebonde. <sup>3</sup> Mare kinyewombe holona mai kenare kaube huluinye mo mokonayembe naei u bene eharaijae, nebeibe hiwa yo mai u mekai bune wane hamenainyele ma yae ei haweumile. <sup>4</sup> Nebei mekai yaere Yesus jemaat yoni-yni naei Be Yun Be Yebae na kaban sele Kiyae benen mende heene nene waewae bele me buhae wanen rambun huba ban haei ban nekemembe naei inyembe.

<sup>5</sup> Nebei sului mbai mayae hokolo fa holona mai be hokolona yo naei a usaei wayembere uwa ane rannehimbe yae hakombe. Mayae nemene kena u ane rannehimbe yae maise naeise mokomembe. Rabuhine ban Allahle homofaene nda mekai moloukoke: "U maengkeu bele yore

Allah me kena yae rorommile,  
nebeibe kena u ane nihaeinyehike nekate yore

Allah kena buhae aere ban mae ei hawemmiyende."\*

<sup>6</sup> Nebeinye bena fokehonole mende yane Allah mare buma enengkaembombe naeise, Allahle kin kelee hamai keleene kena u ane nihennehimbe nekembe. <sup>7</sup> Mai waline buhaere hokoyembe yoni-yni naeise Allahre ebeline bonembe, rabuhine ban Neyae mare holeyembe nareyembe.

<sup>8</sup> Mai u bene na foi yae nekenayembe nane merau uwa kayaa bele hebembe. Walobo yun mai yokeijore yeuboke. Neyae mai hila rabore beko mokonembombere singa monine a kaban kole ro miyae anengkondere ndire ndare ele mele kole baeumi wanen. <sup>9</sup> Wali Ondofolo Naei a elelere hila rabo halaeunge walora nare hun rannele, be rabulembombe hebembe. Maisaei nekaube hila rabo mbainye halaende holona ro miyae nda kani kela makeinya-makeinya mayae beko hubaunge ma mbai neyae hubayainye. <sup>10</sup> Allah kena buhae aere ban mae heume melaue wae mare Wali Ondofolole eisa kaenewoumbe Naei hehe foi sele huba ban haei ban naemmiyende surgane nekemembe. Mayae ya heki ban beko mennehubangkombera Allah benen mai uwa foi mokonembombe, elae inyembe, nane merau mokonembombe Wali Ondofolo Naei a elelere no ban hee ban hakomembe. <sup>11</sup> Allah mbaibe elae wake bele huba ban haei ban nekenende Kiyae bumana kaennele. Amin.

#### *Ro Melaeyei-Melaeyise*

<sup>12</sup> Silwanus Wali Ondofolo weunge huluinye mokoimeyele aka baeke yae eranale kiyae hakoufeboke nda homo fofo ken moloukokale. Nda homo einya Allah na hele kena buhae aere ban mae heumekoke naeise isaeyaemale, nane merau mare moi huramale nebei kena buhae aere ban heumekoke einye kusei mahei ban nekemembe.

<sup>13</sup> Allah yae Babilon kanina jemaat mare eleuboke wekembe wanen mae eleuboke jemaat mare nanemene ro melaeyayembe. Markus raei kelu wanen kiyae yae ro melaeyembe. <sup>14</sup> Mai nolone hi yae hire foi sele yae ro melaeyemmile.

Reyae ebeli banale Yesus Wali Ondofolo bele mbainye wali nekaube yo nanemene rei mai yae nekembe.

---

\* 5:5 5:5 Amsal 3:34

## 2 PETRUS

<sup>1</sup> Onomi foka! Reyae Simon Petrus, Yesus Wali Ondofolole kaliabe mokale, Naei abu akore yeubokale. Allah aei Walilo, Yesus Wali Ondofolo Kiyae, na wali himaloungeboke hele walora ro miyae hiwa Nare hila rabo haleyainye. Nebei ro miyaere reyaere nda homone molale. Naei hila rabo haleyainye roibu maengkele nane hului mbai. <sup>2</sup> Reyae Allahre ebeli banale mare emekai bele yae kena buhae aere ban mae henemembe nane merau rei mai inyemembe, rabuhine ban mayae aei Allahre bele aei Tuhan Yesus belere raumbokene.

### *Allah Kenare Kole Wali Ma*

<sup>3</sup> Allahle elae wake huluinye Nare ranneboke walora eyae na hului wali hena bona u mekai hubamande nane merau Naei kenare kole hului mokomale. Neyae nene waewae bele nane merau u mekai foi sele Kiyae yae aere kaeneumekoke Naei holona ro miyaere imabondere. <sup>4</sup> Nda kani kelane nekate ro miyae naei bekore kena haehae kate hului nekate. Allahle are heteumekoke wali nibi a walora mayae na hului Naei u mekai ma yae nekembe, nane merau mai bekore kena haehae kaube huluinye ehakoyei naeise, Allah nebei a na foi sele mare yakaubokembe. <sup>5</sup> Allah nebei me u mokoubokene, elae yae relennele mai hila rabo Yesusre haleyaungele naeibe u mekai wa mekai foi yae hara roronnele; u mekai wa mekai foise isaei hebaen bele yae hononayembe; <sup>6</sup> isaei hebaen hononayembe mai u mekai harannele; mai u mekai harannele yae beko hubannele hororebe Yesusre no ban hee ban hakonnembe; beko hubannele hororebe Yesusre no ban hee ban hakonnembe yae Allah kenare kole hului nekemembe; <sup>7</sup> Allah kenare kole hului nekemembe yae Yesusle einye aka baeke ware kena buhae hemmiyembe; Yesusle einye aka baeke ware hemmiyembe yae ro miyae nemene kena buhae hemmiyembe. <sup>8</sup> Nebei u mekai ma nemene mai wali einye nekate nane merau emerei-emerei emerenayendena, ro miyae hiwa isaeinyaibonde mayae aei Tuhan Yesus Wali Ondofolore raungeboke hele nane merau Naei kenare kole na hului mokombe. <sup>9</sup> Nde yae nebei u mekai ma naei wali einye enekeinya na ijoko nabe neumbokene, ereihoi sului. Na u benera haneungekoke Allah yae naei beko bako mokoubokene faeinyeungeboke. <sup>10</sup> Nebeinye aka naei baeke naei, elae yae relennele Allah kenare kole hului nekemembe. Nebei nibi yaere Allah na hele mare kaenengkokembere nane merau elembokembe wekembe Naei holone hambokembere elaebe mokonnebombe. Bumane moloukokale honate a hului mokombena, mayae beko na hibi-hibi omokoyei, <sup>11</sup> nane merau Allah na rei mai yae mare waenensimbe Walilo aei Tuhan Wali Ondofolo Yesus Naei yo waku huba ban haei banne emembombe nekemembe.

### *Petrus Naei Kaliare Mokombondere*

<sup>12</sup> Naendaen wanan hosoro nebei bumane moloukokale a nemene mayae na foi yae isaeyaeuboke nane merau Wali Ondofolole na hele wali nibi a mayae me bobo ikiloungekokerebe, reyaere merau raungehikale nebei a roko yae roko yae isaesengkombere. <sup>13</sup> Reyae hubanale walina nekale yae raei baka ranne raufehike are isaesembombere, <sup>14</sup> rabuhine ban reyaere raeisaei nekale na heki ban mo reyaere hererele. Nebei a ei Tuhan Yesus Wali Ondofolo yae rare yakaufoboke. <sup>15</sup> Nebeinye reyaere hererelera mayae na hibi yae nebei a wengkokamale u bene nekenayemembe naeise, reyaere elae yae relerengkonde.

<sup>16</sup> Meyae mare a huwe bele rorayembe hee aei Tuhan Wali Ondofolo Yesus Nauware kitainyeboke elae bele yae bensonde menderere. Meyae mare ro miyae naeinya relimena yae ehuwei, aei Tuhan Wali Ondofolo Yesus naei one hengkore maei ijoko yae erannebokebe huweyayembe. <sup>17-18</sup> Allah yae eleuboke moko ranne hebewande hee yae, Allah surgara elewole a maengkaei yae borandebokke. Nebei hee Yesusre buma hele kolowounge. Allah Na hehe kaban sele eisa Yesusle a be elewole, "Nda Niyae Reyae buhaere haenale Fa, Ra kena foise mokoufe Kiyae."\*

<sup>19</sup> Allahle yenjo kayaayo yae elewate ako faeuko aei nolone honate, na helere yaeiboke. Mana nda ako faeuko mai u benene nekenayembe hele, rabuhine ban nebei ako faeuko walora mayae na hului nda hene isaeyembombe a na hele bele, a ame-ame bele. Nebei ako faeuko isehe wanan mai nibi ouben haubende naenengkombe. Yesus benen mende heene, Neyae mokommebonde Allahle naeise na yaka isaeimabonde, hehe wanan naemmele. Nebei hehe findelau yahei kitende wanan. <sup>20</sup> Na bereise mayae

\* 1:17-18 1:17-18 Matius 17:1-13

isaeyembombe nda niyae: Allahle yenjo kayaayo naei u benena yae Allahle homone omoloikoi, <sup>21</sup> rabuhine ban Allahle ako faeuko huwaimire, nebei a ro miyae naei u benera ban. Nebeibe Allahle yenjo kayaayo Allahle Roh yae aiboyeungere eisuwewate.

## 2

### *A Na Hele Bande Kelaemi Yo*

<sup>1</sup> Na bere Yahudi ro miyae nolone na hele ban are huwewaimi yenjo kayaayo maijakaiboke. Nebei wanen mbai na hele ban are huwaimi kelaemi yo mai nolora yakanate. Nebei yenjo kayaayo a moi-moi yae Allahle naeise na hele ban a kelenaimile yae, ro miyaere beko mokonaimile. Nemene fomene mere mokoumi Kiyae, Tuhan Yesus, Na ha yae yaroumikoke Kiyae yae nebei yo Wali Ondofolo ban ma elate. Nebei aerene naei uware na heki ban mo Allah beko mokommibonde. <sup>2</sup> Ro miyae helen nebei ame-amere kelaemi yo naei wali niki belere hakonaimile. Nebei aerene hiwa yo Yesusle na hele wali nibi are aukaka yae konate. <sup>3</sup> Nebei ame-amere kelaemi yo rambunde kena kaban koyatene, mai rambunde yaronate naeise ahuba mahi-mahi ahunenainyekonde huwenate. Nendahina Allah yae a hokoukoke nare me nommiyonde, naei me u mokoimeyate ereimeyumi huluinye beko mokommibondere.

<sup>4</sup> Allah yae beko bakore mokowate malaikat-malaikatre ehee bukulu hayeumikoke. Nare anuwau ouben hauben helene\* hayeukoke ha elaekei sele yae ikileumikoke, hebenayende Allah mere nommiyonde yane. <sup>5</sup> Nendahina Allah yae nda kani kelana ro miyae Naei a eelere ei ehaweyei yore hole omoloiboi, bu kaban ufeukoke yae bekore mokoumiboke. Wali himalonainyebonde are huwoumi kiyae Nuh bele ro miyae mehine bee belere mo Allah yae hole moloumiboke.† <sup>6-8</sup> Na bere hele, yo bee hele na ro Sodom bele Gomorah bele. Nebei yo bee na ro miyae me hilae u hilae nekai mokowate, wali niki bele nekwate. Na yane baei wali heere folaikoke are asasi kowate me u mokowate nolone wali himaloungeboko ro mbai nekwole, na ro Lot. Neyae nebei yo naei me u beko bakore ijoko yae erewekene, angkaei yae borowekene, kena beko kaban koweke. Allah nebei yo bee me nommiyoke, i yae woke beikoke ondowaise yeikoke. Allah yae Lotbe hole moloungeboko. <sup>9</sup> Nebei ahuba yae keleume, wali ehimaloiboi ro miyae baetere rahe beko yae benate. Naei kenare kole hului mokoyate ro miyaere weitasi nolora hole molommibonde naeise Allah Naeisaei, nane merau wali ehimaloiboi yore ha yae ikilemmikonde na hibi-hibi ehee bukulu hayemmiyende mende huba mokoikoi yane. Na wali hului kolommikondera me nommiyonde naeise Allah Naeisaei. <sup>10</sup> Nda holore na bereise ehee bukulu yemmile: ro miyae naei bekore kena haehae koyatere na hibi-hibi hakoyate yo bele, na yun-jun holona a waimire moi yae buleyaimi yo bele.

Ame-amere kelaemi yo ukaei selene buhae hokoiboi ban surgana malaikat yoniyonire aukaka koyaimi. <sup>11</sup> Malaikat holona yo naei elae bumana, ame-amere kelaemi yo naei elaera. Nebeibe malaikat holona yo Allahle bene nebei ame-amere kelaemi yore a ohoroiboi, aukaka okoi. <sup>12</sup> Nebei ame-amere kelaemi yo obo yoku u mekai wanen yaeiboke, rabuhine ban u bene foi yae ehayeikoi na bekore kena haehae koyatere mo hakoyatene isaeyeiboi rambunde aukaka yae kaimi. Nebei aerene ro miyae yae obo yokure ikilate beko mokonaimile wanen Allah nare beko mokommibonde. <sup>13</sup> Nebei ame-amere kelaemi yo hiwa yore beko mokaimikoke wanen mbai, neyae beko enainyehubande. Naei u benera nekeyaimi hului, bekore kena haehae koyatere ro miyae bene mokate wali mare yu bele aumiboke. Mangkele nanembainye raman bulaunge eyanaubere nebei yo na yoku ijokore erabuhi ban mae elate rei mai yae hakoyate, erabae nebei nibi yaere jemaatre kelen bele mokonainyele. <sup>14</sup> Neyae nda u mekai beko bele nekate: no ban hee ban kena haehae koyate yoko kaeimaere konayendere, hila rabo elae ban yore na kena hawaimi ro miyae hiwa naei rambun yaronatere na hibi-hibi kena kate. Nebei ame-amere kelaemi yo olomo neumiboke, bekore emmiyendere. <sup>15</sup> Neyae Wali Ondofolole na ijen wali nibire nukainyeboko, na hibi-hibi me u beko mokoyate. Neyae Bileam, Beorle kelu, na wali nibine hakoyainye. Bileam kena kaban roise yarondere naeise, me u beko mokouboko. <sup>16</sup> Bileam me u beko mokoubokene, Allah yae obo yoku keledai a banbe nebeibe ro miyae naei a faeu eleukoke walora Bileamre a ukeunge na me u kobure nukennebondere.‡

<sup>17</sup> Nebei ame-amere kelaemi yo a helen huweyaimilebe, nebeibe me u foi omokoi. Nebei yo bu no kemeleikoyole wanen nane merau mangko nokombi meitoroikoyele alu boye kaban mae haleiboyelene yare owoyoi wanen. Ouben hauben anuwaunge nebei

\* 2:4 2:4 Nda anuwau Yunani afaeunge Tartarus raiboke. Homofae hiwane naraka yae molaikoke, nebeibe naraka Yunani afaeunge gehenna elate. † 2:5 2:5 Kejadian 6-8 ‡ 2:16 2:16 Bilangan 22-24

yore Allah mokoungehake. <sup>18</sup> Nebei yo a bangka-bangkare na ukaei bele yae huwaimi, ro miyaere a keleyaimi na bekore kena haehae koyate hului mo nekenate. Nebei a keleyaimi walora ro miyae manemfa hele wali beko nibine orate yo holora wekate yore muli yoboyaimile. <sup>19</sup> Nebei ame-amere kelaeimi yo ro miyae hiware na kena u bekora na hului nou enaimihembonde a keleyaimibe, nebeibe nenaiejae na bekore kena haehae koyate elae keleene namman nekeyate. Ro mbai hile elae keleene nekeleni, nebei elae bele kiyae na kenare kole huluinye mo mokonde hele. <sup>20</sup> Nda kani kela einye ro miyaere u mekai nikire olaemira. Walilo aei Tuhan Yesus Wali Ondofolore isaeinyaibonde walora nebei u mekai niki belera na hului me rubonainyebonde. Nebeibe ro miyae nebei u mekai niki bele me rubainyebokera benen bukenaibondena, naei u mekai na beko hele inyaibonde, na bere nekewatera. <sup>21</sup> Na foi sele nebei ro miyae Wali Ondofolole wali nibi a hului nekenate walora wali himalainyeboke yo yae me baemmile ako faeuko oboroiboi yae nekenayende. Na beko hele nebei ako faeuko boronate, isaeinyate, nebeisa nebei Allahle ukeumi ako faeukore moi hainyaikonde. <sup>22</sup> Nebei yo naeise ahumboyate eleikoyate a na helebe molaikoke: "Yoku na mikae okoisayele mo benen bukeisiyele anakoyele, nane merau obo bolira bu koiboyole mo benen beisoyle boline eikole."§

### 3

#### *Yesus Benen Mende Ya*

<sup>1</sup> Aka naei baeke naei, nda homofae bee nendo mare molongkokamale. Nebei homofae beene mai u bene na ijen mae harannele naeise reyae walerembondere relaenale. <sup>2</sup> Reyae kena kale mayae Allahle yenjo kayaayo naei ako faeuko nendahina huwewatere nane merau aei Walilo Tuhan Yesus ukeumi a Naei abu ako yae huwayembere u bene nekenayembe.

<sup>3</sup> Mayae isaeyembombe, huba mokoikoi heene ro miyae hiwa na bekore kena haehae koyatere mo hakonate u mekai ma yo yakanaibonde. Nda yo mare aukaka yae konayembe, <sup>4</sup> ungayembe: "Yesus a ukembe Neyae benen bensonde mendere nebeibe emei mo. Aei yobe naei maiserekokera meke nda heene, nemene fomene Allah nda kani kela mokoukoke hului mo honate." <sup>5</sup> Nda ro miyae u mehauwae hanenaimikonde, nendahina Allah a eleukoke walora kun wau bele nda kani kela bele majjeuboke. Allah nda kani kelare bura kanibe waheukoke yae mokoukoke nane merau bu bele yae mokouboke. <sup>6</sup> Nane merau bona ya Allah yae nda kani kelare bu yae beko mokoungeloke, bu kaban mae ufeumikoke. <sup>7</sup> Nda kun wau bele kani kela bele Allahle a yae hole moloimeyunge i yae wononde bengkondere. Ya mbai mende, Allah yae Naei a elelere ei ehaweyei ro miyaere na walire hului kolommikonde, beko mokommikonde. Nebei ya mbai Allah yae nda kun wau bele kani kela bele i yae wononde bengkonde.

<sup>8</sup> Aka naei baeke naei, nda abe u bene enundeijae, Allahle u benene, ya mbai bele ralo yakama 1.000 bele nane hului mbai, nane merau ralo yakama 1.000 bele majjeuboke. <sup>9</sup> Hiwa yo yae elate Allah yae Yesusre wennele benen mende naeise Allah haneungekokene, are eleukoke huluinye omokoiboi. Nebei a hele ban. Allah mai aerene na kena herameyele, rabuhine ban ro miyaere beko mokommikondere Allah ahi hele. Allah Naei kena kaban sele kole ro miyae nemene nulu kenaimibonde.

<sup>10</sup> Nebeibe Naei are eleukoke yane, ro miyae isian yokolo merau wae Yesus benen mende. Kun wau na kulun bele nundenaibonde. Allah yae nda kun wau bele kani kela bele i yae wononde bengkonde, neinya rambun bele nemene fomene u inyaibonde. <sup>11-12</sup> Mana mayae Allah merau raungehike Yesus benen mende yare rei mai yae rakeyaunge. Allahle holona wali ma mo nekemembe, Naei kenare kolere mo mokomembe, rabuhine ban nemene Allah beko mokonnebonde, kun wau i yae wononde bengkonde, mokouboke rambun no yoni-yoni i naumene hibonaikonde. <sup>13</sup> Nebeibe Allah are heteungekoke huluinye kun wau neme bele kani kela neme bele mokombonde. Nda anuwaunge ro miyae wali himalainyeboke yo mo nekenayende.

<sup>14</sup> Nebeinye aka naei baeke naei, nda heera mayae nebei rambun benatere rakembene, Allah kenare kole huluinye mokombere elae relenneme, mai walire Neyae a beko elei sului naeise. <sup>15</sup> Nda a u benene nekenayembe, aei Tuhan Yesus ro miyaere hole molommibondere kena kolene, naei kena herauyele. Aei aka baeke Paulus nebei a mbaibe Allah yae isaei hebaen ikeunge huluinye mai naeise homo einye moloukoke. <sup>16</sup> Paulus nebei isaei hebaen bele na homofae nemene Yesus benen mende naeise moloukoke. Nebei homo einye a mbemba isaeinyaibondere ehakaie hubainye yo bele hila rabo elae ban yo bele bukainyehike. Pauluslena a faeufe u mehauwae naei kenare

huluinye eibuke meibuke bukeyainye, Allahle homofaene ako faeuko hiwa nebei hului mbai mokoyaimile. Nebei aerene Allah nare beko mokommibonde.

*A Humboise*

<sup>17</sup> Aka naei baeke naei, mayae maisaei a hele bande kelaeimi yo ame-amebe yanenayembe. Nebeinye, naei a elenatere kayaa hebembe, rabuhine ban nebei ame-ame kelaeimi yae mare yobonayembe mai hila rabo Wali Ondofolore haleungelera balembe belene. <sup>18</sup> Nebei rambun benate belene, aei Tuhan Wali Ondofolo Yesus kena buhae aere ban heumele Kiyare fo i yae ronnebombe naeise na hibi-hibi relennembe.

Yesusre huba ban haei ban hili hebenainyende.



## 1 YOHANES

<sup>1-2</sup> Onomi foka, aka naei baeke naei, Yesus Allahlena wali hena bona nibire keleume Kiyaele naeise meyae nda homone molande. Na beme fome hele Neyae aei Ako Allahle mbainye nekewote. Aei nolone meke nekewole. Naei ako faeuko maei angkaei yae borowande, Nauwa maei ijoko yae erewande, me ramewannele. Neyae wali huba ban haei ban nekele Kiyae na hele Nauwa meuyakauboke are meyae huwande. <sup>3</sup> Maengkele mangkele homo mbainye oromale wali mbainye nekemale naeise nda ijoko yae eranneboke nane merau Naei ako faeuko borannekoke are isaeyaeyembe. Na hele Allahle Yesus Wali Ondofolole maengkele homo mbainye orande wali mbainye nekande. <sup>4</sup> Maei kena u rei mai ammebonde komale naeise nda homone molande.

### *Allahle Hehene Oroi-Oroi*

<sup>5</sup> Meyae nda a Yesuslera borokandebé mare wayembe: Allah hehe no nekele, Naei eise ouben hauben u hele. Nebei hehe wali nibi isaei hebaen wanen mae yeuboke. <sup>6</sup> Allahle a elelere oboroiboi wali ma nekatere ouben hauben wanen. Allah Naei wali nibi mbainye orande wali mbainye nekande naeise elandebé nebeibe Nare onaenne wali ma nekandena, aei uware ame-amebé bemande nane merau Wali Ondofolole walora na hele wali nibi a huluinye enekei. <sup>7</sup> Allah isaei hebaen bele nekele Kiyae. Hehe naeumile nolona wanen mae nekemale, Naei isaei hebaen huluinye wali nibi oromalena, aeise naeise homo mbainye oromale wali mbainye nekemale nane merau aei beko bako yoniyoni Allah na Kelu Yesusle ha ohalene rileuboke yae kuyemmele. <sup>8</sup> Nebeibe aei uware beko bakore omokoyejiae elemalena, aei uware enaei ame-amebé baennele nane merau Wali Ondofolole walora na hele wali nibine oroi. <sup>9</sup> Eyae beko bako mokomabonde hee Allahre nebei me u naeise wo komakandena, Allah me u na ijen mo mokole nane merau Naei are eleikoyole huluinye mokoiboyolene, aei beko bako faeinyemnebonde nane merau aei me hila u hila nanemene kuyemmekonde. <sup>10</sup> Aei uware beko bakore omokoyejiae elemalena, Allahre ame-ame bele Ro yae erannele nane merau Naei a elelere aei kena u eisa oboroiboi. ((Rabuhine ban Allah a eleuko, ro miyae nanemene beko bakore mokate yo mo.))

## 2

<sup>1</sup> Raei kelu omi yae me baemale yo, mayae u mekai beko omokoi nekembe naeise nda homo moloukokale. Nebeibe mai nolona ro miyae hi beko einye ruwendena, aei aere ne oleyele Kiyae na Ro Yesus Wali Ondofolo wali himaloungeboke Kiyae hakommele. Nebei Kiyae yae aei beko mokandebokere faeinyemnebonde naeise Ako Allahre riyennehinde. <sup>2</sup> Aei beko bako aere ne Yesus ohaline baikoke hereke. Nebei mekai yae Allahle ro be ro yoinye aei beko bakore aheukoke baefoke. Aei holona yo naei beko bako mokate aere ne mo ban, nda kani kelana hiwa yo naei beko bako aere bele haiboke.

<sup>3</sup> Allah weume are eyae hubara haeisa yanemanende u mekai walora eyae isaemabonde Allahre eyae ro ranneboke. <sup>4</sup> Ro miyae mbai yae elende, "Reyae Allahre roungebokale," nebeibe Allah yae weunge a hubara haeisa eyaneinya, nebei ro miyae ame-amebé bele ro nane merau Wali Ondofolole walora na hele waline oroi. <sup>5</sup> Nebeibe nde yae Allah Naei a elelere hubara haeisa yaneeunge, nebei ro miyae naei kena u einye Allah na kena buhae u buhae maemae konnekonde. Eyae nda nibi yaere Allahle einye nekande naeise isaemabonde: <sup>6</sup> nde Allah nangkele mbainye nekete yae elendena, nebei ro miyae Yesuslena wali nibi orowole wanen mbainye oronde hele.

<sup>7</sup> Reyae buhaere haemale aka naei baeke naei, nda homone moloukokalene a emebe ewei. Nda wamale are na bere hele mayae borokaube mbai. Nebei wamale are mayae ninae borokaube. <sup>8</sup> Nebeibe nda homona moloukokale a eme wamale wanende yeuboke. Yesus nda a wamale wali ma huluinye nekewole nane merau mayae nekaube. Na bere mayae Allahre onewaungene wali ouben hauben nolone nekewaube, nebeibe mana Yesusle walora wali nibi huluinye nekaube hehene oraube wanen.

<sup>9</sup> Nde yae Allahle hehene nekele yae elele nebeibe naka baekere na hibi-hibi ikele yae koulmila, nebei kiyae na wali ouben hauben nolone namman nekeimeyele. <sup>10</sup> Nde yae na aka baekere kena buhae u buhae hemmile, nebei kiyae Allahle hehene namman nekele. Nebei u mekai foinye na hibi-hibi nekele ro miyae, hiwa yore oro halun wanen mae u mekai beko yae enaleisi eruwei. <sup>11</sup> Naka baekere na hibi-hibi ikele yae koulmile ro miyae, wali ouben hauben nolone namman nekele nane merau Allahre oneunge wali ma yae nekeimeyele. Wali foise ende nibi naeisaei ban yeuboke, rabuhine

ban wali ouben hauben mae na ijokore kumba mokoungebokene. <sup>12</sup> Mayae jemaat, kena buhaere haemale kelu omi wanen ro miyae, Yesu Ro ranne mai beko bakore faeinyembokembene, reya nda homone molale. <sup>13</sup> Rorele wanen hila rabo henauboke yo, Wali Ondofolo na beme fome hele nekewole Kiyae mayae ro raungebokene, reya nda homo mai naeise molale. Ro hokolo fa wanen manemfa Wali Ondofolore hila rabo halaeunge nane merau walobo yunde melaungehake yo, reya nda homo mai naeise molale. <sup>14</sup> Kena buhae haemale kelu omi wanen ro miyae, Ako Allah mayae ro raungebokene, reya homo mai naeise moloukokale. Rorele wanen hila rabo henauboke yo Wali Ondofolo na beme foma hele nekewole Kiyae mayae ro raungebokene, reya homo mai naeise moloukokale. Ro hokolo fa wanen manemfa Wali Ondofolore hila rabo halaeube yo, mai hila rabo elae nekaubene nane merau Allah mai kena une a wembene nane merau walobo yunde melaungehakene reya homo mai naeise moloukokale. <sup>15</sup> Mayae nda a angkaei foi yae borombo! Nda kani kelana wali beko nibine orombere nane merau neinya rambun yoni-yoni belere kena okoiyae. Ro miyae nde yae nda kani kelana wali beko nibine oronaterere kena kondena, nebei kiyae Ako Allahre kena buhae ehei. <sup>16</sup> Rabuhine ban ro miyae nda kani kelana wali beko nibine orate yo na u mekai nda holo namene nekate: yoko kaimere kena haehae koyate, ijoko yae ereiboyate rambun yoni-yoni kena kaban yaronaikondere, nde maenin mae ro ronainyele naeise baete. Nebei u mekai holo Ako Allahlera mate ban, nana hesele nda kani kelana wali beko nibi naei. <sup>17</sup> Nda kani kela bele wali beko nibi nundenayende howalenayende nane merau ro miyae herenate heene nda kani kelana rambun yoni-yoni rabuhi ban inyaibonde. Nebeibe ro miyae Allah kenare kole huluinye wali nekenate yo wali huba ban haei ban nekenayende.

*Wali Ondofolore Wali Nibira Eweyeijae*

<sup>18</sup> Reya buhaere haemale kelu omi wanen ro miyae, nda hee huba mokoikoi yabe nobeungekoke. Mare a usaei uwayembene borowaube nebei yabe emei yae, Yesu Wali Ondofolore ro ban yembondere relennele ro mbai menyakambonde. Nda hee nebei rolana u mekai wanen ro miyae helen maijakauboke. Nebei niyae iwaufa isaemabonde nana hesele nda hee huba mokoikoi yabe yeuboke. <sup>19</sup> Yesu Wali Ondofolore ro ban yembondere relenainyele yo bere aengkele holo mbainye nekewande. Aei holona yo hele bande yaeibokene nebei yo aei u nolo u kaisa aibaleke. Nebei ro miyae aei holona yo hele yaeiboube yae, aengkele mbainye na hibi nekandeweube. Nebei yo wekatene mo, na yaka yeuboke nanemene aei holo einye eyeiboi.

<sup>20</sup> Aka naei baeke naei, mayae nebei mekai ban, rabuhine ban Allahle Roh mare aubokembene nane merau mayae Wali Ondofolore walora na hele wali nibi are isaeyaeubokene. <sup>21</sup> Mayae isaeyaeuboke Wali Ondofolore walora na hele wali nibi ane ame-ame u hele. Nebei aere ne reya nda homone moloukokale. <sup>22</sup> Ame-amere bele kiyae na hele nde? Na hele nda a mekai yae eyelewole: Yesu nana hesele Allah yae oro umau heraweungeboko Wali Ondofolo Kiyae ban. Nebei a ma elate ro miyae Yesu Wali Ondofolore ro ban yembondere relainye yo. Nebei yo Ako Allahle na Kelu Yesu bele nangeke mbainye enekei. <sup>23</sup> Nde yae Yesusre Naeko Allah yae eleuboke Wali Ondofolo ban mae elendena, nebei kiyae Ako Allah nangeke mbainye enekei. Nebeibe Yesusre Naeko Allah yae eleuboke Wali Ondofolore oro umau heraweungeboko Kiyae na hele elendena, nebei kiyae Ako Allah nangeke mbainye nekete. <sup>24</sup> Nebeinye kayaa foi hebembe, Yesuslena a mayae na bere hele boraubokebe hila rabo halemembe. Nebei borauboke are hila rabo halemembena, Ako Allah bele Na Kelu Yesu bele mangkele mbainye nekemembe. <sup>25</sup> Eyae nebei wali ma nekemalena, Yesu Wali Ondofolo Nenaeyiae are heteungekoke wali hena bona aere yemmele.

<sup>26</sup> Yesu Wali Ondofolore ro ban yembondere relenainyele yo yae relainye mare wabenayensimbe balembe bele, nebei yo naei u mekai ma nda homone moloukokale. <sup>27</sup> Nebeibe Yesu Wali Ondofolore walora Allahlena Roh mare aubokembe. Nebei Roh namnan nekelene, ro miyae hi naei a eme kelaemire oboroiyae. Rabuhine ban Allahle Roh yae mare rambun nemene fomene kelembe. Naei kelembe a na hele, ame-ame ban. Nebeinye Allahle Roh yae kelewombe huluinye mo mayae mokombe. Wali Ondofolo mangkele mbainye nekemembe.

<sup>28</sup> Reya buhaere haemale kelu omi wanen ro miyae, Neyae mende heene fe hubamandane uware emafaembonde anuwaube baemale bele, nebeibe Naei ro be ro yoinye be yae rabulemabonde emahembonde naeise, nda hee Wali Ondofolo mangkele mbainye nekemembe. <sup>29</sup> Mayae maisaei Yesu Wali Ondofolo Naei wali himaloungeboko! Nebei sului mbai mayae isaeyaeuboke ro miyae na wali ijen nekatena, fa manemfa honate wanen nebei ro miyae na kena u Allahlera honokate.

## 3

*Kena Buhae U Buhae Naeise*

<sup>1</sup> Eyae rei mai kaban kande, rabuhine ban Allah na kena buhae emekai bele aere heumekokene, Naei kelu omi yae. Nana hesele eyae Naei kelu omi. Nda kani kelana ro miyae yae eyae Allah naei kelu omi yae me baeumbokere onaeime, rabuhine ban nda kani kelana ro miyae Allahre onaeinyene. <sup>2</sup> Kena buhaere haemale aka baeke, eyae nda hee Allahle kelu omire yaendebokebe, nebeibe aei uwa ma enaibende yoni-yoni namman foi yae isaeyeihoi nekande. Eyae aeisaei Yesus Wali Ondofolo mende heene eyae Naei uwa wanen mae imabonde, rabuhine ban Naei uwa hele kiteungebokere aei ijoko hele yae eremande. <sup>3</sup> Ro miyae nanemene Yesus Naei uwa hele kiteungebokere erennebondere rabo halennele kiyae, na u mekai beko nukennebonde, Yesus Wali Ondofolo u mekai yolo-yolo Kiyaelena wali wanen mae nekende.

<sup>4</sup> Allah Naei a elelere ro miyae naei kenane une isaeyeumi. Ro miyae mbai me u beko mokombondena, nebei kiyae Allahle are ehakoibo. "Beko bakore" elate na mekai Allahle are asasi koikoyainyene. <sup>5</sup> Ro miyae naei u mekai beko faeinyeboisene Yesus Wali Ondofolo meke. Mayae isaeyaeuboke Yesus Wali Ondofolole uwa einye u mekai beko u hele. <sup>6</sup> Ro miyae nanemene Yesus Wali Ondofolole einye nekate yo yae benen u mekai bekore omokoyei. U mekai beko na hibi-hibi mokonayende ro miyae Wali Ondofolore ereiboi nane merau oroibo nekate.

<sup>7</sup> Reyae buhaere haemale kelu omi wanen ro miyae, nde maenin horo mare wali nibi beko yae kelenengkombe wali horombombe belene, mayae ewaeisijae hele. Me u ijen mokate ro miyae na wali himalainyeboke, Wali Ondofololena wanen mbai. <sup>8</sup> Ro miyae u mekai bekore na hibi-hibi mokoyate yo walobo yun me kelee u keleene nekate, rabuhine ban na bera hele neyae u mekai beko mokoumeke. Walobo yun me u beko mokoumine nuhu nahu inyaibonde belene Allahle Kelu meke. <sup>9</sup> Fa manemfa honate wanen na kena ure Allahlera honokate ro miyae, u mekai bekore omokoyei, rabuhine ban naei kena u einye Allahle u mekai foi yae meleme raufikene. Neyae u mekai bekore omokoyei sului, rabuhine ban naei kena ure Allahlera honokatene. <sup>10</sup> Allahle kelu omi bele walobo yunbe kelu omi bele nda u mekaisa mo isaemabonde: Ro miyae nde me u ijen omokoinya, nane merau naka baekere kena buhae u buhae eheinya, Allahle kelu omi yae me ebaei sului.

<sup>11</sup> Yesusle a faeu na bere hele huwoumbera mayae nda abe boraukoke, "Eyae kena buhae u buhae aeise naeise hemale." <sup>12</sup> Aei u mekai Kainbena wanen mae omokojiae. Naei u mekai bekone walobo yunbe holona rore yeuboke. Kain na u mekai beko nda nyiae: nauwakere wali himaloungebokene nane merau na u mekai beko aere ne nauwakere kena ikele kowoungue houboke.\* <sup>13</sup> Nebei hului mbai aka naei baeke naei, nda kani kelana wali beko nibine hakoyate yo yae mare ikele konayembe naeise mayae fa yae oboijae hele. <sup>14</sup> Eyae Allah bele wahaendekoke ro miyae holonara andebaleke wali neme bele ekannekande naeise aei aka baekere kena buhae u buhae haemmile yae kelemamile. Kena buhae u buhae ban ro miyae Allah bele wahaekoikebe nekate. <sup>15</sup> Naka baekere ikele koyeumi kiyae Allahle ro be ro yoinye nebei kiyae ro miyaere hate holona rore yeuboke. Mayae maisaei ro miyaere hate holona yo mbai sambai wali hena bona eisubaikoi.

<sup>16</sup> Kena buhae u buhae hei-seise nda u mekai yae isaemabonde: Yesus Wali Ondofolo aei aere ne Naei wali kinyeumbokere. Nebei aere ne aei wali nebei sului mbai aei aka baeke aere ne relemande. <sup>17</sup> Ro miyae mbai wali rambun na hului sului honnainyele, nebeibe naka baeke hi erunge wali rambun kalo moloungeboke heene bolu yae kelendena, Allahlena kena buhaere heumi elae na kena einye enekei. <sup>18</sup> Reyae buhaere haemale kelu omi wanen ro miyae, Allah yae ro miyaere kena buhae u buhae heumile wanen mae, men, aei a yae faeu wae mo hiwa yore kena buhae eheijae, nebeibe u mekai wa mekai bele yae na hele mokomale.

<sup>19-20</sup> Nda nibi yae isaemimale Wali Ondofolole na hele wali nibine orande: Allah na kaban hele, aei kena u einye nekate yoni-yoni bele aei me u mokande bele nemene fomene Neyae naeisaei. Aei kena u osaemabonde heene eyae isaemabonde me u beko mokandeboke. Eyae Allahle Roh Naei a elelere kena u einye hakomale yae kena foi u foi nekemale.

<sup>21</sup> Buhaere haemale aka baeke, aei me u beko bakora aei kena u isasa alalo okoinya, na hului be yae rabulandeboube Allahre ebeli bannele. <sup>22</sup> Nebeisa rahe rambun naeise eyae rimalena na hului yaromale, rabuhine ban Allah weume ana hului mokanne nane merau Na kena ure roweisiyunge me u mokannelene. <sup>23</sup> Nda a nyiae Allah ukeume

\* 3:12 3:12 Kejadian 4:1-14

eyae mokomalere: Allah na Kelu Yesus Wali Ondofolore raneujeke na hele elemale hele, nane merau Naei a ukeume hului kena buhae u buhae aeise naeise hemale hele. <sup>24</sup> Nde yae Allah weumi are hakoyainye yo Allahle einye nekate nane merau Allah naei kena u einye nekele. Allah aei kena u einye nekele naeise Allahle Roh ikeume yae isaeyemmele.

#### 4

##### *Allahlana A Faeu Yoni-Yoni Na Hele, Ame-Ame?*

<sup>1</sup> Kena buhaere haemale aka baeke, ro miyae nemene nauware Allahle Roh a weumi walora elenayende yo naei na hele yae eleyeijae. Ro miyae nauwara Allahle Roh a weumi walora elate yore umali hubammihimbe. Nebei mekai yae mayae isaeyembombe nebei roh Allahlana, Allahlana ban, rabuhine ban ame-amere kelaeimi yenjo kayaayo helen sele majakauboke nda kani kelane faeungekoke oroyate. <sup>2</sup> Allahlana Roh, Allahlana Roh ban naeise nda u mekai yae mayae isaeyembombe: Yesus na hele Allah yae oro umaufe heraweungeboke Wali Ondofolobe ro miyae uwa wanen mae nda kani kelare meke are na hele yae elenatena, nebei ro miyae Allahle Roh a weumi walora elate. <sup>3</sup> Nebeibe Yesus Wali Ondofolo ban mae elenatena, Allahle Roh a weumi walora elate yae eleyeijae. Nebei ro miyae Wali Ondofolore ro ban yembondere relennele kiyaele roh a weumi walora elenate. Nebei Wali Ondofolore ro ban yembondere relennele kiyae mende naei a mayae borokaube. Nda hee nebei kiyaele roh nda kani kela eise meke.

<sup>4</sup> Kelu naei omi naei, mayae Allahle holona ro miyaere yaendeboke. Nane ame-amere kelaeimi yenjo kayaayore melaumihake, rabuhine ban Allahle Roh mare aubokembene. Allahle Roh elae bele, nda kani kelana wali beko nibine orate ro miyaere aumiboke roh elae ban. <sup>5</sup> Ame-amere kelaeimi yenjo kayaayo nda kani kelana wali beko nibire hakoyate yo, wali beko naei a faeufe kelaeimi. Nda kani kelana wali beko nibine orate holona ro miyae nebei ame-amere kelaeimi yenjo kayaayore boroyaimi. <sup>6</sup> Meyae Allahlana ro miyae. Nde yae Allahre ro ronnebonde kiyae maeinya a faeu elandere boronde. Nde Allahle holona ro miyae banna, maeinya a elandere neyae oboroi sele. Nebei nibi yae Allahle Roh a weumi walora kelaeimi ro miyae bele, walobo yun ame-ame bele kiyae a weumi walora kelaeimi ro miyae bele, na yaka ro romamikonde.

##### *Maise Naeise Kena Buhae Eise Meise Yae Hemembe*

<sup>7</sup> Kena buhaere haemale aka baeke, men, aeise naeise kena buhae u buhae hema, rabuhine ban kena buhae u buhae hei-seise Allah yae yeume. Fa manemfa honate wanen na kena u Allahlera honokate ro miyae kena buhae u buhaere heyate nane merau Allahre ro rainyeboke. <sup>8</sup> Ro miyae nde kena buhae u buhae eheyai kiyae Allahre oneunge, rabuhine ban Allah kena buhae u buhae hei-sei none. <sup>9</sup> Allah naei kena buhae u buhae aei u nolo u kainye nda u mekai yae meumejakauboke: eyae Naei walora wali nekemalere Allah Na Hina Fa Hoi Fa nda kani kelare ukeunge meke. <sup>10</sup> Kena buhae u buhae na mekai nda niyae: eyae Allahre kena buhae u buhae haennekoke ban, nebeibe Allah yae aere kena buhae u buhae heumekoke. Aei beko bakore ahengkonde baensonde naeise, Na Kelu ukeunge meke Naei wali yae kinyembondere. <sup>11</sup> Kena buhaere haemale aka baeke, Allah aere kena buhae emekai bele heumekoke aere, eyae nebei sului mbai kena buhae aeise naeise hemale.

<sup>12</sup> Ro miyae roko mbai sambai Allahre ereiboi hororebe, kena buhae u buhae aeise naeise hemalena, Allah aei wali einye nekende nane merau Na kena buhae u buhae aei kena u einye na hului yembonde. <sup>13</sup> Eyae Allah bele mbainye nekande nane merau Allah aengkele mbainye nekande naeise nda nibi name yae isaeyaendeboke: mbai nendo, Naei Roh aere ikeumene. <sup>14</sup> Bee nendo, eyae ijoko yae erekannele Ako Allah Naei Kelure ukeunge nda kani kelana ro miyae hole moloiboise meke. Nebei are ro miyae hiwa yore eyae isaeyemmile. <sup>15</sup> Ro miyae nde Yesusre Allahle Kelu yae na hele elende kiyae, Allah bele mbainye nekete nane merau nebei kiyae Allah Nangkele mbainye nekete. <sup>16</sup> Name nendo, Allah aere kena buhae u buhae heumekoke naei isaeyaendeboke nane merau hila rabo halaende. Allah kena buhae u buhae hei-sei nore yeuboke. Kena buhae u buhae heyate ro miyae Allah bele mbainye nekate.

<sup>17</sup> Yesus ro miyae naei walire hului kolommibonde yane aere be kalemmehande naeise, Allah na kena buhae u buhae aei kena u einye na hului-sului nda nibi yae mokommekonde: nda kani kelane eyae Yesus bele mbainye nekemayende. <sup>18</sup> Kena buhae u buhaere haeme ro miyaere mayae fe waku okommimae. Ro miyae Allah kena buhae u buhae heume wanen hiwa yore kena buhae haemile yo, Allah ehee bukulu yemmilere buhae-buhae okoi. Ehee bukure fe waku bele enaikonde ro miyae Allah kena buhae u buhae heume wanen ehei yore.

<sup>19</sup> Allah na bemere hele aere kena buhae u buhae heumekokene, eyae hire kena buhae u buhae hemamile. <sup>20</sup> Ro miyae hi yae elende, "Reyae na hele Allahre kena buhae u buhae haenale," nebeibe naka baekere ikele koimeyemina, nebei ro miyae na wali ame-ame bele. Rabuhine ban aka baekere ijoko ereumi kiyaeere kena buhae u buhae eheinyana, roko mbai ijoko yae ereiyei Allahre kena buhae u buhae ehei sului. <sup>21</sup> Nda a Yesus Wali Ondofolo yae aere ukeume mokomalere: nde yae Allahre kena buhae hennele, naei aka baekere nebei sului mbai kena buhae u buhae hemmile hele.

## 5

### *Wali Hena Bona Naei*

<sup>1</sup> Allah yae raneujeke oro umau heraweungeboke Yesus Wali Ondofolore yeuboke Kiyaeere hila rabo haleiyate ro miyae naei kena u Allahlera honokate. Nane merau honoukoke akore kena buhae u buhae haeyine ro miyae, honoukoke fa-fare bele kena buhae u buhae henaimile. <sup>2</sup> Nda u mekai yae isaeyande Allahle kelu omire kena buhae u buhae haemmile: Allahre kena buhae u buhae haennele nane merau Naei a weume huluinye mokande. <sup>3</sup> Allahre kena buhae u buhae haennele na mekai nda niyae: Naei a weume hului mokomale. Nana hesele Allah Naei weume a ehekaei sele ban. <sup>4</sup> Kena ure Allahlera honokate ro miyae nda kani kelana wali beko nibira nauwa wekate. Yesus Naei a elelere hila rabo halaenne walora nda kani kelana wali beko nibi nelaere melennehande. <sup>5</sup> Ro miyae Yesus Allahle Kelu are na hele elenate yo yae mo na hului nda kani kelana wali beko nibi nelaere meleungehake. <sup>6</sup> Nda Kiyae Niyae, Yesus Wali Ondofolo Niyae, nda kani kelana nekewole heene, bu yae koungeboke nane merau Naei hare rileuboke. Neyae bu yae koungeboke mo ban, nebeibe Naei wali bele ha bele kinyeungeboke hereke. Nane merau Allahle Roh yae Wali Ondofolo Naeise a na hele isaeyiwumi, rabuhine ban Neyae na hele mo eyelewole. <sup>7</sup> Nda a name isaeyaeimele ((Yesus na hele Allahle Kelu Wali Ondofolo Kiyae)): <sup>8</sup> Allahle Roh weume a, Yesus bu yae koungeboke heena surgara a, Yesus Na ha rileuboke hereke heena a wanan iwau yoni-yoni. Nebei name Yesuslena a mbaise mo isaeyaeimi. <sup>9</sup> Wali Ondofololena a ro miyae yae huwaimire na hele yae elande, nebeibe Allah yae eleukoke a emekai bele, rabuhine ban Allah yae na Kelule naeise abe eleukokene. <sup>10-11</sup> Allah yae Yesusle naeise nda are ukeume, "Raei Kelule walora mare wali hena bona ikamale." Nde yae Allahle Kelure hila rabo halennele kiyae, Allah yae elele are na kena einye nekende. Nebeibe Allah yae Naei Kelule a elelere na hele ban mae elate ro miyae Allahre ame-ame bele Kiyae yae elate, rabuhine ban Allah yae Na Kelu naei a eleukokere na hele ban mae elaikokene. <sup>12</sup> Nde yae Allahle Kelu bele mbainye nekete kiyae, wali hena bona hubannende. Nde yae Allahle Kelu bele mbainye enekei kiyae, wali hena bona ehubaikoi.

<sup>13</sup> Mayae Allahle Kelu naei Rore hila rabo halaube holona yore, mayae wali hena bona yaraukokere isaesimbombere reyae nda homo molale. <sup>14</sup> Nda naeise na foi yae isaeyaendeboke: Allah kenare kole huluinye rambun riyemanelena, eyae na hului be rabulemabonde Allahre ebali bomansinde nane merau Neyae borommehonde. <sup>15</sup> Eyae isaeyaendeboke riyanne huluinye Allah borommehondena, eyae riyewande rambun yoni-yoni na hului yaromakonde. <sup>16</sup> Nebei a faeu na meli mekai nda niyae: mai aka baekere homo mbainye oraube nolone ro miyae hi Allah bele ewaheikoi u mekai ma beko mokombondena, mayae nebei ro miyae naeise Allahre ebali bonnehimbe Allah wali yennele. U mekai beko ma hi mokonnele nebei mokole Kiyae Allah bele waheneikonde, here no unulu bele waheikoke wanan. Nebei ma u mekai beko mayae Allahre ebali bonnelle naeise reyae mare ewei. Allah nda rore wali eyei. <sup>17</sup> Me hila u hila nanemene u mekai bekore mokaimi bangka mo. Nebeibe u mekai beko ma mbai, nebei mokole kiyae Allahle waheneikonde.

<sup>18</sup> Eyae isaeyaendeboke kena u Allahlera honokate ro miyae u mekai bekore na hibi mo omokoyei. Allahle Kelu nare ei haweyemine, walobo yun, u mekai bekore mokole kiyae, Allahle kelu omire beko omokoi sului. <sup>19</sup> Eyae isaeyaendeboke Allahle kelu omire yaendeboke, nane merau eyae isaeyaendeboke nda kani kelana wali beko nibine orate ro miyae nanemene walobo yun u mekai bekore mokole kiyaele me kelee u keleene nekate.

<sup>20</sup> Nane merau eyae isaeyaendeboke Allahle Kelu meke, eyae Allah na hele no Kiyaeere romambondere isaai ikeume. Aengkele Allah bele Na Kelu Yesus Wali Ondofolo bele Nangkele mbainye nekemale. Wali Ondofolo Kiyae Allah helebe yeuboke, ro miyaere wali hena bona yemmile.

<sup>21</sup> Reyae buhaere haemale kelu omi, hoime bahe yoni-yonire ei omoloiiae.

## 2 YOHANES

<sup>1</sup> Onomi foka mayae Allah yae eleuboke wekembe holona ro miyae, nake miyae naei kelu omi bele homo mbainye oraube wanen yo, reyae Yohanes, jemaat naei be yun be yebae holona ro. Reyae Wali Ondofolole walora na hele wali nibine orale yae mare buhae haemale. Reyae mo ban, ro miyae nanemene Wali Ondofolole walora na hele wali nibire rainyeboke yo bele mare kena buhae haeyembe. <sup>2</sup> Reyae mare haemale, rabuhine ban nebei wali nibi a aei kena u einye nekele nane merau huba ban haei ban nekenende.

<sup>3</sup> Reyae ebeli banale, Wali Ondofolole walora na hele wali nibine oromalene, nane merau kena buhae u buhae haemmilene, Allahle nane merau Allahle Kelu Yesus Wali Ondofolole kena buhae aere ban heneimele, yanekoi yase yae ei haweneimele, nane merau kena foi u foi mokoneimele.

<sup>4</sup> Raei kena u rei mai sele kale, rabuhine ban mai jemaat nolona ro miyae hiwa yo ndane hubayaendekoke nane merau nebei yo eramaele Allah are ukeume huluinye Wali Ondofolole walora na hele wali nibine orate. <sup>5</sup> Nebeinye reyae mare jemaat wamale maise naeise kena buhae u buhae hemembe. Nebei wamale a eme ban, na beme fomere Allah yae ukeume a faeu boraukoke ma mbai mo honoimeyele. <sup>6</sup> Aeise naeise kena buhae u buhae hemande nane merau u mekai Allah yae are weume hului mokomale.

<sup>7</sup> Nebei a wamale, rabuhine ban ro miyae helen nda kani kela na hubane hubane faeungekoke oroyate, wali nibi ma hi ame-amebe kelaeimi. Yesusre Allah yae oro umaufe heraweungeboke Wali Ondofolore raneujeke a nane merau Neyae ro miyae uwa yae meke are nda a ame-amere kelaeimi yo yae na hele ban mae elate. Nebei ro miyae ame-amebe wabaimi nane merau Wali Ondofolore ro ban yembondere releyainyele holona yobe nekate. <sup>8</sup> Mauwa kayaa bele hebembe meyae kelewayembe are u bene nundenayengkombe bele, nebeibe mayae elae relennele Na me buhae na hului enjarombe. <sup>9</sup> Yesus Wali Ondofolo yae kelewoumi a usaei waeisaei huluinye enekei ro miyae, Allah bele mbainye enekei. Nebeibe nde yae Wali Ondofolo yae keleumi a usaei waeisaei huluinye nekende kiyae, Ako Allah bele Na Kelu Yesus bele mbainye nekate.

<sup>10</sup> Ro miyae mai bokore menate yo a usaei waeisaei nda a faeu wamalera ma hi hungatena, nebei ro miyaere mai imaere enatena ei ehaweijae, nane merau nebei yore wauwa bele a emelaeyemmimae. <sup>11</sup> Nde yae nebei holona yore ei hawemmilena, nebei holona yae me u beko mokatere nangkele yeuboke mokate.

<sup>12</sup> A helen bolen sele nda homo molalena isaeisemberebe, nebeibe tinta yae homo raitainye molorekonde naei reyae kena ban. Reyae rabo halaele na heki ban mo mangkele hubaimakonde, nane merau aei kenare rei mai ammebonde komale naeise, be yoi mbainye eremale nane merau a faeu mbainye elemale.

<sup>13</sup> Nda jemaatna ro miyae mai jemaat einye ro miyaere ro melaeyayembe. Maei jemaat bele mai jemaat bele Allah yae eleuboke wekeunge ako mbainya emaan wanen nekande.

### 3 YOHANES

<sup>1</sup> Onomi foka aka baeke Gayus, reyaе jemaat naei be yun be yebaere hebale. Aka baeke, reyaе Wali Ondofolole walora na hele wali nibine oralene, ware kena buhaе haewale.

<sup>2</sup> Aka baeke, nda hee waei kena une foi sele bele nekeyae. Nebei wanen mbai waei uwa naeise reyaе Allahre ebeli banale riyanale uwa onomi foka yae nekele. <sup>3</sup> Aei jemaatna aka baeke wa holo mbai ndare mekate yo waei naeise nda a huwaisele, "Weyae Wali Ondofolole na hele wali nibi are borokae heera nebei sului mo nekeyeyae." Nebei aerene raei kena rei mai sele aufeboke kale. <sup>4</sup> Raei kelu omi wanen ro miyae Wali Ondofolole walora na hele wali nibine oratene, raei kenare rei mai emekai bele ansebonde korele, rambun hi-hi yae bekoise na hului ban sele.

<sup>5</sup> Aka baeke, ware kena buhaere haewale kiyae, weyae aei jemaatna aka baeke holona yo naei wali rambun na huluinye hakaemae. Naendae mekai horo nebei ro miyae weyae ro oroiboibe, weyae Wali Ondofolo yae weyete huluinye ei hawamae. <sup>6</sup> Nebei aka baeke holona yo yae waei kena buhae hei-sei are maei jemaatre homone molaiikoke. Allahre kena foise mokoungebondere u mekai haraungebokaene nebei aka baeke wa nibi a enate heene, kolo naei era inyale na hului hakoumibonde, <sup>7</sup> rabuhine ban Wali Ondofolole aerene nda yo kulun ukate. Nebei kalia enaimokondere Allahre isian yo naeisa rambun mbai sambai ejaroikoi. <sup>8</sup> Wali Ondofolole walora na hele wali nibi a weyae maengkele nanembainye kelemamiyende naeise, eyae nebei me ure mokoyate ro miyaere ei haumamile hele.

<sup>9</sup> Reyaе mai jemaatre homo moloukokale aubokale. Nebeibe ro mbai Diotrefes mai jemaat nolone be yun be yebaere yembondere kena haehae kole kiyae, maeinya are wo okoikoi. <sup>10</sup> Nebei aerene, reyaе mai bokore erelena, naei me u beko mokolere jemaat nolone elemakonde. Maere beko mokommebondere Diotrefes aei naeise a beko-beko yae huwele. Naendae wanen horo maere nebei a ma weumekokebe, naei kena omoloiboibe sele. Maei jemaatna aka baeke holore nebeinye mekate hee, neyae ahi yae elewolene ei ehawei nane merau ro miyae eise haungaimilere kena kowate yore bele a hun kolowoumi. Nane merau ei hawaimile ro miyaere jemaat nolora hukewoumi balayeke.

<sup>11</sup> Aka baeke Gayus kena buhaere haewale kiyae, Diotrefes nebei u mekai beko mokouboke bune wane ehakojiae, foi naeise mo mokole. Foise mokate ro miyae Allahle holonane nekate yo. Bekore mokate ro miyae Allahre ereiboibe yae nekeimeyate yo. <sup>12</sup> Ro mbai na ro Demetrius, na u mekaise ro miyae nanemene foi mo elate, Wali Ondofolole walora na hele wali nibi hului nekele. Meyae nane merau Demetrius naei u mekai foise a huwande. Mayae maisaei maeinya a na helebe huwayembe.

<sup>13</sup> Aka baeke Gayus, ware ufete a helen selebe, nebeibe tinta yae homo raitainye molorekonde naei reyaе kena ban. <sup>14</sup> Na heki ban mo wangkele hubayaekonde naeise reyaе rabo halaele. Nebei kulunne eyae a faeube mbembane hubayende hee na benebene elale.

<sup>15</sup> Reyaе ebeli Allahre banale ware kena foi u foi mokonete. Waei kahili wafeu ndane nekate yo yae a melaeyayete. Raei a melaeyawale bele aei kahili wa nemene une-une weumikonde.

## YUDAS

<sup>1</sup> Onomi foka mayae Allah yae kaenengkokembe yo, Ako Allah kena buhae hembe yo, Yesus Wali Ondofolo yae ei hawembe yo. Reyae Yudas, Yakobus na aka baeke, Yesus Wali Ondofolole kaliare mokale kiyae.

<sup>2</sup> Reyae Allahre ebeli banale Neyae nda me u emekai bele mare mokonembe: yanekoi yase yae ei haungemembe, rei mai inyemembe, kena buhae u buhae henemembe.

### *Ame-Amere Kelaemi Ro Miyae*

<sup>3</sup> Kena buhaere haemale aka baeke, Wali Ondofolo Naei a elelere hila rabo halaenne wali neme nekande. Nebei wali neme naeise nda homone molorekondere kena kaban kowalebe, nebeibe reyae hubawanale homone nda a usaei hire ufembere, Wali Ondofolole wali nibi are na ijen mae isaeyinayibonde naeise mayae relennele. Yesus Naei eleuboke wekeumi holona ro miyae nemene fomenere nebei wali nibi are isaeyumiboke. Nebei wali nibi a roko mbai mo ikeume nane merau huba ban haei ban wali neme yeumile.

<sup>4</sup> Reyae nda a wamale, rabuhine ban Allahre ei ehaweyei yo maleu-maleu wae mai u nolo u kainye mayeuboke nekate. Nda yo yae kelaemi Allah aere kena buhae aere ban mae heumelene, eyae na hului u mekai bekore kena haehae kande hului mokomale. Nebei yo kelaemi Yesus aei Tuhan hele mbai mo Kiyae Wali Ondofolo ban. Nebei holona yo naei ehee bukulu nendahina homofaene a nulainyekoke.

<sup>5</sup> Naendae mekai horo nda a ufembere mayae maisaei nanemene, reyae benen mai u benera isaesembombere. Tuhan Allah yae Israel yo kaban yan kabande Mesir kanina ro miyae naei yebaei bubaeise nekewatera bulaeremiboke nebei kanira yaweumiboke maibaleke. Nebeibe Israel ro miyae nolona Naei uwoumi are hila rabo ban yore benen Allah yae beko mokoumiboke. <sup>6</sup> Nane merau u mekai beko bele mokaikoke malaikat yoni-yoni Allahle me kelee u keleena me mokowaimi yo Allah mbai yae ro baewaimine, angken bumana nuwewatera nukaiboke. Nebeinye Allah nda malaikat holonare hubara haeisa elae bele rantai yae wowo koumikoke, ouben hauben anuwaunge hayeukoke ende Wali Ondofolo benen mende nare me nommiyonde.

<sup>7</sup> Nebei sului mbai, nendahina Sodom yo bele Gomora yo bele na kelaunga yo yoni-yoni honowate bele na ro miyae yoko kaeimae kowate nane merau ro na ro akobae bele miyae na miyae akobae bele uwa mbainye honowate. Nebei aerene Allah yae nebei yo nemene i yae woke beukoke. Nebei ro miyae iwaufe yaeiboke u mekai beko bele ro miyae hubara haeisa i ekebeikoi anuwaunge enainyerelende.

<sup>8</sup> Nebei sului mbai nane ame-amere kelaemi ro miyae ime nalire honate huluinye nekate yo u beko mokate yae kena ure beko mokainye. Nebei mokate mo banbe, nebeibe neyae mere mokoyaimi ro miyae naei a elelere moi buleyaimi, nane merau surgane nekate yoni-yonire a hufu ikowaimi. <sup>9</sup> Nebeibe malaikat Mikhael, neyae malaikat yoni-yoni naei be yun be yebae kiyaebe, Musale here no kenane walobo yun bele ane oyeiboke kilewote hee, walobo yunde me noyoi ferere a beko-beko yae be erabuleiboi ahuneiboi, nebeibe Mikhael yae weunge, "Tuhan Nenaiejae a elae yae horoneibote." <sup>10</sup> Nebeibe, nebei ame-amere kelaemi ro miyae naeisaie ban sele rambun yoni-yonire a horoyaimi. Nebei yo na bekore kena haehae kate rambun yoni-yoni mo isaeyete, foi naeise isaeyebai, obo yoko wanen. Nebei rambunde hakoyaimi yae naei uware nanaei beko mokaimi.

<sup>11</sup> Neyae beko hubanayende! Na bere nda ro name nekewate Kain, Baliem, Korah u mekai beko nekewate wanen, nebei holona ro miyae na u mekai beko nekate. Kain mae nauwake Habel houbokene, Allah na uwane iwau mokouboke nane merau hiwa yo yae nare ro beko kaenewainye. Roise yaronaterene, Baliem mae Israel yokeijore nibi mbai keleumikoke Israel ro miyaere naei kena ure yobonaimile me u beko mokonaimile. Nebei aerene Baliem u mekai beko rore rowainye. Korah Allahle a Musale walora uwoumire oboroiboi ehakoiboinye, nda kani kela weweukoke bulune Korah ruke hereke. Allah nebei ro namere me nokeumi wanen mae nebei ame-amere kelaemi ro miyaere me nommiyonde.

<sup>12</sup> Kena buhae u buhaere hembe naei raman bulau mokoiboyaube hee, nebei ame-amere kelaemi yo fe faeiboi ban mae mai nolone anate. ((Hekene hayaemile ruka yoni-yoni nebei heke kuru-kuru ma mokainyele.)) Nebei wanen mbai ame-ame kelaemi yo mai jemaat nolone nekate elate yae kalo helen imokowainye. Naei uware mo narate. Nebei yo a kaban huwatebe, nebeibe naei a faeu ro miyaere foise ebei. Nebei aerene



naei u mekai nda wanen mbai: mangko alu boye yae haleiboyole faeyeungene yare owoyoi, nane merau kombo mahu meinyele ani mokate kulunne omokoi. O ha kala-kala nane merau kambura hekelaikoke wanen, nebei yo Allahre onewainye hee Allah bele wahaeikoke, nane merau isaeyaeinyeboke hee Allah bele wahaeikoke. <sup>13</sup> Naubu na nauwala ruwae elaene olokee mokounge wanen mae nebei yo naei u mekai beko mokate yae fe koi-koi ma mo imokowaimi. Findelau hehe eise meise oratena, ro miyae naei hehe yae imoli mokonatena ijen mae ehawe. Nebei wanen mbai nebei yo naei ame-ame kelaeimire hakonate ro miyae wali nalaibokebe nekate. Nebei ame-amere kelaeimi yo naei ehee bukulu yemmile anuwau ouben kika huba haei ban hononende ma Allah mokoungehake.

<sup>14</sup> Adambe orona mena hokolo mehine bee nendo Henokh yae nda holona ro miyae naei nendahina hele a nuleungekoke. Naei a nda wanen elewole, "Eren! Tuhan Wali Ondofolo na malaikat yolo-yolo helen bolen bele matere. <sup>15</sup> Nda kani kelana ro miyae nanemene na walire mere memmikolondere. Nda aerene Tuhan mae Allahre ei ehaweyei ro miyae me nommiyonde: Allah kena okoi me u beko Allahle u mekaise bune wane ehameikoi ma yae mokayeke aerene, nane merau nda holona yo yae Nare a faeu beko ukainye aukaka kainyeke aerene." <sup>16</sup> Nebei ame-amere kelaeimi ro miyae nda u mekai yae nekate: a mulun-mulun na hibi mo eleyate, naei bekore kena haehae kate huluinye mokate, nauwa bumane kaete, nauwa foi naeise hiwa yore a ame-ame yae kena hawaimi.

*Angkaa Yoboi-Yoboi Naei A Usaei*

<sup>17</sup> Nebeibe mayae kena buhaere haemale aka baeke, na bere aei Tuhan Yesus Wali Ondofolole abu ako yae mare uwayembe are bene foi yae nekenayembe. <sup>18</sup> Neyae mare uwayembe, "Huba mokoikoi ya aukakare konayembe ro miyae helen menaijakambonde. Naei Allahre ei ehaweyei bekore kena haehae kate mo hakonate mokonate." <sup>19</sup> Nebei yo relaeinyele Wali Ondofolole wali nibi mbainye oraube yore wabanayembe, nebei wali nibira wemembe. Nebei aukakare konayembe ro miyae naei bekore kena haehae katere mo hakate, Allahle Roh nangkele ban.

<sup>20</sup> Nebeibe mayae kena buhaere haemale aka baeke, nda nibi yae mai kena u elae yarombo: Wali Ondofolo Naei a elelere hila rabo halemembe, nane merau Allahle Roh wembe huluinye ebeli bonnembe. <sup>21</sup> Mayae aei Tuhan Yesus Wali Ondofolo yanekoi yase yae ei hawenembe wali hena bona inyemekonde hee rakemembe yae, Allah kena buhae hembe Kiyaele a wembe hului nekembe.

<sup>22</sup> Ro miyae na hila rabore kena wauwau koyate yore mayae yanekoi yase yae ei hawemmile. <sup>23</sup> Ro miyae i faeu bele eisa nukaufake yobaukoke maibaleke wanen mae ame-ame kelaeimi are kena kaban hakonatere ro miyaere a usaei wemmile yae hole molommibo. Hiwa yore yanekoi yase yae ei hawemmile, nebeibe mai uwa kayaa bele hemembe nebei yo yae mokate u mekai beko einye eukuwende bele. U mekai beko naeise ikele yae komembe.

*Allahre Bumane Enainyekaende A*

<sup>24</sup> Allah mbaise ei molomande, buma kaemande. Neyae na hului kayaa hebenembe mayae u mekai beko yae nalenensimbe balembe belene. Nane merau Neyae na hului mai wali naeise a beko eleikoi sului yae, kena rei mai yae, Naei nene waewae bele bokore yaungembe embe. <sup>25</sup> Allah mbai mo, aei Walilo, aei Tuhan Yesus Wali Ondofolole walora Allah Niyae nene waewae bele angken nuwei na bumana hele nuwele elae wake bele one hengko bele nekenende, na beme fome helera meke nda heene nane merau huba ban haei ban nekenende. Amin.

## WAHYU

<sup>1</sup> Nda homofaene Yesus Wali Ondofolole naeise. Allah Naei kaliare mokate yore na heki ban mo benate rambunde kelemmibonde naeise, Allah yae nebei benate yoni-yni Yesusre yakaungeboke. Yesus yae Na malaikatre ukeunge reyae Yohanes Naei kaliare mokale kiyaele bokore meke, nebei yoni-yni benatere isaeyensebondere. <sup>2</sup> Allahle a faeu bele Yesus Wali Ondofolo Naei uwa naei a bele reyae kanewale yoni-yni nanemene isaeyaemaale. <sup>3</sup> Nde yae nda homofaena nulainyekoke a faeu engkonde, emboronde, nane merau nou ennehombonde kiyae onomi foka u mekai hubannende, rabuhine ban enaibende ya nobeungekokene.

<sup>4</sup> Aka naei baeke naei Asia kanina jemaat mehine bee nekaube yo, reyae Yohanes ebeli bale Allah Hubalo Mando Kiyae bele Naei kenda wameran bene nekeyate Roh mehine bee bele nane merau Yesus Wali Ondofolo bele mare kena buhae aere ban mae henayemembe nane merau onomi foka rei mai yae ei haungayemembe. <sup>5</sup> Yesus Wali Ondofolo Allah weunge a huluinye isaeyeyumi Kiyae mbaibe nulu yo mahe yora ainyuke holona yo Neyae na bena Kiyae, nane merau nda kani kelana ondofolo yoni-yni mere mokommile Kiyae.

Yesus aere kena buhae heume, nane merau Naei uwa kinyeumiboke haiboke ha yae aei beko bako aeumefoke nekewandera ruboumeboke. <sup>6</sup> Nebeisa Neyae aere mokoumeboke Naeko Allahle imam yoni-yni holona ro miyaere yaendeboke, Allahle me kelee u keleene nekemande, Naei kaliare mokomande. Nare mo hili hebenainyende nane merau rambun nanemene huba ban haei ban mae me mokommiyende. Amin.

<sup>7</sup> Eren, Neyae mangkora mele,

ro miyae nanemene nane merau Nare menda yae nekate yo bele na ijoko-ijoko yae erenainyele.

Nane merau Neyae ro miyae naei wali hului emmikolondene,

nda kani kelana yoho yoni-yni nanemene rime kali ayan buyan enainyekonde, ya! Amin.

<sup>8</sup> Tuhan Allah Nauwa naeise eleukoke, "Reyae Yunani afaeunge huruf na bene kiyae Alfa na moinya kiyae Omega bele ninae nekewole Kiyae, mekenekele Kiyae, nane merau mende Kiyae, nane merau Elaelo Wakelo."

<sup>9</sup> Reyae Yohanes, mai aka baeke wanne maengkele beko hubannele nane merau Yesusle me kelee u keleene nekande. Yesusle kalia mokandene beko hubannele hororebe, na hebaen-sebaen mae Yesus Naei a elelere na hibi-hibi hila rabo halemayende. Allah weufe a faeu bele nane merau Yesuslena a isaeyaemaale bele aerene rare Patmos yokobane aisewoke nekewale. <sup>10</sup> Tuhanbe ya yae Allahle Roh rare aufeboke, a mbai elakei sele, amin kulun wanen, raei moisa releunge borale, <sup>11</sup> elele, "Weyae ijokore ereyae rambun yoni-ynire homofae mbainye moloukonde, nda jemaat mehine beere yeumikonde enate: Efesusre, Smirnare, Pergamusre, Tiatirare, Sardisre, Filadelfiare nane merau Laodikiare."

<sup>12</sup> Reyae be moise yae wekale, rare nde yae nebei a weufere ererembondere. Nebeibe raei be euwekale bae oro bele isehere naeyele rambun emasra mokaikoke mehine bee hebatebe erale. <sup>13</sup> Nane merau nebei oro bele isehere naeyele rambun na nolone hele Allahle bokora meke ro miyae uware yeuboke Kiyaele wanen afae yae hebelebe eranale. Nebei ro na malo hireukoke koko maengin nimoko hubana yolu ikileuboke malo emasra. <sup>14</sup> Na yun bele umaa bele domba ma keuleumon hele, salju wanen, na ijoko bae i bolo-bolo wanen. <sup>15</sup> Noro perunggu yolo-yolo italo nolone wili halaman bole wanen. Na a elele bae kume hele, naubu buhaeinya nauwala ruwae hayele wanen. <sup>16</sup> Na me meube reufine findelau mehine bee bele ikileukoke. Neuwara ramiyaeli mbai reufira reufira ijoko bele na henengkaei sele meukuke. Na be yoi rainya hu inyukui wanen naeukoke.

<sup>17</sup> Reyae be euwekale erekanale hee, Noro bene here no wanen bai yae oukoloukokale. Nebeisa Na me meube reufi raei uwa ranne raufike wa, elele, "Buhae ohokojae! Reyae Hubalo Mando. <sup>18</sup> Reyae Niyaebe ya wali no Kiyae. Reyae herekalebe, nebeibe erise, aungkale wali hena bona nekerende. Here naei bele nulu yo mahe yo naei yo yan bele naei kunci Raei me einye honaisele."

<sup>19</sup> "Nebei aerene weyae ereyae bewate rambun bele nda hee yae baete bele bena yane benaifonde bele homone moloiko. <sup>20</sup> Raei meube reufine ikileukokale findelau mehine bee bele oro bele isehere naeyele rambun emasra mokaiboke mehine bee bele ijokore

ereukokae nda na mekai niyae: findelau mehine bee nebei jemaat mehine bee naei malaikat, oro bele isehere naeyele rambun mehine bee nebei jemaat mehine bee.”

## 2

### *Efesus Jemaat Naei A Usaei*

<sup>1</sup> “Efesusna jemaat na malaikatre homo nda wanen mae moloukonde:

Nda a niyae findelau mehine beere Na me meube reufine ikileuboke nane merau oro bele isehere naeyele rambun mehine bee emasra mokaikoke u nolo u kaisa orole Kiyaelera: <sup>2</sup> Reyae isaeyebokale foi yoni-yoni nane merau Raei kaliare mayae elaekei sele mokaube. Beko hubawaunge hororebe, Raei a elalere na hibi-hibi rabo haleimeyaubene, u mekai beko bele yore mayae ewaeisi. Nane merau Yesusle abu ako yae elate yore mayae umali hubaumikoke bae, naei ame-ame baete abe hubayaekoke. <sup>3</sup> Raei Ro aerene beko hubawaunge hororebe, ma kena beko ebei nebeibe kena yae herawaube na hibi-hibi Raei a elelere hila rabo haleimeyaube.

<sup>4</sup> Mayae nebei me u foi mokaube hororebe, Reyae mare ane hayaemale, na beme fomena kena buhae hewaufe ma haeungehoke. <sup>5</sup> Nebeinye u bene foi yae nekayengko, na bere Rare kena buhae hewaufe walira na wauwau felebe mayae balekaube. Uwa olomombombe mo bembombe, na beme fomena mokowaube foi yoni-yoni benen mokombe. Mai uwa olomoiboi Reyae wamale hului omokoinya, Reyae mai bokore merele, oro bele isehere naeyele rambun hebele anuwaufa ufenende. <sup>6</sup> Nebeibe mayae nda me u foi mokaubere Reyae kena kale nda niyae: Nikolausre hakainye ro miyae naei u mekai beko yoni-yoni mokatere Reyae ikele kamaele mbai, mayae ikele kaumi.

<sup>7</sup> Nda a boraube ro miyae, Allahle Roh yae jemaat-jemaatre weumi huluinye ma wali nou hembo! Hila rabo bekore mokoungue elaere melennehande ro miyae Reyae waeremihinde walire yeumile o ha Allahle heke einya hebele ani enayanende.

### *Smirna Jemaat Naei A Usaei*

<sup>8</sup> “Jemaat Smirna na malaikatre homo nda ma yae moloukonde:

Nda a niyae Hubalo Mandolera nane merau hereke nebeibe benen aunguke Kiyaelera: <sup>9</sup> Reyae isaeyebokale mayae beko na bune-bune hubaimeyaunge nane merau hun ban wai ban yaeuboke. Nebeibe naeinya hesele Allahle isaei hebaende mayae hun bele wai bele! Holo mbai nauware Yahudi ro miyae yae na ame-ame elate, erabae na hele walobo yunde ei molainyele holona yo. Mai ro fere mokonayembombere a beko mahi-mahi yae huwatere Raeisaei. <sup>10</sup> Beko yoni-yonira hubannele naeise buhae ohokojae. Eren, walobo yun mae umalire hubanensimbe naeise, mokonnebonde mai u nolo u kaisa ro miyae holo mbai kawane ahemmikonde. Ya me bee mo beko hubannekombe. Raei ufembe a huluinye mo nekemembe enserembombena, wali hena bona bele me buhaere isembe.

<sup>11</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo! Hila rabo bekore mokoungue elaere melennehande ro miyae here roko bee nendo na beko enainyehubandere eisubayeikoi.

### *Pergamus Jemaat Naei A Usaei*

<sup>12</sup> “Pergamusna jemaat na malaikatre homo nda wanen mae moloukonde:

Nda a niyae ramiyaeli henen reufira reufira halaeikokere mere ikileuboke Kiyaelera: <sup>13</sup> Mayae nekaube anuwau Reyae isaeyebokale. Walobo yun kendan wameran nekele yone nekaube. Nebeibe Raei rore bumane kaeuboke nekaube. Nane merau, Antipas, Raei wanale a huluinye isaewoumi kiyae mai yone, walobo yun neuboke anuwaunge, mai ijoko bene haiboke hee erewaube hororebe, mai hila rabo Rare kusei mahei ban halewaube.

<sup>14</sup> Nebeibe nda u mekai Reyae kenare okoi ma namman mokaube: mai u nolo u kainya hiwa yo Beliam kelewoumi u mekai suluinye hakaikoke mokate. ((Yahudi yobe naei kamahe naei nekewate heene, Israel ro miyae wali nalenaibondere nda a yae yobammile naeise, nda Beliam mae Barakre keleungekoke. Naei ame-ame kelewoumi walora Israel ro miyae nda me u beko mokowate: walobore eise molonainyele na raman anewate nane merau yoko kaeimae kowate.)) <sup>15</sup> Nane merau mai nolona hiwa Nikolauslana are hakaikoke holona yo naei a usaese me bobo hele ikilainyekoke mokate. <sup>16</sup> Nebei aerene mai uwa olomombo! Nebei u mekai eharaiboinya, na heki ban mo Reyae mai bokore merele, Raei euwa na ramiyaeli yae nebei yore merensabelembe.

<sup>17</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo! Hila rabo bekore mokoungue elaere melennehande ro miyae

feu manna nunna honate bele na ro nemere molaikoke ruka keleumon bele Reyae isemikonde. Nebei ro neme hi yae ha yae isaeyeiboi, yaronaikonde yo yae mo naeisaei.

*Tiatira Jemaat Naei A Usaei*

<sup>18</sup> "Tiatirana jemaat na malaikatre homo nda wanen mae moloukonde:

Nda a niyae Allahle Kelulena, Na ijoko i bolo-bolo wanen, Noro perunggu yolo-yolo wanen. <sup>19</sup> Mai naeise nda rambunde Reyae isaeyeubokale: kalia yoni-yoni mokaube naei, kena buhae u buhae haeube naei, Rare hila rabo halaeufe naei, beko hubawaunge hororebe Raei a elalere hila rabo haleimeyaube naei, na bena kalia mokowaubera nda hee emekai bele mokaube naei.

<sup>20</sup> Nebeibe nda u mekai Reyae kenare okoi ma namman mokaube: Miyae mbai na ro Izebel nauware Allahle yendo kayaalo yae ame-ame beme kiyaere mayae waeunge-hike Raei ro miyaere nibi beko keleumi. Neyae ame-ame yae ro miyae ikeleuomi, yoko kaeimae konate nane merau hoime bahere eise molonainyele na raman yaronate anenante. <sup>21</sup> Reyae nare mon ikanale u mekai beko mokelera uwa olomombonde, nebeibe neyae ahi. <sup>22</sup> Eren, beko hubanaimilere mokoungehake ijongku honoi mbai ranne a waelin-waelinne haisekonde. Nangkele yoko kaeimae mbainye katera uwa olomoiboinya, nebei miyae nane merau nebei u mekaise hakainyekoke mokate yo bele hekelerekonde ehee bukulu wejjei kaeiboi ban enainyehubande. <sup>23</sup> Nebei miyaele kelu omi horekonde. Nebeisa jemaat yoni-yoni isaeyinate Reyae ro miyae naei u bene wa bene na kena u ei bele ereyale Kiyae nane merau mai me u mokaube huluinye Reyae berensombe. <sup>24</sup> Nebeibe, mayae jemaat Tiatira yona hiwa yo nebei u mekaise ehakoiko omokoi yo bele walobo yun yae elele isaei hebaende isaeyeikoi yo belere Reyae mare ehee bukulu eyei. <sup>25</sup> Nda fenbe mare riyamale, wali nibi foi isaeyaeubokere me bobo ikilennekombe nekemembe Reyae merele heene.

<sup>26</sup> Hila rabo bekore mokoungelaere melennehande nane merau Raei kena foise mokonaisele kaliane mokonayende na wali huba enainyemokongkonde ro miyaere, Reyae nebei yore nda kani kelana nekate yo yoni-yoni me mokoi-mokoi elae nare eremikinyende. <sup>27</sup> Allahle homofaene Raei naeise nda a molaikoke,

'Neyae ro miyaere mehukun besi yae me mokommile,  
hele helai a waelinne hakeiboyate wanen mae hakembonde nuhu nahu inyai-bonde.\*

<sup>28</sup> Nane merau na hibi-hibi hakaise yo findelau yahei isemikonde. <sup>29</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo.

### 3

*Sardis Jemaat Naei A Usaei*

<sup>1</sup> "Sardisna jemaat na malaikatre nda wanen mae homone moloukonde:

Nda a niyae Allahlena Roh mehine bee bele findelau mehine bee mene ikeleumi Kiyaelera. Mai kalia yoni-yoni mokaubere Reyae isaeyeubokale. Nebei mekai mokaubene, mayae no yaeube yo yae ro miyae hiwa elate erabae herauboke. <sup>2</sup> Nebei aerene annu! Foi yoni-yoni namman honayembe uwa elae molombo. Rabuhine ban Raei Allahle ro be ro yoinye Reyae eramale mai me u mokaube mbai sambai ehimaloiboi sele. <sup>3</sup> Nebei aerene na bemena mare kelewayembe bele mai angkaei yae borowaube bele bene foi yae nekenayengkombe. Nebei yoni-yoni benen mokombe hele, nane merau beko bako yoni-yoni mokowaubera uwa olomombombe. Mayae benen ainyui nekembena, yoko ro miyae wanen mae Reyae merele, nane merau mayae onengkombe makei hee yae waei bokore merele.

<sup>4</sup> Nebeibe mayae jemaat Sardisna nekaube u nolo u kainya ro miyae mbemba wali nibi bekore ehakoiboi nekate. Nebei yo Allah yae yeisi raeiboi bele yo yae me baeumene, Rangkele malo keleumon mae uwa molonaimebonde, ele mele mbainye oromale. <sup>5</sup> Hila rabo bekore mokoungelaere melennehande ro miyae nanembainye nebei malo keleumon ma mbai yae hirenainyekonde. Ro miyae wali hena bona enainyarongkonde rore molaikoke homofaera Reyae nebei yo naei ro eisobeikoi, nane merau Maekole ro be ro yoinye bele Naei malaikat yoni-yoni bene bele nebei yore ro eremironde. <sup>6</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo!

*Filadelfia Jemaat Naei A Usaei*

<sup>7</sup> "Filadelfia jemaatna malaikatre nda wanen mae homo moloukonde:

\* 2:27 2:27 Mazmur 2:5

Nda a niyae nene waewae bele Na Hele mo elele Kiyaera. Na bere Ondofolo kaban Daud Yerusalem yona romau rawembonde naei kunci ikileuboke wanen nda Kiyae Allahle holonare enayembonde romau na kunci ikileuboke. Neyae rawembondena, hi yae ha yae ahuneiboi sului. Neyae ahunembondena, hi yae ha yae eraweiboi sului. <sup>8</sup> Mai kalia mokaube yoni-yoni Reyae isaeyeubokale. Eren, mai naeise romau rawembokamale hi yae ha yae ahuneiboi sului. Reyae isaeyeubokale mai uwa male u yambi u nekauberebe, nebeibe Raei elale are hakaube nane merau Raei Ro kenane ro miyae bene onaeufe a yae eleikoi mo. <sup>9</sup> Ro miyae hiwa walobo yunde ei moloi-moloi holona ro miyae ame-ame yae baete nauware Yahudi ro miyae yae elate, erabae nebei na hele ban. Eren, Reyae nebei yore ufemile mai oro bene oro selen-selen menaitorongkonde nane merau wo konate Reyae mare buhae heimeyamale. <sup>10</sup> Raei a eleukokale huluinye beko hubawaungele hororebe, no ban hee ban hakowaufe. Nebeinye nda kani kelana nekate yore umalire beko yae mennende hubanainyele heene, Reyae mare kayaa heberembe.

<sup>11</sup> Reyae na heki ban mo merele. Hi yae ha yae mai wali hena bona me buhae einukeisai naeise, mare kelewayembe are me bobo ikilennekombe, nebei sului nye hakomembe. <sup>12</sup> Hila rabo bekore mokoungela elaeere melennehande ro miyae Raei Allahre ei mom-mom imaene kose hure inyaibonde. Nebei anuwaufa roko mbai benen eibalei hele. Naei uwane nda ro keli moloremikonde: Raei Allahle Ro, Raei Allahle Yerusalem neme surgara, Raei Allahlera mende yo yan naei ro, Raei Ro neme. <sup>13</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo!

#### *Laodikia Jemaat Naei A Usaai*

<sup>14</sup> "Laodikiana jemaat na malaikatre homo nda wanen mae moloukonde:

Nda a niyae Amin mae rainyeboke Ro, Allah weunge a hului yae nane merau na hele yae isaeyemi Kiyae, Allah yae mokouboke rambun yoni-yonire mere mokoumi Kiyaelera. <sup>15</sup> Mai kalia yoni-yoni mokaube Reyae isaeyeubokale. Mai u mekai nuku, naumere eleikoi. Reyae kena kale mayae naumebe nekaube, nebei banna nukube nekaube. <sup>16</sup> Mayae naume ban nane merau nuku banne, Raei euwana rambunbe mikae yae okorensambere kena kale. <sup>17</sup> Mayae elauwe, 'Mayae keren nale bele yo, maei uware rambun na hului arilandekoke, kalore omoloiyai.' Nebeibe mayae onaeukoke, naeinya hele mayae ro ban sele, mai wali baengko ban, keren nale ban, kumba, melan. <sup>18</sup> Nebeinye Reyae mare a usaai ufengkombere mayae keren nale bele nekembe naeise, Raeinya emas yolo-yolo bele i naumene yolaimikoke Raeisa roi yae yarongkombe. Mai uwa melanne fe hubaungere ahengkombe naeise, malo keulemon Raeisa roi yae yarongkombe. Ijoko kumba nekaubere minyak yae hobengkombe ijoko erembe naei rambun Raeisa roi yae yarongkombe.

<sup>19</sup> Nde naei Reyae buhaere haemaele yo a elae ufemile, nane merau wali na mekai keleremile. Nebei arene mai u bene harannebombe beko yoni-yoni mokaubera uwa olomombombe. <sup>20</sup> Eren, Reyae romau bene hebale me kaba-kaba bale. Ro miyae Raei faeuko borombonde nane merau romau rawembondena, Reyae erensinde hubayaekonde, nane merau Rangkele raman mbainye anale.

<sup>21</sup> Raei yokeijore meleumihakalene, Maekole kendan wameranne Rangkele rondebokone nekande. Nebei sului mbai hila rabo bekore mokoungela elaeere melennehande ro miyaere Reyae ehe koremikonde, Raei kendan wameranne Rangkele mbainye emarombonde. <sup>22</sup> Nda a boraube ro miyae, Allahle Roh yae jemaat-jemaatre weumi a huluinye ma wali nou hembo!"

## 4

#### *Surgane Ei Moloi-Moloi*

<sup>1</sup> Nebeisa reyae erale bae surgana romau mbai wekainyele. Bere boroukale a faeuko mbai na yaka hele amin raneiboyate kulun wanen mae releunge, nda wanen weufe, "Ndare meikite, Reyae bena yane enaibende rambun ware kelereikote." <sup>2</sup> Na hibi hele Allahle Roh yae ewaufebokale. Erale bae, surgane kendan wameran mbai honolene Ro mbai nuweubokale nekele. <sup>3</sup> Nebeinye nuweubokale Kiyae na be yoi erale hasai ma bele bu baemaema ma bele naeungekoke permata yaspis nane merau permata sardis wanen. Na kendan wameran yaneukoke permata zamrud ma yae wili halaman naeikoyole wanen mae yahan felahan hehe naeungekoke. <sup>4</sup> Na kendan wameran nekelere kendan wameran hi 24 hele yae yanainyekoke. Nebeinye 24 yoyo koseyo raibokale, na malo keulemon hiraikeke, ondofolo fokoma emas yae mokaibokale na yunne obunaikoke. <sup>5</sup> Nebei kendan wameran mbai nendora wili bowole ku kaendolo rorole. Na kendan

wameran bene i kaijeu mehine bee bolaiboke bate. Nda i kaijeu Allahle Roh mehine bee hele. <sup>6</sup> Nane merau nebei kendan wameran honole bene bumoko kaca wanen yolo-yolo renden yale kristal wanen.

Kendan wameran nolo etemetena heme keline Allahle yebaei bubaei keli nauwa obo yoku ma yo, bene moinye ijoko bele mo. <sup>7</sup> Nebei Allahle yebaei bubaei keli nauwa obo yoku ma yo nda uwa ma nekate: mbai nendo singa wanen, bee nendo lembu wanen, name nendo na be ro miyae be wanen, keli nendo aye bomekon nakeikoyole wanen. <sup>8</sup> Nebei obo yoku keline naeise naeise noro mehine mbai, na uwa kaban noro kelere bae ijoko bele mo. Reniai rai no ban hee ban koi bae kainye,

“Nene waewae, nene waewae, nene waewae

Tuhan Allah Elaelo Wakelo

nekeumekae, mekae nekeyae, nekewende.”

<sup>9</sup> Kendan wameranne nekele wali huba ban haei ban Kiyae yebaei bubaei keli nauwa obo yoku ma yo hili hebainye, be hinainye, helen foi wainye hee bae, <sup>10</sup> nebei 24 yoyo koseyo be are nekate ei molainye. Nondofolo fokoma kulate, Na bere yae kolate wa elate,

<sup>11</sup> “Maei Tuhan Allah,

nda kani kela einya rambun Weyae mokouboke

nane merau Waei kena hului yae yaeiboke.

Nebei aerene Weyae yeisi raeiboi bele

nane merau na mekai sele

ware hili hebenayete, be hinenayete, elae wake kinyenete.”

## 5

### *Homofae Bele Domba Kelu Bele*

<sup>1</sup> Nebeisa reyaere erale kendan wameranne nekele Kiyae na me meube reufine homofae mbai, homo yae ei moi molaikoke, ahuneuboke, oleikojiae olaeinyekoke, meterai mehine bee hele yae baikoke. <sup>2</sup> Benen erale mo malaikat mbai elae wake bele kali kaban mae kaenele, “Nde yeisi raeiboi bele yae Allah me baeunge kiyae na hului nda meterai kanengkonde nane merau nda homo wennende?” <sup>3</sup> Nebeibe surgana, nda kani kelana, nulu yo mahe yona, hi yae ha yae nebei homo wennende, einyare hilombondere na hului ban sele. <sup>4</sup> Nebeinye ra kena beko hele yeubokalene rime yae rimale, rabuhine ban ro mbai sambai na Allah yeisi raeiboi bele yae me baeunge kiyae na hului nebei homore wennende eise hilombondere ehubaikoi sele. <sup>5</sup> Nebeibe yoyo koseyo nolora ro mbai yae rare weufe, “Rime erimeijae. Eren, nana hesele Yahudi yohona Singa kaenewainya Ondofolo Kaban Daudle orona mena Kiyae, na yokeijore ninae meuferaweukoke. Neyae na hului ndi meterai mehine bee kulangkonde nane merau ndi homo wennende.”

<sup>6</sup> Nebeisa erale bae, nebei kendan wameran na nolone hele Domba Kelu naisake wanen hebele, Allahle yebaei bubaei keli nauwa obo yoku ma yo bele yoyo koseyo holona bele yanainyekoke. Nebei Domba Kelu na tanduk mehine bee, na ijoko mehine bee. Nebei niyae Allahle Roh mehine bee nda kani kela na hubara hubara ukeumi mekate yo. <sup>7</sup> Nebei Domba Kelu kendan wameranne nekele Kiyaele bere yae eufebeunguke homofae olaeinyekoke na me meube reufine honolere mo rouke. <sup>8</sup> Nebei homofae rouke hee, Allahle yebaei bubaei keli nauwa obo yoku ma yo bele 24 yoyo koseyo bele Domba Kelu bene ana waitorouboke. Naeise naeise kecapi bele nane merau na mene honole ebe emasra mokaiboke neinye o ha onkou fololo bele maemae koukoke. Nebei onkou fololo bele Allahle holona yo naei ebeli kali boyainyele. <sup>9</sup> Neyae nda koi bae eme hele nebei Domba Kelure kainye,

“Waei yeisi raeiboi hului

na mekai sele ndi homofae rowele na meterai kaneukonde,

rabuhine ban Waei ha yae ro miyae nda holora yaroukoka:

yoho yoni-yonira, afaeu yoni-yonira, kani kela yoni-yonira.

<sup>10</sup> Weyae nebei yo mokoumibokae

aei Allahle me kelee u keleene nekenate yo holo yae nekenate

nane merau Allahle kaliare mokonate naeise imam holona ro miyaere yaeiboke.

Nebei ro miyae ondofolo wanen mae nda kani kelare me enaimimokonde.”

<sup>11</sup> Benen reyaere kanale mo, angkaei borale malaikat holo kaban sele mere ebaekoi sului nekate. Nebei kendan wameran honole bele Allahle yebaei bubaei keli nauwa obo yoku ma yo bele nane merau 24 yoyo koseyo belere yanainyekoke hebate. <sup>12</sup> A kaban lon mae na bulaunge wokainyele elate,

“Domba Kelu haiiboke Kiyae,

Weyae yeisi raeiboi belene na mekai sele

elae wake, kuikui maemae, isaei hebaen, meli mekai, be hinei-sinei, hili hebei-sebei,  
ro buma kaei-kaei,

Ware mo kinyenete hakenete!"

<sup>13</sup> Nebeisa reyaе borale surgana, nda kani kelana, nulu yo mahe yona, naubu walaubuna, nda holona yo nanemene elate,

"Kendan wameranna Kiyaere nane merau nebei Domba Kelure

huba ban haеi ban bumane kaenaimile, be hinenaимile, hili hebenaimile, elae wake  
bele nekebe!"

<sup>14</sup> Allahle yebaei bubaei keli nauwa obo yoku ma yo yae elate, "Amin!" Nebei 24 yoyo koseyo be are nekate ei molowaimi.

## 6

### *Meterai Yoni-Yoni*

<sup>1</sup> Nebeisa reyaе erale nebei Domba Kelu yae meterai mehine bee baikoke mbai nendo kulaubokera, reyaе borale Allahle yebaei bubaei keli nauwa obo yoku ma yo nolora na mbai nendo yae elele, "Mei!" Na elele kulun ku nele kulun wanen borale. <sup>2</sup> Reyaе erale bae, kuda kelemun raei bene yakaiboke, na ranne hebeunguke kiyae na mene fela u ikileuboke, ondofolo fokoma bele kinyainyеboke. Na yoкеijore meuferawеukoke nane merau hiware enserawengkonde naeise, ro wanen mae neyae kulun uke ele.

<sup>3</sup> Nebei Domba Kelu meterai bee nendo kaneubokera, reyaе borale Allahle yebaei bubaei keli nauwa obo yoku ma yo nolora na bee nendo yae elele, "Mei!" <sup>4</sup> Kuda hi na ma hasai sele meukuke. Nebei kuda randa hebeunguke kiyae ramiyaеi koko kaban ikeunge. Naei me einye elae kinyeungeboke nda kani kelana rei mai rowende nane merau mokommibonde ro miyae hi yae hire hombonde.

<sup>5</sup> Nebeisa nebei Domba Kelu meterai name nendo kulaubokera, reyaе borale Allahle yebaei bubaei keli nauwa obo yoku ma yo nolora na name nendo elele, "Mei!" Reyaе erale kuda nokombi mbai. Na ranne hebeunguke ro rambun ehe huluisse kolaimi rambun na mene ikileuboke honole. <sup>6</sup> Allahle yebaei bubaei keli nauwa obo yoku ma yo nekate nolora, reyaе borale a wanen kaenele elele, "Gandum ma mbai me kobou mbai kalia ya mbai naei roibu hului yae rowende. Gandum ma hi me kobou name kalia ya mbai naei roibu hului yae rowende. Minyak goreng bele anggur bu bele beko omokommimae!"

<sup>7</sup> Nebei Domba Kelu meterai keli nendo kulaubokera, reyaе borale Allahle yebaei bubaei keli nauwa obo yoku ma yo nolora na keli nendo yae elele, "Mei!" <sup>8</sup> Reyaе erale kuda mbai na ma bu baembaem yangko-yangko foloinye-foloinye. Na ranne hebeunguke kiyae na roHERE, nulu yo mahe yo na moisa hakoungеboke. Nda kani kela fo keli hele ramiyaеi yae, moni yae mai yae, yo bei yan bei yae, obo yoku ham bele yo yae, ro miyaere honate elae nare kinyeumiboke.

<sup>9</sup> Domba Kelu meterai maehae mbai nendo kulaubokera, reyaе erale hili era akau erare ongkou felate itukai na keleene unulu helen erale. Nebei yo Allahle ako faeuko aerene nane merau nebei ako faeukore huwewate aerene howate. <sup>10</sup> Nda holona yo kali kaban lon mae kaenate, "Weyae nemene fomene me mokamae. Weyae nene waewae bele nane merau na hele no. Makei hee yae Weyae nda kani kelana ro miyae walire hului eumikolonde nane merau maere howaime aerene ehee bukulu eumiyende?" <sup>11</sup> Nebeisa nda holona yore malo koko mbai kelemun ma naeise naeise waheumikoke ukeumi, na kena hebaen-sebaen mae nekemembe mende mare hayengkokembe wanen mai aka baeke, mangkele mbainye Allahle kaliare mokate yo, honaikonde na helen sului na hului yembonde.

<sup>12</sup> Reyaе eranale nebei Domba Kelu meterai mehine mbai nendo kulauboke. Oinye kaban sele hineuboke. Hu ouden kika malo nokombi ruka-ruka kambang mara mokate wanen yeuboke, nane merau oko nemene ha wanen hasai yeuboke. <sup>13</sup> Yakuna findelau otowate ara ani nime hele yo alu boye elaene na nora hineumi otate balete wanen. <sup>14</sup> Yaku kingkowole emfae oleikoyainye wanen mae nundeweke. Elu yoi yokoba-yokoba honayeke anuwaufa wewe molowate.

<sup>15</sup> Nebeisa nda kani kelana ondofolo yoni-yoni, rore raimi holona, fela yun-jun, keren bele nale bele yo, elae bele wake bele yo, yebaei bubaei yo, yebaei bubaei ban yo, nanemene ahe bulune eluna ruka kaikainye ahewate. <sup>16</sup> Elure yoise nane merau rukare nda yo kaenaimile, "Kereiso! Maere meimeherawene! Kendan wameranne nekele Kiyae bere raufike erelera, nane merau Domba Kelu naei ikele han haneuboke kolera,

maere ahemmeko! <sup>17</sup> Rabuhine ban naei ikele han ya ninae meufeuboke. Ro miyae nde lon mae na hului na bene herawembonde hebende?"

## 7

### *Israel Kanina Ro Miyae 144.000*

<sup>1</sup> Nebeisa reyae erale malaikat keli hele nda kani kela na huba keline hebaiboke. Neyae nda kani kelane, bu yaunge, o hane, nda kani kelana alu boye keli erawei naeise hunde ranainyehindere. <sup>2</sup> Malaikat hi kayeero reyae erenale hure kitele anuwaufa yeuwakauboke. Allah wali bele Kiyae na meterai mokole rambunde nda malaikat yae roweimeyele. Malaikat keli nda kani kela bele bu yau bele bekore mokonainyebondere kinyeumboke yore nebei malaikat yae a elae hele yae kaeneumi, weumi, <sup>3</sup> "Meyae Allahle yenjo kayaayo naei feline namman meterai obokoi mo, nda kani kela, bu yau, o ha beko omokojiae ba."

<sup>4</sup> Nebeisa rare yae weufe borale Allahle meterai yae na feline iwau merau baikoke ro miyae nanemene 144.000. Nda ro miyae Israel yoho me bee oro nen bee belera yaraikoke. <sup>5-8</sup> Na yoho yohora 12.000. Na yoho niyae:

Yehuda, Ruben, Gad,  
Asyer, Naftali, Menasye,  
Simeon, Lewi, Isakhar,  
Zebulon, Yusuf, Benyamin.

### *Ro Miyae Holo Kaban*

<sup>9</sup> Nebeisa benen reyae erale bae, ro miyae riya fena-fena (kaban) na helen mere ebaeikoi sului. Nda holonara ro miyae hebate: kani yoni-yoni, yoho yoni-yoni, afaeu yoni-yoni nemene. Nebei ro miyae helen nebei kendan wamerande yae nane merau Domba Kelu hebelere na be baebokoke hebate. Na malo koko keleumon hiraikoke, na mene palem no maensa bele mo. <sup>10</sup> Nda yo a elaekei sele yae kaenate, "Aei Allah kendan wameranne nekele Kiyaele nane merau Domba Kelule aere hole moleimeboke."

<sup>11</sup> Malaikat nanemene nebei kendan wameran nane merau yoyo koseyo holona bele Allahle yebaei bubaei keli nauwa obo yoku ma yo belere yanaimikoke hebewate. Malaikat holona na kendan wameran bene be ane waitoroukoke Allahre einye molainye, <sup>12</sup> na a bele yae wainye,  
"Amin!

Allahre ro buma hosoro kaeinye bele,

hili hebei-sebei bele, isaei hebaen bele, helen foi bele, be hinei-sinei bele, elae wake bele, meli mekai bele

huba ban haei ban nekewende. Amin!"

<sup>13</sup> Yun-jun nekate nolora ro mbai yae rare hineufe, "Malo keleumonde hiraikoke yo, nde naei nane merau makeisa mewate yo?"

<sup>14</sup> Reyae wanale, "Tuhan Wembai Waeisaei sele."

Nebeisa rare weufe, "Nda yo weitasi kowaimi mon nolora mate, na malo keleumon yeiboise Domba Kelu ha yae kuyaikoke. <sup>15</sup> Nebeinye, nebei yo Allahle kendan wameran bene hebate, reniai rai Allahre ei mom-mom imaene Naei kaliare mokate. Allah kendan wameranne nekele Kiyae nebei yore ningkang roroumiyende. <sup>16</sup> Nebei yo benen monire bukire ehubaisi, nane merau rolonsan naume nauwane oboi, <sup>17</sup> Rabuhine ban kendan wameran nolone nekele Domba Kelu yae Naei be yun be yebae rore yembonde. Neyae nda yo yawemmibonde walire yemmi bu nore enate. Nane merau Allah nebei yo naei ijoko ibo inse emmihobengkonde."

## 8

### *Meterai Mehine Bee Nendo*

<sup>1</sup> Domba Kelu meterai mehine bee nendo wekeunge hee, surgana ei aku ban nau ban yeuboke hukai bohi hului honoukoke. <sup>2</sup> Nebeisa reyae erale nane malaikat mehine bee hele Allahle bene hebate yo. Nebei malaikat yoni-yonire amin waku wanen rambun mehine bee naeise naeise yeumikoke.

<sup>3</sup> Malaikat hi meke na me einye o ha ongkou fololo bele hawate anuwau emas yae mokaiboke, hili era akau erare ongkou felate itukai kelaeunge hebele. Nare ongkou fololo bele rambun helen yaeinyekoke nanembainye Allahle holona ro miyae naei ebeli bele alennebonde mo nebei kendan wameran bena itukai emas mokaiboke ranne i felembondere. <sup>4</sup> Nebei fololo bele rambun feleuboke ongkou bele Allahle holona ro miyae naei ebeli bele nanembainye nebei malaikat me eisa Allahle ro be ro yoise yete.



<sup>5</sup> Nebeisa nebei malaikat ongekoufe feleuboke anuwau rouke, hili era akau erare ongekou felate itukainya i bele auboke, nebeisa nda kani kela rande kaungehike. Ku kaendolo rorole, wili bole, nane merau oinyeu hinele.

*Amin Waku Wanen Rambun Yoni-Yoni*

<sup>6</sup> Malaikat mehine bee na mene amin waku wanen rambun mehine bee ikilako ke yo rannaibondere mokoisa-mokoisa hebate.

<sup>7</sup> Malaikat mbai nendo amin waku wanen rambun raneuboke bele, ya es ruka ma hayele, i ha bele alaeyeboke nda kani kela rande hekelewate. Nda kani kela fo name bele o ha fo name bele hun hobo buyae-buyae kate nanemene hukelako ke baeufoke.

<sup>8</sup> Nebeisa malaikat bee nendo amin waku wanen rambun raneuboke. Rambun mbai elu kaban wanen i yae boloufike belebe naubu walaubure kainyehike. Naubu walaubu fo name hele hare yeuboke. <sup>9</sup> Naubu walaubuna wali bele yo nane merau bu kai naubu walaubuna nanemene fo name beko bewate.

<sup>10</sup> Malaikat name nendo amin waku wanen rambun raneuboke. Findelau mbai kaban sele i kaijeu wanen mae boloufike bele yaku bumara ruke oke wi nane merau rotebu fo name nekeumile. <sup>11</sup> Nebei findelau na roO HA OHEM BELE, bu fo name faere bele mo yaeiboke. Nebei bu faere belere anewate ro miyae helen sele herewate.

<sup>12</sup> Nebeisa malaikat keli nendo naei amin waku wanen rambun raneuboke. Hu, oko, findelau yoni-yoni fo name nekeumi, hehe naei elae fo name malewate. Huae ya bele rai ya bele fo name hehe ban yaeiboke. <sup>13</sup> Nebeinye erale hee yae angkaei borale aye bomekon mbai bumara hele nakeuko ke ele bele a elakei sele kaenele, "Beko, beko, beko embembe, nda kani kelane nekaube ro miyae naei! Rabuhine ban malaikat name naei amin waku wanen rambun ebi fere rannaikonderene."

## 9

<sup>1</sup> Nebeisa malaikat maehae mbai nendo amin raneuboke. Reyae erale mo findelau mbai yakura ruke nda kani kela rande honole a bulu na wauwau hele romaufe rawate kunci ikeunge. <sup>2</sup> Neyae nebei a bulu na wauwau hele raweuboke bele eisa ongekou itukai kabanna wanen mae baleyate. Nebei ongekou wae mokoungboke yaku bele hu inyukui bele ouben yaeiboke. <sup>3</sup> Na wauwau hele bulura yele ongekou eisa hatu yoni-yoni nda kani kela rande baleijate. Nebei yore akaikai rena wanen naeumiko ke. <sup>4</sup> Nda yore a herawoumi, "Nda kani kela ranna ke hun hobo, o meleme, o ha beko omokoi jae. Nebeibe ro miyae na feline Allahlena meterai u yore mo beko mokonaimile." <sup>5</sup> Hato yoni-yonire elae ikeumi ro miyaere honate naeise ban, nebeibe oko maehae mbai meuboi auboise konaimile naeise. U nene yae wa akaikai rena nele buhae kunyeiboyele hubanne wanen, hatu rena nede hubanainyele. <sup>6</sup> Nebei oko maehae mbai ro miyae herenatere relenainyelebe, nebeibe eherei sului. Neyae herere kena konatebe, nebeibe here nda yo naeisa ahaufe yae wenende.

<sup>7</sup> Hato yoni-yoni na ma kuda felare enatere kitaimibo ke wanen erewaimi. Nebei hatu yoni-yoni na yun ranne rambun ondofo lo fokoma emas yae mokaiko ke bele wanen nane merau na be yoi ro miyae be wanen, <sup>8</sup> na umaa miyae maengke umaa wanen, na heraa singa heraa wanen. <sup>9</sup> Na nimoko kayaa rambun besi yae mokaibo ke wanen. Na noro kulun kereta holo mbai kudu u hale yae yoboiboyate buloo fela nolore ate wanen. <sup>10</sup> Nebei yo reme bele nane merau rena bele, akaikai rena wanen. Na reme einya ro miyae uware buhae mokonaimilere oko maehae mbai yembonde naei elae bele nekate. <sup>11</sup> Nebei yo naei mere mokowoumi ondofo lo malaikat mbai na wauwau hele a buluna kiyae. Na ro Ibrani afaeu wae Abadon, Yunani afaeu wae Apolion na mekai, beko mokole kiyae.

<sup>12</sup> Bekore benate naei mbai nendo moi woke. Eren, benen bekore benate bee hele menetere.

<sup>13</sup> Malaikat mehine mbai nendo amin waku wanen rambun raneuboke. Reyae angkaei borale Allahle bena hili era akau erare felate itukai emas yae mokaibo ke huba keli tandukra a kulun relaeinye. <sup>14</sup> Nebei a malaikat amin waku wanen rambun bele mehine mbai nendore weunge, "Efrat wi kaban kelaunga malaikat keli ikilaimiko ke hebate hayeimiko!" <sup>15</sup> Nda malaikat keli nda hukai, ya, oko, ralo yakamane relahi yae mokainyehake, nda kani kelana fo name na ro miyaere honaikondere hayaeimiko ke. <sup>16</sup> Reyae boroubokale kudu ranna felayo na helen 200.000.000.

<sup>17</sup> Nebeinye ijoko raneufebo ke kanale yae kudu yoni-yoni haungate yo bele na nimokore hiron kayaa rambun na bu nda ma: i wanen hasai, ruka nokommon nilam wanen, yangko-yangko belerang wanen. Kudu na yun singa yun wanen, neuwara i bele ongekou bele belerang bele baleimeyate. <sup>18</sup> Nda yo bei yan bei i bele ongekou bele

belerang bele kuda yoni-yoni euwara baleimeyate yae ro miyae fo name howaiبوکه. <sup>19</sup> Kuda yoni-yoni naei elae euwa eisa bele reme eisa bele. Na reme rami wanen, yun bele, na hului akende olumbo halumbo kounmile.

<sup>20</sup> Yo bei yan bei meungekene herewatera hiwa yo ehereiboi nekewate yo na me hila u hilara nei ehuweiboi mo kate, walobo yoni-yonire namman ei molaimi. Hoime bahe emasra, perakra, perunggura, rukara ora mokaiبوکه rambun ijokore erei, oboroi, ele mele okoyei yoni-yonire namman ei molaimi. <sup>21</sup> Nane merau ro miyae hoi-soisa, buloo mahi-mahi mokoi-mokoisa, yoko kaeimae koyatera, yokora, nebei yo nei ehuweiboi mo nekate.

## 10

### *Malaikat Bele Homofae Fele-Fele Bele*

<sup>1</sup> Benen reyae erale mo malaikat elae wake bele kiyae surgara ole. Nauwa mangko yae feleungeboke, na yun ranne yahan felahan mae naeungekoke. Na be hu hehe wanen naeukoke, noro i wanen boloufike bele. <sup>2</sup> Homofae kaei-kaei mbai wekainyele bele na mene honole. Noro meube reufi naubune aleke, oro meli reufi yaunge aleke. <sup>3</sup> Na kali elaekei sele kaenele, singa romou han kole wanen. Kaeneukokera mo, ku kaendolo mehine bee hele na a bele yae elewate. <sup>4</sup> Nda ku kaendolo mehine bee na a elewate haenyukera raei kena homone molorekondere, nebeibe reyae borale a mbai surgara weufe, "Ku kaendolo mehine bee naei a nunne heraweubonde, homone omoloijae!"

<sup>5</sup> Oro bune yaunge hebeukoke malaikat eranale kiyae na me meube reufi yaku bumare yae kaeuboke. <sup>6</sup> Allah wali huba haei ban nekele Kiyae nane merau kani kela bele bu yau bele kun wau bele neinya rambun bele mokoukokae Kiyaele Ro yae a holo kole wa elele, "Benen ya, oko enakeleisi sului." <sup>7</sup> Nebei malaikat mehine bee nendo amin waku wanen rambun ranembonde heene, Allah meraufe raungehike nunna honate na hului benate. Nebei benate ma mbai bere na yebaei bubaei yoni-yoni yenjo kayaayo holore ukeumi.

<sup>8</sup> Borale surgara elewole boroubokale a faeuko mbai benen rare weufe, "Eye, homofae wekainyelebele malaikat oro bune yaunge hebeukoke hebele kiyaele mera rowele."

<sup>9</sup> Nebei malaikat bokore ekale na mena homofae kaei-kaeise mo rare yenselere riyeungehikale. Neyae weufe, "Rowei aneiko. Wa yarele mokonnebonde beko hubaungele, nebeibe euwa ei madu yu wanen hubaungele." <sup>10</sup> Reyae nebei homo kaei-kaei malaikat na mera roukale nebeisa aneukokale. Raei euwa einye madu yu wanen, nebeibe huneukokalera yarele einye beko bele hubawanale. <sup>11</sup> Rare weufe, "Allah merau raungehike nda holo naeise benen huweumile hele: yoho yoni-yoni, kani kela yoni-yoni, afaeu yoni-yoni, ondofole yoni-yoni."

## 11

### *Allahle Are Elenete Ro Bee*

<sup>1</sup> Nebeisa baengka fo mbai huluis kolaimi o wanen rare ikeufele mo na a bele weufe, "Ainyu eye, Allahre ei mom-mom imae nane merau hili era akau erare felate itukai bele hului koloumikonde. Nebeinye eise molainye yo na helen sului me baekonde. <sup>2</sup> Allahle imaehou moise reufi hului okoloijae, rabuhine ban na noro keline Allahre ei omoloi ro miyaere kinyaimibokene. Yokeijo maiserawaikoke yo wanen Allahle yo ranne nda yo yae eyale meyale alenate fonde oko 42 yembonde. <sup>3</sup> Reyae wamale are isaeyneimile ro miyae bee hele Raei elae isemile ufemile enete, Allahle yenjo kayaayo naei malo baengko ban mae hireneikonde, Allahle Roh yae wemmile a huweneimile na heki ya 1260." <sup>4</sup> Raei are eleneikonde ro miyae bee nane mbai Tuhan Kiyae kani kelare me mokoumi Kiyaele bene Zaitun no bee Kiyae nane merau oro bele isehere naeyele rambun bee Kiyae. <sup>5</sup> Ro miyae nde yae hokolo beere bekore mokommibonderena, i neuwana enduwende yae na yokeijore mokommibonde hukelenaibonde. Nebei ma yae nare bekore mokonaimilere ro miyae nanemene hongkonde hele. <sup>6</sup> Nebei yo Allahle Roh weumi ane ungaimile hee, naei me einye mo elae kinyeumbokoke kenare konete hului nda me u mokoneibonde: yaku ahuneinyebonde ya molonde bele, bu nanemene mokoneinyebonde hare yembonde, nda kani kela yo bei yan bei yae kou beneinyehonde.

<sup>7</sup> Nebei ro bee Allahle Roh weumi a naeise ro miyae hiware isaeyneimile baensondera, na wauwau hele a bulura obo yoku kiyae yakambonde bele buloo fela relenainyekonde nebei yore melemmihande, na beene hongkonde. <sup>8</sup> Na here no yo rore rainye nibi ekene hainyaikonde hononete. Nebei yo Sodom bele Mesir bele yo yae ahunenaibonde kaenewaimi, naei Tuhande ohalire baikoke anuwau mbai. <sup>9</sup> Yoho yoni-yonina, afaeu yoni-yonina, kani yoni-yonina, ro miyae nebei here no ya name bohi bele

menaimirengkonde, enaimolongkonde naeise ehe okoikoinye. <sup>10</sup> Nda kani kelana u mekai beko bele ro miyae nda ro bee hereibokene rei mai sele kate, naeise naeise rambun foi eije meije yaeimi. Rabuhine ban nebei yenjo kayaayo bee mokowoumi nda kani kela ranna ro miyae beko helen hubawainye.

<sup>11</sup> Ya name bohi bele nekaikokera, Allahlena walire yeumi Roh nebei yenjo kayaayo bee naei uwane haweumikoke, ro miyae bene ainyuke. Ro miyae eraimi yo fe waku nekaumi kate. <sup>12</sup> Nebei yenjo kayaayo bee borote surgara a kaban mae nare kaeneumi, "Ndare yae mebelebo!" Na yokeijo bene, hokolo bee nauwa mangko yae feleumiboke surgare ewote.

<sup>13</sup> Nebei hee yae oinyeu kaban sele hineubokene, nebei yo kaban fo me beere keraiboke nane merau ro miyae 7000 heraiبوke. Hiwa yo buhae hele hokoumibokene, Allah surgane nekele Kiyae hili hebewainye.

<sup>14</sup> Beko bewole bee nendo moi woke. Eren, beko benate name nendo na heki ban ahunennebondere.

*Amin Waku Wanen Rambun Mehine Bee Nendo*

<sup>15</sup> Nebeisa malaikat mehine bee nendo amin waku wanen rambun raneuboke surgane borale a elaekei sele elate,

"Nda kani kela rande me mokoi-mokoise aei Tuhan nane merau aei Wali Ondofolole me einye kinyewainye.

Neyae huba ban haei ban me mokommiyende."

<sup>16</sup> Yoyo koseyo 24 Allahle kendan wameran bene kendan wameran hiwa ranne nuwate yo be are nekate Allahre ei molowainye, <sup>17</sup> na a bele wainye,

"Tuhan Allah Elaelo Wakelo nda hee nekeyae, na bere nekeimeyae Kiyae, meyae helen foi ware wayete,

rabuhine ban Waei elae wake kaban mae Ondofolo wanen mae huba raweuboke me mokoumile.

<sup>18</sup> Nda kani kelana Ware ei omoloi yo

ikele han ainyainyu hengko-hengko kate,

nane merau Weyae u mekai beko bele ro miyaere

ehee bukulu eumiwonde ya na hului yeuboke.

Weyae herewate yore hului kolommile

nane merau Waei yebaei bubaei u mekai yenjo kayaayo bele,

Waei eleukokae wekaemae ro miyae Wa rore bumane kaeyete yo bele,

fele-fele kaban-kaban nanemene

na roibure waheumilere yabe na hului yeuboke.

Nda ya niyae,

nda kani kelana bekore mokowate yore bekore mokoumibonde yabe yeuboke."

<sup>19</sup> Nebeisa surgana Allahre ei mom-mom imae wewe moloukoke. Nebei imae einya Allah yae ikeumi Yahudi ro miyaere wali heere foloumikoke are hawaikoke anuwau yakauboke. Nebeisa wili weuboke, ku kaendolo rorowole no ban hee ban, nda kani kela oinyeu hinewole, nane merau ya es ruka wanen helen balewate.

## 12

*Miyae Bele Alaka Wanen Kiyae Bele*

<sup>1</sup> Nebeisa surgane nda iwau kaban sele ma yakauboke: miyae mbai hu malo yae feleuboke, oko noro keleene, nane merau na yunne ondofolole fokoma wanen findelau me bee oro nen bee bele yanainyekoke. <sup>2</sup> Nebei miyae uwa bele, hononde ya na hului yeubokene, ele kali bole. <sup>3</sup> Benen iwau hi surgane yakauboke. Eren, alaka mbai, hasai, nauwa kaban hele, na yun mehine bee, na tanduk me bee, na yun mehine beene ondofolo fokoma bele mo felaikoke. <sup>4</sup> Yakuna findelau yoni-yoni fo name alaka reme yae aweumi yobole nda kani kelare hekelewole. Nebei alaka wanen kiyae nda fa hononde mo na hibi hunengkonde naeise, honondere kole miyae na bene hebele. <sup>5</sup> Nebei miyae kelu fabe honoke. Neyae nda kani kelana ro miyae yanekoi yase ban mae mehukun besi yae me emmimokonde Kiyae. Hongke bele na hibi hele na mera nukaisake, Allahle bokore Naei kendan wameranda yae rokainyele ekate. <sup>6</sup> Allah yae Naei naeise relahi yae mokoungchake a kala-kala anuwau yae nebei miyae hakauboke ewole. Nebeinye ya 1.260 enainyeholende naeise.

<sup>7</sup> Nebeisa surgane buloo fela yeuboke. Malaikat kaban Mikhaellere hakainyekoke malaikat yoni-yoni bele alakalere hakainyekoke walobo bele felane relaeinye. <sup>8</sup> Nebeibe alaka kiyaele holonare here waimibokene, nebei yo surgane anuwau ban yaeiboke.

<sup>9</sup> Nebei alaka nendahina rami rorele mbai, walobo yoni-yoni naei yun kiyae. Na ro

Setan, nda kani kela kabanda ro miyaere ame-amere wabeumi. Naei uwa bele na walobo yoni-yoni bele nda kani kelare hekelaikoke okate.

<sup>10</sup> Reyae borale a mbai surgara elaekei yae kaenele, elele,

“Nda naei hee niyae:

Allah Naei holona ro miyaere holere moloumiboke,  
Naei me einye mo yaeiboke elae wakure keleumiboke,  
Naei yo waku mere mokondere raneujeke,

nane merau Neyae oro umaufe heraugeboke Wali Ondofolo one hengko bele kiteungeboke.

Rabuhine ban aei Wali Ondofolo einye aka baekere Allahle ro be ro yoinye reniai rai ahumbo-ahumbo koumiyeke kiyae surgara hukainyehikene.

<sup>11</sup> Aei aka baeke wa yae ahumbo-ahumbo koumiyeke kiyaeere

Domba Kelule ha yae bele Naei naeise are isaeiwaimi bele yae meleumihake.

Rabuhine ban naei wali buhaere eheikoi ban mae isaeiwaimine.

<sup>12</sup> Nebei aerene surgane nekaube yo nanemene rei mai kaban kombere ya.

Nebeibe beko embende, nda kani kela bele bu yau bele,

rabuhine ban walobo yun mai bokore na ikele han romou wae akeuboke oke,  
rabuhine ban neyae isaeyeuboke naei ya fofu helene.”

<sup>13</sup> Nda kani kela rande kainyehike oke naeise nebei alaka isaeyeuboke hee, na hibi hele nebei miyae kelu fare hongke kiyaeere yambeisoke. <sup>14</sup> Alaka nekele anuwaufa ahau fele yae a kala-kala mokainyena anuwaufe nakengkonde ennekengkonde naeise, nebei miyaere aye bomekon kaban naei noro bee hele yaeinyekoke. Alaka nare beko mokonnebonde belene, ndine heki ralo yakama name bohi bele holonainyele. <sup>15</sup> Nebei miyae uware rowende ende naeise rami kiyaele ((alaka)) neuwara bu wi bumae elae wanen rorougeboke. <sup>16</sup> Nebeibe nda kani kela yae nebei miyaeere hakuungeboke. Neyae wewe koukoke rami yae neuwara rorouboke bube huneukoke. <sup>17</sup> Alaka nebei miyaere ikele hele kowoungue. Naei orona mena hiwa Allahle a weumire hubara haeisa yaneyainye ro miyae Yesuslena isaeyaeimi yore bele habelekeumi buloo fela relaeinye.

<sup>18</sup> Nebei alaka naubu na buhaeinye hebeunguke rakele.

## 13

### *Nau Buna Obo Yoku*

<sup>1</sup> Nebeisa reyaere erale mo naubura obo yoku mbai yeuwakauboke, na tanduk me bee, na yun mehine bee. Tanduk naeise naeise ondofole fokoma mbemba bele mo, na yun ranne naeise naeise Allahre aukakare kainye ro yae molaikoke. <sup>2</sup> Nebei obo yoku uwa eranale tutul wanen, noro beruang oro wanen, neuwa singa euwa wanen. Alaka naei elae wake bele na kendan wameran nekele bele naei one hengko bele nebei obo yokure kinyeungekoke. <sup>3</sup> Nebei obo yoku na yun mehine bee nolora hi eranale na yun bauwau kaban moloikoyole wanen nebei yunna bauwau na walire riyau weungeboube ma nebeibe onomi rouke. Nda kani kelana ro miyae ebunne robone era mahi hele yae elate, nebei obo yoku na moisa hakainyekoke. <sup>4</sup> Nebei yo alakare ei molowainye, rabuhine ban nda obo yokure elae wake kinyeungebokene, nane merau nebei obo yokure ei molainye wa elate, “Hi yae ha yae nda obo yoku wanen u mo! Hi yae ha yae nangeke felare ororoikoi sului.”

<sup>5</sup> Nebei obo yoku kiyaeere embei aiko ukaei naei a yae Allahre aukaka konende naeise maline aungeboke. Nane merau elae wake na heki oko 42 mere fommimokongkonde naei kinyeungeboke. <sup>6</sup> Nebeisa hengkelan raufike Allah Naei uware, Allah Naei rore, Naei nekele anuwaufe, nane merau surgane nekate yoni-yonire, aukaka koumi. <sup>7</sup> Yesus Naei eleuboke wekumi ro miyae bele fela relenainyele, neyae melemmihande naei elae ikeunge. Nda kani kelana yoho yoni-yoni, afaeru yoni-yoni, kani kela yoni-yoni nemene mere mokommile naeise elae wake naei uwane kiteungeboke. <sup>8</sup> Nda kani kela mokouboke hee Allah yae wali hena bona enaijaronde ro miyae homofae mbainye moloukoke. Nebei homofae Domba Kelu naisake Kiyaele naei. Nebei homofaene ro omoloikoi ro miyae nemene nebei obo yokure ei molonainyele.

<sup>9</sup> Nda are boraube ro miyae ma wali nou hembo,

<sup>10</sup> Ro miyae nde kawane enainyahengkonde naeise hului rainyehikena,  
nebei kiyae kawane enainyahengkonde hele.

Nde ramiyaeli yae honaibonde naeise hului rainyehikena,  
ramiyaeli yae honaibonde hele.

Nebeinye mayae Yesus Naei elembokembe wekembe ro miyae beko hubanayembe hororebe, mai kena ure herawembe nane merau Wali Ondofolo Naei a elelere na hibi-hibi hila rabo halennele.

#### *Kani Kelana Obo Yoku*

<sup>11</sup> Nebeisa reyaе erale obo yoku hi kani kelara neke yeuwakauboke. Nebei obo yoku domba keluna tanduk wanen na tanduk bee, nebeibe naei a elele alaka a faeuko wanen. <sup>12</sup> Obo yoku mbai nendo kiyaele ro be ro yoinye naei anuwau elae wakere obo yoku bee nendo mokowole. Neyae waeli hele bewoumi nda kani kela einye ro miyae nanemene na bena obo yoku bauwau wae molowolene hereinyen-hereinyen kowolera nebeibe benen foise yeuboke kiyaeere ei molonainyelere. <sup>13</sup> Nebei obo yoku bee nendo kiyae ro miyae bene iwau mahi-mahi mokole, yakuna i mokoungeboke nda kani kelane oke bele. <sup>14</sup> Bena obo yoku kiyaele aerene nebei obo yoku bee nendo kiyae iwau mahi-mahi mokole. Nebei me u walora nda kani kelana wali nekate yore ame-ame wabeumi. Neyae nebei yore elae yeumi nane obo yoku ramiyaеli yae neke nebeibe na wali mo nekele kiyaele bere hinenainyele naeise, obo yoku be yoi ma mbai rambun mokonaibonde anainyununde. <sup>15</sup> Nebei obo yoku be yoi ma mbai rambunde mokaiboke rambun mae a bele elende naeise nane merau naei kena hului yae nare be ehinei yore honate naeise, obo yoku bee nendore elae ikeunge nebei mokaiboke rambunde wali no annehonde. <sup>16</sup> Neyae mokonnebonde ro miyae nemene ro rowainye yo bele ro ban ro bele, rambun bele yo rambun ban yo, yebaei bubaei yo yebaei bubaei ban yo, na me meube reufine nebei banna feline iwau wanen mokonaimikonde. <sup>17</sup> Nebei iwau uwane oloona, ro miyae hire hare ewaeisi rambunde eyaroi nane merau rambun nai ehei. Nebei iwau obo yokule ro bele nane merau nomor mbai naei ro bele ahuneuboke. <sup>18</sup> Nebei naeise na foi yae isaeyembe. Isaеi hebaen bele ro miyae nebei obo yoku robe naei nomorra isaеinyaiбonde, rabuhine ban naei nomor ro mbai naei nomor. Nebei obo yokule nomor 666 yeuboke.\*

## 14

#### *Domba Kelu Bele Ro Miyae 144.000 Bele*

<sup>1</sup> Nebeisa reyaе erale bae, nane Domba Kelu Sion elune hebele nangkele nanembainye hebate ro miyae 144.000. Nebei ro miyae feline nebei Domba Kelu ro bele Naekole Ro bele molaimikoke yo mbai. <sup>2</sup> Nane merau reyaе nda surgana kulun borale: bu rilele releunge wanen nane merau ku nele wanen, erabae nebei kulun borale kecapi kate ro miyae holo mbai naei kecapi bele yae mbainye kate. <sup>3</sup> Allahle kendan wameran bene nane merau nebei anuwaufe yanainyekoke Allahle yebaei bubaei keli nauwa obo yoku ma yo bele 24 yoyo koseyo bele bene neyae koi bae kate. Nebei koi bae kate eme hele, hi yae ha yae isaеyeikoi sului. Nebei 144.000 ro miyae nda kani kelara Yesusle ha rileubokene, nebei ro miyae Naeinya yo mo naeisaеi. <sup>4</sup> Nebei yo naei u mekai beko omokoi naeise miyae maengke bele mbainye ohonoikoi. Nebei yo miyae maengke yele wanen nekate, Domba Kelu yae ende ijende nangkele hakonainyekonde enate. Allah bele Domba Kelule Naei hili era akau era yele wanen inyaibonde naeise, nebei yo ro miyae nolora Yesusle ha yae yaroukoke. <sup>5</sup> Nda yo naei euwara ame-amere ebei, nane merau ro miyae hiwa nare a beko eleikoi sului.

#### *Malaikat Name*

<sup>6</sup> Reyaе erale malaikat hi kayeero buma hosoro yaku eite meitera nakeukoke. Nda kani kelana ro miyae nemene, kani kela yoni-yoni, afaeunge yoni-yoni, yohone yoni-yoni, nemenere huba ban haei ban hononate a foi faeu foi huwemmikonde. <sup>7</sup> Nebei malaikat a elaekei sele kaenele, "Allahre fe faenne, hili hebene, rabuhine ban Allah ro miyae naei walire hului kolommikonde hee na hului yeubokene. Nare ei molonne! Neyae buma a bele bu yau bele rotebu yoni-yoni bele mokouboke Kiyae."

<sup>8</sup> Malaikat bee nendo na moisa nakeukoke mbai nendore neungeboke mo kaenele, "Kereufoke, Babel yo kaban yan kaban kereufoke ya! Neyae nda kani kelana ro miyaere mokowoumi nangkele yoko kaeimae kowate aerene u bene beko yaeiboke, bu elae aneisiyate wanen." <sup>9</sup> Malaikat hi nda beere neumiboke mo kaenele, "Nde maenin, nebei obo yoku bele na be yoi ma mokaiboke rambun belere ei molaimi yo nane merau nebei obo yokule ro iwaufe na feline na mene molaimikoke yo, <sup>10</sup> nebei ro miyae Allahle romou han mengkonde hubanainyehinde. Ro miyae mbai kolaeinye beko hele aleiboyele rambunde anensindena, beko yembonde. Allahle romou hande hubanainyehinde ro

\* 13:18 13:18 Ibrani afaeu bele Yunani afaeu bele naei huruf yoni-yonibe nomor ma yaeiboke.

miyaere bu beko anenaisinde wanan mae beko inyaibonde. Nebei ro miyae Allah Naei malaikat bene bele Domba Kelule bene bele i bele belerang bele bolensinde yae wali u buhae bele hubanainyende. <sup>11</sup> Nebei u buhaere yeumi i ongkou huba ban haei ban rawenende. Nebei obo yoku kiyaere ei molainye yo bele na ro yae iwaufe baimikoke yo nemene reniai rai no ban hee ban beko hubanainyende.” <sup>12</sup> Nebei aerene mayae Yesus Naei eleubokembe wekembe ro miyae Neyae ukembe are hubara haeisa yaneyaunge nane merau Yesus Naei a elelere hila rabo haleyaube yo beko hubanayembe hororebe, mai kena ube herawembe.

<sup>13</sup> Benen reyae borale surgara a ukeufe, “Nda homo moloiko, ro miyae nda heera Tuhande hila rabo halaeunge yae herenayende yo, onomi foka enainyehubande.”

Allahle Roh yae elele, “Na hele. Nda yo me buhae inyemile naeise na kalia mokayekera no inyaibonde.”

#### *Nda Kani Kela Maluboi*

<sup>14</sup> Reyae erale bae mangko keleumon ranne Allahle bokora meke ro miyae uware yeuboke Kiyae wanan nuweuboke nekele, ondofolele fokoma emas yae mokaiboke bele na yunne, gandumde maluwembonde rame hangkei Na mene. <sup>15</sup> Allahre ei mom-mom imaera malaikat hi meukoke, mangko ranna nuweuboke nekele Kiyae a kaban mae kaeneunge, “Waei mena rame aweinyobo, rabuhine ban kani kelana nimaiboke yo helen selene, nane merau maluboise ya na hului yeubokene.” <sup>16</sup> Nebeinye mangko ranna nekele Kiyae na gandum maluboi rame aweungeboko nda kani kela maluweuboke.

<sup>17</sup> Malaikat hi kiyae eranale surgana Allahre ei mom-mom imaera meukoke na mene rame henengkaei ikileuboke. <sup>18</sup> Benen malaikat hi i yae wononde hili era akau erare ongkou felate itukaisa meke, nare nda kani i yae wonondere elae kinyeungeboko kiyae yae malaikat rame bele kiyaere weunge, “Wa mena rame aweinyobo! Nda kani kelana anggur ani na nora rurei, rabuhine ban ani nime yaeibokene.” <sup>19</sup> Nebei malaikat na rame nda kani kelare aweungeboko, anggur ani na no bele rureukoke, anggur bu mokate anuwau kabanne haiwate. Nebei anuwaunge Allah naei romou han kole huluinye mokole. <sup>20</sup> Anggur ani oro yae nukate wanan nebei ro miyae yo moisa nukate nane merau nebei nukate anuwaufa ro miyaena ha bu ma rilele, na wauwau kuda imoli mokate ha, meter bee hului na ahau 300 kilometer.

## 15

#### *Malaikat Yoni-Yoni Yo Bei Yan Bei Bele*

<sup>1</sup> Nebeisa reyae erale yakune iwau hi kaban nane merau mahi. Malaikat mehine bee hele riyau ungaibonde naei yo bei yan bei mehine bee na mene ikilaikoke. Nebei yo bei yan bei yae Allah Na ikele han romou bele haneuboke kole riyaufe weungebondere.

<sup>2</sup> Reyae erale naubu kaca i bele alaeinyeboko ma wanan enene nane obo yoku bele na be yoi ma mokaikoke rambun bele na ro na nomor belere melaimihake ro miyae hebate. Naeise naeise Allah yae ikeumi kecapi na mene ikilaikoke. <sup>3</sup> Nda yo Allahle yebaei bubaei Musa yae kowole bele Domba Kelu kowole bele koi bae kate, “Tuhan Allah Elaelo Wakelo,

Waei me u mokowoyae kaban sele nane merau era mahi hele.

Weyae kani kelana nemene naei Ondofolo mere mokoimeyamae.

Waei wali nibi a na ijen sele nane merau na hele.

<sup>4</sup> Tuhan, ro miyae nemene fomene Ware huba haeisa yanayete, nane merau Waei Rore hili hebayete.

Rabuhine ban Tuhan, Wembai sele nene waewae bele.

Kani yoni-yoni nemene hokonaimende,

Ware ei molonayete,

rabuhine ban Weyae na ijen bangsa mo mokowoyae naeise yakauboke.”

<sup>5</sup> Nebeisa reyae erale surgana Allahre ei mom-mom imae Allah yae isaeiwoumi homofae honole anuwau wekeunge. <sup>6</sup> Malaikat mehine bee yo bei yan beise mehine bee bele nebei imaera maibaleke. Na malo hiraikoke nda ma: lenan yolo-yolo wili halaman, nimoko ha mas. <sup>7</sup> Allahle yebaei bubaei keli nauwa obo yoku ma yo nekate nolora hi aunguke malaikat mehine beere naeise ebe emas yae mokaiboke waheumikoke. Nebei ebe einye Allah wali huba ban haei ban nekenende Kiyaele romou han rilaiikoke. <sup>8</sup> Allahre ei mom-mom imae ei Naei nene waewae bele Naei elae wake bele ongkou wae maemae koungekoke. Nebei imaere hi yae ha yae eyeisi sului mende nda malaikat mehine bee yo bei yan bei mokonaibonde baensonde.

## 16

*Ebe Mehine Bee Allahle Romou Han Bele*

<sup>1</sup> Reyae borale a kaban sele Allahre ei mom-mom imae eisa malaikat mehine beere weumi, "Emene, Allahle romou han nebe mehine beene nda kani kela ranne rilengkombe."

<sup>2</sup> Malaikat mbai nendo eke, ebe einye rambun nda kani kelare rileuboke. Nebeisa ro miyae obo yoku kiyaele iwau wae baimikoke yo nane merau na be yoi ma mokaiboke ei molowaimi yo nauwane u koukou ferewate, u nenere koi-koi ma erewaimi.

<sup>3</sup> Malaikat bee nendo ebe einya rambun naubu walaubune rileuboke. Nebei bu hare yeuboke, heratena ha nokombi wanen. Naubu na wali bele yo nanemene herewate.

<sup>4</sup> Malaikat name nendo ebe einya rambun wi yoni-yni bele rotebu yoni-yni belene rileuboke. Nebei anuwau nanemene bu hare mo yaeiboke. <sup>5</sup> Reyae borale malaikat bu yoni-yni mere ikileuboke kiyae elele,

"Allah nekeyae, nekeumekae, nene waewae Kiyae,

na ijen sele ro miyaere me noyamae,

<sup>6</sup> rabuhine ban nda yo yae Allahle holona ro miyae naei ha nane merau Allahle yenjo kayaayo naei ha mokowaimi rilewate.

Naei me u mokowate huluinye na ijen selebe Weyae nda yore mokoumbokae nda hee hane anate."

<sup>7</sup> Reyae borale hili era akau erare ongkou felate itukaisa elele,

"Tuhan Allah Elaelo Wakelo,

na hele yae nane merau na ijen mae Weyae ro miyaere me noyamae."

<sup>8</sup> Nebeisa malaikat keli nendo ebe einya rambun hu ranne rileuboke. Hu naumere elae ikeunge ro miyae nebei naumene inyukuinye hukelenate. <sup>9</sup> Ro miyae hu inyukui naumene hukelenate yo, Allah yo bei yan bei mere mokole Kiyaele robe olomo rorowainye. Naendaek mekai horo mokoumibe, nda yo namman nulu ekeiboi nane merau ahi hele Allahre hili hebenainyelere.

<sup>10</sup> Malaikat maehae mbai nendo ebe einya rambun nebei obo yoku kiyaele kendan wameran nekele ranne rileuboke. Nebei obo yoku kiyaele me kelee u keleena nekate yoni-yni bele ouben kika feleumiboke. Nebei ro miyae buhae hele kowatene, na faeu koka yae yalekate. <sup>11</sup> Nebei yo buhae katene nane merau koukou kitewatene, surgana Allahre olomo hele rorainye. Nebeibe nebei yo naei u mekai wa mekai beko mokowatera nulu ekeiboi.

<sup>12</sup> Malaikat mehine mbai nendo ebe einya rambun Efrat Wi kabanne rileuboke. Ondofolo yoni-yni enaa reufira menate naei nibibe mokounehake, nebei wi bu kemeleukoke. <sup>13</sup> Nebeisa reyae erale alaka euwara, obo yoku mbai nendo euwara, obo yoku bee nendo yendo kayaalo ame-amere kelemi kiyaele euwara, nali name hele na uwa ma hikae wanen maibaleke. <sup>14</sup> Nda yo walobolena nalire yaeiboke, rambun emere-emere mokate. Nebei nali name ekate ondofolo yoni-yni nda kani kelana nanemene arilenaimehindere Allah Elaelo Wakelo Naei ya kaban a hokoukokene felare relenainyelere.

<sup>15</sup> Tuhan Yesus yae elele, "Eren, Reyae yoko ro miyae wanen merele. Onomi fokare hubanainyende ro miyae nauware kayaa hebenende nane merau na malo na mokoisai yae mo nekende na melan mae alonnekondene ro be miyae bene na ro uwa miyae uwabe yakambonde bele."

<sup>16</sup> Anuwau mbai Ibrani afaeu wae Harmagedon, nebeinye nane nali name ondofolo yoni-yni arilaimihike.

<sup>17</sup> Nebeisa malaikat mehine bee nendo ebe einya rambun alu einye rileuboke. Reyae borale Allahre ei mom-mom imae na kendan wameran nuweler a mbai elaekei nda wanen elele,

"Nanemene na hului yaeiboke!"

<sup>18</sup> Wili bole bele, ku kaendolo bele rorole, oinyeu elaekei sele hineuboke. Nebei oinyeu elae hului nda kani kelane ro miyae nekaimake eyeiboi mo, nda naei kaban sele. <sup>19</sup> Yo kaban reu namere baikoke nane merau kani hi hi naei yo yan otowate. Allah Babel yo kabande bene nekainye. Anggur bu kolaeinye rileuboke wanen mae Allah yae Naei ikele han romou bele roroukoke nebei yore ikeumi. <sup>20</sup> Yokoba-yokoba bele elu yoi nanemene nundaiiboke. <sup>21</sup> Ya ruka es wanen woke na hekaei 50 kg yakura ruke nda kani kelana ro miyaere herauwole. Nebei yo bei yan bei ya ruka es wanen na elaekei sele molowolene, nebei ro miyae Allahre olomo yae rorowainye.

## 17

*Yoko Miyae Kaeimae Miyae Bele Obo Yoku Kiyae Bele*

<sup>1</sup> Malaikat mehine bee ebere mene ikilaikoke nolara hi raei bokore meke mo rare weufe, "Mei ndare yae, yoko miyae kaeimae miyae bu yoni-yoni ranne nekele kiyaeere Allah yae ehee bukulu yennele naei reyae kelereibote. <sup>2</sup> Na kani kelana ondofole yoni-yoni nangkele yoko kaeimae kowate. Nda kani kelana ro miyae nangkele nebei miyae yoko kaeimae kowatene, u bene beko yaeiboke, bu elae aneisiyate wanen."

<sup>3</sup> Nebeisa Allahle Roh rare aufeboke, nane malaikat rokeufele a kala-kala anuwaufe ekende. Miyae mbai eranale obo yoku hasai sele na yun mehine bee na tanduk me bee bele na moko ranne nuweuboke nekele. Nebei obo yoku uwane Allahre ro beko mokainye a homone yae molaikoke, mon ban kikai ban yeuboke. <sup>4</sup> Nebei miyae na malo haisai bele fi kolei ma bele hireukoke. Nebei malo emas yae permata yae mutiara yae kiteungeboke. Kolaei emas mbai na mene ikileuboke einye na yoko kaeimae koweke abuneweke u nenere koi-koi rambun mae niki bele yae maemae koukoke. <sup>5</sup> Na feline nda ro mbai yae molaikoke na mekai nunne honowole:

BABEL RO RANNEBOKE YO,  
MIYAE MAENGKE YOKO KAEIMAE KAIYEKE YO BELE  
NDA KANI KELANA WALI NIKI BELE NA NO NIYAE.

<sup>6</sup> Reyae nebei miyaere eranale fa hele bale, rabuhine ban Yesus Naei eleuboke wekeumi holona ro miyae Yesuslena isaeiwaimi yo naei ha rilaiboke yae mokoung nebei miyaere yun yambainyekoke. <sup>7</sup> Nebei malaikat yae weufe, "Rahene fa yae boyae? Reyae ware isaeiseibotere nebei miyae nde, nane merau nebei obo yoku yun mehine bee tanduk me bee bele na moko ranne helaukeunge kiyae nde. <sup>8</sup> Nebei obo yoku eranae, bere wali nekewole nda hee hereke, nebeibe na heki ban mo here a bulu na wauwau helera menyakambonde, nebeisa Allah yae beko ennemokombonde. Nda kani kela mokouboke heene wali hena bona yaronaikonde ro miyae na ro homofaene molaikoke. Nebei obo yoku kiyaeere benen yakambonde heene, nda kani kelana wali nekate ro miyae nane homofaene na ro omoloikoi yo fa yae bonate. Rabuhine ban na ijoko yae erenate nebei obo yoku kiyae bere wali nekewole nda hee enekei, nebeibe neyae benen menjakambonde.

<sup>9</sup> "Nda naeise isaei hebaen bele ro miyae isaeyemmibombe: yun mehine bee na mekai elu mehine bee nebei miyae na ranne angkende nuweuboke nekele. Nebei yun mehine bee nane merau ondofole mehine bee yaeiboke. <sup>10</sup> Nebei ondofole nolona maehae mbai mere ikilaiboke mokowatera ninae keraimikoke, mbai namman me ikileuboke mokoumi, na hi kayeero namman emei. Neyae mende hee ya na fofe hele me mokommikonde. <sup>11</sup> Obo yoku bere wali bele nekeukoke kiyae nda hee wali enekei, nebei niyae ondofole mehine name nendo. Neyae nebei ondofole mehine bee holone me baieboke, nare bekore mokonainyebonde anuwaufe ele.

<sup>12</sup> "Tanduk me bee ereyae nebei ondofole me bee nebeibe namman mere ikileiboi omokoi yo. Nebeibe ondofole wanen mae mere ikilenaibonde mokonaimile naeise elae wake kinyemmibonde, nda obo yoku kiyae bele nanembainye hukai mbai mere mokonaimikonde. <sup>13</sup> Nda Ondofole me bee na mekai ma harainyeboke mbainye. Nanemene elae wake bele one hengko bele nda obo yoku kiyaeere mo kinyenainyebonde. <sup>14</sup> Nda yo Domba Kelu bele felare relenainyelere. Nebeibe Domba Kelu yae nebei ondofole yoni-yonire melemmihande, rabuhine ban rowa yoni-yoni bele ondofole yoni-yoni bele nemene Neyae mbai naei Ondofole Kaban. Nebei hee Domba Kelu kaeneumikoke nane merau eleuboke wekeumi ro miyae, Naei weumi a huluinye nekate yo nangkele menate."

<sup>15</sup> Malaikat yae rare weufe, "Nane bu bele ijen weyae ijoko ereubokae ijen mbai nane yoko miyae kaeimae miyae yae nuweuboke nekele anuwau na hele ro miyae helen bolen nda holonara: kani kela yoni-yoni, afaeu yoni-yoni. <sup>16</sup> Nebei obo yoku bele tanduk me bee bele weyae ereukokae, nebei yoko miyae kaeimae miyaeere ikele konainyele. Naei rambun hononainyelere beko mokonaikonde, nare mokonainyebonde melan yembonde, nauwa melen anenaikonde, i yae relenainyebonde bende. <sup>17</sup> Rabuhine ban Allah nda yore na kena kusemmikonde na kena mbai u mbai yae Naei kenare kole ma mokonaibonde. Nebei naeise nda yo mere ikilenaibonde mokonaimilere obo yokure kinyeungeboke. Neyae mere mokommile mende Allah yae eleukoke a na hului menainyebonde. <sup>18</sup> Nebei yoko miyae kaeimae miyae ereungebokae, nebei niyae yo kaban nda kani kela ranna ondofole yoni-yoni nekatere mere ikileuboke mokoumi kiyae."



## 18

*Babel Yo Kereufoke*

<sup>1</sup> Nebeisa reyae erale malaikat hi surgara ole, elae wake kaban kinyeungeboke, na uwana i nyukui nda kani kelane hehe naeuko. <sup>2</sup> Nebei malaikat a kaban don mae kaenele,

“Kerairoke ya, Babel, rore rainyeke yo, kerairoke ya!

Nda heera walobo yoni-yni nebei yo anuwaunge nekenate

nane merau enaelo yoni-yni bele u nenere koi-koi aye yoni-yni bele uware ahaeikoke nekate.

<sup>3</sup> Nda kani kelana yo nanemene nangkele yoko kaeimae kowate aerene

u bene beko yaeiboke, bu elae aneisiyate wanen.

Nda kani kelana ondofole yoni-yni bele nangkele yoko kaeimaere kayeke

nane merau na walire keren nalere ufayeke wali mara nai hei-sei yo keren bele nale bele yaeiboke.”

<sup>4</sup> Benen reyae a hibe borale surgara elele,

“Raei holona ro miyae embalene.

Nebei eisa embale na me hila u hila mokatebe hakommikombe mokombe bele,

nane merau naei uware memminende yo bei yan bei kayeero mangkele huban-  
nekombe bele.

<sup>5</sup> Rabuhine ban na me hila u hila riyane hayayeke yakune eungeke

nane merau Naei me hila u hilare Allah bene nekeungehike.

<sup>6</sup> Allah, hiwa yore beko yoni-yni mokowoumi hului yae nare mokoinyeho,

nebei mokowolere raka bee yae beinyeho.

Naei me u mokowole bu beko wanen yaeibokere

naei kolaeinye raka bee rileinyeho anensinde.

<sup>7</sup> Naei kena ura nauware bumare kaewole

nane merau nauwa naeise kuikui maemae honainye yae eleweke.

Nauware foi hubawoungé hului yae

nare u buhae wa buhae bele kena beko u beko bele yeungele.

Rabuhine ban naei uwa naeise na hibi mo eleyele,

‘Reyae miyae ondofole, miyaenale ban.

Reyae kena beko u beko ehubasi nekerende.’

<sup>8</sup> Nebei aerene nda yo bei yan bei naei uwara na ya mbai sele mennende:

here, kena beko u beko, moni mai.

Nare inye wononde hukelembonde,

rabuhine ban Tuhan Allah mere nononde Kiyae elae wake kaban belene.”

<sup>9</sup> Nda kani kelana ondofole yoni-yni nda miyae bele yokore kaeimaere kayeke nane merau naei kuikui maemae bele mokowate nekewate yo, nebei yo i yae hukelele onskou kiteyele erenatene, kena beko u beko hubanainyele nane merau rime rimenate na rimahili bele hainyainyele. <sup>10</sup> Naei u buhae wa buhae nekeunge kole erate wanen mbai enainyehubandere fe waku konatene, nebei yo nahaufa hele hebenaihonde nda a kaenenate,

“Yei, kabekokae ya, rore rayewekete Babel elae bele wake bele yo,

rabuhine ban na hukai mbai sele ware mere nonowonde heebe yeubokene.”

<sup>11</sup> Nebei miyaele aerene nda kani kelana nai hei-sei haete yo rime rimenate kena beko nekenate, rabuhine ban hi yae ha yae benen naei rambun henate eyaroinye. <sup>12</sup> Kakai kabanda hawate rambun naise haete nda niyae: emas, perak, permata, mutiara, malo lenan, ungu, sutera kermisi, malo haisai, rambun na mane-mane o jeruk fololo bele, rambun gadingra mokate na mane-mane, o na roi bumana na mane-mane, perunggu, besi, pualam, <sup>13</sup> o elan yu bele, bumbu na mane-mane, o na onskou fololo bele, mur, kemenyan, anggur bu, minyak zaitun, tepung, gandum, sapi, domba, kuda na kereta bele, nane merau yebaei bubai.

<sup>14</sup> Naise haete yo yae nda miyaele ungainyele, “Waei kenare kowekae kombo mahu nanemene u hele yaeiboke. Hilire hebayeweke rambun yoni-yni ninae nundaiboke. Weyae benen ehubayeikoi!”

<sup>15</sup> Nebei rambun yoni-ynire naise hayeke ro miyae nebei miyaele walora keren bele nale bele yaeiboke yo naei u buhae wa buhae nekeunge kole erenate wanen mbai enainyehubande fe waku konatene, na ahaufa hebenaihonde. Neyae rime rimenate, kena beko u beko hubanainyele, <sup>16</sup> nda a kaenenate,

“Yei, kabekokae ya, rore rayewekete yo,

miyae maengke wanen mbai lenan malo maye-maye fi kolaei ma yae bele haisai bele yae hireikoyainye

nane merau emas yae permata yae mutiara yae u kamaere molayeweke!

<sup>17</sup> Nebeibe na hukai mbai yae na keren nale ninai beko yaeiboke.”

Imoli mokoi yo, bumoko ele mele yo, kai einya kalia yo, nane merau ro miyae naubu na wali rambun baiei-baiei yo, nanemene ahaufa hebenabonde. <sup>18</sup> Neyae nda yo kaban yan kaban i yae boloufike bele ongkou erenate hee, kali kaenenate elenate, “Yo hi mbai nda yo kaban wanen ehebei!” <sup>19</sup> Nebeisa nebei ro miyae kani man na yun ranne heraeinyate kena beko hubainye iwau mare, na rime bele rimenate, kena beko u beko hubainyete, nda a kaenenate,

“Yei, kabekokae ya rore rayewekete yo,

naubuna kai bele yo nanemene nda miyae naei rambun helen hawayewekete yae keren bele nale bele bewate.

Nebeibe na hukai mbai sele neyae ninai beko yaeiboke.”

<sup>20</sup> Reyae homone molale Kiyae kena ura a honanale,

“Mayae surgana yo nebei yo kereufoke aerene rei mai kon.

Mayae Yesus Naei eleuboke wekeumi holona ro miyae bele Yesusle abu ako bele Allahle yenjo kayaayo bele rei mai kon.

Rabuhine ban neyae mare beko mokoimeyembe aerene Allahlena ehee bukulu naei rande oke.”

<sup>21</sup> Nebeisa elae bele malaikat mbai ruka kaban sele mbai na kaban gandum hikinei-hikinei ruka ma hului kaeuboke naubu walaubure kaungehikera elele,

“Nebei mekai niyae elaekei sele yae kannehindene,

benende eisubayeikoi sului.

<sup>22</sup> Kecapi kulun, koi bae, suling mawayeke, amin waku wanen rambun, ranayeke bele neinye oboroiboi sele.

Rambunde na bune-bune mokate naei isaeito hebaendo mbai nebeinye ehubaikoi.

Gandumde hikinate ruka kulun benen oboroiboi.

<sup>23</sup> Isehe neinye benen enaeikoi,

miyae neme ro neme eraman bulaunge me bin me foka benen oboroiboi.

Nebei yona nai hei-sei yo nda kani kelane rore raimiyeke yo nekewainye.

Naei buloo aere mokaweke yae kani hiwa na ro miyaere ame-ame wabewaimi.

<sup>24</sup> Allahle yenjo kayaayo naei ha bele Yesus Naei eleuboke wekeumi holona ro miyae naei ha bele

nane merau nda kani kelane haikoke ro miyae nemene naei ha bele nebei yo einye hubayaeikoke aerene me nokete.”

## 19

### *Allahre Na Bumane Hele Kaemande*

<sup>1</sup> Nebeisa reyae borale ro miyae helen mae elate a wanen surgara nda a kaenate,

“Allahre na bumane hele kaemande!

Aei Allah holere moloumeboke Kiyae

na mekai sele Neyae nene waewae bele elae wake bele nekenende,

<sup>2</sup> rabuhine ban na hele yae nane merau na ijen mae Allah yae walire hului ikolowoumi.

Nebei rore rainyeke yoko miyae kaeimae miyae naei yoko kaeimae kowole yae nda kani kela na ro miyae na u bene beko mokowoumi kiyaeere Allah yae me nokeunge.

Nebei miyae Allah Naei kalia mokowate yore houkoke kiyaeere Allah ehee bukulu na mekaibe ikeunge.”

<sup>3</sup> Nebei surgana ro miyae helen mae benen kaenate,

“Allahre na bumane hele kaemande!

Nebei yore hukelele i ongkou no ban hee ban kitenende.”

<sup>4</sup> Nebeisa nane 24 yoyo koseyo bele yebai bubaei keli nauwa obu yoku ma yo bele Allah kendan wameranne nuweuboke nekele Kiyae bene be are roraiboke ei molainye wa kaenate,

“Amin, Allahre na bumane hele kaemande!”

<sup>5</sup> Nebei kendan wameranda a mbai borale elele,

“Allahle kaliare mokoyaube ro miyae Nare hubara haesa yaneyaunge yo ebimbin kaban-kaban nanemene Allahre bumane kaenne!”

<sup>6</sup> Nebeisa reyae borale ro miyae riya kaban naei a wanen, na kulun nauwala hayele bele ku kaendolo rorole bele kulun wanen a kali kaenate,

“Allahre na bumane hele kaemande!

Rabuhine ban aei Allah Elaalo Wakelo yae nda hee mere mokoumile.

<sup>7</sup> Men, eyae rei mai koma, me bin me foka boma, Nare hili hebeman!

Rabuhine ban Allahle Domba Kelu miyaere rowende ya yeuboke

nane merau na miyae neme nenaiejae nauwa mokoungehake.

<sup>8</sup> Hirengkonde naei malo lenan yolo-yolo bele wili halaman bele nare ikainyele.”

(Yesus Naei eleuboke wekeumi holona na u mekai wa mekai foi mokate malo lenan maye-mayere ahuneuboke.)

<sup>9</sup> Nebei malaikat yae rare weufe, “Nda moloiko: Ro miyae Allahle Domba Kelu miyae neme rouke eraman bulau mokombondere kaeneumikoke yo, onomi foka yae hubanainyende.” Baraungeboke weufe, “Nebei a yoni-yoni Allahlene na hele are yaeiboke.”

<sup>10</sup> Nebei malaikat noro bene reyaere be are nekale nare ei molorendere, nebeibe rare weufe, “Ae, nebei mekai omokojiae! Reyaere waeinya wanen mbai Allahle yebaei bubaei nane merau waei aka baekke Yesuslena are isaeyaimile yo bele na hului mbai. Allahre mo ei moloungelae! Rabuhine ban Yesuslena isaeyaimi a faeu nanembai Allahle Roh ro miyae walora huwate a faeu.”

### *Kuda Keleumonde Helaukeunge Ro*

<sup>11</sup> Nebeisa reyaere erale surga wekainyele. Erale bae kuda keleumon mbai yakauboke. Helaukeungele kiyae na roALLAH WEUNGE A HULUINYE NEKELE nane merauNA HELE. Buloo felane melesayeumi yore na ijen mae me noyoomi. <sup>12</sup> Na ijoko i faeu wanen, na yunde ondofole yoni-yoni naei fokoma helen feleukoke. Na uwane ro mbai molaikoke Nenaiejae mo naeisaei, hi yae ha yae isian hele. <sup>13</sup> Na malo hane yawaisikebe hireukoke. Na Ro Allah Naei a elele Kiyae. <sup>14</sup> Surgana felayo na malo lenan maye-maye keleumon sele hiraiboke, kuda keleumon randa hawaiboke, Nare hakainyekoke. <sup>15</sup> Bere neuboke Kiyaele euwara ramiyaeli mbai henengkaei sele meukuke. Nebei ramiyaeli yae kani hi hina Allahre ei omoloi ro miyae melemmihande, yanekoi yase ban mae mehukun besi mokaiboke yae nare mere mokommikonde. Anggur ani rande oratene anggur malangka inyaibonde wanen mae, Neyae Allah Elaelo Wakelo Na romou han kolene ro miyae beko mokommile. <sup>16</sup> Na malone bele noro baerene bele ro mbai molaikoke nda niyae:

ONDOFOLO YONI-YONI NAEI ONDOFOLO

TUHAN YONI-YONI NAEI TUHAN.

<sup>17</sup> Nebeisa reyaere erale malaikat mbai hu ranne hebele aye bumara nakaikoke yore nanemene a elaekei sele yae kaeneumi, “Ndane mo memarilensi, Allah yae eraman bulau kaban mokoungehakere anengkombe naeise. <sup>18</sup> Mayae na hului nda ro miyae naei melen anembe: ondofole yoni-yoni naei, fela yun-jun naei, elae wake bele yo naei, kuda naei, kudare helaukainyele yo naei, ro miyae yebaei bubaei, yebaei bubaei ban, fele-fele, kaban-kaban, nemene naeise anembere.”

<sup>19</sup> Nebeisa reyaere erale nebei obo yoku kiyae bele nda kani kelana ondofole yoni-yoni na felayo bele arilaisike kuda keleumon moko randa helaukeungele Kiyae na felayo bele felere relenainyelere. <sup>20</sup> Nebei obo yoku kiyae bele iwau mahi-mahire mokowole obo yoku bee nendo ame-amere kelewoumi yendo kayaalo kaenewainye kiyae bele na beene ikilaikoke. Na bere nebei iwau mahi-mahi mokowole kiyae yae nebei obo yokule ro uwane molaikoke ro miyae na be yoi ma mokaiboke rambunde ei molaimiyeke yore ame-ame wabewaimile. Nebeisa hokolo bee na wali-wali yae yaraikoke bumoko belerang bele i buloo-buloo benendene hayaikoke. <sup>21</sup> Nebei obo yoku kiyaele felayo hiwa nanemene, kuda keleumon moko randa helaukeungele Kiyaele euwara meukuke ramiyaeli yae houkoke. Nebei yo houkoke naei u melen aye nanemene mekate anewate, yarele u kaekae bewate.

## 20

### *Ralo Yakama 1.000*

<sup>1</sup> Nebeisa reyaere erale surgara malaikat mbai a bulu na wauwau hele naei kunci bele rame ha kaban bele na mene yaroukoke owakouboke. <sup>2</sup> Alaka nendahina rami kiyae mbai nane mbai walobo yun Setan mae kaenainye kiyae ikileuboke rame ha yae wowo koungekoke ralo yakama 1.000 fongsebungkondere. <sup>3</sup> Nebei alaka wanen kiyae here a bulu na wauwau helene kainyehike. Nebei alaka nda ralo yakama 1.000 namman ebaeisoi yae benen ro miyaere wabemmile belene, nebei a bulu na wauwau hele ahunaiboke na ranne meterai ukate. Ralo yakama 1.000 baensonde mo ya na fofe hele nekengkonde naeise, benen hainyainyekonde.

<sup>4</sup> Nane merau kendan wameran hiwabe reyaere eramaele. Nebei ranne nekate yore ro miyae hiwa naei walire hului kolonaimikonde elae kinyeumiboke. Reyaere eramaele Yesuslena a isaewaimi aerene bele Allahle ako faeuko huwaimi aerene bele na yun folowate yo naei unulube eramaele. Nebei ro miyae nda obo yoku bele na be yoi ma

mokaiboke rambun belere ei omoloi nekewate yo, na ro nomor feline mene obokoi yo. Nda yo benen maiwaleuboke ondofolo wanen yaeiboke ralo yakama 1.000 Wali Ondofolo bele nanembainye mere menaimokongkondere. <sup>5</sup> Nda niyae roko mbai nendo herewate ro miyae walenaibonde. Nebeibe ro miyae herewate yo hiwa ewaleiboi mo ralo yakama 1.000 huba fonnemokongkonde. <sup>6</sup> Ro miyae roko mbai nendo amminunde holona, na u mekai yolo-yolo hele yo, onomi foka yae hubanainyende. Here roko bee nendore neyae ehubaikoi, nebeibe Allah bele Wali Ondofolo bele Naei imam yoni-yonire inyaibonde, nane merau Wali Ondofolo bele nanembainye ralo yakama 1.000 me mokonaimikonde.

*Walobo Yunde Heraweuboke*

<sup>7</sup> Ralo yaka 1.000 baensondera walobo yun kawara hainyainyekonde. <sup>8</sup> Nebeisa ende, nda kani kela na heme keline faeungekoke nekate yo yan Gog bele Magog bele kanina ame-ame yae wabemmile arilemmile, felare roronaikondere. Naei felayo na helen naubu buhaeinya ifau mere ebaeikoi sului wanen. <sup>9</sup> Nda kani kelane forilennekonde Allahle holona ro miyae naei nekate anuwau bele Allah buhaere heunge yo yan bele yanainyeyekonde. Nebeibe yakura oke i yae nebei felayo hukelaikoke baeufoke. <sup>10</sup> Obo yoku kiyae bele obo yoku bee nendo ame-ame keleumi yendo kayaalo kiyae bele hekelaikoke bumoko belerang bele i buloo-buloo bele benende mbainye walobo yun nebei felayore ame-amere beumiyeye kiyae kanyehike. Nebei yo reniai rai no ban hee ban u buhae wa buhae nemmile konayende.

*Huba Haleungeboka Ya Me Nommionde*

<sup>11</sup> Nebeisa eranale kendan wameran kaban sele keleumon ma nane merau na ranne nuweuboke nekele Kiyae bele reyae eranale. Nda kani kela bele kun wau bele na bera nundaiboke, benen naei enate anuwau ehubayeikoi sului. <sup>12</sup> Nane merau heraiiboke ro miyae ro bele raimiyeye yo bele ro ban yo bele eramaele kendan wameran bene nanembainye hebate. Homo-homo wewe kaikoke. Nebeisa homofae hi wali hena bona yaronaikonde yo naei wekainyele. Herewate yo naei me u mokowate homone molaikoke hului yae koloumikoke. <sup>13</sup> Naubu walau buna herayeke yo bele nulu yo mahe yona ekainyekanate yo bele nanemene waleumiboke naei me u mokowate hului yae koloumikondere. <sup>14</sup> Nebeisa here bele nulu yo mahe yo bele bumoko i buloo-buloo belere hekelaikoke. Ndi bumoko i buloo-buloo bele here roko bee nendo niyae. <sup>15</sup> Wali hena bona yaronaikonde yo naei homofaene na rora omoloikoi ro miyae bumoko i buloo-buloo belere hekelaikoke.

## 21

*Surga Neme Bele Kani Kela Neme Bele*

<sup>1</sup> Nebeisa surga neme kani kela neme beungehokebe reyae erale. Surga bele kani kela bele bena ro nundaiboke, naubu walaubu u yeuboke. <sup>2</sup> Reyae erale Allahle yo yan Yerusalem neme Allahle mera surgara oke. Yerusalem neme na mekai miyae neme u kamae rileuboke na molore hubainyekondere mokoungehake wanen. <sup>3</sup> Nebeisa reyae borale nebei kendan wameranda a kaban don mae kaenele, "Eren, nda hee Allah nekele anuwau ro miyae nolone hebele.

Allah ro miyae bele wali nanembainye nekenate.

Nebei yo Allahle holona ro miyae inyaibonde,

nane merau Allah nebei yo naei Allahre yembonde.

<sup>4</sup> Neyae nebei yo naei ijoko ibo nanemene hobemmikonde.

Ro miyae benen here eheryei, kena beko okoyei, ibo inse okoi, u buhae wa buhae ehubaikoi,

rabuhine ban bena yana bewate wali mare nanemene ninae nundaiboke."

<sup>5</sup> Kendan wameranne nuweuboke nekele Kiyae yae elele, "Eren, Reyae rambun nanemene mokamaele nemere mo yaeiboke. Raei a elale homone moloiko, rabuhine ban nda a yoni-yoni na hele nane merau rabo ensalembe."

<sup>6</sup> Nebeisa elele,

"Nanemene na hului yaeiboke.

Reyae Yunani afaeunga huruf na bena kiyae Alfa bele na moinya kiyae Omega bele nekale, Hubalo Mando.

Ro miyae nde nde bukire konate yo, Reyae nondon mae walire yeumi rotebu rileungera bu isende anensinde.

<sup>7</sup> Ro miyae nde beko hubanainyelebe,

nebeibe na hibi-hibi Raei wali nibine oronayende yo nebei rambun nanemene Reyae eremiwahende.

Reyae naei Allahre isebonde,

neyae Raei kelu omire inyaihonde.

<sup>8</sup> Nebeibe ro miyae fere faeyate yo, Wali Ondofolo Naei a elelere hila rabo ehalei yo, wali niki kombu mo yo, ro miyaere hoyate yo, yokore kaeimaere koyate yo, buloo aerere mokate yo, hoime bahere ei molaimi yo, ame-ame bele yo, nanemene bumoko belerang bele i buloo-buloo belene enaisayende. Nda here roko bee nendo niyae.”

### *Yerusalem Yo Neme*

<sup>9</sup> Malaikat mehine bee maisebeuboke riyaufe ungainyehonde naei yo bei yan bei ebe mehine bee bele ikilaikoke hebate nolora malaikat mbai meke mo rare weufe, “Ndare mei. Domba Kelu na miyae neme kelereibote.” <sup>10</sup> Nebeisa Allahle Roh yae aufeboke, are weufe malaikat yae yaweufehoke elu mbai kaban sele buma hosoro hele. Nebei elura Allahle yo Yerusalem neme, Allahle mera surgara olebe rare keleufe. <sup>11</sup> Allah Naei one hengko inyukui yae nebei yo kaban yan kabande hehe naeungekoke. Na wili halaman bole permata foi sele yaspis wanen bu baembaem ma, yolo-yolo kristal wanen. <sup>12</sup> Nebei yo kaban enere yanaisoke ele kaeumau, buma hosoro, neinye romau me bee oro nen bee bele, malaikat me bee oro nen bee na kelaunge hebate. Nebei romau ranne Israel yoho me bee oro nen bee bele ro yae molaikoke. <sup>13</sup> Romau na noro kelire name name mo bukaimiboke, enaa norore name, maken norore name, hilo norore name, ifale norore name. <sup>14</sup> Nebei yo kaban yan kabande yanainyekoke ele hure ruka me bee oro nen bee bele ranne hebaimikoke. Nebei ruka ranne Domba Kelule abu ako ro yae molaikoke.

<sup>15</sup> Rare are weufe malaikat nebei yo kaban yan kaban bele na romau bele ele yanaisoke belere huluisse kolonnekonde naeise huluisse kolainye o emasra na mene rouke. <sup>16</sup> Nebei yo kaban yan kaban huba keli na koko bele na kaeu-kaeu bele na hului sului. Nebei malaikat huluisse kolainye o emasra yae raungehike bae, na koko, kaeu-kaeu, bumare, ike naeise naeise 2.200 kilometer hului. <sup>17</sup> Ele naiboke na kaeu-kaeu hului raungehike bae meter 65 hului. Ro miyae yae hului kolainye nebei malaikat hului raungehike. <sup>18</sup> Nebei yo kaban yan kaban elere bu baembaem ma permata yaspis yae naiboke, na yo yande emas hele yae mokaiboke, kaca ma wanen. <sup>19</sup> Elere naiboke aehuna rukare permata na bune-bune mokainyekoke. Nda ruka yae mokainyekoke:

raka mbai nendo ruka yaspis, bu baembaem ma;

raka bee nendo ruka nilam, hemboni nokon ma;

raka name nendo ruka mirah, fi kolei ma;

raka keli nendo ruka zamrud, bu baembaem ma;

<sup>20</sup> raka maehae mbai nendo ruka unam, coklat bele keleumon bele;

raka mehinen mbai nendo ruka sardis, coklat bele hasai bele aleibo-aleibo ma;

raka mehine bee nendo ratna cempaka, yangko-yangko ma;

raka mehine name nendo ruka beril, haye ma bele nokon ma bele alaeiboke ma;

raka mehine keli nendo ruka krisolit, yangko-yangko ma;

raka me bee nendo ruka krisopras, bu baembaem bele keleumon bele ma;

raka me bee oro nen mbai ro ruka lazuardi, naubu ma;

raka me bee oro nen bee ro ruka kecubung, fi kolei ma.

<sup>21</sup> Romau me bee oro nen bee belere mutiara mbemba naeise naeise na romau suluinye mokaikoke. Nebei yo kaban yan kaban na nibi kaban emas yolo-yolo be nulu kaca ma wanen mokaiboke.

<sup>22</sup> Nebei yo kaban yan kabande erale nebeinya Allahre ei mom-mom imae ereiboi, rabuhine ban Tuhan Allah Elaelo Wakelo bele Domba Kelu bele nebei yo naei ei mom-mom imaere yeiboke. <sup>23</sup> Nebei yo yan nolone hu bele oko bele na hehe enaeikoi, rabuhine ban Allahle u inyukui yae naeikoyele nane merau Domba Kelu Kiyae isehe wanen naemmile. <sup>24</sup> Nane merau nebei kani na ro miyae nebei hehe eisa ele mele konayende, nane merau ondofolo yoni-yoni baengko bele rambun yoni-yoni nebei yo eise roungeaimende. <sup>25</sup> Nebei yo kaban yan kaban na romau na raweiboi mo hebenende, rabuhine ban nebei anuwau huaere isian. <sup>26</sup> Kani hi hi ro miyae naei nene waewae bele naei kuikui maemae bele nebei yo eise yaronate menate. <sup>27</sup> Nebeibe u nene bele rambun eyeiboi sului nane merau ro miyae fere mokowaimi me u mokate yo bele ame-amere haete yo bele eise eyeiboi sului. Ro miyae na ro Domba Kelule wali hena bona yaronaikonde yo naei homofaene moloukoke yore mo ehe kommikonde nebei yo eise waemmihinde enayehonde.

## 22

<sup>1</sup> Nebei malaikat mbai wali yeumi wibe yolo-yolo renden sele kristal wanenbe rare keleufe. Nebei wi Allahle Domba Kelule kandan wameran neketera rileunge, <sup>2</sup> nebei yo

kaban yan kaban na nibi kaban nolore yae rileimeyele. Wi bonei-bonei reufi-reufine walire yaimi o habe hebate, ani roko me bee oro nen bee bele ralo yakama mbai mokoikoyate, oko mbai roko mbai ani mokoikoyole. Na fae yae nebeinye arilaisike, ro miyae onomi yemmile naeise. <sup>3</sup> Allah yae olomore neungeboke rambun nebei yo einye u. Allah bele Domba Kelule kendan wameran nebei yone hononende. Allahle kaliare mokate yo nebei yo yanne Naei kaliare mokonate. <sup>4</sup> Nebei yo Allah na be yoi kanenainyele nane merau Allahle ro na feline molonaimikonde. <sup>5</sup> Nebei yo yanne reniai ban, ishe bele hu hehe bele enaekoi, rabuhine ban Tuhan Allah Nauwa inyukui yae nebei yore hehe naemmikonde. Nda ro miyae yae ondofolo wanen mae huba ban haei ban hiwa yore me mokonaimiyende.

*Yesus Benen Mende Hee*

<sup>6</sup> Nebeisa nebei malaikat yae rare weufe, “Na ranne a yoni-yoni na hele nane merau rabo ensalembe. Tuhan Allah Naei Rohre weunge yenjo kayaayo walora huwemmile Kiyae, Naei malaikatre ukeunge meke Naei kaliare mokate holona yore na heki ban benate rambunde kelemmibonde naeise.”

<sup>7</sup> Eren, nana hesele bene nekenayete, Reyae na heki ban mo merele. Ro miyae nda homofaena a nuleungekokalere hakonate yo, onomi foka hubanainyende.

<sup>8</sup> Reyae Yohanes nda rambun nanemene angkaei borowale ijoko yae erewale kiyae. Nebeisa boroukokale nane merau ereukokalera malaikat nda rambunde keleufekoke kiyaele oro bene be are nekale eise molorendere. <sup>9</sup> Nebeibe neyae weufe, “Ae, nebei mekai omokojiae! Allahre mo ei moloinye! Rabuhine ban waeinya wanen mbai reyae Allahle kaliare mokate ro, nane merau waei aka baeke Allahle yenjo kayaayo bele ro miyae nanemene fomene nda homofae einya a usaei wasaeise hakoyate yo bele nane hului mbai.”

<sup>10</sup> Neyae benen weufe, “Nda homofae einye nulainyekoke a faeu nunne eherawejiae, rabuhine ban ndare inyaibonde ya nobeungekokene. <sup>11</sup> Ro miyaere nda mekai yae weumile: nde naei bekore mokonayendena, na hibi yae beko mokonayende; nde wali niki belere mokonaterena, na hibi niki bele olenayende; Allah kena kole huluinye ro miyae mokonaterena, na hibi Allahle kena hului hakonainyele; wali yolo-yolo yo, na hibi wali yolo-yolo yae nekenayende.

<sup>12</sup> “Eren, Reyae na heki ban mo Raeinya roibu bele roufemende. Ro miyae me u mokowate huluinye Raeinya roibu waheremikonde. <sup>13</sup> Reyae Yunani afaeunge huruf na bena kiyae Alfa bele na moinye kiyae Omega yeubokale, Hubalo Mando, hengkelen raufikale Kiyae nane merau hubare erensalengkonde Kiyae.”

<sup>14</sup> “Ro miyae na hului walire yaimi o ha na ani anenate nane merau nebei yo kaban yan kabande na romaufa enayembonde naeise na malo kuyaikoke yo, onomi foka yae hubanainyende. <sup>15</sup> Yo moinye nda u mekai bele ro miyae yae enainyekende: yoku u mekai bele yo, buloolo yo, yoko kaeimaere koyate yo, ro miyaere hoyate yo, hoime bahere ei moloyaimi yo, ame-amere beyatere kena kate yo.

<sup>16</sup> “Reyae Yesus, jemaat hire-hire huweumile naeise, Raei malaikatre ukanale ende nda ako faeuko ware isaeinyete. Onsi kambura ketate wanen Reyae Ondofolo Kaban Daudle orona menara faukale. Reyae Niyae rene kaukaunga hehe kabande naekoyole findelau yahei.”

<sup>17</sup> Allahle Roh bele miyae neme wainyeboke wanen Allahle jemaat bele elete, “Menne!” Borate ro miyae yae elenate, “Menne!” Ro miyae nde walire yemmile bu anensindere ki oyeungena, mai kena kaube hului me karo yae ren.

*Huba Mokoikoi A*

<sup>18</sup> Ro miyae nde nda homofae na a nulainyekokere borombondena, Reyae Yohanes nda are isaeisembombere: ro miyae nde yae nda ako faeuko barannele kiyae, nebei ro miyaere nda homofae einye yo bei yan bei molaikokebe ehee bukulure Allah yae nebei yore ennebarande. <sup>19</sup> Nane merau ro miyae nde yae nda homofae na nulainyekoke a kalo ennemolondena, nda homofaene molaikoke walire yeumi o ha bele Allahle yo neme bele nebei ro miyae naei kayeero Allah yarongkonde. <sup>20</sup> Nda are nanemene isaeiwoufe Kiyae elele, “Na hele, Reyae na heki ban merele.”

Amin, Tuhan Yesus meinye!

<sup>21</sup> Reyae ebeli banale Tuhan Yesus Allahle holona ro miyaere kena buhae aere ban mae hemmiyende. Amin.